

Fore New Testament



The New Testament in the Fore Language of Papua New Guinea

**Fore New Testament
The New Testament in the Fore Language of Papua New Guinea
Nupela Testamen long tokples Fore long Niugini**

copyright © 1974 Biblica

Language: Fore

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiiola and XeLaTeX on 11 Nov 2022 from source files dated 9 Oct 2020
df2bc6bf-8ad4-55de-aa26-7089b3e61564

Contents

FRT	1
Matiyu	2
Maka	45
Aruku	70
Yoni	115
Aposoro	146
Aroma	185
1 Korinti	203
2 KORINTI	220
Karesiya	232
Epesasi	238
Piripai	244
Korosi	248
1 Tesaronaika	252
2 Tesaronaika	256
1 Timoti	258
2 Timoti	263
Taitasi	267
Pirimoni	269
Iburu	270
Yemisi	284
1 Pita	289
2 PITA	294
1 Yoni	297
2 Yoni	302
3 Yoni	303
Yuta	304
Areberesoni	306

Mono Agowe

The New Testament in the Fore Language of Papua New Guinea

Nupela Testamen long tokples Fore long Niugini

Mono Agowe

The New Testament in the Fore language of Papua New Guinea
[for]

Translation by Wycliffe Bible Translators

© 1974 Biblica

Print publication, 1974 by Biblica

Web version
2013, Wycliffe
www.Wycliffe.org

<http://pngscriptures.org>

www.ScriptureEarth.org

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/4.0>

Your are free to share — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating**. Na tu, **yu no ken senisim Tok**.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela**.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela**.

Mono Agowe

MATIYU AOGI KAMANA KAEMARANTIYE

Wasana aboraurite kanauguna Isu aborantiye
(Aruku 3:23-38)

¹ Wasana ai'aru ai'aru aboraurite kanauguna, Isu Karaisiti aeba Abara'amuke, ae aga'nu Tebitike, isige tupisa aborantiye.

² Pigoya, Abara'amu aepisa Aisaki aboraogana, Aisaki aepisa Yekobu aboraogana, Yekobu aepisa Yutabe to a'natabarabate aborantawé. ³ Pigoya, Yuta aepisa Peresebe Sarabe aborantase. Piya, Tema yakari puwaisitantiye. Pigoya, Perese aepisa Esoroni aboraogana, Esoroni aepisa Aramu aboraogana, ⁴ Aramu aepisa Aminatapu aboraogana, Aminatapu aepisa Nasoni aboraogana, Nasoni aepisa Saramani aboraogana, ⁵ Saramani aepisa Powasi aborantiye. Piya, Areyabu yakari potantiye. Pigoya, Powasi aepisa Obeti aborantiye. Piya, Aruti yakari potantiye. Pigoya, Obeti aepisa Yesi aboraogana, ⁶ Yesi aepisa wa'ega Tebiti aborantiye.

Pigoya Tebiti aepisa Soromoni aborantiye. Piya, Yuraya nkanarimpa yakari potantiye. ⁷ Pigoya, Soromoni aepisa Ariyabomu aboraogana, Ariyabomu aepisa Abaisa aboraogana, Abaisa aepisa Esa aboraogana, ⁸ Esa aepisa Yiyosapati aboraogana, Yiyosapati aepisa Yoramü aboraogana, Yoramü aepisa Asaya aboraogana, ⁹ Asaya aepisa Yotamu aboraogana, Yotamu aepisa Eyasi aboraogana, Eyasi aepisa Esekaya aboraogana, ¹⁰ Esekaya aepisa Manasa aboraogana, Manasa aepisa Emosi aboraogana, Emosi aepisa Yosaya aboraogana, ¹¹ Yosaya aepisa Yekonayabe a'natabarabate aborantawé. Piya puguni, Yuta kinapa Pebironi mari iraku'ma ibabute wanta, pi kanabi aborantawé.

¹² Pigoya, igeba Pebironi umintuguna, pi'ná aka'i Yekonaya aepisa Siyatieri aborantiye. Pigoya Siyatieri aepisa Serababeri aboraogana, ¹³ Serababeri aepisa Abayati aboraogana, Abayati aepisa Erayakimu aboraogana, Erayakimu aepisa Eso aboraogana, ¹⁴ Eso aepisa Seroki aboraogana, Seroki aepisa Ekimu aboraogana, Ekimu aepisa Eriyati aboraogana, ¹⁵ Eriyati aepisa Eriyesa aboraogana, Eriyesa aepisa Matani aboraogana, Matani aepisa Yekobu aboraogana, ¹⁶ Yekobu aepisa Yosepe aborantiye. Aeba Mariya awaentana puntiye. Aibogana, Mariyaba Isu yakari potaogini, ae ageba: Karaisiti, Koti utaratanta yagarawé, untawé.

¹⁷ Aborantapa pipa mayamawé: Abara'amu aepisa agobima aborata kanauguna Tebiti aboranti, pi a'waipa 14 puntiye. Piya, Tebiti aepisa aboraurite kanauguna Yuta kina Pebironi mari ibabute wanta, pi a'waipa pabiyama 14 puntiye. Piya, pi kanabis aboraurite kanauguna Karaisiti aboranti, pi a'waipa pabiyama 14 puntiye.

Mariyaba Isu yakari potantiye
(Aruku 2:1-7)

¹⁸ Isu Karaisiti aboranti, pi agowapa mayama waintiye: Mariyaba Yosepeka maekiyema utatauguna, kampa atokaema isiyota isiyota puma mintusuguna, Aota Awamus'a'ama Mariyati tumima ao'maeeyogana yagara aga'e pogini agantawé. ¹⁹ Piya pogana, kana utatanta yagara Yosepeba arupu yagara miyomeka mayama napintiye: Naeba kamana'wa pagusama otakana ani pusanaga uwa kakamagi kaikuwema, napintiye. ²⁰ Piyama napima mintogana, Wa'egawamatisa enisore ka'waina amonta tumpa patama maya omintiye: Yosepe, kaeba Tebiti ntgararamaga, wayaka Mariya maekenagaba karuba a-po. Yagara aga'e pemipa, pipa Aota Awamus'a'ama esegi potama aboramiye. ²¹ Pigoya, masinto yakari potakanaba, ae ageba: Isuwe, pipa kamanatepisa Tau'ikena yagarawé, omo. Piya, aeba aokina'wapa aguntaenawaipisa l'ima aogi puwaitakiye.

²²⁻²³ Pigoya a'ya'waemaena aborantikaná, paipa poropete ka'waina Wa'egawama nkawamutasa maya kamana untiye: Abiyo. Age'aragawae ka'waina aga'e pumagina, masinto yakari pekiripa, agewapa Imanuweriwe ukibewe. Pipa kamanatepisa: Kotiba taege mintiye ukibewe, untiye. Poropete piya kamana unti, pi au'wa aborantiye.

²⁴ Pigoya, Yosepeba awaibintisa aogamagina, enisorewama kamana omome pi wasimagina, anarimpa kayone potama ababuntiye. ²⁵ Pigoya, waya'waenaba kampa puma mintusuguna yagaraba aborantiye. Piya pogana, Yosepeba ae ageba: Isuwe, omintiye.

2

To marisa abinta kina'mi ampa Isu agantawé

¹ Pigoya, Eroti pi mparasa wa'ega yagara mintogana, Isu aeba Petariyamu kumata Yutiya mara aborantiye. Pigoya pi kanabipa, pa nkirosa'mitisa to marisa nori aisuma

aganta kina'mi Yerusaremi kumata ampa irosa'ma, ibigama maya untawe: ² Yuta kina tige aoso Wa'ega ae kumata aboraye. Taeba maroti maretisa yakari potanti noriwa agategi, ampa ae agisabi parokaema ta'mu potakena kanaune, untawe. ³ Piya Yuguna, wa'ega yagara Eroti abima pами pogini, a'ya'ma Yerusaremi kuma ago kina igebe pами puguna, ⁴ Eroti aeba a'ya'ma tabe mono kiye kinape mono tisa kinape igebe'e yogini aki puguna: Karaisiti yagaraba, ae kumata aborakiyema untanema, ibigaogini, ⁵ maya omintawé: Yutiya mari Petariyamu kumatane. Pika Kotitisa kamana abima uwaimikena poropete ka'waina mayama kaemarantiye:

⁶ Petariyamu kuma Yuta mari, kaeba Yuta kuma ai'né tuminta kumapa kampaye, iye. Kaeftisa kiya yagara ka aborama, Isureyo naokina kabiwaitakiyema, kaemarantiye untawe.

⁷ Piya Yuguna abite, Eroti abira nori aisunta kina ibira igebe'e umagina, pi nori aborantika pasema ibigaogini omuguna: ⁸ Petariyamu kumati waiyema, uwaitama maya untiye: Tigeba wama esegima uma aguyosa'ma, kana yagaranto aboratate kanama unamigi, pabiyama naeba wama na'mu potamagi agisabi parokaekuwe, untiye. ⁹ Kana wa'ega yagara yagara piya uwaimogini abite wantawé. Ke'i wantini maroti mawaitisa nori aganta, pipa pabiyama to kake aboraogini agaurite wauguna, kana yagaranto mintome ntamankama abobora esegima waintantiye. ¹⁰ Piya pogini, igebe nori agate tabera i'muntanaba puntawé. ¹¹ Piya pumagini, namapinti ima yagarantobe anowampa Mariyape isigama, irakabima ae ageba asaga'yuma, kotawaipisa i'muntanaba maema aisa potamagini, kori yabape, aogi agunta kagupe, tusa masawaeppe amintawé.

¹² Piya puguna, Wa'egawama amonta paitama akayuwaitaogini, igebe Eroti kampa a'wae puma wanta, to ki'wama mawaii wantawé.

Yosepege Mariyage Isu ababute Isipi mari wantase

¹³ Pigoya igebe a'wae puma wauguna, Wa'egawamatasa enisore ka'waina Yosepe amonta patama, kamana maya untiye: Kaeba asima, yagarantobe anope isibabute Isipi mari tiyegaka wama, nae kamanaka agawa puma miyivo. Abo. Eroti aeba yagaraga aguyosa'ma aegukena piya, ababute wagaso, omintiye. ¹⁴ Piya omogana, Yosepeba asima yagarantoke anoke isibabute aseka Isipi mari pai'ma wamagini, ¹⁵ pita'i umintuguna Eroti purintiye. Piya, poropete ka'waina Wa'egawama nkawamupisa kamana maya untiye: Yagaranepa Isipi mari mintaka, kega'e yekana pita'isa kanakiye. Pi kamana'ama esegi puntiye.

Eroti uwaitaogini inamu ntagara iyeguntawé

¹⁶ Pigoya, nori aisunta kina igebe Eroti ikabitate wauguna, agowa abite agobipa tabera puntiye. Piya pumagina irebu kina uwaitaogini, igebe wama Petariyamu kumatasabe awamori kuma'antontorasabe, masi yagara kabowaiipa tara kampa punta yagara, igebe a'ya'ma iyeguntawé. Pipa nori aisunta kina ige iwamupisa kana yumesa puma, pabi kana yagara iyeguntawé. ¹⁷ Pigoya, pika poropete Yeremaya kamana maya unti, pi'na esegi puntiye:

¹⁸ Arama kumatasabe ka kamana abogini, tabera intara'ena puma kube'ena puguni abewe, iye.

Areseriba araga yagarawa aegugasumeka iguyosakate tabera kube'ena pekini, aurikena pugagate atakibewe, piya unti'na esegi puntiye.

Yosepebe waya yagarawampabe a'wae puma kanantawé

¹⁹ Pigoya, Eroti pu'waogana, Yosepe Isipi mari miyogana, Wa'egawamatasa enisore ka'waina amonta patama maya omintiye: ²⁰ Yagara aegukena punta kinapa ago pu'wawe. Kaeba asima, yagarantobe anope isibabute Isureyo mari waiyoma, omintiye. ²¹ Piyama omogana, Yosepeba asima yagarantoke anoke isibabute Isureyo mari wantawé.

²² Pigoya, Akereyasi aeba abawampa Eroti mparupa maema Yutiya mara kabinti, pi kamanapa Yosepe abitegina, pita'i wama umikenagaba karu puntiye. Piya pogana, Wa'egawama amonta ki'isa kamana uma aboramogana, pimpa atate Karariya mari wama, ²³ ka kumapa, agewapa Nasareti, pita'i wama umintantiye. Piya, Karaisitika poropete kina'mi: Ae agewapa Nasareti yagarawake ikibewe, unta, pi'na esegi puntiye.

3

Yoniba mono yugawa agobintiye

(Maka 1:2-8; Aruku 3:1-18; Yoni 1:19-28)

¹ Pigoya pi kanabipa, Yoni wani pai'itanti ntagara, Yutiya mari aborama ka'me mpari umima, mono maya untiye: ² Koti kabiratakenaena agarosaya, aguntaenaripa kaite tigu a'wae piyo, untiye. ³ Pigoya, pi ntagaraga poropete Aisaya maya unti, pipa aborantika:

Awaga kamana ikena yagara ka'me mpari mima, kega'e uma mayama aboraye:
Wa'egawamanta ke i'ma arupu puma amuyena piyo, piya untiye.

⁴ Pigoya, Yoniba kaiwapa kamoro yaga ayatasa pumaranta, pi ami u'magina, arirasa kante puma abamu kimagina, nanintawapa iroke tuke nama mintantiye. ⁵ Pigoya, Yerusaremi kumatisabe Yutiya marisabe Yontani waninkama maroteri materi miyume kinape, a'ya'ma aeti wawaentawe. ⁶ Piya pumagini, aguntaena pume kamana'waipa uma aborauguna, Yontani anomppai pai'itantiye.

⁷ Pigoya, uwoma Parasi kina'mibe Sarusi kina'mibe mono wanika irosauguna, Yoni igate maya uwaimintiye: Tigeba kuya awarorawe. Kotitisa amo'ena aborarimekiri kakagaisanaga kebaya urimegiri mata'i kanawae. ⁸ Tigeba aguntaenaripa kaitegiri tigu a'wae pigina, mono a'wapa aboraigiriba, wani kanara maekibewe. ⁹ Pigoya, ti maete ikenaba a-puma: Taeba Abara'amu nkaga'nuraga aogima mikunemagiripa, a-siyo. Pabigo urimekiri abiyo: Kotiba ma ntatabatas Abara'amu nkaoso aga'nugi iba pikenaba agantiye. ¹⁰ Piya, ya agaiyukena tupa ya agobi atantiye. Pi ntawama a kampa aogima ayanakana agaiyuma yakupi kaekiye, Yoniba meto kamana piya untiye.

¹¹ Piya untanta to maya untiye: Naeba tigu a'wae piyoma wanitasa paititauwa, naka'i kanakibi ntagara, agewapa asunagasima waintika, naeba mayamanaba agisa anapa kampa arakae potakuwe. Pi ae Aota Awamusatasabe yakutasabe paititakiye. ¹² Aeba aka maete kanama, witi naninta ampa aigaga pumagina, anonkapa namapi atantana, ariwapa tayaba yakupi kaegaikiye, piya untiye.

Yoniba Isu wani pai'atantiye

(Maka 1:9-11; Aruku 3:21-22)

¹³ Aibogana, Isu aeba Karariya marisa Yontani waniti kanama, Yoniti aborama: Mono wani pai'natanema, omintiye. ¹⁴ Pigoya, Yoniba abitegina kunta puma maya untiye: Ayamabaya kaeba naeti ampa piyama yene. Kaeba nae pai'natagana kanara pikiye, untiye. ¹⁵ Piya yogana, Isuba kamana mayama a'wae puma omintiye: A'a-o, ibaba pai'natao. Piya pekara, tasigeba Koti kamana aogima wasikuse, untiye. Piya yogana Yoniba abitegina pai'atantiye. ¹⁶ Pigoya, Isupa pai'ataogana aeba Yontani wanipintisa iyogana, manta kabi a'waiyogana, agaomepa Koti Nkawamusa'ama pupunta kanta purite aeti tumpintiye. ¹⁷ Tumpintogana, mantabintisa kamana ka maya untiye: Mepa nabugai ntagaranene. Tabera na'mu potauwe, untiye.

4

Kewama Isu amiyo puntiye

(Maka 1:12-13; Aruku 4:1-13)

¹ Pigoya, Awamus'a'ama Isu ka'me mpari ababute wama, kewama amiyo potakenaga ababute wantiye. ² Pigoya, Isuba pita'i nanintaga a'a-o uma, 40 yaga uwa miyogana aga'ena abuntiye. ³ Piya pogana, amiyo pikena agowama aeti aborama maya omintiye: Kaeba Koti Ntagara mintanapa, yegana ma ntabankama paretyena pekana nao, untiye. ⁴ Piya yogana, Isuba antota maya untiye: Mono isa'ama maya iye: Wasanama nanintarasa kampa a'ya'ma esegiyenawapa maekiye. Koti nkawamupisa mono pi abima esegiyenaba maekiye iye, untiye.

⁵ Piya yogana, kewamaba Isu Yerusaremi kumati ababute ima, tabe mono nama nkagari mesutama, ⁶ maya omintiye: Kaeba Koti Ntagara mintanapa, pa'yo puma tumo. Piya, mono isa'ama maya iye: Koti aeba enisore kina'wa uwaitakin kabigatakibewe, iye. Piya, kaegukena pikibipa, iyatasa kababute tumigina, yabankamaba kagisaba kampa airisakiye iye, untiye. ⁷ Piya yogana Isu maya omintiye: Pigoya, mono isa'ama to ka maya iye: Wa'ega Kotigapa amiyo puma agakenaenaba a-po iye, untiye.

⁸ Piya yogana, kewama to ababuma e'ero nkamuti ima mesutamagina, a'ya'ma mam-pabisu kumape igaenabe ayakimagina, ⁹ maya omintiye: Nae nagisabi ampa parokaema nageba asagayuyegapa, a'ya'waema waintantana kamiwaekuwe, untiye. ¹⁰ Piya yogana Isu mayama omintiye: Satani, kaeba natate wagaso. Mono isa'ama maya iye: Wa'ega Kotigapa, ae age asagayuma, ae abiwa kayokaya'ena potao iyema, omintiye.

¹¹ Piya omogana kewama atate waogini, enisore kina igeba irosa'ma aogima kabitantawe.

Isu Karariya mari wama mono yuga agobintiye

(Maka 1:14-15; Aruku 4:14-15)

¹² Pigoya, Yoni araku'ma iga'na namapi atauguna mintogana, Isuba pi awaga kamana abitegina, pimpa atate Karariya mari wantiye. ¹³ Wamagina Nasareti kumapa agaite Kapaniyamu kumati umintantiye. Pi kana kumapa kotu awamori, Seburonige Napitaragaige

isiga'nu mpara umintantiye. ¹⁴ Piya pogana, pintanaga poropete Aisaya maya unti, pipa au'wa aborantiye:

¹⁵ Seburonige Napitarage isige mari, kotu awamori, Yontani waninkama maroteri waintipa,

To marisa kina'mi ampinta mpa, Karariyawa,

¹⁶ Pita minta kina'miba tununtanabi miye'nagiba tabe e'wasaena agawe, iye.

Piya, purikena puma miye kina'miti e'wasa aboraye, piya untiye.

¹⁷ Pigoya, pi ntagaba Isuba agobima mono untana, maya uwaimintiye. Koti kabiratak-enaenaba agarosaya, aguntaenaripa kait tigu a'wae piyo, piya uwaimintiye.

*Tarawa tarawaki kina igega'e yogini aegarantawe
(Maka 1:16-20)*

¹⁸ Pigoya, Isu aeba Karariya kotu awamori wama nasi nasi puntana, tara yagarara isigaomepa, kapa Saimoni to agiwapa Pitabe, a'nantowampa Enturube, isigeba inoyanta aebusume ntagararaginisi, kotupinti kuko aibarekima wanipinti motausuguna, uma isigantiye. ¹⁹ Piya uma isigate maya uwaismintiye: Naegaraiso. Inoyanta aeyamesa puma wasana iba pikenaena tisiyakikuwe, uwaismintiye. ²⁰ Piya uwaismoginisi, pabigo kuko'waisipa atate aegarantase.

²¹ Aubusuguna, Isu to nasi nasi puma to tara yagarara isigaomepa, Sepeti ntagara Yemisige a'nantowampa Yonige, isibawaisimpa Sepetige wanipisa karebi mima, kuko aogi puma mintuguna, ampa isigantiye. Pigoya, Isuba isigega'e yoginisi, ²² isibawaisimpa pabi wanipisa karebi atate, Isu aegarantase.

*Isu uwoma kina'miti yoga puntiye
(Aruku 6:17-19)*

²³ Pigoya, Isuba Karariya mari ainkima nasi nasi puma, ini namankaipinti ima mono kamana umagina, Koti kabiratakena kamanapa uwaimagina, yoni kinape i'ama kampa aogi punta kinape kaba itantana puwaentiye. ²⁴ Piya pogana, awaga kamana'ama Siriya mari abae purite wagana pogini abite, yoni kinape, iki nakiyen ibome kinape, ke kina intabaipinti minta kinape, aonanta puma ware'naowa pume kinape, kebo kinape, aeti a'ya'ma ibabute wauguna aogima kaba itawaentiye. ²⁵ Piya pogini, Karariya marisabe, Tekaporisi kumatisabe, Yerusaremi kumatisabe, Yutiya marisabe, Yontani maroteri materisa tabe uwoma kina aki puma aka'i wantawae.

5

*Isu amuti mono uwaimintiye (Au'wa 5-7)
(Aruku 6:20-23)*

¹ Pigoya, Isuba uwoma kina igate, amuti ima asu mintogini, abagi kina'wa agora wauguna, ² mono maya uma uwaimintiye:

³ Igu'amaka abegana kusi miye kina, igepta Koti kabiwaitakini i'muntanabi mikibewe.

⁴ Intara'enabi miye kina, igepta mantarasaena intawama asoyaena pekini, i'muntanabi mikibewe.

⁵ Agoya puwaita kina, igepta aintiba aogi kumapa maema mimagini, i'muntanabi mikibewe.

⁶ Iga'ena ibemi kina, igepta naninta wanika ibemisa puma Koti nkarupuyena ibemi kina, igepta aintiba iga'e pakini i'muntanabi mikibewe.

⁷ To kina'mika intara pe kina, igepta aintiba Koti antara puwaitama iyo'maeyakini, i'muntanabi mikibewe.

⁸ Aguntaena kampa napiye kina, igepta aintiba Kotipa agamagini i'muntanabi mikibewe.

⁹ I'ima paru puwaita kina, igepta Kotiba: Yagara araganene uwaimekini, i'muntanabi mikibewe.

¹⁰ Arupuyenarakarana puwaitagini miye kina, igepta Koti kabiwaitakini i'muntanabi mikibewe.

¹¹ Pigoya, naeka wasanami kamparaga kamana uritama, karana puritama, agunta kamana uma kumpari uritagiripa, aintiba ti'muntanabi mikibewe. ¹² Piya, tigepta aintiba aogi ikantanaripa mantariba taberaka'yane. Pika ti'mu puma tinta asoya puma miyoyo. Paipa wasanami poropete mintanta kinapa pabiyama karana puwaitantawae, piya untiye.

*Wasanaba kayoge kaneke waiyemisa puma miyeno
(Maka 9:50; Aruku 14:34-35)*

¹³ Tigeba wasana ikapi mimagiri, kayo kanta puma mintawe. Pigoya, kayo i'nisama kasigabekapa, aya pekana to kake asabama iga pikie. Pipa kampaye. Piyaena pikenaba kampa waintkiye. Uwa asunu kaegasagini, wasanami pita'i nasi nasi puma aeyese pewe.

¹⁴ Pigoya, tigeba wasana ikapi kane kanta puma mintawe. Piya, kuma ka amuta abora waintakanaba, asekapa e'wasaenawapa a'ya'ma wasanamiba agakibewe. ¹⁵ Pigoya, ka'waina kane igi'magima kampa kankabe maema airari kaetantana, marunkata igi'ma atakana, nama nkantabaiinti e'wasaba a'ya'ma kina puwaitakiye. ¹⁶ Tigeba etimpaba pabiyama wasana e'wasa puwaitano. Igeba aogima mikenaenari agaigina aogi pekini, mantari tibarimpa nkage asaga'yuyewo, piya untiye.

Paisa mono kaikenaba kampa aborauwe, Isu untiye

¹⁷ We, paisa ago kamanape poropete kina'mi kamanape kaikena aborantiyeba, naekaba a-siyo. Naeba kaikenaba kampa aboramagi, naeba to wasima abae pikenaba aborauwe. ¹⁸ Naeba taga urimekiri abiyo: Mage mantage waiyemisa puma, Koti nkago kamanapa uwa waikiye. Ka awa'enaba kampa kakawakibikana, uwa waikiye. ¹⁹ Pigoya, wasana ka'waina Koti unti kamana ago uwaenanto ka kasimagina to kinakaba: Piyama kasiyema uwaimikibi'naba, ae ageba uwaenanto Koti kabiratakibi nttagaba waikiye. Piya, ka'waina aeba a'ya'ma wasimagina to kinakaba: Piyama poma uwaimikibi'naba, aeba pabiyama Koti kabiratakibi nttagaba tabe yagara ima mikiye. ²⁰ Pika urimekiri abiyo: Arupuyenarimpa kampagina mono tisa kina'mige Parasi kina'mige arupuyenawaimpapa igaikipipa, aintiba tigeba Koti kabiratakenaenabipa kampa uma pasikibewe, piya untiye.

Igobi pikena kamanane (Aruku 12:57-59)

²¹ Pigoya, tayabamagi kamana maya uwaimintiye: Kaeba wasanaba a-nkaeguma kaiyo. Ka'waina wasana aeguyekiripa, kamana abikena kina'miti ababute wama metaiyo, paisa kamanapa piyamagiri abewe. ²² Piya, naeba to urimekiri abiyo: Ka yagaramaba ao'yagaraga agobi potakanaba, pika kamana abikena kina'miti ababute wama kamana otakiye. Pipa kanarane. To waina aeba ao'yagaraga kamparaga kamana uma: Kani po omekiniba, ababute kanisore kina'mi akiyenabi metakibewe. Piya, to ka'waina aeba ao'yagaraga: Aibo yagaragawe omikibi'naba, a'abibintisa yakupi wao, omikiye. Pipa kanarane, piye untiye.

²³ Pigoya, kaeba ka'muntana tabe mono namapinti maete ikena puntanapa: Nao'yagaramage kamanatesi waintkiye, piyama napintanapa, ²⁴ pabigo ka'muntanaba arata agora atate tumima, wama kao'yagaramage kamanatisipa uma aogi pugaite, a'wae puma ima ka'muntanaba Kotiti aratarapa mesutaganana aogi peno.

²⁵ Pigoya, tigetisa ka'waina kamana ugatakanapa, kamana abikena kina'miti kampa uma irosanta ke'i wantrisi, ni nttagaramage kamanatisipa uma aogi piso. Piya kampa pikibempepa, ugatakibi nttagaramaba karu'ena abikena kina'miti wama agoga yekana, abikena yagarama irebu kina'wa uwaitakini, iga'na namapi katakibewe. ²⁶ Naeba taga ugamukuwa, abo. Kaeba pi nkiga'na namapi mintanapa, uwaba kampa irosa wakibene. Aintiba iretaba amima a'ya kaite, wakibene, piya untiye.

To wae kuntana paibikena kamanane

²⁷ Pigoya, kamana paipa maya uwaimintine: Kumiyenaba a-po. Pi kamanapa abintawé. ²⁸ Pigoya naeba urimukuwa, abiyo. Ka yagarama to wae ka'waina agama agabakibipa, ae aumawama Koti nkaobi ago ata puma kumiyenaba potaye. ²⁹ Pigoya, ka kaowama aguntaena pikena pekanapa, pi'ma maebugaso. Tarayaga kao waintakanapa kaeba a'abibinti tumisanaga, aogima kabiy. ³⁰ Kayatakantisa aguntaena pikena pekanapa, arisa'ma maebugaso. Aogi kienayaga waima kaeba a'abibinti tumisanaga, aogima kabiy, piya untiye.

Waya kaikena kamanane

(Matiyu 19:9; Maka 10:11-12; Aruku 16:18)

³¹ Pigoya, paipa to kamanapa mayama uwaimintiye: Ka'waina waya'wa kaikena puntanaba, kaikena awa'ena amimagina otano, untiye. ³² Pigoya, naeba urimukuwa, abiyo. Ka'waina waya'wampaba kupyonaba kampa puntakana uwa kaikibipa, aeba ata potakana, karu'ena kumiyenaba pikie. Piya, to ka yagarama kainta wae maekibipa, aebé kumiyenaba pikie, piya untiye.

Koti nkaobi uma esegi pukena kamanane

³³ Pigoya, tayabamagi to ka maya uwaimintine: Kaeba Koti nkaobi atamaba kumpari kamanapa uma esegiba a-po. Piya, ae aobi uma esegi pumaba wasiyegana, au'wa aborano, untiye. Pi paisa kamanapa piyamagiri abewe. ³⁴ Naeba pika urimukuwa,

abiyo. Koti nkaobi uma esegi pentanaba ataiyo. Piya, mantara uma esegiba pipa a-piyo. Mantaba pipa Koti nkaemu yabaewe.³⁵ Piya, mara uma esegiba pentanaba pipa a-piyo. Maba Koti nkagisa aema miyemi mpawe. Piya, Yerusaremi kumata uma esegiba a-piyo. Yerusaremiba tabe Wa'ega Yagarama kumane.³⁶ Piya, ti'no nkabiyata uma esegiba a-piyo. Tigeba antugu ti'nun kabiya yema ka omigina, tunu pikibera, to ka omigina wae'wae pikiyo. Pipa kampaye.³⁷ Pigoya, pika kamanatipa tagaka owe uma, pabiyama aegaraiyo. A'a uma, pabiyama aegaraiyo. To nara uma esegi pukibepa, pi kamanapa ke kinapisa aboray, piya untiye.

Antota'enaba kampa pikena kamanane
(Aruku 6:29-30)

³⁸ Pigoya, paipa kamana maya untine: Ka'waina kaoga airikakanapa, antota airikao, iye. Piya, kawa aibarara pekanapa, antota aepa pabiyama aibarara po, untine. Piya kamana abintawa,³⁹ pika to kapa naeba urimukuwa, abiyo. Tiyeguma karana titakena pigiripa, antotapa a-nkataenaba puwaitaiyo. Pika ka'waina katamara kaeguyekanapa, to ka auka'i a'wae puma amo.⁴⁰ Piyamaba, to ka'waina kae kamana ugatamagina siyotiga maeyakanapa, mu'mu siyotigapa kaga amo.⁴¹ Piyamaba, ka kiye agarao k'i'i nababute waoma ugamekanapa, kaeba e'ero k'i'i ababute wama ao'maeyo.⁴² Piyamaba, to ka'waina ka'enaga esugatakanapa, amo. Piya, a'y'o ukatakena yekanapa, owe otao, piya untiye.

Kama kina agu kao'ena pikena kamanane
(Aruku 6:27-28, 32-36)

⁴³ Paisa kamana ka mayama waintiye: Kaeba kaokina agu kao'ena potentana, kama kinakaba kagobi potao, untiye. Pi kamanapa abintawé.⁴⁴ Pika naeba urimukuwa, abiyo: Kama kinatipa agu kao'ena puwaitantiri, karana purita kina igecka napima nunamu yiyo.⁴⁵ Piya puntiripa, mantarisa tibarimpa ntagaraena puma mikibewe. Piya, Koti aeba yegin, pankamaba agunta kinape aogi kinape kaga e'wasa puwaitaye. Pabiyama yegin, kaba arupu kinape antage kinape kaga kanara tiyeye.⁴⁶ Tigeba agu kao'ena purita kina, ige'amana agu kao'ena puwaitaiginaba, aintiba aya iretaripa Kotiba timikiye. Pipa kampaye. We, takisi maenta ku kina'miba piyaba puwaitawé.⁴⁷ Piya, to marisa kina'miba iyokina aogi puwaitawé. Tigeba pabiyama tiyokinapa aogi puwaitantiripa, ayama igaikibewe. Pipa kampaye.⁴⁸ Abiyo. Tigeba mantarisa tibarimpa aota miyemisa puma, pabi nkawameta miyiyo, Isu piya untiye.

6

Wasana iyo'maekena kamana untiye

¹ Tigeba aogima kabiyiyo. Aogiyena puntiripa, tipa wasanami nkiyobipa a-mpaete iyivo. Piya pukibepa, mantarisa tibarimpatisa ka ikantanaba kampa maekibewe.² Tigeba wasana kao'ena puma awagaena puwaitantiripa: Ka'isa kina'mi tagama i'mu purataiyemaba, taberasaba a-kega'e yiyo. Piya, kumpari mono kina igeba ini namapipe uwa ke'ibe: Tage maete ima i'mu puratayema, wasana kao'ena puwaitawé. Naeba tagaka urimuwe. Piya kina'miba wasana i'mu puwaita nkikantanawaipa ago maerekana, aintiba toba kampaye. Ige pesa puma a-piyo.³ Pigoya, kusi kina kao'ena puwaitaganaba, ka kaentisa kina'miba pukibintanaba to kaentisa kina'miba a-ankabiyo.⁴ Piya pegana, kao'engampaba kakama waigatagina, kabagampa a'y'a'maena kakama waintintana agamagina, antotapa kamikiye, piya untiye.

Nunamu ukena kamanane
(Aruku 11:2-4)

⁵ Pigoya, tigeba nunamu ukena puntiripa, kumpari kina'mi yesa pumaba a-siyo. Pi kina igeba ini namapipe ke'ibe nunamu yepa, pipa: Wasanami tagama i'mu purataiyema, piyaba pewe. We, naeba tagaka urimuwe: Piya kina'miba au'wapa ago maentaka, toba kampa maekibewe.⁶ Piya, kaeba nunamu ukena puntanapa, namakapinti ima kabe kitama kabagampa kakama miyemi'na aeti nunamu yo. Piya pegana, kabagampa kakama agamagina, antotapa kamikiye.

⁷ Pigoya, tigeba nunamuba uwa tiwamutasa urite wagana pumaba a-siyo. Pipa to marisa kina'mintanawé. Pi kina igeba uwoma kamana aisurite wagana pekana: Koti abiramikiyema, yewe. We, pipa kampaye.⁸ Tibarimpapa kampa esotantagana, aeba agoripa ago abiwaeyagiri, tigeba ige yesa puma a-siyo.⁹ Pigoya, tigeba maya uma nunamuba yiyo:

Taba, mantabinti mintane. Kae kage aota waiyeno.

¹⁰ Kae kabiratakenaenagapa aborawaeyano.

Mantari kae kawamu aega'ma wasikenaena waintemisa puma, pabiyama mabi taeti aborano.

¹¹ Ibaba kaeba nanintarepa tae awameta tamo.

¹² Tao'mi kaintanawai nkatupa mae igasompe nkawameta kaintanare nkatupa maera-gaso.

¹³ Tamiyo pusanagaba aogima kabiratao.

Kewama nkayapisa taba puratao, piya nunamu yiyo, untiye.

¹⁴ Piya, tigeba wasanami nkaibo'enawaipa kasiginaba, mantarisa tibarimpaba pabiyama tige'enaba maerigaikiye. ¹⁵ Piya, tigeba wasanami nkaibo'enawaipa kampa igasiginaba, tibarimpaba aibo'enaripa pabiyama kaga kampa maerigaikiye, piya untiye.

Naninta a'a-o uma mikena kamanane

¹⁶ Pigoya, tigeba monoka naninta a'a-o uma mintiripa, tiyowa muruse puma a-mpiyiyo. Piya, kumpari mono kina'mi ige piya pegana, wasanamiba ige naninta a'a-o uma miyentanawai igabebe piyema, iyowawamaba ataena pegini miyewe. Pigoya, ige pesa a-piyo. Naeба tagaka urimuwe: Igeba ikantanawaipa ago maentane. ¹⁷ Piya, kaeba naninta a'a-o uma mintanapa, ka'noti masawae pai'ma kaowaena po. ¹⁸ Piya pegini, wasanamiba naninta a'a-o uma miyempentanama nkagogopa kampa agabebe pegana, kabagampa kakama miyemi, ae abintowa abeno. Piya pegana, kabagampa kakama agamagina antotapa kamikiye, piya untiye.

Aogiyena maema aki pikena kamanane

(Aruku 12:33-34)

¹⁹ Pigoya, tigeba mampabi a'ya'maena aogiyenaba a-mpaema aki piyo. Kampaye. Mampabipa umuwama narigagina kasipama ataena pegina, ku kina'mi agasaba'ma kuntana pewe. ²⁰ Piya, tige'ena aogiyenaripa mantari aki piyo. Pita'iba umuwamaba kampa narigakanaba kasipama ataenaba kampa pekini, ku kina'miba agasaba'ma kuntanaba kampa pikibewe. ²¹ Piya, aogiyenaripa waintemi, pi kumakaba asi nasi napiyewe, piya untiye.

Au'ama nke'wasaenama kamanane

(Aruku 11:34-36)

²² Pigoya, kau'ama kane'wapa kaowe. Kaogapa aogima waintanaba, kau'amapa kanara e'wasa potakiye. ²³ Kaoga tikaeyakanaba, kau'amaba pabiyama tunusu wakiye. We, kagu'ama kane'wa tu'ma wakanapa, tabera tununtanaba aboragamekana kaorika'ena puma mikibene, piya untiye.

Ka'wainaba tarara kayokaya'ena kanara kampa pikiye

(Aruku 16:13)

²⁴ Pigoya, ka yagarama tabe yagararamisi kayokaya'enaba kampa kanara pikiye. Aeba ka'wainapa kayone potentana to ka'wainapa agama aekita potakiye. Piya pumagina, aeba ka'wainati uma atokaentana to ka'wainapa akabitakiye. We, tigeba pabiyama Koti ntugabe mone kutankama ntugabe ka awameta kanara kampa maekibewe, piya untiye.

Arirasaenaga taberapa a-ntapi napi piyo

(Aruku 12:22-31)

²⁵ Pigoya, naeba urimekiri abiyo: Tigeba mikenaenarikaba: Nana nanintabe wanipe maema nakune. Tau'arnakaba: Nana tautasaena maema purukunema, uwoma tigiba a-ntapiyyiyo. Piya, naninta wanane. Mikenaenarimpa au'wantaga'enawe. Titasaena wanane. Ti'ama au'wantaga'enawe. ²⁶ Piya, tigeba inatisa kabara agaiyo. Igeba aintanaba kampa puma nanintaba kampa kubu'ma namankaipi kampa aki pewe. Kampaye. Mantarisa tibarimpaba nanintaba uwa aboroma imiye. We, tigeba kabarapa kampaye. Ae aobipa tigeba wasanarawae. ²⁷ Pigoya, tigeba napiyenari waintakiripa mampara to kake amato puma to ka'isa yaga mirite wakibewa, a. Pipa kampaye.

²⁸ Piya pikenaena kampa waintegiripa, nana piyema kaigaba uma uwoma tigiba napiyewe, a. We, yaobisa ya aosa pamika agoba abiyo. Aeba aotsaenawampa ntugabe kampa piye. ²⁹ Pika urimukuwa, abiyo: Paipa tabe yagara Soromonii aeba konariyenawantaga yagaramaba aogiyenaba purintomepa ya aosawamapa kampa againtiye. Kampaye. ³⁰ Piya, yaobintisa a'no ibanto pabiyama aogima mparamagina, aiba pabigo paribekini yakupi maema kaekibepa, pipa Koti yegina a'nopa aogiyena maraye. We, tigeba kampa agama napiyegana timatiti'enaba uwaenantowe. Piya, Kotiba titasaenarikaba kabirityae. ³¹ Pigoya, tigeba uwoma tigi a-ntapimagiri: Nana nanintabe wanipe maema nakune. Nana maema amirkuneba, taberapa a-siyo. ³² We, to marisa kina'miba a'ya'maena yontanaga napi napi pewe. Piya, mantarisa tibarimpaba

pi a'ya'waemaenarikaba abintegiri, uwoma tigi a-ntapi piyo. ³³ Pigoya, tigeba Koti kabitatakena mono'ama nkau'wape arupuyenawape aborasanaga tigupa paitama ataigina waiyeno. Piya pigina, aeba mampara a'ya'maenaripa kaga aborarimikiye. ³⁴ Tigeba aisaenagaba uwoma tigiba a-ntapiyiyo. Aisa yagaba nana kuntuyenabaya aborakibi, pipa kampa abintawe. A'ya'ma yagaba kuntaenaba toma toma aboraurite wayema, pabinkanto uwa napiyegana waiyeno, Isu piya untiye.

7

*Antota kamanapa a-so
(Aruku 6:37-38, 41-42)*

¹ Tigeba to wasanama aupti pima kamana a-nkuwaitaiyo. Kampa uwaitakibepa, tigeba pabiyama antota kamanapa kampa uritakiye. ² Piya, tigeba wasana antota kamana uwaitakibe, pabi nkawameta Kotiba tigeba uritakiye. Piya, wasana pabi aborawaimikibe nkawameta Kotiba a'wae puma timikiye. ³ Pigoya, kao'yagarama nkaobipa i'nintana waintakanapa, ayama agantana, kaeka kaobi ya atu waintakanapa, nanaga ae aogi potakenaga napiyene. ⁴ We, kaeka kaobi ya atu waintemipa, kaeba ayama kao'yagaragaba mayaba omegana aogi pikiye: Nao'yagara, kaeba abintaga, kaobi i'ni waintika maegagasanoma, aogi pikiye. ⁵ We, kumpari kina, kaeka kaobi ya atu waintemipa, pipa maru maegaite aogima agantana, kao'yagarama nkaobisa i'ni maegasagana aogi pikiye. ⁶ Pigoya, tigeba monotasaenaba kara kanta kinapa a-nkimiyo. Piya, aogi mono kutatipa yaga kanta kinapa a-nkimiyo. Igeba pintanaba uwa igisarasa aewarigaitegini pabigo a'wae puma tige tiba nasanaga, piyaba a-piyo, piya untiye.

*Wasanama esegi puma nunamu ukena kamanane
(Aruku 11:9-13)*

⁷ Pigoya, tigeba Koti abigaiginaba timikiye. Aguyosagaiginaba au'wapa maema tigeti aborakiye. Kabera aiwakarusiginaba Kotiba aititakiye. ⁸ Piya, Kotiti esota kina'miba maeyawe. Aguyosaga kina'miba agawe. Kabera aiwakaruse kina'mitiba Kotiba ai'itaye. ⁹ We, tigetisa ae ntgararama yagarawampa nanintaga yekanaba antotapa yabapa amikiye, a. ¹⁰ Inoyantaga yekanaba kuyaba amikiye, a. Pipa kampaye. ¹¹ We, tigeba antage kina'mitaba yagara aragaripa aogiyena imewe. Piya, mantarisa tibarimpa aeba asugasima esota kina tigepta aogiyenaba tabera timikiye. ¹² Pigoya, tigeba wasanam purataiyema tibikibintanaba, pabi nkawameta igepta puwaitaiyo. Piya puwaitamagiri, tigeba Moseseko poropete kina'mike kamana'ama nkagoba aborakibewe, piya untiye.

*Kabewama kamanane
(Aruku 13:24)*

¹³ Pigoya, tigeba uwaena kabintori mantari ima uma pasiyo. Ataena pikena kuma'ama kabewapa pipa tabewe. Piya ke'wapa pabiyama tabe waiyegini, pita'iba uwoma kina'miba pasewe. ¹⁴ Piya, miyaba kuma'ama kabewapa uwaenanto waiyegina, ke'wapa wakenaba esegi puntiye. Pita'iba uwaena kina'antomi pasewe, piya untiye.

*Kumpari poropete kinaka aogima kabiyiyo
(Aruku 6:43-44; 13:25-27)*

¹⁵ Tigeba kumpari poropete kina'mika aogima kabiyiyo. Igeba i'amaba sipisipi kanta purite tigeti paebuma kanakibewe. We, intabaipintiba igeba kabu kara kanta puma tige tiba nakena kanakibewe. Pika aogima kabima miyivo. ¹⁶ Pigoya, mono au'waipa agamagiri agowaipa aogima agakibewe. Piya, wasanam waini a'wapa akenanaenabintisa kampa asikewe. Piki yawamapa asigi'ma nakenaba agaenabintisa kampa asikewe. Kampaye. ¹⁷ Piya, aogi yawamaba aogi yamanka aeyagiri asikewe. We, ata yawamaba ata yamanka aeye. ¹⁸ Piya, aogi yawama ata yamanka aekenaenaba kampa waintegina, ata yawama aogi yamanka aekenaenaba pabiyama kampa waintiye. ¹⁹ Pigoya, a'ya'ma yawama aogi yamanka kampa aeyaginiba aga'yuma yakupi maebugasawe. ²⁰ Pika naeba maya yuwe: Pi kina'mi mono au'waimpa igama agowaika aogima abikibewe.

²¹ Pigoya: Wa'egane, Wa'egane, sumagini nagise kina igeba a'ya'maginiba Koti kabitatakena mantariba kampa ikibewe. Kampaye. Mantarisa nabanempa nkawamu wasiye kina igemana ikibewe. ²² Piya, pi kanabipa uwoma kina'mi maya unamikibewe: We, Wa'egare, Wa'egare, taeba kae kawamutapa wasanaba monopa uwaiminta, ke kinapa kae kawamutapa agaruba igainta, kae kawamutapa tabena aboranema puntompene. Kampa tagantano, ukibewe. ²³ Piya unamigipa, naeba maya uwaimukuwe: Naeba ayantaga tigabebe puntone, a. Aguntaena pe kina tigeba ae'wama wawaegasiyo, piya uwaimukuwema, untiye.

Esegima aema mikenka kamanane
(Aruku 6:47-49)

²⁴ Pigoya, wasana ka'waina ma kamana'ne abima wasikibipa, aeba napi napi yagara ae awametane. Pi ntagara aeba namankapa u takaitasa nama kintiye. ²⁵ Kimaraogana waintogana, tabe ka aema wani pa'ma iguguya pumagina akasabakena pugagate atao-gana waintantiye. Piya, esegi yarasa kimaraomeka tonkiya puma waintantiye. ²⁶ Pigoya, wasana ka'waina ma kamana'ne abima kampa wasikibi, aeba aibo yagara ae awametane. Piya, aibo yagara ka'waina aeba namanka amunta yarasa kintiye. ²⁷ Kimaraogana, tabe ka aema wani pa'ma iguguya pumagina kana namapa akasakasu pa'wantiye, piya untiye.

²⁸ Pigoya, Isu ma kamana uma a'ya ataogini abimagini pami puntawe. ²⁹ Piya, aeba mono tisa kina'mi yesa kamana name. Aeba kiye kina'mi yesa puma uwaimintiyema, untawete.

8

Isu karu yagara ka kaba atantiye
(Maka 1:40-44; Aruku 5:12-14)

¹ Pigoya, Isuba amutisa tumogini uwoma kina'miba aegarantawe. ² Piya puguna, ka karu yagara aeti kanama ampa parokaema maya uma omintiye: Kae kabemika kaba nayakena puntanara aogi punatao, untiye. ³ Piya yogana, Isu aya parosuma auta u'ma maya untiye: Piyaenaga nabije. Pabigo kata wakanra aogima miyo, untiye. Piya yogana, pabi ntaga kana karuyenawapa ata wantiye. ⁴ Ata waogana Isu maya omintiye: Uwa kinapa a-nkuwaimima, kaeba marupa wama kaupa mono kiya yagara uma ayakegana agano. Piya, kaeba wama Mosese uramintintanaba Kotiti amegini, wasanamiba kagate: Aoso yagara miyema, napikibewe, piya omintiye.

Isu irebu yagara kayokaya yagara kaba atantiye
(Aruku 7:1-10)

⁵ Pigoya, Isuba piya potategina Kapeniyamu kumati a'wae puma wantiye. A'wae puma waogana, Aroma kina'mi irebu kiye yagara ka'waina aeti irosa'ma maya omintiye: ⁶ Wa'ega yagara, kayokaya yagarane yonintana abeginra agisa ayapa ago pu'waewamagina tabera aukegina mintiye, omintiye. ⁷ Omogana, Isu abite: Naene ima kaba atakuwe, omintiye.

⁸ Piyama omogana, irebu kiye yagara aeba maya untiye: Wa'ega, naeba tumima minta kina mintogana, nana pegina namantepintiba ubasikibene. Kaeba pita'i uma mima kamana yegana kayokaya yagarane ne kabareno. ⁹ Piya, naeba ima minta kina'mi nkiwamu wasimagi, to ka'isa tumima minta irebu kina'nepa kabiyuwe. Piya, igeftisa ka'wainapa: Wao, omekanabaa wakiye. To kapa: Kanao, omekanabaa kanakiye. Kayokaya yagarane: Pi ntuga po, yekanabaa pikiye. Piya, kiya kina'mi yosa kamana yeganara ata wano, untiye. ¹⁰ Piya yogana, Isu pi kamana abima napi napi puntana, aega'ma kanaume kina maya uwaimintiye: Taga urimekiri abiyo: Isureyo kina, tigetiba ma ntaramara nkatimatit'ena piya awametapa kampa agauwe. ¹¹ Pika amato puma yekiri abiyo: Pankao irosamitisabe tupasemitisabe wasanaba uwoma namu'isa kina irosa'ma, Abara'amu, Aisaki, Yekobu, igege mantarisa kumati aki puma naninta kaga nama i'mu pikibewe. ¹² Piya pigiri: Taeba Yuta kina, mono ago kina mintune, ye kina'mitaba, tigeba tununtanabi tumima tiwara upaba puma kub'e'na puma mikibewe, untiye.

¹³ Isu piya ute, irebu kina'mi kiye yagara maya omintiye: Kaeba wao. Kamati'enagampa au'wapa aboragamikiyema, omintiye. Pigoya, kana kayokaya yagarawapa pabi ntaga kaba'ma aogi puntiye.

Isu Pita aentawa yoninka kaba atantiye
(Maka 1:29-31; Aruku 4:38-39)

¹⁴ Pigoya, Isu Pita ntamapi iyomepa aentawampa nkau yaku taogana awaita mintogana agantiye. ¹⁵ Agate ayata urogana yoninkapa pabigo ata wantiye. Ata waogana, kana wae'maba asima naninta maema Isu amogana nantiye.

Isu uwoma kina kaba itantiye
(Maka 1:32-34; Aruku 4:40-41)

¹⁶ Aibogini, asenamaita ke kina intabaipinti minta kinapa uwoma ibabute kanagana puntawe. Piya puguna, Isuba ke kina'waipa kamana'watasa igarubantana, a'ya'ma kina'mi nkinuntanawaipa kaba itantiye. ¹⁷ Piya pogana, poropete Aisaya kamana mayama kaemaranti, pi'na esegi puntiye: Aeba anuntanarepa taparintana yonintanarepa aesagabintiye, piyama kaentiye.

*Isu aegarakena kamana untiye
(Aruku 9:57-60)*

¹⁸ Pigoya, uwoma kina'miba aeti kanama ampa ainkiyuguna igitate abagi kina'wa: Kotu maroteri wakunema, uwaimintiye. ¹⁹ Uwaimogini wakena puguna, mono tisa yagara ka'waina agora wama maya omintiye: Tisa, kaeba pita'i mata'i wakena yegapa naeba kaegarakuwe, untiye. ²⁰ Piya yogana Isu maya a'wae pomintiye: Kabu kara igeba age'waintaga waintiye. Piya, inatisa kabara igeba ina'waintaga waintiye. We, Wasanama Ntagara naeba nawaikenka maruntepa kampa waintiye, omintiye. ²¹ Piya omogini, abagi kina igetisa to ka'waina mayama omintiye: Wa'ega abintaga, marupa wama nabanempapa pu'waka uma kaitate kaegarano, untiye. ²² Piya yogana Isuba maya omintiye: Monota pu'wasu puma miye kina'miba igeba purikibe kinapa kanara kwaitatakibewe. Kae'enagaka ampa naegaraoma, omintiye.

*Pontawama Isu nkawamu wasintiye
(Maka 4:36-41; Aruku 8:22-25)*

²³ Isu piya ute wanipisa karebi iyogini, abagi kina'wa iyuguni wantawe. ²⁴ Wauguna, pabigo pontaba tabera puma kotupa aiga'yo'ya puma ataena puritegina wanipisa kare antabaiapinti tumintiye. Aibogana, Isu aeba awaitamintantiye. ²⁵ Piya pogini, igeba wama abage pumagini: Wa'ega, naisikena pune, untawe. ²⁶ Piya yuguna maya uwaimintiye: Nanaga tiyekuruba pewe. Timatiti'enaripa uwaasantowa, a, untiye. Piya uwaimimagina, aeba asima pontabe wanipe tabe kamana uwaisimoginisi uwasuwa puntase. ²⁷ Aibogini, pi kina'miba agate uwoma nkigi napima maya untawe: Aeba nana yagaragana, pontawamake waninkamakeba awamupa wasiye, untawe.

*Isu tara kina'misi ke kina igarubantkiye
(Maka 5:1-17; Aruku 8:26-37)*

²⁸ Pigoya, Isuba kotupa ta'ema maroti Katara kina'mi mpari wama uma irosantiye. Uma irosaoginisi tara yagarara ke kina'waisintaga kanama ampa abatantase. Isigeba wasana irubintisa kanamaginisi agasaya pusuguni iyekuru puma pita'iba wasanaba kampa nasi nasi puntawe. ²⁹ Isigeba Isu agateginisi kega'e uma maya untase: Kaeba Koti Ntagaragawa, nana purasitakena kanane. Kanapa kampa agarosantegina kaeba ata purasitakenaga iyenoma, untase.

³⁰ Pigoya, pagasari uwoma ntaga naninta namagini mintantawe. ³¹ Mintuguni, kana ke kina igeba lsuka maya uma esotantawe: Tagarubakena puntanapa, urataga pi nttagami nkintabaiapinti tumpa paseno, untawe. ³² Piya yuguna Isu aeba: Karu'ena ae'waiyo, uwaimintiye. Piyama uwaimogini, kana yagara taramisi isintabaiapintisa irosa'magini, yaga intabaiapinti uma pasintawe. Pasuguni, kana yagami karu'ena kotu waintometra ausari tumima wanipinti naisuwaewantawe.

³³ Piya puguni, igitate kana yaga kiye kina igeba iyegaka kumati ima, pi a'ya'ma kamanape ke'waisintaga yagara taramisi kamanape kaga wasana a'ya'ma uwaimiwaentawe. ³⁴ Uwaimuguni, wabe wayape a'ya'magini kumatisa tumimagini Isuti tumpa irosantawe. Aeti tumpa irosa'magini: Marepa atate to mari waomagini, esegima omintawe.

9

*Isu agisa aya pu'wanta yagara kaba atantiye
(Maka 2:1-12; Aruku 5:17-26)*

¹ Pigoya, Isuba wanipisa karebi ima kotupa to kake ta'ema kanama kuma'wati to kakema irosantiye. ² Irosaogini, agisa aya pu'wanta yagara ka wasara wasirite kanatawe. Piya puguna, Isuba imatiti'enawaimpa nkagoba igitate agisa aya pu'wanta yagara maya omintiye: Yagarane, kaekuruba a-po. Naeba aguntaenagapa maegagasuwema, omintiye. ³ Piyama omogana, mono tisa kina ka'isamiba intabaiapinti mayama napintawe: Ae'wa nkau maete ima Kotika akayasotayema, napintawe. ⁴ Piyama napiyuguna, Isuba napiyenewai igitate maya uwaimintiye: Tigebibia nanaga agunta kamanapa napiyewe. ⁵ Piya, aguntaenawa mpaegasuwe, yopa, au'wapa kampa agawe. Asima wao ukubopa, kaba atama kasa au aborakenaengababa tiyobi kunta piye. ⁶ Pigoya, Wasanama Ntagara naepa mabi aguntaena asu'a pikena esegiyenaba naminti, pi'n'a nkagoba aogima agabebema agaiyo, piya ute, agisa aya pu'wanta yagaragaba maya omintiye: Asima wasagapa aesagabite wa'egati waoma, omintiye. ⁷ Piyama omogana, asima wa'ewati wantiye. ⁸ Piya pogini, a'ya'ma kina'miba agate iyekuru pumagini, Koti pi nkesegiyena wasana imomeka i'mu puntawe.

*Isu Matiyuka kega'e untiye
(Maka 2:13-17; Aruku 5:27-32)*

⁹ Pigoya, Isu aeba pitasa wama takisi maeyome ntagara ka agewapa Matiyu, aeba yogaeba pome ntamankapi mintogana uma abatama omima maya untiye: Kaeba kanama ampa naegaraoma, omogana, pabigo asima aegarantiye. ¹⁰ Pigoya, Isu namankapinti naninta nanema aega'e yogana iyogini, takisi maeyume kinape to ka'isa aguntaena pume kinape uwoma irosauguni, Isube abagi kinape kaga nanintaba nantawe. ¹¹ Piya puguni igate, Parasi kina igeba abagi kina'wa maya uwaimintawé: Tisaripa takisi maeya kina aguntaena pe kina'mikeba nana pikena kaga mama nanintaba nayema, ibigantawé. ¹² Pi kamana Isuba abite maya uwaimintiye: Tusa yagara aeba aogi kina'mitiba kampa yogaba piye. Yoni kina'miti mana piye. ¹³ Pigoya, tigeba wama paisa kamana mayama waintemi, pi nkagoba abibebe piyo: Naeba kaema agunta abasakenaenagaba kampa nabiye. Agu kao'enaga nabiye, iye. Piya, naeba: Aogi kinatawe, ye kinapa aogi puwaitakenaba kampa tumintone. Naeba agunta kina igu a'wae pikibeka tumone, piya uwaimintiye.

*Isu aoganta'enawampa paisaenaba agarubaye
(Maka 2:18-22; Aruku 5:33-39)*

¹⁴ Pigoya, pi ntaga Yoni nkabagi kina igeba Isuti ampa irosa'ma maya uma abigantawé: Taebe Parasi kinape ka'isa yagara monotaka nanintaba a'a-o uma uwa miyuna, pi kae kabagi kina'miba nana piyemana nanintaba a'yuguba nawe, untawe. ¹⁵ Piya yuguna aeba maya uwaimintiye: Wasanami iba'ena pigina iba wae'ma nkawaeba uwa mintakiniba, ayama aokina'miba intara'ena puma nanintaba a'a-o uma mikibewe, a. Pipa Kampaye. Ainti iba'wae'ma nkawae ampa arakurite ababute to mari wagasiniba, aokina'miba intara puma kampa naninta nanta uwa mama aeka napikibewe. ¹⁶ Piya, ae ntagarama paisa kai atugekanaba aoso kairasaba pugunikiye, a. Pipa Kampaye. Aoso kaiwama paisa kai tabera paibekana atu'ma atisananaga piyaba a-po. ¹⁷ Piya, ke kasa wainiba paisa meme aribipa ari'atakiye, a. Kampaye. Kasa wainiwama paisa meme ariba atu'ma wainibe meme arike ataena pusanaga piyaba a-po. Piya, kasa waini to kasa meme aribi ari'ataiginaba, isigeba kaga aogima waikibese, piya untiye.

*Isu Yairasi nkaraga purintapisa kaba atantiye
(Maka 5:22-43; Aruku 8:41-56)*

¹⁸ Isu aeba pi kamana uwaimima mintogini, monota paitama miyome ntagara ka'waina aeti kanama agora ampa parokaema maya untiye: Aragane ibanto puriya, kaeba kanama auta ampa aukaya pegana aoganoma, omintiye. ¹⁹ Piyama omite waogini, Isu aeba asima abagi kina'wake aega'ma wantawé. ²⁰ Wauguna, waya ka iyegari tumiyaba mima miyogana kaboba nagisarisa tara tumpaema a'ya punti, aeba Isu kai atunkata aukaya puntiye. ²¹ Piya puntana, antabapintiba mayama napintiye: Kai manankata aukaya pumagi kabarikuwe, untiye. ²² Piya ute, aukaya pogana Isuba a'wae puma kana wae'mati ao agama maya untiye: Araganepa, kantawamaba paru peno. Kaeba kamatiti putamatpeka aogi kabiye, omintiye. Omogana, pabigo kana waepa kaba'ma awantkiye.

²³ Pigoya, Isuba wama kiya yagarama ntamapi ima ini kubegabe kamana'waipa abite maya uwaimintiye: ²⁴ Tigeba irosa'ma tumiwaegasiyo. Ma nkaraga aeba kampa purintiye, aeba uwa awaita mintiye, piya uwaimogini, kamana'wa abugunaba uwa anagi kamana kanta piyema napintawé. ²⁵ Aibuguna uwaitao, abe'i irosa'ma tumiwaegasuguna, kana wasana wasa waintometi uma pai'ma kana aragama nkayata urogana, aogama asintiye. ²⁶ Piya pogana, pi kamana'ama pi mpariba pabigo abae purite wagana puwaentiye.

Isu isiyorika yagararage aibo yagarage aogi puwaitantiye

²⁷ Pigoya, Isuba pi mpaba atate waogini, isiyorika yagara taramisi aega'ma wantinisi kega'e uma maya untase: Kaeba Tebiti ntagaragawa, tasigeka kantara po, untase.

²⁸ Piya yusuguna abite wama kumata uma irosaeginisi agora wausuguna isibigama maya untiye: Tisiyo aogi puritakena esegiyenabaa wainatantiya, pipa abibebe pesoma, isibigantkiye. Piyama isibigaognisi isigeba maya untase: Pipa taga abibebe puse, untase.

²⁹ Piya yusuguna isiyoraa aukaya puntana maya untiye: Tisimatiti'enarisimpa au'wapa aborarisimikiye, untiye. ³⁰ Piya yogana, pabigo isiyo apina'ma agantase. Aibusuguna, Isuba esegi kamana uma maya uwaisimintiye: Abiso. Tisigeba ma kamanapa wasana ankuwaimisigini abiyo, uwaimintiye. ³¹ Piyama uwaisimoginisi, pigo isigeba wamaginisi mare-u me-u pusuguna pi mpariba kana kamana'ama abae purite wagana puntiye.

³² Pigoya, isigeba wausuguni, igeba karu'ena ka yagara Isuti ababute kanantawe. Aeba ke kina ka'waina aigaraogana aibo'ena puma mintantiye. ³³ Piya pome ntagara ke kina agaruba agasogana aeba kamana untiye. Piya pogini, uwoma kina mintume kina'miba i'mu pumagini maya untawe: Maretapa paipa piyaenaba kapa kampa aboragi agama miyompene, untawe. ³⁴ Piya yuguni, Parasi kina igeba Isuka maya untawe: Ke kina'mi asu igasima minti ntagarama ao'maeayagina, ke kinapa agaruba igasaye, untawe.

Isu aeba a'ya'ma kinaka antara kamana untiye

³⁵ Pigoya, Isu aeba pabiyamagina a'ya'ma mari nasi nasi pumagina, tabe kumatibe uwaena kumantontoribe Koti kabiratakena kamana mono namapinti uwaimintana, yonintana iki nakiyena ibome kinapa kaba'ma paru puwaita waentiye. ³⁶ Pigoya, uwoma kina igantana igeba antara puntiye. Igeba sipisipi kiye kampa kabiyejana atenaabi mpiyesu puma miyuguna, ³⁷ pika antara puma abagi kina maya uwaimintiye: Yogaba tabe waintegina, piya naninta a'na pukena kinapa tarantowe. ³⁸ Pika tigeba yoga agowamaka esotaigina naninta a'na pukena kinapa aboraigiri yogawatapa waiyo, piya uwaimintiye.

10

*Isu nkabagi kina'mi nkigewe
(Maka 3:13-19; Aruku 6:12-16)*

¹ Isu aeba abagi kina nagisarisa tara tumpaema kina'wa igege'a yogini ampa irosaunguna, ke kina igaruba igaikenabe yonintana iki nakiyena ibome kina kaba itakibeka esegiyena imintiye. ² Pigoya, aposoro nagisarisa tara tumpaema kina'mi nkigeba mayamawewe: Marusa yagara Saimoni aoso agiwapa Pitawa, ae a'nanto Enturuwa, Sepeti ntagara Yemisiwa, ae a'nanto Yoniwa, ³ Piripiwa, Patoromayowa, Tomasiwa, takisi maeyome ntagara Matiuywa, Aopayesi ntagara Yemisiwa, Tariyesiwa, ⁴ namu'isa kiya kina igarubakaikena abugai ntagara Saimoniwa, ainti Isu minaga'ena punti ntagara Yutasi Isikeriyoitiwa sumagini, abagi puntawewe.

*Isu abagi kina'wa yoga kamana uwaimintiye
(Maka 6:7-13; Aruku 9:1-5)*

⁵ Pigoya, Isu abagi kina nagisarisa tara tumpaema kina'wa ige uwaitama igarubantana maya untiye: Tigeba to marisa kina'mitiba a-nkwaiyo. Sameriya kina'mi kumatiba a-nkubasiyo. ⁶ Isureyo tu, sipisipi kabuba wantasa puma miye kina, igeti mana waiyo. ⁷ Wasanamitti uma irosantiripa maya uwaimiyo: Koti kabiratakena yagaba agarosaye, uwaimiyo. ⁸ Piya, tigeba yoni kina kaba itaiyo. Pu'wanta kinapa asiwaitaiyo. Karu kinapa aogi kaba itaiyo. Ke kinapa igaruba igasiyo. Piya, maeyantanaba ikantanarasa wanane. Uwa maeyasa puma tigeba ikantanaba a-mpaentiri uwa iyo'maema aogi puwaitaiyo. ⁹ Monebe tabebe uwaenantobeka kapa a-nkira'ma maete waiyo. ¹⁰ Kopa a-nkarakae piyo. Piya, tara kaike tigisa anape pusu'ma ke'i nasikena wantape a-mpaete waiyo. Uwa tika nasiyo. Piya, yoga kinapa yogawaitasa nanintawaipa imegini maeyasa puma timigiri maeyiyo.

¹¹ Pigoya, kuma pita'i mata'i uma irosantiripa wasana ago igaiyo. Ka'waina kayone puritama kao'ena puritakiripa, pabi ae namapi ima pabippi mima waimarate waiyo. ¹² Namankaipinti uma pasintiripa: Mono tigeti waiyema, uwaimiyo. ¹³ Piya, kana namapisa kina aogima arupu puma miyiginaba, tigu paruyenanaba igeti wano. Piya, kampa aogima miyiginaba, pi paruyenanaba tigettii a'wae puma kanano. ¹⁴ Piya, ka yagarama namankapinti kampa tibabute wama kamanati kamana abekiripa, wakibe nttagaba tigisarisa i'ni aiwaka potate waiyo. ¹⁵ Naeba taga urimukuwa, abiyo: Aintisa kanabipa Sotomu Komora kina tumimaena puwaitantana, maya kumatasa kinapa tabe kuntuyena aborawaimikiye.

Aintiba toma toma kuntuyena aborakiye

¹⁶ Abiyo. Sipisipi kabukarawama ige abakapintiba kampa uwaitakenaena naeba pi tigepe uritauwa, pika tigeba miyarinkama pemisa puma pasema aogimagiri napima nasiyo. Piya pupuntama pemisa puma aogima napima kamparagaena a-piyo. ¹⁷ Tigeba wasanamika aogima kiya puma nasiyo. Igeba kamana uritakena namankaipinti tibabute wamagini, mono namankaipinti eru kasutasi tiyegukibewe. ¹⁸ Pipa nanagawane. Tigeba nabagi kina mintaka uma tabe kiye kinatibe wa'ega kina igegetibe tibaisusu purite wama kamana uritakibewe. Piya, tigeba ige iyobipe to marisa kina'mi nkiyobipe esegima mono uma araiyo. ¹⁹ Piya, igeba kamana uritakibepa: Aya kamana ukunemaba abima, tara taraba a-piyo. Pi nttagaba kamana ukena kamanapa Aota Awamus'ama napi

napiyenaripi ataritakiye. ²⁰ Piya puritakiri, kamana yiginaba tige kamana kantaba kampa pikiye. Tibarimpatisa Aota Awamus'a'ama tigupi mikibi, ae kamana'ena pikiye.

²¹ Pigoya, pi ntagaba aganto ka'wainaba a'nantopa minaga pekini aegukibewe. Aba ka'wainaba yagarawapa pabiyama minaga pekini aegukibewe. Piya, yagara aragawaimpiba inogi ibagipa kamana uwaitama minaga pigin iyegukibewe. ²² Pigoya, nae nawaga kamanataka wasanamiba tigeka abima kama puritakibewe. Pigoya, ka'wainaba kampa natakibikana esegima mimagina kana'wa a'ya pekanaba, aintiba Koti ababikiye. ²³ Pigoya, ka kumata uma irosa'ma mintingi tiyeguma tigarubaigiripa, to kumati pai'ma tiyegaka waiyo. Piya, naeba ubebema urimukuwa, abiyo: A'ya'ma Isureyo kumati yoga wairite wanti, pipa igiga puma mintigi, Wasanama Ntagara naeba tumpa irosakuwe.

²⁴ Pigoya, abikena namapisa yagara ka'waina tisawampa asu agaikenaenaba pipa kampa waintiye. Piya, kayokaya yagara ka'waina pabiyama tabe yagarawa asu agaikenaenaba pipa kampa waintiye. ²⁵ Piya, abikena namapisa yagara aeba tisawampa ae awameta pekanaba kanarasakiye. Kayokaya yagara aeba tabe yagarawampa ae awameta maema aborakanaba pabiyama aogi pikiye. Pigoya, tibatipa Piyesiburu, pipa ke kina'mi tabewaimpawe unamekini, naokina tigepa pabiyamagini tabera kamparaga kamana uritakibewe, piya untiye.

*Wasanamaba Kotika aekuru peno
(Aruku 12:2-7)*

²⁶ Pigoya, tigeba wasanamika a-tiyekuru piyo. Kakama waintintanaba pipa agorapa kampa kakama waikiye. Pipa aintiba aborakiye. Piya, airarikaegainta'ena waintipa, pipa agorapa kampa kakawakiye. Pabiyama aintiba apira puma aborakibewe. ²⁷ Pigoya, tununtanabinti urimo kamanapa tigeba ara uwaimiyo. Piya, obina kamana abepa tigeba nama nkagari asu mimagiri kega'e uma uwaimiyo. ²⁸ Pigoya, ariri'ama aeguntini tigu ti'ama aegukena aguyosagakibe kina igekaba a-tiyekuruba piyo. Piya, tigutipe ariri pe kaga isibanakinisi agagabinti tumikenka esegiyenawantaga yagara Koti, aeka tiyekuru piyo.

²⁹ Pigoya, kisabentonto uwaena monentorasa ika pewe. Piya tibarimpaba kampa owe untakanaba ayamagina mabipa tumikiye. Pipa kampaye. ³⁰ Piya, wasana tige ti'no nkabiyapa pipa a'ya'magina aisuwa abiwaeye. ³¹ Pika tigeba tiyekuruyenabipa ampiyio. Tigeba kisabepa kampaye. Tigeba wasanarawe.

*Isu nkage uma aborakena kamanane
(Aruku 12:8-9)*

³² Pigoya, ka'waina aeba nae nagene wasanami nkiyobi uma aborakapa, naeba pabiyamagi mantarisa nabanemba ae aobi uma aborakuwe. ³³ To ka'waina aeba wasanami nkiyobi kakanatakapa, aepa naeba pabiyamagi mantarisa nabanemba ae aobi kakatakuwe.

*Isuba ma'ena pikena aborantiye
(Aruku 12:51-53; 14:26-27)*

³⁴ Pigoya, tigeba naekaba: Aeba paruyena maema aborakena tumintiyeba, a-siyo. Naeba paruyena wanane. Ma'ena pikena kasontentaga tumintone. ³⁵ Piya, naeba wasana attara puwaitakena tumintone. Pika abage yagarawampage isigeba attara pisigina, anoge aragawampage isigeba attara pisigina, aentawampage natuge isigeba pabiyama attara pikibese. ³⁶ Pigoya, ka'waina aeba aokina igetisa yagarama kama potasanaga aborantone. ³⁷ Piya, ka'waina aeba abake anoke agu kao'ena tabera puwaisitantana naepa uwaenanto punatakibi, aeba nae nao'yagaraba kampa mikkiye. Piya, ka'waina aeba yagara aragawa agu kao'ena tabera puwaisitantana naepa uwaenanto punatakibi, aeba pabiyama nae nao'yagaraba kampa mikkiye. ³⁸ Eya, ka'waina aeba maripowa, pipa wasanami igobi punatantanaba kampa aesagabinta naegarakibi'naba, aeba pabiyama nae nao'yagaraba kampa mikkiye. ³⁹ Piya, ka'waina aeba mikenaenawaka owe yekanaba, a'yugu potakiye. Piya, naeka napima mikenaenawaka a'a-o yekanaba, aboramikiye, piya untiye.

*Isuka kayone pe kina aogi ikantana maekibewe
(Maka 9:41)*

⁴⁰ Pigoya, wasana ka'waina aeba aogi puritai'naba pipa nae aogi punataye. Piya, nae aogi punatai'naba Koti aogi potaye. We, ae unataoga naeba kanantokanane.

⁴¹ Pigoya, ka'waina poropete yagaraga: Koti nkao'yagarawe, otama aogi potakibi'naba, aeba poropete kina'mi ige awameta ikantanaba maekiye. Piya, ka'waina Koti aega'ma tagantana pe kina to ka'wainaka: Koti nkao'yagarawe, otama aogi potakibi'naba aeba

tagantana pe kina'mi ige awameta ikantanaba maekiye.⁴² Ae abagi kinane, uwaitamagina, aogaso wani iru'ma imikibi'na ikantanawapa aintiba kampa kaikiye, Isu piya untiye.

11

*Yoni aeba ka'isa abagi kina uwaitaogini Isuti wantawe
(Aruku 7:18-35)*

¹ Isuba nagisarisa tara tumpaema abagi kina'wa kamana piya uwaimiwaetate atate, to kumati mono uwaimirite wantiye. ² Piya pogana, Yoni wani pai'itanti ntagara aeba iga'na namapi mintana, Karaisiti yoga pome pi awaga kamana abite abagi kina'wa uwaitaogini igeba wamagini, ³ Isu maya uma abigantawe: Kaeba utaratanti ntagara Karaisiti kanakiye, untapa, kaebera to ka yagaraga agawa puma misunema, abigantawe.

⁴ Piyama abigauguna, Isuba maya uwaimintiye: Tigeba a'wae puma wamagiri, agama abentanama kamana uma Yonipa omiyo. Pipa mayaenawee: ⁵ Iyorka kina'miba iyo agawema, igisa iya pu'wanta kina igeba ke'i nasi nasi pewema, karu kina'mi nki'amaba aogi piyema, purinta kina'mi iyo agawema, kusi kina'miba aogi kamana abewemagiri uma omintiri, to kapa mayama amato puma omiyo: ⁶ Ka'waina aeba naeka abima aekita kampa pikibi'naba aeba a'mu pikiyeme, iyema omiyo, untiye.

⁷ Piya uwaimogini, Yoni nkabagi kina igeba a'wae puma wauguna, Isu aeba wasana mintume kina Yonika maya uwaimintiye: Tigeba ka'me mpariba Yoniti wama, ayaena agakena wantawee. Misa ka ponta wama maete wate kanate pemisa pogiri agakena wantawa, a. Pipa Kampaye. ⁸ Wasana kawaina kaiwapa aogi awa'ena purintogiri agakena wantawa, a. Pipa Kampaye. We, wasana aogi kai pure kina'miba tabe kina'mi ntamapi mintini iwaiba waintini pewe. ⁹ Piya, poropete ka agakena wantawa, a. We, nae naeba urimukuwa, abiyo: Tigeba pi agama miye ntagara aeba poropete kaisa kina ige awametapa Kampaye. Aeba to awametane. ¹⁰ Piya, aeka mono isapisa kamana ka mayama waintiye:

Abo. Kamana'ne maenta yagara agarubakana paitama kaori wama, kekapa aogi pikiyeme, Koti untiye, iye.

¹¹ Pika naeba ubebema urimukuwa, abiyo: Waya'mapisa aboranta ka'wainaba Yoni wani pai'itanti ntagara aepa kampa againtikana, pigo Koti kabiratakena yaga aborakiniba nagora tumima miye kina'nempiba Yonipa asugaikibewe.

¹² Pigoya, Yoni wani pai'itanti ntagara, ae yoga agobinti ntagaba Koti kabiratake-naenaba agobima agasiya puma aborantinaba aboraye. Pika esegi pe kina'mi ige Koti kabiratakena kumapa maekena pewe. ¹³ Piya, a'ya'ma poropete kina'mi kamanape Moses ominti ago kamanape ke nasompentanaga kaeta kanantagana, Yoni aboraogana kamana'waimpa au'wa aborakena kanapa aborantkiye. ¹⁴ Pigoya: Iraiya a'wae puma kanakiyeme unta, pipa tigeba Yonika: Iraiyawee, yiyo. ¹⁵ Pigoya, ageyaga kina'maba ma kamanape abibebe peno.

¹⁶ Pigoya, mampabisa ae kina'mita awame puritasuwe, a. Tigeba yagara araga ige awametane. Igeba kumati mima iyo kina maya uwaimewe: ¹⁷ Ini yokiripa, nanaga wa'enaba kampa pewe. Tantara ena pokiripa, nanaga kub'enaba kampa pewe, piya yewe. ¹⁸ Piya omesa puma Yoniba yogawa agobintanaba monoka ka'isa nanintabe waini wanipe kampa nama a'a-o uma miyogini agantiniba maya untawe: Aeba aibo'ena piye, untawe. ¹⁹ We, Wasanama Ntagara naeba tumima wanipe wanipe nanintabe naogiri, nagantiripa maya yewe: Aeba uwoma ntanintabe waini wanipe nayaba yagarawee. Aeba takisi maeya kinape aguntaena pe kinape ige iyo'yagarawema, naeka yewe. We, mono agowapa igu'ama kintarama miye kina'mi, ige aogima aegaragiri agawe, Isu piya untiye.

*Ka'isa marisa kina'miba atama mintanta kamanane
(Aruku 10:13-15)*

²⁰ Pigoya, Karariya ka'isa kumati Isuba uwoma ntuga puma esegiyenawampa ago maema aboraogini agantiniba igupa kampa a'wae puguna, ige'ma kamana maya uwaimima untiye: ²¹ We Korasini, nantarane. We Petisaita, nantarane. Mebi, Tigeti kukantana tabera aboranti, pipa Taya Saironi kumata aborantisinta igeba intara puma karu'ena auga'magini igu a'wae puntasiné. ²² Pika urimukuwa abiyo: Aintisa kanabipa Taya Saironi kina tumimaena puwaitantana, maya kumatasa kinapa tabe kuntuyena aborawaikiye. ²³ We, Kapaniyamu kina, tigepe mantari tibabute ikibewa, a. Kampaye. Aintiba agagabinti tumikibewe. Piya, kukantana tige kumati aborantemisa puma Sotomu kumata aborantemisa, ibabe aintibe Sotomuba uwa waiyesine. ²⁴ Pika urimekiri abiyo: Aintisa kanabipa Sotomu kumatasa kina tumimaena puwaitantana, maya kumatasa kinapa tabe kuntuyena aborawaikiye, Isu piya untiye.

*Tigeba naeti kanamagiri migaraiyo, Isu untiye
(Aruku 10:21-22)*

²⁵ Pigoya, pi nttagaba Isuba abawampa a'mu potamagina maya untiye: We naba, kaeba mantage mage tabe agowe. Abikenaenawaika abegana tabe pe kinapa kaka waigasane. Piya, igu'amaka abegana inamu kanta pe kina'mipa iyakima imene, pika naeba na'mu pugataopa, ²⁶ kaeba piyama aboraurite wagana penema, pipa uma esegi puntampene. ²⁷ Pigoya, a'ya'maena wainatantipa nabanempa nayapi atawaentine. Pika wasana ka'waina yagarawa naeka agoneka kampa abibebe piye. Nabanempa abiwa abibebe piye. Piya, nabanempa ae agowaka pabiyama wasana ka'waina kampa abibebe piye. Yagarawa nae nabinto abibebe puwe. Piya, yagarawa naeba wasana ka'waina nabanempa nkago uma aboramekanaba aege abibebe pikie, Isu piya untiye.

²⁸ Piya ute to maya untiye: Pigoya, kuntaena aesaga'ma tintara'enabi mpiye kina tigeba a'ya'ma naeti kanawaeyigi migarakena timekana paruriben. ²⁹ Piya, naeba nanta nagu paruyuenanentaga mintoka, kanamagiri mimintebota atama agonepa ampa abibebe piyo. Piya pigina tigu timankamaba migarano. ³⁰ Pi kuntuyenaba tibota aesagatitaopa pipa aogiyenawe. Piya, pi timontana aesagabikibepa kuntaba kampa tibikiye, Isu piya untiye.

12

*Sabatiwama kamanane
(Maka 2:23-28; Aruku 6:1-5)*

¹ Pigoya, pi nttagaba Isuba abagi kina'wapa paita itaogini sabatira witi yugabinti wantawe. Wantini abagi kina igeba iga'ena ibogini witiba akima nantawe. ² Piya puguni, Parasi kina'miba igate Isu omima maya untaw: Abo. Kabagi kina'miba sabatira akumparanta'ena peganaba ataena piye, untaw. ³ Piya omuguna maya uwaimintiye: Tebitibe aokina'mibe iga'ena ibogini punta, pi kamanapa tigeba kampa aisuma abewa, a. We, tige abintaw. ⁴ Igeba tabe mono namapinti iyogana pareti Koti nkamume pipa amigini maema nantane. Pipa aebe aokina'mibe a'yuguba kampa nakibewema, mono kiye kina'mi mana nakenawema, akumparantane. ⁵ Pigoya, a'muntana kaekena mono kina igeba yoga pumentanawaika Moseseba kamana kaenti, pipa aisuma kampa abewa, a. Pipa ago abintaw. Igeba sabatira yoga pumagini sabati ataena peweba asuwaitaiyo. ⁶ Piya, naeba pika urimekiri abiyo: Tiyora asima minti, aebe tabe mono namapa asugasima mintiye. ⁷ Pigoya kamana awa'ena ka mayama waintipa, pi kapa tigeba abisanawa, kampa abewo. We, naeba kaema agunta abasakenaenagaba kampa nabiye. Kao'ena waintaga misanaga nabiye, Koti untiye. Tigeba pi kamana abima yesinta, kaintanawai kampa wainta kinapa ma uwa kamanapa kampa uwitasine. ⁸ Pigoya, Wasanama Ntagara naeba pi sabatirapa kabima miyuwe, Isu piya untiye.

*Isu sabatira ka yagara kaba atantiye
(Maka 3:1-6; Aruku 6:6-11)*

⁹ Isu piya ute, pitasaba atate wama mono namankaipinti intiye. ¹⁰ Pigoya, pita'i ka yagara mintantiye. Aebe ayapa tagarakiwanta, mintogini wasanamiba Isu abigama maya untaw: Ma nttagaraba sabatirapa kanara kaba atakibepera kampaye, untaw. Piya, igeba uwaba kampa untaw. Kamana'wa abite kamana otakena napimagini untaw. ¹¹ Pigoya, Isu aebe iwamu aibatenama maya untiye: Tigetisa ka'waina yagawa kabinti, sabatira tumekanaba sabatiraka uma kasakana uwa mikiyo. Pipa kampaye. Aebe ao'maekiye. ¹² Yaga uwaena kinane. Wasana tigeba pi amantaga kinane. Pika sabatirapa wasana kanara aogi puwaitakune untiye. ¹³ Piya ute kana yagarapa: Kayapa parosoma, omintiye. Piyama omogana, ayankasa pogana aibarutama aogi puma to ka auka'isa ayankama waintomesa puntiye. ¹⁴ Piya pogini, Parasi kina igeba pintana agate wawaemagini Isu nkaegukenaenaga nikintaw.

Isu aebe taga Koti kayokaya yagarawane

¹⁵ Pigoya, Isuba pi kamana abite pimpa kumapa mintantipa atate tori wantiye. Waogini uwoma kina'mi aega'ma wauguna, yoni kinapa kaba'ma aogi puwaitantiye. ¹⁶ Pigoya, igeba to ka'isa kinapa: Nawaga kamana a-nkuwaimiyoma, tonkiya kamana esegima uwaimintiye. ¹⁷ Piya pogana, Koti nkawamupisa kamana poropete Aisaya meto kamana kaemaranti, pi'n'a au'wantaga'ena mayama puntiye:

¹⁸ Mapa kayokaya yagarane. Nae utamarantone, iye.

Pigoya aewapa aogi yagaranene. Naeba aeka nabugaye, iye.

¹⁹ Naeba Aota Awamus'a ne aeta atakana ao'maeyakana kamana'ne a'ya'ma namu'isa kinapa uma aborawaima maema arupu pikie, iye.

Piya, aeba kaba kampa ibi'ma, taberasa kampa uwaitakiye, iye.

Piya, tabe kamana'wapa ke'iba kampa aborakini abikibewe, iye.

²⁰ Pigoya, uwaena misankanto aka'yuwantipa, a'ya'ma kampa aka'yuwaisa pumagina ataenaba kampa puratakiye, iye.

Piya ka'isa yagaba uwaena yakunkanto tamipa, kampa tu'ma waikana, magi magi kinapa kampa ataba puratakiye, iye.

Piya puma, esegima yoga pekana Koti kamana'amaba aborama arupu puma aogi purite wagana pikkiye, iye.

²¹ Piya pekini, to marisa kina'miba aeka napinapima agawa pikibewe, Koti untiyema, Aisaya Isuka piya kaentiye.

Isuba ke kina agaruba agasogini kamana otantawe.

(Maka 3:20-30; Aruku 11:14-23; 12:10)

²² Pigoya pi nttagaba ka yagara kewama aigaramagina aorikaema aibo'ena puntiye. Aibogini, Isuti ababute wantawae. Piya puguna, Isu kaba'ma aogi potaogana kamana uma ao agantiye. ²³ Piya pogini, a'ya'ma uwoma kina mintume kina'miba agate tabera pamipumagini maya untawae: Taeba napiyompepa Isuba Tebiti nttagara utaratanta Karaisiti kanta piye, untawae. ²⁴ Piya yuguni, Parasi kina igeba pi kamana abite maya untawae: Kumparaine, ke kina'mi tabewai agewapa Piyesiburu, ae esegiyenawatasa ke kinapa agaruba igasaye, untawae.

²⁵ Piya yuguni Isuba napi napiyenawai igate maya uwaimintiye: Ka marasa aokina'mige kamaena pumagini kamparagaena pigina ka'me mpa aborakiye. Piya, to kumatisa kina'mibe to namapisa kina'mibe pabiyama aokina'mige ma'ena puma ataena pigini nama kuma'waipa akasaba'magina ataena puwakiye. ²⁶ Piya, Satani ke kinapa ayama agaruba'ma kama potama agarubakiye, a. Pipa kampaye. Piya pekana aeee ma'ena puma ataraisigina a'ya'waemaenawampa kamparagaena pusanaga piyaba kampa pewe. ²⁷ Piya, naekaba mayaweye: Aebe Piyesiburu ao'maeayagina ke kinapa agaruba igasaye, yepa: Pigoya, ka'isa tiyokina'mi igeba ke kinapa agaruba igasaye. Pipa ke iyo'maema esegi puwaitagini pi ntugaba pewe, a. Pi ke kina Piyesiburu ae esegiyenarasaba kampaye. Piya, tiyokina'miba agaruba agoba agamagini, aintisagaba tigepa utaritakibewe. ²⁸ Pigoya, naeba Koti Nkawamus'a'ama nao'maeayagi ke kinapa agaruba igasoka, Koti kabiratakenaenaba tigetiba aboraye.

²⁹ Pigoya, kewama esegi yagara kanta puma mintakanaba, ayamagina namankapintiba imia kotapa aparakiye, a. Pipa kampaye. Marupa pi esegi yagara araku'ma agisa aya kirokaetama pabigo kotankapa aisagakiye.

³⁰ Pigoya, ka'waina aeba kayone kampa punatai'naba kama punataye. Piya, ka'waina aeba yagarunte kampa ibabuma aki pi'naba aeba igarubaye. ³¹ Pika urimukuwa abiyo: Aintiba kotiba a'ya'ma aguntaenabe a'ya'ma kamparaga kamana wasanami yepe kanara mae igakiye. Pigoya, Aota Awamus'a'ama akayasotakibi'na, ae kaintanawapa Kotiba kampa maegakiye. ³² Wasanama Ntagara nae uma kamparaga punatakibi'na, aepa aguntaenawapa uma asu'a pogaikuwe. Piya to ka'waina aeba Aota Awamus'a'ama uma kamparaga potakibi'na, ae kaintanaba mabipe mantaribe kampa uma asu'a pogaikuwe, Isu piya untiye.

Ata yawamaba kamparaga yamanka aeye

(Aruku 6:43-45)

³³ Isu piya untana to maya untiye: Pigoya tigeba ka yawama nka'wakaba: Aogiyenawe, untiri, kana yawaka kaga: Aogiyenawe, yewo. Piya, to ka yawama nka'wakaba: Kamparagawe, untiri, kana yawakaba kaga: Kamparaga yawe, yewo. Piya, yawama nkapa agamagiri, agowaka aogima napikibewe. ³⁴ We, kuyawama ntagara, tigeba agunta kina mintawa, aogi kamanapa kapa nanawae ukibewe, a. Pipa kampaye. Tigupi waintintanaba pabiyama tiwamupisa irosaye. ³⁵ Pigoya, aogi agu'yaga yagaramaba aogiyenabe aborakiye. Kamparaga agu'yaga yagaramaba pabiyama kamparagaena aborakiye. ³⁶ Naeba urimukuwa abiyo: Kamparaga kamana toma toma se, pi kamanapa Koti a'ya'ma kina pakoi pikibi ntaga ibigakini, kamana yigina uritakiye. ³⁷ Piya, aintib kaeka kamanataka kababikibe, pabi kaeka kamanatakabaya katakiye, Isu piya untiye.

Ka'isa kina'mi: Kukantana peka agakune, untawae

(Maka 8:12; Aruku 11:29-32)

³⁸ Piya uma uwaimogini, mono tisa kinape Parasi kaisa kina'mibe maya kamana a'wae pumagini omintawae: Tisa, kaeba kukantana ka pega agano, untawae. ³⁹ Piya yuguna maya uwaimintiye: Mono'wai kampa waima antage kina'mitaba, tigeba kukantanagaba yewo. Tigeba kukantanaba aoso'enaba kapa kampaye. Yonati aborantisa puma pabiyama

aborakiri agakibewe. ⁴⁰ Yona aeba kakaga yaga tabe inoyantawama nkantabaipinti mintantisa pumagi, Wasanama Ntagara naeba pabiyamagi ma antabaipinti kakaga yaga mikuwe. ⁴¹ Ainti Koti a'ya'ma kina pako pikibi ntgabba Niniba kumatisa kina aborama mamparisa kina'mi kamparaga kamanati uma abora uritakibewe. Pipa uwaba kampaye. Niniba kumatasa kina igepe Yona aeba wasanaraka'yankama ige'ma kamana uwaimogini abima igu a'wae puntaka, piya ma minto naeba Yona ae awametapa kampaye. Pipa asugasima mintogiri, pabi ntaga tigeba kampa piyama a'wae pigina pi Niniba kina uritakibewe. ⁴² Piya, mare takoerisa tabe wae aeba pabiyamagina a'ya'ma kina pako pikena yagaba ma mpabisa kina'miti kamparaga kamanati abora uritakiye. Pigoya pipa uwaba kampaye. Pi kana waepa aeba atuti wama Soromoni aetisa mono abintiye. Piya, ma minto naeba Soromoni ae awametapa kampaye, pipa asugasima mintuwé, Isu piya untie.

*Ke kina to kake a'wae pumagina kanakiye
(Aruku 11:24-26)*

⁴³ Piya untana, Isu to maya untie: Kewamaba wasanaba atate wama ka'me mpari umima, maru kumakaba aguyosagakiye. Aguyosakate maya ikiye: ⁴⁴ Namantepa atate kanantoka, pita'i to kake a'wae pumagi wakuwe. Piya ute a'wae pumagina agakibipa, kana namapa paga pumagini aogi pugaintane. ⁴⁵ Piyaena agate wama ke aokina tonaentisa tara umaema kina to kake kamparagaena pe kina ibabekini kanama pabi ntamapi ampikibewe. Aibigina pi ntagara aeba paipa kampa aogi yagara mintanti'naba aintiba tabera kampa aogimagine ata puwakiye. Mamparasa kamparaga kina tigetiba pabiyaena aborakiye, Isu piya untie.

*Isu ano a'nanto ige kamanane
(Maka 3:31-35; Aruku 8:19-21)*

⁴⁶ Pigoya, Isu aeba wasana mono uwaimima mintogini, ika'i anobe a'natabarabe kamana omikena ampa agawa pumagini mintantawe. ⁴⁷ Piya puguna, ka'waina igité maya omintiye: Kanobe ka'natabarabe kamana ugamenka takai' kagawa pumagini mintawé, piyama omintiye. ⁴⁸ Piyama omogana Isu maya omintiye: Nano na'natabaragi yewo, untie. ⁴⁹ Piya ute abagi kina'wa mintumeti aya nkasa pumagina maya untie: Igaiyo. Nano na'natabaragi maye, untana: ⁵⁰ Mantarisa nabanempa nkawamu wasima aegara kina pi ige nano na'nanto namana'maba mintawé, Isu untie.

13

*Aintana asigikena kamanane
(Maka 4:1-9; Aruku 8:4-8)*

¹ Pigoya, pabi ntaga Isuba namapintisa irosa'ma wamagina kotu kepari umintantiye. ² Umintogini, wawayu uwoma kina'mi ampa irosa'magini aki puguna, igité to ka wanipisa karebi intie. Imagina aeba wanipisa karebi mintogini uwoma kina igeba kepari mintantawe. ³ Piya puguna, meto kamana toma toma uwaimintana, kapa maya untie: Abewo. Ka yagarama aintana pikena wantiye.

⁴ Wama uma aibarase pogana aowa ka'isaba kepi tumpa waintantiye. Aibogana, kabarakama irosa'ma ampa nawaeagaintiye. ⁵ Piya aowa ka'isaba yabankama nkabobori uwaena manto waintometa tunkwaima, karu'ená irantiye. ⁶ Piya pogana abu'wapa tumomepa inata ara'waiyogana pa taogana asama pari puma pu'wantie. ⁷ Piya ka'isa aowapa kabubinti tunkwaima iraogana kabuwama aibarusa pogana asa wantiye. ⁸ Pigoya ka'isa aoba apa mabi tumpa waimagina anonkapa uwoma aborama aosa pama ka'isa 100-wa, to ka'isa 60-wa, to ka'isa 30-wa, suma aboraogana uwoma ntaninta waintantiye. ⁹ Piya, ageyaga kina'maba ma kamanapa abibebe peno, Isu piya untie.

*Isu meto kamanaka uwaimintiye
(Maka 4:10-12; Aruku 8:9-10)*

¹⁰ Kamana piya umagina uwaimogini, abagi kina'wa igeba agora wamagini abigama maya untawé: Kaeba nanaga meto kamanapa uwaimene, untawé. ¹¹ Piya yuguna, aeba maya uwaimintiye: Kakamagina Koti kabiratakena kamana waintemipa, pipa tigemana abikibewema untine. Pigoya, ka'isa uwoma kina'miba kampagini abikibewe, untine. ¹² Pigoya ka'waina aeba mono aminta'ena maemagina miyekanaba aintiba Kotiba to kake amekana uwomantana aboramikiye. Piya, to ka'waina mono aminta'ena kampa aogima maema miyekanaba apa'urekana uwa mikiye. ¹³ Igeba iyo ma'maginiba kampagini agabebe pewe. Igerasa abintiniba kampa aogima abibebe pewe. Piya, agowapa kampa abeka ma kamana meto kamanatasa uwaimuwe. ¹⁴ Pigoya, igecka Aisaya meto kamana mayama kaenti, pi'na esegi piye:

Igerasa uwa abintiniba igutasaba kampa aogima abibebe pikibewe, iye.

Piya, iyorasaba agantiniba kampa aogimagini agabebe pikibewe, iye.

¹⁵ Ma mparasa kina igepe igu'ama esegi puwama ige akumpagini, iyorka pewe, iye.

Pika iyowamaba kampa aogimagina agabebe pikiye, iye.

Igewamaba kampa aogima abibebe pikiye, iye.

Piya, igu'amaba kampa aogima napikiye, iye.

Piya pumagini igu'kampa a'wae pigipa ayamagi naeba aogima kaba itakuwe. Pipa kampaye, Koti untu kamana Aisaya piyama kaentiye.

¹⁶ Pigoya tigeba tiyoyaga mintiri, tigeyaga mintawa, pika ti'muntanabi mpintawé.

¹⁷ Naeba ubebema urimukuwe: Poropete kina mono kina uwoma kina'mi igeba tige abima agantana pi agakenagaba ibugagate itaogini, uwa kampa agama abintane, Isu piya untiye.

Aintana asigikena kamana ago uwaimintiye

(Maka 4:13-20; Aruku 8:11-15)

¹⁸ Piya untana, Isu to maya untiye: Pigoya, ma aintana asigikena kamana urimo kamana, pi'na nkagowa uma aborarimekiri abiyo: ¹⁹ A'ya'ma kina koti kabiratakena kamana abimagini aogima kampa igupi napikibe kina igezi Satani irosa'ma aintana asigimarantapa maerite wagasaye. Pi ntagara aeba kepi aowa tumpa waintanti pi nkawametane. ²⁰ Pigoya yabankama nkabobori tumpa waintantisza nkawameta piyamagini miye kina igeba mono abimagini pabigo iga ibegini napimagini miyewe. ²¹ Igupipa abupa kampa panta inata ara'ma miyewe. Piya pegana aogi kamana'neka ma'enä pumagini ataena piginaba ae abintemi kamana agarao kaikiye. ²² Pigoya, ka'isa aowa kabubinti tumpa waintanti, pi nkawameta miye kina'miba mono abimagini mintagana, mampabisa kuntaenagabe mone kutakabe napi napima miyekana, igaenama igu'ama maema a'yugu puwaigasakini pabigo mono'ama nkau'wapa kampa aboraye. ²³ Pigoya, apa mabi tumpa waintantisza pi nkawameta mikibe kina'miba mono abimagini igutasa maemagini miyewe. Piya pegana, ka'wainatiba au'wapa 100-wa, to wainatiba 60-wa, to ka'wainatiba 30-wa, suma aboraye, Isu piya uwaimintiye.

Yogabinti yoni tagakena meto kamana untiye

²⁴ Piya untana, Isuba meto kamana to ka maya uwaimintiye: Ka yagarama yogawati aogi aintana aowa asigitanti, aeta Koti kabiratakenaenaba awame pukue. ²⁵ Pigoya kana yagara aeba aintanaba asigitate waogana asekka kama yagarawampa kanamagna yoni nkaosa maemagina albarase pugaite wagaintiye. ²⁶ Pigoya, kana aintana pumaraomepa i'magina nakena aborakena pogana yonipa kaga tarage uma irantiye: ²⁷ Piya pogini, kayokaya yagara igeba agate yogawama nkabapa omima maya untawe: Tabe yagarare, kaeba yogagatiba aogi aintana asigimarantampepa, aetasabaya yonipa tagayerna, abigantawé.

²⁸ Piyamagini abigauguna maya untiye: Pipa kama kina ka'waina asigimarantegina tarage uma iraye, yogini, igeba abigama maya untawe: Abintaga, wama uma i'ma maebugasano, untawe. ²⁹ Piyama yuguna maya uwaimintiye: Kampaye. Tigeba yoni igintiri kaga nakenaena igisanaga uwa ataiyo. ³⁰ Nakenabe yonipe kaga waimaginis aborakibese. Pigoya, nakena maekena yaga aborakapa, yoga kina uwaimekini igeba marupa yoni kibi'ma i'magini asaema yakupi kaentini, nakena aintanaba maemagini namantepinti ataigna waikye, untiyema, Isu piya untiye.

Masitetige yisitiwamake meto kamanane

(Maka 4:30-32; Aruku 13:18-21)

³¹ Pigoya, meto kamana ka maya uma uwaimintiye: Koti kabiratakenaenaba masiteti a'wanto piyamawe. Wasana ka'waina aowa yogawati metantyiye. ³² Kana yamankapa to ka'isa yamanka piyama wanane. Aeba uwaenantowe. Kana yaba i'maginaba ka'isa nakena yawamapa igasimagna tabe yaena piye. Piya pegina, kabarankamaba kanama amarapa ampa mima inapa kiyewe, untiye.

³³ Piya untana, meto kamana to ka maya uwaimintiye: Koti kabiratakenaenaba yisitiba piyamawe. Ka wae'ma yisiti maemagini paretitinti paigu pekanaba, pi pareti anosama igaena tabera pukiye, Isu piya untiye.

Isuba meto kamana'amana untiye

(Maka 4:33-34)

³⁴ Pigoya, Isu aeba wasana kamana uwaimintanaba pi meto kamana'amana uwaimintiye. Kamana au'wapa kampa aboramagina uwaimintiye. ³⁵ Piya pogana, poropete yagara ka'waina kamana abima mayama kaenti, pi'na esegi puntiye: Nawamupipa meto

kamana'amana aboraka ukuwe. Piya, ma aborantemita kakanta kamana wairite kanama agowapa ampaema aborakuwema, Isu piya untiye.

Yogabinti yoni tagakena meto kamana'ama nkagowane

³⁶ Pigoya, Isuba pi a'ya'ma kina itaogini wauguna namapinti intiye. Ima mintogini abagi kina igeba aeti wamagini omima maya untawe: Witi yugabinti yoni taganti pi kamana ago kaeba yega abeno, untawe. ³⁷ Piya umagini abigauguna maya uwaimintiye: Wasana aogi aintana asigiyemipa Wasanama Ntagara naewe. ³⁸ Yogaba pipa a'ya'ma marisa kinane. Aogi aintanaba pipa nae monota miye kinane. Yoni nkaosa asigintemi, pi kinapa kewama nkaokinane. ³⁹ Pigoya, pi yoni nkaosa asigintemi ntagara, aeba Sataniwe. Piya, witi maekena yagaba pipa ainti tabe kanawee. Naninta maema akibikena kinapa enisore kina igewe. ⁴⁰ Pigoya, yoni i'ma yakupi kaeyasa pumagina, ainti tabe kanabipa aborakiye. ⁴¹ Piya, aintiba Wasanama Ntagara naeba enisore kina'ne uwaitakini maga maga naokina'ne igepisa naegarakenaenawaipa ata puwaitakenaenabe agunta pe kinape kibi'ma, ⁴² tayaba yakupi itakini tumpikibewe. Pita'i tumpimagini kube'ena pumagina iwarasa kaki aema mikibewe. ⁴³ Pigoya, pi ntagaba arupu kina igeba mantarisa ibawaimpa ae kumata pa nke'wasaena piyaenama e'wasa puwaitakiye. We, ageyaga kina'maba ma kamanapa abibebe peno, Isu piya untiye.

Wasanama mone pogisi abatama maenti meto kamanane

⁴⁴ Pigoya, Isu toba maya untiye: Koti kabiratakenaenaba piyamawe: Mone pogisi yogari kakataogana waintantiye. Piya waintogana, ka'waina uma abatamagina to kakantiye. Piyamagina tabera a'mu pumagina a'ya'waemaenawapa to kina imogini mone amuguna wama yoga uma ika puntiye, Isu meto kamana piya untiye.

Tabe ikantana pasesuwama mpeto kamanane

⁴⁵ Pigoya Koti kabiratakenaenaba ka yagarama yoga pumagina pasesuga aguyosaganti, ae piyamawe. ⁴⁶ Aeba aogi pasesu agategina, wama a'ya'waemaenawapa maema wasana imuma mone maeritegina wama aogi pasesu uma ika puntiye, Isu piya untiye.

Kuko'ama mpeto kamanane

⁴⁷ Pigoya, Isu to ka meto kamana maya untiye: Koti kabiratakenaenaba kuko piyamawe. Wasanami kuko wanipinti motagana tumegini inoyantaba toma toma ampa pai'ma awaitaye. ⁴⁸ Piya pegini, paibegana uwa mari iyegini kana inoyantaba pak'o pumagini nakenaba tu'napi atantini kampa nakena inoyantaba uwa kasagana waye. ⁴⁹ Pigoya, aintisa kana mampa a'ya pekanaba pabiyaena aborakiye. Piya pekini pi ntagaba enisore kina'mi maga maga nasi nasi pumagini, aogi kina'mi abakapintisa agunta kinapa kibi'magini, ⁵⁰ tayaba yakupinti ipasanaiginu tumikibewe. Pita'i tumpima kubi'ena pumagini iwarasa kaki aema mikibewe, untiye.

⁵¹ Piya untana, Isuba abagi kina'wa ibigama maya untiye: Tigeba a'ya'ma ago abibebe pewa, a, untiye. Piya yogini, igeba: Ago abune, untawe. ⁵² Piya yuguna aeba maya uwaimintiye: Pigoya, mono tisa kina'mi Koti kabiratakenaenama nkagoba abinta kina, igeba mono abikenaena uwaena waintiye. Piya, wasanama aotasaenawataso tonarona maema aboramisa puma, igeba mono abikenaenawaipisa tonarona aogi paisaenabe kasasaenabe maema napimagini aboraramewe, Isu piya untiye.

Nasareti kumatasa kina'mi Isu ikabitantawe

(Maka 6:1-6; Aruku 4:16-30)

⁵³ Pigoya, Isuba meto kamana toma toma uma a'ya atate, mawati wantiye. ⁵⁴ Wama mono namapi imagina kamana yogini, wasanamiba abite pam'i pumagini maya untawe: Aetasabaya ma aogi napiyenabe awame'ena potakena esegiyenabe maeye. ⁵⁵ Taeba agowapa abintune. Aeba kapenta yagarama ntagarawe. Anowampa ageba Mariyawee. Piya, a'natabarami nkigewaipa Yemisiwa, Yosepewa, Saimoniwa, Yutasawa sumawe.

⁵⁶ Pigoya amana'natabaraba taege kaga mintawe. Pigoya aeba a'ya'waemaenaba aetasa maemagina aborantiye, untawe. ⁵⁷ Piya umagini aeka abuguna kampa aogi puntiye. Aibogana, Isu maya uwaimintiye: Koti unti kamana yemi poropete yagarama kamana uwoma kina'mi ibugaye. Piya, mawatape agowatape namankapipe ageba kampa waintiye, untiye. ⁵⁸ Piya, igeba aeka kampa aogima ntapiyumeka, Isuba kukantanaba uwomapa pi kumatapa kampa puntiye.

¹ Pigoya, pintaga Karariya kina'mi tabe yagara Eroti aeba Isu kamana abite,² aokina'wa Isuka maya uwaimintiye: Pi Yoni mono wani pai'itanti ntagara aeba purintapisa aogamagina asima ma nkesegiyena puma miye, piyama napima uwaimintiye.

³ Pi kamanapa uwa kampa untiye. Pai irebu kina'wa uwaitaogini Yoni agisa aya kirokaema iga'na namapi atantane. Pipa mayaenaraka piya potantawé: Eroti aeba a'nantowampa Piripi nkwe, agewapa Erotyasi aparogana,⁴ Yoniba tutusotama maya untiye: Kaeba kuntana pumagina aogiyena kampa penema, omintiye. Piyama omogana, Erotyasiba pitaka agobi pogana, Eroti aeba yogini iga'na namapi ababotantawé.⁵ Pigoya, aegukena pomepa, uwa wasanamiba Yonikaba: Poropete yagarawé, yumeka aekuru puma atantiye.

⁶ Aibogana, Eroti yakari potanta yaga aboraogini, tabe kina igeba kanama aege ampa aki pumagin mintuguna, Erotyasi nkaragawampa ige iyobi wa'ená pogana, Eroti agamagina a'mu potamagina maya omintiye:⁷ Naeba Koti nkaobi uma esegi puwe. Kaeba piya mayaenaga yegapa kamukue, untiye.⁸ Piya yogana, kana araga aeba anowampa uma augeaogana maya untiye: Kaeba Yoni mono wani pai'itanti ntagara, ae a'nonkayampu isigi'ma tu'napi atamagina pabigo namo, untiye.

⁹ Piya yogana tabe yagara abima pami puma kunta puntiye. Pigoya, Koti nkaobi uma esegi puntika, wasana ma minta kina'mi abigini kamana'ne tumisanagawema:¹⁰ Owe otama, yogini, kayokaya kina'mi igeba wamagini Yonipa iga'na namapisa ana'mu uma isigima,¹¹ anonkayampuba tu'napi atamagini maete kanama kana araga me nkamuguna aeba maemagina anowampa amintiye.¹² Piyama Yonipa aeguyuguna purogini, Yoni nkabagi kina'miba ampa irosa'ma au'wapa maete uma kaintawé. Kaitate Isuti wama pi awaga kamana uma omintawé.

*Isu 5,000 kina naninta imintiye
(Maka 6:31-44; Aruku 9:10-17; Yoni 6:1-13)*

¹³ Pigoya, Isu aeba Yoni kamanapa abite, pi mpaba atate wanipisa karebi ima ka'me mpari abintowa umikena wantiye. Waogini, wasanamiba abite a'ya'ma kumatisa uwoma kina'mi aega'ma wamagini, pabita'i uma irosantawé.¹⁴ Piya puguna, wanipisa karebintisa tumima a'ya'ma kina igamagina, antara puwaitama yoni kinapa kaba'ma paru puwaitantie.

¹⁵ Piya pumagina mintogana, atamisaogini abagi kina'wampi igeba omima maya untawé: Mapa ka'me mpari mintokana atamisaya, pika wasana itagini a'ya'ma kumati wamagini naninta maema aboraiyoma, omintawé.¹⁶ Piyama omuguna maya uwaimintiye: Nanaga waiyema uwaitawé, a. Tigeba naninta imiyo, untiye.¹⁷ Piya uwaimogini maya untawé: Taeba ma paretiba nayaka'muna, inoyantaba tarawa suma, pabinkawanto urintune, piya untawé.¹⁸ Piya Yuguna aeba: Pipa naeti maete kanaiyo, yogini maete kanantawé.

¹⁹ Maete kanauguna, wasana uwaitaogini kabu aebaru'ma mara'mintantawé. Piya puguna pi pareti nayaka'muna, inoyanta tarawa sumagina maema, mantari ao ma'magina Kotiti a'mu potamagina apako pumagina abagi kina imogini, igeba wasana pakó pumagin imintawé.²⁰ Imuguni, igeba a'ya'magini namagini iga'e pantawé. Piya puntini, arita waiyomepa kibi'magini iraguguna nagisarisa tara tumpaema wa'nu ku awaitantie.²¹ Pigoya, kana naninta nanta kinapa 5,000-wa kinane. Piya, waya yagara araga kampa aisuntane.

*Isu aeba wani nkabobori wantiye
(Maka 6:45-52; Yoni 6:15-21)*

²² Piya pute, pabigo Isuba abagi kina'wa uwaitaogini, wanipisa karebi ibiwai imagini kotu maroteri a'wae pumagin wakena paitama wantawé. Piya puguna, aeba a'ya'ma kinapa itaogini wa'ewati wawaeyuguna,²³ aeba abintowa amuti imagina nunamu untiye. Piyamagina mintogana ase yogana, ae abinto pabita'i mimagina mintantiye.²⁴ Piya pogana, kana wanipisa kareba wamagina koyu abakapi uma irosantie. Piya pogana, pontaba waumetisa puritegina kanama wanipa tabera aiga'y'o'ya pumagina wanipisa karebi apasanantie.²⁵ Aibogana, Isuba aseka aba mariki wani nkabobori wamagina, abagi kina'miti uma irosantie.²⁶ Piyamagina waogini agategini iyekuru pumagin: Ke kina kanayemagini, A-e, a-e, untawé.²⁷ A-e, a-e, yuguna, Isuba karu'ena kega'e' uma maya uwaimintiye: Tintawamaba paru peno. Naene kanauwa, tiyekuruba a-piyo, untiye.

²⁸ Piya yogana, Pitaba pabigo awamuta u'magina maya untiye: Wa'ega, kae kanantanapa yega, wani nkabobori kaeti wano, untiye.²⁹ Piya yogana, Isu: Kanao, omintiye. Piya omogana, Pitaba wanipisa karebintisa irosa'ma tumimagina wani nkabobori Isuti wantiye.³⁰ Wantana tabe punta pogana agategina aekuru pumagina wanipinti tumikena

puntana, Isu agisumagina: Wa'ega, kaeba nao'maeyo, untiye. ³¹ Piya yogana, pabigo Isuba ayata u'ma ao'maentana maya untiye: Kaeba kamati'i'enaba uwaenantowe. Kaeba nanaga kagu'ama tara taraba pene, untiye. ³² Piya utegina, ababoginisi wanipisa karebinti iyusuguna, pabigo pontaba asaba'wantiye. ³³ Piya pogini, kana wanipisa karebi mintume a'ya'ma kina'miba Isu nkagora ampa parokaemagini maya untawe: Kaeba taga Koti Ntagaragawe, untawe.

*Isu uwoma kina Kenesareti mari kaba itantiye
(Maka 6:53-56)*

³⁴ Pigoya, kotupa ta'emagini Kenesareti kuma uwa mari iyuguni, ³⁵ wasanamiba Isupa agabebe pumagini yuguni, kana kuma'ama nkawamori minttano kina igeba yonintana ibome kinapa ibabute kanauguni Isu maya omintawe: ³⁶ Abintaga, kaigampa nkatuta aukaya pekana yonitepa tatawano, untawe. Piya ute, piya pume kina'miba kaba'ma aogi puwaentawe.

15

*Koti kamana agowamaba tayabamagi kamanapa asugasaye
(Maka 7:1-13)*

¹ Pigoya, pi ntagaba Yerusalem kumatisa Parasi kinape mono tisa kinape ka'isa Isuti ampa irosa'magini mayama abigama untawe: ² Kabagi kina igeba nanaga tayabamagi meto kamana agoba aemita pewe. Piya puntini igeba naninta nakenaba, iyantanaba kampa punta uwa nawe, untawe. ³ Piya ute abigauguna, Isuba maya uwaimintiye: We, tigeba pipa nanaga tigeti mpeto kamana ago wasintiri, Koti ae'wa nkawamupisa kamanapa aemita pewe. ⁴ Piya, Kotiba mayama utantiye: Kaeba kano kaba kamana abimagina isi'waisipa asaga'yuyo, iye. Piya, ka'waina aeba anoke abakega kamparaga kamana uma ata puwaositakibipa, aepa aeguma kaiyo, untiye. ⁵ Pigoya, tigeba pipa aya pewe. Yagara araga igeba inogi ibagipa maya kamana uwaimewe: Nautasaenaba mapa tisigepa kampa tisiminta, tabe mono namapinti maete ima Kotiti a'muntana amukuwe, piya umagini, inogi ibagi kampa aogima iyo'maeyagiripa, tigeba abeganaba aogi piyo. ⁶ Tigeba piya pumagiri Koti kamanapa aemita puntiri tigeti kamanapa maema wasima asaga'yuyewe. ⁷ We, kumpari kina, tigeka Koti Aisaya omogana meto kamana ago mayama taga untiye:

⁸ Ma kina'miba iwamutasaba nae nage asaga'yuntini, igu'amaba pagasara miyewe, iye.

⁹ Naeti mono'waipa kampa yewa, uwaba yewe, iye.

Piya, nae kamana'nepa kampa unta, wasanami kamana yewema, Koti iyema, kaen-tiyema, Isu piya untiye.

*Agu yagara i'nintana potakena kamanane
(Maka 7:14-23)*

¹⁰ Pigoya, Isu aeba pi kamana uwaimite to ka'isa kina igege'a yogini kanauguna maya uwaimintiye: Naeba kamana urimekiripa aogima abima napiyiyo. ¹¹ Tintabaipinti tumemintana, pi'naba tigu'amapa i'nintanaba kampa potaye. Tiwamupintisa irosa'ma iyemintana, pi'naba tigu'amapa i'nintanaba potaye, untiye.

¹² Piya yogini, abagi kina igeba agora wamagini maya omima untawe: Kaeba kamana uwaimekini Parasi kina abimagini ata pepa abeno, untawe. ¹³ Piya yuguna, pi Parasi kinaka maya uwaimintiye: A'ya'ma yaba mantarisa nabaneempaba kampa kurinti, pipa abu'yaga igima maebugaikkiye. ¹⁴ Piya, tigeba igeba uwa itaiyo. Igeba iyorika kina'mi to ka'isa iyorika kina ke iyakikena kinane. Piya, ka aorika yagarama to ka aorika yagara ke ayakikibipa kaga agagabi tumikibese, untiye.

¹⁵ Piya yogana Pitaba Isu maya omintiye: Meto kamana yempe'na nkagoba aborama yega taeba abeno, untiye. ¹⁶ Piya yogana Isu maya untiye: We, tigeba pabiyama tigu napi napiyenana kampa wainta mintawa, a. ¹⁷ Agoba mayamagiripa kampa abewe: Tiwamupi nagana tintabaipinti tumimagine ayasaurite ke'wati to kake tumiye. ¹⁸ Piya, tintabaipinti waintana tiwamupisa irosai, pi'naba tigu'amapa i'nintana pumagina kamparaga potaye. ¹⁹ Piya, wasana antabaipintisa aguntaena toma toma irosai, pipa mayamaweh: Ata napiyenawa, wasana aegukenaenawa, kumiyenawa, kupiyonawa, kuntanawa, kumpari kamana otakenaenawa, akayasukaenaenawa sumagina, ²⁰ pintanama tigu'amapa aegu-magina i'nintanaba potaye. Piya, tiyantana kampa punta naninta nantanamaba tigu'amapa aeguma i'nintanaba kampa potaye, Isu piya untiye.

*Kenani marisa wae ka'waina Isu agisuntiye
(Maka 7:24-30)*

²¹ Pigoya, Isu aeba Yuta kina ige maba atate to marisa kina'mi mpari Taya Saironi kuma waintusumeti wantiye: ²² Wamagina umintogana, Kenani marisa wae, pi mara miyome nkwa'e'maba kanama Isuka kega'e uma agisumagina maya untiye: We, Wa'ega, kaeba Tebiti ntagaragawa, naeka kantara punatao. Araganepa kewama tabera aigarama amiyo piye, untiye. ²³ Piya yogana abintanaba, Isuba kamanapa kapa kampa a'wae pomintiye. Piyama kampa a'wae pogini, abagi kina igeba omima maya untawe: Kaeba waya otaganawano. Aeba tak'a'i tabe kiga'e uta kanaye, untawe.

²⁴ Piya yuguna aeba maya uwaimintiye: Naeba Isureyo aruyenabisa yaga kabubama miye kanta pe kina'amanamiti unatantine, piya untiye. ²⁵ Piya yogana, kana wae aeba agora ampa irosa'ma parokaema esotamagina: Wa'ega, kaeba uwa nao'maeyo, untiye. ²⁶ Piya yogana, Isureyo kina'mige uwa kina'mige mono abikibeka Isu meto kamanapisa maya omintiye: Yagarantomi ntaninta ipa'magi kara imekanaba kampa aogi pikkiye, untiye. ²⁷ Piya yogana, kamana mayama a'wae pumagina omintiye: Wa'ega, pipa kanara yene. Pigoya karantontomi ibawaimpigi naninta yabaera atamagini nagana aritawa tumeginiba pipa uwa nawe, untiye. ²⁸ Piya yogana maya omimagina untiye: We waya, kamati'i'enaga imagina waintiye. Pi yempesa pugatano, untiye. Piya yogana pabigo aragawapa kaba'magina aogi puntiye.

Isuba uwoma kina kaba itantiye

²⁹ Pigoya, Isu aeba pi mparsa to kake a'wae puma kanama Karariya kotuta ampa irosantkiye. Irosa'ma amuti ima mintogini, ³⁰ uwoma kina kanagana pumagini aeti ampa irosantawe. Igeba igisa iya pu'wanta kinape, iyampu aigakayo'na'na kinape, iyorika kinape, aibo kinape, to ka'isa inuntana ibome kinape uwoma kina a'ya'ma ibabute kanama Isu agora ampa aki puwaitantawe. Aibuguna kaba'ma aogi puwaitawaentkiye. ³¹ Piya pogini, aibo kina'miba kamana untawe. Igisa iya pu'wanta kina'miba ke nasintawe. Iyampu aigakayo'na'na kina'miba aogi puntawe. Iyorika kina'miba iyo agantawe. Piya puguni, wasanamiba pi agate Isureyo kina'mi Kotiwaipa tabera i'mu potantawe.

Isu 4,000 kina naninta imintiye

(Maka 8:1-10)

³² Pigoya, Isuba abagi kina igege'a uma maya uwaimintiye: Naeba a'ya'ma ma kina'mika nantara puwe. Igeba naege kakaga yaga mimagini iga'enaga purewe. Piya, naeba uwaitakini igeba naninta kampa nanta wamagini, ke'i uma iyonanta pumagini ware'asanaga abimagi tara puwe, untiye. ³³ Piya yogini, abagi kina'wampiba maya omintawe: Mapa ka'me mpariwa, tabe nanintaba aetasa aborama ma uwoma kinapa imekana naigina kanarasa waetakiyema, omintawe. ³⁴ Piyama omuguna, Isu ibigama maya untiye: Tigeti ntanintaba ayaki waintiye, yogini, igeba maya untawe: Tonaentisa tara umaema paretiwa, uwaena inoyantantonto tarantowa sumagina waintiye, untawe. ³⁵ Piya yuguna, abintana yogini kana a'ya'ma kinapa aki pumagini mara'mintantawe.

³⁶ Piya puguna, kana paretibe inoyantabe maema Kotiti a'mu potamagina, apako pumagina abagi kina'wa imogini pako pumagini pi kinapa imintawe. ³⁷ Imuguni, a'ya'ma kina namagini iga'e pantawe. Aibuguna, arita waiyomepa kibi'magini tonaentisa tara umaema wa'nu kupi iraguguna awaitantiye. ³⁸ Pigoya, naninta nanta waba 4,000 wa mintuguni, waya yagarabu kampa aisuntawe. ³⁹ Piya potate, Isuba wasana uwaitaogini wauguna aeba wanipisa karebi imagina wama Magatani mari uma irosantkiye.

16

Awame'enaga yuguna Isu a'a-o uwaitantiye

(Maka 8:11-13; Aruku 12:54-56)

¹ Pigoya Parasibe Sarusi kinape igeba Isuti ampa irosa'magini amiyo pumagini maya untawe: Kaeba yegana mantarisa awame'ena aboraka agano, untawe. ² Piya yuguna, aeba maya uwaimintiye: Tigeba ase ikena pegiripa maya yewe: Abayarere puwae-waikana aiba pa takiye, yewe. ³ Maregiripa maya yewe: Ibinapa tunusuma atami pikana ka aekiye, yewe. Tigeba ibinankama nkagoba abintawe. Pi ma kana'ama nkagoba nanaga kampa abewe. ⁴ Antage kina, mono kampa wainta kina, awame'ena ka agakenaga yewo. Tigeba tonaba kampaye. Yonati awame'ena aborantisa pumagina aborakiri agakibewe. Piya uwaimitegina itate wantiye.

Parasi Sarusi kina'mikaba meto kamana untiye

(Maka 8:14-21)

⁵ Pigoya, abagi kina igeba Isuge kotupa ta'emagini maroti uma irosantini, nanintaba igege'ama kampa maenta wantawe. ⁶ Piya, Isu maya uwaimintiye: Pigoya, paretibi

yisiti atagana anosamisa puma, Parasi Sarusi kina'mi ata kamana'wai anosasanaga kabiyiyo, untiye. ⁷ Piya yogini, igeba mayama mare-u me-u puntawe: Pareti atate kanaompeka piyaba uramiye, untawe. ⁸ Piya kamana yuguna, pabigo kana kamana'ama agebi pasogana abite maya uwaimintiye: We, tigeba timatit'enaba uwaenantowe. Tigeba nanaga naninta kampa maete kanakaba abima tara tara tigiba napiyewe. ⁹ Naeba ka'ena punto, pipa karu'ena tigegu'a pegiri kampa napiyewo. Naeba pareti nayakamutasa 5,000 kina'mi imuwigani namagini iga'e pauguni, aritapa kibi'ma wa'nu kupa ayaki iraguguna awaitantiye. ¹⁰ Pareti tonentaitsa tara umaema pabintantorasa 4,000 kina imuwigani namagini iga'e pantini, aritapa kibi'ma ayaki wa'nu ku iraguguna awaitantiye. ¹¹ Pigoya, naeba nanintagaba kampa urimuwa, pipa aogimagiribibebe pusanaga yuwe. Piya, naeba Parasi Sarusi kina'mi ata kamana'wai anosasanaga aogima kabiyiyo, yuwe, untiye. ¹² Piya kamana uwaimogini, ibaba abibebe pumagini maya untawe: We, paretiwama yisitigaba kampa iye. Parasi Sarusi kina'mi kamanaka aogima kabiyiyoma iye, piya untawe.

Pitaba Isuka Karaisitiwema uma aborantiye

(Maka 8:27-30; Aruku 9:18-21)

¹³ Pigoya, Isu aeba wamagina Sisariya kumata, Piripi kabinti kumata uma irosakena puntana, abagi kina'wa ibigama maya untiye: Wasanamiba Wasanama Ntagara naekaba kewe yewema, ibigantkiye. ¹⁴ Piyama ibigaogini, igeba maya omima untawe: Igeba kae kageba toma toma sewe. Ka'isamiba Yoni mono wani pai'itanti ntgaraware yegini, ka'isamiba Iraiyaweye yegini, ka'isamiba Yeremayaweye yegini, to ka'isamiba to ka mintanti poropetewe, kaekaba piya yewe, piya untawe. ¹⁵ Piya uma omuguna, to kake ibigama maya untiye: Pigoya tigeripa pipa naekaba kewe, untiye. ¹⁶ Piya yogana Saimoni Pitaba maya untiye: Kaeba utaratanti ntagara Karaisiti, Koti miyaba ae yagaragawe, untiye.

¹⁷ Piya yogana Isu maya omintiye: Saimoni, Yona ntagara, kaeba ka'mu po. Ma kamanapa ka yagaramaba kampa ugamiye. Mantarisa nabanemba uma aboragamintiye. ¹⁸ Pika naeba kamana ka ugamukuwa, abo: Pita kaeba yabakawe. Ma ntabata naokina'nepa itakini atokaemagini mintigina a'abiwama nkesegiyenamaba kampa ipasanakiye, untiye. ¹⁹ Piya untanta to maya untiye: Naeba Koti kabiwaitakena kuma'ama kiwapa kamuwae. Pigoya mabi kabe ai'itaganaba, mantariba pabi nkawameta aborakiye. Piya, mabi kabe ki'itaganaba, mantariba pabi nkawameta pabiyamagina aborakiye, untiye. ²⁰ Piya utegina, abagi kina'wapa kamana esegima uwaimima maya untiye: Naeka Karaisiti yagara mintiyemaba tigeba wasanaba ankuwaimiyo, untiye.

Isu pu'magina asikibi kamana uwaimintiye

(Maka 8:31-9:1; Aruku 9:22-27)

²¹ Pigoya pi ntaga Isuba agobima ainti a'ya'waemaena aborakibi, pi kamana aboramagina abagi kina'wa uwaimintiye. Aibuntana Yerusaremi kumati iyekini monota kabiyume kina'mibe, tabe mono kiye kina'mibe, mono tisa kina'mibe tabe kuntaenaba aboramimagine, aeguyigina pu'magina kakaga yaga mite to aogama asikibi, pi kamanapa a'ya'ma uwaimiwaentie.

²² Piya uwaimogana Pitaba Isu abiri aega'e uma kabi'magina maya omintiye: Wa'ega, Kotiba kao'maeyakan pintanaba kampa aboramagmeno, untiye. ²³ Piya yogana Isu aka'intaesi potama Pitapa maya omintiye: Satanigawa, kaeba natate wagaso. Kaeba antage ki nayakima Kotikaba kampa napiyene. Kaeba wasanama kamana'amana napiyene, untiye.

²⁴ Pigoya, pabintaga Isu kamana ka mayama amato puma abagi kina'wapa maya uwaimintiye: Wasana ka'waina nae naegarakena puntanaba au'ama kamana akabitate wasanami igobi potakibikaba a-nkaekuru puma maripowa aesaga'uritegina naegarano. ²⁵ Pigoya ka'waina mikenaenawaka owe yekanaba, a'yugu potakiye. Piya, to ka'waina aeba naeka mikenaenawaka a'a-o yekanaba aboramikiye. ²⁶ Pigoya ka'waina aeba mabi a'ya'waemaena maemagina agu'amankapa aeguma kaiyekanaba, aya pukiye, a. Agupa ayamabayao to kakema ika pekana kanarasakiye, a. Pipa kampaye. ²⁷ We, naeba yekiri abiyo: Wasanama Ntagara naeba, nabanemba mantarisa e'wasaaenama naeti ampa e'wasa punataka, enisore kina'wapa ibabeka tumukune. Piya pumagi, a'ya'ma kina'miba mampabi pentana mana, pabi nkawameta antota'enaba imukuwe. ²⁸ Pigoya naeba taga urimukuwa abiyo: Tigetisa ma ka'isa minta kinapa kampa purintigi, Wasanama Ntagara naeba tumima wa'egaenanepta abora maema aborakini nagakibewe, Isu piya untiye.

17

*Isu nkau'ama to auga puntiye
(Maka 9:2-13; Aruku 9:28-36)*

¹ Pigoya, Isu aeba tonaeentisa ka'umaema yaga a'ya puwaogana, Pitana, Yemisina, a'nanto Yonina, sumagina ibabute wasana kampa minta amuti intawe. ² Pita'i iyora asima mima au'amaba to auga puntiye. Piya pogana, aowawamaba pankama nke'wasa pemisa puma e'wasa puwantiye. Aibogana kaiwampaba wae'wae pumagina tabera e'wasa puwantiye. ³ Piya pogana, Mosesege Iraiage pabigo ampa aborama aege kamana uma abuguna igeba igantawe. ⁴ Piya puguna, Pitaba Isu maya omintiye: Wa'ega, mata'i miyokana aogi piye. Pika abintaga kakaga ke nama kiyeno, kae'ena kana, Mosesenta kana, Iraiyantha kana sumagi, kiyeno, untiye.

⁵ Piya yogana, pabigo wae ibinankama tumimagina itikaewantiye. Aibogana ibinankama antabaipintisa kamana ka mayama tumintiye: Mepa nabugai ntagaranene. Tabera na'mu potauwa, ae kamana abiyo, untiye. ⁶ Piya kamana abite, abagi kina igeba iyowarisa aigarepa'magini tabaraba pumagini tabera iyekuru puntaw. ⁷ Piya puguna, Isuba igora wama aya ikaya puma maya untiye: Tigeba asima, karuba a-pumagiri miyijo, untiye. ⁸ Piya yogini igeba iyoma'magini agaumpe, Isu abiwa agantawe. ⁹ Pigoya, amutisa tumintini Isu maya uwaimintiye: Ma kasa'ena aga, pi kamana wasanaba a-nkuwaimima mintigi, Wasanama Ntagara naeba purintapisaba naogamagi asiyekiri uwaimiyoma, uwaimintiye. ¹⁰ Piyama uwaimogini, pi abagi kina'wa abigama maya untawe: Iraiya marupa irosakana ae aka'i utaratanti ntagara Karaisitiba irosakiye, mono tisa kina'miba nanaga yewema, abigantawe. ¹¹ Piyama abigauguna maya uwaimintiye: Iraiya aeba taga kanama a'ya'waemaena ampa maemagina aogima arupu pikiyeba untane. ¹² Pika urimekiri abiyo: Iraiya mparu mpaenti ntagaramabu ago irosa'ma mintogiri, kampa napinta, tigeti ntapiyena aega'ma ataena potantane. Piya, Wasanama Ntagara naepa pabiyama ataena punatakibewe, untiye. ¹³ Piya yogini igeba mayama abintawe: Pipa Yoni mono wani pai'itanti ntagara aeka iye, untawe.

*Isu ke kina'ma antabaipinti minta yagaranto kaba atantiye
(Maka 9:14-29; Aruku 9:37-42)*

¹⁴ Pigoya, amutisa tumimagini amuri wasana mintumeti tumpa irosauguna ka yagara Isuti kanama agora ampa parokaema maya omintiye: ¹⁵ Wa'ega, kaeba yagaraneka kantara potao. Aeba aonanta puma ware'naowa pumagina tapa wagite wanipintiba tumite piye. ¹⁶ Piya pegi abagi kinakampiti ababute kanaogini kaba'ma aogi potakena pugagat igiga pumagini uwa atawate, piye omintiye.

¹⁷ Piya omogana Isu maya omintiye: We, timatit'enya kampa wainta amu kina tigeba, naeba ayaki yaga tigeje mimagi kuntaenariqa aesaga'magi tiyo'maema mikuwe, a, untiye. Piya umagina: Kana yagaranto ababute kanaiyo, untiye. ¹⁸ Piya yogini igeba ababute kanauguna Isu kana ke kina kabiraogana kana yagaranto atate waogana aogi puntiye.

¹⁹ Aibogini, abagi kina igeba abiri abigama maya untawe: Taeba nanaga ke kina agarubakenaba pugagate ataaune, untawe. ²⁰ Piya yuguna, aeba: Timatit'enariqa uwaenantowe, uwaimintiye. Piya untanta to maya untiye: Taga timatit'enya uwaena yamanka'anton kanta puma wairitntagiripa, maro nkamu'amaka: Tigabao, yiginaba tigabakiye. Pigoya, aintiba ka yuga kampa waintigiripa kanara kampa pikibewe. ²¹ (Piya, ke kina pipa to ka'enarasaba kampaye, uwa nunumurasage monoka naninta a'a-o uma mikenaenarasage igarubakibewe, Isu piya untiye.)

*Isu purintapisa asikena kamana uwaimogana tara puntiye
(Maka 9:30-32; Aruku 9:43-45)*

²² Pigoya, ainti Isuba Karariya mari nasi nasi puntana, abagi kina maya uwaimintiye: Wasanama Ntagara naeba e'ero ntagaba kampa mintakana minaga'ena puma wasanami nkiyapi natakin, ²³ naeguyigi pu'magi, kakaga yaga miyekana to kake nabage pikiyeye, untiye. Piya yogini, abagi kina'miba abite ata inta paritantaw.

Mono namataka takisi punti kamanane

²⁴ Pigoya, Kapaniyamu kumati a'wae puma kanauguni tabe mono namankama takisi mone maemagini mintantawye, piya pume kina'mi ige Pita abigamagini maya untawe: Tisarimpaba tabe mono namankama takisi atabera aya piye, untawe. ²⁵ Piya yuguna, Pita maya untiye: Owe. Aeba atakaiwe, untiye. Piya ute Isu mintome ntamapinti imaginaba kana kamanapa kampa omintogana aewa abigama maya untiye: Pita kaeba nana kagi napiyene. Mabi to marisa tabe kina'miba igeba ketisa tabe takisi moneba maeyawye. Iyo'mitisabe uwa to ampa kabinta kina'mitisabaya maeyawema, abigantkiye.

²⁶ Piyama abigaogana: Pi ampa kabinta kina'mitisawe, untiye. Piya yogana Isuba to maya omintiye: Pipa kanara yena, pigoya pika iyokina igeba uwa miyewe. Pigoya, taeba Koti nkaokinatawe. ²⁷ We, igeba taeka abima a'yugu atabusanaga kotuti wama iga'na atagana tumokana inoyanta maru okabikibi, pi paibuma awamu atarama ka mone maema wama tasigekaba tabe mono namankama takisi menkimo, piya untiye.

18

Inamunkantonto miyesu puma miyioyo
(Maka 9:33-37; Aruku 9:46-48)

¹ Pigoya, pabi ntaga abagi kina igeba Isuti wamagini maya uma abigantawe: Koti kabiratakena yaga aborakanaba ke tabeba miliye untawé. ² Piya yuguna, Isu uwaena yagaranto ka kega'e yogana kanaogana abakanikaipis asitamagina, ³ maya untiye: Taga urimukuwa abiyo: Tigeba tigupa a'wae puma yagara araga ano aba aegaramisa puma mikibepa, Koti kabiratakenaenama nkagupi uma pasikibewe. Piya kampa pikibepa taga kampa uma pasikibewe. ⁴ Piya, ka'waina aeba ma ntagaranto ae awameta tumima mikib'i'naba Koti kabiratakenaenama nkaguta kiya mikiye.

⁵ Pigoya, ka'waina naeka napiimagina ma kana yagaranto ao'maekibi'naba pipa aeba nae nao'maekiye, Isu piya untiye.

Ataenama wasanama nkamatiti'enaba maema kamparaga potaye
(Maka 9:42-48; Aruku 17:1-2)

⁶ Pigoya, Isu to kamana maya untiye: Piya, maya yagaranto naegarakana, ka'waina ayakekana kamparagaena pukibemipa, kana ayakikibi ntagara araku'ma tabe yabantama ana'mubi ubu'atama tabe wanipinti apasanakasagananaisemisinta: Pipa kanara pewe, yesine. ⁷ Aguntaena pukena amiyo'ena asi nasiba mara aboragita, ataenabi myune. Aibegiba, aguntaena aborakibi ntagara aintiba ataenabi mikiye.

⁸ Pigoya, kayankamabera kagisawama kamparagaena pikena pekanapa, arisa'ma maebugaso. Kagisa kaya tararasa aguntaena pekanaba, ainti tayaba tayaba yakupi maebugatasanaga piya po. Kagisa kaya kampa wainta yagara mintana miyaba kumati uma irosakibempepa, pipa kanarane. ⁹ Pigoya, kao agama kamparagaena pikena pekanapa pi'ma maebugaso. Tara kaoyaga mintana ainti tayaba yakupi maebugatasanaga piya po. Kaorika mintana miyaba kumati uma irosakibempepa, pipa kanarane, Isu piya untiye.

Yaga kaka wanti meto kamanane
(Aruku 15:3-7)

¹⁰ Pigoya, Isu to kamana maya untiye: Tigeba pasemagiri ma ntakarantonto igecka abigina uwaena kantaba a-peno. Naeba pika urimukuwa abiyo: Enisore kina'wai igeba mantarisa nabanemba rkaobi asi nasi aborama miyewe. ¹¹ (Pigoya, Wasanama Ntagara naeba kabubama miye kina iguyosa'ma ibabikena tumintone.)

¹² Piya, ka'waina sipisipi 100 igeftisa ka'antabubawanakanaba kaikibera, 99 igepta itate kabubinti wama kaka wai'naka uma aguyosakiye. Pika tigeba nanaweyewe.

¹³ Naeba tagaka urimukuwe. Aeba aogima aguyosagakiye. Aguyosa'ma aboratamaginaba, 99 minta igecka wanane. Kaka wai aeka a'mu pikiye. ¹⁴ Piya, ma ntakarantonto igeftisa pabiyama ka'wainaba kamparagaenabi misanaga mantarisa nabanempati kampa aogi piye, Isu piya untiye.

Aguntaena pikibe kina'mika iyo'maekena kamanane

¹⁵ Piya untana Isu to maya untiye: Pigoya kao'yagara ka'waina kaeti aguntaena maema aborakanapa kaeba wama tisibiri aguntaenawapa aborama omo. Aeba kamanaka abima paruma kayone pekanapa abegana pabigo a'ya peno. ¹⁶ Piya, kamanaka a'a-o uma kampa abekanapa, ka yagarawo, tara yagarawo isiba peginisii isige agowapa kaga abima uma arupu potaiyo. ¹⁷ Piya, kapi kamanati a'a-o uma kampa abekiripa mono kiye kina'minkakiyenabi ababotaiyo. Ige kamana a'a-o umagina kampa abekiripa: Aeba to kina, agunta kinane, otaiyo.

¹⁸ Pigoya, naeba taga urimukuwa abiyo: Tigeba mabi a'ya'waemaena aguntaenawai uwa ataigina waiyekanaba, mantariba pabiyama waikiye. Piya, mabi uma uwa kasiginaba, mantarisa pabiyama uwa kaikiye.

¹⁹ Pigoya abiyo: Tigetisa tara yagara taramisi ka'enaga isigu kata atokaemaginisi esotaisiginaba, mantarisa nabanempaba abiwaisimikiye. ²⁰ Piya, wasana tarawo, naeka akibigipa, naeba ibakapi mikuwe, Isu piya untiye.

Ata kayokaya yagarama mpeto kamanane

²¹ Pigoya Isuba kamana piya yogana, Pitaba aeti uma mayama abigantiye. Wa'ega, nao'yagarama aguntaena punatakapa, aguntaenawapa asu'a pugasakana ayaki pekana kanarasakiye. Piya, asu'a pugasakana tonarentisa tara umaeayakana kanarasakiyoma, abigantiye. ²² Piyama abigaogana Isu maya omintiye: Tonaentisa tara umaemaba kampaye. Kampa aisuntaenaba uwa asu'a pugaso.

²³ Pigoya, pika Koti kabiratakenaenaga, meto kamana yekiri abiyo: Ka marasa tabe yagara ka'waina kayokaya yakarakinunka: Iretane namikibewema, igege'a untiye.

²⁴ Pigoya, ka yagara ababute kananta aetiba iretawpa 10,000,000 tora waintantkiye.

²⁵ Aeba tabe irita pipa antota amikenagaba mone aguyosagantiye. Aibogana tabe yagara aeba pi ntgararama nkwaya yagarawape, aewape, yaga kotankape a'ya'magini wasanami ikantana maeyigina, kana monewamaba ae'enaena puwaewanema, untiye. ²⁶ Aiyogana, kayokaya yagara aeba tabe yagarama nkagisabi ampa parokaema maya uma agisuntiye: Tabé yagarane, kaeba uwa nataga naeba ainti iretagapa kamenoma agisuntiye. ²⁷ Piyama agisogana tabe yagara aeba antara potama iga'na namapipa kampa ababotanta atunkapa uwa atatantiye.

²⁸ Piya potaogana namapintisa irosa'ma tumima waomepa kana kayokaya yagara ao'yagara ka tumpa abatama, aeti atunkapa 100 tora waintogana, abatama araku'ma ana'mu kana u'ma tutusotama maya untiye: Atuntepa pabigo ma kanara namo, untiye.

²⁹ Piya yogana, ao'yagara aeba agora uma parokaema agisuma maya untiye: Kaeba uwa nataga ainti naeba iretagapa kamukuwe, untiye. ³⁰ Piya uma agisogana, kamana'wapa kampa abinta wama yogini ao'yagaraba maya uma iga'na namapi ababontantewe. Aibuntini maya omintawé: Iretagapa amiwaegaite irosakibene, untawé.

³¹ Piya pogini, aege atokaema yoga pume kina'miba agate igeba intara pumagini wama tabe yagara kana kamana uma omiwaentawé. ³² Piya yuguna aeba abite kayokaya yagara aepa to kake kega'e uma maya omintiye: Kaeba kamparaga yagaragawe. Nagiseka naeba nantara pugatama tabe iritanepa atagatauwé. ³³ We, kaeba kao'yagaraga pabiyama kantara potama au'isanawé, piya untiye. ³⁴ Piya uma tabera amo'ena pumagina irebu kina'miti atama maya untiye: Tigeba kamparagaena potama karana atamagiri miyigina tabe iritanepa a'ya wakiri ataiyo, untiye. ³⁵ Pigoya, tigeba tinta ase'yonabisa aguntaena kampa mae igasiginaba mantarisa nabanempaba pabiyama kuntaena puritakiye, Isu piya untiye.

19

Waya agarubakena kamana Isu untiye

(Maka 10:1-12; Aruku 16:18)

¹ Pigoya Isu aeba toma toma kamana uma a'ya atate, Karariya maba atate Yontani wani imparoteri ura'emá wama Yutiya irosantiye. ² Irosaogini wasana uwoma kina'mi igeba aegarauguna yoni kina'wai kaba itantiye. ³ Aibuguni, ka'isa Parasi kina'miba aeti irosa'ma, amiyo potakena maya uma abigantawé: Ago kamanatepinti wasanama waya ka'menaraka puma waya kaikenaba kanara payawa, uramoma abigantawé.

⁴ Piyama abigauguna maya uwaimintiye: Tigeba mono kamana mayama waintipa, pipa kampa aisuma abewa, a. A'ya'mena Koti maru maema aborantanaba, wabe wayape kaga aborawaigantine. ⁵ Aborawaisitama, maya untine: Pika wamaba anope abape isitate waya'wampati uma atokaema, isigeba ka kina kanta puma miyese, untiye. ⁶ Piya, isigeba taraba kampa punta, ka'ena puma miyese. Koti atokae isitantika, wasanamaba a-nkatara isitano, Isu piya uwaimintiye.

⁷ Piya uwaimogini igeba maya untawé: We, pipa Moseseba waya kaikena puntiripa esa amima otaiyoba, piyaba nanaga untiye, untawé. ⁸ Piya yuguna Isuba maya uwaimintiye: Monoka kampa karu'ená abima tige akuneka Mosese waya kaikenaenagaba abima owe puritantine. Piya, agobinti'naba piyaba kampa untine. ⁹ Pika naeba urimukuwa abiyo: Ka'waina waya'wampaba kumiyonaba kampa puntakana uwa kaite to wae maekibipa, aeba kumiyenaba pikie, Isu piya untiye.

¹⁰ Piya yogini, abagi kina igeba maya omima untawé: Wawayá isige agoba piyama waintika, waya kampa maenta uwa mikenaenaba, pipa kanarane, untawé. ¹¹ Piya yuguna Isu maya uwaimintiye: Pi ye kamana ukubopa, pipa uwa kina'mi wanane. Pi utawaitanta kina'mi mana ubikibewe, untiye. ¹² Wasana ka'isa kinapa inogi intabaipintisa waya kampa maekena kina aborawé. Piya, ka'isa kinapa wasanami i kasamagini waya kampa maekibewema, uwaitawé. Piya, to ka'isa kina'miba mantari kabiratakenaenaga napimagini waya kampa maenta uwa miyewe. Pigoya, ma kamanapa otawaitai kina'mi mana abima aegaraiyo, Isu piya untiye.

*Isu inamu ntakarantonto akayona puwaitantiye
(Maka 10:13-16; Aruku 18:15-17)*

¹³ Pigoya, igeba inamu ntakarantontowai Isuti ibabute kanauguna, ayapa i'nota atama nunamu ikiyema omintawé. ¹⁴ Aibuguni, abagi kina igeba karu kamana uwaitauguna, Isuba maya untiye: Tigeba itaigini yakarantonto igeba naeti kanaiyo. Tigeba ankkakunkitaiyo. Piya miye kina'mi kaba Koti kabiratakenaenaba utawaitantine, untiye.

¹⁵ Piya ute ayapa inota atama kayone puwaitategina, kana maba atate tori wantiye.

*Tabe kutantaga masimabi ka'waina Isu akabitantiye
(Maka 10:17-31; Aruku 18:18-30)*

¹⁶ Pigoya, ka yagarama Isuti ampa irosa'ma abigama maya untiye: Tisa, naeba aogiyenaba aya pukuboti, e'wasaena maemagi a'ya'ma yagaba miyaba mikuwoma, abigantiye. ¹⁷ Piyama abigaogana, maya omintiye: Pi aogiyenagaba nanaga nabigane. Aogiyenama nkagoba ka'ant'o mintiya, kaeba a'ya'ma yaga miyaba mikuwe untanapa, ae kamana ago abima wasiyo, untiye.

¹⁸ Piya yogana, aeba: Ae kamana agowema, abigantiye. Abigaogana maya untiye: Paisa mono ago kamana'amaba maya iye: Kaeba wasanaba a-nkaeguma kaiyoma, kumiyenaba a-poma, kuntanaba a-poma, kumpari kamanaapa to wainapa a-sotaoma, ¹⁹ kano kaba kamana wasiyo. Piya puntana kaekaka kabemisa puma kaokinakaba pabiyama kabeno, piya untiye. ²⁰ Piya yogana kana yagara aeba maya omintiye: Pipa wasirite kanama mintantone. Pika kapa aya pusuwema abigantiye. ²¹ Abigaogana Isu maya omintiye: Kaeba arupu puma aogima mpikenaga untanapa, wama kotagapa to kina imima mone maemagina kusi kina imegana aogima miyepa, mantari aogiyenagapa aboragamekana kaeba kanama ampa naegarao, untiye. ²² Piya yogana kana yagara abima kamparaga potate wantiye. Kotapa taberaka'ya waitantogana, pika piya puntiye.

²³ Piya pute waogana, Isuba abagi kina'wa maya uwaimintiye: Naeba taga urimukuwa abiyo: Tabé kutantaga kina'mi kabiratakena manta kumati ikenagaba pipa igiga puma tabe kuntuyenawe. ²⁴ Naeba pabi kamana to kake urimukuwe. Tabé kamoro yagawama na'ama nkagepinti uma pasikenaenaba pipa esegiyenawe. Piya, tabe kutantaga yagaramaba Koti kabiratakena kumati ikenabá pipa to awameta, tabe kuntaenawe, untiye. ²⁵ Piya yogini, abagi kina'miba pi kamana abite pam'i pumagini maya untawé: We, kebaya mantariba ikiye, untawé. ²⁶ Piya yuguna Isuba igantana maya untiye: Pipa wasanama piyakenaenaba kampa waintiye. Pipa Koti ka pikenaena waintiye, piya uwaimintiye.

²⁷ Piya uwaimogana Pitaba pabigo awamuta u'magina maya untiye: Abo, taeba a'ya'waemaenarepa takabiaetate kaepa kaegaraune. Pigoya aintiba pi'n'a nkantotapa nanaena aboraramikiye, abigantiye. ²⁸ Piyama abigaogana Isu maya uwaimintiye: Naeba taga urimekiri abiyo: Aintiba a'ya'waemaena aborama aogi pikena kanabipa, Wasanama Ntagara naeba e'wasa naemu yabaeneta miyekini, naegara kina tigeba pabiyama mampabisa tabe kina'mi nkimu yabae nagisarisa tara tumpaema pita'i mima, Isureyo aruyena to nagisarisa tara tumpaema kina'mi ige kamana uma a'ya itakibewe. ²⁹ Pigoya, ka'waina aeba naeka uma aganto, a'nant'o, amana'ma, ano aba, araga yagarawa, kuma'wa, kiyanka, atate aeba naegarakibi'naba pi'n'a antotapa uwomantana maema mintana aintiba miyaba'ena maekiye. ³⁰ Piya, iba ka'isa kiya kina'miba igeba kayokaya kina miyigini to iba kayokaya pe kina'miba igeba kiya kina uma mikibewe, Isu untiye.

20

Waini yuga kiye kina'mi kamanane

¹ Pigoya, Isu to kamana maya untiye: Koti kabiratakenaenaba waini yugawama nkaba aeta meto kamana ukuwe. Piya, waini yugawama nkaba ka'waina abaya aseka ka'isa kayokaya yagara ibabikenä wantiye. ² Pigoya ka'isa ibabuma ka yagasa ikantanaba wantora piya uma aborawaimogini abuguna kanarasaogini yogawati uwaitaogini wantawé. ³ Pigoya to pabi ntaga abaya to kake wama ka'isa kina maketi kumati uwa mintuguna, ⁴ uma igama maya uwaimintiye: Waini yugane waintiye, wama uma pigi, ikantanaba kanara timukuwe, yogini, abite waini yugawati wantawé. ⁵ Pigoya, kagi abebege atamaisakenage pogana, to kake wama pabiyama uma ibabuntiye. ⁶ Pigoya atamai to kake wama ka'isa kinapa yoga kampa punta uwa mintuguna uma ibatama maya uwaimintiye: Tigeba nanaga e'ero ntaga uwanama mintagana atamaisaye, untiye. ⁷ Piya yogini maya omintawé: Ka yagaramaba yoga kamanaapa taepa kampa tababuma urataine, untawé. Piya yuguna maya uwaitama untiye: Waini yugane waintiye, wama piyo, uwaimintiye.

⁸ Piya, yugawama nkababa piya puma mintogana, aseyogana kiya yagarawa mayama omima untiye: Kaeba yoga kina igege'e uma mone imo. Ainti ibabo kina'mitisa agobima

imirite wamagina maru ibabo kina'mitiba uma imima a'ya po, piya untiye. ⁹ Piya yogana abite ainti atamai ibabunta kina ige igega'e yogini kanauguna ka'wainanta ka'wainanta wantora imiwaentiye. ¹⁰ Piya imogini, maru kanaume kina'mi igeba agate: Taepa ikantanaba mesuba puma tamikiyema, napintawe. Aibuguna pabiyyama wantora wantora imintiye. ¹¹ Piya imogini agate, yogawama nkabapa kabi'ma maya untawe: ¹² Ainti kana kina igeba yogaenaba uwa anagi'ena ampa pewe. Piya taeba pipa pankaerugumpa taise pagapaga yugaena puma mintokana ase iya, pipa nanaga ainti kana kina igeke ka awametapa tamihi, untawe.

¹³ Piya yuguna, yogawama nkababa igegetsa ka yagara maya omintiye: Nao'yagara, naeba ataenaba kampa pugatauwa, kaebe wantoraga ugamogana abima kanarane yempene. ¹⁴ Pika monegapa maete wao. Naeba ainti kana kinapa kaeke ka awameta timukuwema napiyegana kanarasaine. ¹⁵ Pintanaba pipa nae'enawe, pika naeba agowama nae napimagi, piya mayaena pikena untapa pukuwe. Kaebe nanaga nanta aseyonaneka pogananapa abima ataba pene, untiye. ¹⁶ Pika kayokaya kina'miba kiya kina miyigini, kiya kina'miba kayokaya kina mikibewe, Isu piya untiye.

Isu purintapisa asikena kamana kakagara untiye

(Maka 10:32-34; Aruku 18:31-33)

¹⁷ Pigoya Yerusaremi kumati ikena puguna, Isu aeba abagi kina nagisarisa tara tumpaema ige'amana ibabogini ibiwai wantawe. Ke'i wantini maya uwaimintiye: ¹⁸ Abewo, taeba Yerusaremi kumati iyune. Pita'i nabanempaba Wasanama Ntagara naepa tabe mono kiye kinape mono tisa kinape ige iyapi natakini igeba: Aeguyiyoma, unamatagin, ¹⁹ namu'isa kina'miti unataigini igeba karana natama eru kasutasa naeguma maripora ita nataigi purukuwe. Pu'magi kakaga yaga miyekana nabanempaba to kake asinatakiye, Isu piya untiye.

Yemisige Yonigeba tabe mikenaga untase

(Maka 10:35-45)

²⁰ Pigoya, pi ntaga isinowaisimpa Sebeti ntagara tara isibabute Isu nkagora ka'enaga esotakena uma parokaentiye. ²¹ Uma parokaeyogana abigama maya untiye: Kaebe nanaga kabiye, yogana, aeba maya untiye: Kaebe yega, yagarane tara ainti tabe Wa'ega aborakibempe ntagaba kayatakanti kayake'masima mikibese, untiye. ²² Piya yogana Isu maya omintiye: Tigeba aibo'enarika piyaba yewe. Nae nantara'enabi tisigeba kanara pasikibeso, untiye. Piya yuginisi isigeba: Owe, pabiya pukuse, untase. ²³ Piya yusuguna maya uwaisimintiye: Nae nantara'enabi taga pasikibese. Pigoya, nayatakanti nayake'masi mikena kamana ukenaenaba pipa naetiba kampa waintiye. Nabanempa uwaitanti kina, ige pi yabaerapa mikibewe, Isu piya untiye.

²⁴ Pigoya, to nayatar'a'mu abagi kina'miba pi kamana abite kana agantoke a'nantokeba ka isibirantawe. ²⁵ Piya puguna Isuba igega'e uma maya uwaimintiye: Mampabisa tabe kina'miba esegima kabiwaitawe. Imagini miye kina igeba uwa kinapa igasimagini tabe kina'wai miwaetawe. Pipa abintawe. ²⁶ Pigoya tigeba itigiso atigiso piyo. Pika tigetisa ka'waina imagini kiya mikena puntanaba, aokina'mi kayokaya'ena pumagina miyeno. ²⁷ Pigoya ka'waina aeba paitaritamagina kiyari mikena puntanaba, aokina'mi ige yoga kina miyeno. ²⁸ Piya, Wasanama Ntagara naeba pabiyyama tige nae kayokaya'ena punataiyomaba kampa tumintone. Næeba tige kayokaya pumagi, mikenaenanetasa uwoma kina ika puma a'wattakena tumintone, Isu piya untiye.

Isiyorika yagara tara isiyo agawaisitantiye

(Maka 10:46-52; Aruku 18:35-43)

²⁹ Pigoya Isube abagi kina'wape igeba Yeriko kuma agaite wauguni, wasana uwoma kina'mi iyega'ma wantawe. ³⁰ Piya pugunisi, isiyorika yagara tara ke awamori mintusuguni, Isu kanama ke'i waye, untawe. Yugunisi abite pabigo agasiya kiga'e uma maya untase: Wa'ega, kaebe Tebiti ntagara tasigeka kantara po, untase. ³¹ Piyama tabera kega'e yusuguni, a'ya'ma kina'miba: Paka pisoma, uwaisimumepa, isigeba kampa abintinisi to kake esegima kega'e umaginisi maya untase: Wa'ega, Tebiti ntagara, kaebe tasigeka kantara purasitao, untase. ³² Piya yusuguna, Isu aeba abite keta asimagina mintana yuginisi kanausuguna: Nana purasitaomagirisi yesema, isibigantiye. ³³ Piyama isibi-gaoginisi maya omintase: Wa'ega, tasiyo agarasitaoma yuse, untase. ³⁴ Piya yusuguna, isiyora aukaya pogana pabigo isiyo apina'ma agantase. Aibuntinisi Isu aega'ma wantase.

¹ Pigoya, wamagini Yerusaremi kumata uma irosakena puntawe. Piya puntini, Oribesi amuta irosa'ma uwaena kuma'anto ka, agewapa Petipaesi pipa agaikena puntana Isuba abagi kina'wampitisa tara yagarara uwaisimima isigaruba'magina, ² maya untiye: Tisigeba maretai uwaena kuma'anto waintiti wamagirisi, tonki yaga anobe aikeribe iga'nara mintakibesa, uma iyoba'ma isibabute kanaiso. ³ Tisigeba piya pisigina ka'waina tisibigakirisiba maya omiso: Wa'ega aeba pikaba a'yo mpaekenaga iye, omiso. Piya yisiginaba owe urisitakiye, piyama uwaisitaognisi wantase. ⁴ Pigoya, pintanaba uwaba kampaye. Poropete ae meto kamana'ama esegi penema piya puntane. Aeba maya kamana kaentiye:

⁵ Tigeba Saiyoni kumatasa kinapa maya uwaimiyo: Abewo. Wa'egari aeba aguparuye-nawaka uma tonki yaga akabapi mima tigeti waye, iye.

Pika aikeri yaga akabata mima waye, piyama kaentiye.

⁶ Pigoya uwaisitaognisi abagi yagara tara isigeba wamaginisi Isu nkawamu wasimaginisi, ⁷ yaga anoke aikerige uma iyoba'urite kanausuguni, kaiwaipa atamagini abobori ama agutauuguna ima mintantiye. ⁸ Piya pogini, uwoma kina'mi kaiwaipa atamagini ke'i ama aguta wauguni, ka'isa kina'miba yanta aerisa'ma agurite wantawe. ⁹ Aibuntini, uwoma kina'mi aoribe aka'ibe wama i'mu potama maya untawe:

We, Tebiti ntagara taeti kanaye. Wa'egawama nkawamuta kanaika ta'mu potano.

We, inatisa yagaraga ta'mu potano, uta wantine.

¹⁰ Pigoya Yerusaremi kumati iyogini, kuma ago kina'miba pamipumaginayauntawe: Pipa ke kanagini yewe, yuguni, ¹¹ maya uwaimintawe: Poropete Isu, aeba Karariya mari Nasareti kumatasa aborantinapimpaye, piya untawe.

*Tabe mono namapi ikantana puguna Isu igarubantiye
(Maka 11:15-19; Aruku 19:45-48; Yoni 2:13-22)*

¹² Pigoya, Isuba pita'i tabe mono namapi iyomepa pita'i ikantana puma mintuguna, igarubantana mono ankami ankami pume kina'mi ntatabebe kabara ataume ntatabebe apasana'ma asunukaentana, ¹³ maya uwaimintiye: Mono isa'ama maya iye: Mono namantepa nunamu ukena namantana peno, iye. We, tigeba piya kuntana pe kina'mi ntamantana piye, uma igarubantiye. ¹⁴ Piya utegina, pi tabe mono namapinti mintogini iyorika kinape iraena ibome kinape aeti kanauguna kaba itantiye. ¹⁵ Piya pogini, tabe mono kiye kina'mibe mono tisa kina'mibe igebe pi esegiyena ometana agantini yagara araga tabe mono namupi i'mu potamagini: Tebiti ntagara taeti kanagi ta'mu peno, piya yuguni abintini, igeba kamparaga potamagini, ¹⁶ Isu maya omintawe: Ma nkaraga yagarami i'mu pugatapa abeno, untawe. Piya yuguna Isu maya untiye: Naeba ago abuwe. Piya, mono kamana ka waintipa mayama kampa aisewo: Inamu kina nonotasa kina'mi inta maema ase'yo pegana iwamupi Kotiti i'muntana aogima aboraye, pipa kampa aisewoma, ibigantiye. ¹⁷ Aibumagina, akabiwaitate Yerusaremi kumatisa tumimagina Petani kumati ima ase yogana waintiye.

*Isu yogana piki ya asawantiye
(Maka 11:12-14, 20-24)*

¹⁸ Pigoya, abayara tabe kumati a'wae puma kanaogana aga'ena abuntiye. ¹⁹ Piya pogana ke awamora piki ya ka agategina wama agori a'waka uma aguyosagaomepa a'yenkamana waintogana agantiye. Agate kana ya maya omintiye: Kaeba apa toganaba kampa aekibene, yogana, pabigo kana yaba tamiri'ma asamagina pari puwantiente. ²⁰ Piya pogini abagi kina igebe agategini pamipumamayauntawe: We, ma ntaba nana pumaginagarropa asaye, untawe.

²¹ Piya yuguna Isu maya uwaimintiye: Naeba taga urimekiri abiyo: Tigeba tigu'ama tara tara kampa punta esegima timatiti pumagiri mikibepa, pipa yara kukantana aboramisa puma pipe to ka'isaena pikibewe. Piya, tigeba maro amu'amaka: Kaeba tigaba'ma wanipinti tumo, yesinta, pabi ikibesa pesine. ²² Pigoya, aogima timatiti puma mintiri a'ya'waemaenaga esotaiginaba Koti aborarimikiye, Isu piya untiye.

*Kiya kina'mi Isu amiyo puma abigantaweh
(Maka 11:27-33; Aruku 20:1-8)*

²³ Pigoya, wama tabe mono namapi ima mono untiye. Umaginamintogini, monotasa tabe kiye kinape Yuta kina'mi monota kabi yume kinape igebe aeti wamagini maya uma abigantaweh: Kaeba mata'i a'ya'waemaenaga pempeka ke nkawamutapaya a'ya'waemaenaba poka pipa antotapa urimukue: ²⁵ Yoni mono wani pai'itantintana aetasa aborantie. Pipa mantarisaenabera wasanamintanawema, ibigantiye. Piyama

ibigaogini igeba: Nana kamana omusune, ugate uwa asaba'wantawe. Aibuntini maya untawe: Taeba mantarisaenawe yekanaba, nanaga kamana'wapa kampa abintawe, ukiye.²⁶ Piya, wasanamantanawe yekiniba, wasanamiba Yonikaba tabe poropetewe umagini ataena puratakibewe, untawe.²⁷ Piya utegini igeba: Kampa abintune, untawe. Piya yuguna Isu kamana mayama a'wae puwaimintiye: Pi yepa kanarana, pipa naeba pabiyama ke awamutapaya a'ya'waemaena poka antotapa kampa urimukuwe, Isu piya untiye.

Ka yagarama ntagara taramisi meto kamanane

²⁸ Piya untana to maya untiye: Kamana ka urimekiri abimagiri agaiyo. Ka yagarama ntagara tara mintantase. Aibusuguna aeba amaru yagarawa maya omintiye: Yagarane, ibaba kaeba wamagina waini yugaena uma po, omintiye.²⁹ Piya omogana kana yagara aeba maya untiye: Aerawane, kampa nabosagaye, untiye. Piya utegina ainti to uma a'wae puma napimagina uma puntiye.³⁰ Piya pogana isibaba aeba to aintisa yagara pabi yoga kamana omogana maya untiye: Naeba kanaraka uma pukuwe, untiye. Piya ute ainti antawama ata pogana atate wagaintiye.³¹ Pigoya, tigeba aentagaramaba abawampa nkawamu wasintiye yewe, untiye. Piya yogini igeba: Amaru yagarawampawe, untawe. Piya yuguna Isu maya uwaimintiye: Naeba tagaka urimukuwe. Ae pemisa puma takisi maeya ku kinape kupiyo waepa paitamagini Koti kabiratakenaenama nkagupi uma pasigiri, tigeba aintisaena pikibewe.³² Piya, Yoni ampa irosa'ma arupu puma mikena ki tiyakogiripa, tigeba mono'wapa a'a-o yuguni takisi maeya ata kinape kupiyo waepa ige uwasuwama a'yugu mikenaenawaipa atategini wasintane. Igeba piya puguripa, tigeba igantiripa aintiba kampa tintara pumagiripa kampa a'wae pumagiri abintane, Isu piya untiye.

Waini yugara kamparaga kina'mi kabinta meto kamanane

(Maka 12:1-12; Aruku 20:9-19)

³³ Piya umagina, Isu to maya untiye: Naeba to ka kamana urimukuwa, abiyo. Wasana ka'waina mawata waini kurintiye. Ku'ma a'ya atamagina, ainkima kagisa kimagina waini anti airakenaena puntiye. Piya potama yoga kiye pikena nama kitama kiya kabiwaitate to mari wantiye.³⁴ Umintogana nakena aborakena kana aboraogana, kayokaya kina'wa: Waini nae'ena ka'isa maete kanaiyoma, uwaitaogini wamagini kiya kabima miyume kina'miti uma irosantawe.³⁵ Irosa'ma yuguni, kana yoga kiye kina igeba kayokaya kina iraku'ma kapa uwa aeguntini, kapa ara aeguntini, piya kapa yaba kasutasa ausa aeguntawe.³⁶ Piya puguna yogawama nkababa to kake uwoma ntagara uwaitaogini ampa irosaunguni pabiyaena puwaitantawe.³⁷ Piya puguna ainti ae'wa ntagara mayama napimagina otantiye: Yagarane agarubakana wakiniba ae awamu wasikibewema, napintiye.³⁸ Piyama napima otaganma ampa irosaogini agate, kana yoga kiye kina'miba maya mare-u me-u puntawe: Aintiba pi ae kana yuga maesanaga, taeba aepa aegugaite aintana pekanra tae'enaena pikie, untawe.³⁹ Piya yuguna pabigo ampa irosaogini, agaruba urite yoga awamori uma aegumagini kaintawe, Isu piya untiye.

⁴⁰ Pi kamana uma a'ya atate, Isu wasana ibigama maya untiye: Yogawama nkabawampa aeba ampa irosantanaba, aintiba kana waini yuga kiye kinapa aya puwaitakiyema, ibigantkiye.⁴¹ Piyama ibigaogini igeba maya omintawe: Kamparagaena potantaka pabiya kamparagaena puwaitana iyegukiye. Aibuntana waini yugawatapa aogi kiye kina ibabuwaitakini igeba a'ya'ma yagaba wainiwapa maema amimagini mikibewe, untawe.

⁴² Piya yuguna Isuba maya uma amato puma uwaimintiye: Mono isapi kamana ka waintipa, pipa tigeba kampa aisewa, a. Pipa mayamaweh:

Nama kikena kina'miba ka ya ago kainta ntawama iba wa'ega ya asima waintiye, iye. Pintanaba Wa'egawamaba ago pega taeba agantompeka ta'mu pune, untiye.

⁴³ Pika urimukuwa abiyo: We Yuta kina, Koti kabiratakenaenaba tigetisa tipa'ma to aoso kina, mono au'wapa maema aborakibe kina imikiye.⁴⁴ (Pigoya wasana ka'waina pi wa'ega yara aeguma au aerisa puma aikiye. Pipa pi wa'ega yawamaba pipa wasana to ka'waina abobora tumpa waima aeguma aigisебa'ma aerisa puwakiye, Isu piya untiye.)

⁴⁵ Meto kamana piya yogini monotasa tabe kiye kina'mibe Parasi kina'mibe igeba abibebe pumagini: We, pipa taeka iye, untawe.⁴⁶ Piya ute araku'ma aegukena napiyumepa, wasanamiba Isukaba: Poropete yagarawe, yumeka iyekuru pumagini uwa atantawe.

¹ Pigoya, Isuba meto kamana to ka amato puma maya uwaimintiye: ² Mantari kabiratakenaenaba mampabisa tabe yagara ka'wainata awame pukuwe, untiye. Piya, tabe yagara ka'waina yagarawampa nkxae iba'ena pomuguna tabe naninta maema kao puntiye. ³ Piya puntana kayokaya kina'wa uwaitaogini a'ya'ma uwaiminti kina'miti wama kega'e uma ibabikena wantawe. Wama uma uwaimuguni: A'a-o, untawe. ⁴ Piya yuguna tabe yagara aeba kayokaya kina'wa to ka'isa mayama uwaitama untiye: Tigeba wama naokinati wama maya uwaimiyo, untiye: Tabe yagara aeba ago naninta maema aki pugasima yegini uwoma apa purumaka ago aegumagini kao pugasawe. Aibumagini a'ya'ma nanintaba ago maema aogi pumagini tiyobi pewe. Pika tigeba kanaigi yaganepa waya ababomima kana naninta namagi ta'mu potano, iyema uwaimiyoma uwaitaogini wantawe.

⁵ Pigoya igeba wama uma uwaimuguni, kamana abima aekita potate, ka'waina aeba yogawati wantiye. Aibogana to ka'wainaba situuwawa kabikena wantiye. ⁶ Piya pusuguni to ka'isa kina'miba kayokaya kina'wapa iraku'ma iyegumagini kaintawe. ⁷ Piya puguna tabe yagara aeba ata pumagina irebu kina uwaitaogini igeba uma iyegumagini namankaipa yaku nkigi'ma kaewaegaintawe. ⁸ Piya puguna tabe yagara aeba to kake kayokaya kina'wa maya uwaimintiye: Nanintaba ago kao pugasune, piya kega'e uwaimintompe kinapa igeba iyekita pumagini kampa kanapa aerana, kasiyo. ⁹ Piya, tigeba ke'i nasi nasi pumagiri wasana ibatakibepa ibabute kanaiyo, untiye. ¹⁰ Piya yogini kayokaya kina igeba ke'i nasi nasi pumagini uwa kamparaga kinape aogi kinape a'ya'magini ibabuguni irosa'ma namapa ampa pumaema mintantawe.

¹¹ Mintuguna tabe yagara aeba igakena iyomeka, ka yagara aogi kaiba kampa aminta uwa ima asu mintogana agate maya omintiye: ¹² Nao'yagara, kaebe aya pegina kaigapa aogiyenaba kampa amirinta asumintane, yogana, aeba kamana asaba wantiye. ¹³ Aibogana, tabe yagara aeba kayokaya kina'wa uwaimima maya untiye: Tigeba agisa ayata kirokaema tununtanabinti apasanaigina tumima, pita'i tumpimagina awamu uparisa puma kube'ena pumagina miyeno, Isu piya untiye. ¹⁴ Piya untana to maya untiye: Pi puntisa puma igeba'e unta kinapa uwomane. Piya, ibabuma kibi'itanta kinapa tarantowe, Isu untiye.

*Takisi monega Isu abigantawe
(Maka 12:13-17; Aruku 20:20-26)*

¹⁵ Isu piya uwaimogini, Parasi kina igeba ka au'i wamagini kamana tobi tabi potama arakurikena kamana uma abintawé. ¹⁶ Piya puntini, ibagi kina'waipe Eroti nkaokina ka'isamipe: Kamana uma aborama, uwaimuguni igeba Isuti wama maya untawe: Tisa, taeba kae agoba abune. Kaeba taga ntagara mintane. Piya, ima tumima minta kinakaba kampa karu punta esegiyenawaika kampa kaekuruba puma Koti mpono'ama kipa kanara uramima tayakene. ¹⁷ Piya, ka kabigakuna, uramo: Mono kina'mita, taeba Aroma wa'ega yagara Sisa takisi mone amusupera kampaye, untawe.

¹⁸ Piya yuguna intabaipinti kumpari kamana'wai igitate maya untiye: Kumpari kina, tigeba nanaga minaga punatakenaga yewe. ¹⁹ Tigeba tabe yagara Sisa mone ame, pi ka nayakigi agano, untiye. Piya yogini mone ka maema ayakuguna ibigama maya untiye: ²⁰ Amankape awa'enabe mapa kewema, ibigaogini ²¹ igeba: Sisantawe, untawe. Piya yuguna maya uwaimintiye: Pigo yewa, Sisantanaba Sisa amiyo. Piya, Kotintanaba Koti amiyo, untiye. ²² Piya umagina uwaimogini, igeba abima pamí potategini atate wantawe.

*Purintapisa asikenaenaga Isu abigantawe
(Maka 12:18-27; Aruku 20:27-40)*

²³ Pigoya igeba wauguni, pabintaga ka'isa Sarusi kina igeba Isuti ampa irosantawe. Pi kina igeba: Purintapisa asikenaenaba kampa waintiye, piya uma miyume kinane. ²⁴ Pi ige Isu maya uma omintawé: We tisa-o, Moseseba kamana mayama kaentiye: Wasana ka'waina yagarawa kampa aboratanta purekanaba a'nanto kiyaba maetama aganto antotopa yagara aborano, untiye. ²⁵ Pigoya, abakatepi ka aga'na tonaaentisa tara umaema mintantawe. Aibuntini marusa iganto waya maemagina yagara kampa aboranta mima pu'waogana, a'nanto kiya aetantiye. ²⁶ Aeba pabiyama yagara kampa aboranta mima pu'waogana, a'nanto to ka'waina kiya waepa pabiyama taetantiye. ²⁷ Piya pumagini tonaaentisa tara umaema aga'naba a'ya'magini pu'waewauguna, kiya wae aeba ainti mima purintiye. ²⁸ Piya, igeba ka wae'amana a'ya'magini maentaka, ainti asiratakena yagaba ke nkxae mikiyema abigantawe.

²⁹ Piyama abigauguna Isu maya uwaimintiye: Tigeba mono kamanape Koti nkesegiyenagabe kampa napima kamanapa umagiri ata pewe. ³⁰ Asikena yagaba wawayapa to kake kampa maekibewe. Igeba enisore miyesa puma asu mikibewe. ³¹ Pigoya, tigeba asikenaenaga yepa urimukuwe. Koti aeba kamana urimintipa, pipa tigeba aisuma kampa

abewa, a.³² Maya urimintine: Naeba Abara'amu, Aisaki, Yekobu ige Koti mintuwe, untiye. Piya untika, aeba pu'wanta kina'nane. Aeba iyoganta kina'mi Koti mintiye, Isu piya untiye.³³ Kamana piya yogini, wa waya a'ya'ma kina igeba mono yomeka abima pami puntawe.

*Isu mono ai'nega abigantawe
(Maka 12:28-31; Aruku 10:25-28)*

³⁴ Pigoya, Isu kamana'ama Sarusi kina iraku'ma akunogini, Parasi kina igeba abite aki puntawe.³⁵ Aki pumagini kamana awa'ena abinta, iyo'yagara ka otauguna ago'ena pumagina maya untiye:³⁶ Tisa, mono kamana ai'neba ae'na tabeba piye, untiye.³⁷ Piya yogana Isu maya omintiye: Kaeba a'ya'ma kagu kaumakape napiyenagape Wa'ega Kotigapa a'ya'ma amegana waiyeno.³⁸ Pi kamanapa mono ai'neba asugasimagina waintiye.³⁹ Pigoya to ka abae wainti, isigeba ka awametane. Pipa mayama: Kaekaka kabemisa puma pabi nkawameta kaokinaka kabeno.⁴⁰ Pi kamana ai'ne taramisi Moses nkago kamanape poropete kina ige kamanape agona pese, Isu untiye.

*Isu aeba Karaisitika Parasi kina ibigantiye
(Maka 12:35-37; Aruku 20:41-44)*

⁴¹ Pigoya, Parasi kina aki pumagini mintuguna Isuba ibigamagina maya untiye:⁴² Tigeba Karaisitikaba nanawe yewe. Aeba ke ntagarawema, ibigaogini, igeba Tebiti ntagarawe, untawe.⁴³ Piya yuguna Isu maya uwaimintiye: Piya, Tebiti aeba Awamus'a'ama otaogana ayaga utaratanta yagara Karaisitikaba Wa'eganeneba, omintiye. Aeba maya untine:

⁴⁴ Tabe yagara aeba nae Wa'egaba maya omintine: Kaeba nayatakanti ampintaga, kama kinakapa kagisabi ibabuma aki peno, untiye.

⁴⁵ Pigoya, Tebiti aeba nanaga aga'nukaba: Wa'eganeneba, untiyema, ibigantiye.⁴⁶ Piya uma ibigaogini igeba kamana a'wae puma omikenaga napigate uwa atantini, pi ntaga aeka karu puntawe. Piya puntini, aintiba to kake kampa kamanapa abigantawe.

23

*Mono tisa kinake Parasi kina'mike kamanane
(Maka 12:38-39; Aruku 11:43, 46; 20:45-46)*

¹ Pigoya pi ntigaga Isuba ka'isa kinape abagi kina'wape maya uwaimintiye:² Moses marutapa mono tisa kinake Parasi kinake miyewe.³ Pika kamana aborama urimigiripa abimagiri wasiyiyo. Piya, igewai miyesa pumaba a-mpiyyiyo. Igeba kamana iwamupisa untiniba agowapa kampa wasiyewe.⁴ Igeba kuntaena asaema tibota aesagatitate, igewaipa uwa ika miyewe.⁵ Pi a'ya'waemaena pepa i'maete imaena mana pewe. Igeba mono nunamurasa tusantanawai puwaitagini pu u'ma, toma tomantana maema paentaaebi miyewe.⁶ Piya pumagini, tabe naninta nakena yagabe mono namapi mikena yagabe marusa yabaera paitama asu misanaga ibugaye.⁷ Wa waya uwa kina'mi ke'ibe kumatibe i'mu purataiyea iyowa agasiya pumagini mintini, igewaipa tisawe uwaimisanaga ige atakae puma miyewe.

⁸ Pigoya, tigeba pipa tisawe uramiyomaba a-siyo. Tisaripa Koti abintowe. Piya, tigeba uwa a'ya'magiri aganto a'nanto mintawe.⁹ Pigoya, mabi kawainaka tabaweba a-siyo. Mantari tibarimpaba ka'anto mintiye.¹⁰ Pigoya kiya kinateneba a-suritaiyo. Kiya yagararipa Karaisiti aeba ka'antowe.¹¹ Piya, tigeti kiya ima mikibi'naba tige kayokaya'ena peno.¹² Piya, ka'waina ae'wa nkaumarasa au maete ima miyekanaba, merunkuba potakiye. Piya to ka'waina au maete tumima miyekanaba ababuma mesuba potakiye, Isu piya untiye.

*Mono tisa kinake Parasi kinake ige'ma kamana Isu untiye
(Maka 12:40; Aruku 11:39-42, 44, 52; 20:47)*

¹³ Piya yogana Isu amato puma maya untiye: We, mono tisa kinake Parasi kinake kumpari kina, tigeba ataenabi mikibewe. Nana pegiri wasanami igeba mantari kabitatakena kumati uma pasikena yegiripa ke akunkigasawe. Tigeripa kampa uma pasintiri ige uma pasikena yegiripa a'a-o uma aka'ya waitawe.¹⁴ We, mono tisa kinake Parasi kinake, kumpari kina, tigeba tara tarrena puma, ataenabi mikibewe. Tigeba e'ero nunamurasa ago'ena pumagiri ainti abeya wae'mi mpone kutankai a'ya'ma aisaga, pi'na nkantotapa aintiba kamparaga ikantana maekibewe.

¹⁵ We, mono tisa kinake Parasi kinake, kumpari kina, tigeba ataenabi mikibewe. Tigeba wanipe mabe agasigasima nasimagiri to marisa kina ababuma tibagi kinati me nkatakena wantiri, pigo tige kamparagaena pesa puma ayakigina aeba tigasimagina tabera kamparagaena puma a'abibi tumikiye.¹⁶ We, tiyorika kiye kina, tigeba ataenabi

mikibewe. Nanaga mayaba yewe: Tabé mono namata aigmá uma esegi pepa pipa kamparíne. Pigo tabé mono namataso aogi awa'enaawata aigmá esegi puma ukenagaba nanaga tagakaba yewe.¹⁷ We, tigeba aibo kina tiyorikane. Awa'ena pipa uwaenawé. Awa'ena wainta aota namankama asugasima aeba tonawé.¹⁸ Pigoya, to kapa mayawé yewe: Aratara aigmá uma esegi pepa pipa kumparíne. Pi arata aboborisa a'muntanara aigmá esegi puma ukenagaba, nanaga tagakaba yewe.¹⁹ We, tiyorika kina tigeba, a'muntana pipa uwaenawé. A'muntana wainta aratawama asugasima aeba tonawé.²⁰ Pika ka'waina aeba aratara aigmá uma esegi pekanaba arata ae'wape abobori waintintanabe kaga'ena pukiye.²¹ Pigoya, ka'waina aeba tabé mono namata aigmá uma esegi pekanaba, pipa mono nama ae'wape kana mono namapi miyi'nape kaga'ena pukiye.²² Piya, ka'waina aeba mantari aigmámina uma esegi pikibipa, pipa Koti marunkape kana marunkama nkababe kaga'ena pukiye.

²³ We, mono tisa kinake Parasi kinake kumpari kina, tigeba ataenabi mikibewe. Yogarisaenabe to ka'isaena maema nayatará'mu aki puma'ma kapa Kotinta atakena kamana yewe. Piya puntiri ka auka'i au'wantaga'ena monota uma arupu puma, agama kao'ena puma kamana ago wasima aegarakenaenaba pipa kampa pewe. Ka wasintiri to kapa wasiyiyo.²⁴ We, paitama miye tiyorika kiye kina, tigeba maeyaena pewe: Wanitipisa ki'nunkama agama maema maebugasagana, tabé yagawamaba kampa aganta pabigo asaga'yuma paga iyopotaye.

²⁵ We, mono tisa kinake Parasi kinake kumpari kina, tigeba, ataenabi mikibewe. Tigeba tu'natipe kankaberipe aririsaba wani nkaema wae'wae puntiri antabaipintisa kampa aeyobagana i'nintanabe aguntaenabe awaitama waintiye.²⁶ We, Parasi kaorika kina kaeba, marupa tu'na kankabegapa antabaipintisa ka'ena waintipa, pipa waninkaema aogi pugaite ainti aririsaba waninkaema aeyobao.

²⁷ We mono tisa kinake Parasi kinake, kumpari kina, tigeba ataenabi mikibewe. Wasana aru piyama mintawé. Wasana aru aboboriba awa'ena puma aogi pugasawé. Piya, antabaipintiba pu'wanta kina'mi ayampube karebe kobabe waintiye.²⁸ Tigeba pabiyama tipa wasana iyora aogi tiwa maema miyewe. Piya tintabaipinti pipa kumparípe mono'ama aguya aikenabenabe awaitama waintiye.

*Tisa kinapa kamparaga ikantana maekibewe Isu untiye
(Aruku 11:47-51)*

²⁹ We, mono tisa kinake Parasi kinake, kumpari kina tigeba ataenabi mikibewe. Tigeba poropete kina'mi nkiru paga pumagiri aogi pewe. Piya puntiri paisa mono kina'mi nkiru yugaba awa'ena puntiri,³⁰ maya yewe: Tayabamagi mintantata miyompesinta, igepa kampa iyo'maema poropete kinapa iyegumagi ataenaba kampa puwaitaompesine, yewe.³¹ We, tigeba piya kamana umagiri poropete iyegunta kina ige iga'nugi miyepa agoripa uma aborawé.³² Piya, tiyabamagi kaintaba uwa inataso atata kanantagiri, tigeba pabita amato pegana tabé kuntu piye.³³ Tigeba kuyarawé. Tigeba ma'ama nkawarorawé. Kaintanama nkantoto a'abibinti tumikena yaga aborakiripa aeta pai'ma wama kakakibewe. Pipa kampaye.

³⁴ Pigoya abiyo: Naeba tigeti poropetebe, aogi napiyena puma abinta kinape, mono tisa kinape, uwaitakini uma iroasaigiripa, tigeba ka'isaba iyeguma kamparaga puwaitakibewe. Piya puntiri ka'isaba maripora iyeguntiri, ka'isaba mono namapinti eru kasutasa iyeguma a'ya'ma kumati igarubata nasikibewe.³⁵ Piya pugini, aogi kina'mi korankai uwarakaya'ya ari'lma ataena purite kanama mintanta, pi'na nkantotapa tigeti ampa aborarimikiye. Pai Eboro, aetasa ma'ena aborama purite kanama Perekaya ntagara Sekaraya ae tabé mono namapi arata agora aeguma a'ya puntane. Pi'na nkantotapa tigeti ampa aborarimikiye.³⁶ Pika taga urimukuwe, abiyo: Pi a'ya'ma kamaena purite kananta, pi kaintanaba ma kanabi mpiye kina tigeti ampa puma a'ya pikiyé, Isu piya untiye.

*Isu Yerusaremi kumatasa kinamika kube'ena puntiye
(Aruku 13:34-35)*

³⁷ Piya untana Isu to maya untiye: We, Yerusaremi kina, Yerusaremi kina'mitaba, tigeba nanaraka poropete kama puwaitama mono kina tigeti uwaitantapa yaba kasutasa iyeguma kaiyawé. Kokorewama awagi'nu agagatasa isamu puma agagapinti itamagina miyemisa pumagi, naeba tigeta agasiyama ibabumagi nagora aki puwaitakena yuwagini, a'a-o urite kanamagini mintantane.³⁸ Pika nama kumatipa kasakana kabu isubumagina waikiye.³⁹ Piya yekiri abiyo: Naeba titakiri kampa naganta mirite wamagiri, asaba: Wa'egawama nkawamuta kanaika ae ta'mu potano, ukibepa, pi ntagaba tigeti to kake aborakuwe, Isu piya untiye.

24

*Tabe mono nama ainti ataena pikibi kamanane
(Maka 13:1-2; Aruku 21:5-6)*

¹ Pigoya Isu aeba tabe mono namapisa irosa'ma waogini, abagi kina igeba ainti wantimi tabe mono nama aogima kimarantakini agama agabantini omuguna,² maya uwaimintiye. Ma kanabipa waiyegiri agawe. Pigoya, naeba tagaka urimukuwa abiyo. Kama kina'mi irosa'ma nama kumatiba akasagasasuba kasigina, ka yabankamaba to ka yabankama nkabobora ware'naigina nama tubo aborama waikiye, Isu piya untiye.

*Aintiba uwoma kuntuyena aborakiye, Isu untiye
(Maka 13:3-13; Aruku 21:7-19)*

³ Piya ute Oribesi amuti ima mintogini, abagi kina ibiwai agora wamagini abigama maya untawe: Pi yempentanaba ae ntaga aborakiye. Pipa kaega ampa irosakena yagawo, mampa a'ya pikena yagawo aborakena, nana kukantana kapa aborakiyema, abigantawé.

⁴ Piyama abigauguna Isu maya uwaimintiye: Ainti ka'waina kumpari urigasima tigu'ama maema a'yugu puritanaga aogima kiya kabimagiri miyivo. ⁵ Piya wasana uwoma kina irosa'ma nae nage umagini: Naeba Karaisiti nawe umagini, uwoma kina'mi nkigu'ama paibumagini kamparaga puwaitakibewe. ⁶ Pigoya, ma'ena pewe kamana abintiri, esiba kamana abitegiri tiyekuruba a-puma: Kana a'ya piyeba, a-siyo. Pi ma'ena maru pikibepa, asa aka'i agogo yaga aborakiye. ⁷ Maga maga kina'miba kamaena pigini, to ka'isa kina'miba to ka marisa kina uma iyeguyigini kamaena purite wagana pikibewe. Kaboba tabera aborakana imimapá tabera purite wagana pikiye. ⁸ Pigoya pi nttagaba marusaena uwa tiki nakiyenaba tabera aborarimikiye.

⁹ Pigoya, pi nttagaba tibabute wamagini tiki nakiyena purintini tiyeguma kaikibewe. A'ya'ma marisa kina'miba naetaka kama puritamagini kamparaga puritakibewe. ¹⁰ Piyaena aborakiniba uwoma kina'mi monopa kaitegini iyokinaká minaga'ena pumagini igobi puma kamparaga uwaitakibewe. ¹¹ Piya pigini, uwoma kumpari poropete kina ampa irosa'magini, napi napiyenari maema a'yugu purigaikibewe. ¹² Pigoya mono aguya aikenenaema anosama abae pekan, agu kao'enaba uwoma kina'mitiba kaka wakiye. ¹³ Pigoya ka'waina aeba monopa esegima aega'magina mintakana kana'wapa a'ya pekanaba, ababikiye. ¹⁴ Pigoya Koti kabiratakena aogi awaga kamana'ama maga maga wagana pumagini, a'ya'ma marisa kina'mi ige agowaipa maema aborakana, kanapa a'ya puwakiye, Isu piya untiye.

*Aintiba kamparagaena aborakena kamanane
(Maka 13:14-23; Aruku 21:20-24)*

¹⁵ Piya untana Isu to maya untiye: Poropete Taniyeri kamana kaenti, pipa pasema aisuma abiyo. Piya, ma nkisapi aisuma agakibe kina'miba aogima abiyo. Pi kamana'ama esegi pekanaba kamparagaenaba tabe mono namapi ataigiri tini'ena pikibewe. ¹⁶ Piya pumagiri igit, Yutiya mari mikibe kina'miba tiyegaka amu mari iyiyo. ¹⁷ Piya pigini, wasanami abe'i mintakibetisaba namatipinti a'wae pumagiri ima kotatipa a-mpaentiri uwa waiyo. ¹⁸ Piya, to wasanamiba yogari mintakibetisaba a'wae pumagiri wa'eri a-nkwama kai kabiripa a-mpaentiri uwa waiyo. ¹⁹ We, pi kanabipa iga'entaga waepe inamuganto mono amikibe waepe kamparagama mikibewe. ²⁰ Tigeba Wa'ega esotaigina abintakiri, tiyegaka pai'ma wakenaenaba esiba yagabe sabatirape a-nkaborano. ²¹ Piya, pi nttagaba tabe kuntuyena aborakiye. Pintanaba ma aborantitasaba kampa aborantine. Aintibe to kake kampa aborakiye. ²² Piya, Kotiba kanapa kasama arosakenaengaba umarantine. Kampa piya untemisinta, wasana ka'waina mono maema mikenaenaba pipa kampa aboramisine. Piya, Koti ae'wa nkibabikena kinaka umagina kanapa kasama, arosakiye.

²³ Pigoya: Karaisitiba mata'i taeti aboraya, marota'i igitet aboraye, piya kamana'ama wagana pekiripa, a-nkabiyo. ²⁴ Piya, pi nttagaba kumpari karaisitibe kumpari poropetebe ampa irosa'ma kukantanaba toma toma agasiyaena pumagini wasanami abikenaenawaipa maema a'yugu puwae igaikibewe. Piya puntini Koti ae'wa nkibabikena kina'mi nkabikenaenawai maema a'yugu puwaigaikenaba kasa'enabe awame'enabe tabera aborakibewe. ²⁵ Pigoya naeba maru urimoka, ainti aborakiripa albopa a-piyo.

²⁶ Pigoya, pika ka'me mpari Karaisiti aboragi agauna yigiripa, a-nkwaiyo. Piya nama pita'i mata'i aboraye yigiripa, pipa a-nkabiyo. Kampaye. ²⁷ Wasanama Ntagara naeba kakamaba kampa kanakuwe. Apayaena pegina a'ya'ma auka'i e'wasa puwamisa puma, naeba pabi nkawameta aborakuwe. ²⁸ Eya, wasana purinta kina wainti mpari

kegebankama kanama ampa aki pemisa puma, pabi nkawameta aborakiri nagakibewe, Isu piya untiye.

*Wasanama Ntagara tumikena kamanane
(Maka 13:24-27; Aruku 21:25-28)*

²⁹ Piya untana Isu to maya untiye: Pigoya, tabe kuntuyena pikibi kanaba a'ya puwakana, papa tunusekana, opa kampa e'wasa pekana, noriba tutu pekana, mantaba kuru pekana esegiyenawapa iyoba'ma kareko pikkiye. ³⁰ Pigoya Wasanama Ntagara nae kukantanaba mantari aborakini a'ya'ma maga maga kina'miba pi agate kube'ena pumagini nagsigidi naeba mantarisa ibinankama nkabobori e'wasaena esegiyenentaga tumpa irosakuwe. ³¹ Piya, enisore kina'nepa uwaitakini tabe kiga'e uma ma maretibe metibe, atibe abetibe naokina'nepa kibi'magini ibabuma aki pikibewe, Isu piya untiye.

*Piki yawamaka meto kamana untiye
(Maka 13:28-31; Aruku 21:29-33)*

³² Piya untana Isu to maya untiye: Pigoya, piki yawama kana aboragiripa agama abewe. A'no mpa'ma pari pegiripa agantiripa: Tabe pa tagiya wakena piye, yewe. ³³ Pabiyama urimontana aborawae wakiri, agantiripa, naeka: Aebe kabera ampa asintiye, yiyo. ³⁴ Piya, kamana ka taga urimukuwa abiyo: Ma kanabi miye kinapa kampa purinta uwa mintigina pi a'ya'waemaenaba aborakiye. ³⁵ Pigoya mantabe mabe a'ya wakana, kamana'nepa waiyaba waima kampa kakakiye, Isu untiye.

*Ka'waina aebe kanapa kampa abintiye
(Maka 13:32-37; Aruku 17:26-30, 34-36)*

³⁶ Isu piya untana to maya untiye: Pigoya, pintana aborakena yagaga wasana ka'waina kampagina abibebi puntiye. Piya, enisore kina igeba pabiyama kampa abintawé. Yagarawa naebe pabiyama kampa abintuwé. Nabanempa ae abintowa abintiye. ³⁷ Piya Nowa mintanti kanabi wasanami a'ya'waemaenaba puntasa puma, Wasanama Ntagara nae ampa irosakena yaga agarosakiniba pikibewe. ³⁸ Piya, paipa wani kampa pagintoginiba, nanintabe wanipe uwa nantini, iba'ena puntini, pumagini a'yuguma mintantawé. Mintuguna, Nowaba pabigo wanipisa karebi iyogana, ³⁹ tabe wani pa'ma ipirintantisa puma, Wasanama Ntagara nae ampa irosakena yagaba pabiya awame'ena pikibewe. ⁴⁰ Pigoya, pi ntagaba tara yagarara yogari mintisiginaba, Kotiba ka'wainapa ababuntana to ka'wainapa a'a-o uma atakiye. ⁴¹ Piya, waya taramisi naninta kao'ena puma mintisiginaba, ka'wainapa ababuntana to ka'wainapa a'a-o uma atakiye. ⁴² Pika tigeba aogima kabiyiyo. Wa'egaripa kanakena kanapa kampa abintawé. ⁴³ Pigoya, tigeba agowapa mayama abiyo: Ka kumatasa kina ku kina ma aseka irosakiyema napiyisinta, iyogabama mima nama kuma'waipa kabiyiginaba kuntanaba kampa maeyisine. ⁴⁴ Pigoya, Wasanama Ntagara naekaba pabiyama kampa napikibe kanabi, kanakuboka aseyo puma miyivo, piya untiye.

*Aogi yuga yagarage ata yuga yagarage isige meto kamanane
(Aruku 12:42-46)*

⁴⁵ Piya untana amato puma maya untiye: Wa'ega ka'waina kayokaya kina'wampa ige kiwayaika otamagina maya omikiye: Naeba wama umintakanapa, kaebe kiya kabiwaitama asi nasiba naninta ka awameta imima miyo, ukiye. Pigoya, aebe ayama miyekanapa kiyaba mono wantaga awamu wasikenaena wantagane otaiyo. ⁴⁶ Piya, aebe yoga otanta pipa aogima puma miyekanaba, wa'ega yagarawapa irosa'magina abekanaba a'mu potakiye. ⁴⁷ Naeba taga taga'ya yekiri abiyo: Aebe pi ntagaraba pipa kiya tabe otama a'ya'maenawatapa kabiyenoma otakiye. ⁴⁸ Pigoya, pi kayokaya yagara aebe wa'eganepa agaropa kampa kanakiyema, antabapintiba napimagina, ⁴⁹ karana itamagina, kayokaya kina iyegumagina, nanintabe esegi wanipe nama aibo abo'ena puma karana itakanaba, ⁵⁰ togana wa'ega yagarawa a'wae puma kanakena kanapa, pi kampa napinta mintakana, ⁵¹ agaronkanto irosa'ma agaruba'ma kumpari kina ai'aruyenabi atakana ata maru mpikiye. Pi mparupi igeba iwara upaba puma kube'ena puma mikibewe, Isu piya untiye.

25

Nayataramu aratagawae ige meto kamanane

¹ Isu kamana ka maya untiye: Pigoya, pi kanabipa Koti kahiratakenaena nayataramu aratagawae igeta meto puma maya ukuwe, untiye. Piya, iba'wae ao'maekena puntini, igeba wama wasana ke'i kabima mimagini, ababikena kane'waipa maete wantawé.

² Pigoya, nayaka'mu aragawae igeba aibona, piya to nayaka'mu aragawae igeba napi

napiyena waintagana sumawe.³ Piya, aibo aragawae igeba kane'waipa uwa maete wama kampa napima waninkapa kampa awaitama tiginta wantawé.⁴ Pigoya, napi napiyena waintaga aragawae igeba wanipa awaitama ari atamagini kane'waipa maete wantawé.⁵ Piya puguna wasana kampa karu'ena kanaogana, aobi puma mintuguna iwaiga ibogini waintawé.

⁶ Waintuguna, aseká nkabubu saogana, kega'e kamana ka mayama aborantiye: We, wasana ago kanaya, karu'ena asimagiri uma ababiyo, untiye.⁷ Pigoya aratagawae igeba abite iyogama asimagini kane'wai maema tabe puguna tantkiye.⁸ Piya puntini, aibo aragawae'mipa napi napiyena waintaga aragawaepa maya uwaimintawé: Taeba kanete tabe pokana tu'makena piya, tigeba wanipa kapa ari'ma na tamiyo, untawé.⁹ Piya yuguni, napi napiyena waintaga igeba maya uwaimintawé: Piya kampa pukune. Wanipa pipa kaga kampa kanarasaratakiye. Tigeba situwati wama ika piyo, untawé.¹⁰ Pigoya, igeba kane'waipika wani ika pikena wagasuguna aobi pume ntagara ampa irosa'ma aratagawae ase'yó puma kane'waintaga mintume ige ibabogini wantawé. Wamagini kumati uma irosa'ma namapinta ima kabe kitama naninta namagini mintantawé.

¹¹ Mintuguni aibo aratagawae igeba kanama kega'e umagini: Naba-o, naba-o, kabe aitatao, untawé.¹² Piyama kega'e yuguna maya uwaimintiye: Naeba taga urimekiri abiyo: Naeba kampa tigao kinatawa, wagasiyo, untiyema, Isu untiye.¹³ Piya, kanapa kampa abintaka, tigu'ama kiyeba aogima kabima miyivo, Isu piya untiye.

Kayokaya kina mone asa iminta meto kamanane

(Aruku 19:11-27)

¹⁴ Piya untana, Isu to amato puma maya untiye: Aintiba tabe yagara ka'waina punti, pi nkawameta aborakiye, untiye. Pi tabe yagara ka'waina pagasa mari wakena puntana kiya kina'wa igege'a uma monewa kabitaiyema pako puma imintiye.¹⁵ Pigoya, ka kiye yagara mone asaba nayaka'mu (\$5,000) amintiye. To ka'waina tara asa (\$2,000) amintiye. To ka'wainapa ka asa (\$1,000) amintiye. Piya potate wantiye.¹⁶ Wagasogana pabigo 5,000 tora maeyome kiye yagaramaba agobima to kake aborakena yuga pogana to 5,000 tora aborantiye.¹⁷ Piya, to ao'yagara 2,000 tora maeyome, aeba pabiyama yoga pogana to kake 2,000 tora aborantiye.¹⁸ Pigoya, 1,000 tora maenti, aeba tabe yagarawampa moneba maete wamagina uma ka ku'magina kaitaogana waintantiye.

¹⁹ Pigoya, tabe yagarawai e'ero kana mintana, a'wae puma kanantiye. Kanama mone iminti kiye kina igege'a uma mone kamana abikena aki puntiye.²⁰ Piya pogana 5,000 tora aminti, aeba ampa irosa'ma to kasa 5,000 tora me nkattantana maya untiye: Tabé yagarane, kaeba mone asaba nayaka'mu asa namintampetasa naeba yoga pogana, to kake nayaka'mu asa mampa aboraye, untiye.²¹ Piya yogana tabe yagarawampa maya omintiye: Kaeba aogi kayokaya yagaragawé. Kaeba aogiyena pene. Kaeba yagarapa aogima kabiylene. Kaeba uwaenarapa aogima kabiympeka naeba ugatakana, to ka'isaenaba kabilibena, kaeba kanama tabe yagaragampa, naege ampima ka'mu po.

²² Piya yogana, 2,000 tora aminti kiye yagara aeba ampa irosa'ma maya untiye: Tabé yagarane, kaeba mone asaba tara asa namintampetasa, pitasa naeba yoga puma maema aki pogana to kake tara asa mampa aboraye, untiye.²³ Piya yogana tabe yagarawampa maya omintiye: Kaeba aogi kayokaya yagaragawé. Kaeba aogiyena pene. Kaeba yagarapa aogima kabiylene. Kaeba uwaenarapa aogima kabiympeka naeba ugatakana, to ka'isaenaba kabilibena, kaeba kanama tabe yagaragampa naege ampima ka'mu po.

²⁴ Piya yogana, ainti mone 1,000 tora aminti, aeba ampa irosa'ma maya untiye: Tabé yagara, naeba agogopa mayama abintuwe. Kaeba agasiya yagaragawé. Kaeba to kina'mi yuga pumarapisaba naninta uwa maeylene. Piya, to kina'mi aintana asigimarapisaba uwa maeylene.²⁵ Pigoya naeba pika naekuru pumagi, ka mono asa namintampetasa maete wama mabinti kaitaogana waintika, mampa maetemekamuwa maeyo, untiye.²⁶ Piya yogana tabe yagarawampaba maya kamana a'wae pomintiye: Kaeba kayokaya yagara ata yagara kamparaga yagaragawé. Naeba yogaba kampa punta uwa mima to kina'mi pumarapisaba maema nakena yuwe. Piya, aintanaba kampa maemagi uwa kupisa maema namigi nakena yuwe.²⁷ Naekaba piyama napimagina monenepa mone kiye kina'mi imekini yuga puma to ka'isa maemagini atantaga ampaeyosintawé, untiye.²⁸ Piya ute to maya untiye: Tigeba mone apa'ma nayatará'mu mone asa urinti ntagara ae amiyo.²⁹ Piya, ka'waina Kotítisa maentintanaba aogima maema miyekanaba, pipa uwomantana to kake aboramikiye. Piya, to ka'waina Kotítisa maentintana kampa aogima maema miyekiniba, apa'urigina pipa uwa mikiye.³⁰ Pi kamparaga kayokaya yagaraba araku'ma tunutantanabinti apasanaigina tumeno. Pita'i tumpima awamu uparisa puma kube'ena pumagina miyeno, Isu piya untiye.

Wasanama Ntagara a'ya'ma kina pakó pikena kamanane

³¹ Piya untana Isu to maya untiye: Pigoya, ainti Wasanama Ntagara naeba mantarisa e'wasaena wantaga enisore kina'mi abakapi igege irosa'magi, awa'ena yabaeneta imagi mikuwe. ³² Piya punta, a'ya'ma maga maga kina igege'a yekini nae naora ampa aki puwaekibewe. Aibigi, kiya ka'waina sipisipibe memebe pako pemisa puma, pabiyama pako pumagi, ³³ sipisipiba nayatakanti aki puwaitanta, memebe nayake'masi aki puwaitakuwe. ³⁴ Piya puwaitanta, naeba Wa'egawaimpana nayatakantisa kina maya uwaimukuwe: Nabanempatisa akayona maentana kina, tigeba kanama Koti kabiratakena kasa kumati ampaema miyivo. Pipa paitaka'ya maba kampa aborantogana utaritantiye. ³⁵ Piya, tigeba mayaena punatantaka: Naga'ena nabogiripa namintaba namintane. Wanika nabogiripa namintane. Naeba to marisa namu kanaogiripa aogima nababuma natantane. ³⁶ Nauka miywagiripa tigeba nautasaenaba namintane. Yonintana naboga waitamintuwagiripa tigeba kao'ena punatantane. Piya iga'na namapi mintuwagiripa kanama ampa nagantane. Pigoya pika kasa kumati ampaema miyo, ukuwe.

³⁷ Piya yekini, monota arupu puma asoya punta'nagiba maya kamana a'wae puma unamikibewe: Wa'ega, kaeba aeta kaga'enaba kaboga nanintaba kamintompene. Piya, aeta wanikiba kaboga kamintompene. ³⁸ Piya, to marisa namupa aeta kanauku namapipa kababugatanompene. Piya, aeta kaukapa mintuku kautasaenaba kamintompene. ³⁹ Piya, kapa aeta yonintanaba kaboganape iga'na namapipe mintuku uma kagama kao'maentompene, ukibewe.

⁴⁰ Piya yigipa, naeba Wa'egawaimpa naba maya uwaimukuwe: Naeba taga urimukuwa, abiyo. Tumima uwaena kanta puma miye naokina kao'ena puwaitantapa, pipa nae punatantasu piye, ukuwe. ⁴¹ Piya utegi, nayake'masisa kina igepe maya uwaimukuwe: Kani'ena puritanta kina, tigeba nabanempaba Satanike aokina'wake tayaba yaku kaewaitanti, pita'i tumima miyivo. ⁴² Tigeba maya puntawe: Naeba naga'ena nabogiripa namintaba kampa namintane. Piya, wanika nabogiripa kampa namintone. ⁴³ Piya, to marisa namu kanauwagiripa kampa nababuma aogi punatantawe. Nauka mintuwagiripa nautasaenaba kampa namintane. Yonintana nabogiripe iga'na namapi mintuwagiripe kampa ampa nagantane. Pigoya, tigeba tayaba yakupi tumpiyyo, uwaimukuwe.

⁴⁴ Piya uwaimekini, nayake'masisa kina igeba maya ukibewe: Wa'ega, kaeba aeta naninta wanika kaga'enaba kabogana mintukupe, to marisa namu kanaukupe, kauka mintukupe, yonintana kabogana mintukupe, iga'na namapi mintukupe, aeta kagamagi taekitaba pugatantompene, ukibewe. ⁴⁵ Piya yigipa maya uwaimukuwe: Naeba taga urimukuwa abiyo. Tumima uwaena kina kanta puma miye naokina kayone puma kao'ena kampa puwaitantapa, pipa nae kampa punatantasu piye, ukuwe. ⁴⁶ Pigoya, igeba iki naki puyaba kumati tumigini, pi aogima arupu puma miye kina igeba a'ya'ma yaga miyaba kumati ima asu mikibewe, Isu piya untiye.

26

Kiya kina'mi Isu aegukena kamanane

(Maka 14:1-2; Aruku 22:1-2; Yoni 11:45-53)

¹ Pigoya, Isu aebe pi kamana uma a'ya atate abagi kina'wa maya uwaimintiye: ² Tara yaga a'ya pekanra Pasoba yagaba aborakiye. Pigoya, pi ntaga nabanempaba Wasanama Ntagara naepa wasanamiti unatakini maripora naegukibewe, untiye.

³ Piya yogini, pabi ntaga tabe mono kiyi kinape Isureyo kina'mi kiyi kinape, igeba monota paitanta yagara Kayapasi, ae namapi aki puntawe. ⁴ Aibumagini pasema Isu araku'ma aegukena kamana uma abintawe. ⁵ Piya puntini maya untawe: Ma nkaota yagaba kampa piya pukune. A'yugu a'ya'ma kina'mi ma'ena puratasanagawe, untawe.

Waya ka'waina agunta wani Isu pai'atantiye

(Maka 14:3-9; Yoni 12:1-8)

⁶ Pigoya, Isu aebe Petani kumati wama Saimoni, karu yagarama ntamapinti ima naninta nantyi. ⁷ Namagina mintogana, waya ka'waina aeti wamagina tabe ikantana wantaga aogi yaba kankabentobisa aogi agunta masawaee a'noti pai'atantiye. ⁸ Piya pogini, abagi kina'miba agate uma iyekita pumagini maya untawe: Pi tabe ikantana wantaga'enaba nanaga uwa kasaye. ⁹ We, pitasa mone uwoma maema kusi kina imekana kanarasakenaw, untawe.

¹⁰ Piya yuguna Isuba abite maya uwaimintiye. Tigeba nanaga ma kana waepa abima kunta potawe, a. Pi nkwaepa aebe naukaena punataye. ¹¹ Pigoya, kusi kinapa asi nasi tigege miyigiri aintiba iyo'maekibewe. Piya, naeba pipa tigegeba asi nasiba kampa mikuwe: ¹² Naeba ago purekini kainatakibewe, pika masawaepa nau'ama pai'ma aogi potaye. ¹³ We, naeba taga urimukuwa abiyo: Maga maga aogi mono kamana urite

wantiniba, ma nkwaya'ma nau'ama aogi potai, pi nkawaga kamanapa kaga urite waiginia abae pikiye, Isu untiye.

*Yutasiba Isu minaga pikena mone maentiye
(Maka 14:10-11; Aruku 22:3-6)*

¹⁴ Pigoya, nagsarisa tara tumpaema abagi kina'wapis ka yagara, agewapa Yutasi Isikerioti, aeba tabe mono kiye kina'miti wama maya uwaimintiye: ¹⁵ Naeba Isu minaga puritakiripa, tigeba moneba ayaki namikibewema ibigantiye. Piyama ibigaogini, pabigo 30-wa siriba mone aisuma amuguna maentiye. ¹⁶ Maeritegina Isu minaga pikena apasa puma mintantiye.

*Isu aeba abagi kina'mige Pasoba naninta nantawe
(Maka 14:12-21; Aruku 22:7-14, 21-23; Yoni 13:21-30)*

¹⁷ Pigoya, yisiti kampa wainta pareti nakena yaga agarosaogini, abagi kina igeba Isu abigamagini maya untawe: Taeba ibaba Pasoba nanintaba ae ntamapi kao pugatasune, untawe. ¹⁸ Piya yuguna maya uwaimintiye: Tigeba kumati ima ka yagaramati wama maya omiyo: Tisarempaba kaeka maya iye: Kana'ne agarosagi kae namapi ima nabagi kina'mige Pasoba naninta nakenaga yuwe iyema, omiyo, untiye. ¹⁹ Pigoya, Isu yome kamanapa abagi kina'miba wasiwaes u'magini wama Pasoba nanintaba maema kao puntawewe.

²⁰ Piya puguna ase yogana, Isuba nagsarisa tara tumpaema abagi kina'wapa ibabute pi ntamapi ima Pasoba naninta nantawe. ²¹ Nantini Isuba maya uwaimintiye: Naeba taga urimukwu abijo: Tigetisa ka'waina nae minaga pikiye, untiye. ²² Piya yogini, abagi kina'mi intawamaba tabera kamparaga pogini ka ka abigaurite wama: Wa'ega, naeka iyepera kewe, untawe. ²³ Piya yuguna aeba maya uwaimintiye: Ma ntagara tu'napi naege aya kaga atami ntagara, ae naepa minaga pikiye. ²⁴ Piya, Wasanama Ntagara naeba mono kamanata unatanti ki'i wakuwe. We, Wasanama Ntagara naepa minaga punatakibi'naba ataenabi mikiye. Piya, pi ntagarapa wasanama kampa yakari potantesinta, kanara pesine, Isu untiye. ²⁵ Piya yogana Yutasi, minaga yagaramaba pabigo abigama maya untiye: Tisa, naeka kapa yeno, untiye. Piya yogana Isu: Pabigo yene, untiye.

*Isu abagi kina'wa ara naninta imintiye
(Maka 14:22-26; Aruku 22:15-20; 1 Korinti 11:23-25)*

²⁶ Pigoya igeba naninta namagini mintuguna, Isuba pareti maema a'mu potama ako puma abagi kina'wa maya uma imintiye: Mapa nae nauna, maema naiyo, untiye. ²⁷ Piya utegina, waini kankabe pabiyama maema Koti a'mu potama maya uma imintiye: Tigeba a'ya'waemagiri naiyo. ²⁸ Mapa Kotiti aoso atokaekena korantene. A'ya'ma kina'miti aguntaenari a'sua penema ataritauwe. ²⁹ Pigoya, urimekiri abijo: Mabipa waini wanipa ibanto ainkagogo namagi a'ya puwe. Pigoya to kake kampa nanta uwa mimagi ainti bananempa kabiratakibi kumati tigege kasa waini nakune, untiye.

³⁰ Pigoya, ini urite kumatisa wama tumima maro nkauka'i Oribesi amuti intawewe.

*Pita Isu akabita kena kamana untiye
(Maka 14:27-31; Aruku 22:31-34; Yoni 13:36-38)*

³¹ Pigoya ke'i wantini Isu maya uwaimintiye: Mono isa'ama naeka mayama unti, pi'na esegi pikiye: Sipisipira kabima minti ntagara aeguyiginiba, kana sipisipi iyegaka aibarara puwakibewe, iye. Piya yemisa puma tigeba iba ma nkaseka a'ya'waema natate tiyegaka'ya puwakibewe. ³² Piya pigi purintapisa asinataka, Karariya mari wama paitaritakuwe, untiye. ³³ Piya yogana Pita maya omintiye: Ka'isa kina igeba a'ya'waemagi kaekaka abima katate ata pikibewe, pigoya naeba pipa kapa abimagi kampa katategi ataenaba kampa pukuwe, untiye. ³⁴ Piya yogana Isu maya omintiye: Kampaye. Naeba taga ugamukwu abo: Ma ibasa aseka kokorewama kampa aga untakana, kakaga yaga uwameka unatakibene, untiye. ³⁵ Piya yogana Pita maya untiye: Kaeka kaeguntini naepa pabiyama naegukena pigipa, uwamegaba kampa ugatakauwe, untiye. Piya yogini abagi kina'wampiba a'ya'ma pabiya uwaentawewe.

*Isu Kesemeni yugabi nunamu untiye
(Maka 14:32-42; Aruku 22:39-46)*

³⁶ Pigoya, wama yogaba ka agewapa Kesemeni, pita'i uma irosa'magina Isuba abagi kina'wa maya uwaimintiye: Tigeba mata mintiginto, naeba marota'i wamagi nunamu ukuwe, untiye. ³⁷ Piya ute, Pitake Sebeti ntagara tarage ibabute wantiye. Wantana pabigo napiyenawapa kunta puma kampa ayampu puma tabaraba puntiye. ³⁸ Piya puntana maya uwaimima untiye: Nantawamaba tabera kunta puma puremantana nabiya, tigeba mata tiyogaba puma naege miyivo, uwaimintiye. ³⁹ Piya uwaimite, uwaenantora wama

mabi uma parokaema maya uma nunamu untiye: Nabanempa, abegana kanarasakana ma nauki nakiyenaba naparo. We, nae napiyenanepa a-nkaegaranta, kaeka ntapiyena mana aegarao, untiye.⁴⁰ Piyama nunama ugaite kakaga abagi kina'miti a'wae puma kanama iwaita mintuguna igate, Pitapa maya omintiye: Tigeba naege uwaenantoba tiyogamaba kanara kampa misiwa, a.⁴¹ We, timyo'ena abekiri amu puma ware'asanaga tiyogaba pumagiri nunamu yiyo. Tigu'amaba aseyo pegina ariti'amaba kunta piye, untiye.

⁴² Piya ute to kake wama kamana maya uma nunamu untiye: Nabanempa, nauki nakiyenama naparikena abegana kampa aogi pekanapa, uwa abiwaeyekana kae kamana'ama esegi peno, untiye.⁴³ Piya ute a'wae puma abagi kina'pa iwaita mintuguna ampa ibatantiye. Piya pogana iyowama kunta pogana igate⁴⁴ itate to wama nunamu yogana kakaga puntiye. Kamana maru yome, pabi kamana uma untiye.

⁴⁵ Nunama a'ya atate a'wae puma abagi kina'miti kanama maya uwaimintiye: Tiwairabampa waikena untiripa, ainti piya piyo. Mapa Wasanama Ntagara nae agunta kina'miti unatakena kana'ne agarosaye.⁴⁶ Pika asiyigi wano. Minaga punatakibi ntagara pabigo irosaye, Isu piya untiye.

Kama kina'mi Isu arakurintawé

(Maka 14:43-50; Aruku 22:47-53; Yoni 18:3-12)

⁴⁷ Piya uwaimima mintogini, nagisarisa tara tumpaema abagi kina igitisa iyo'yagara Yutasi aeба uwoma kama kinapa paita itaogini pabigo ampa irosantawe. Tabe mono kiye kinape Isureyo kiye kinape uwaitauguni, irebube ma'ena kasupe maete ampa irosantawe.⁴⁸ Pigoya, kana minaga yagaramaba marupa maya kamana uwaimintiye: Amo nakiri agantiripa, pimpayemagiri arakuriyo, uwaimintiye.⁴⁹ Piya uwaimite ampa irosa'ma Isuti wama: We, Tisane, untana pabigo amo nantiye.⁵⁰ Piya pogana Isuba maya omintiye: Nao'yagara, yoga pikena ute kanampepa karu'ena ibanto po, untiye. Piya yogini igeba pabigo kanama araku'ma ayatara kirokaentawe.

⁵¹ Piya puguna Isuge mintume kina igitisa ka'waina kasonkapa abamu kantibisa pabigo a'yu pumagina tabe kiye yagarama kayokaya yagara aegukena age arisa kaintiye.⁵² Piya pogana Isu maya omintiye: Kasokapa maemo kabamu kantibinti paka puro. Ka'waina aeба ma'ena puntanaba antotapa ma'enamana a'ya'waema kinapa iyegukiye.⁵³ Pigoya, kaeba naekaba nanawe yene. Nabanempapa kanara kampa esotakana pabigo uwoma enisore kina uwaitakini tumima nao'maekibewema, kampa napiyewo.⁵⁴ Pigoya tumima nao'maeyigina monota naeka meto kamana unta, pi'na nkau'wapa kampa aborasanaga, uwa pintanaba aboranamikiye, Isu untiye.

⁵⁵ Piya utegina uwoma kina arakurikena kanaume, igepa maya uwaimintiye: Tigeba naeka abeganaba kama yagara kanta pegiri irebu ma'ena kasutintaga kanama ampa nababewo. We, naeba asi nasi abora, tabe mono namapi mono urimima miyone. We, narakurikena untiripa pita narakurisanawe.⁵⁶ Piya, pipa uwaba kampaye. Pipa poropete kina'mi mono isapisa kamana'ama esegi puwaeyenema aborawaentiye, Isu untiye. Piya yogini abagi kina'miba Isu atate a'ya'magini iyegaka wawaegaintawe.

Monota paitanta kiye yagarama ntamapi ababute intawé

(Maka 14:53-65; Aruku 22:54-55, 63-71; Yoni 18:13-14, 19-24)

⁵⁷ Pigoya, irebu kina igeba Isu araku'rite monota paitanta kiye yagara Kayapasi aeti ababute wantawé. Pi ae namapi mono tisa kinape kabiyume kinape aki pumagini mintantawé.⁵⁸ Pigoya Isu ababute wauguna, Pitaba igama maro ita maro ita putagina ainti wantiye. Wamagina uma irosa'magina tabe kiye yagarama kagisa kagopi uma pa'ima kayokaya kina'mi nkibakapi uma: Isupa ayabaya otakibeka agakuwe, ute uma mara'mintantiye.

⁵⁹ Pigoya tabe kiye kinape a'ya'ma monotosa kanisore kinape igeba Isu kumpari kamana maema aborama otamagini, aegukena kamana umagini abintawé.⁶⁰ Aibuntini kumpari kamanapa uwoma uma aboramagini abumepa aeguyema kamanapa kapa kampa aboraogini aguyosa'ma mintantawé. Piya puguni tara yagararamisi aborama,⁶¹ Isuka maya untase: Ma ntagara aeба Koti tabe mono nama akasaba'ma kakaga yaga a'ya peka to kake kima a'ya pukuwe yagara abintomene, untase.⁶² Piya yusuguna paitanta kiye yagara aeба asimagina Isu maya omintiye: Kae kamana yepa nanaraka ugatagana pipa ka auka'isaba ukena napiyepera kampaye, untawé.⁶³ Piya yogana, Isuba kamana kampa unta asaba'magina mintantiye. Piyama mintogana monota paitanta yagara aeба to kake abigama untiye: Koti miyaba yagara, ae aobi kabigakanapa umagina esegi po. Kaeba Karaisiti, Koti Ntagaragabera kampayema, abigantiye.⁶⁴ Abigaogana Isuba maya untiye: Pabigo yene. Pigoya, ka urimukuwa abiyo: Aintiba Wasanama

Ntagara naeba esegiyenama nkagowama ae ayatakanti mimagi mantarisa ibinankama nkabobori tumpa irosakiri nagakibewe, untiye.

⁶⁵ Piya yogana monota paitanta kiye yagara aeba pi kamana abima amo'ena puma kaiwa atutu puntana aokina maya uwaimintiye: Aeba Koti akayasotaya, pika nanaga to kake ukune. Pipa kampaye. ⁶⁶ Pi kamanapa tigeba abimagiri, ayama napiyewe, untiye. Piya yogini igeba: Aeba ataena piya, aeguma kaiyo, untawe. ⁶⁷ Piya utegini, igeba Isu nkaowapi kaisa potama aeguyuguni, ka'isa kina'miba iya kasu atamara aeguntini, ⁶⁸ karana puma maya untawe: Kaeba Karaisiti yagara mintanapa, kaeguyemi ntagarama nkagewapa yo, untawe.

Pita Isuka agantuwema uwame otantiye
(Maka 14:66-72; Aruku 22:56-62; Yoni 18:15-18, 25-27)

⁶⁹ Piya puma mintuguna, Pita aeba abe'isa kagisa kagopinti mintantiye. Mintogana, kayokaya araga ka'waina aeti wama maya untiye: Kaeba Isu, Karariya yagara, aege miyempene, untiye. ⁷⁰ Piya yogana, aeba wasana mintume kina ige iyobi uwame umagina: Nae kampa abinto kamana kaeba yene, untiye. ⁷¹ Piya ute kabebi tumikena pogana, kayokaya araga to ka'waina agate aeka wasana maya uwaimintiye: Ma ntagara Isu Nasareti kumatasu yagara aege miyine, uwaimintiye. ⁷² Piya uwaimogana Pitaba to kake uwame uma waya untiye: Naeba kana yagara aepa kampa agantuwe. Pipa Koti nkaobi taga suwe, untiye. ⁷³ Piya otate mintogini, wasanamiba Pitati wama maya untawe: Taeba kamanakapa ago abibebe pune. Kaeba taga ige aruyenabisawe, untawe. ⁷⁴ Piya yuguna, to kake Koti nkaobi uma esegima a'yugu kamana uma: Naeba kana yagarara kampa agantuwe, uwaimintiye. Piya yogana pabigo kokore aga untiye. ⁷⁵ Piya pogana, Isu kamana maya unti: Kokorewama kampa aga untakana kaeba kakagara uwame unatakibene unti, pi kamana napimagina abe'i wama tabera antara puma kub'e'ena puntiye.

27

Isu ababute Pairatiti wamagini kamana otantawé
(Maka 15:1; Aruku 23:1-2; Yoni 18:28-32)

¹ Marogini tabe mono kiye kinape to ka'isa Isureyo kabiyume kinape a'ya'ma aki puma Isu aeguma kaikena kamana uma esegi puntawé. ² Piya yuguni Isu ayatarara kirokaetama ababute yagara Pairatiti metantawé.

Yutasi uma kobama purintiye
(Aposoro 1:18-19)

³ Pigoya purikiyema uma esegi puguna, Yutasi minaga yagara aeba agama abite: Nanaga piyaba puwe, ute, antawama kampa aogi pogana, kana 30-wa mone siriba amintapa maete kiya kina a'wae puma imintana uwaimima maya untiye. ⁴ Naeba kumpari sumagi, kaintanawa kampa wainta yagara minaga pogana ataena piye. Piya yogini igeba: Taetiba nanaga kanama yene. Pipa kae'enawe, untawe. ⁵ Piya ute moneba a'a-o yuguna, pi tabe mono namapinti uma maebugaite kaiwa amirite wama uma kobantiye.

⁶ Piya pogini, tabe mono kiye kina'miba kana moneba kita puntini maya untawé: Moneba wasana ikantanaga tabe mono namapisa monebisa atakanaba kampa aogi pikkiye, untawé. ⁷ Pigoya, kana monerasaba ayabusune, umagini mare-u me-u pumagini magabu pome ntagara ae ma, namu kina'mi ige iru yuga, pita'i aboranema ika puntawé. ⁸ Pigoya, kana mawama nkageba: Kora mpawe, untawé. Piya kana agiba uwa waintiye. ⁹ Pigoya, paipa mono kamana Poropete Yeremaya nkawamupi aboranti, pi kamana'ama nkau'wapa aboranti, maya untiye: Isureyo kina igeba ikantanawa 30-wa mone siribawé, untawé. ¹⁰ Piya, kana monerasa magabu pome ntagara ae ma ika puntawé. Wa'egawama unamintisa puntawé, Yeremaya piyama kaentiye, untiye.

Pairati Isu abigantkiye
(Maka 15:2-5; Aruku 23:3-5; Yoni 18:33-38)

¹¹ Pigoya, igeba Isu tabe yagara Pairatiti ababute wauguna abigama maya untiye: Yuta kina'mi Wa'ega Yagaraba kaewo, untawé. Piya yogana Isuba: Pabigo yene, untiye. ¹² Pigoya, tabe mono kiye kina'mibe monota kabiyume kina'mibe kamana otaugunaba, antotapa kampa a'wae puma uwaimintiye. ¹³ Piya pogana Pairatiba abigamagina maya untiye: Kamana ugataganapa, nanaga ka'iba kamanapa kapa kampa yene, untiye. ¹⁴ Piya yogana Isuba kamanapa kapa kampa a'wae pumagina yogana, kiya yagaramaba uwoma agi napintiye.

*Pairatiba Isupa maripora aeguyiyo untiye
(Maka 15:6-15; Aruku 23:13-25; Yoni 18:39-19:16)*

¹⁵ Pigoya a'ya'ma kabu, Pasoba naninta nakena yagaba, pi mparisa kiya yagarama aeba Yuta kina'mi nkiga'na kina ka'wainaka age yugunaba au'ima iyoba imima mi pomekana piye. ¹⁶ Pigoya, pi ntagaba ka kamparaga yagara iga'na namapi mintantiye. Agewapa Parabasiwe. ¹⁷ Pigoya, wasana aki puma miwaentuguna Pairatiba mayama ibigantiye: Ke uwa ataoma yewe. Parabasipera Isu aeba Karaisiti yagarawe ye, ae uwa atasuwe, piya untiye. ¹⁸ Piya Yuta kina igeba uwa Isupa igobi potama aeti metaume pi abintana piya untiye.

¹⁹ Pigoya, Pairatiba kamana uma a'ya pikena yabaera mintogana, wayawampa aeti maya kamana ataogana wantiye: We, naeba iba asekapa amonta agama aeka tabera nantara puwa, pi aogi asoya yagara uwa atao, untiye.

²⁰ Pigoya tabe mono kiye kinape kabiyume kinape igeba a'ya'ma kina'mi imo atikeba'magini maya untawe: Omigina Parabasi uwa atantana, Isupa aeguyenoma, omiyo, untawe. ²¹ Piya yuguna kiya yagaramaba to kake ibigama maya untiye: Aepera, ae uwa ataoma yewe, untiye. Piya yogini igeba: Parabasiwe, untawe. ²² Piya yuguna maya uwaimintiye: We, Karaisiti yagarawe ye ntagara, aepa aya pukuwema, ibigantiye. Piyama ibigaogini, a'ya'waemagini ka kamana umagini: Maripora pureno, untawe. ²³ Piya yuguna Pairatiba to kake umagina: Nana kaintanarakawe, untiye. Piya yogini to kake tabe kamana uma: Maripora pureno, untawe.

²⁴ Piya yuguna Pairatiba napiyompe kamana'wampaba kampa aogi puntiye. Piya pogini, pabigo tabe ma'enya pikena puguna, yogini wani amuguna iyora ayapa wani nkaentana maya untiye: Ma ntagarara kaintanaba naetiba kampa tamakaeyano. Pipa tige a'wae puma timuwe, untiye: ²⁵ Piya yogini igeba iwamu ka'i ka'i: Kanarane, untawe: Pi kaintanaba taebi taga'nugitibe taeti waikiye, untawe. ²⁶ Piya yuguna, Pairatiba Parabasi uwa ataogana igebi waogana, Isupa eru kasutasa aegugasimagina, maripora aeguyiyema irebu kina ababuwaimintiye.

*Irebu kina'mi Isu akayasotantawé
(Maka 15:16-20; Yoni 19:2-3)*

²⁷ Pigoya, pi tabe kiye yagarama irebu kina'wa ka'isamiba igeba Isu ababute namapintisa tumima, irebu kina'mi ntamapinti ababute ima, yuguni a'ya'ma irebu kinapa ampa aki puntawé. ²⁸ Aki puwaeyguni Isunta kaiwapa atagasima tabe yagaramanta tete kai potantawé. ²⁹ Pigoya, ake wainta taminoku ka pugasimagine a'notapa taminonkitantawé. Piya potantini, wantapa ka amuguna ayatakanti u'magina tabe kina kanta puma mintantiye. Aibogini igeba wama agora uma irakabima akayasotama maya untawé: We, Yuta Wa'ega Yagara, kaeba aya pene, untawé. ³⁰ Piya ute, igeba kaisa potama, wantawa apa'ma pabigo a'no nkaiwa'ma aeguntawé. ³¹ Piyama aegumugaitegini, pi tete kaiba atagasimagine to kake ae'wa kai maema amitamagini maripora aegukena ababute wantawé.

*Isu maripora aeguyuguna purintiye
(Maka 15:21-32; Aruku 23:26-43; Yoni 19:17-27)*

³² Pigoya, ababute wama ke'i ka yagara uma abatantawé. Agewapa Saimoni aeba Sairini kumatasa, ae tutusotauguna Isunta maripoba maema aesaga'u ataogini wantawé. ³³ Wamagini, maba ka agewapa Korikota, pipa kamanatepisa a'no nkayampu amuta, uma irosantawé. ³⁴ Uma irosa'ma waini wanipi asa tusa wanipa paigu puma amikena yuguna, nabigategina a'a-o untiye. ³⁵ Piya pogini pabigo maripora itagintawé. Piya puguna maripora mintogini, kaiwata tete'ena pumagini pakó puntawé. ³⁶ Piya puritegini mara'mimagine kiya kabitantawé. ³⁷ Pigoya, a'notapa agowapa mayama kaimaranta waintantiye: Mapa Isu, Yuta kina'mi Nkwa'ega kaema atantawé.

³⁸ Pigoya, ma'enya kuntana yagara tara kaga maripora iyeguma to ayatari to ayatari pumagini isitantawé. ³⁹ Pigoya pita'i wa waya wate kanate pume pi kina'miba Isu akaya kamana omima maya untawé: ⁴⁰ We, tabe mono nama akasaba'ma kakaga yaga kima a'ya pukuwe yempe ntagaragawa, kaeka kaupa ao'maeyowe. Kaeba Koti Ntagara mintanapa, mariporasa iyoba'ma tumowé, untawé. ⁴¹ Pigoya, tabe mono kiye kinape kabiyume kinape igeba pabiyama akayasotama maya untawé: ⁴² Wasana ka'isa kina iyo'maentikana, ae'wa nkau'amampa ao'maekenagaba igiga pumagina kunta piye. Aeba Isureyo kina tae Wa'ega mintanaba, mariporasa iyoba'ma tumeka aeti uma atokaeyano. ⁴³ Aeba: Naeba Koti Ntagara nawe, ute, amatiti'enawapa Kotiti atantegina waintika, pika Kotiba aeka abekanaba iyoba'atano, untawé. ⁴⁴ Pigoya ma'enya kuntana yagara tara aeke kaga iyegunta, isigeba pabiyama akayasotama umaginisi kamparaga potantase.

*Isu pu'wantkiye**(Maka 15:33-41; Aruku 23:44-49; Yoni 19:28-30)*

⁴⁵ Piya potama mintuguna, kagi abebe pogana ase uma maba kanarasama waintogana atamaisa puntiye. ⁴⁶ Piya atamaisaogana Isuba pabigo kega'e uma maya untiye: Iro-i, Iro-i, arama sabatani, untiye. Pipa maya untiye: We Kotinempa, Kotinempa, nanaga natane, untiye. ⁴⁷ Piya yogini, mintume kina igetisa ka'isa kina'mi abite maya untawé: Mae ntagara aeba Iraiyaka kega'e uma agisiye. ⁴⁸ Piya yuguna, ka yagara aeba karu'ena wamagina kai attua asa wanipi aemagina asara kitamagina Isu amikena pogini ka'isa kina'miba maya untawé: ⁴⁹ Kaeba uwa ataganao. Iraiyaba taga kanama iyoba'atakana tumeka agakune, untawé. ⁵⁰ Piya yuguna, Isuba to kake tabera kega'e yogana aumaba iwaegaintiye.

⁵¹ Piya puroganaba, tabe mono namapi Koti nkauka'i akumparanta kaiba atisa aturite tumima abeti tumpa tasawaogana tara awatentana puntiye. Piya puntana imimapa tabera pogana tabe yabapa aibako pumagina kuya mpaentiye. ⁵² Pigoya, pita'i wasana iru wairite wanti, pipa a'waiyogini mono kina, pai purinta kina, igetisa ka'isa kinapa iyogama asintawé. ⁵³ Piya, Isu ae'wa paitama asiyogini igeba ireubtisa imaginai aota mono kuma, Yerusaremi, ima uwoma kina'mi aborawaimintawé. ⁵⁴ Pigoya, irebu kina'mi kiye yagarabe aokinape Isuta kiya kabima mintume kinape, igeba pi imima pomepe to ka'isaenabe agamagini abite, iyekuru puma maya untawé: Ma ntagara aeba taga Koti Ntagarawe, untawé.

⁵⁵ Pigoya, Isu aegunta pita'iba wayapa uwoma pagasari mimagini pi puntanaba agama abintawé. Igeba Isu Karariya marisa aega'ma kanama kayokaya'ena potanta'nagi, ⁵⁶ igeba Mariya Matara kumatasa wa, piya to auka Mariyawa, Yemisike Yoseke isinowa, pigoya to ka'waepa Sebeti ntagara tara isige isinowa, to ka'isa waena sumagini, igeba kaga mimagini agantawé.

*Isu kaitantawe**(Maka 15:42-47; Aruku 23:50-55; Yoni 19:38-42)*

⁵⁷ Pigoya asenamaisaogana, Arimatiya kumatisa a'yo ampiyome tabe kutantaga yagara, agewapa Yosepe, Isu mpono abima abagi puma mintantiye. Pi ae kanantiye. ⁵⁸ Kanama Pairatiti wama, Isu yabaewaka omogana abite yogini irebu kina igeba amintawé. ⁵⁹ Piya puguna Yosepeba wasana wasaba maema wae kairasa asagakokima maete wantiye. ⁶⁰ Maete wama, yaba nkage, aewa nkaruwema kana kaba ku'maranta, pipi Isupa metama tabe yabantama ka a'warigasogana awaba aigunkaogana wantiye. ⁶¹ Pigoya kana wasana aru awarapa Mariya Matara kumatasawa, to Mariya ao'waena suma isigebi mimaginisi agantase.

Irebu kina'mi Isu nkarura kiya kabintawé

⁶² Marogana sabati aboraogini, tabe mono kiye kinape Parasi kinape igeba aki purite Pairatiti wamagini maya untawé: ⁶³ Tabe yagarare, taeba kamana ka napiyompeka uga-mukune. Aegutompé kumpari yagara aeba aogama mintana maya untiye: Pu'magi papa kakaga peka naogamagi asikuwe, untuki asisanaga kabikibewe. ⁶⁴ Piya abagi kina wampi wamagini kuntana isu'urintini ago asiyayema, wasana kampari uwaigaisanaga yegini irebu kina igeba arura esegima kiya kabiimagini mintigina, kakaga yaga a'ya peno. Paipa kumpari sumagina: Naeba Koti ntagara nawe untikana, aintisa kumpari kamana'ama abobori anosasanaga, uwoma tagi napima ugamune, untawé. ⁶⁵ Piya yuguna Pairatiba maya uwaimintiye: Kanaraka irebu kina timekiri ibabute wama wasana aruba akumpa kiya kabiwaitaigini pasemagini mikibewe, untiye. ⁶⁶ Piya yogini igebe irebu kina'mige wama kana aruba akunkatamagini yabankama nkaboboriba ara'ena potama irebu kinapa itauguni kabima mintantawé.

28

*Isu asiwantiye**(Maka 16:1-10; Aruku 24:1-10; Yoni 20:1-18)*

¹ Pigoya, sabatiba a'ya puwaogini waintuguna marusa yaga aborantiye. Piya pogana marikena poginisi, Mariya Matara kumatasawa, to auka Mariyawa suma, isigebi aru agakena wantase. ² Wausuguna tabe imima pabigo pogana, Wa'egawamatisa enisore ka'waina mantarisu tumima yabapa aebasanakasogana a'waiwaogana abobora mintantiye. ³ Piya, apayaena kanta e'wasa pemisa aowarisaba puwaogana kaiwatisaba wae'wae puma ibina kanta puwantiye. ⁴ Pigoya, arura kabima mintume kina igeba agate iyekuru pumagini tabaraba puma purikena kanta puma mintantawé.

⁵ Pigoya, tara wae tara uma irosausuguna enisorewama maya uwaisimintiye: Tisigeba a-tisiyekuruba piso. Naeba abintuwa, tisigeba Isu maripora aegunta agakena kanase. ⁶ Pigoya aeba mata'iba kampaye. Aeba maru urimintisa pumagina ago asiwaye. Tisigeba kanama marunkapa mampaye. Pipa agate, ⁷ karu'ena wama abagi kina'wa maya uwaimiso: Isu aeba purintapisa ago asiwaye. Pigoya, Karariya mari wama paitaritakiya, tigeba pita'i wama agakibewema uwaimiso. Pigoya, ago urisimuwe, untiye.

⁸ Piya uwaisimoginisi, isigeba karu'ena aruba irikabitate isiyekuru puma tabera isi'mu purite abagi kina uwaimikena karu'ena wantase. ⁹ Piya pusuguna ke'i Isuba pabuma: Aya pese, untiye. Piya yoginisi, isigeba agora uma parokaema agisara araku'ma ae age maema asaga'yuntase. ¹⁰ Piya pusuguna Isu maya uwaisimintiye: Tisigeba a-tisiyekuruba piso. Wama naokina uma uwaimisigini Karariya mari ima pita'i nagaiyo, piya uwaisimintiye.

Irebu kina'mi kamanane

¹¹ Pigoya waya tara isigeba wausuguni, wasana aru kiye kina igevisa ka'isa kinapa karu'ena kumati ima, pi aborantintanama nkawaga kamana tabe mono kiye kina uwaimiwaentawe. ¹² Pigoya, kiya kina igeba monota kabiyume kina igege' uma igege kamana uma abiritegini, igeba irebu kina mone uwoma imimagini maya uwaimintawe: ¹³ Tigeba maya yiyo: Aseka tauwaitamintokini, abagi kina'wampi kanama Isu nkaupa kuntana iso'urewe, yiyo. ¹⁴ Piya kamana kiya yagaramaba abite ka'ena puritasanagaba atiyeckuruba piyo. Taeba kanara uma kayone potakune, untawe. ¹⁵ Piya uma uwaimuguni, irebu kina igeba pi mpone maeritegini kamana uwaiminta, pi wasintawe. Pigoya pi kumpari kamana'amaba Yuta kina'mitiba anosama tabe wairite kanantiye.

Isu amuta aborama mono yugaraka uwaimintiye

(Maka 16:14-18; Aruku 24:36-49; Yoni 20:19-23)

¹⁶ Pigoya, abagi kina nagisarisa ka tumpaema, igepe Karariya mari ka amuti Isu igege'a yogini intawe. ¹⁷ Imagini, ae'wa agate aeti uma parokaema agisuntawe. Piya puguni, ka'isa kina'miba igu'ama tara tara puntawe. ¹⁸ Piya puguna, Isuba igora wamagina maya uwaimintiye: Kotiba mantarisa mabisa esegiyenaba a'ya'ma nae namiwaentine. ¹⁹ Pika tigeba maga maga wama toma toma nae nage awaga kamana uwaimigini naegaraigiri, Nabanempawa, Yagarawa nawa, Aota Awamusana suma, tae tageraka mono wani pai'itaiyo. ²⁰ Aibumagiri kamana uriminto kamana uwaimigini wasiwaeyiyo. We, tigeba abiyo: Naeba a'ya'ma yagaba asi nasima tigege miyekana pi kanapa a'ya pikkiye, Isu piya untiye.

MAKA AOGI KAMANA KAEMARANTIYE

*Yoni wani pai'itanti ntagarama kamanane
(Matiyu 3:1-12; Aruku 3:1-9, 15-17; Yoni 1:19-28)*

¹ Koti ntagara Isu Karasatikaba aogi kamana mayamawé: ² Pigoya, Koti kamana unti ntagara Aisaya esapi mayama kaentiye:

Abo. Kamana'ne maenta yagara agarubakaná paitama kaori wama, kekapa aogi pikiyema, Koti yeginaba, ³ awaga kamana ukena yagara ka'me mpari mima kega'e uma mayama aboraye: Tabe Yagarama ki i'ma aogi piyoma, Aisaya piyama kaentiye.

⁴ Piyama kaeyogana, Yoni wani pai'itanti ntagara wama ka'me mpari umima maya uwaimintiye: Aguntaenaripa kaitegiripa a'wae puma wani pasigma, Kotiba aguntaenaripa maerigaikiye, uwaimintiye. ⁵ Piya uwaimogini a'ya'ma Yutiya marisa kinape a'ya'ma Yerusaremi kumatasa kinape aeti wawabumagini, aguntaena pume kamana'waipa uma aborauguna, Yontani wanipi pai'itantiye.

⁶ Pigoya, Yoninta kaiwapa kamoro yaga ayatasa pomima, au'arirasa abamu kantiba kitama mima, iroke tuke nantiye. ⁷ Pigoya, Yoniba maya kamana untiye: Nakai kanakibi ntagara agewapa asu nagasima waintika, naeba mayamanaba narakabima agisa anapa kampa akubo agaikuwe. ⁸ Piya, naeba wanitasa paititaogana, togana aeba Aota Awamusatasa paititakiye, uwaimintiye.

*Yoni Isu wani pai'atantiye
(Matiyu 3:13-17; Aruku 3:21-22)*

⁹ Pigoya, pi kanabipba Karariya mari Nasareti kumatasa Isu kanaogana, Yoni Yontani wanipi pai'atantiye. ¹⁰ Pai'atacgana wanipisa ima mayo agaopa, manta kabi a'waiyogana, Awamus'a'ama pupuna kanta purite Isuti tumpitogana, ¹¹ mantabisa maya kamana tumintiye: Kaeba nabugami ntagaranekawe. Tabera na'mu pugatauwé, untiye.

*Kewama Isu amiyo puntiye
(Matiyu 4:1-11; Aruku 4:1-13)*

¹² Aiyogana, pabi ntaga Awamus'a'ama Isupa ka'me mpari agarubaogana wantiye. ¹³ Wamagina 40-wa ntaga ka'me mpari mintogana, Satani amiyo potaogana, Isu kampa abintiye. Pigoya Isuba umugabage miyogana, enisore kina'mi aogima kabitantawé.

*Isu yogaenawapa Karariya-i agobintiye
(Matiyu 4:12-17; Aruku 4:14-15)*

¹⁴ Pigoya, Yonipa araku'ma iga'na namapinti atauguna, Isuba Karariya-i wama Koti nkaogi kamana uma, ¹⁵ maya untiye: Pigo agoya, Koti kabiratakenaenaba agarosaye, Isu piya ute: Aguntaenaripa kaité tigu a'wae puma aogi kamana abibebe puma aegaraiyo, uwaimintiye.

*Isu tarawa tarawaki kinapa ibabuntiye
(Matiyu 4:18-22)*

¹⁶ Pigoya, Isu aeba Karariya kotu awamori waomepa Saimonige a'nantowampa Enturuge, isigeba yogawaisipa inoyanta aebusume ntagararaginisi, kuko albarekima wanipinti motausuguna uma isigate, ¹⁷ Isu maya uwaisimintiye: Tisigeba ampa naegaraiso. Inoyanta aeyamesa puma wasana iba pikenaena tisiyakikuwe, uwaisimintiye. ¹⁸ Piya uwaisimoginisi, pabigo isigeba kuko'waisipa atate aegarantase.

¹⁹ Aibusuguna, Isuba to nasi nasi puma waomepa, Sepeti ntagara Yemisige a'nantowampa Yonige wanipisa karebi mima, kuko aogi puma mintusuguna uma isigantkiye. ²⁰ Isigategina pabigo isigeba'e yoginisi, isigeba isibawaisimpa Sepetige yogawa pome kina'wake wanipisa karebi itate Isu aegarantase.

*Isu ke kina agarubantiye
(Aruku 4:31-37)*

²¹ Pigoya igeba Kapaniyamu kumati wama, sabati yaga Yuta kina'mi mpono namapinti wama, Isu kamana uwa uwaimogini, ²² kana kamana yomeka abite pamí puntawé. Piya, Isuba mono tisa kina'mi kamana nane. Kiya kina'mi yumesa kamana uwaimogini, abite pamí puntawé.

²³ Pigoya, pi mono namankaipinti ka yagara ke kina antabaipinti minta yagara ampimagine, mayama tabera kega'e uma maya untiye: ²⁴ We, Isugaba Nasaretirisa yagaragawé. Taegukena kanapaya, nana puratakena kanane. Piya, naeba ago abopa,

kaeba Kotitisa aota yagaragawe, piya untiye. ²⁵ Piya yogana, Isu: Paka pumagina atate irosa'ma wagaso, omintiye. ²⁶ Omogana, kana yagarama antabaipisa ke kina'mi apasara potama tabera kega'e otate irosa'ma wagaintiye. ²⁷ Aibogana, a'ya'ma kina'miba agate pam i pumagini, maya kamana mare-u me-u puntawe: Nana kamanapaya iye. Taeba kampa abintompe kamana umagina, Kiya kina'mi usu kamana uma uwaitagini kegina'miba kamana'wapa wasiyewe, untawe. ²⁸ Aibogini, a'ya'ma Karariya kina'miba Isu pomentanaga abite napintawe.

*Isu Pita aentawampa ao'maentiye
(Matiyu 8:14-15; Aruku 4:38-39)*

²⁹ Pigoya, Isuba mono namapisa iro'ma Isu Yemiske Yonike isibabute wamagini, Saimonike Enturuke isige namapinti wantawe. ³⁰ Waumepa, Saimoni aentawampa nkau yaku taogana awaitamintogini, Isu omuguna, ³¹ aeba wama uma ayata u'ma asitaogana, yonintanawapa ata waogana, kana wae'maba naninta maema imogini nantawe.

*Isu uwoma kina aogi puwaitantiye
(Matiyu 8:16-17; Aruku 4:40-41)*

³² Pigoya, pi ntagaba asenamaita a'ya'ma yoni kinake ke kina intabaipinti minta kinake ibabute Isuti kanagana pumagini, ³³ a'ya'ma pi kumatasa kina'miba nama kabera ampintugana ³⁴ uwoma kina'mi tonarona inuntanawaipa kaba itamagina, uwoma keginapa igarubantiye. Pigoya, ke kina'miba a'wa nkagoba agauguna, pipa mare-u me-u pusanaga akunkitantiye.

*Isu Karariya-i nasintiye
(Aruku 4:42-44)*

³⁵ Pigoya, abaya asekia Isu asima iro'ma wama, ka'me mpari wamagina uma nunamu yogini, ³⁶ ainti Saimonige aokinaka aguyosagata wama ³⁷ uma agate: A'ya'ma kina'mi kae kagakena pewe, omintawe. ³⁸ Piya omuguna, Isuba maya untiye: Pigoya, taeba to ka'isa kumati wano. Igape mono uwaimikenaga kanauwe, uwaimintiye. ³⁹ Piya uwaimitegina, aeba wama a'ya'ma Karariya mari wama, mono namankaipinti kamana uma uwaimimagine, uwoma ke kinapa agarubantiye.

*Isuba karu yagara ao'maentiye
(Matiyu 8:1-4; Aruku 5:12-16)*

⁴⁰ Pigoya ka karu yagara aeti kanama ampa parokaema mima, esegima mayama abigantiye: Kaeba kabemika kaba natakena puntanapa aogi punatao, omintiye. ⁴¹ Piya omogana Isu antara potama, ayapa parosuma auta u'ma maya untiye. Piyaenaga nabiye. Pabigo kata wakana aogima miyo, untiye. ⁴² Piya yogana, pabi ntaga kana karuyenawapa ata wantiye. ⁴³⁻⁴⁴ Ata waogana Isu esegima uma maya omintiye. Uwa kinapa ankuwaimima, kaeba marupa mono kiye yarara uma kaupa ayakegana agano. Piya, kata wamikaba pai Moses uramintintanaba amegini wasanamiba kagate: Aoso yagara miyema napikibewe, piya omintiye. ⁴⁵ Aibogana, kana yagara abe'i irosa'ma wama, mare-u me-u puma pi kamana uwaimogana, Isu to kumati uwa wakenaga kampa abogana, abe'i ka'me mpari mintogini, a'ya'ma auka'isa wasanamiba aeti wantawe.

2

*Isu agisa aya pu'wanta yagara kaba atantiye
(Matiyu 9:1-8; Aruku 5:17-26)*

¹ Pigoya, to yagaba Isu a'wae puma Kapaniyamu kumati to kakema umintogini, wasanamiba: Isuba wa'eri ago ampintiye, untawe. ² Piya yuguni uwoma kina'mi namapa ampa pumaewauguni, ka'isa kina'miba kaberi ampa aki puma mintuguna, Isu aogi kamana uwaimintiye. ³ Piya uwaimogini, wasanami agisa aya pu'wanta yagara ababute kanama, tarawa tarawa kina'mi wasirite kanantawe. ⁴ Kanaumepa wasanaba pumaewauguni kampa Isu agora ababute inta, nama nkabobori imagini, asu akuritama, pita'isa kana yoni ntagaraba wasa yara waitama motauguna tumintiye. ⁵ Tumogini: Aogi potakiyema napiyuguna, Isu ibite: Yagaranepta, aguntaenagapa iba maegagasuve, omintiye.

⁶ Piya omogini, ka'isa mono tisa kina'miba pita mara'mima mayama ige napintawe: ⁷ Nanagabayab pi ntgaramaba maya kamanapa iye. Kotika akaya kasa iye. Kebaya aguntaenarepa maeragaikiye? Koti ae abinto maeragaikiye napintawe. ⁸ Piyama napiyuguna age napima ibite Isu mayama uwaimintiye: Nanaga piyamaba tigebipa napiyewe. ⁹ Nana kuntaenawema napiyewe? Yoni ntagara aguntaenagapa maegagasuve, asima wasaga aesagabite wao yoka yewo, utegina: ¹⁰ Tigeba abiyo. Wasanama

Ntagara naeba ma mpabi esegiyenanetasa aguntaena maerigaikena esegiyenanepa waintiye. Naeba kuntaena pekiripa, agate napima yiyo uwaimintana, agisa aya pu'wanta agaraba maya omintiye:¹¹ Naeba ugaminta, kaeba asima wasagapa aesagabite wa'egati waoma omintiye.¹² Omogana kana agarabamaya asima wasawa aesagabite waogini, agate a'ya'ma kina'mi tabera pami pumagini, igeba: Taeba kampa agantompentanawe. Koti aogi potayema, Koti i'mu potantawe.

*Isu Aribaika kega'e untiye
(Matiyu 9:9-13; Aruku 5:27-32)*

¹³ Pigoya, Isu iro'ma wama kotu awamori to umintogini, a'ya'ma kina aeti wabuguna, kamana'wapa uwaimintiye.¹⁴ Uwaimitegina to waomepa Aribai, Aopayesi ntagara, takisi opiswipanti mintogana uma agate: Naegarao, omintiye. Omogana asima aegarantiye.

¹⁵ Pigoya, uwoma takisi maeyume kinake kamparaga kinake aegarauguna, aeba Aribai ntamapinti umima, pi kinake Isuge abagi kinake mima naninta nauguni,¹⁶ Parasi kina'mi nkarotu tisa kina kanama ampa igaumepa, pi kinake mima nama miyogini, agate abagi kina'waka mayama ampa ibigantawe: Nanagabaya takisi maenta kinake kamparaga kinake nanintaba nayema, ibigauguna,¹⁷ Isuba abite maya uwaimintiye: Wasana kampa yoni nkibemi kina'miba tusa yagaramata kampa wawe. Yonintana ibemi kina'mi mana igeba wawe. Piya: Aogi kinatawe, ye kinapa aogi puwaitakenaba kampa tumintuwe. Naeba agunta kina igu a'wae pikibeka uwaimikena tumuwe, piya uwaimintiye.

*Naninta i'mikena kamana untawe
(Matiyu 9:14-17; Aruku 5:33-39)*

¹⁸ Pigoya, Yoni abagi kinake Parasi kinake ka'isa yagaba naninta atate uwa mintuguni, wasanami kanama Isupa mayama abigantawe: Nanaga Yoni abagi kinake Parasi abagi kinake ka'isa yagaba monoka nanintaba a'a-o uma uwa mintuguni, nana piyema kae kabagi kina'miba nanintaba a'yugu nawema, abigantawe.¹⁹ Abigauguna Isu maya uwaimintiye: Pigoya, wasanami iba'enya puntiniba, a'ya'ma kina'miba nanintaba umaerite kampa menkatama miyewa, karu'ena ampa nawe, uwaimintana: Pi ibawae'ma nkawaewampa uwamintegini, ae aokinapa naninta imepa igeba kampa a'a-o unta maeyawe.²⁰ Pigoya, ainti iba'wae'ma nkawaewampa ampa arakurite ababute to mari wagasiginiba, pi ntagaba ao'miba intara puma kampa nanintaba nanta, uwa mima aeka napikibewe, uwaimintiye.

²¹ Piya uwaimintana to kamana maya untiye: Pigoya, paisa kai atugekanaba, wasanaba kampa aoso kaiba kasama pitapa atama pugunikiye. Kampaye. Piya pikibipa to paisa kaiwamaba to tabera atugekana, tabe age waikiye, untana,²² to ka kamana maya untiye: Piya, wasanama kasa yamanka antinkapa maema, kampa paisa yaga au'aribintiba ataye. Antipa piyama ataisinta, akapisa anosama, kana paisa yaga au'ariba kampa aibakentama, karu'ena muru'wagina wanipa pita'isa tumiwasine. Piya, kasa yamanka'ama nkantipa kasa yaga au'aribinti ataye, uwaimintiye.

*Sabatiraka kamana untawe
(Matiyu 12:1-8; Aruku 6:1-5)*

²³ Pigoya, ka sabatirapa Isuba witi yugabinti waogini, abagi kina'mi wamagini kana witi yugabisa maeyuguni,²⁴ Parasi kina'miba maya untawe: A'yuguyena pewe. Tigeba sabatirapa akumparanta'enaba piyaba pewema, Isupa abigauguna,²⁵⁻²⁶ maya uwaimintiye: Tigeba tayabama Tebiti puntintanagaba kampa napiyewo. Abayata mono kiya agarabanta, Tebitige aokinake iga'enya ibogana, Koti mpono namapinti iyogana Abayata Koti nkamume ntaninta maema amogana nantana, aokinapa imogini nantawe. Pipa uwa kina'mi ntanintaba kampaye, mono kiye kina'mi ibiwai nakedna nanintawe, uwaimintiye.

²⁷ Piya untana to maya uwaimintiye: Kotiba wasanaga migaranema napima sabatiba puntiye. Sabatigaba kampa napinta wasanaba maru puntiye.²⁸ Piya puma Wasanama Ntagara naeba sabatirapa kabima miyuwe uwaimintiye.

3

*Isu aya pu'wanta agarapa aogi potantiye
(Matiyu 12:9-14; Aruku 6:6-11)*

¹ Pigoya, Isu ini namapinti to waomepa, pita'i aya pu'wanta agarabanta mintogini,² Pitasa kina'miba Isupa agategini, sabatira kana agarabanta aogi potakaba agate kamana otakunema napintaw. ³ Pigoya, Isu aya pu'wanta agarabanta: Mati kanaao, omintana,⁴ pi kinakaba mayama ibigantkiye: Ago kamanatepa ayama napiyewo. Sabatirapa wasana aogi puwaitakunema napiyebaya, ata puwaitakunema napiyebaya, iyogaikunema napiyebaya, iyegukunema napiyewema, ibigantkiye. Ibigaogini kamana kampa unta, asaba wantaw.

5 Piya, igeba ige akuninta kina mintuguna igategina, antara pumagina, kampa a'mu puwaitanta ka ibirantiye. Piya puntana kana wasanagaba, Isu: Kaya paroso, omintiye. Omogana aeba aya parosogana atawantiye. ⁶ Piya pogini, Parasi kinapa iro'ma Eroti aokinake aki puma mintini: Aya pumabaya aegukunema napima, mare-u me-u puntawe.

Uwoma kina kotuta aki puntawe

7 Pigoya, Isuge abagi kinake pi kinapa itate kotuta wauguni, uwoma Karariya kinake, Yuntiya kinake, ⁸ Yerusaremi kinake, Intumiya kinake, Yontani wani aka'isa kinake, Taya kuma'ama agorasa kinake, Saironi kuma'ama agorasa kinake, a'ya'ma Isu pome kamana abima, uwoma kina aeti wantawe. ⁹⁻¹⁰ Piya, uwoma kina Isu aogi puwaitaogini, a'ya'ma yoni kinapa aibasana'ma maretta meta puta wama aeti wamagini: Auta uma arakurukunemra, napintawae. Piyama napiyuguna, Isu: A'yugu napasa nakibewema, wanipisa kareba nagora ataiyoma, abagi kinaka uwaimintiye. ¹¹ Uwaimogini ke kina antabaipi minta kinapa agantiniba intagawarisa uma aigarepa'wama kega'e uma: Kaeba Koti Ntagaragawae, untawe. ¹² Piya yuguna: Wasanaba piyaba a-nkuwaimiyo, Isu ke kinapa esegima uwaimintiye.

Isu aeba abagi kina'wa aisuwaitantiye

(Matiyu 10:1-4; Aruku 6:12-16)

¹³ Pigoya, Isu amuti ima aewa napiyome kinaka igege'a uma: Kanaiyo, kega'e yogini aeti kanantawe. ¹⁴ Kanauguna nagisarisa tara tumpaema kina ibabuma: Tigeripa aposoro kinatawe uwaimite: Nae nabagi pumagiri, kamana'nepa uwaimikenabu wamagiri, ¹⁵ esegiyenanepe maema ke kinapa agarubakibewe, piya uwaimima ibabuntiye. ¹⁶ Pigoya, abagi kina'mi nkigewaipa maya uwaimintiye: Saimoni aoso ominti nkagiwapa Pitawa, ¹⁷ Sepeti ntagara Yemisiwa, Yemisi nka'nantowampa Yoniwa, isigewaisipa anagi isigi Powanagisiwe uwaisiminti, tae kamanapisa antaru yisa kina miyese uwaisiminti, ¹⁸ Enturuwa, Piripiwa, Patoromayowa, Matiyuwa, Tomasiwa, Aopayesi ntagara Yemisiwa, Tariyesiwa, namu'isa kiya kina igarubakaikena abugai ntagara Saimoniwa, ¹⁹ ainti Isu minaga'ena punti ntagara Yutasi Isikeriyotiwa, sumagini, abagi puntawe.

Ke kinapa ao'maeayne, Isupa omintawe

(Matiyu 12:24-32; Aruku 11:14-23; 12:10)

²⁰ Pigoya, Isu wa'eri tumogini, uwoma kina aeti ampa aki puguna kampa nanintaba nakeda puntawe. ²¹ Kampa nakeda puguni, wa'ewatisa kina'mi piyama abitegini: Aeba aibo'enabaya piyema napimagini, Isu arakurikena kanauguni, ²² mono tisa kina Yerusaremisra tumume kina'mi maya untawe: Piyesibu ababibawaye, untini: Ke kina'mi kana tabewaimpa nkesegiyenawatasaka ka'isa ke kina igarubakasabayaw, untawe. ²³ Piya yuguna, kega'e yogini aeti ampa aki puguna, imiyo kamana maya uwaimintiye: Kewama ae'wapa aya pumabaya agarubamisine. ²⁴ Piya, ka marasa kina'mi ige igewai ma'ena pesinta, kampa aogimapa miyese. ²⁵ Pigoya, wasanama aokina'mage maka yesinta, kampa aogimapa miyese. ²⁶ Piya puma, kewama aokinaka ka ibiramisinta kampa uwa miyeginia, esegiyenawaipa kampa waiyisine.

²⁷ Piya, ka'wainaba to ka esegi yagarama ntamapinti wama ae'ena kuntana maekena puntanaba, marupa kana esegi yogurtaka araku'ma iga'narasa kirokaetama, namankapisia kotopa kuntanaba piye.

²⁸ Piya, taga kamana urimuwe. Wasanama aguntaenawape a'ya'ma ka abirkibintanawape maegaikenaenaw. ²⁹ Pigoya, wasanama Aogi Awamusaka ata kasa ikibipa, Kotiba kampa maegaikye. Kana aguntaenawape kampa maegasaki kina a'ya'ma yaga uwa waikiye, piya untie. ³⁰ Piya: Aeba ke kina ababiye, yuguna, Isu kana kamana uwaimintiye.

Isu anogabe a'natabarabe kamana untiye

(Matiyu 12:46-50; Aruku 8:19-21)

³¹ Piya yogini, anobe a'natabarabe abe'i ampima, aeka kega'e untawe. ³² Kega'e yuguni uwoma kina, agora mara'mintume kina'miba: Kanobe ka'natabarabe abe'i ampa mima kagakena pewe, omuguna: ³³ Nanobe na'natabarabe ayabayawema, ibigantiye. ³⁴ Isu piyama ibigategina, agora mara'mintume kina igategina maya uwaimintiye: Nanobe na'natabarabe mampa tigege tige mintawe. ³⁵ Wasanama Koti yemi kamana abe kinapa, pi kinapa nae na'natabarabe nanobe mintawe, uwaimintiye.

¹ Pigoya, kotu awamori Isu to kamana ukena pogini, uwoma kina'mi aeti kanama a'ya'ma ampa aki puguna, uwa marisa atate wanipisa karebi kotupi umintogini, a'ya'ma kina kotu awamori mintantawe. ² Mintuguna aeba uwoma meto kamana uwaimintana, ka maya kamana uwaimintiye:

³ Abiyo. Ka yagarama aintana pikena wantiye. ⁴ Aeba wamagina aintanawapa maema aibarase pogana, aowa ka'isaba kepi tumpa waiyogana, kabrankama irosa'ma ampa nawaegaintiye. ⁵ Pigoya aowa ka'isaba yabankama nkabobori uwaena manto waintometa tunkwaima, karu'ena irantkiye. ⁶ Piya pogana, abu'wapa kampa mabintiba tuminta, yaba nkabobori ara'waiyogana, pa taogana aeba karu'ena asama pari puma pu'wantiye. ⁷ Pigoya, to ka'isa aowapa kabubinti tunkaima iraogana, pi yoninkama aibarusa pogana asa wantiye. ⁸ Pigoya to ka'isaba apa mabi tumpa waima i'ma anosama aosa pama, ka'isa 30-wa, to ka'isa 60-wa, to ka'isa 100-wa suma aboraogana, uwoma ntaninta waintantiyema, uwaimintiye. ⁹ Uwaimintana: Ageyaga kina'maba ma kamana abibebe peno, Isu piya untiye.

Isu meto kamana agowa uwaimintiye

(Matyu 13:10-17; Aruku 8:9-10)

¹⁰ Pigoya, pi a'ya'ma kina atate wagasuguni, nagsarisa tara tumpaema kina'wake to aokinake meto kamana yomeka abigauguna, ¹¹ maya uwaimintiye: Tigeba Koti kabiratakibintanagaba ago urimikenaba piye, uwaimite: Uwa kina'mikaba kana amiyo kamana naeba uwaimogini, ¹² pigoya Aisaya pai kaemarantisa puma iba mayaenaba pewe:

Igeba abepa agowapa kampa abewe.

Agapa agowapa kampa agawe.

Piya, ago aogima abesinta aguntaenawai

ataigina, Koti mae igasasine,

Isu piya uwaimintiye.

Aintana punti kamana agowa Isu uwaimintiye

(Matyu 13:18-23; Aruku 8:11-15)

¹³ Piya uwaimintana, to kamana maya uwaimintiye: Tigeba ma meto kamanapa kampa abintawo. Aya pumabaya a'ya'ma meto kamana agowapa abikibewe. ¹⁴ Pigoya, pi aintana punti ntagara aintana aibarase puntisa puma, aogi kamanapa aibarase piye. ¹⁵ Piya, kepi tumintisa puma aogi kamana ke'i aibarase pogini, pi ka'isa kina'mi abepa, kewama karu'ena kanamapa, intabaipintisa aintanta kanta puma wainti kamanapa ampaeriy. ¹⁶⁻¹⁷ Piya, ka'isa yabata tumima abu'wa kampa pantaisa pumaba, ka'isa kina'miba pewe: Aogi kamana abima maru'ena i'mu puma, arontaganto aogima miyegina, aintiba kana kamanatakaba antara'ena aboraginabe ata potakena aboraginabe, karu'ena uwa ataye. ¹⁸ Pigoya, toba piya puma kabubinti tumintisa puma, ka'isa kina'maba maru'ena aogi kamana abima, ¹⁹ aintiba mampabisena napa'ima, kotaka ibugagina tonarona maekenaga napiyegana, kana kamanapa agora kaka waye. ²⁰ Pigoya, to ka'isa aogi mabi tumima tabera irantisa puma, to ka'isa kina'miba kana aogi kamanapa abima aega'ma miyewe. Piya, aintanaba ka'isa 30-wa, ka'isa 60-wa, to ka'isa 100-wa suma, aborantisa puma, wasanaba tonarona aogiyenaba Kotiti potawe, uwaimintiye.

Igi'maete kampa kaka atakena kamana Isu untiye

(Aruku 8:16-18)

²¹ Uwaimintana to mayama ibigantiye: Pigoya, wasanama kane yaku igi'maete namap-
inti wamaba, aeba kankabe maema aibarakitakibe, waikena sipa amentapinti metakibe,
yara itagikibayawe, a. ²² We, kampa agantintanaba agorapa kampa kaka wantiye.
Toganaba kanewama e'was'a pisa puma meto kamana'ma nkagowapa aborakiye. Airari
kaenta'enaba toganaba aborawaekiye. ²³ Ageyaga kina'maba abeno, uwaimintiye.

²⁴ Uwaimintana to kamana maya uwaimintiye: Pi abe kamana aogima abima tigebi
ataiyo. Abimagiri tigeba wasana pabi aborawaimikibe nkawameta Kotiba a'wae puma
timikiye. ²⁵ Pigoya, wasanama ka'isa agowapa aogima napikibipa, uwoma to agoba
Kotiba omikiye. Pigoya to yagarama kamana agowa kampa napikibipa, abikenaenawapa
Koti maegakiye, piya uwaimintiye.

Aintana iranema meto kamana Isu untiye

²⁶ Uwaimintana Isu to maya uwaimintiye: Pigoya, Kotiba mayama taepa kabirataye:
Wasanama yogari wama, aintana pugaitegina, ²⁷ asi nasi asekapa waimarate, arapa
asima uma agateginaba: Aya pumabaya kana aintanaba i'ma anosakiyema, napiye.
²⁸ Piya, aewa mabintisa i'ma a'yenka aboraurite ima, aosaba pama anontana pegina, ²⁹ pi

ntagaba yogari wama naninta umaeeye. Pigoya nanintara kabiyyisa puma Kotiba piyama tagutata kabirataye, untiye.

*Ya a'wa meto kamana Isu untiye
(Matiyu 13:31-32; Aruku 13:18-19)*

³⁰ Piya untana Isu to maya untiye: Pigoya, Koti kabiratamisa puma nanawe ukune. Pikaba ayama meto kamanapa ukunema, ibigantana: ³¹ Pigoya, masiteti yawama nkaowapa uwaenantonto waintakana maema aintana pukibipa, ³² pipisa i'ma anosama tabe ya ima, amaba tabera wagana kana pegina, kabarankamaba amari inapa kiyewe. Pintana piya pemisa puma Kotiba piyamakabirataye, uwaimintiye.

*Meto kamana'waka Isu kamana untiye
(Matiyu 13:34-35)*

³³⁻³⁴ Pigoya, uwoma meto kamanataso aogi kamana'wapa uma ige abikena kamana uwaimogini abima napiyuguna, toma toma meto kamana a'ya'ma kina uwaimitegina, togana abagi kina'wa ibiwaipa meto kamana a'ya'ma agowapa uwaimintiye.

*Pontawama Isu nkawamu wasintiye
(Matiyu 8:23-27; Aruku 8:22-25)*

³⁵ Pigoya, pi ntaga ase yogana: Ta'ema maroteri wakune, uwaimitegina, ³⁶ Isu wanipisa karebi mima, awamori mintume kinapa itaogini, abagi kina'mi wanipisa karebi ababute wauguni, to wanipisa karebi ka'isa kinapa aege wantawé. ³⁷ Piya puguna, agasiya ponta kanama wanipa tabera aiga'y'o'ya puma, ka'isa wanipa wanipisa karebinti iyogana, kunta puma ipirintakena puntiye. ³⁸ Isu a'no aisagenawata waitamintogini, igeba aeti wama abage pumagini maya omintawé: Tisa yagara, kaeba taekaba kampa napiyeno. Taeba naisukena pune, omintawé. ³⁹ Piya omuguna, aebe asimagina pontawamakaba tabe kamana umagina, waninkamaba: Pasebuma, uwa waiyo yogana, ponta a'ya waogana wanipa uwasuwa puntiye. ⁴⁰ Aibogana maya uwaimintiye: Nanaga tiyekuruba pewe. Timititi'enaba kampa waintiya, a, untiye. ⁴¹ Piya yogini, igeba pami pumagini: Aebe nana yagaragana, pontawamabe waninkamabe ae kamana wasiyesema, igeba mare-u me-u puntawé.

5

*Ka yagarama nkantabaipisa Isu ke kinapa agarubantiye
(Matiyu 8:28-34; Aruku 8:26-39)*

¹ Pigoya, igeba kotu maronkateri wama, Kerasa kina'mi mpari wama, ² wanipisa kare ate tumogana, wasana irubintisa ka yagara, ke kina antabaipinti minta yagarama, Isuti kanantiye. ³ Kana yagaraba asi nasi wasana irubinti miyogini, wasanami kampa araku'ma esegi iga'narasa kampa ayapa kirokaentawé. ⁴ Pigoya ka'isa kina'mi pai uwoma ntaga araku'ma, agisa ayatapa esegi iga'narasa kirokaetauguna, ayapisa atisa kaitegina agisabisa airisa pugasi pogini, wasanamiba esegiyenawapa kampa asugaintawé. ⁵ Kana yagaraba a'ya'ma yaga arape asenabipe wasana irubinti mintana amuti mintana pumagina, ata kiga'e uma yaba kasu mpaema aupa airisa puntiye.

⁶ Pigoya, aebe e'ero marisa Isupa agategina, karu'ena kanama aeti ampa arakabima mintogana, ⁷⁻⁸ Isuba: Ma ntagarama nkantabaipisa ke kinapa irosao, omintiye. Piya omogana, kana yagarama taberesa maya untiye: Isu, kaeba inatista tabe Koti Ntagaragawé. Nana punatakena kanane. Koti nkaobi suwa, a-nkata punatao, untiye. ⁹ Piya yogana Isu aebe: Kagegapa kegawema, abigantiye. Abigaogana: Taeba uwoma mintompeka, piya puma nagenepe Uwomane unamewe omintiye. ¹⁰ Piya omima: Mamparisaba atagarubaoma, esegima abigantiye.

¹¹ Pigoya, uwoma ntaga amu ararabiri mima naninta nama miyuguni, ¹² ke kina'miba: Tagarubaga yaga intabaipinti wanoma, abigantawé. ¹³ Piyama abigauguna aebe: Pigoya waiyo, uwaimintiye. Uwaimogini kana ke kinapa antabaipisa iro'ma intabinti ubasuguni, kana yaga, 2,000 yagagini igeba karu'ena ausari tumima, kotupinti tumpa naisuwaewantawé.

¹⁴ Naisuwaewaguni yaga kiye kina'miba karu'ena iyegaka wama, wa'eribe yogaribe wama uwaimuguni, wabe wayape kanaganá puma, kana pomentana ampa agakena kanantawé. ¹⁵ Isuti kanamagini ampa agaomepa, kana pai ke kina antabaipinti minta yagara kaiwapa amitauguna mara'mima aogima mintogini, agate iyekuru puntawé. ¹⁶ Aibuguni pomentana agaume kina'miba kana yagaragawa pi yagagawa suma uwaimintawé. ¹⁷ Pigoya pi kina'miba: Mampa atate tori wao, ukena puguna, Isu atate tori wantiye.

¹⁸ Tori wakena pumagina wanipisa karebi iyogana, kana yagara pai ke kina antabaipinti minta yagara kanama, Isuka: Nababo, yogana, ¹⁹ Isu: A'a-o, untana: Wa'egati

wama, Koti antara pugatama aogi pugatami kamana kaokina uma uwaimo, omintiye.
²⁰ Piya omogana aeba wama, pi naya tara'mu kuma'i wama, kana Isu pome kamamapa uwaimikena pogini, a'ya'ma kina'mi abite pami puntawe.

*Isu kiya yagarama nkarakganto ao'maekena puntiye
 (Matiyu 9:18-19; Aruku 8:40-42)*

²¹ Pigoya, Isu wanipisa karebi to wama maroteri wama awamori umintogini, uwoma kina aeti kanantawe. ²² Kanauguna ka mono namataso kiya yagara, agewapa Yairasi kanama ampa agate Isu agisabi parokaema mima, ²³ maya uma abigantiye: Aragan-tonepa agaro nttaganto purikena piye. Kaeba kanama auta uma arakuregana, aeba atawakanaba aogima miyeno, yogana, aege wantase.

*Ka wae'ma Isu kaiwata aukaya puntiye
 (Matiyu 9:20-22; Aruku 8:43-48)*

²⁴ Piyama aege wausuguni uwoma kina aega'ma wama agora karare putasuguna, ²⁵ ka wae'ma aeti kanantiye. Kana waepa iyegaena abogana nagisarisa tara tumpaema kabuba miyomepa kampa ata waogana, ²⁶ tonarona tusa kinati waomepa, kampa aogi potauguna, a'yawaema yabankapa ige imiwaegasomepa, kana yoninkapa kampa ata waogana, to tabera ataena abuntiye. ²⁷⁻²⁸ Pigoya kana waepa Isu pome kamana abite, uwoma kina mintume ikapinti kanamagina, ampa napima: Kaiwata aukaya pukubopa nata wakiyema ageba napimagina, aka'i kanama kaiwata aukaya pogana, ²⁹ korankapa ago tabagobu waogana age napiyomepa: Yonintepa ago natawayema, napintiye. ³⁰ Aibogana Isu: Ka'isa esegiyenane wayema, age napigategina: Kainetapa kebaya aukaya piyema, ibigantiye. ³¹ Ibigaogini, abagi kina'mi maya omintawe: Uwoma kina'mi kagorapa mintagana agana, nanagaba: Kebaya naukaya piyeba yene yuguna, ³² Isu: Kebaya piyema, marea mega puntiye. ³³ Piya pogana kana wae'maba potao-mentanaga napima, aekuru puma tabaraba pumagina, ae agora ampa parokaema mima, a'ya'waemaena pome kamanapa omintiye. ³⁴ Omogana, Isu maya omintiye: Araganepa, kamatiti punatampeka aogi kabiye. Pika wama aogima miyo, omintiye.

*Isu kiya yagarama nkarakganto asitantiye
 (Matiyu 9:23-26; Aruku 8:49-56)*

³⁵ Pigoya, pi kamana uma miyogana, ka'isa kina'mi kiya yagarama namapisa iro'ma kanama, kiya yagara maya omintiye: Aragagapa ago pu'waye. Nanagabaya tisa yagaraba to kamanapa omima miyene, omuguna, ³⁶ Isu kana kamana kampa napinta, ini nama kiya yagarapa: A-kaekuru puma, naeka aogima napima miyo, omintiye. ³⁷ Omigaita wasanaba: A-kanaiyoma, akunkitate, Pitawa Yemisiwi Yemisi a'nantowampa Yonitiwa suma, ibiwai ibabute wama, ³⁸ mono nama kiya yagarama ntampinti waumepa: A-e a-e, uma tabe kub'e'na puma miyuguna, kana kamana abite, ³⁹ namapinti ima maya uwaimintiye: Nanagabaya tabe kamana uma kubenaba pewe. Kana aragaba kampa agorapa pu'waye. Uwa waitamintiye, uwaimogini, ⁴⁰ igeba kagi potantawe. Piya puguna a'ya'ma igarubaogini abe'i irosa'ma tumuguna, kana aragantoma anoke abake abagi kinake ibabute wama, araganto mintometiba intiye. ⁴¹ Imagina kana aragantoma ayata u'ma: Tarita kumi, omintiye. Kana kamanapa tae kamanapisaba: Araganto asiyo ugamuwe, untie. ⁴² Piya yogana kana araganto karu'ena asima nasi nasi puntiye. Pi nkarako kabuwapa nagisarisa tara tumpaema kabu pome nkarakantowe. Asima nasogini igeba agasiyama pami puguna: ⁴³ To kinapa pontanaga a-nkuwalmiyo, untana: Kana araga naninta amigina nano, uwaimintiye.

6

*Nasaretirisa kina'mi Isupa uwa atantawe
 (Matiyu 13:53-58; Aruku 4:16-30)*

¹ Pigoya, Isu pitasa itate mawati waogini, abagi kina'wampiba aege wantawewe. ² Pigoya sabati yagaba mono namapinti wama kamana yogini, uwoma kina'mi abite pami puma maya untawewe: Ma ntagara aetasabaya kana kamanapa maeye. Aetasabaya ma aogi napiyenaba maeye. Aya pumabaya kampa agaompentana aewapa esegima piye. ³ Taeba agowapa abintune. Aebe kapenta yagara, Meri ntagara mintiye. Yemisige Yosesege Yutasige Saimonige igantowaimpa mintegini, ae imanapa mata taege miyewe, piya umagini Isuka abuguna kampa aogi puntiye. ⁴ Aibogana, Isu maya uwaimintiye: Koti untili kamana yemi poropete yagarama kamanaka uwoma kina'mi ibugaye. Pigoya mawatape namankapipe ageba kampa waintiye, uwaimintiye. ⁵ Piya, aeba kana mariba kampa tabe yuga puntamikana, yoni kinapa taranto ita u'ma aogi puwaitantiye. ⁶ Aibogini igeba

akekaba kampa napiyuguna: Nanagabaya kampa abewe, untiye. Piya ute, pabi kumata uwaena kuma'antontori nasima kamana'wapa uwaimintiye.

*Isu abagi kina'wa: Yogaenari waiyoma, uwaitantiye
(Matiyu 10:5-15; Aruku 9:1-6)*

⁷ Isu abagi kina nagisarisa tara tumpaema kina'wa igege'e yogini menkaki puguna, ke kina agarubakena esegeiyenaba imima tara tara puma to auka'i to auka'i igaruba'ma, ⁸ maya uwaimintiye: Tigeba nasikibepa, kotapa a-mpaete wantiri nanintabe kope uwa atantiri, tibamukantisa ikantana pukena yabapa a-nkurite waigina, Koti kabiritakiye. Pigoya, pusu'ma nasikena asage, ⁹ tigisa anage maentiri, kaiba ka'anto purite waiyo, uwaimintiye. ¹⁰ Pigoya to kumati to kumati waigini, maru: Naege mikibewe ikibi nttagarama ntamapi wama, pi kumata a'ya'ma yaga aege umigategiri, to kumati waiyo. ¹¹ Pigoya to kumati waigini, kampa ti'ma'ma kamanati kampa abigiripa, tigisarisa i'ni asari puwaitate toriba waiyo. Piya piginaba: Kampa taekaba i'mupa pewema napikibewe, uwaimintiye. ¹² Isu uwaimogini, igeba nasima: Tigeba ataenaripa kasiyo uwaimintini, ¹³ uwoma ke kinapa igarubantini, uwoma yoni kina'mipa i'noti masawae pai'itauguni ita wantiye.

*Yoni wani pai'itanti ntagara pu'wantkiye
(Matiyu 14:1-12; Aruku 3:19-20; 9:7-9)*

¹⁴ Pigoya, Isuka kamana mare-u me-u puguna, Eroti kiya yagara yome kamana abintiye. Piya, Isu esegi yuga pikana: Yoni wani pai'ita pome ntagara pu'watitisa asima mintibayawema, ka'isa kina'miba napiyuguni, ¹⁵ to ka'isa kina'miba: Iraiabayawema yuguni, to ka'isa kina'miba: Pai Koti kamana unti ntagara kanta pikana kana yagaraba poropete yagarabayawema, napintawe. ¹⁶ Piya yuguna, kana yagaraga Eroti maya untiye: Yoni wani pai'ita pome ntagarabayawe. Nae uwaimuwagini ana'mu arisata nttagarama asima mintiyema, napima untiye.

¹⁷⁻¹⁸ Pigoya, pai Eroti nka'nantowampa Piripi nkxae Erotyasi maeyogana, wani pai'ita punti ntagara Yoni Erotipa maya omintiye: Ayuguma ka'nantogampa nkxae maeyane, omogana, abigategina pika Eroti wasana uwaimogini, Yonipa araku'ma iga'narasa kirokaetama, iga'na namapinti metantawe. ¹⁹ Aibuguna Erotyasi Yonipa kabi'ma aegukena pogana, ²⁰ Eroti, Kotiti Yoni aogima aegaranta yagaragana, agate aekuru pumagina, Yonitapa kabima mintantiye. Aibuntana Yoni kamana abisanaga abugaogana, asi nasi abite Eroti pam'i puma aekuru puntiye.

²¹ Piya pogana ka yaga Erotyasi Yonika ataena potakena agi napintiye. Pi ntaga awaewampa yakari potanta yaga aboraogini, kamani kiya kinake ami kiya kinake Karariya kumatas ka yaka kinake menkaki puguna, Eroti taena puwaitaogini nama i'mu potantawe. ²² Piya puguna, Erotyasi nkaragawae'wampa wama wa'ena uma pogini, Erotinge kiya kina'mige i'mu potamagini, Eroti mayama abigantiye: Aragawae, nanaga kabiye. Kabikibintanaga unamegapa kamukuwe. ²³ Taga kauwe. Ka'isaenaneka kabikibintanaga unamegapa uwa kamenyo untiye.

²⁴ Piya yogana, kana aragawae'ma abe'i iro'ma tumima anowampaka: Nana namoma abigasuwé yogana, anowampa maya omintiye: Yoni wani pai'ita pem'i nttagarama nka'no arisa namoma abigao, omogana, ²⁵ karu'ena kana kiya yagarari wama maya omintiye: Ibanto Yoni wani pai'ita pem'i nttagarama nka'nopa arisa'ma tu'napi atama namo, yogana, ²⁶ kana kiya yagaramaba antara pugantiye. Pigoya, aki puntume kina'miba: Taga kauwe yome kamana abuguna pika napintana: A'a-oba kampa unta, ²⁷ irebu yagaraga: Wama Yoni nka'no kasama menkamo, yogana, iga'na namapinti wama uma kasama, ²⁸ tu'napi atama maete aragawae menkamogana maete anowampati memintiye.

²⁹ Aibogini, Yoni abagi kina'miba abitegini, abamupa maema mabinti kaitantawé.

*Isu uwoma kina nayaka'mu pareti imintiye
(Matiyu 14:13-21; Aruku 9:10-17; Yoni 6:1-13)*

³⁰ Pigoya, Isu nkabagi kina'miba yogawaipa atate Isuti wama, a'ya'ma pume kamanape uwaimume kamanape ampa omintawé. ³¹ Piya puguni uwoma kina'mi pita'i kanagate wate puguni, Isuge abagi kina'wampige kampa nanintaba nauguna, pigoya abagi kina'waka mayama uwaimintiye: Tabire to auka'i wama, kampa wasana mimma auka'i una migrakuna, uwaimogini, ³² wanpisa karebi ibinto ka'me mpari wakena puntawé.

³³ Pigoya igeba wakena puguni, uwoma kina'mi igate, a'ya'ma kumatisa atate karu'ena awamori wama, umikena pome mpara maru umintuguna, ³⁴ Isu pita wanipisa karebintisa irosa'ma, uwaena kina tumpa igaomepa, piyama yaga awaro ano kampa miyisa puma, igeba mintuguna, tumpa igate antara puwaitama, uwoma kamana uwaimikenä agobintiye. ³⁵ Piya, ase ikena pogini, abagi kina'miba Isuti kanama maya omintawé:

Ibanto atamaisaya, mapa ka'me mpari mintuna, ³⁶ a'ya'ma kinaka: Kuma'ibe yogaribe wama nanintarika uma agama ika piyo, uwaimintana igarubaoma, omintawé. ³⁷ Piyama omuguna Isuba: Tigeba naninta maema imiyo, untiye. Piya yogini igeba: Aya pusune. Moneba 200 torarasa nanintaba ika puma imisanagaba kabiyoma, abigantawé. ³⁸ Abigauguna, Isu maya uwaimintiye: Ayaki nanintaba urintabayawa, wama agaiyo, untiye. Yogini, igeba wama ibiga ibiga pugate kanama: Nayaka'mu paretiwa, inoyanta tarawa suma waintiye, omintawé.

³⁹ Piya omuguna, Isu abagi kinaka maya uwaimiyoma uwaimintiye: Tigeba aepati a'ya'ma kina ka umaki ampaki puma miyiyo uwaimiyo, untiye. ⁴⁰ Piya yogini, uwaimuguni maropi mopi ka umaki ampaki puma mara'mimagine, ka'isa au'i 100 kina mara'miyuguni, to ka'isa au'i 50 kina mara'mintantawé. ⁴¹ Mara'mintuguna Isu kana naya ka'mu paretiwa, tara inoyantawa suma mae u'ma mantari ao ma'magina Kotiti a'mu potamagina, pareti apako puma abagi kina imogini maete nasima imintawé. Pabiya puma inoyanta tarage apako puma, a'ya'ma kina imogini, ⁴² pigoyema a'ya'ma kina'mi naumepa iga'e pantie. ⁴³ Aibogini, abagi kina'mi nasima paretibe inoyantabe aritapa maema, nagisarisara tara tumpaema ku iragintawé. ⁴⁴ Pigoya, kana naninta naume kinapa waba 5,000 waba mintantawé.

*Isu wani nkabobori nasintiye
(Matiyu 14:23-33; Yoni 6:15-21)*

⁴⁵ Pigoya, Isu abagi kina'waka: Naeba a'ya'ma kina igarubakiri, tigeba wanipisa karebi paitama maronkateri Petisaira kumati waiyo, uwaimintiye. ⁴⁶ Pigoya: Tigeba waiyo, uwaimitegina amuti nunamu ikena intiye. ⁴⁷ Piya, abiwa mima nunamu untana asekapa abagi kina'wa wanipisa karebi kotu nkakapinti mintuguna, ⁴⁸ igaomepa tabe esiba kanama, wanipa aiga'yo'ya aiga'yo'ya pogini, wanipisa kareba kampa aogima pubasanantawe. Aibuguna, Isu igitate tumima, aseka aba mariki wani nka'eti ige igora wamagina uwaigaite, ⁴⁹⁻⁵⁰ wani nka'eti nasogini, agate: Pu'wanta kina'ma nkamapayawe, utegini, igeba a'ya'ma agate iyekuru puma: A-e, a-e, untawé. Piya yuguna, Isuba: Naene kanauwa, tiyekuruba a-piyo, utegina, ⁵¹ wanipisa karebi igege asu miyogana, esiba to pomesapa kampa puntiye. Aibogini agasiya pamipumagin: Ayabaya piyema, napintawé.

⁵² Pigoya, atamaita pareti apako puma imome'na nkagowapa kampa aogima napiyuguna, kunta ibuntiye.

*Isu uwoma yoni kina Kenesareti aogi puwaitantiye
(Matiyu 14:34-36)*

⁵³ Pigoya kotu maronkateri wama, Kenesareti mara iro'ma wanipisa kareba ubu'atate wantiye. ⁵⁴ Piyama wauguni, wasanamiba Isu agate, ⁵⁵ a'ya'ma kumati karu'ena wama uwaimuguni, yoni kina wasirite Isu mintometi kanagana puntawé. ⁵⁶ Piya, Isu tabe kumatibe uwaena kuma'antontoribe yogaribe nasima agaogini, yoni kinapa wasirite kuma akapi meta menkata puma mintini: Kaeba kanagini kautasaenama nkututa urigina ita wano, yuguni, a'ya'ma kina autasaenara uruguna ita wantiye.

7

*Isu iyabama kamanaka kamana uwaimintiye
(Matiyu 15:1-9)*

¹ Kai'isa Parasi kinake mono tisa kinake Yerusaremisa kanama Isuti ampa aki puguna, ² ka'isa aokina'mi Parasi kina'mi uwaimumesa puma, kampa iyantana punta, uwa nanintawai nauguni igantawé. ³ Piya, Parasi kina'mige a'ya'ma to Yuta kina'mige iyabami yume kamana aega'ma: Kumite aebasanaunema napima, iyankaota asu ma'maema iyan-tana pugaitegini, nanintaba nantawé. ⁴ Pigoya, igeba maketibisa naninta maeyumepa, kampa wasimi punta, kana naninta kampa nantawé. Piya toma toma paisa kamana abintini, kankabebbe tu'nape kao'ena punakena tinibe abumesa puma wasimi puntawé. ⁵ Pigoya nanintawai uwa nauguni igitate, Isuka Parasi kina'mige mono tisa kina'mige mayama abigantawé: Kabagi kinakampiba, nanagabaya tayabami untasa puma kampa iyapa wasimi punta, uwa nawe, untawé. ⁶ Piya yuguna Isu maya uwaimintiye: Tigeba kumpari kina'mitaba, pai Aisaya mayama tigeka Koti kamana taga kamana ago kaemarantine:

Ma kina'miba iwamutasaba nae nage asaga'yuntini, igu'amaba pagasara miyewe, iye.

⁷ Naeti mono'waipa kampa yewa, uwa yewe, iye.

Nae kamana'nepa kampa unta, wasanami kamana yewema, Koti iyema, kaentiye.

⁸ Piya, tigeba nanagabaya Koti kamana akayuma, wasanami kamanapa abewe, untiye.
⁹ Piya untana to maya uwaimintiye: Tigeba ayabaya Koti kamanapa akayuma wasanami kamanapa wasiyewe. Pipa kampa kanarasaye. ¹⁰ Piya, Mosese pai maya untiye: Kano kaba kamana abima wasiyo, untana: Wasanama anoke abakega kamparaga kamana ukibipa, aepa aeguma kaiyo, untiye. ¹¹ Pigoya tigeba piya yepa: Anoba isimikenaenaga: Mapa kobaniwe umagina, tae kamanapisa: Mapa Koti amikenaenawe, umagina, ¹² ano aba kampa isimikibipa, Aerane yewe. ¹³ Piya puma tigeti kamana yepa, nanagabaya Koti kamanapa uwa atawé. Piya, tonarona piyrena pewe, Isu uwaimintiye.

*Tantabaipinti ataena pusanaga Isu kamana uwaimintiye
(Matiyu 15:10-20)*

¹⁴ Pigoya, Isu pi kinaka kega'e yogini, menkaki puguna maya uwaimintiye: Kamana'nepa tigeba a'ya'ma abibebe puma abiyo. ¹⁵⁻¹⁶ Uwa marisaena wasanama maema nakibipa, agupa i'nintana kampa potakiye. Piya, wasanama atama napiyekanaba agupa i'nintana potakiye, uwaimintiye.

¹⁷ Uwaimitegina wasanaba itate namapinti iyogini, abagi kina'wampi kana meto kamanaka abigauguna, ¹⁸ maya uwaimintiye: Tigege kana kamana agowapa kampa abintawa, a. Wasanama uwa marisa naninta maema nakibipa kampa i'nintana potakiyema, kampa abintawa, a. ¹⁹ Pipa kampa agupipa waikiye. Aga'epa tunkwaiyekana uwa megaikkiye, untiye. Piya, Isu kamana agowapa: A'ya'ma nanintaba aogi nakedna naninta waintiye, untiye. ²⁰ Pigoya to maya untiye: Wasanama age napikenenaewampa agupa kamparagaba pikkiye, untana: ²¹ Wasanama antabaipisa toma toma napima aguntaenaba piye. Pipa mayamawé: Ata napiyenewa, kupiyonawa, kuntanawa, wasana aegukenaenawa, kumiyenawa, ²² to wainantana maekenaenawa, aguntaenawa, kumpari'enawa, i'nintanawa, to waina mparu maekenaenawa, akayasukenaenawa, agebigoenawa, aibo'ena pikenaenawa sumawe. ²³ Piyaenaba napiyenewatasa aborama agupa i'nintana potakiye, uwaimintiye.

*Ponisiya kumatasa wae'ma Isupa aogima aegarantiye
(Matiyu 15:21-28)*

²⁴ Piya puntana, Isu asima pi kuma atate, Taya kuma agora wama napintiba uma migarakena pogini, wasanamiba: Ago Isu ampintiyema, napiyuguna, ²⁵⁻²⁶ ka wae'ma abite Isuti kanama, agisabi uma parokaentiye. Kana waepa namu'isa wae, mawapa Siriya Ponisiya kumatasa waepa mintomepa, aragawapa ke kina antabaipinti minta aragawae mintogana, Isuti wama mayama abigantiye: Araganepa ke kina antabaipinti mintiye, wama agarubao, untiye.

²⁷ Piya yogana, Yuta kinake to kinakega Isu meto kamana maya omintiye: Maru yakarantontomi ntaninta imigaite, karawama naninta aintiba imikena pewe. A'yugu yakarantontomi ntaninta kara amisanagawe, omintiye.

²⁸ Omogana: We naba-o, yakarantontomi naninta arita maema karantonto imegini nawe, untiye.

²⁹ Aiyogana, Isu maya omintiye: Aogi kasa yena, wa'egati wama aragagapa uma agao. Antabaipisa ke kinapa ago wagasaye, untiye. ³⁰ Piya yogana aebe wa'eri wama, aragawa sipara uwa waitamintogana uma agaomopera, kana ke kinapa ago wagaintiye.

Ageba akunkanta yagara Isu aogi potantiye

³¹ Aibogana, Isu Taya maba atate Saironi kumapa agaite, nayatar'a mu kuma waintome ki' wama, Karariya kotuta wantiye. ³² Wama umintogini, ka'isa kina'miba agekumpa kampa aogima kamana yome ntagara ababute Isuti kanamagini: Kaya aukaya pegana, ata wano, untawe. ³³ Piya yuguna, Isu kana yagara abiri ababute wamagina, aya amarasa ageba purosa atate, kaisa puma antebura atama, ³⁴ mantari mayo agau'magina, antara potama: Epata, untiye. Piya, tae kamanapisa: Ageba a'waiyo, untiye. ³⁵ Piya yogana pabigo ageba a'waiwaogana, awamupa kampa kunta abogana kamanapa uwa untiye. ³⁶ Piya pogana, Isu: Makaba wasanaba a-nkuwaimyo, untiye. Piyama toma toma: A-nkuwaimyo, yogini, igeba uwaimome kamana uwa atate, to kinati mare-u uwaimi me-u uwaimi puguni, ³⁷ a'ya'ma kina abite tabera pam pumagini: We, a'ya'waemaenaba aogiyena puntana, agekuninta kinake, mi'mi'ma kinake aogi puwaitaye, untawe.

*Isu uwoma kina tonaentisa tara umaema pareti imintiye
(Matiyu 15:32-39)*

¹ Pigoya, pi ntaga waya'wa uwoma aki puntawé. Aki pumagini, nanintawaipa nawaegasuguna, Isu abagi kina'waka kega'e yogini kanauguna maya uwaimintiye: ² Ma

kina naege kakaga yaga miyepa, ibanto naninta i'miyega nantara puwaitauwe.³ Ka'isa e'ero marisa kanata kina kampa naninta iminta wa'eri igarubakubopa ke'i iyonanta puma iyegukiye, untiye.⁴ Piya yogini, abagi kinamiba: Mapa ka'me mpariwa, uwoma kina naninta imikenaba aetasabaya maema imukunema, abigantawe.⁵ Piyama abigauguna: Paretiba ayaki urite kanawema, Isu ibigantkiye. Ibigaogini: Tonaentisa tara umaema waintiye, untawe.

⁶ Piya Yuguna, A'ya'ma kina mara'miyiyo, yogini, mara'miyuguna, kana tonarentisa tara umaema paretiba mae u'ma, Kotiti a'mu potama, apako puma abagi kinawaka: Maema imiyo, yogini, pabi yomesa puma maete nasima, a'ya'ma kina imintawe.⁷ Aibuguna to inoyanta taranto waintogana, pike maema a'mu potama imimagine: Maete wama imiyo, untiye.⁸⁻⁹ Piya yogini, imuguni maema nauguna iga'e pantiye. Pi kana kinapa 4,000 kina'mi nantawe. Pigoya igeba nagate, ka'isa arita ataumepa, abagi kina'mi nasima maema tonarentisa tara umaema ku iragintawe. Piya puguna, Isu a'ya'ma kinapa igarubantana,¹⁰ karu'ena abagi kina'wake wanipisa karebi mima, Tamanuta mari wantiye.

Ka'isa kina'miba awame'enaga abigantawe

(*Matiyu 16:1-4; Aruku 12:54-56*)

¹¹ Umintuguni, ka'isa Parasi kina aeti kanamagini tonarona kamana uwa abigantini: Kaeba mantarisa awame'ena purayakega, agakubompepa Kotiba a'mu pugataye ukune, untawe.¹² Piya Yuguna, Isu antara puma aemu maema maya uwaimintiye: Nanagabaya ibasa kina'miba: Awame'enaba tayako, yewe. We, taga kauwe. Kanaenaba naeba matasa kinapa kampa tiyakikuwe, uwaimitegina,¹³ itate wanipisa karebi asumima maroteri wantiye.

Parasi kinakabe Ertigabe Isu kamana uwaimintiye

(*Matiyu 16:5-12*)

¹⁴ Waomepa abagi kina'miba nanintaba igebru'a puguna ka'anto wanipisa karebi waintogana,¹⁵ Isu: Aogima napiyivo, uwaimintana: Paretibi yisiti atagana anosamisa puma, kiya yagara Ertibe Parasi kina'miba ata kamana'wai anosasanaga kabiyivo, uwaimintiye.¹⁶ Uwaimogini: Nanawebaya iyema, abagi kina'miba napimagini: Paretibi pukenaena kaite, tagegru'a puma kanaompekabaya napimaiye, untawe.¹⁷ Piya yuguna, Isu abitegina mayama to ibigantkiye: Nanagabaya paretibi kampa waintemika yewe. Tige ibaba esegiyenane kampa agantawo. Kampa aogima napiyewo.¹⁸ Tigeba tiyoba waintiye. Kampa agawo. Tigeba tigeba waintiye. Kampa abewo. A'ya'waemaenagaba tigebru'a pewo.¹⁹ Nayaka'mu paretibi apako puma, 5,000 kina imuwigini nagate, atunkapa ayaki ku iragintawema, ibigaogini: Nagisarisa tara tumpaemawe omintawe.²⁰ Piya omuguna, Isuba: Pigoya tonarentisa tara umaema paretibi apako puma, 4,000 kina imuwigini nagate, atunkapa ayaki ku iragintawema, ibigaogini: Tonaentisa tara umaema kune, untawe.²¹ Aiyuguna: Pigoya ibanto agowapa kampa napiyewoma, ibigantkiye.

Isu Petisaira kumata aorika yagara aogi potantkiye

²² Pigoya, igebru'a Petisaira kumati waumepa, ka'isa kina'mi aorikaenta yagara Isuti ababute kanamagini: Auta aukaya poma, abigantawe.²³ Piyama abigauguna, Isu kana aorikaenta yagara ayakana urite, kumatasa abe'i uwa mari wamagina, aobi kaisa potama, ayapa aora araku'ma: Ago aganoma abigantkiye.²⁴ Abigaogana agategina: Wasana agaopa yawama nasisu piye untiye.²⁵ Piya yogana, Isuba aora to aya urogana aoba apina'ma agaogana ata waogana, a'ya'waemaenaba aogima agantkiye.²⁶ Agaogana Isu: To ma kumatiba a-nkwamagina, wa'egati wao, omintiye.

Kaeba Koti utaratanti ntagaragawe, Pita Isuka omintiye

(*Matiyu 16:13-20; Aruku 9:18-21*)

²⁷ Piya omite, Isuge abagi kina'wake Sisariya Piripai kumati wama, ke'i abagi kina'waka: Naekaba kebayawe yewema ibigaogini,²⁸ igebru'a maya omintawe: Ka'isa kina'miba Yoni wani pai'itanti ntagaraweye yegini, ka'isamiba Iraiywae yegini, to ka'isamiba poropete yagarabayawe yewe, untawe.²⁹ Pigoya tigeba naekaba kewema napiyewema ibigaogini: Kaeba Koti utaratanti ntagara Karaisitigawema, Pita omintiye.³⁰ Omogana: Pigoya naekaba wasanamipa mayaba a-nkuwaimiyo, uwaimintiye.

Isu aewa purikena kamana uwaimintiye

(*Matiyu 16:21-28; Aruku 9:22-27*)

³¹ Pigoya, Isu abagi kina'wampi kamana'wapa agobima maya uwaimintiye: Wasanama Ntagaranaga tabe kuntaenabi mpikuwe. Monota kabiyume kina'mige, mono kiya kina'mige, mono tisa kina'mige naepa uwa natakibewe. Pigoya, asa wasanami naeguyigi,

kakaga yaga pu'ma mintakana asinatakiye, piyama pagusama untiye. ³² Piya yogana Pita abiwa ababurite wama kabi'magina: Pi kamanapa a-so, omogana, ³³ Isu a'wae pumagina abagi kina'wa igate, to Pitati a'wae puma maya omintiye: Satanigawa, kaeba natate wagaso. Napiyenagapa Kotintaba kampa maeyane. Uwa wasanamanta maeyane omintiye.

³⁴ Piya omitegina, Isu abagi kina'wakaba a'ya'ma to kinakabe: Mata'i kanaiyo, yogini, kanauguna maya kamana uwaimintiye: Ka'waina naegarakibipa, kae'enaenagapa atate naegaragana, wasanami igobi pugatakibika a-kaekuru puma maripogapa ae-saga'uritegina naegarao omukuwe, uwaimintana: ³⁵ Pigoya, ka'waina mikenaenawaka owe yekanaba, a'yugu potakiye. Naeka aogi kamana'neka mikenaenawaka a'a-o yekanaba aboramikiye. To ka'waina ae'wa nkaguka napi napi pikibipa uwa purikiye. ³⁶ Pigoya, ka'waina mabi a'ya'waemaena maemagina agu'amankapa kaiyekanaba, aya pikiye, a. ³⁷ Agupa ayamabaya to kakema ika pekana kanarasakiye. Pipa kampaye. ³⁸ Pigoya, ibasa yagaba wasanamiba Kotipa atate aguntaena pewe. Piya pekana, wasanama ibaba naeke kamananekega ani pikibipa, toganaba nabanempa nke'wasaena yaga enisore kinake tumukubopa, Wasanama Ntagaranaga, pi naeka ani pikibi kinapa uwa atakuwe untiye.

9

¹ Piya untana to maya untiye: Tigeba abiyo. Ka'isa mata miye kinapa maru Koti esegima kabima mintintana agakibepa, aintiba purikibewe, piya untiye.

*Amuti Isu nkau'ama e'wasa puntiye
(Matiyu 17:1-13; Aruku 9:28-36)*

² Pigoya, tonaentisa ka umaema yaga, Isuba Pitana, Yemisina, Yonina suma, ibi-wai ibabute e'ero nkamuti asu mintogini, igeba agaumepa aupa to au maeyogana, ³ autasaenawapa wae kanta puma agasiyaena puma e'wasa puwantiye. Piya mampabisa kina'ma kai wasimi pekanaba kampa piyaba pikiye. ⁴ Piya pogini Iraiyyaga Mosesenge aborama, Isuge kamana yuguni, pi kakaga abagi kina'miba agate, ⁵⁻⁶ tabera iyekuru puma, Pita kampa aogima napinta Isupa uwa maya omintiye: Kiya yagarama-o, taeba aogima maba miyompeka, kakaga nama kikune. Kapa kae'enawa, to kapa Mosesentawa, to kapa Iraiyyantawa sumagi, kikune, untiye. ⁷ Piya yogana, ibina pabita aborama amankama aerarikaeyogana, ibinapisa maya kamana tumintiye: Mapa nae nabugai ntgaranena, ae kamana abiyo, untiye. ⁸ Piya yogini igeba to karu'ena mae'aebuma agaumepa, to kinapa kampa mintuguna, Isu abiwa igege mintantiye.

⁹ Aibogini, igeba amutisapa atate tumuguna, ke'i Isu maya uwaimintiye: Ibanto agantanagaba wasanaba a-nkuwaimyo. Wasanama Ntagara naepa pu'wakubotisa asinatakipa kanarana uwaimyo, untiye. ¹⁰ Piya yogini, pabi yomesa pumagini kampa wasanaba uwaimintini, igeawai mare-u me-u puma: Ayagabaya pu'wakubotisa asinatakiye iye, untawe. ¹¹ Piya untini Isu mayama abigantawé: Mono tisa kina'miba: Nanagabaya Iraiya maru kanakiyea yewema, abigauguna, ¹² aeba maya uwaimintiye: Taga kaewe. Iraiya maru kanama a'ya'waemaena aogi puwaitakiye. Pigoya nanagabaya mono isapipa: Wasanama Ntagaraga ata potakenaenabe uwa atakenaenabe waikiye untiye. ¹³ Piya, naeba urimuwe: Iraiya ago kanaogana, esapinti aekaba kaemarantisa puma, wasanamiba napima ata potantawe, uwaimintiye.

*Ke kina antabaipinti minta yagaranto Isu ao'maentiye
(Matiyu 17:14-21; Aruku 9:37-43)*

¹⁴ Pigoya, igeba to abagi kinati tumima, tumpa agaumepa uwoma kina aki puma mintuguni, ka'isa mono tisa kinake abagi kinake mima esegi kamana uma miyuguni, ¹⁵ pi aki puntume kina'miba Isu agate pam puma, aeti wamagini: Aya pene, untawe. ¹⁶ Yuguna Isu abagi kina'waka: Esegi kamanapa igege nanawebaya yewema ibigantiye. ¹⁷ Ibigaogana, ka yagara wasana ikapinti mintometisa maya omintiye: Tisa yagarama-o, yagaranepta ababute kaeti kanauwe. Piya, yagaranepta ke kina antabaipinti mintegin, kamana kampa yegin, ¹⁸ kana ke kina'ma ata potama, apasanakasagina mabi tumpa aeguyegin, akagawa tuwaruwa puma awara upababuma tagagaba'wagi, kabagi kinaka: Kana ke agarubaiyo, yopa, kampa pewe, untiye.

¹⁹ Aiyogana Isu maya uwaimintiye: We, tigeba kampa tigupa aogi pe kina mintawa, ayaki yaga tigegeba mikuwe. Ayaki yagabaya kamana'nepa kampa abikibewe. Pigoya, naeti ababute kanaiyo, untiye. ²⁰ Piya yogini aeti ababute wantawe. Ababute wauguna kana ke kina'ma Isu agate, kana yagaranto aeguma aebasana kasogana, mabi tumpa wareware pogana, awamupintisa akagawe irintiye.

²¹ Aibogana Isu kana abawampapa: Ayaki yaga kanaenaba abuntinema, abigantiye. ²² Piya yogana aeba maya untiye: Uwoma ntaga aegukena pumagina, yakupipe wanipipe aesagayuma mae maebiye. Tasiyo'maekena napintanapa kantara purasitama tasiyo'maeyo, untiye. ²³ Piya yogana Isuba: Kae napintana unamempeno. We, napiyenaga naeti atakibempepa, a'ya'maenaba Koti aogima kao'maekiye, omintiye. ²⁴ Omogana, karu'ena kana yagarantoma nkabawampa kega'e uma: Naeba napiyenanepta uwaenanto kaeti atauwa, nao'maeyo untiye. ²⁵ Piya yogini, uwoma kina Isu nkagora ampa aki puma, agakena puguna igate, Isu ke kinapa maya esegima omintiye: Kaeba agebe awamupe akumpa'ma miyempe ke kinakawa, kana yagaranto atate iro'ma wagasimagina, toba antabapintiba a-kanaoma, nae ugamuwe, untiye. ²⁶ Piya yogana, kana ke kina'ma agasiya kega'e uma, kana yagarantoba aeguyogana, aukomentanaga maeti tagaga pa'waogana, atate iro'wantiy. Iro'waogana kana yagaranto pu'wasu puwaogini, uwoma kina'muba: Ago pu'wayema, napintawe. ²⁷ Pigoya, Isu yagarantoma nkayata u'ma asitakena ao'maeyogana asima mintantiye.

²⁸ Aibogana Isu namapinti iyogini, abagi kina'miba ibiwai aeti wama: Nanagabaya taeba ke kinapa kampa agarubaunema, abigantawe. ²⁹ Abigauguna: Kana ke kina agarubakenaba uwaba kampaye. Nunamurasa ka agarubakenaenawe, uwaimintiye.

*Isu aewa purikena kamana to uwaimintiye
(Matiyu 17:22-23; Aruku 9:43-45)*

³⁰⁻³¹ Pigoya, pi kuma atategini Karariya mari wama, Isu: Nabagi kina ago kamana uwaimikena pekini, a'yugu uwa kina'mi nagate menkaki pusanagawema, napimagina, ibiri ibabute wama maya uwaimintiye: Wasanama Ntagaranagana, nababuma wasana imiginiba naeguyigi, pu'wakubopa togana kakaga yagaba asima mikuwe untiye. ³² Piya yogini, igeba yome kamanapa kampa aogima napintini, iyekuru puma kampa pikaba abigantawe.

*Kebaya tabe yagaraba mikibi kamanane
(Matiyu 18:1-5; Aruku 9:46-48)*

³³ Pigoya, igeba Kapaniyamu kumati wama, namapinti ima Isu abagi kina'waka: Ke'iba nanawe yewema, ibigantiye. ³⁴ Ibigaogini: Taepisa kebaya maru kiya yagaraba miyema, ke'i marebiga mebiga puma napimagini, iyekuru puma kamanapa kampa omintaw. ³⁵ Kampa omuguna, Isu mara'mima nagisarisa tara tumpaema abagi kinaka: Kanaiyo, yogini, kanauguna maya uwaimintiye: Wasanama kiya yagara misanaga abugakanaba: Pigo naeba uwa yagara mima, a'ya'ma kina'mi kayokaya yagara mikuwema napikibipa, pipa aogiyenawee, untiye. ³⁶ Piya untana, ka yagaranto ababuma igora atama, ayatasaa eepa u'ma maya uwaimintiye. ³⁷ Wasanama naeka napima pabiya yagaranto ababipa, naepa agupi nababiye. Pigoya naepa nababipa, nae unatanta yagarage agupi ababiye, piya untiye.

*Wasanami kampa kamaena puratakibepa taokinane
(Aruku 9:49-50)*

³⁸ Piya yogana Yoni maya omintiye: Tisa yagaragama-o, ka yagarama taepa kampa taegaranta kaeka napima ke kina igarubagi agate: Uwa miyo omunema, untaw. ³⁹ Piya yuguna Isu maya untiye: Tigeba uwa miyoba, a-siyo. Piya, wasanama naeka napima esegi yuga pikibipa, toganaba naekaba ata kasaba kampa karu'enaba ukiye. ⁴⁰ Piya, wasanama yagare kampa aguya aikibi'napa tao'maeye. ⁴¹ Pigoya abiyo. Wasanama: Karaisiti aegaranta kina mintawema, napima: Ma nkwanu mpaema naiyo uma timikibipa, pi ntugabisa Koti taganaba ikantana amikiye, untiye.

*Wasana igu ataena pikenaga Isu uwaimintiye
(Matiyu 18:6-9; Aruku 17:1-2)*

⁴² Pigoya, Isu to kamana maya untiye: Piya maya yagaranto naegarakana, ka'waina ayakekana kamparagaena pukibemipa, kana ayakikibi ntagara araku'ma tabe yaban-tama ana'mubi ubu'atama, tabe wanipi apasanakasinta: Pipa kanara pewe, yesine. ⁴³ Pigoya, kayankama kamparagaena pikena pekanapa arisa'ma maebugaso. Piya, ka kaya kampa wainta yagara mintana miyaba kumati irosakibempepa, pipa kanarane. A'yugu kaya tararasa aguntaena pekanaba, maebugatakana kampa tu'makena yakupinti tumikibene. ⁴⁴ (Piya, pi kumatisa kabagina'ma iba nakanaba kampa ita wakana, tabatikena kampa tu'ma wakiye.) ⁴⁵ Pigoya, kagisawama kamparagaena pikena pekanapa maebugaso. Piya, ka kagisa kampa wainta yagara mima miyaba kumati irosakibempepa, pipa kanarane. A'yugu kagisa tararasa aguntaena pekanaba, kaepa a'abibinti maebugatakiye. ⁴⁶ (Piya, pi kumatisa kabagina'ma iba nakanaba kampa ita wakana, tabatikena kampa tu'ma wakiye.) ⁴⁷ Pigoya, kaowama agama kamparagaena

pikena pekanapa pi'ma maebugaso. Piya, togana ka kao wainta yagara mintana Koti kabiratakena kumati ikitempepa, pipa kanarane. A'yugu kao tararasa aguntaena pekanaba, kaepa a'abibinti maebugatakiye.⁴⁸ Piya, pi kumatisa kabagina'ma iba nakanaba kampa ita wakana, tabatikenaena kampa tu'ma wakiye, piya untiye.

⁴⁹ Piya untana to maya untiye: Pigoya wasanama nanintabi kayo atama nagina, aogi igi pemisa puma, a'ya'ma kinapa yakutasa aogi puwaitakiye.⁵⁰ Piya, kayoba aogi igaenawé. Piya, i'nisama kasigabekapa, aya pekana to kake asabama iga pikie. Pipa kampaye. Pigoya wasanama nanintabi kayo atakena aogima pemisa puma, to kina'mige aogima miyiyio, untiye.

10

Waya kaikena kamanaka Isu uwaimintiye

(Matiyu 19:1-12; Aruku 16:18)

¹ Pigoya, Isu pi mpa atate Yutiya mari wama Yontani wani mparoteri ura'ema waogini, to pumesa puma uwoma kina'mi aeti kana puguna, to yomesa puma kamana uwaimintiye.

² Kamana uwaimogini, ka'isa Parasi kina'mi aeti irosa'ma amiyo potakena puma maya uma abigantawé: Ago kamanatepinti wasanama waya kaikenaenaba tagapayawema, uramoma abigantawé. ³ Piyama abigaunguna Isu a'wae puma: Aya kamana Moses urimintiyema, to ige ibigantie. ⁴ Ibigaogini igeba maya untawé: Waya kaikena puntiripa, esa amima otaiyoma, Moses untyiyema, omintawé. ⁵ Piyama omuguna Isu maya uwaimintiye: Tigeba monoka kampa karu'ena abima tige akuneka, Moses pi uraminti kamana kaentine. ⁶ Piya, pai Koti maru a'ya'waemaena aborantanaba, wabe wayape kaga aborawaisitantine. ⁷ Pika napima, wamaba ano abapa isitate waya'wampati atokaema isigeba ka kina kanta puma miyese, untiye. ⁸ Piya, isigeba taraba kampa punta, ka'ena puma miyese. ⁹ Pigoya, Koti atokae isitantiika, wasanaba a-nkatara isitano, Isu piya uwaimintiye.

¹⁰ Piya uwaimite namapinti waogini, abagi kina'mi pi kamana'ama nkagowaka abigau-guna, ¹¹ maya uwaimintiye: Ka'waina waya'wampaba kaite to wae maekibipa, marusa wae'wa ataena potama kumiyenaba pikie. ¹² Piya puma, waya'ma marusa wawa agora atate, to wa maekibipa, awae ataena potakiye, piya uwaimintiye.

Isu yakarantonto a'mu puwaitantiye

(Matiyu 19:13-15; Aruku 18:15-17)

¹³ Pigoya, ka'isa kina'mi yakarantonto Isuti ibaburite: Ita ukaya penema napima, ibabute kanauguni, abagi kina'miba pi kinaka imo kasa untawé. ¹⁴ Piya yuguna, Isu pi kamana abite kampa a'mu puntana, abagi kina'waka maya uwaimintiye: Tigeba itaigini, yakaranton igeba naeti kanaiyo. Tigeba a-nkakunkitaiyo. Piya miye kina'mikaba Koti kabiratakenaenaba utawaitantine. ¹⁵ Pigoya tigeba urimikenaba abiyo. Wasanama kampa yagaranto miyisa puma Koti aegarakibipa, Kotiba kana kinatapa kampa kabima milkiye, untiye. ¹⁶ Piya untana, yakarantonto ibabuma aki puwaitama, ita ukaya puma: Aogima miyiyio, uwaimintiye.

Tabe kutantaga yagaramage Isuge kamana untase

(Matiyu 19:16-30; Aruku 18:18-30)

¹⁷ Pigoya, Isu asima wakena pogana, ka yagara karu'ena kanama agisabi ampa arakabima mima: Kaeba aogi tisa yagaragawa, naeba ayabaya pukubotisa e'wsaena maekuwema abigantie. ¹⁸ Abigaogana Isu maya omintiye: We, nanagabayá: Aogi yagaragawema unamene. Ka Koti abiwa aogi yagaraba mintiya, toba kampaye.

¹⁹ Pigoya, nayatara'mu ago kamana mayama ago abintana: Wasanaba a-nkaeguyoma, kumiyenaba a-poma, kuntanaba a-poma, kampari kamanapa to wainapa a-sotaoma, to kina'ma ntanagaba a-kaukaba poma, kano kaba kamana wasiyo. Pipa ago abintane, omintiye. ²⁰ Omogana: Tisa yagarama-o, naeba yagaranto mitatopa pi kamana abimagi, a'ya'ma yagaba pabiya putone, kana yagaramaba omintiye. ²¹ Piyama omogana Isuba: Nabugampe ntagaragawema napintana, mayama omintiye: Ka'enaba kampa aogima napiyene. Kaeba wama kotakapa umaema to kinati imima yaba maema, kusi kinapa imo. Piya pikibempepa mantabinti uwomantanaga waikiye. Pabi ugamosa pugaite ampa naegarao, omintiye. ²² Piya omogana abigate, uwoma kutankaka napima, antara puma amo pute wantiye.

²³ Pigoya, Isu abagi kina'wa igeate maya uwaimintiye: Ayamabaya tabe kutantaga kinapa Koti kumati ikiye, a, untiye. ²⁴ Piya uwaimogini, pi kamanaka abagi kina'miba abite pami puguna, Isu to maya uwaimintiye: We, ma ntakaraki'nuntepa abiyo.

Wasanama Koti kabiratakena kumati ikenaba esegiyenawewe.²⁵ Pigoya, kamoro yagamaba na'ama nkagepinti uma pasikenaba pipa esegiyenawewe. Piya, tabe kutantaga kinapa Koti kabiratakena kumati ikenaba pipa to awameta, tabe kuntaenawewe, untiye.²⁶ Piya uwaimogini, pi kamanaka abagi kina'miba tabera pami pumagini, mare-u me-u puma: Pigoya kebaya ao'maeyakana ikiyema napintawewe.²⁷ Piyama napiyuguna, Isu igate maya uwaimintiye: Pika wasanama kunta abekana kampa pikenaenawewe. Pigoya Kotipa kampa kuntaba abegin a'ya'waemaena pikenaenabagantiye, uwaimintiye.

²⁸ Piya uwaimogana, Pita Isuka: Abo, Taeba a'ya'waemaenabata ago kaegaraune, omikena pogana,²⁹ Isu a'ya'mabagikinaka maya uwaimintiye: Owe tagane. Tigeba abiyo. Wasanama nae aogi kamana napima naeka, mawa, yogawa, anonanto aganto a'nanto ano aba yagarawa, atate naegarakibipa,³⁰ ibasa yagaba aogima mima, uwoma to namape yogabe maeyakini, uwoma to anonantoge agantoge a'nantoge anoge yagarawake aege ampiyigini, to kina'miba aepa ata potaigina, agogo yagaba aebā e'wasa yagara asu mikiye.³¹ Pigoya, pi ntaga ka'isa kiya kinapa kayokaya kina miyigini, kayokaya kinapa kina mikibewe, untiye.

Isu ae'wa purikena kamana to ka uwaimintiye

(*Matiyu 20:17-19; Aruku 18:31-34*)

³² Pigoya, Isuge aokinake Yerusaremi kumati ikena ki'i imagina, Isuba paitama waogini, abagi kina'miba a'ka'i wama pamipuguni, igege waume kina'miba iyekuru puntawewe. Aibuguna, Isu nagisarisa tara tumpaema abagi kina'waka: Ka auka'i kanaiyo, yogini, kanauguna aeti ka'isaena aborakibi puma kamanapa³³ maya uwaimintiye: Tigeba abiyo. Yerusaremi kumati iyekini, Wasanama Ntagara naepa naraku'ma, mono kiya kinake mono tisa kinake imigini, kamana unatama: Aeguyiyo ukibewe. Piya umagini, naepa namu'isa kina imigini,³⁴ karana natamagini, kaisa punatama, iga'na kasu maema naebaru'magini naeguyigigi pu'wakuwe. Aibumagi togana kakaga yagaba asima mikuwe, uwaimintiye.

Yemisige Yonige tabe kina mikenaga isibugantkiye

(*Matiyu 20:20-28*)

³⁵ Aiyogini, Yemisige Yonige isigeba Sepeti ntagara taraginisi, Isuti kanamaginisi ampa mayama abigantase: Tisa yagarama-o, tae kabiratakenaenaga kabigakena puse, yusuguna:³⁶ Ayama kabirisitakenaenaga tisibiyema, isibigaoginisi,³⁷ maya omintase: Kaeba togana aogi kumakati mara'mima kabima mikenaenara mikibempape, tasigeba kaege mima, ka'waina kayatakantisa auka'i miyekana, ka'waina kayake'masisa auka'i mima, kiya kina misanaga tasibiye, untase.

³⁸ Aiyusuguna, Isu auki naki pukenaenaga meto kamana maya uwaisimintiye: Tisigeba nabigakenaenaga kampa aogimaba napiyese. Nae nantara'enabi tisigeba kanara pasikibeso. Nae pai'natakibintanaba tisigeba paitisitasiyoma, isibigantkiye.³⁹ Piyama isibigaoginisi: Owe, piya purasitakibepa kanarane, omintase.

Piya omusuguna, Isu maya uwaisimintiye: Pigoya, nae nantara'enabi pasikibese. Nae pai'natakibintanaba tisigeba paitisitakiye.⁴⁰ Pigoya, nae naya tararari mikena kinakaba kampa nae napiyokana, Koti ae abintana wasanaba ibabuma kana naya tararariba itakiye, uwaisimintiye.

⁴¹ Uwaisimogini, to pi nayatar'a'mu abagi kina'miba pi kamana abite, Yemiske Yonikegaba ka isibirauguna,⁴² Isu kega'e uma, a'ya'ma aki puwaitama maya uwaimintiye: Tigeba ago abintawa. Wasanama uwa kinaka kiya mima pitasa kinata: Kabiyo yeginaba, aeba esegima kabiye. Kiya yagarama: Piya piyo yintanaba pewe.⁴³ Pigoya, tigeba kana kiyaenaba kampa piyaba pumagiri, ka yagarama kiya mikena pipa, aokina'mi kayokaya'enaba pikiye.⁴⁴ Pigoya tigeri ntapima: Nae kiya yagara mikuwema napikibepa, a'ya'ma to kina'mi kayokaya'enaba po.⁴⁵ Piya, Wasanama Ntagara naeba tige nae kayokaya'ena punataiyomaba kampa tumintone. Naeba tige kayokaya pukenaga tumpa pu'ma, uwoma kina ika puma a'watitakena tumintone, uwaimintiye.

Isu to ka aorika yagara aogi potantkiye

(*Matiyu 20:29-34; Aruku 18:35-43*)

⁴⁶ Pigoya, igeba Yeriko kumati asu migategini, Isuge abagi kina'wake to uwoma kinape pitasa ikena puguna, ka aorika yagara, agewapa Patimesi, Timeyosi ntagara keta mara'mintometisa: Ma na namiyo, untiye.⁴⁷ Piya uma mintogini igeba: Isu Nasareti kumatisa yagara iye, yuguna abite, aeba Isuka kega'e uma maya untiye: Isugaba, Tebiti ntagaragawa, naeka napima kantara punatao, untiye.⁴⁸ Piya yogini uwoma kina'mi: Paka puma miyo, omuguna to taberasa kega'e uma: Tebiti ntagaragawa, naeka napima kantara punatao, untiye.⁴⁹ Piya yogana, Isu pabita mima: Mati kanao omiyo,

untiye. Yogini, igeba kana aorika yagaraga: Ka'mu puma asiyo. Ago kaeka kega'iyema, omintawewe.⁵⁰ Omuguna, kabiwi ka'urintometisa akubugaite, asima Isu asu aepantiye.⁵¹ Aibogana: Kaepa nana pugatasanaga kabiwema, Isu abigaogana, kana aorika yagaramaba maya omintiye: Tisa yagaragawa, nao agasanaga nabugaye, untiye.⁵² Piya yogana Isuba: Naeka aogima napiyekana, ago kata wagina uwa wao, Isu omintiye. Omogana, ago aogamagina pabi ki'i Isu aegarantiye.

11

*Kiya yagara pemisa puma Isu Yerusaremi kumati intiye
(Matiyu 21:1-11; Aruku 19:28-40; Yoni 12:12-19)*

¹ Pigoya, Yerusaremi agora ikena puntini, Oribesi amu amentanti Petipaesi kumape Petani kumape waintogana, Isu abagi kina tara paitama isigaruba'ma,² maya uwaisimintiye: Mo kumati tumima, tonki aikeri kampa wasanamiba nasinta ubu'atama mintigiri, tumikibemepa pabigo aora tumpa agamagirisi, akariyoba'urite iyiso.³ Piya pisigini, wasanami: Nanaga pese yigirisiba, maya uwaimiso: Tabe yagarama yegira maeyomekana, pabigo arontaganto me timikiye uwaimiso, untiye.⁴ Piya yeginisi tumima tumpa agausumepa, kabe agora keta yara tonki aikeriba ubu'atama mintuguni, wama uma akariyobantase.⁵ Piya pusugana, kana pita mintume kinamiba: Nanaga yaga awaroba akariyobase, untawewe.⁶ Piya yugunisi, pabi uwaisimomesa puma uwaimusuguni: Kanaranra, ababute waiso untawewe.⁷ Piya yugunisi, isigeba kana tonki aikeriba ababute Isuti imaginisi, isitasaenarasa kana yaga akabata amapa agutausuguna, pi abobora Isu mara'mintantiye.⁸ Piya pogini, uwoma kina'miba itasaena akubuma ke'i aguyuguni, to ka'isa kina'miba yogarisa ya a'ye aegayuma ke'i aguyuguna, pi'na nkabobori wantiye.⁹ Waogini, aori aka'i ogasi ankagasi puta wantini, taberasa maya untawewe:

We, Wa'egawama nkawamuta taeti kanaika ta'mu potano.

¹⁰ Tayabama Tebiti kabima mintantisa puma kabikena piya, Kotika ta'mu potano. We, Inatisa Yagaraga ta'mu potano, untawewe.

¹¹ Piya yuguna, Isu Yerusaremi kumati ima, tabe mono namapinti asu pai'ma, pipintisaena a'ya'waemaena asu agaogana, ase ikena pogana, irosa'ma Petani kumati nagisarisa tara tumpaema kinake tumintiye.

*Yamanka kampa aeyome ntaga kamanane
(Matiyu 21:18-19)*

¹² Tunkwaimarategina, Petani kumatasa ke'i iyogana, aga'ena abuntiye.¹³ Aibogana mogaoepa a'ye uwaena wainta ya, agewapa piki ya agate tumima tumpa aka aguyosagaomepa, kampa yoga yagawa aboraogana, apa kampa aentiye. Kampa aentogana a'yenkarana abi agate,¹⁴ pi ntaga maya omintiye: Toba apa a-nkaeyagini, wasanamiba to kampa asigi'ma nakibewe, omogini, abagi kina'miba pi kamanapa abintawewe.

*Ikantana maeyume kina mono nampisa igarubantiye
(Matiyu 21:12-17; Aruku 19:45-48; Yoni 2:13-22)*

¹⁵ Pigoya igeba Yerusaremi kumati asu mima, Isuba tabe mono namapinti iyumepa, pita'i ikantana puma mintuguna igarubantana, mone antota ankami ankami pume kina'mi ntabaebi kabara ataaume kina'mi ntabaebi apasana'ma asunukaentana,¹⁶ itasaena pi mpono kuma akapipa maete wakenaga akumpa'ma mintantiye.¹⁷ Piya pumagina aebla maya esegima uwaimintiye: Mono isa'amaba maya iye: Mono namantepa a'ya'ma kina'mi nunamu ukena namantana peno, untiye. We, tigebla piya pegana kuntana pe kina'mi ntamantana piye, uma igarubantiye.

¹⁸ Uwaimogini, tabe mono kiye kina'mibe mono tisa kina'mibe kana pomentanaga abite, Isu aeguyigina purikibi kamana untawewe. Piya, a'ya'ma kina'miba Isu kamana abite pam'i puma i'mu puguni, kana mono kiye kina'miba pika napima, Isuka iyekuru puntawewe.¹⁹ Aibuguna ase ikena pogini, Isuge abagi kina'wake pi kumatasaba atate wantawewe.

*Taga nunamu ikibi'naba pabyaena maekiye
(Matiyu 21:20-22)*

²⁰ Wama waimarate, marogini abayara ke'i kanantini, kana piki ya agaumepa aubu yaga asawantiye.²¹ Asa waogana, Pita wama uma agate ai kagi yome kamanaka napima, Isuka maya omintiye: Tisa yagarama-o, agao. Kaeba kamana kana piki ya omitampe ntala ago asa waye, untiye.²² Piya yogana Isu maya uwaimintiye: Pika napiyiyo. Tigebla Kotiti tigu atantiri,²³ kampa tonaronaga napinta, ikibe kamanaka piya pikiyema napikibepa, piya pikiyeme. Piya, maro nkamu'amaka: Tigaba'ma wanipinti tumo yesinta,

pabi yesa pesine.²⁴ Pigoya pika urimuwe. Tigeba nunamu uma abigantiripa, pikaba ago abima pikiyema napiyiyo. Piyama napima ikibepa, pintanaba ago tigeka pikiye.

²⁵ Pigoya, tigeba asima nunamu untiripa, to kinaka timo'ena pikenaenaba kasiyo. Piyama kaikibepa, mantarisa tibarimpaba aibo'enaripa maerigaikiye.²⁶ Piya, tigeba wasanami nkaibo'enawaipa kampa mae igasiginaba, mantarisa tibarimpaba aibo'enaripa pabiyama kaga kampa maerigaikiye, piya untiye.

Kebaya esegiyenaba kamiye, mono kina'mi abigantawe

(*Matiyu 21:23-27; Aruku 20:1-8*)

²⁷ Pigoya, igeba to ima Yerusaremi kumati asu mima, Isu tabe mono namapinti nasogini, mono kiya kinamige tisa kina'mige kabiyume kina'mige aeti ima,²⁸ mayama abigantawewe: Nanaga kaeba mantanaba pene. Ke po yemintana pene, untawe.

²⁹ Piya yuguna Isu maya uwaimintiye: Pigoya naeba ka'enaga tibigakiri, ukubontanaga aogima unamikibepa, ke po yemintana pene ye kamanapa urimukuwe.³⁰ Piya, tigeba unamiyo. Yonikaba wani paititanemaba ke omintiye. Mantarisaenabera wasanam-intanawema, ibigantiye.

³¹ Piyama ibigaogini, igeba mayama napintawewe: Nanawe ukenema, mare ibiga me ibiga pumagini, Koti po omintiye yekanaba, aebe: Nanagabaya ae kamanapa kampa abewe ikiye.³² Piya wasanami po omintawewe yekanaba... Pigoya a'ya'ma kina'miba Yonikaba: Koti kamana unta yagarabayawewe yepa, a'ya'ma kinaka mono kina'mi iyekuru puntawewe.³³ Iyekuru puma: Taeba kampa abintune, omintawewe. Isupa piyama omuguna, aebe maya untiye: Pigoya naeba: Ke po yemintana pene ye kamanapa kampa urimukuwe, Isu uwaimintiye.

12

Yogara kabima mikena meto kamananee

(*Matiyu 21:33-46; Aruku 20:9-19*)

¹ Pigoya, Isu meto kamana maya uwaimintiye: Pigoya ka yagara waini yamanka maekena yuga puma'ma, kagisa aenkima kima'ma, yamanka aerakena koma ma'ma, kabima mikena namapa kima'ma, kabinataiyema to kina kana yugaba imogini kabima mintuguna, aebe to mari wagaintiye.² Wagasometisa yamankapa agutayagan, ka yuga kina'waka: Wama yogara kabima miye kina'mitsisa yamankatasa maekibe nkape'ena umaema mentamoma, agarubaogana wantiye.³ Wa-mepa, pi ntugara kabima mintume kina'miba kana yuga yagarawapa araku'ma aeguma aegumugasima, kampa ape'enaba aminta, auka agarubaoguna wa'eri wantiye.⁴ Waogana to ka yuga kina'wa agarubaogana waomepa, to pi ntagara araku'ma a'no aiyeye pumutama, ataaena potantawewe.⁵ Piya puguna kana yogama nkabawampaba to yuga yagarawaga agarubaogana waogini, araku'ma aegutauguna purintiye. Aibuguna, to igarubaogini waumepa, iyeguyuguni ka'isa purintawewe.⁶ Aibuguna agagate ka yagara mintomepa, ae'wa ntagara abugaome ntagara mintogana: Yagarane agarubakana wakiniba, ae awamu wasikibewema, napintiye. Piyama napima, agarubaogana waomepa,⁷ kana yogara kabima miyume kina'miba mare-u me-u puma maya untawe: Ma ntagarabaa kana yogama abawampa ntagarawaa kanaigi aeguyeno. Aegukubompepa kana yogaba tae'enaena puwakiye, untawe.⁸ Piya utegini, kana yagarawapa araku'ma aegutama, wasirite yoga awamo kabubinti me maebugaintawewe, Isu piya untiye.

⁹ Piya uwaimintana, to maya untiye: Pigoya kana yugama nkabawampa kanama ampikipipa aya pikiye, a. Tige ago abintawewe. Kana yagara kanakibipa pi kinapa ampa iyegugasima, to kinaka: Kana yogarapa kabiyivo, uwaimikiye, untiye.

¹⁰ Piya, naeka mono isapisa kamana maya waintipa kampa aisewo. Pipa ago abintawewe: Nama kikena kina'miba ka ya ago kaintaa ntawama iba wa'ega ya asima waintiye, iye.

¹¹ Pintanaba Wa'egawamaba ago pega, taeba agantompeka, ta'mu pune, untiye, Isu piya uwaimintiye.

¹² Uwaimogini, kana Yuta kiye kina'miba: Taeka ma amiyo kasaba iyema, napima arakurikena pumepa, pi a'ya'ma kinaka iyema'ma, Isu uwa atate wantawewe.

Takisi imikena kamana Isupa abigantawewe

(*Matiyu 22:15-22; Aruku 20:20-26*)

¹³ Pigoya, ka'isa Parasi kinake ka'isa Eroti nkaokinake: Isuti wamagiri uma tonarona kamana abigaiyo, untawe. Ata kasa urimikibayawema uwaimite igarubaoguni,¹⁴ aeti kanamagini mayama abigantawewe: Tisa yagaragawa, taeba ago kagaune. Kaeba taga ntagara mintane. Piya, ima tumima minta kinakaba kampa karu punta, esegiyenawaika kampa kaekuruba puma, Koti mpono'ama kipa kanara uramima kayakene. Pigoya, mono

kina'mite taeba Aroma wa'ega yagara Sisa takisi mone aya pusune. Tae ago kamanapa ayabaya iya uramoma, omintawe.

¹⁵ Piyama omuguna, Isu meto kamana'wai abite maya uwaimintiye: Nanagabaya

ataena punatakena pewe, untana: Pigoya, yabapa maete kanama nayakiyo, untiye.

¹⁶ Piya yogini, igeba maete kanama amuguna: Amankape awa'enabe mapa kewema, ibigaogini igeba: Sisantanawe, untawé. ¹⁷ Piya yuguna, Isu maya uwaimintiye: Pigo yewa, Sisantanaba Sisa amiyo. Piya, Kotintanaba Koti amiyo, yogini aekaba pami puntawé.

Pu'wakibetisa asikena kamana Isupa abigantawé

(*Matiyu 22:23-33; Aruku 20:27-40*)

¹⁸ Pigoya, ka'isa Sarusi kina'mi Isuti kanantawé. Pi kinapa wasana pu'watisaba kampa asikibewema napiyume kina'miba, ¹⁹ igeba Isuti kanama maya uma abigantawé: Tisa yagara-o, Moses kana kamana ago taeka mayama kaema uramintiye: Wasanama anarimpa yagaraena kampa pekana kana yagara pu'wakibipa, to a'nantowampa kana abeya waepa maema aege mimaginisi, agantowampaka yagaraenaba pikibese uramintiye, untawé. Piya untini amiyo kamana mayama abigantawé: ²⁰ Pigoya, tonaentisa tara umaema aga'nantonto mintumepa igantowaimpa wayapa maentiye. Maema'ma kampa yagaraena punta pu'wantiye. ²¹ Aibogana, to ae aka'isama kana waepa maeyomepa, aege kampa yagaraena punta pu'wantiye. Piya pogana to pi'na nkaka'isama maeyomepa, aege uwa pu'waogini, ²² to pi'na aka'isami pabiya puma maema pu'wantawé. Pigoya tonaentisa tara umaema aga'nantonto kana wae maema'ma, a'ya'ma kampa yagaraena punta pu'waewauguna, kana waepa ika'i purintiye. ²³ Pigoya, tonaentisa tara umaema kina'mi nkwaena, asikibi nttagaba ke kana waepa maekiyma abigantawé.

²⁴ Piyama abigauguna Isu maya uwaimintiye: Tigeba kampa abintawé. Ayamabaya kampa napiyewe, a. Tigeba mono kamanape Koti nkesegiyenagabe kampa napima agantawé. ²⁵ Piya, pu'wantatisa asiwaitakini, wa wayapa to kake kampa maekibewe. Igeba enisore miyesore puma asu mikibewe, untiye.

²⁶ Piya, pu'wantapisa asikena kamanapa urimukuwe. Tigeba Moses kaemaranti nkisapipa yabi yaku takena kamanapa ago abintawé. Piya, yabi yaku taogana uma agakena waogana, pita Koti Moses maya omintiye: Naeba Abara'amu, Aisaki, Yekobu, ige Koti mintuwé, untiye. ²⁷ Pipa untika, aeba pu'wanta kina'nane. Aeba iyoganta kina'mi Koti mintiye. Piya, tigeba kampari'ma napiyewe, Isu piya uwaimintiye.

Ago kamana'ama nkagowa uwaimintiye

(*Matiyu 22:34-40*)

²⁸ Piya uwaimogana, ka mono tisa yagara ampima, Sarusi kina pi yume kamana abite: Aogi kamana iyema napite, Isuti kanama mayama abigantiye: Nana taga ago kamana'ama asugasimaba waiyema, abigantiye. ²⁹ Piyama abigaogana Isu maya omintiye: Pi kana asugainta kamanapa mayama waintiye: Isureyo kinapa abiyo. Tae Tabé Yagara Koti abiwa tabe miyeginá, ³⁰ pigoya a'ya'ma kagu kaumakape, napiyenagape, esegiyenagape, Wa'ega Kotigapa a'ya'ma amegana waiyeno. ³¹ Pigoya ma kamana'ama nkaka'isaba ka maya kamana waintiye: Kaegaka napima kabiyempesa puma, kaokinakaba kabiyo. Pigoya, ma tara kamana yo kamana'amaba to ka'isa ago kamana'amapa asu igaintiye, omintiye.

³² Piya omogana, kana mono tisa yagaramaba maya omintiye: Tisa yagara-o, kanara sene. Yempe kamanapa taga kamanane. Pi yempepa Tabé Yagara abiwa Kotiba miyeginá, to kotiba kampa mintawé. ³³ Pigoya, pintanaba wasanama a'ya'ma agutasabe napiyenawatasabe esegiyenawatasabe Kotika abugagina, aewaka napiyisa puma agrorasa kinakaba napiyipa, pipa tagane. Pigoya wasanama monoka yaga ababute wama, uma aeguma ina yakuta Kotiti kaema, tona a'muntana amipa pipa tagane. Pigoya pi tara yempe kamana abima wasanama aegaraipa, Kotiba aekaba abugaye, kana yagarama untiye.

³⁴ Piya yogana, Isu yome kamana abite, nauka kamana yenema napima, maya omintiye: Pigoya, kaeba agaró Koti aogima aegarakibene, omogini, wasanami abite, iyekuru puma to kamanapa kampa abigantawé.

Karaisierti aya yagarabayawema, ibigantiye

(*Matiyu 22:41-46; Aruku 20:41-44*)

³⁵ Pigoya, Isu tabe mono namapi kamana uwaimima mayama ibigantiye: Mono tisa kina'mi Koti utaratanta yagaramaba Tebiti ntakaraki'nu mikiye, yepa ayabayawe, untiye.

³⁶ Piya, Tebitika Aogi Awamus'aama nkawamuta maya untiye:

Kotiba Tabé Yagaraneka: Kaeba nayatakanti ampintaga kama kinakapa kagisabi ibabuma aki penoma, untiye, Isu piya untiye.

³⁷ Piya untana: Tebiti utaratanta yagaraga: Tabé Yagaranene yemipa, pigoya yakaragi'nunkapa mikena piya ayamabayawema, Isu ibigantiye. Piya, mintume uwoma kina'miba abite Isuka i'mu puntawe.

*Ka'isa tisa kina'mi pesapa a-piyo, uwaimintiye
(Matiyu 23:1-36; Aruku 11:37-54; 20:45-47)*

³⁸⁻³⁹ Pigoya, Isu uwaimintana maya untiye: Ka'isa mono tisa kina'mi e'ero kai igisari paibotate, wama maketi kumata nasegini, wasanamiba: Aogi yagarawe, uwaitasanaga ibugagini, mono namapi paitama marusa aogi yabaera misanagega ibugagini, taena pepa tabe yagara mima, piya po piya po usanaga ibugaye. Piya pesapa a-piyo, untiye. ⁴⁰ Piya, pi kina'miba abeyawae'mantana paibumagin, uwomantanawa uwa maerintini, e'ero nunamu uwa ago'ena kasa yewe. Piya pekana igepe toganaba Kotiba tabera kamparaga puwaitakiye, untiye.

*Abeya wae'ma yabankapa Kotiti atantiye
(Aruku 21:1-4)*

⁴¹ Pigoya, Isu tabe mono namapinti Kotiti yaba atakena kankabema nkagora mara'miyogini, wasanami yaba pipi ataunguna agantiye. Piya pogini, uwoma yaba wainta kina'miba tabe yaba maema kankabebi menta puguna, ⁴² ka wae awaewampa pu'wanta wae'ma ampa tara uwaena yabankoto tara, piya wanisenikana, mempaebotantiye. ⁴³ Piya pogana Isu abagi kina'waka kega'e yogini, ampa aki puguna maya uwaimintiye: Tagaka urimuwe. Ma kotanka kampa wainta abeya wae'ma atami ntabankama a'ya'ma kina'mi mono namapisa kankabebi ata ntabankamapa, ae asu igasima ataye. ⁴⁴ Pigoya, igeba tabe yabankai waintipsa ka'isa maema atawe. Ae ba kampa kotankapa waintegina, pabi waintinkawa a'ya'waemaenawapa maema kasagina, naninta ika puma nakenaba kampa uwa ataye, untiye.

13

*Tabé mono nama akasabakena kamanane
(Matiyu 24:1-2; Aruku 21:5-6)*

¹ Pigoya, Isu tabe mono namapisa iro'ma waogana, ka abagi yagarama maya omintiye: Tisa yagarama-o, agao. Nauka tabe yabatasa ma aogi mono nama kintawé, agao, yogana, ² Isu maya omintiye: Pigoya ma agampe tabe namapa kama kina irosa'ma akasagasuba kasaigina, ka yabankamaba to ka yabankama nkabobora ware'naigina nama tubo aborama waikiye, untiye.

*Ataena uwomantana aborakiye, Isu untiye
(Matiyu 24:3-14; Aruku 21:7-19)*

³ Piya utegina, Isuba wama Oribesi amuta asu mara'mima, pi amutisa kana tabe mono nama mo agaogana, Pitage Yemisige Yonige Enturuge pabi ibinto aeti imagini, ⁴ maya untawé: Kae uramempentanaba ayantaga aborakiye. Nanabaya kanaka agakana, a'ya'ma uramempentanaba agarontaga aborakiyema uramo, untawé.

⁵ Piya yuguna, Isu maya kamana agobima uwaimintiye: Tigeba napiyiyo. A'yugu wasanami kampari kamana'wai abisiwe. ⁶ Piya, uwoma kina irosa'ma nae nage umagini: Naeba Karaisiti nawe, uma, uwoma kina'mi nkigu'ama paiburnagini kamparaga puwait-akibewe.

⁷ Pigoya, ma'ena pewe kamana abintiri, esiba kamana abitegiri, tiyekuruba a-puma: Kana a'ya piyeba, a-siyo. Pi mpa'ena maru pikibepa asa agogo yaga aborakiye. ⁸ Piya, maga maga kina'miba kamaena pigini, to ka'isa kina'miba to ka marisa kina uma iyeguyigini kamaena purite wagana pikibewe. Piya, to mari to mari imima tabera pekini, ka'isa kinapa naninta i'mikibewe. Pigoya, way'a'ma yagaraena pikena pegina maru agobima aukemisa puma, kana ataenaba maru pikie.

⁹ Pigoya, tigeba aogima napiyiyo. Wasanami kanama ampa tiraku'ma kotiyena puritama, mono namapi kasotasa tiyegukibewe. Pigo tigeba naegaraka, kanisore kinatige tabe kinatige tibabute waigiripa, tigeba pi kinapa aogi kamana'nepa uwaimiyo. ¹⁰ Pigoya, a'ya'ma kinapa aogi kamana'nepa uwaimiyo, togaanaba agogo yagaba aborano. ¹¹ Piya, tiraku'urite kotira wakena pigiripa, kana uwaimikubo kamanakaba: Ayabaya uwaimukunema, a-ntapiyiyo. Pi ntaga kamanatipa ikena kampa napikibewe. Aogi Awamus'a'ama urimikibi kamana uwaimiyo. ¹² Pigoya, pi ntaga wasanami i'nanto iraku'ma to kina imigini iyeguyigini, piya pemisa puma, ibawaiimpiba yagarawaipa ata puwaitauguni, to yagarawaimpa anoke abakepa ataena puma: Iyeguyiyo yigini,

iyegukibewe. ¹³ Pi ntagaba nae nageraka wasanamiba kama puritakibewe. Piya pigiri, a'ya'ma yaga naeka napima kampa natakibepa, toganaba aogima mikibewe, untiye.

*Agasiya ataena aborakiye, uwaimintiye
(Matiyu 24:15-28; Aruku 21:20-24)*

¹⁴ Pigoya, ma esapi aisuma agakibe kina'miba aogima abiyo. Piya, pi agogo yagaba monota tabera kamparagaenaba a'yugu mikibi nkauka'i ataigiri tini'ena pikibewe. Piya, pi ntagaba Yutiya mari mikibe kinapa, tiyegaka wama amu mari iyio. ¹⁵ Wasanami abe'i mikibe kina'miba a'yugu namapinti ima ka'isaenaba asu maete wasanagawe. ¹⁶ Pigo wasanami yogari mintakibetisaba a'yugu to wama namapintisaena ampaete wasanagawe. ¹⁷ Pi kanabipa iga'entaga waape, inamuganto nono amikibe nkwaepe kamparagama mikibewe. ¹⁸ Pi ntagaba esiba yaga waisanaga Kotiti nunamu iyio. ¹⁹ Pigoya, maru Koti pogana, aboranti ntaga toma toma ataena waita waita ima, ibantoba waintikana, togana pi ntagaba tabera asu igasima tabe kuntuyenabala waiyekana, to asaba ataenaba kampa waikiye. ²⁰ Pigoya, Wa'egawamaba: Naegarao uwaimi kinaka napintikana, pi ataenaba e'ero ntaga kampa waikiye. Pi ataena e'ero ntaga waiyisinta, a'ya'ma kina kampa uwa minta pu'waewasine.

²¹ Pigoya wasanami: Agaiyo, Koti utaratanta yagara, Karaisiti yagara mata'i mintiye urimikibepa, a-nkabiyo. Agaiyo, marompa mintiye urimikibepa, a-nkabiyo. ²² Piya, ka'isa kina'mi aborama tonarona esegiyenawai puriyakintini, ka'isa kina'mi: Karaisiti yagara nawe, yigini, ka'isa kina'mi: Poropete yagara nawe, yigiripa, ige kamanapa a-nkabiyo. Igeba meto'ena puma, Koti: Naegarao uwaimi kina'mi ntapiyenewaipa maema ataena pikena pigiripa, ²³ pi kamanapa a-nkabiyo. A'ya'ma togana aborakibintanaga urimuwe, uwaimintiye.

*Wasanama Ntagaranaga to aborakuwe, untiye
(Matiyu 24:29-31; Aruku 21:25-28)*

²⁴ Uwaimintana to maya untiye: Pigoya, pi ata yaga aborakan, toganaba papa tunusekana, opa kampa e'wasa pekana, ²⁵ noriba tutubu pekana, mantaba kuru pekana esegiyenawapa iyoba'ma kareko pikiye. ²⁶ Piyaena marupa aborawaka, togana Wasanama Ntagara naeba tumukubopa, tabe esegiyenanentaga mimigara tumekini nagakibewe. ²⁷ Pi ntagaba enisore kina igarubakini, a'ya'ma mari wama, a'ya'ma matuka matukarisa kina Koti: Naegaraiyo, uwaimemi kinapa ibabuma, naeti me akibikibewe, untiye.

*Piki ya kamana uwaimintiye
(Matiyu 24:32-35; Aruku 21:29-33)*

²⁸ Piya untana, to maya untiye: Pigoya, pika ya agama aogima napiyiyo. Kana yawama nka'nō mparagina: Pipa yoga yaga aborayema, napiyesa puma, ²⁹ urimontana aborakibipa, agogo yaga agaroo aborakiyema, napiyiyo. ³⁰ Pigoya tagaka urimuwe. Ka'isa kina'mi kampa purikibepa, a'ya'ma urimontanaba aborakiye. ³¹ Mantabe mabe a'ya wakana, kamana'nepa uwa waiyaba waima kampa kakakiye, untiye.

*Isu to aborakibi ntagagaba kampa abune
(Matiyu 24:36-44; Aruku 17:26-30, 34-36)*

³² Piya untana to maya untiye: Pigoya, ayantagabaya urimontanaba aborakiye. Wasanamiba kampa abintawe Mantarisa enisore kina'miba kampa abintawe. Koti Ntagara naeba kampa abintokana, nabanempa abiwa abintikana, yekana aborakiye.

³³ Ayantagabaya aborakiyema kampa abepa, nae tumukubopa napima aogima miyiyo. ³⁴ Pika meto kamana ukwu, abiyo. Piya, wasanama namankama atate to wa'eri wantana, yaga kina'waka: Piya po, piya po, omima: Na kiye kabiyo, omite wagasaginiba: Ayantagabaya kanakiyema, napi napi pesa puma, ³⁵ tige napiyiyo. Ayantagabaya namankama nkaba kanakiye: Atamaino, asenabintiwo, kokore aga yekanawo, abawayo, kanakibyawema, tigeba kampa abintawe. ³⁶ Agaro kanama a'yugu waitamintigina, ampa tigakiye. ³⁷ Pigoya urimontanaba a'ya'ma kina uwaimuwa, pika napi napi piyo, uwaimintiye.

14

*Isu aegukena kamana napintawe
(Matiyu 26:1-5; Aruku 22:1-2; Yoni 11:45-53)*

¹ Piyama magaba Yuta kina'mi Pasoba naminta nakena yagabe yisiti kampa wainta pareti nakena yagabe aborakena pogini: Isupa aya pumabaya kakama araku'ma

aegukunema, tabe mono kiya kina'mige mono tisa kina'mige napintawe.² Napintini: A'yugu naninta nakibe ntaga arakurekini wasanami ata ma'ena pusangawé, untawe.

*Waya'ma Isu nka'noti masawae ti'ma pai'atantiye
(Matiyu 26:6-13; Yoni 12:1-8)*

³ Pigoya, Isu Petani kumata wama, Saimoni autanta'ena ago ata wanti ntagarama ntamapinti umima, naninta naogana, ka wae'ma marasa punta kabó kankabe aogi agunta masawae maete kanantiye. Kana masawaenkama nkagewapa natíwe, tabe yabatasa ika pumaranta, maete kanamagina, kana kankabe ampa a'wa puma, Isu nka'noti ti'ma pai'atantiye.⁴ Piya pogini, ka'isa kina'miba agate ka abi'ma: Nanagabaya kana masawae kasayema, mare-u me-u puntawe.⁵ Piya, kana masawae to kina imemisinta, 300 torapa maema, kusi kina imemisinema, ka abirantawe.⁶ Piyama abirauguna Isu maya untiye: Uwa ataiyo. Nanagabaya kaba abirawé. Naukaena punataye.⁷ Pigoya, kusi kina'mi asi nasi tigege miyekini, a'ya'ma yaga napima iyo'maekeña pewe. Pigoya tigege naeba asi nasiba kampa mikuwe.⁸ Kana wae'ma aewa napima, masawae nauti yora punatama kainatakibika napima, ibantoba maema aogi piye.⁹ Pigoya naeba tagaka urimuwe. A'ya'ma mari nae aogi kamana uwaimikibepa, ma punatamintanaga aeka mare-u me-u pukibewe, untiye.

*Yutasi Isupa kiya kina imikena puntiye
(Matiyu 26:14-16; Aruku 22:3-6)*

¹⁰ Pigoya, nagisarisa tara tumpaema abagi kina mintumepa, ka abagi yagara, Yutasi Isikeriyoti, aeba tabe mono kiye kinati wama: Isupa araku'ma timukuwoma, uma ibigantkiye.¹¹ Piyama ibigaogini, ae kamanaka i'mu pumagini: Piya yempeka yabapa kamukune yuguna, Yutasiba: Aenkauka'ibaya Isuba waka arakurukuwema, napintiye.

*Isuge abagi kinake Pasoba naninta nantawe
(Matiyu 26:17-25; Aruku 22:7-14, 21-23; Yoni 13:21-30)*

¹² Pigoya, yisiti kampa wainta pareti naume ntaga aboraogini, pi marusa yaga Pasoba nanintaraka sipisipi awaro aegukena puguni, abagi kina'mi Isuka mayama abigantawe: Pigoya taeba aenkauka'i wama, Pasoba nanintagapa maema kaeti aogi pukunema, abigantawe.¹³ Abigauguna, Isu abagi kina tara isigaruba'ma maya uwaisimintiye: Tisigeba kuma'i waisigina, wani kankabe aesaga urinta yagarama tisigakirisiba, ae aega'urite waisigina,¹⁴ namapi wakirisi, kana namankama nkaba nkuma omiso: Tisa yagaramaba maya iye: Naäge nabagi kinake mima Pasoba naninta kae namapi nakuna, aemparuta ampima nasune iyema, omiso.¹⁵ Omisigina, aebe tisibabute inati aogi pumaranta tabe maru asu tisiyakekirisi, pita'i Pasoba naninta taeka napima aogi piso, uwaisimintiye.¹⁶ Uwaisimoginisi pi abagi kina'misi itate kuma'i wamaginisi pi abagi kina'misi itate kuma'i wamaginisi, pabi uwaisimomesa puma wama agateginisi, Pasoba naninta aogi puntase.

¹⁷ Albusuguna, ase ikena pogini, Isuge nagisarisa tara tumpaema kinake wama,¹⁸ uma teboria mima nantini, Isu maya untiye: Pigoya tagaka urimuwe. Tigepisa ka'waina minaga punatakiye. Ibanto naege naninta nami ntagarama piya pikiye, untiye.¹⁹ Piya yogini igebe intara pumagini: Naeka yeno yenoma, abigauguna,²⁰ aebe maya uwaimintiye: Nagisarisa tara tumpaema kina tigepisa, naege ka tu'napisu paretirasa antipi mo aema nami ntagaramaka yuwe, untiye.²¹ Piya, Wasanama Ntagara naeba mono kamanata unatanti ki'i wakuwe. We, Wasanama Ntagara naepa minaga punatakib'i'naba ataenabi mikiye. Piya, pi ntagarapa wasanama kampa yakari potantesinta, kanara pesine, Isu untiye.

*Auke korake imogini nantawe
(Matiyu 26:26-30; Aruku 22:15-20; 1 Korinti 11:23-25)*

²² Pigoya, igebe naninta nantini, Isu paretiba maema, Koti a'mu potama, ako puma imintana: Mapa nae nauna maema naiyo, untana,²³ waini kankabe maema a'mu potama, imogini pi a'ya'ma kina'mi nantawe.²⁴ Piyama imitana, Isu maya uwaimintiye: Uwoma kina Kotiti atokaekenaga ma korantepa ago pagikkiye. Pipa ara'ena potauwe.²⁵ Tagaka urimuwe. Toma naompe wainiba kampa nakubopa, toganaba Koti kabiratakibita kasa'ena nakuwe, uwaimintiye.

²⁶ Piya uwaimintana ini ugaitegini, iro'ma Oribesi amuti intawe.

*Pitaka: A'yo uwa natakibene, Isu omintiye
(Matiyu 26:31-35; Aruku 22:31-34; Yoni 13:36-38)*

²⁷ Albuntini, Isu maya uwaimintiye: Mono isa'amaba maya iye: Sipisipira kabima minti ntagara aeguyiginiba, kana sipisipiba iyegaka aibarara puwakibewe, iye. Piya

yemisa puma, tigeba a'ya'ma natate tiyegaka'ya puwakibewe. ²⁸ Pigoya togana asinatakibipa, Karariya-i tigepa paitama wama aborakiri nagakibewe, untiye. ²⁹ Piya yogana: A'ya'ma kina'mi iyegaka'ya puwakibepa, naeba kampa katate wakuwema, Pita omintiye. ³⁰ Piyama omogana Isu maya omintiye: Tagaka ugamuwe. Iba aseka kakagara naeka: Kampa aganto ntagarawe, yeganaba: Tarara kokorewama aga ukiyema, omintiye. ³¹ Piyama omogana Pita esegima maya untiye: Wasanami naeke tasiyegukibepa: Naeba ae ao'yagara kampa mintuweba kampa ukuwe, omogini, a'ya'ma kina'miba pabi Pita yomesa suntawe.

*Isu Kesemeni yugabi nunamu untiye
(Matiyu 26:36-46; Aruku 22:39-46)*

³² Pigoya igeba ka au'i wama, kana mawama nkagewapa Kesemeni, wamagini Isu abagi kinaka: Mata mara'miyigi nunamu yeno, uwaimintiye. ³³ Piya, Pitana Yemisina Yonina suma, ibiri ibabute wamagina, agasiyama aekuru puma akawagawa pumagina, ³⁴ maya uwaimintiye: Naepa tabera naukima nanta waru waru nabiya, tigeba mata mima kabinataiyo, untiye. ³⁵ Piya umagina, aeba ka au'i wama auki nakiyena uwa atakenaga umagina, mara antagawarisu uma aigare pa'ma mima, nunamu maya untiye: ³⁶ We nabanempa-o, kaeba a'ya'waemaena pikena yagara mintana, nauki nakiyenaba naparo. Pigoya, nae napiyenagaba a-ntapima, kaeka napikibempentana wasima po, untiye.

³⁷ Piya ute, kana pi kakaga kina'mi waitamintuguna, igate Pitaka maya omintiye: Saimoni waitamintano. ³⁸ Kampa agarosama kaoganta wairabankano. We, tiyogama mima, kabinatama nunamu yiyo. Piya puntiripa kampa aguntaena pikibewe. Pigoya tigu'amaba tiyampu pegina ti'amaba kampaye, uwaimintiye.

³⁹ Piya uwaimitegina, to mare auka'i wama, pabi to yomesa nunamu untiye. ⁴⁰ Ugaitegina to ampa igaomepa, waite asite pugagategini waitamintuguna, kanama ampa igaogini, ae omikena kamanakaba kampa napintawe.

⁴¹ Aibuguna to wagate kanaomepa maya uwaimintiye: Tigeba to migrakena waiyewo. Pabigoya, nae yaga aboraya, ibanto Wasanama Ntagaranagana, ataena punatakini, agunta kina'mi narakurikena pewe. ⁴² Pigoya, asiyigi wano. Minaga punatakena yagaraba mompa iya, agaiyo, untiye.

*Isu arakurintawe
(Matiyu 26:47-56; Aruku 22:47-53; Yoni 18:3-12)*

⁴³ Pigoya Yutasi, nagsarisa ka tumpaema abagi kina nasumepisa me nkigait waogana, Isu kamana ugaka pogana, Yutasi uwoma kina uma ibabute kanantiye. Piyama tabe mono kiye kina'mige tisa kina'mige kabiyume kina'mige pi uwoma kina igarubauguni, igeba irebube ma'ena kasupe maeyuguna, ⁴⁴ minaga potakena pome ntgararama ibabute kanantiye. Aeba kanantana maya untiye: Uma agate, amo nakubo ntgaraba aewa, araku'ma kabirite waiyo, piya ute ibabute kanantiye.

⁴⁵ Yutasi ibabute kanama, karu'ena Isuti wama: Tisa yagarama-o, ute, uma aepa'ma amo naogini, ⁴⁶ uma aebasa'ma araku'urintawe.

⁴⁷ Araku'uruguna, ka pi mintume ntgararama kasonka me a'yuburintana, mono paitanta yagarama ntuga yagarawapa uma aeguma, age aira kaentiye. ⁴⁸ Aibogana Isu maya uwaimintiye: Tigeba nanaga naekaba ku kinanema napima, narakurikena irebube kasope maete kanawé. ⁴⁹ Naeba asi nasi tabe mono namapinti wama kamana yogiripa, kampa pita'iba narakurewe. Pigoya, mono isa'ama yemisantana naraku'ma, karana natakibewe, untiye. ⁵⁰ Piya yogini, abagi kina'wa a'ya'ma atate iyegaka'ya puwantawé.

Ka yagara auka aegaka wagaintiye

⁵¹ Piya puguna, ka kai amirinta masimabima Isu aega'urite kanaogini, aeke arakuruguna, ⁵² kana yagaramaba aibarigo puma, kaiwapa atagaite auka aegaka wagaintiye.

Isu kamana otantawé

(Matiyu 26:57-68; Aruku 22:54-55, 63-71; Yoni 18:13-14, 19-24)

⁵³ Pigoya, igeba Isupa ababute monota paitanta yagarari wauguni, pita'i a'ya'ma tabe mono kiye kina'mige kabiyume kina'mige tisa kina'mige me nkaki puntawé. ⁵⁴ Piya puguna, Pita aka'i aega'ma pasema wama, monota paitanta yagarama kumati ima, irebu kina mintume ntakuta asu tapintiye.

⁵⁵ Asu tapiyogini, tabe mono kiye kina'mige a'ya'ma mono kanisore kina'mige mimagini, Isu kamana otamagini, Isu ataena pusanaga ige atakae puma, Isu aegukena pumagini, piya kamanapa kampa abintawé. ⁵⁶ Pigoya, uwoma kina'mi ampimagine, kampari kamana: Aeba piya pine, piya pine Yuguna, ige yume kamana agoba kampa aogima abintawé. ⁵⁷ Piya puguna ka'isa kina'miba asima kampari kamana Isuka maya untawé:

⁵⁸ Ma wasanami kimaranta mono nama akasaba'maba, wasanami kampa kiyesa ntama

kakaga yaga kima a'ya kaikuwe, ubegi abibompene, untawe. ⁵⁹ Piya umagini, igeba to ka'isami yumesa puma, kampa ka kamanapa unta, to kamana to kamana uwaimintawé.

⁶⁰ Uwaimuguna, monota paitanta kiye yagarama ikapi asima mima, Isuka mayama abigantiye: Ma kina'mi kaeka yepa, kaeba ayawé uramikibenema, abigantiye. ⁶¹ Abigaogana, Isu kampa kamana unta asaba'waogana, paitanta yagaramaba to mayama abigantiye: Tabe ta'mu potaoompe Ntagarama ntagara Karaisitigawoma, abigantiye. ⁶² Abigaogana Isu maya untiye: Pipa nae mintuwe. Tigeba Wasanama Ntagaranaga Esegiraka'ya Ntagarama nkayatakanti mara'miyekiri nagaigi, mimiga mantara tumeikiri nagakibewe, untiye. ⁶³ Piya yogana, tabe kiye yagaramaba kabi'ma autasaenaba aegaregaru pa'ma, maya untiye: Nanagabaya to kina'mi kamana yigi abukune. ⁶⁴ Ae'wa piyama Koti Ntagaranawé yipa, kampari kamana'wapa yegiri abewa, aya pisiwema, ibigantiye. Ibigaogini: Aeba ata yagarawa, aeguyiyoma uwaimo, untawe.

⁶⁵ Piya untini, ka'isa kina'miba kaisa potamagini, aoba airarikae u'ma aegutategini: Kebaya kaeguya, uramoma, abigauguni, irebu kina'miba araku'ma iya kasutasa aeguntawé.

Pita Isuka: Kampa aganto ntagarawé, untiye

(*Matiyu 26:69-75; Aruku 22:56-62; Yoni 18:15-18, 25-27*)

⁶⁶ Pigoya Pita kuma'i mintogana, monota paitanta yagarama ntuga potaome nkwaepa kanama, ⁶⁷ agaomepa Pita yakuta tapima mintogana ampa agate: Kaege Isu Nasaretirisa agarageba naseka kagabone, untiye. ⁶⁸ Piya yogana aeba: A'a-o. Naeba kampa abuwa, kamanakapa nanawe yewe, untiye. Utégina, ae kagisa kabera tumpintogana, kokore aga untiye. ⁶⁹ Tumpintogana to kana wae'maba agate, agora mintume kinaka: Mo ntagaraba ae aokinane, uwaimogana, ⁷⁰ Pita to: A'a-o, untiye.

Piya yogana uwaenanto togana to agora ampintume kina'mi Pitaka: Kaeba Karariya yagaragawa, nanaga: A'a-o yene. Kaeba ka aokinakawe, untawe. ⁷¹ Aiyuguna aeba: We, taga kauwe. Naeba pi yempe ntagaraba kampa aganto ntagarawé, ute amota atantiye. ⁷² Piya pogana kokorewama to ka aga yogana, Pitaba pai Isu omome kamanaka mayama napintiye: Kaeba naeka kakagara: Kampa aganto ntagarawé yeganaba, tarara kokorewamaba aga ukiye omomeka napima, tabera antara puma, kube'ena puntiye.

15

Isu ababute Aroma kiye yagarari wantawé

(*Matiyu 27:1-2, 11-14; Aruku 23:1-5; Yoni 18:28-38*)

¹ Pigoya, abaya aseká tabe mono kiye kina'mige kabiyume kina'mige tisa kina'mige, a'ya'ma karisore kina'mige aki puma: Piya pukunema, uritegini, Isupa iga'narasa kirokaetamagini ababute wama, Pairati memintawé. ² Memuguna Pairati: Kaeba Yuta kina'mi Wa'ega yagaragawoma, abigantiye. Abigaogana Isuba: Kae piyaba yene, omintiye. ³ Piya yogini, tabe mono kiye kina'miba: Uwoma tonarona ataenaba pemi ntagarawé, Pairati omintawé. ⁴ Piyama omuguna, Pairati to ka mayama abigantiye: Igeba kaeka tonarona ataena pemi ntagarawé yepa, kaeba kampa kamanapa ikena penoma, abigantiye. ⁵ Aiyogana, Isuba to kampa unta asaba'waogana, Pairati piya pomeka pamí puntiye.

Pairati: Isu ababute yara aeguyiyo, untiye

(*Matiyu 27:15-26; Aruku 23:13-25; Yoni 18:39-19:16*)

⁶⁻⁷ Pigoya, ka yagaraba agewapa Parabasi, pi ntaga aege ao'mige ma'ena puma, kiya kina'mi nkaokina iyegute, karabusibi mintantiye. Mintuguna, a'ya'ma Pasoba naninta naume ntagaba Pairatiba uwa kinaka: Karabusibisaba ke uwaba atasuwema, ibiga puntiye. ⁸ Piya, pome ntaga uwoma kina ampa aki puma mima, Pairatika: To puntampséa puma ka'mu puratama, karabusibisa ka yagara uiwa ataoma, abigantawé. ⁹⁻¹⁰ Piya yuguna Pairati mayama napintiye: Mono kiye kina'mi Isuka imo potamagini, araku'ma kotiyena potawema, napimagine: Tige yeka, Yuta kina'mi Nkwa'ega yagara uwa atasuwoma, ibigantiye. ¹¹ Ibigaogini tabe mono kiye kina'miba ampa aki puntume kinapa maya uwaimintiye: Parabasi uwa ataoma omiyo, untawe. ¹² Piya yuguna, Pairati aki puntume kina to mayama ibigantiye: Yuta kina'mi Nkwa'ega yagarawé ye ntagara mintiye, aepa aya pusuwema untiye. ¹³ Piya yogini: Yara aeguma itagiyo, untawe. ¹⁴ Piya yuguna Pairati: Nana ataenaba pegiri yewema, ibigaogini, to taberasa: Yara aeguma itagiyo itagiyo, untawe. ¹⁵ Piya yuguna, Pairati aki puntume kina'mi i'mu punatakibewema, napima: Parabasi uwa wao, untiye. Piya yogana waogana, Isupa irebu kina imogini, igeba paga kasutasa agasiya kasu aeguyuguna: Ababute wama yara itagiyo, uwaimintiye.

Irebu kina'mi Isu karana atantawe
(Matiyu 27:27-31; Yoni 19:2-3)

¹⁶ Piya uwaimogini, irebu kina'mi Isupa ababute tabe irebu kina'mi kumati wamagini, kana kuma'ama nkagewapa Paratoriyamu wamagini, to ka'isa irebu kinakaba uma kega'e yuguni, ampa aki puntawe. ¹⁷ Piya pumagini, kiya kina'ma tete kai maema Isupa amitamagini, ake wainta iga'narasa taminoku'ena potama, a'notapa tamimonkitama, ¹⁸ saroti amimagini: Kaeba Yuta kina'mi Nkwa'ega yagaragawa, e'ero ntaga aogima miyo, untawe. ¹⁹ Abuntini, igeba kasotasa a'no airapora puma aeguntini, kaisapa potentini, aeta parokaema karana kasa uma: Kaeba tabe yagaragawe, untawe. ²⁰ Piya puma karana atagaitegini igeba tete kaiba atama maebugasimagini, to ae'wa kai amitamagini, abe'i iro'ma ababute, yara itagikena wantawe.

Isu yara itagintawe
(Matiyu 27:32-44; Aruku 23:26-43; Yoni 19:17-27)

²¹ Pigoya, ka Sairini marisa yagara agewapa Saimoni, Aresantake Arupasike isi-bawaisimpa, to auka'isa kanaometa keta pabumagini: Maripoba aesaga'urite wao, omuguna aesaga'urite wantiye.

²² Piya pogini, igeba Isupa ababute, Korikota wasana a'no nkayampu kanta mari wama umintuguni, pita'i aeguntawe. ²³ Piya, ka'isamiba kampa aukikena tusa wani wainibi atama: Naoma amuguna: Kampa nakuwe, untiye. ²⁴ Piya, irebu kina'mi uma yara itagitamagini, kaiwapa maemagini, tete'ena pumagini, kebaya tonarona kaiwapa maekiyema puntawe.

²⁵ Piya pumagini, abayara yara itagitamagini, ²⁶ kotiyena potaume kamana maya uma kaentawe: Yuta kina'mi Nkwa'ega yagarawema, kaemagini, a'no nkabobori a'makaetantini, ²⁷⁻²⁸ ku kina tarage, kapa ayatakantiwa, kapa ayake'masiwa suma, isigeke yara ita isitantawe.

²⁹ Piya puguni ka'isa kina'mi agora wama, pumireri potama maya untawe: Kaeba ka yaga tabe mono nama akasabakaiteba, karu'ena kakaga yaga kikuwe ubempe ntagaragawa, ³⁰ kaega ntapima, yarasa kaupa aogi purite tumo, omintawe. ³¹ Piya omuguni, tabe mono kiye kina'mige mono tisa kina'mige pabiyama pumireri potamagini, igewai marebiga mebiga puntawe: Aeba to kinapa aogi puwaitantana, aewapa nanagabaya kampa au'wapa aogi piye, untawe. ³² Piya, Koti utaratanta, Isureyo kina'mi kiya yagaranawе untanapa, yaba pabigo ibanto atate tumegapa, kagate kae kaegarano, untawe. Piya yugunisi, pi tara aeka ita isitaume ntagararamisiba, isigege pumireri potamaginisi, aeka ata kamana otantase.

Isu purintiye
(Matiyu 27:45-56; Aruku 23:44-49; Yoni 19:28-30)

³³ Piya puguna, kagita a'ya'ma maba ase uwaogini mintuguna, to atamaita mesu marintiye. ³⁴ Pigoya, Isu atamaita mayama kega'e untiye: Iro-i, Iro-i, arama sabatani, untiye. Pi kamanapa tae kamanapisaba: Kotinempa-o, Kotinempa-o, nanagabaya kaeba uwa natane, untiye. ³⁵ Piya yogini, ka'isa mintume kina'miba abitegini: Iraiayabaya kega'e iye yuguna, ³⁶ ka yagarama karu'ena wamagina kai atuta asa wanipi ae u'ma, asara kitama: Nao, ute mayo amintiye. Aibumagina mintume kina'mipa maya uwaimintiye: Pabita, abiyo. Iraiayaba tumpa akitama uwa atakibayaka agakune, untiye. ³⁷ Aiyogana Isu tabera kega'e uma, purintiye.

³⁸ Purogana, tabe mono nama nkantabintisa kai, Koti nkauka'i akunkataume kai akapisa aeru'ma torirari puwantie. ³⁹ Piyama Isu purogana, irebu kina'mi kiya yagarama agora mintumetisa agate, maya untiye: Tagane. Ma ntagaraba Koti Ntagarawewe, untiye.

⁴⁰ Pigoya, pi ntaga waya'iyaba mare nkau'i mima apasa puntawe. Ka'isa kana wae'mi nkigewaipa: Mariya Matara kumatisa waena, to ka Mariya ae'wa nkamana Yemisike Yoseseke isinowaisimpa, to ka wae'ma agewapa Saromiwa suma, ⁴¹ Karariyi-i Isu mintoganaba, kana wae'mi aega'ma, ao'mae pome wae'iya mintuguni, to uwoma Yerusaremi ababute inta wae'iyamige ampima, agaba puma mintantawe.

Isu nkaupa maema kaintawe
(Matiyu 27:57-61; Aruku 23:50-55; Yoni 19:38-42)

⁴² Pigoya, aiba sabati aborakiyema, a'ya'waemaenaba aogi puma ntagagana ase ikena pogana, ⁴³ Arimatuya kumatasa yagara Yosepe, aekuruyenagaba kampa napinta Pairatiti wama: Isu nkaupa maesuwoma, abigantiye. Pigoya kana yagara aogi mono kanisore yagara mimagina, Koti kabima mikenaenaga napi napi pome ntagaragana mintantiye.

⁴⁴ Piya yogana, Pairati: Agobaya pu'wayema, napima, irebu kiya yagara kega'e uma

abigaogana: ⁴⁵ Owe ago pu'waye, kana irebu yagara omintiye. Omogana abite Yosepeka: Kanarana au'wapa umaeoyo, omintiye. ⁴⁶ Omogana Yosepeba aogi wae kai maerite wamagina, uma akitama, pi kaibi yoburite, yabapi ku'maranta kabi uma kaitamagina, kawarapa tabe yaba a'waremagina akunkatantiye. ⁴⁷ Piya poginisi, Mariya Matara kumatisa waeke, to ka Mariya Yosese nkanowampage, kanama kaiyome aru ampa agantase.

16

Isu asima mintantiye

(*Matiyu 28:1-8; Aruku 24:1-12; Yoni 20:1-10*)

¹ Pigoya, sabati a'ya waogini, Mariya Matara kumatisa waena, to ka Mariya Yemisi nkanowampawa, to ka wae Saromiwa sumagini, aogi agunta yome tusaena ae auti yora potakena tusaena ika puritegini, ² sonta yagaba, abaya aseka asima aruri wantawe. ³ Ke'i wantini tabe yabaka: Kebaya aru ka awarasa a'wareragasaki pai'atakunema, igewai uta wantini, ⁴ pi yabapa tabe yabapa uma agaumepa, a'waima a'ware wantiye. ⁵ Aibogini, kabinti wama uma agaumepa, aogi wae kai amirinta masimabi yagara ayatakantisa auka'i asima mintogini, uma agategini pами puntawate.

⁶ Pami puguna maya uwaimintiye: Tigeba a-pamiba piyo. Isu Nasaretirisa yagara, yara itaginta ntagarabu agusagapa, aeba matapa kampa minta, ago asima waye. Agaiyo, mata kaitatawe. ⁷ Piya, tigeba wamagiri Pitage abagi kinake: Paitama Karariya-i wakiri, urimintisa puma pita agakibewe, uma uwaimiyo, uwaimintiye.

⁸ Uwaimogini, igeba iyekuru puma pami pute, arubintisa iro'ma iyegaka wamagini, iyekuru puma, kana kamana kampa to kinapa uwaimintawate.

Mariya Matara kumatisa wae'ma Isu agantise

(*Yoni 20:11-18*)

⁹ (Pigoya, abaya aseka sontara Isuba asima, Mariya Matara kumatisa wae'ma agora aboraogana, agantiye. Kana wae'mapa pai Isu tonarentisa tara umaema ke kina agaruba agasome waekana mintantiye. ¹⁰⁻¹¹ Mintogini, Isu nkaokina'mi intara puma kube'en a puma miyuguna, aeba wama: Isu ago asima mintegi agauwe, uwaimogini abite: Kampari kamana yene, untawe.)

Tara yagararamisi ke'i Isu agantase

(*Aruku 24:13-35*)

¹² (Togana to tara yagarara uwa mari ke'i wausuguna, Isu to kina kanta yagara aboraoginisi agateginisi, ¹³ to kinati wama: Ago Isupa agause, yusuguni: Kampari kaese, untawe.)

Isu aboraogini nagisarisa ka tumpaema kina'mi agantawate

(*Matiyu 28:16-20; Aruku 24:36-49; Yoni 20:19-23*)

¹⁴ (Pigoya, togana nagisarisa ka tumpaema kina'mi naninta nauguna, pita Isuba aboramagina maya uwaimintiye: To kina'mi ago nagategini, asima mintiye kamana nagata kina'mi urimuguripa, nanaga tigeba akumpa'ma miywewma, ka ibirantiye. ¹⁵ Piya umagina aeba to amato puma maya uwaimintiye: Tigeba a'ya'ma auka'i nasima, aogi kamana'nne a'ya'ma kina uwaimiyo. ¹⁶ Wasanama nae kamana aega'ma wani maekibipa, ao'maeyakanaka ikiye. Pigoya wasanama kampa nae kamana aegarakibipa Koti ataena potakiye. ¹⁷ Pigoya nae kamana aegarakibe kinapa maya esegiyena pikibewe: Nae nageraka ke kina agarubakibewe. Kasa to kamana ikibewe. ¹⁸ Kuya iyatasma maekibepo karaena nakibepe, kampa ata puwaitakiye. Pigoya igeba iyatasma yoni kina'mi ikaya pikibepo ita wakiye, piya uwaimintiye.)

Isu mantari intiye

(*Aruku 24:50-53; Aposoro 1:9-11*)

¹⁹ (Tabe Yagara Isu piya uwaimigasogana, ababogana mantari imagina, Koti nkay-atakantisa auka'i asu mintogini, ²⁰ abagi kina'wampiba a'ya'ma auka'i wama, kamana'wa uwaimuguna, Wa'egawamaba iyo'maema, esegiyena tonarona pogini, agategini: Taga kaeyewe, untawe. Tagane.)

ARUKU AOGI KAMANA KAEMARANTIYE

Aruku esa kaemagina ka tabe yagara amintiye

¹ Teyopiro, tabe yagarare, abakatepi Koti kao'ena puratama mono yuga punti kamanapa uwoma kina'mi aogima arabama kaentawé.² Pi kamanapa Isu nkagora mintanta kina'mi agama abintini, piya mayaenama nkagowapa abinta kina'mi nkuraminta kamana kaentawé.³ Pigoya, naeba pabiyama nabegi, agarosa a'ya'waemaña aboraurite kananti, pika pasema aisuma a'ya uritegi, kau'nana kamana uma kaeyuwé.⁴ Pigoya, pipa aisuma mayama abibebe po. Mono ugamtapa taga au'wantaga'ena, ka'isa kina'mi nkugaminta kamanapa kaeba aogima aismagina, abibebe po.

Yoniba aborakiyema, enisorewama Sekaraya omintiye

⁵ Pigoya, Erotiba Yuta kina'mi nkwa'ega yagara mintome kanabi, mono kiye yagara ka mintantiye. Agewapa Sekaraya, aeba Abaisa ae mono yuga aruyenabisa yagarawé. Waya'wapa Eroni mpono yuga aruyenabisa pi nkututasa, agewapa Erisabeti mintantiye.⁶ Pigoya, isigeba Koti nkaobi isigupa aogima atamaginisi mima, a'ya'ma Wa'egawama unti kamanape arupu kamana'wape aogima wasima mintantase.⁷ Piya, Erisabeti anamo wae mintika, isigeba yagarawaisi kampa minta mima, karea aenta tantase.

⁸ Pigoya, Sekarayage aokina'mige Koti mpono yugawai pikenagana aboraogini,⁹ irosa'magini Koti ntuga uwaitantemi ntuga iyota iyota puma maentini, Sekarayapa kunka aguntaena kaeyanema otauguna, Koti ntamankama nkagupinti uma pasintiye.¹⁰ Piya pogini, wa waya uwa kinapa abe'i kumati aki puma mima, Wa'ega esotama mintuguna,¹¹ kunka aguntaena kaeyogana, Wa'egawamatisa enisore aboramagina, kunka aguntaena kaekenaenara ayatakantisa auka'i asima mintantiye.¹² Asima mintogana, Sekaraya agate pamí pumagina aekuru puntiye.

¹³ Piya pogana, enisorewama maya omintiye: Sekaraya, kaeba a-kaekuru po. Wa'egawamaba esotakanaba abintika, wayakampaba aga'e puma, yagara ka yakari pekanaba, kaeba ae ageba Yoniwe omo.¹⁴ Pigoya, kae kantawamaba aogi puma, asoya pekana ka'mu pikibene. Piyama aborakiniba, uwoma kina'mi abigina iga pukiye.¹⁵ Pi ntagara Wa'egawamaba nkaobi tabe kina'ena puma mikiye.¹⁶ Aeba esegi wanipa a'a-o uma miyekana, Aota Awamus'a'maba inamugantora agupi tumima pumaekiye. Pumaeyakana, Isureyo kina uwoma kina igu a'wae pekini, Wa'egawama, tabe Kotiwaimpa agarasena pikibewe.¹⁷ Piya, poropete yagara Iraiayati aumabe esegiyenabe waintanti, pabiyama waintantakana paitamagina, wama Wa'egawama nkawaga kamana ikena kina'ena puma mikiye. Pigoya, abawampabe yagarawampabe ige igu maema paru puma kayone puwaitakini, ka'masa puma mikiye. Piya, ikeri pakibe kinapa uwaitakini, to a'wae puma aegaranta kina'mi nkaruyenaba uma mikibewe. Piya pekini, wasanamiba a'ya'waema Wa'egawamaka aseyo puma mikibewe, untiye.

¹⁸ Pigoya, enisorewama piya yogana abintanta, Sekarayaba kamana mayama a'wae pomintiye: Naebe waya'nepe tasigeba ago karea aenta tause. Pikaga kamana kapa ayama abibebe pukuwe, yogana,¹⁹ enisorewama maya omintiye: Abeno. Nagenepe Kebariyo, naeba Koti nkaobi miyo'nana, nagarubagi kaeti tumima aogi awaga kamana ugamoganapa,²⁰ kampa abibebe pene. Pi'na antotapa aibo'ena puma, kamana kampa unta kina'ena puma mintagana, kamana ugamo kamana'amaba au'wantaga'ena pikiiye, piya omintiye.

²¹ Pigoya, Sekaraya aeba tabe mono namapinti e'erotá mintogini, wa wayapa igeba agawa puma mimagini, uwoma nkigi napintawé.²² Piya puguna, ainti igezi tumimagine, kamana uwaimikena igiga puntiye. Aibogini igeba maya untawé: Aeba tabe mono namapinti to ka aoso'ena agai'nawe, yuguna, pigo aeba ayatasa awame puwaiyakintiye. Awamupisa kamanapa kampa untiye.

²³ Piyama mintogana, yoga pikena kana'wapa a'ya pogana, atate kumati wantiye.²⁴ Pigoya, ainti waya'wampa Erisabeti aga'e puntana, opa nayaka'mu kakama mintantiye. Piya puntana maya untiye:²⁵ Wa'egawama aeba kana atanti, pipa aborakanaba aogi punatamagina anamo nanintanaba asu'a punagaintiye, untiye.

Enisorewama: Isu aborakiye, Mariya omintiye

²⁶ Pigoya, tonarentisa ka'umaema upa Erisabeti aga'e pogana, Koti nkenisore yagara Kebariyo agarubaogana, Karariya mari Nasareti kumati tumimagine,²⁷ aragawae'mati tumintiye. Kana aragawae'ma nkagewapa Mariyawé. Pigoya, kiya yagara Tebiti nkayabama, agewapa Yosepe mintana, kana aragawaepa maekiyema ika potantiye.²⁸ Aibuguna, kana enisorewama Mariyati wama maya omintiye: Aya pene. Wa'ega Yagara

kagora mima, kaeka a'mu pugatama abegin aogi piye, yogana,²⁹ Mariya kana enisore yagarama yome kamana abite aekuru pumagina: Kamana agowapa ayabayawema, napintiye.

³⁰ Piyama napiyogana, enisore yagarama maya omintiye: Mariya, kaeba a-kaekuruba po. Koti antawamaba kaeka abegin aogi piye.³¹ Kaeba kaga'e puma masinto yakari potamagina, agewapa Isuwe omo, untiye.³² Piya untana to maya untiye: Aeba ae age Inatisa Wa'ega Yagarama Ntagarawe omikibewe. Piya puma, ayabama Tebiti kabintemisa puma tabe yagara mima,³³ a'ya'ma yaga Yekobu nkaokinatapa kabiwaitama, a'ya'ma yaga Tabe Yagara miyaba miyaba mikiye, piya omintiye.

³⁴ Piya yogana, Mariya enisore yagaraga maya omintiye: Naeba kampa nawaeba mintiye. Yempe kamanapa aya pikie, untiye.

³⁵ Piya yogana, enisore yagarama maya omintiye: Aota Awamus'a'ama kantabaipinti tumekana, Inatisa Yagarama esegiyenawampa aogi pugatakana, yagaragampa aota yagara, age Koti Ntagarawe ukibewe.³⁶ Kaeba abo. Kanogae Erisabetigaba, aeba anamo aentawye ye wae'ma aga'e pumagina, togana kakaga u migaitegina, masinto yakari potakiye.³⁷ Piya, Koti ka'ena pikenaba kampa igiga pukiye, untiye.

³⁸ Piya yogana Mariya maya omintiye: Abo. Naeba Wa'ega Yagarama kayokaya araganagana, pabi yempesa punatakiye, untiye. Yogana, enisore yagaraba atate wagaintiye.

Mariya Erisabeti uma agantiye

³⁹ Enisorewama kamana omigaite wagasogana, pabi ntaga Mariya ka'isaenawapa aogi purite, Yutiya mari karu'ena wamagina, amu wainti mari ima, kuma ka waintiti imagina,⁴⁰ Sekaraya ntamapinti ima Erisabetika: Aya pene, asu untiye.⁴¹ Aya pene asu yogana, Erisabeti ntagara antabaipinti patagi pogana, Aota Awamus'a'ama Erisabeti nkantabinti pumaeyogana,⁴² Erisabeti Mariyaka maya omintiye: Koti a'mu pugataye. Kaeba aogi waekagana, taberesa Kotiba aogi pugatakana, kantabaipinti aborama mintemi ntagara aogi yagara aborama miye.⁴³⁻⁴⁴ Pigoya abo. Kae kamana yeka aboganawa, nantabaipintisa yagaranempa ago a'mu puma patagi piye. Naeba na'mu pugatauve. Kaeba nae Wa'ega Yagarama nkanogawe. Ayabaya naeti kanama ampa nagane.⁴⁵ Pipa Wa'ega Yagarama kamana ugamtina, kaeba abekana tagantana pemika, tabera ka'mu potane, piya omintiye.

Mariya a'mu kamana untiye

⁴⁶ Piya omogana, Mariyaba abite a'mu kamana maya untiye:
Naeba nagu namankamaba Wa'egaga na'mu potauwe, iye.

⁴⁷ Piya, naumawamaba Koti aogi punatakaenanempa na'mu potauwe, iye.

⁴⁸ Abo. Ae kayokaya araga nae uwa miyogana nababuma aogi punatakini, ibabe aintibe
Koti a'mu punatami kamana a'ya'ma kina'mi abimagini, naeka i'mu punatakibewe,
iye.

⁴⁹ Piya, Koti tabera aogi punatami, esegi yagara miye, iye.
Piya, agewapa aota puma waintiye, iye.

⁵⁰ Aeka abemi kinapa igepe agu kao'ena puwaitamagina, ago paipe ibabe abemi kinapa
igepe aogi puwaitaye, iye.

⁵¹ Aeba esegiyenawampa nkagowapa aboramagina, i maete iye kina igepe igarubantiye,
iye.

⁵² Aeba kiya kinapa maema merunkaba puwaitaogini tumi wantaw, iye.
Piya, tumima mintanta kina ababuma mesuba puwaitantiye, iye.

⁵³ Aeba kusi kina ige piyamaenaba asaema imintana, pi tabe kutantaga kinapa igasogini,
imu kampa wainta kina'ena puma mintantaw, iye.

⁵⁴⁻⁵⁵ Piya, tayabamagi Abara'amupe aga'nugipe utawaitantiye. Pabi nkawameta piya
purataika, kamana'wapa uwa waita ikiye, iye.

Pi kamana'waka napimagine, Isureyo kina, Koti kayokaya kina'wa, agu kao'enaga uma
tabaibuntiye, Mariya piya untiye.

⁵⁶ Piya ugaite, Mariya aeba Erisabetigae kakaga u migaitegina, kuma'wati a'wae puma
wantiente.

Erisabeti Yoni yakari potantiye

⁵⁷ Pigoya, Erisabeti yakari pikena yaga aboraogana masinto yakari potantiye.⁵⁸ Piya,
Erisabeti nkaotumpibe wa'ewatas a kina'mibe abite, Wa'egawama aogima ao'maeyogini
ampa agate, igebe a'ya'ma i'mu potantaw.

⁵⁹ Pigoya, Yoniba ka sonta migasogini, paisa mono kamanapi waintome kamana
wasiyu'ma au kasantaw. Au kasagasinagin, agewapa abawampa aukantana
Sekarayawae omikena puntini,⁶⁰ abigauguna anowampa: Kampaye. Agewapa Yoniwe

omiyo, untiye. ⁶¹ Piya yogini: We, kae kaokina'mi piya igiba piyamaba kampa waintiya, aya pukune, ugategini, ⁶² a'wae pumagini abawampaka iyatasa posenta pumagini: Agewapa kewe omusune, untawe. ⁶³ Piya yuguna, Sekaraya esaka ibigaogini me nkamuguna: Agewapa Yoniwema, kaentiye. Piyama kaeyogini, wasanamiba agate pamipumagini: I-e, a-e, untawe. ⁶⁴ Piya puguna, Sekarayaba pi ntaga kamana iro'ma untana, Kotigaba tabera a'mupa puntiye. ⁶⁵ Piya pogini, wa'ewatasaka kina'miba pintanaga agate iyekuru puntaw. Piya pumagini, Yutiya amu waintome mpari nasima mare-u me-u puta nasintawa. ⁶⁶ Piya umagin, abume kina'mi: Aya yagarantobaya mikiyema, napimagini: Wa'egawama nkesegiyenawampa aepipa waintiye, uma: Ayabaya pukiye, untawe.

Sekaraya a'mu kamana untiye

⁶⁷ Piya yuguna, abawampa Sekaraya Aota Awamus'aama pumaeyogana, maya untiye: ⁶⁸ Isureyo kina, tae Wa'egare Kotika ta'mu potaune, iye.

Ataenabisa aokina'wa ampa taba puma aogi purataye, iye.

⁶⁹ Piya, kayokaya yagara'wa Tebiti nkayabamapisa ka esegi yagara asitakana aogi puratakiye, iye.

⁷⁰ Pai poropete kina'wa uwaitaogini, waiyaba mikena kamana umarantapa, iba aboraye, iye.

⁷¹ Pigoya, kama kinatempi nkiyapisa tababumagina, aeba abima ata purata kina'mi nkiyapisa iyoba tatakiye, iye.

⁷² Piya, tayabamagi kao'ena puwaitama iyo'maekuwe, Koti piya untiye, iye.

Pika maema ka aga'naena puratama, agu kao'ena ibaba purataye, iye.

⁷³ Piyaba Koti tayabama Abara'amupa uma esegi potentika, ⁷⁴ kama kinatempi igetisa iyoba tataka, aogima mpima kayokaya kina'wa mpimagine, ⁷⁵ a'ya'ma yaga taeba ae aobi aota puma mima, aogi ki'i eagarakubompeka Kotiba ka esegi yagara asitakana aogi puratakiye, Sekaraya piya untiye.

⁷⁶ Piya untana, Sekaraya a'wae puma yagarawaka maya omintiye:

Pigoya, ma ntagaranto, kaeba Inatisa Wa'ega Yagarama poropete yagaragawe, ugamikibewe, iye.

Piya, kaeba paitama Wa'egawama ki'i atakibene, iye.

⁷⁷ Piya, kaeba aogi puratakena kamana uwaimegini, a'ya'ma aokinapa abikibewe, iye.

Piya, aeba aru'enawaipa agaruba igasima ibabuntiye, iye.

⁷⁸ Pigoya, tabe kao'ena Kotiba puratama, piya aogi puratamika, pi aeba mantarisa e'wasaena otakana taeti arakiye, iye.

⁷⁹ Tununtanabi purikena kanta puma miye kina e'wasaena tamima aogi puratakiye, iye.

Piya, paruyenama kia boraka agama, kanara tanta paruyenabisa aegarakune, Sekaraya Yonika piya untiye.

⁸⁰ Aiyogana, ainti kana yagarantoba anosama tabe pogana, aumawampaba esegi potantiye. Piya, aeba ka'me mpari umintogana, kana'wapa aboraogana, Isureyo kina'mi nkiyobipa aborantiye.

2

Mariya Isu yakari potantiye

(Matiyu 1:18-25)

¹ Pigoya, Aroma tabe kkiye yagara Ogasita aeba kamana ataogana wagana pogini, a'ya'ma kina'mi nkigewai kaemagini aogi pikena puguni, ² pi nttagaba igewai kaekena maru'ena puguna, Kariniyasi aeba Siriya kumata kiya yagara mintantiye. ³ Mintogini, a'ya'ma kina mawaita ige kaekena umaki ampaki puntaw.

⁴ Piya puguna, Yosepeba Tebiti ayabamagana, Tebiti kumati wakena pumagina, Karariya-i Nasareti kumatasa atategina, Yutiya maru wama Petariyamu kumati wantiye. ⁵ Pigoya, Yosepeba wama, maekena pome nkarakawaepa Mariyapa aga'entaga, ababute Petariyamu wama mintusuguna, ⁶ pi ntaga yakari potakenakana aboraogana, ⁷ masinto amaru yagara yakari potantiye. Yakari potamagina, kairasa asagakokima, purumakankama ntamapi naninta amume tu'napi ataogana mintantiye. Pigoyema, kana wasana waikena namapa pumaewaogana, ae mikena maru kampa waintogana, piya puntiye.

Enisore kina'mi yaga kkiye kina'miti tumintaw

⁸ Pigoya, pi nkauka'iba ka'isa sipisipi kabiyume kina pita'i mimagini, sipisipira aseka kaburi kabima mintuguna, ⁹ Wa'egawama nkenisorewama igeti tumpa aboraogana, Wa'egawama nke'wasaenawampa ke i'ma iyakogini, agategini iyekuru puntaw. ¹⁰ Aibuguna, kana enisore yagarama maya uwaimintiye: Tigeba a-tyekuru puma abiyo.

Naeba aogi kamana maete tigeti tumuwe. Kana maete tumo kamana'amaba a'ya'ma kinati wakini, abima tabera i'mu pikibewe.¹¹ Pigoya, Tebiti kumata iba asenabinti, ti'ima aogi puritakena yagara yakari potagina, Karaisiti, Wa'ega Yagara, aeba ago aboraye.¹² Piya, kana inamugantoba taberaberasa akarakimagini, purumakankama ntaninta tu'napi atama mintakiya, tigeba wama agantiripa urimo kamanapa napiyiyo, uwaimintiye.

¹³ Piya yogana, mantabintisa uwoma enisore kina'mi aege aboramagini igeba inirasa Koti nkage maya uma asagayuntawe:¹⁴ Inati mantari Koti ta'mu potano. Aeba mabisa kina a'mu puwaitamagina, paruyena aborama imiye, piya untawae.

Yaga kiye kina'mi Isu uma agantawe

¹⁵ Enisore kina'mi ini piya utegini, pabita itate mantari intawae. Igasuguni, kana sipisipira kabiyume kina'miba maya untawae: Karu'enya maeyigi, Petariyamu-i wama Wa'ega Yagarama nkuramemintana uma agano, untawae.¹⁶ Piya utegini, igeba karu'enya wamagini, Mariyake Yosepeke uma isigaumepa, kana inamugantoba purumaka ntaninta tu'napi waita mintogini uma agantawe.

¹⁷ Uma agategini, igeba kana enisore yagarama yagarantoga yome kamanaka uwaisimuguni,¹⁸ ka'isa kina'miba kabiyume kina'mi yume kamanaka abite, uwoma nkigi napintawae.¹⁹ Napiyuguna, pigoyema Mariyaba kana kamana kampa agegu'a punta, aeba napi napi puntiye.²⁰ Piya pogini, sipisipira kabiyume kina'miba a'wae puma wamagini, a'ya'waemaena abima aganta kamana napimagini, Kotika i'mu potama age asagayuntawae.

Isu nkage omintawae

²¹ Pigoya, tonarentisa kakaga umaema yaga a'ya puwaogini, au kasagasima agewapa Isuwe omintawae. Kana agewapa, kampa aga'e puntogana enisore yagarama pai omome nkagi, omintawae.

Simiyonige Anage Isu agate isi'mu potentase

²² Pigoya, togana Isuke anoke isibabuma ma'ataome ntagaba aboraoginisi, Moses kamana ago kamana wasiyu'maginisi, ano aba Isu ababute Yerusaremi kumati imaginisi Wa'egawama nkaora atakena puntase.²³ Piya, Wa'egawama nkawamupisa ago kamana mayama waintantiye: Pipa kamaru masi aborakanapa Wa'egawama nkaora atao, iye. Piya untili kamana abi u'ma piya puntase.²⁴ Piya pumaginisi, pi nkago kamana wasiyu'ma Wa'egawama mpono awa'enä, pipa tara pupunta tarawo, intanuma awararawo, kaema agunta abasa atakena maete wantase.

²⁵ Pigoya, Yerusaremi kumata ka yagara mintantiye. Agewapa Simiyoni, aeba miyomentanawapa aogima mima Kotiti agupa amintiye. Piyama, Isureyo kina igebo aogi puwaitakenaena aborakibika, kana yagara aobi puma mintogana, Aota Awamus'a'ama agupi pumaema mintantiye.²⁶ Pigoya, ago pai Awamus'a'ama maya omintiye: Kaeba to-ganaba Wa'egawamatissa Karaisiti aborakan, agate purikibene, piya omintiye.²⁷ Pigoya, pi ntaga Awamus'a'ama Simiyoni: Tabe mono namapi iyo, omintiye. Omogana abite iyoginisi, anoge abage kamana ago wasiyu'ma Isupa ababurite kana namapinti ima Koti nkaora atakena pusuguna,²⁸ Simiyoni Isu uma ababurintana, Koti nkage asagayuma a'mu puntiye.²⁹⁻³⁰ A'mu pumagina, aeba maya untie:

Wa'egawo, naeba kayokaya yagaragapa, naonepisa kaetisa aogi puratakena yagara agaogana, mampabi mikenaenanepe a'ya piye, iye.

Pai utampe kamanakaga napima agaogana, nantawama paru piye, iye.

³¹ Kaeba mono maga maga kina'mi ige'ena iba aborane, iye.

³² Isureyo kinakaba taetiba e'wasaena aboragi ta'mu pune, Simiyoni piya untie.

³³ Isuka piya yoginisi, anoge abage isigeba uwoma nkisigi napintase.³⁴⁻³⁵ Piya, Simiyoniiba igebo akayona puwaitamagina, kana yagarantowampaka Mariya mayama omintiye:

Abeno. Ma ntagara aepisa Isureyo kina pako pikibeka Koti ago untine, iye.

Uwoma Isureyo kinapa aetasa asesepa'ma ware'nakibewe, iye.

Piya, ka'isa kina igebo aeti uma atokaema asikibewe, iye.

Pi ntagaraba uwoma kina'mi ntapikenaenawaipa aborakiye, iye.

Piya, aeba Kotipisa aboragini, aeka uwoma kina'miba imo kamana otaigina, pigo kaegapa tabera kantara pikibene, Simiyoni piya omintiye.

³⁶ Pigoya, ka Koti kamana uwaimi punti nkwe, aeba Panuwero nkaraga, Asa pi nkiga'nabiswa aboranta wae, agewapa Ana, ago aenta tantiye. Pigoya, aeba iba'enä kasatauguna, tonarentisa tara umaema kabu awaege mintogana pu'waogana,³⁷ aeba uwa mimagina 84-wa kabu aentarama mimagina, a'ya'ma yaga tabe mono namapi ampima,

asenabintibe arape nanintagaba kampa napinta, Kotiti napi napi puma mintantiye.
³⁸ Pigoya pabi ntaga mintogini, Yerusaremi aogi pukena yagaraga ka'isa kina'mi aobi puma mintantawe. Mintuguna, pabi ntaga kana aentaba ampimagina, Koti a'mu potama, aobi punta kinapa: Aobi pompe ntagaraba ago aboraye, uwaimintiye.

Nasareti kumati a'wae puma wantawé

³⁹ Pigoya, Wa'ega Yagarama nkago kamanaka a'ya'ma pugaitegini, Karariya Nasareti kumati wa'ewaiti wantawé. ⁴⁰ Wama umiyuguna, kana yagarantoba pita anosama, esegi pogana, Koti a'muntana potamagina tabera aogi napiyena amintiye.

Isu ababute Yerusaremi kumati wantase

⁴¹ Pigoya, a'ya'ma kabu yagaba anoge abage Yerusaremi wama, Isureyo kina iyo'maenti kana aboraoginisi wantase. Pi i'mu punta ntaga nkagewapa Pasoba naninta nakena yagawe. ⁴² Pigoya, Isuba nagisarisa tara tumpaema kabu miyomekana, kana i'mu pumeti ababute wantase. ⁴³ Wama mintusuguni, pigo i'mu taenaba iso'ma nagaitegini, wa'ewaiti wauguna kana yagarantoba Isuba pabi Yerusaremi mintantiye. Aeba mintoginisi anoge abageba: Aokinake wagasayema, napiima wantase. ⁴⁴ Wausuguna, ka yaga a'ya waoginisi aguyosakate, to ka'isa aokina ibigausuguni: Kampaye, untawé. ⁴⁵ Piya yugunisi to a'wae puma Yerusaremi kumati to wama aguyosagantase.

⁴⁶ Aguyosagausuguna, kakaga yaga a'ya waoginisi mono namapinti asu agama abatantase. Pigoya, aeba ka'isa mono tisa kinake mintogini, ka'isa kamana abigauguna aeba yume kamanapa aogima a'wae puma uwaimintiye. ⁴⁷ Piya uwaimogini abite a'ya'ma pi kina'miba pamii puntawé. ⁴⁸ Piya pugunisi, anoge abageba kana kamana abite pamii puntase. Pigoya, anowampa maya omintiye: Yagarawo, nanaga piya pekara tasigeba kaguyosa'ma tasu nkairaporuse, piya untiye. ⁴⁹ Piya yogana Isu maya omintiye: Nanaga naguyosagase. A'yugu naeba nabanempa ntamapinti kampa misanaga mintuwe, untiye. ⁵⁰ Piya yogana, anoge abage kana yome kamanapa isigeba kampa aogima abintase.

⁵¹ Pigoya, Isu aeba isigege irosa'ma Nasareti kumati wama isige kamana abibebe puntiye. Piya pogana, anowampaba kanaenaga napi napi puntiye. ⁵² Aibogana, Isuba aupe napiyenawape anosaogini, wasanamibe Kotibe agauguna aogi puntiye.

3

Yoni Koti ntuga agobintiye

(Matiyu 3:1-12; Maka 1:2-8; Yoni 1:19-28)

¹ Pigoya, Aroma kina'mi kiye yagara, agewapa Taebiriyasi, aeba nagisa ka'amu kabu kabiwaitama miyogana, Pontiyasi Pairati Yutiya mara kabiyogana, Erotiba Karariya mara kabiyogana, a'nantowampa Piripiba Ituriya mabe Tarakonaitisi mabe kabiyogana, Arisaniyasiba Abirini mara kabima mintoginisi, ² pigo Anasige Kayapasigeba mono kiye yagarara mintantase.

Pigoya, pi kanabi Koti kamanapa Yoniti tumintiye. Kana yagaraba Sekaraya ntagara-gana ka'me mpari mima, pi kamana abintiye. ³ Abigaite, a'ya'ma Yontani waninkama maroteri materi nasima maya uwaimintiye: Aguntaenaripa kaitegiripa a'wae puma wani pasigina, Kotiba aguntaenaripa maerigaikiye, uwaimintiye. ⁴ Pigoya, poropete Aisaya pika kamana agoba pai maya uma kaemarantiye:

Awaga kamana ukena yagara ka'me mpari mima kega'e uma mayama aboraye:
 Wa'egawamanta ke i'ma, arupu puma amuyena piyo, iye.

⁵ Aigubunta'enaba ku'ma amuyena pumagiri, a'ya'ma tabe amupe amara nkamupe akusamagiri, antage nantage kipa maema asoya puma, arupu pumagiri, atumite asite punti kipa parakaba'magiri, a'ya'ma aogi piyo, iye.

⁶ Piya, a'ya'ma kinapa Koti tababuma aogi puratakena yugawapa agakibewe, piya uma kaemarantiye.

⁷ Pigoya, uwoma kina Yoniti mono wani pasikena kanauguna maya uwaimintiye: Tigeba kuya awarorawe. Koti tisa amo'ena aborarimekiri kakagaisanaga kebaya urimegiri mata'iba kanawé. ⁸ Tigeba aguntaenaripa kaitegiripa tigu a'wae pigina mono au'wapa aborakiripa, wani kanara maekibewe. We, tigeba: Abara'amu nkaga'nuraga aogima mikunemagiripa, a-ntapima yiyo. Pabigo urimekiri abiyo: Kotiba ma ntatabasa Abara'amu nkaoso aga'nugi iba pikkenaba agantiye. ⁹ Piya, ya agayukena tupa ya agobi atantiye. Pi ntawama nka kampa aogima aekanaba, agaiyuma yakupi kaekiye, Yoniba meto kamana piya untiye.

¹⁰ Piya yogini, kana wasanamibe mayama abigantawé: Taeba aya pukunema, abigauguna,¹¹ aeba maya untiye: Kai tara waintakanaba, ka yagara kaiba kampa waintakanaba ameno. Nanina waintakanaba, kampa waintakibi ntagara ka'isa ameno, piya untiye.

¹² Pigoya, ka'isa takisi maeyume kinapa kanama mono wani pasikenaga abigamagini maya untawe: Tisawo, taeba aya pusune, untawe. ¹³ Piya yuguna, aeba: Tigeba takisiba maekibe nkawa maeyiyo. Toba a-nkagasima maeyiyo, uwaimintiye. ¹⁴ Piya uwaimogini irebu kinapa kanama: Taeba aya pusunema, abigantawe. Abigauguna, aeba maya uwaimintiye: Tigeba to kinapa imiyo'enaba a-puma, yabankaipa a-mpaemagiri, kampari kotiyenaba a-puma, yabankaipa a-mpaeyiyo. Pabi ikantanari maemagiri uwa miyivo, piya uwaimintiye.

¹⁵ Piya yogini, kana wasanamiba Yoni yome kamanaka abimagini a'ya'ma pi kina'mi mayama napintawe: Aeba aobi pompe ntagara Karaisitiwema, Yonika untawe. ¹⁶ Piya yuguna, Yoni a'ya'ma kinapa maya uwaimintiye: Pigoya, ka yagara naka'i kanakibi ntagaramaba, agewapa asunagasima waintika, naeba mayamanaba agisa anapa kampa akubo agaikuwe. Piya, naeba wanitasa paititauwe. Aeba Aota Awamusatasage yaku-tasage paititakiye. ¹⁷ Aeba aka maete kanama, witi naninta ampa aigaga pumagina anonkapo namapi atantana ariwapa tayaba yakupi kaegaikiye, uwaimintiye. ¹⁸ Piya uwaimintana, Yoni to mono to mono aogi kamana uwaimintiye.

Eroti Yonipa arakurintiye

¹⁹ Pigoya, tabe kiye yagara Eroti, ae a'nantowampa nkxae Erotyasi maeyogana, Yoniba: Mantanabe to ka'isa ataenagape a-po, omintiye. ²⁰ Omogana aeba to tabera ata agi napintiye. Piya, piya yomeka Erotiba abitegina, Yonipa araku'magina iga'na namapi atantiye.

Yoni Isu wani pai'atantiye

(Matiyu 3:13-17; Maka 1:9-11)

²¹ Pigoya, a'ya'ma pi kina wani pai'itantana, Isuge pai'atantiye. Piya pogana aeba nunamu yogana, manta a'waiyogana, ²² Aota Awamus'a'ama pupunta kanta purite aeti tumintiye. Tumogana pi mantabintisa maya kamana tumintiye: Kaeba nae nabugami ntagaranekawe. Tabera na'mu pugatauwe, untiye.

Isu nkayabamagi kamanane

(Matiyu 1:1-17)

²³ Pigoya, Isu 30 kabu mimagina, yogawapa agobintiye. Pigoya, wasanamiba aekaba abugunaba Yosepe ntagara kanta puntiye.

Piya, Yosepe aeba Irai ntgararawe.

²⁴ Piya, Irai aeba Matati ntgararawe. Matati aeba Aribai ntgararawe. Aribai aeba Merikai ntgararawe. Merikai aeba Yanai ntgararawe. Yanai aeba to Yosepe ntgararawe.

²⁵ Piya, pi Yosepe aeba Matatayasi ntgararawe. Matatayasi aeba Emosi ntgararawe. Emosi aeba Neyamu ntgararawe. Neyamu aeba Esirai ntgararawe. Esirai aeba Nagai ntgararawe.

²⁶ Piya, Nagai aeba Meyati ntgararawe. Meyati aeba to Matatayasi ntgararawe. Pi Matatayasi aeba Semeni ntgararawe. Semeni aeba Yoseki ntgararawe. Yoseki aeba Yota ntgararawe.

²⁷ Piya, Yota aeba Yowanani ntgararawe. Yowanani aeba Aresa ntgararawe. Aresa aeba Serababeri ntgararawe. Serababeri aeba Siyatieri ntgararawe. Siyatieri aeba Nerai ntgararawe.

²⁸ Piya, Nerai aeba to Merikai ntgararawe. Pi Merikai aeba Erai ntgararawe. Erai aeba Kosamu ntgararawe. Kosamu aeba Erimetamu ntgararawe. Erimetamu aeba Eya ntgararawe.

²⁹ Piya, Eya aeba Yosuwa ntgararawe. Yosuwa aeba Eriyesa ntgararawe. Eriyesa aeba Yorimu ntgararawe. Yorimu aeba to Matati ntgararawe. Pi Matati aeba to Aribai ntgararawe.

³⁰ Piya, pi Aribai aeba Simiyoni ntgararawe. Simiyoni aeba Yuta ntgararawe. Yuta aeba to ka Yosepe ntgararawe. Pi Yosepe aeba Yonamu ntgararawe. Yonamu aeba Eriyakimu ntgararawe.

³¹ Piya, Eriyakimu aeba Mereya ntgararawe. Mereya aeba Mena ntgararawe. Mena aeba Matata ntgararawe. Matata aeba Netani ntgararawe. Netani aeba Tebiti ntgararawe.

³² Piya, Tebiti aeba Yesi ntgararawe. Yesi aeba Obete ntgararawe. Obete aeba Powasi ntgararawe. Powasi aeba Samoni ntgararawe. Samoni aeba Nasoni ntgararawe.

³³ Piya, Nasoni aeba Aminatabu ntgararawe. Aminatabu aeba Atimini ntgararawe. Atimini aeba Anai ntgararawe. Anai aeba Esironi ntgararawe. Esironi aeba Perese ntgararawe. Perese aeba to Yuta ntgararawe.

- ³⁴ Piya, pi Yuta aeba Yekobu ntagarawe. Yekobu aeba Aisaki ntagarawe. Aisaki aeba Abara'amu ntagarawe. Abara'amu aeba Tera ntagarawe. Tera aeba Neyo ntagarawe.
- ³⁵ Piya, Neyo aeba Seraki ntagarawe. Seraki aeba Ariyu ntagarawe. Ariyu aeba Pereki ntagarawe. Pereki aeba Iba ntagarawe. Iba aeba Sira ntagarawe.
- ³⁶ Piya, Sira aeba Kenani ntagarawe. Kenani aeba Apakisati ntagarawe. Apakisati aeba Semi ntagarawe. Semi aeba Nowa ntagarawe. Nowa aeba Arameki ntagarawe.
- ³⁷ Piya, Arameki aeba Metusara ntagarawe. Metusara aeba Inoku ntagarawe. Inoku aeba Yereti ntagarawe. Yereti aeba Ma'arariyo ntagarawe. Ma'arariyo aeba to Kenani ntagarawe.
- ³⁸ Piya, pi Kenani aeba Inosi ntagarawe. Inosi aeba Seti ntagarawe. Seti aeba Antamu ntagarawe. Piya, Antamu aeba Koti ntagarawe.

4

*Kewama Isu amiyo puntiye
(Matiyu 4:1-11; Maka 1:12-13)*

¹ Pigoya, Yontani wanipi Yoni Isu wani pai'ataogana, Awamus'a'ama agupinti pumae-wama, ka'me mpari ababute wantiye. ² Wama 40 yagaba umintogana, kewama pi nttagaba amiyo potantiye. Aibogana, naninta kampa nanta i'mintogana, aga'ena abugaogana, ³ kewama aeti aborama maya omintiye: Kaebe Koti Ntagara mintanapa, yegana ma ntabaka paretiyena pekana nao, untiye. ⁴ Piya yogana, Isu antota maya omintiye: Koti kamana'ama maya iye: Wasanamaba nanintarasaba kampa a'ya'ma esegiyenawapa maekiye, iyema, omintiye.

⁵ Piya omogana, kewamaba ababurite inati imagina, a'ya'ma mampabisa kinapa asu aro nttaganto ayakimagina, ⁶ maya omintiye: A'ya'ma ma nkesegiyenabe igaenabe nae namiwaentine. Pigoya nae napima ka'waina amikenaba amukuve. Piya, kaepa kamukuwe. ⁷ Kaeba nae nageba asagayuyegapa pi a'ya'waemaena waintintanaba kae'enaena puwaewakiye, untiye. ⁸ Piya yogana, Isu antota uma maya omintiye: Koti kamana'ama maya iye: Wa'ega Kotigapa, ae age asagayuma, ae abiwa kayokaya'ena potao, iyema, omintiye.

⁹ Piya omogana, kewama Isu Yerusaremi kumati ababute ima, tabe mono nama nkagari mesutama maya omintiye: Kaeba Koti Ntagara mintanapa, matasa pa'yō puma tumo. ¹⁰ Piya, Koti kamana'ama mayama iye: Kotiba aeba enisore kina'wa uwaitakanra kabigatama kao'maekebive, iye. ¹¹ Piya, kaegukena pukibipa, iyatasra kababute tumigina, yabankamaba kagisaba kampa arisakiye, iyema, untiye. ¹² Piya yogana, Isu antota uma maya omintiye: Koti kamana'amaba to ka maya iye: Kaeba Wa'ega Kotigapa amiyo puma agakenaenaba a-po, iyema, untiye.

¹³ Piya yogana kana amiyo'ena a'ya waogana, kewama Isupa atate migarakena wantiye.

*Isu Karariya mari yogawa agobintiye
(Matiyu 4:12-17; Maka 1:14-15)*

¹⁴ Pigoya, Aota Awamus'a'ama Isu esegiyena amogana, Karariya-i to wama yogawa pogini, a'ya'ma pi nkauka'isa kina'mi ae awaga kamanapa abintawewe. ¹⁵ Aibuguna, aeba mono namapinti imagina, kamana uwaimogini i'mu potentawewe.

*Nasareti kina'mi Isupa ikabitantawewe
(Matiyu 13:53-58; Maka 6:1-6)*

¹⁶ Piya puguna, uwaena yagaranto Isu mima anosanti mpari Nasareti wantiye. Pita'i a'ya'ma sabati yaga mono namapi ibomeka, ka yagaba ima Koti kamana aisikena asiyogini, ¹⁷ aepa poropete Aisaya kaemaranti nkisa amintawewe. Amuguna maema aparotama, maya kamana waintogana uwaimintiye:

¹⁸ Pigoya, Wa'egawamatisa Awamus'a'ama nae nantabinti tumegina, aogi kamana uwa kina uwaimo unatantiye, iye.

Piya, to wainaga araku'ma upebe punta kinapa atagana wanoma, iyorikaenta kinapa iyogawai taoma, atabi mpiye kinapa aogima mikibewe, uwaimomagina, naisagagi tumuwe, iye.

¹⁹ Piya, Wa'egawamatisa Awamus'a'ama nae nantabinti tumegina, aogi kamana yoma unatagi tumuwe, iyema, Isu esapisa kamana piya untiye.

²⁰ Piya ugaitegina, aeba kana esa akarakima amome ntagara amite mara'miyogini, kana mono namapi mintume kina'miba: Ae kamana'wa ukena piye, utegina, iyoba araga aragama agauguna, ²¹ aeba mayama agobima uwaimintiye: Ago uriminta kamana au'wapa ibanto aboragiri abewe, untiye. ²² Piya yogini, igebe awamupisa iga

kamana'wapa abima pami pumagini: We, aeba Yosepe ntagarawewe. Ayamabaya aogi kamanapa iye, untawe.

²³ Piya yuguna, Isu maya uwaimintiye: Tigeba obisobi kamana naeka maya yepa: Tusa yagara kae kauka aogi pega kagano. Piya, Kapaniyamu kumata yoga puntampe nkawaga kamana abune. Pabiyyama magata pega agano, piyama nabigakibewe, uwaimintiye.

²⁴ Piya uwaimintana Isu to maya untiye: Naeba taga kauwe. Koti unti kamana yemi poropete yagarama kamana'wapa mawatasata kina'miba kampa abima aegarakibewe.

²⁵ Pigoya, naeba tagaka urimunu. Iraiy mintome kanabi, kaboba kakaga pumagina opa tonaentisa ka'umaema u, kampa ka aemagina, pa tawaogana kaboba tabera pumagina, a'ya'ma kina iga'enaba tabera ibuntiye. ²⁶ Ibogini, pi ntaga Isureyo abeya waepa uwoma mintuguna, igetiba Koti Iraiyapa kampa agarubantiye. Ae'wa nkaokinatiba kampa agarubantiye. Aepa Saironi mara Sarepata kumati ka namu'isa abeya waeti agarubaogana, wama naninta nantiye. ²⁷ Piya Iraisa mintome kanabipa, Isureyo mara uwaena karu kina mintuguna, kampa ita wantiye. Piya, ka Siriya marisa yagara, agewapa Naemani, abiwapa Iraisati waogana kaba ataogana anamopa ata wantiye, Isu piya uwaimintiye.

²⁸ Piya uwaimogini, a'ya'ma mono namapinti mintume kina'mi ka abi'ma, ²⁹ pi kina'miba kumawaitisa agarubakena pumepa irosa'ma ige kumati amuti ababute ima au'yari apasanakaikena puguna, ³⁰ aeba abakapinti uwigasi ankigasi putagina wagaintiye.

Isu ka yagarama nkantabintisa ke kina agarubantiye

(Maka 1:21-28)

³¹ Pigoya, Isu Karariya mari tumima, Kapaniyamu kumata wantiye. Wamagina sabati yagaba waya'wa kamana uwaimintiye. ³² Kana kamana uwaimomepa kiya kina'mi yumesa kamana yogini abite pami puntawee. ³³ Pigoya, pi mpono namapinti ka yagara, ke kina antabapiinti minta yagara, aege mintuguna, aeba tabera kega'e uma maya untiye: ³⁴ We Isuguba, Nasaretirisa yagaragawee. Taegukena kanapaya, nana puratakena kanane. Piya, naeba ago abopa, kaeba Kotitisa aota yagaragawee, piya untiye. ³⁵ Piya yogana, Isu ka abi'ma maya omintiye: Paka pumagina, atate irosa'ma wagaso, omintiye. Omogana, ke kina'maba kana yagara apasara pomepa, kampa aupa airisanta uwa irosa'ma wagaintiye.

³⁶ Piya pogini, kana pi kumata mintume kina'miba pami pumagini, mare-u me-u puma maya untawe: We, aeba nana kamana iye. Aeba esegiyenawapisa kiya kina'mi usu kamana uma ke kina uwaitagini atate wagasawee, piya untawe. ³⁷ Aibogini, pintana pome kamanapa urite, a'ya'ma pi mari wagana kana puntawee.

Isu Pita aentawampa aogi potantiye

(Matiyu 8:14-15; Maka 1:29-31)

³⁸ Piya puguna, mono namapisa iro'ma, Saimoni ntamapinti iyomepa Saimoni aentawampa nkau yaku taogana mintogana, Isu yoninkapa: Kaba ataoma, abigantawee.

³⁹ Abigauguna, aeba agora ampagina yoninkapa: Ata wao, yogana ata wantiye. Ata waogana, kana wae'maba asima naninta maema imogini nantawee.

Isu uwoma kina aogi puwaitantiye

(Matiyu 8:16-17; Maka 1:32-34)

⁴⁰ Pigo papa tupasikena pogana, ka'isa iyokina'miba tonarona inu ibome kinapa ibabute kanagana puguna, Isuba a'ya'ma i'nota ayapa ataogana, ita wantiye. ⁴¹ Piya pogana ke kina wasanami nkintabaiintisa igarubakasogini, igebe irosa'ma kega'e uma: Kaeba Koti Ntagaragawee, untawe. Pigoya igebe: Isu aeba Karaisiti yagarawema, napiyuguna, to mare-u me-u pusanaga akunkitantiye.

Isu Yutiya mari nasima kamana uwaimintiye

(Maka 1:35-39)

⁴² Pigoya, Isu abayara itate ka'me mpari waogini, ka'isa kina'miba aguyosa'ma aeti wamagini: Taege mikibene, uma arakuruguna, ⁴³ aeba maya uwaimintiye: To ka'isa kumatiba naeba Koti kabiratakena aogi kamanapa uwaimoma unatagi kanauwewe, uwaimintiye. ⁴⁴ Piya uwaimite Yutiya mari mima, a'ya'ma auka'i mono namapinti kamana uwaimita nasintiye.

¹ Pigoya, ka yagaba Isuba Kenesareti kotu nkawamori umima Koti kamana yogini, wasanamiba ampa aki puma airakiraki puma ampa abintawe. ² Piya puguna Isu agaomepa, wanipisa kare tara kotu nkawamori waintusuguni, kana inoyanta aeyume kina'miba iro'ma tumima kuko wanipi aemiyuguna, ³ aeba Saimonintana wanipisa karebi ima asu mintana, Saimoni maya omintiye: Awamorisaba paibumanto pubasa naigina wano, yogini pubasana'ma metauguna, aeba kana wanipisa karebi mara'mima pipisa a'ya'ma awamori mintume kinapa mono kamana uwaimintiye.

⁴ Piyama kamanan uwaimitegina, Saimonika maya omintiye: Tigeba wani nkakanti wamagiri, kana kukotipa metama inoyanta aeyiyo, untiye. ⁵ Piya yogana, Saimoni maya untiye: Tabé Yagaramawo, taeba asekapa tabé yuga pumiyompepa, kana inoyantaba kampagi aeyune. Piya pompeka, kae yempekaba kukopa atama agakune, untiye. ⁶ Utetina, kopa wanipinti motantawe. Piya pumepa, uwoma inoyanta ira'waiyogini, kana kupa kunta puma ae'mutikena pogana, ⁷ igeba iyokinaka to ka wanipisa karebi mintuguna, kega'e yuguni, kanama ampa iyo'maema, tarayaga wanipisa karebi uwaena atauguna, kana wanipisa kareba kunta puma ipirintakena puntase.

⁸ Piya pogana, Saimoni Pitaba pintanaba agategina pami pumagina, Isu nkagisabi arakabima parokaema maya untiye: Naeba uwa agunta yagara mintuwe. Wa'ega Yagara, kaeba uwa natate wao, untiye. ⁹ Pipa nanagawanane. Inoyanta maeyumeka aekuru pogini, pi aokina'mibe pabiyama iyekuru puntawae. ¹⁰ Piya pogana, tara yagarara Yemisige Yonigeba, Sepeti ntagara tara, isigegeba isiyekuru pusuguna, Isu mayama Saimoni omintiye: Kaeba a-kaekuruba po. Aintiba inoyanta aeyempesa puma wasana iba pikibene, piya omintiye. ¹¹ Piya omogini, igeba wanipisa kareba pubasanama kepiyati me nkatama, a'ya'waemaenawaipa kaite Isu nkaegarantawe.

*Isu karu yagara kaba atantiye
(Matiyu 8:1-4; Maka 1:40-45)*

¹² Pigoya, Isuba ka kumata mintogana, ka yagaraba a'ya'ma aupintiba karuyena abome ntagarara Isu agate, aowarisa mabi parokaema maya untiye: Wa'egawo, kaeba kabemika kaba natakena puntanapa aogi punatao, untiye. ¹³ Piya yogana, Isu aya parosuma auta u'ma maya untiye: Piyaenaga nabiyete, untiye. Piya umagina: Pabigo kata wakana aogima miyo, untiye. Piya yogana, pabi ntaga kana karuyenawapa atawantiye. ¹⁴ Atawaogana Isu esegima maya omintiye: Kaeba uwa kinapa a-nkuwaimima, marupa wama kaupa mono kiye yagara uma ayakegana agano. Piya, kata wamikaba pai Moses uramintintanaba Kotiti amegini, wasanamiba kagate: Aoso yagara miyema napikibewe, piya omintiye.

¹⁵ Aibogini, a'ya'ma Isu pomentanaga wasanamiba mare-u me-u puta nasuguna, uwoma kina ampa kamana abekana yonintanaba kaba atagaikiye, piya uma aeti kanantawe. ¹⁶ Aibuguna, pabigo itategina ka'me mpari wama nunamu untiye.

*Isu agisa aya pu'wanta yagara kaba atantiye
(Matiyu 9:1-8; Maka 2:1-12)*

¹⁷ Pigoya, ka yagaba Isu mono kamana uwaimima yogini, Karariya marisabe Yuta marisabe Yerusearem kumatasesabe, ka'isa Parasi kinake kamana ago abinta kinake, igeba pitisa kanama wasana abakapi ampintantawe. Ampintuguna, Wa'ega Yagaramapisa yoni kaba itakena esegiyenawapa Isu ago maentiye.

¹⁸ Piya maeyogana, ka yagaraba agisa aya pu'wanta yagara, ka'isa kina'mi wasa yara wasirite kanamagini, Isu nkagora me nkatakene kanaumepa, ¹⁹ namapa pumaewaunguni, kupa kampa tantiye. Aibogini, kana yagara wasirite nama nkabobori imagini, asu akuritama, pita'isa motauguna tumima Isu nkagora tumintiye. ²⁰ Tumogana, Isu imatiti'enawai aeti ataume igantana maya untiye: Nao'anto, naeba aguntaenagapa maegagasuve, omintiye.

²¹ Omogini, ka'isa mono tisa kina'mibe Parasi kina'mibe pi kamana abintimi, mare-u me-u puma maya untawae: Ma ntagaraba Kotika anagiyenaba usuyenaba, aeba nana yagarawae. Koti ae abi aguntaenarepa maeragaikiye, untawae. ²² Piya yuguna, Isu kana napiyenewai nkigate maya untiye: Tigeba nanaga tigebibpa napiyewe. ²³ Nanaenama kunta piye. Pigoya, naeba: Aguntaenaga maegagasuve, yokabera: Asima wao, yokawe. Asima wao, yekana, kampa asima nasekiripa kagi punatakibewe. ²⁴ Pigoya, tigeba abiyo. Wasanama Ntagara naeba ma mpabi aguntaena maerigaikena esegiyenanepta waintiye. Pi nkinuntana naeba agarubakiri agamagiri, aguntaena maerigaikena esegiyenanepta napiyivo, uwaimintiye. Piya uwaimintana, a'wae puma agisa aya pu'wanta yagaragaba maya omintiye: Naeba ugamoto, kaeba asima wasagapa aesagabite wa'egati waoma, omintiye. ²⁵ Piya omogana, karu'ena asima waitamiyome wasawapa aesagabite wa'ewati

wantana, Kotiti a'mu potantiye.²⁶ Piya pogini, uwoma kina'miba agate pami puma, Koti nkage asagayuma: Ibasa yagaba nanabaya agaune, untawe.

*Isu Aribaika kega'e untiye
(Matiyu 9:9-13; Maka 2:13-17)*

²⁷ Pigoya, pabi ntaga togana Isuba waomepa, takisi maeyome ntagara, agewapa Aribai, takisi opisibi mintogana, isu: Ampa naegarao, omintiye. ²⁸ Piya omogana, asima a'ya'waemaenawapa atategina wama Isu nkaega'ma wantiye.

²⁹ Aega'ma wama, Aribai namankapi tabe naninta Isupa kaema amintiye. Piya pogini, uwoma takisi maeyume kinape to uwa kinape isigege ampa mara'mima naninta nantawe.³⁰ Piya puguni, Parasi kina'mibe mono tisa kina'mibe Isu abagi kinaka uwoma kamana maya untawe: Nanaga takisi maeya kina'mige to aguntaena pe kina'migeba igebe nanintaba newema, abigantawe. ³¹ Piyama abigaunguna, Isu maya untiye: Wasanami kampa yoni nkibemi kina'miba tusa yagaramati kampa wawe. Yonintana ibemi kina'mi mana igeba wawe. ³² Piya pemisa puma: Aogi kinatawe, ye kinapa aogi puwaitakenaba kampa tumintuwe. Naeba agunta kina igu a'wae pikibeka uwaimikena tumuwe, piya untiye.

*Naninta a'a-o uma i'mikena kamana abigantawe
(Matiyu 9:14-17; Maka 2:18-22)*

³³ Piya yogini, kana wasanamiba Isuka maya omintawe: Yoni nkabagi kina'miba uwoma ntaga nanintaba kampa nanta, a'a-o uma nunamu yewa, Parasi nkaokina'migeba pabiya pewe. Pigoya kae kabagi kina'miba nanintabe wanipe asi nasi a'yugu nawe, piya omintawe. ³⁴ Omuguna, Isu maya uwaimintiye: Pigoya, wasanami iba'ena puntimiba, a'ya'ma kina'miba nanintaba kampa a'a-o ukibewe. Igeba naninta naiginaba, iba'wae'ma nkawawempa uwa mikibipa, pipa kanarane. ³⁵ Pigoya, ainti iba'wae'ma nkawae ampa arakurite ababute to mari wagasiginiba, pi ntangaba ao'miba intara puma kampa nanita nanta uma mima aeka napikibewe, untiye.

³⁶ Piya untana, Isu meto kamana pika maya uwaimintiye: Wasanama abara kai atugekanaba, to aoso kairasaba kampa kasama pitapa motama pugunikiye. Piya pukibipa pi abara kai to atu'wakanaba, ka aogi kai kampa waikiye, untiye.

³⁷ Piya untana to maya untiye: Piya, wasanamaba kasa waini wanipa paisa yaga au'aribi kampa arigikiye. Piyama paisa yaga au'aribi arigikibemipa, namagima aiguri-wakiye. ³⁸ Piya, wasanamaba kasa wainina pabi kasa yaga au'aribi arigiye. ³⁹ Pigoya, wasanama paisa waini nagaiteginaba, toba kasa wainigaba kampa abiye. Aeba: Paisaenarepa aogiyenawe, iyema, Isu piya uwaimintiye.

6

*Sabatiga abigantawe
(Matiyu 12:1-8; Maka 2:23-28)*

¹ Pigoya, ka sabatirapa Isu witi yugabinti waogini, abagi kina'wampi kana witiba maema iyasama nantawe. ² Piya puguna, ka'isa Parasi kina'miba igate maya untawe: Tigeba sabatirapa akumparanta'enaba nanaga piyaba pewe, untawe. ³ Piya yuguna Isu maya uwaimintiye: Tigeba kampa napiyewo. Tayabama Tebitige aege miyume kina'mige iga'ena ibogana puntikaba aismagiri kampa abewo. ⁴ Aeba Koti mpono namapinti ima, Kotika napima ataume paretiasu maentiye. Pigoya, pi paretiba uwa kina'miba kampa nakenawe. Mono kiye kina'mi ibiwai nakena atanta paretiasu maema akobuma, a'ya'ma uwa aokinapa imogini nantapa kanarane, piya untiye. ⁵ Piya untana, Isu to maya untiye: Wasanama Ntagara naeba pabiyama sabatirapa kabima miyuwe, piya uwaimintiye.

*Isu aya pu'wanta yagara sabatira kaba atantiye
(Matiyu 12:9-14; Maka 3:1-6)*

⁶ Pigoya, to ka sabatirapa Isu mono namapinti ima kamana uwaimogana, ka yagaraba ayatakantisa pu'wanta yagara mintogini, ⁷ ka'isa mono tisa kina'mige Parasi kina'mige, Isuba ago napiyenerawaipi igategina, kana aya pu'wanta yagara: Asitaigina mata'i iyeno, yogana, aeba asima ikapi intiye. ⁹ Iyogana Isu maya uwaimintiye: Naeba tibigauwe. Sabatira ago kamanapa nanawie yie. Wasana sabatira aogi potakupera ataena potakune. Ao'maeupupera aegukunema, ibigantiye. ¹⁰ Piya untana, a'ya'ma kinapa mare-iga me-iga puntana, kana yagaramaka maya omintiye: Kayapa aparotano, omogana, karu'ena kana ayapa aparotaogana atawantiye. ¹¹ Piya pogini, kana kina'miba agate intabi ikimagini: Isupa nana potakunema, napintawe.

*Isu nagisarisa tara tumpaema kina ibabuntiye
(Matiyu 10:1-4; Maka 3:13-19)*

¹² Pigoya, pabi ntaga Isuba nunamu ukena amuti iyogana, ase yogana, pabi nkasen-abinti Kotiti nunamu untiye. ¹³ Piya yogana marogana, aeba abagi kinaka igege'a yogini kanauguna, nagisarisa tara tumpaema aisuwaitama, igewaipa aposorowe uwaitantiye. ¹⁴ Piya, igewaipa mayamawe: Saimoni aoso ominti nkagiwapa Pitawa, ae a'nanto Enturuwa, Yemisiwa, Yoniwa, Piripiwa, Patoromayowa, ¹⁵ Matiyuwa, Tomasiwa, Aopayesi ntagara Yemisiwa, namu'isa kiya kina igarubakaikena abugai ntagara Saimoniwa, ¹⁶ Yemisa ntagara Yutasiwa, ainti Isu minaga'ena punti ntagara Yutasi Isikeriyotiwa, sumagini, abagi puntawe.

*Isu uwoma kina aogi puwaitantiye
(Matiyu 4:23-25)*

¹⁷ Pigoya, ibaburite igege amutisaba tumima, amura tumpa irosa'ma mintuguni, tabe uwoma abagi kinape tabe uwoma Yuta kinape Yerusaremi kinape, wani nkagorasa Taya kinape Saironi kinape, me nkaki puma kamana'wa abima yonintanawai mae igaikenaga uma aeti aki puntawe. ¹⁸ Aibuntini, ke kina intabinti mintome kinapa kanauguna, agaruba igaintiye. ¹⁹ Piyamaba esegiyenawampa iyo'maeyogini, a'ya'ma kina'miba: Yonintanarepa tatawakiyemanapimagini auta ukaya puntawe.

*Isu a'mu kamanape antara kamanape untiye
(Matiyu 5:1-12)*

²⁰ Piya puguna, Isu abagi kina'wa igau'ma maya uwaimintiye:

We, kusi miye kina, tigeba Koti kabiritakiri, ti'muntanabi mikibewe.

²¹ Tigeba tiga'ena tibemi kina'mitaba, aintiba tiga'e pakiri, ti'muntanabi mikibewe.

Tigeba ibaba kube'ena puma miye kina'mitaba, aintiba kagi pumagiri ti'muntanabi mikibewe.

²² Piya, Wasanama Ntagara naeka wasanami kama puritama aruyenabisa tigaruba'magini karibi'ma agunta kamana tigeka uritaigiripa, tigeba ti'mu piyo. Ti'muntanabi mikibewe. ²³ Piya, aintiba aogi ikantanaripa mantariba taberaka'yane. Pika pi ntangaba ti'mu puma tinta asoya puma miyivo. Paipa iyabamagipa pabiyama poropete mintanta kinapa karana puwaitantawe.

²⁴ Mone tabe kuta ntaga kina, tigeba ikantanaripa ago maeyawe. Aintiba toba kampaye. Tigeba ataenabi mikibewe. Pika tintara piyo. ²⁵ Pigoya, ibasa yaga tabe nakena nata nase kinapa, tigeba aintiba tiga'ena tibikiye. Tigeba ataenabi mikibewe. Pika tintara piyo. Pigoya, ibasa yaga kagi pe kinapa, aintiba tigeba kube'ena pigina tiyo'nu tumikiye. Tigeba ataenabi mikibewe. Pika tintara piyo.

²⁶ Pigoya, tige maete ima i'mu puritaigiri, tigeba kampa aogima mikibewe. Paipa pi kina'mi nkiyabamagi kumpari poropete kinapa pabiyama i'mu puwaitantawe.

*Isu kama kina aogi puwaitakena kamana untiye
(Matiyu 5:38-48)*

²⁷ Pigoya, naeba kamana'ne abe kina mayama urimuwa, abiyo: Tigeba kama kinatipa agu kao'ena puwaitantiri, imo purita kina aogi puwaitaiyo. ²⁸ Karibi'ma ata purita kinapa ti'muntanaba puwaitaiyo. Karana purita kina igecka napima nunamu yiyo. ²⁹ Pigoya, wasanama amo pugatama, ka katamara kaeguyekanapa, to ka auka'i a'wae puma amo. Piyamaba wasanama mu'mu kaiga maeyakanapa, a-kamopa puma, uwa atamagina to ka kai maekenaba a-nkakuno. ³⁰ Pigoya, wasanama ka'enaga esugatakanapa, amo. To wasanama ka'isaenaga maeyakanapa, to namomaba a-nkabigao. ³¹ Pigoya, tigeba wasanami purataiyema tibikibintanaba, pabi nkawameta igepe puwaitaiyo.

³² Piya, tigeba agu kao'ena purita kina ige'amana agu kao'ena puwaitaiginaba, aintiba aya iretaripa Kotiba timikiye. Pipa kampaye. We, agunta kina'miba iyokinapa antota agu kao'ena puwaitawe. ³³ Pigoya, wasanami aogi puritaigiripa, tigeba piyama aogi puwaitakibepa, nana ti'muntana maekibewe. Pipa kampaye. Pabi ata kina'mige pabiyama puwaitawe. ³⁴ Pigoya, iretaripa antota timikibe kinapa ireta imikibepa, ti'muntanaba nana maekibewe. Pipa kampaye. Piya pesa puma, ata kina'miba to a'wae puma ata kinapisa ireta maekena pewe. ³⁵ We, tigeba kama kinati kayone pumagiri, aogi puwaitamagiri, aogi puwaitakibentanabe imikibentanagabe antota maekenaba a-ntapiyiyo. Piya puntiripa, inatisa Tabé Yagarama ntagaraena piginaba, aintiba tabe ikantanaba timikiye. Piya, aeba wasanaba igama aekita kampa puwaitikana, uwa a'yugu kinape kampa i'mu pe kinape uwa iyo'maema, aogi puwaitaye. ³⁶ Pigoya, inatisa tibarimpaba antara puritamisa puma, wasanaga tintara puma iyo'maeyiyo, Isu piya untiye.

*Antota kamana a-nkuwaitaiyo, untiye
(Matiyu 7:1-5)*

³⁷ Piya untana Isu to maya untiye: Tigeba to wasana upi pima kamana a-nkuwaitaiyo. Kampa uwaitakibepa Koti tigepa pabiyama antota kamana kampa uritakiye. Pigoya, tigeba wasana aguntaenabipa a-nkitaiyo. Kampa itakibepa, Koti tigepa pabiyama aguntaenabipa kampa titakiye. Pigoya, tigeba aguntaenawai mae igasiginaba, pabiyama Koti aguntaenaripa maerigaikiye. ³⁸ Pigoya, to kina ka'isaena imiginaba, Kotiba pabiyama agiyenaba timikiye. Wasana kopa aigire pumagina awaitawamisa puma, Koti tabe puma agasiya timikiye. Piya, pabi imikibe nkawameta Kotiba a'wae puma timikiye, Isu piya untiye.

³⁹ Piya untana, Isu amato puma meto kamana maya untiye: Aorikaenta yagaramaba to aorikaenta kinapa ayama kepa ayakikiye. Pipa kampaye. Kampa ayakekinisi, isigeba kaga a'abibintiba aesama isiyegukiye. ⁴⁰ Piyama, abikena namapisa kina'muba kampa tisa kina'wapa asugasaye. Kampaye. Aeba urintanaba togana pabi tisawama pemisa pukkiye. ⁴¹ Pigoya, kao'yagarama nkaobipa i'nintanta waintakanapa, ayama agantana, kaeka kaobi ya atu waintakanapa, nanaga ae aogi potakenaga napiyene. ⁴² We, kumpari kina, kaeka kaobi ya atu waintemipa, kaeba ayama kao'yagaragaba mayaba omegana aogi pikkiye. Nao'yagara, kaeba abintaga, kaobisa i'nintanaba maegagasanoma, omegana aogi pikkiye. We, kaeka kaobi ya atu waintemi, pipa marupa maegaite aogima agantana, kao'yagarama nkaobisa i'ni maegasanova aogi pikkiye, Isu piya untiye.

*Ata yage aogi yawama kamana untiye
(Matiyu 7:17-20; 12:33-35)*

⁴³ Piya uwaimintana Isu to maya untiye: Aogi yawamaba kampa ata yamankapa aeye. Piya, ata yawamaba aogi yamankapa kampa aeye. ⁴⁴ Pigoya, a'ya'ma yamanka'ama aboragiripa, agowapa abewe. Piya, wasanamiba akenanaenabintisa kampa piki yamanka asikewe. Kabuyenarasaba kampa waini yamanka asikewe. ⁴⁵ Pabiyamaba aogi yagaramaba agupintiba aogi napiyenawapisa aogiyenaba piye. Piya, ata yagaramaba agupipa ata napiyenawapisa aeba ataenaba piye. Piya, agupi awaitanti'naba awamupisa irosaye, Isu piya untiye.

*Tara namaka meto kamana untiye
(Matiyu 7:24-27)*

⁴⁶ Pigoya, to kamana Isu maya uwaimintiye: Tigeba naeka: Wa'egarekawe, Wa'egarekawe, untiriqa, nanaga nae yo kamanapa kampa abima wasiyewe. ⁴⁷ Piya, naeti kanakibemi kina'maba kamana'ne abima wasikibipa, aepa nanara awame pusuwe. Mayama waintiye: ⁴⁸ Ka yagarama nama kikena puntanaba, maruntana puma, tako aema'ma mabinti aibirintama aegasima, u takaitasa nama kimaragina, wani pa'ma akasabakena pugagategina, esegi puwagina kuruyenaba kampa punta uwa waiye. Piya, aeba tonkiya puma kimarantkiye. ⁴⁹ Pigoya, wasanama nae kamana abintana kampa wasiyemipa, aeba piyama wasanama amunta yarasa nama kimaraogana, wani pa'ma ata pogana karu'ena kana namapa akasakasu pa'wantiye, Isu piya untiye.

7

*Isu ka kayokaya yagara yoninka kaba atantiye
(Matiyu 8:5-13)*

¹ Isu aeba wasana mono kamana a'ya uwaimitategina Kapaniyamu kumati wantiye. ² Pita'i namu'isa irebu kina'mi kiya yagarama, ae kayokaya yagara purikena puma mintantiye. Pigoya, kana tabe yagara pi ntagaraka abogana aogi puntiye. ³ Piya pogana, kana irebu kiye yagara Isu nkawaga kamana abite, Yuta kina'mi paitakena kina'mi igaruba'magina: Isuti wama kayokaya yagarane yonintanawapa atanawema, uma omiyo, uwaimima igarubantiye. ⁴ Pigoya igeba Isuti wama esegi kamana maya uma omintiye: Taeba kiya yagara aeka abokana aogi piye. Pika kamana'wapa abo. ⁵ Aeba agu'wapa Yuta kina taeti waiye. Pigoya, mono nama aboranemaba, aewa monepa ataogana kanarasaogana abora tamintiye, omintawe.

⁶ Piya uma omuguna Isu abite igege wantiye. Wama kiya yagarama ntamata irosakena pogana pita'isa aokina uwaitaogini, kanama Isu mayama omintawe: Wa'ega, naeba tumima mintakina mintogana, pegina kaeba a'yugu puma namantepintiba ubasikibene. ⁷ Piya, naene abogana kampa aogi pegi, kaeti ikenakaba kunta puwe. Piya, kaeba pita'i uwa mima kamana yegana kayokaya yagaranepa kabareno. ⁸ Piya, naeba ima minta kina'mi nkiwamu wasimagi, to ka'isa tumima minta irebu kina'nepa kabiyuwe. Piya, igetisa ka'wainapa: Wao uma omekanaba wakiye. To ka pa: Kanao, yekanaba

kanakiye. Kayokaya yagarane: Pi ntuga po, yekanaba pikiye. Piya, kiya kina'mi yosa puma yeganaba atawano, untiye.

⁹ Piya yogana, Isu pi kamana abima kiya yagaraga napi napi puntana, a'wae pumagina a'ya'ma aega'ma kanaume kina'mipa mayama uwaimintiye: Naeba urimekiri abiyo. Isureyo kina, tigetiba ma ntgararama nkamatiti'ena piya awametapa kampagi agauwe, uwaimintiye. ¹⁰ Piya uwaimogini, kiya yagarama aokina'miba a'wae purite namapinti ima, kayokaya yagara yoninka ata waogini agantawe.

Isu ka yagara purintapisa asitantiye

¹¹ Pigoya, to ka yagaba Isu to ka kumapa agewapa Neni, pita'i waogini, abagi kina'wape wasana uwoma to kinape aege wantawe. ¹² Pigoya, wa'e ikibi kabera uma irosaogini, purinta kina ka wasi maete tumintawe. Kiya wae'ma ntagara ka'anto mima purintiye. Piya, ae kumatisa uwoma wa wayapa kaikena tumi puntawe. ¹³ Tumi puguna Isuba pi kiya wae agama antara potama: A-kube'enaba po, omintiye. ¹⁴ Piya omogini, wasana wasaba wasi u'ma mintuguna, Isu mama wasa aukaya puma maya untiye: Masimabiwo, naeba ugamoto kaogama asiy, untiye. ¹⁵ Piya yogana, purintapisa asimagina kamana untiye. Pigoya Isuba anowampage miyenema amintiye. ¹⁶ Piya pogini, wasanamiba agate iyekuru pumagini, Kotiti i'mu puma maya untawe: Poropete tabe yagara abakatepi aboranti mintiye, untawe. Pigoya ka'isamiba to maya untawe: Kotiba aokina tae tao'maekena kanaye, untawe. ¹⁷ Piya, awaga kamana Yutiya maribe to ka'isa maribe wagana kana puntiye.

Isu Yoni nkabagi yagarara kamana uwaisimintiye

(Matiyu 11:2-19)

¹⁸ Aibogana, Yoni mintogini, ae abagi kina'mi: Isu piya mayaena pome, pi kamana omintawe. ¹⁹ Pigoya pi kamana abite, tara yagara: Wa'ega maya uma abigaisema, isigarubantiye: Karaisitiba kanakiye untapa, kaebera, to ka'wainaka agawa pukupayawee, uwaisitaoginisi, ²⁰ Isuti wamaginisi irosa'ma maya untase: Yoni mono wani paitakena yagarama maya uma tasigarubaye: Karaisitiba kanakiye untapa kaebera, to ka'wainaka agawa puma mikune, iyema, abigantase.

²¹ Pigoya, Isu aeba pi ntaga to yoni kinapa kaba itantana, keba igaruba igaintana, iyorika kinapa iyo agaitantana puntiye. ²² Piya poginisi isigeba uma irosa'ma abigausuguna mayama uwaisimintiye: Tisigeba wamagirisi agama abeme kamana. Yonipa maya omiso: Iyorika kina'miba iyo agawe. Ka miyaba kina'miba ke'i nasewe. Karu kina'miba kabarewe. Aibo kina'miba kamana abewe. Purinta kina'miba iyo agama asiyewe. Kota kampa wainta kina'miba aogi mono kamana abewe, omiso. ²³ Piya, ka'waina naeka abima aekita kampa pikibi'naba, a'muntanabi mikiye, uwaisimite isigarubantiye.

²⁴ Pigoya, Yoni nkao'yagara taraba a'wae puma wausuguna, Isu aeba wasana mintume kina'mi igepe Yonika maya uwaimintiye: Tigeba ka'me mpari nana agakena wantawe, a. Misa ka'waina pontawama maete wate kanate pogiri agakena wantawe, a. Piyaba kampaye. ²⁵ Piya, ka yagara aotasaena aogiyea wantaga mintogiri agakena wantawa, a. Piyaba kampaye. Wasana aotasaena aogiyea maema miye kina'miba igeba kiye yagarama nkaogi namapi mima pita uwa miyewe. ²⁶ Pigoya, poropete ka agakena wantawe. Owe, piya naeba urimekiri abiyo. Wasana aganta, aeba poropete ka'isa kina'mi awametapa kampaye. Aeba to awametane. ²⁷ Aeka kamana awa'ena Koti yagarawapa maya omintiye: Naeba kayokaya yagarane otagana, ae paitagatama ke i'ma aogi pugatakiye, piya untiye. ²⁸ Pigoya, naeba urimukuwa, abiyo: Waya'matisa aboranti'na ka'wainaba Yonipa kampagina againtiye. Pigoya Koti kabiratakibi kanabipa tumima minta kina'nempiba Yonipa agaikibewe, Isu piya untiye.

²⁹ Piya, aeba piya yogini a'ya'ma uwa kina'mibe takisi maeyume kina'mibe abimagini: Koti pikibemintanaba aogiye nawe, untawe. Pigoya pi kina'mi Yoniti pai wamagini, mono wani maenta kina mintantawe. ³⁰ Piya, Parasi kinake kamana ago abinta kinake igeba Koti uwaimomentanaba: A'a-o, untawe. Pigoya, pi kina'mi Yoniti wama, mono wani kampa pasume kina'miba igeba Koti kamanapa: A'a-o, otantawe.

³¹ Pigoya Isu to maya untiye: Mamparasa kina tigekaba kegita awame pusuve. Nanarane. ³² Tigeba yagara araga piyamawe. Igeba kumati mimagini iyo'mi mayama uwaimewe: Ini yokiripa, nana piyema kampa wa'enaba pewe. Tantara'ena puma kube'ena pokiripa, nana piyema kampa tao'maeyawe. Tigeba pi nkawametane. ³³ Yoniba mono wani pai itanti ntagara yogawa agobintanaba, ka'isa nanintabe waini wanipe kampa nanta, uwa a'a-o uma miyogiri agantiripa: Agu'ama a'yugu piye, tigeba untawe. ³⁴ Pigoya, Wasanama Ntagara naeba kanama nanintabe wanipe naogiripa, nagantiri nanagabayaya maya yewe: Aeba uwoma nanintabe wanipe nai ntgarawee. Takisi maeya

kinake aru kinake ige iyo'yagarawe, tigeba naeka yewe. ³⁵ Pigoya abiyo. Mono agowapa igu'ama kintarama miye kina'mi, ige aogima aegaragiri agawe, Isu piya untiye.

Waya ka'waina Isu nkagisari wani pai'atantiye

³⁶ Pigoya, Parasi ka'waina Isu nanintaga aegae' yogana, nankapinti ima naninta nantiye. ³⁷ Pigoya, pi kumatasa aru'wae ka'waina, Isu aeba Parasi ntamapi ima naninta naogana abitegina, aogi agunta masawae yaba kankabe wantaga ka maete, ³⁸ aka'i asima mimagina, kube'ena pogana, ao'nuwama agisari pasogana a'no nkabiyatasa aebago puntiye. Pumagina agisaba amo'nantana, agunta wanipa pai'atantiye. ³⁹ Waya'ma piya pogana, Parasi agarra Isuka aegae' untu ntagara aeba antabaiinpinti mayama napintiye: Ma nkaepa ataena pemi waene. Piya, Isu aeba poropete miyemisinta, agowapa abibebe pemisinema, napintiye. ⁴⁰ Pigoya, napiyogana Isuba abite mayama omintiye: Saimoni, naeba kamana ka ugamekana abo, omogana: Tisa, yega abeno, omintiye. ⁴¹ Omogana Isu meto kamana maya untiye: Mone kina ka'waina tara agarra moneba uwa isimintiye. Ka'wainapa wanantareti tora amintiye. Pigoya to ka'waina nayatar'a'mu tora amintiye. ⁴² Pigoya, isigeba antota amikena monega aguyosagantase. Aibusuguna, atunkisipa uwa aerawane utegina, isitantiye. Pigoya, isigetisa ka'waina mone isimintemi ntagaragaba a'mupa taberapa potakiye. Kaeba keka yenema, abigantiye. ⁴³ Piyama abigaogana, Saimoni maya untiye: Mone uwoma a'a-o otantemi, aeka yuwe. Piya yogana Isuba: Kaeba kanara yenema, omintiye. ⁴⁴ Piya ute, waya'mati a'waebuma Saimoni maya omintiye: Ma nkaepa agano. Naeba namakapinti iyoganapa, kaeba nagisari pasikena wanipa kampa atanatampene. Pigoya ma nkae aeba nagisaba ao'nurasa pai'natama a'no nkabiyatasa aebago punagasaye. ⁴⁵ Kaeba kampa namo nampene. Piya, ma nkae aeba nagisanepa ebi ebima namo naye. ⁴⁶ Kaeba na'notiba uwa masawaepa kampa pai'natampene. Piya, ma nkae aeba nagisanepa aogi agunta masawaetasata pai'nataye. ⁴⁷ Pika ugamekana abo: Waya aeba kao'enaba uwoma punatamika, aru'enawapa uwoma asu'a pogasuve. Pigoya, ka'waina aeba aru'enaba ise'anto asu'a potakibi naba, kao'enaba uwaenanto piye, omintiye. ⁴⁸ Piya umagina, waya maya omintiye: Aru'enagapa asu'a pugagasuwe, omintiye. ⁴⁹ Piya omogini, wasana naninta kaga nama mintanta kina igeba mayama mare-u me-u puntawe: Aeba nana agarra kana aru'enaba asu'a piye, untawe. ⁵⁰ Piya yuguna, Isuba pi nkwaekaba maya omintiye: Kamatiti'enagampaba aogi pugataye. Kaeba wamagina paruyenabi miyo, omintiye.

8

Ka'isa wae'mi Isu aegarantawe

¹ Pigoya, to ka'isa agarra Isuba tabe kumatibe uwaenka kuma'antontoribe nasi nasi puma mima, wasana aogi mono uwaimima Koti kabiratakena kamana uwaimintiye. Wama uwaimogini nagisarisa tara tumpaema abagi kina'wampibe wauguni, ² to ka'isa wayapa pai yoni kinape ke kina intabapi minta kinape mintuguna, igegetisa agaruba igasogini, igege wantawe. Igetisa kapa Mariya, Matara kumatasa waene, aepa keba tonaaentisa tara umaema agaruba againti nkwaene. ³ Piya, to kapa agewapa Yowana, Eroti ntama kiyi agarra Kusa, ae waene. Piya, to ka waepe, agewapa Susana, to ka'isa waepe igege wantawe. Pi wae'miba Isuge abagi kina'wake ige'wai kutatasu iyo'maema kao'ena puwaitantawe.

Aintana asigikena kamana Isu untiye (Matiyu 13:1-9; Maka 4:1-9)

⁴ Kumaka kumaka a'ya'waema kina Isuti kanagana puma pumaeyuguna, igantana meto kamana ka mayama uwaimintiye: ⁵ Wasana ka'waina aeba aintana pikena wantiye. Wama aibarase pogana, ka'isa aowapa kepi tumpa waiyogana, wasanam'i igeba nasi nasi puma aerapauguni, kabarakama irosa'ma ampa nawaegaintiye. ⁶ To ka'isa aowapa asigiyogana yabankama nkabobori tumpa waiyogini, pipa maba kampa waintomeka i'magina iyomepa asama pu'wantkiye. ⁷ To ka'isa aowapa kabubinti tunkwaima iraogana, kabuyenama pabiyama i'magina aibarusa pogana asa wantiye. ⁸ Piya to ka'isa aowapa apa mabi tumpa waima, anonkapa uwoma aboramora aosa pama 100-wa aboraogana uwoma ntaninta waintantiye, untiye. Pi kamanapa uma a'ya atate, kega'e uma maya uwaimintiye: Agyegaya kina'maba ma kamanapa abibebe peno, Isu piya untiye.

Isu aintana kamana'ama nkagowapa uwaimintiye (Matiyu 13:10-23; Maka 4:10-20)

⁹ Pigoya, abagi kina'wampiba igeba pi kamana'ama nkagowaka abigauguna maya uwaimintiye: ¹⁰ Koti kabiratakena kamana kakama waintipa, tigemana abiyoma untine. Ka'isa kina'miba igeba meto kamana agowa kampa abikibewe. Piya pumagini iyoma

kagagate, ka'enaba kampagini agabebé pikibewe. Piya, igerasaba kamana abikena pugagate agowapa kampagini abibebe pikibewe, untiye.

¹¹ Piya untana ago maya untiye: Meto kamana yopa, pi'na nkagowapa mayama waintiye: Aintanaba Koti kamanane. ¹² Pigoya, kepi aintana tunkwaintogana, kabarankama ampaema nantisa puma miye kina'miba igeba mono kamana abigina iguta waiyekana, pabigo kewamaba irosa'ma maerite pai'wagini, mono'wai kampa wainta uwa mama ataenabi miyewe. ¹³ Pigoya, to ka'isa aintana yaba nkabobori tumpa tagantisa puma miye kina igeba maru'enaba mono abima iga pewe. Piya ibigakena aboraginiba anuntana pewe. ¹⁴ Pigoya, to kabubinti tumintisa puma miye kina igeba arirasaenama igu'amapa maema a'yugu puwaitakini, uwoma napiyenawampa mone kutankama nkigaenawampa mono'ama aeguyegina, au'wapa kampa waiye. ¹⁵ Aintana aogi mabi tumintisa puma miye kina igeba mono kamana abima igu'amapa kiya kabima, pasema aogima miyewe. Piya pumagini au'wapa aborawe, piya untiye.

Kane igi'ma kampa kakakena kamana untiye

(Maka 4:21-25)

¹⁶ Pigoya, Isu to maya untiye: Ae kina'ma kane igi'ma tusuparirasa atikaekiyebera, asipawama nkamentapinti atakana waikiye, a. Pipa kampaye. Kanepa igi'ma abora atagana waima, nama nkagupintiba e'wasa puma arakini wasanamiba ima agakibewe.

¹⁷ Pigoya, a'yawaemaena kakama waintintanaba, pipa waima kampa waikiye. Pipa mimaba ainti aborakiye. Piya, ka'isaena wasanama atikae kainta'ena wainti, pipa waimaba kampa waikiye. Pipa mimaba a'waitakiye. Piya pegana agowapa pita arakiye.

¹⁸ Pigoya, ka'waina aminta'ena kanara maema miyekanaba, to kake tabe puma amikiye. Piya, to ka'waina aminta'ena kampa aogima kabima miyekanaba, aparikiye. Pika tageba aogima abibebe puma napi napi puma miyijo, Isu piya untiye.

Isu ano a'natabaraga kamana untiye

(Matiyu 3:31-35)

¹⁹ Pigoya, uwoma kina Isu ainkima asima mintuguni, anobe a'natabarabe kanama wasanabi igiga puma pagasara mintantawe. ²⁰ Piya puguna, ka yagarama igategina Isupa maya omintiye: Kanobe ka'natabarabe takai kagakena ampintawé, untiye. ²¹ Piya yogana Isu abite maya untiye: Koti kamana abima wasiye kina mampa nanobe na'natabarabe mintawé, piya untiye.

Pontawamage waninkamage Isu nkawamu wasintase

(Matiyu 8:23-27; Maka 4:35-41)

²² Pigoya, ka yagaba Isube abagi kina'wape wanipisa karebi intana, maya uwaimintiye: Taeba kotupa ta'ema maroteri wane, yogini abuguni wantawé. ²³ Waumepa Isupa awaiga abogana waintiye. Waitamintogana pontaba tabera puma, kotunkamaba ataena purite, waninkamaba wanipisa karewama nkantabaipinti tumima awaitama ipirintakena puntiye. ²⁴ Aibogini, igeba wama Isu abage pumagini: Tabe yagara, tabe yagara, taeba naisukena pune, untawé. Piya yuguna, aeba asima pontawamake tabe waninkamake tabe kamana uwaismoginisi uwasuwa puwantase. ²⁵ Aibusuguna Isu maya uwaimintiye: Tigeba timatit'enaripa aeta waintegiri yewe, antiye. Piya yogini, igeba a'ya'ma iyekuru pumagini tabe igi napintawé: We, aeba nana yagaragana, pontawamake waninkamake kamana uwaismeginisiba awamu wasiyese, uma mare-u me-u puntawé.

Isu ke kina igarubaogini yagama nkantabaipinti pasintawé

(Matiyu 8:28-34; Maka 5:1-20)

²⁶ Pigoya, igeba kotupa ta'erite wama Kerasa kina'mi au'i irosantawé. Pigoya pi au'i Karari kotunkama maroteri irosantawé. ²⁷ Pita'i uma irosa'ma wauguna, kumatisa ka yagara aeti kanantiye. Pi ntagara aeba antabapinti ke kinapa uwoma miyuguna, e'ero nttagaba aotasaena kampa maema punta auka mimagina, piya namapinti kampa mima, aeba wasana irubintimana umi mpi puta nasintiye. ²⁸ Pigoya, aeba Isuti kanamagina agama, tabera kega'e uma mabi ware'nama agisabi mima tabe kamanatasaya maya untiye: Isu, kaeba inatisa tabe Koti Ntagaragawe. Kaeba nana punatakena kanane. Kaeba ankata punataao, untiye. ²⁹ Pigoya pai asi nasi kewama aeba e'ero nttagaba pi nttagaraba agu'amapa ataena potaogana, esegi puma miyogini, wasanamiba agisa ayatapa esegi iga'narasa kirokaetama kiya kabima mibuntawé. Aibuguna, iga'naba arisa narisa potate, pai'ma ka'me mpari uma mibuntiye. Pigoya, Isu kana yagarama nkantabaipisa ke agarubakena pogana, agama piyama: A-nkata punataao, untiye. ³⁰ Piya yogana Isu: Kagegapa kegawema, abigaogana: Nagenepa Uwomane, untiye. Piya, keba uwoma pi ntgararama nkagupi pai'ma mintaka, untiye. ³¹ Piya, igeba Isu uwa puwaitakini, a'abibinti tumisanaga kampa ibogini agisuntawé.

³² Pigoya, pi mpariba uwoma ntagamiba amu ararabinti mima naninta nama mintuguna, pika ke kina igeba abirataga yaga intabaipi tumeno, piyama abigauguna: Kanarane, owe, uwaitantiye. ³³ Piya uwaitogini, igeba wasana antabaipisa irosa'magini, yaga intabaipinti ubasintawe. Ubasuguni, pi ntagamiba karu'ena ausari tumima, tumpa wani naisuwaewantawe.

³⁴ Piya puguni, yaga kiye kina'miba agate karu'ena wama wasana wa'eribe yogaribe wama uwaimintaw. ³⁵ Uwaimuguni igeba pintana aborantika agakena irosa'ma kanama, Isuti ampa agantawe. Pigoya, pi uwoma ke kina antabaipisa irosa'waume ntagaramaba aotsaena wantaga kamana wantaga Isu nkagora mintantiye. Piya pogini, wa way'a'miba agate iyekuru puntaw. ³⁶ Piyama mintuguni, pintana agama abinta kina'miba pi ntagara aogi potaome kamana uwaimintaw. ³⁷ Piya, pi Keresa marasa kina'miba tabera iyekuru pogini, Isu aebe mawaipa kaite wanema omintaw. Omuguna, a'wae puma itate wanipisa karebi iyogana, ³⁸ ke wantaga miyome ntagaramaba aega'ma aegē wakena esotantiye. Esotaogana Isuba agaruba'ma maya omintiye: ³⁹ Kaeba wa'egati wama, Koti kaeti piyaena pugatami, pi awaga kamana uwaimo, untiye. Piya yogana, pi ntagara aebe a'wae puma, Isu maema aogi potanti pi awaga kamana kuma'watisa kina uwaimiwaentiye.

*Isu pu'wanta aragage yoni waeke kaba isitantiye
(Matiyu 9:18-26; Maka 5:21-43)*

⁴⁰ Pigoya, wasanami igeba Isuka agawa puma mintuguna, irosaogini agama i'muntana potantaw. ⁴¹ Aibuguna, mono nama kiye yagara ka, agewapa Yairasi, aebe kanama Isu nkagisabi parokaema aragawaka abigantiye. ⁴² Pigoya, aragawapa ka'anto kabowapa nagisarisa tara tumpaema kabu pugasomekana, purikena puma mintogana, Isuka: Nae namati kanao uma, agega'e untiye.

Piya yogana Isuba abite waogini, uwoma kina'mi pumaewauguna, ⁴³ pi kina'mi nkabakapi waya ka mintanti, aebe iyegari tumiyaba miyogana, kabowapa nagisarisa tara tumpaema kabu pabiya mintantiye. Mintogini, tusa kina'miba ao'maekenaba pugagate uwa atantaw. ⁴⁴ Piya, kana wae'maba aebe Isu aka'i wama kaiwampa atuta aukaya puntiye. Aukaya pogana, pabigo korankapa tabago puntiye. ⁴⁵ Piya pogana, Isu: Ke naukaya piye yogini, wasanamiba uwamega yuguna, Pita maya untiye: We, Tabe Yagara, uwoma kina'mi kobe puma mintini kaukaya pewe, untiye. ⁴⁶ Piya yogana, Isu maya untiye: Kampaya, ka'waina naukaya pegina esegiyenanepta wag iagauwe, untiye. ⁴⁷ Aibogana: Aebe agonepa pabigo aboraye, wayapa ute, tabaraba purite Isu nkagora uma parokaema, yoninkampa kamanape aukaya pogana koranka tabago punti kamanape, kaga uma aboraogini abiwaentaw. ⁴⁸ Pigoya, Isuba maya omintiye: Araganepa, kamatiti punatampeka aogi kabiye. Pika wama aogima miyo, omintiye.

⁴⁹ Pigoya, Isu piya uma mono nama kiye yagarama ntamati wakena pogana, pi ntagarama ntamatista ka yagara kanama maya ampa omintiye: Aragagapa ago puriye. Pika tisa yagaraba uwampapa a-nkotagana kanano, untiye. ⁵⁰ Piya yogana, Isu pi kamanapa abima mono nama kiye yagarapa mayama omintiye: A-kaekuruba po. Kamatiti punataganaba, aragagapa aogama asikiye, untiye. ⁵¹ Piya ute, napinti ima ka'isaba waitaogini abe'i mintuguna, Pitake Yonike Yemiske kana aragama nkanoge abage isigege ige'mana ibabogini, wama napi uma pasintaw. ⁵² Uma pasuguni, wa waya igeba kube'ena puma mintuguna, Isu maya uwaimintiye: Kube'enaba a-piyo. Aragaba kampa purintiye. Aebe uwa awaitamintiye, untiye. ⁵³ Piya yogini, igeba agor pu'wantika agaume kina'mi kagi potantaw. ⁵⁴ Piya puguna Isuba kana aragama nkayata u'ma kega'ye uma: Araga, kaeba asiy, omintiye. ⁵⁵ Piya omogana, amankampaba a'wae puma kanaogana asintiye. Asiyogana: Naninta amigina nano, uwaimintiye. ⁵⁶ Piya yoginisi, anoge abage isigeba tabera pami puntase. Aibusuguna Isuba: Pi kamana wasana a-nkuwaimyo, uma akunkaitantiye.

9

*Isu abagi kina'wa yoga kamana uwaitantiye
(Matiyu 10:5-15; Maka 6:7-13)*

¹ Isu aebe nagisarisa tara tumpaema kina'wa igege'e yogini irosaunguna, keba agaruba igaintana, yoni kinapa kaba itakibeka esegiyena imima yoga kamana uwaitantiye. ² Pigoya, wasana Koti kabiratakena kamana uwaimima, yoni kina kaba itakibeka maya uwaimima ³ igarubantiye: Tigeba ke'iba wantape titasaena ampaete wantiri ira'na kupe, nanintabe monebe kai tarabe, a-nkurite waiyo. ⁴ Pigoya, ka kumata irosa'maba namapi pasikibepa, pabipi miyivo. Mima irosa'ma waiyo. ⁵ Piya, tori uma irosaigini, a'a-o uma uritaigiripa, iro'ma tigisarisa i'ni pugaitegiri waigini, ataenabi miyentanaga abima

napiyiyo, Isu piya uwaimima igarubantiye. ⁶ Piya uwaimima igarubaogini, igeba ase'yo puma wantawe. Piya puma kumaka kumaka nasi nasi puma, wasana aogi mono kamana uwaimintini, yonintanabe iki naki pomentanabe kaba itantawe.

*Eroti Isu nkawaga kamana abintiye
(Matiyu 14:1-2; Maka 6:14-16)*

⁷ Wasana kiye yagara Eroto aeba Isu piya mayaena pome, pi nkawaga kamana aboganaba kunta abuntiye. Pipa ka'isa wasanamiba maya yumeka puntiye: Yoni aeba purintapisa asima mima, pintanaba piye, yuguna, ⁸ ka'isamiba akayotama maya untawe: Kampaye. Iraiya to kake aborama mintiye, yuguni, piya ka'isamiba maya untawe: Kampaye. Poropete tayabama ka'waina aogama mintiye, untawe. ⁹ Piya yuguna, abogana Eroto kunta abogana maya untiye: Yonipa naeba ago yuwagini aeguntawe. Pigoya, ke piya pemi nkawaga kamanapa abuwe. Piya uma, ka'enaga umaba Isu agakena puwe, untiye.

*Isu 5,000 kina naninta imintiye
(Matiyu 14:13-21; Maka 6:30-44; Yoni 6:1-13)*

¹⁰ Pigoya, aposoro kina igeba yogawaitisa a'wae purite kanama, pi punta kamana Isu omintawe. Omuguna Isuba ibabute Petisaita kuma mari ibiwai umikena wantiye. ¹¹ Waogini, wasanami agate aega'ma wantawe. Piya Isuti irosauguna, ao'ena puwait-aogini mintuguna, Koti kabiratakena kamana uwaimimagina, yoni kinapa kaba itantiye.

¹² Piya puma mintuguna, pankaoba pasikena pogini, nagisarisa tara tumpaema kina'wa aeti wama maya omintawe: Mapa kabubinti mintompeka, kaeba wasana itagini kuma wairite wanti, pita'i wama namape nanintabé aguyosa'ma aboraiyo, uwaimo untawe. ¹³ Piya yuguna Isu: Tigeri kapa nanintabé imiyo, uwaimintiye. Uwaimogini igeba maya omintawe: Amana parettontoba nayaka'muna, inoyanta tarawa suma, piyaki'anto waintiye. Pika aya pukune. Kumati wama ma uwoma kina'minta ige nanintabé wama ika pukuno, untawe. ¹⁴ Pigoya, pi waba 5,000 kina mintumeka, abagi kina'wampiba piya untawe. Yugana: Wasana uwaitaigini arabamagina, 50 kina aki puma mirite waiyo, uwaimintiye. ¹⁵ Piya uwaimimagine, igeba wasana uwaitauguni, arabama mara'mintantawe. ¹⁶ Abuguna, pareti nayaka'mupe inoyanta tarape maema mantari ao ma'magina Kotiti a'mu potamagina, apako puma abagi kina'wa imogini igeba pako puma wasana imintawe. ¹⁷ Pigoya, igeba a'ya'waema nama iga'e pantawe. Piya nauguna, aritapa kibi'magini, wa'nú kupa nagisarisa tara tumpaema ku iraguguna awaitantiye.

*Pitaba Isu nkagowa uma aborantiye
(Matiyu 16:13-28; Maka 8:27-9:1)*

¹⁸ Pigoya, ka yaga Isu aeba abagi kina'wa ibabute tori umima, Isu aewa nunamu untiye. Piya puntana: Wasanami naekaba kewe yewema, ibigama untiye. ¹⁹ Ibogaogini mayama omintawe: Ka'isa kina'miba Yoni mono wani pa'itatakena yagarawé ugatawa, piya ka'isamiba Iraiywé ugatawa, piya ka'isami igeba Poropete tayabama ka'waina aogama asima mintiye, piya ugatawa, omintawe. ²⁰ Piya yuguna, igewai ibigama maya untiye: Piya, tige tigeripa napiyepa naekaba kewe yewema, ibigaogana, Pita: Kaeba Kotitisu utaratanti ntagara Karaisitigawe, untiye. ²¹ Piya yogana, wasana to kina kampa uma abora uwaimikibeka, uwame uma esegi puwaitantiye. ²² Piya mayama amato puma uwaimintiye: Wasanama Ntagaramantepa tabe kuntaenabi punataigini, mono kabiye kinape tabe mono kiye kinape kamana ago abinta kinape, igeba karana natama naeguyigi, papa kakaga mima purintapisa asikuwe, untiye.

²³ Piya untana, wasana a'ya'waema toba maya uwaimintiye: Ka'waina nae naegarak-ena puntanaba, au'wama kamana akabitate, wasanami igobi potakibikaba a-nkaekuru puma maripowa aesagabite naegarano, ute, ²⁴ piya, ka'waina mikenaenawaka owe yekanaba a'yugu potakiye. Naeka napima, mikenaenawaka a'a-o yekanaba, aboramikiye, untiye. ²⁵ Piya untana maya untiye: Pigoya, ka'waina aeba mabi a'ya'waemaena maemagina, agu'amankapa aeguma kaiyekanaba, aya pikkiye, a. ²⁶ Piya, ka yagarama kamana'neka ani punatakibipa, Wasanama Ntagaramanageba pabiyama nani potakuwe. Pigoya, tumukubopa, nabanempa nke'wasaenabe ensiore kina'mi nke'wasaenayaga naeba e'wasa puma tumukubopa, pi ntagaba ani potakuwe. ²⁷ Naeba taga taga'ya urimekiri abiyo: Ma minta tigetisa ka'isamiba purikenaenaba kampa aborantigina, Koti kabiratakenaenaba aborakiri agakibewe, piya untiye.

*Isu manta auga puntiye
(Matiyu 17:1-13; Maka 9:2-13)*

²⁸ Isu aeba pi kamana uma mintogana, tonarentisa kakaga umaema yaga a'ya pogana, Pitake Yonike Yemiske ibabute amuti nunamu ukena intiye. ²⁹ Ima nunamu asu yogana, aowawamaba to auga pumagina, kaiwampaba waentana puma e'wasa puwantkiye.

³⁰ Piya poginisi, wasana tara aborama aege kamana untase. Pi isige isigewaisipa Mosesege Iraiage,³¹ isigeba manta e'wasaenawaisintaga irosa'maginisi, Isu Yerusaremi kumati mampa atate ikena kamanapa tumpa Isuge untase.³² Piya pusuguni, Pitabe ao taramisibe iwaigaba tabera ibogini waintawe. Pigoya, ibegu pumiyumetisa agantapa, Isube e'wasaenawape tara yagararamisibe igantawe.³³ Pigoya isigeba wakena pusuguna Pita maya omintiye: Kiya yagarama-o, taeba mata'i miyokanaba igabiye. Pika namapa kakaga kiyeno. Kae'ena kane. Mosesenta kane, untiye. Pigoya, aeba kamana kampa aogima napinta, uwa untiye.³⁴ Piya yogana, ibina ka'waina tumima airari kae igaintiye. Ibina kima itikaewaogini, igeba iyekuru puma mintuguna,³⁵ ibinankama antabapintisa kamana mayama aborantiye: Mepa utatanta yagaranene. Tigeba kamana'wapa abiyo, untiye.³⁶ Piya kamana yogini abintini, agaumepa Isu abintowa mintogini agantawe. Piya, pi abagi kina'wapa pintana agantapa, pi kanabipa kampa wasanaba uwaiminta, uwa igupi napima mintantawe.

Abagi kina ke agarubakena pugagate atantawe

(Matiyu 17:14-21; Maka 9:14-29)

³⁷ Pigoya marogini, amutisa tumima wasana uwoma kina ibatantawe.³⁸ Piya puguna, ige abakapintisa ka'waina maya uma Isu agisuntiye: Tisa, kaeba kamana'nepa abima, yagaranepa ao'maeyo, aeba ka'antowe.³⁹ Abeno. Kewama aepagina pamintami puma, a-e a-e uma miye. Piya paisusu pegina akagawaba i'waegasaye. Piya, kewamaba kampa agarosamaba atatewaikana, tabera amiyo amayo puma anuntana potaye.⁴⁰ Pigoya, kabagi kinaka uwaimogini, igeba ke agarubakena pugagate atawe, untiye.⁴¹ Piya yogana, Isu maya untiye: We, timatiti'ena kampa wainta, aibo kina mintigi, naeba ayaki yaga tigege mintakiri, napiyenaripa kaitegiri nae kamana abikibewe, untana: Pigoya, kana yagaraga ababute kanaao, omintiye.⁴² Piya omogana kana yagara ababute Isuti wakena pogana, kewamaba abai pogana, agisa ayapa paropara puwantiye. Piya pogana, Isu kewama kabiraogana, aegaka waogana, pi ntagaraba aogi potamagina abawampa amintiye.⁴³ Piya pogini, wasanami agamagini, Koti esegiyenawampa agowapa agamagini pami puntawewe.

Isu purikena kamana'wa uwaimintiye

(Matiyu 17:22-23; Maka 9:30-32)

Pigoya, wasanami a'ya'waemaena pomentanaga agaumeka pamipuma mintuguna, Isu abagi kina'wa ibiwai mayama uwaimintiye:⁴⁴ Pigoya, ma kamana urimekiri abibebe piyo. Wasanama Ntagara naepa to kina'mi iyapi natakena unatantemi kana'nepa ago agarosaye, untiye.⁴⁵ Piya uma uwaimogini, igeba kamana kampa aogima napima abuguna, kakawaogini kampa abima aogi puntawewe. Pigoya abigakenaba iye kuru puma atantawewe.

Tabe mikena kamana untiye

(Matiyu 18:1-5; Maka 9:33-37)

⁴⁶ Pigoya, abagi kina igeba: Taetisa ke tabeba mikkiye, uma maka untawewe.⁴⁷ Piya yuguna Isuba imabinti agowai abimagina, uwaena yagaranto ka ababuma, agora atama⁴⁸ maya uwaimintiye: Ka'waina naeka napima, ma uwaena yagaranto ao'maekibipa, pipa nae nao'maekiye. Pigoya, nao'maekibipa nae Inatisa nagarubanti Ntagara ao'maekiye. Piya, tigetisa ka'waina aeba tumima mikibi'nakaba, aeba naobi tabeba mikiye, piya untiye.

Kampa karibarakibe kinapa tigeti tiyone, untiye

(Maka 9:38-40)

⁴⁹ Pigoya, Yoni maya omintiye: Tabé yagara, taeba wasana aogaso ka'waina kae kage uma, ke agarubagi agaompepa, aeba taepa kampa taegaramika akunka ataune, untiye.

⁵⁰ Piya yogana, Isu maya omintiye: Tigeba a-nkakunka ataiyo. Piya, yogari kampa aguya aikibi'napa tiyo'ena potaiyo, untiye.

Sameriya kina'mi Isu a-kanaoma akunkatantawe

⁵¹ Pigoya, Isu aeba yogawapa a'ya kaite iyekana, Koti ababikenagana agarosakena pogana, Yerusaremi kumati wakena uma esegi puntiye.⁵² Umagina, tonkiya potate apa igarubaogini paitama wantawewe. Paitama wama, Sameriya kina'mi ka kumata irosa'ma Isunta uwaikena nama ka aboraiyema uwaimintawewe.⁵³ Pigoya Isu aeba Yerusaremi kumati wakena piye kamana abitegini, nama akunintawewe.⁵⁴ Akunuguna, abagi yagarawa tara Yemisige Yonige isigeba abiteginisi, Isu abigama maya untase: Wa'ega, kaeba abegarao. Kae kabukibika, kega'e yekana, mantarisa yaku tumima ma kina irabateno, untase.⁵⁵ Piya yusuguna, a'wae puma ka isibi'atare,⁵⁶ igeba to kumati wantawewe.

*Isu aegarakena kamena untiye
(Matiyu 8:19-22)*

⁵⁷ Pigoya, igeba ke'i wauguna, wasana ka'waina ibatama Isu mayama omintiye: Kaeba pita'i mata'i wakena yegapa naeba kaegarakuwe, untiye. ⁵⁸ Piya yogana, Isu maya omintiye: Kabu kara igeba age'waintaga waintiye. Piya, inatisa kabara igeba ina'waintaga waintiye. We, Wasanama Ntagara nawaikena maruntepa kampa waintiye, omintiye. ⁵⁹ Pigoya Isu to wasana ka abatama: Kaeba kanama naegarao, omintiye. Omogana a'wae pomintiye: Wa'ega, abintaga marupa wama nabanempapa pu'waka uma kaitate kaegarano, untiye. ⁶⁰ Piya yogana Isu maya omintiye: Monota pu'wasu puma miye kinapa purikibe kinapa kanara kaiwaitakibewe. Kaeba kanama naega'ma, Koti kabiratakena kamana aborawaimo, omintiye. ⁶¹ Pigoya, to ka'waina maya omintiye: Wa'ega, nae kaegarasanga nabiye. Piya abega, paitama a'wae puma wama, nao'mipa: Pigo miyiyoma, naya imite kaegarano, untiye. ⁶² Yogana Isu maya omintiye: Ka'waina aeba ka'ena pubasanantana aka'i aomarakibi kina'maba pemisa puma, Koti kabiratakena yugaba kampa pikiye, Isu piya untiye.

10

Isu uwoma kina mono uwaimiyoma uwaitantiye

¹ Pigoya, Isuba to sebentiwa ntagara aki puwaitama, yoga kamana uwaitantiye. Piya, aewa wakena pome kumatiba tara tara uwaitama maya untiye: ² Yogaba tabe waintegina piya naninta a'ha pukena kinapa tarantowe. Pika tigeba yoga agowamaka esotaigina naninta a'na pukena kinapa aboraigiri yogawatapa waiyo, Isu piya untana, ³ Tigeba wantiripa mayama abiyo: Tigeba sisipisi awarowama kabu yagama abakapinti wamisa puma, tigarubaogiri wawe. ⁴ Pigoya, tigeba mone asabe ira'na kupe, to ka'isa tigisa anape a-mpaete waiyo. Ke'i waigini, wasanami tigigaigiripa uwoma kamana asiyo. ⁵ Pigoya, ka namapi uma pasikena puntiripa, pi namapi miye kinapa mayama uwaimiyo: Paruyenabi miyijo uwaimigina, ⁶ pigo pi ntamapi aogi paru yagara ka mintakiripa, paruyenabu aeti waiyeno. Kampa yekanaba pi paruyenabu tigetiti to a'waebuma kanano, untana, ⁷ namapa pasikibe pabi ntamapi miyigini, nanintabe wanipe timigiri naiyo. Tigeba nama toyaba antasima, ka namapi mima naminta timigiri naiyo. Piya, yoga kinapa yogawaitasa ikantanaba imegini maeyasa puma timigiri maeyiyo. ⁸ Pigoya, ka kumata irosaigini aogi puritama naninta timigiripa nantiripa, ⁹ itantiripa maya uwaimiyo: Koti kabiratakenagana mampa agarosaye, uwaimiyo. ¹⁰ Pigoya to ka kumata irosaigini nankaipi kampa tiba puritaigiripa, abei'i irosa'magiri maya uwaimiyo: ¹¹ Matasa tagisarisa i'ni pugasokana tigetiti waye. Piya, kapa mayama napiyyiyo: Koti kabiratakenagana agarosaye uwaimintiye. ¹² Isu pi kamanapa uma, kapa mayama amato puntiye: Naeba urimekiri abiyo. Aintisa kanabipa Sotomu kumatasa kinapa tumimaena aborawaimikibikana, maya kumatasa kinapa tabe kuntaenaba aborawaimikiye, Isu piya untiye.

*Kamana abintana kampa aegarami kina'mi kamanane
(Matiyu 11:20-24)*

¹³ Pigoya, Isu to kinaka maya kamana uwaimintiye: We, Korasini kina, nantarane. We, Pesaita kina, nantarane. Mebi tige mari kukantana tabera aboranti, pipa Taya Saironi kina'mi kumata mayaenaba aborantosinta, igeba intara puma karu'ena auga'magini igu a'wae puntasine. ¹⁴ Piya, aintisa Koti pakobikibi kanabipa, Taya Saironi kumatasa kinapa tumimaena aborawaimikibikana, tige kuntaenaripe mesuba puma aborarimikiye. ¹⁵ We Kapaniyamu kina, tige mari uwomantana poka, mantari ikitibewa, a. Kampaye. Aintiba a'bibinti tumikibewe, uwaimintiye. ¹⁶ Uwaimintana igepta to maya uwaimintiye: Tige kamana abikibi'naba nae kamana abikiye. Piya, tige a'a-o uritakibi'naba pabiyama naepa a'a-o unatakiye. Piya, nae a'a-o unatakibi'naba pipa unatanti'na ae a'a-o otakiye, piya uwaimima yogawaiti igarubantiye.

Igarubanti kina igeba a'wae puma kanantawe

¹⁷ Pigoya, pi sebentiwa ntagaramiba igeba a'wae puma kanama, i'mu purintini Isu awaga kamana maya omintawé: Wa'egare kae kage uma kegina igarubaokiniba, tawamupa wasiyewe, untawé. ¹⁸ Piya yuguna maya uwaimintiye: Pigoya pabiyama Sataniba aeba mantarisa amonta tumemisa puma ware'ware purite tumoga agantuwe. ¹⁹ Abeno. Esegienabu ago timintokana, piya pi kama kina'ma a'ya'waemaenawampaba ataenaba kampa puritakibewe. Tigeba kuyabe ontabenipe iyebasaiginiba kampa ataenaba puritakibewe. Esegienabu ago timintuwe. ²⁰ Pigoya, tigeba kewama tiwamu

wasinta, pikaba ti'mupa piyo. Piya, tigeripa mantarisa esapi Koti kaemaranta wainti, pika tabera ti'mu piginiba aogi pikkiye, untiye.

²¹ Pigoya, pi ntaga Aota Awamus'a'ama anta aseyo pogana, Isu a'mu kamana maya untiye: Naba, mantage mage agowane. Kaeba abikenaenawaika abegana tabe pe kinapa kakawaigasane. Piya, igu'amaka abegana inamu kanta pe kinapa uma aborawaimene. Piya, naeba pika na'mu pugatauwe. Naba, kaega napimagina piyama abora urite wanema uma esegi puntampene, untana, ²² Pigoya, a'ya'ma wainatantipa nabanempa nayapi atawaentiyi. Pika wasana ka'waina yagarawa naeka agoneka kampa abibebe piye. Nabanempa ae abiwapa abibebe piye. Piya, ka'waina nabanempa ae agowaka kampa abibebe pega, yagarawa nae nabinto abibebe pumagi, nae napima wasanaba uma aboramekana aegeba pabiyama abibebe pikkiye, piya untiye.

²³ Piya umagina, a'waebuma abagi kina igewaipa maya uwaimintiyi: Tigeba kasa'ena agaka ti'mupiyo. ²⁴ Piya, naeba urimekiri abiyo. Pai a'ya'ma poropete kinape kiya kinape uwomampi igeba tige pi agama abentanaba, pipa agowa agama abikenagaba ibugagate itantiye. Igeba kampa agama abintawe, piya untiye.

Sameriya yagara tupu kina'wa ao'maenti kamana untiye

²⁵ Pigoya, kamana ago abinta yagarama ka asima, Isu amiyo kamana mayama abigantyi: Tisa, naeba ayabuma e'wasaena maemagi asi nasi aogima mikuwema, abigaogana, ²⁶ Isuba maya omintiyi: Mono ago kamana awa'ena kamanapipa ayama waintegina aisene, omogana, ²⁷ kamana ago abinta yagarama maya untiye: Kaeba a'ya'ma kagu kaumakape esegiyenagape napiyenagape. Wa'ega Kotigapa a'ya'ma amegana waiyeno, piya kaegaka kabemisa puma, pabiyama kae kaokinaka kabeno. Kamanapa piyama waintiyi, untiye. ²⁸ Aiyogana, Isu maya omintiyi: Kaeba kamanapa kanara yene. Pipa wasima mima aogima mikibene, omintiyi. ²⁹ Pigoya, pi ntagara kamanapa abintanaba aewa age maema aogi puma to kake: Wasana naopa kewema, abigantyi. ³⁰ Aiyogana pika Isu kamana kapa maya omintiyi: Wasana ka'waina wa'ewapa Yerusaremi kumatisa Yeriko kumati tumikena tumogini, kama kina'mi minaena puma mintuguna, pipi uma pasintiyi. Piya, igeba aegumagini, kaiwape kotankape apawaeritegini, atauguna purikena puma mintantiye. ³¹ Mintogana, mono kiye yagara ka'waina pabi ki'i wama agamagina, au'akanan aerite maroteri wama againtiyi. ³² Aebe waogana, Aribai yagara ka'waina irosa'magina pabiyama agama au'akanan aerite maroteri wama againtiyi. ³³ Piya pusuguna, Sameriya marisa yagara ka'waina pabi ki'i wama uma abatantiye. Uma agamagina antara potama ³⁴ agora wama masawaetasabe waini wanitasabe anamopipa pai'atama asaftantiye. Piya potama, ababuma yagawampa akabata atama ababute wama, wami ntamapinti metama aogima kabitantiye.

³⁵ Pigoya, maroganaba wakena puntanaba, waba ntama kiye yagaraba tu tora am-intanta maya omintiyi: Kaeba ma ntagara aogima kabiyo. Piya, to ka'isa ae auta kaikibempepatakaba, to kake kanamagi amato puma kamukuwe, untiye. ³⁶ Pigoya, wasana tarawa kanaki kina igitisaba ku kina'mi aegunta ntagaraba mapa ao'enaba ke potantiyema, napiyenema abigantyi. ³⁷ Piyama abigaogana, kamana ago abinta yagara aebe maya untiye: Antara potama ao'maenti ntagara, aewe, yogana Isu abite: Kaeba wama pabiya puma miyo, omintiyi.

Mariyake Matake isige kamanane

³⁸ Isube abagi kina'wampibe igeba wama to kumata uma irosaumepa, ka wae agewapa Mata aebe nankapi Isu ababotama maruntak'ena potantiyi. ³⁹ Pigoya, a'nantoba ka mintantiye, agewapa Mariya, aebe Wa'ega yagarama agisabi mima mono'wa abintiyi. ⁴⁰ Piya pogana Mata aebe naninta kao'ena puntana uwoma agi napima mima, kao'enaba pugategina Isuti wama maya untiye: Wa'ega, nana pegina na'nantoba natagi, nae nabi kao'enaba pumiyoganapa, kaeba agantanapa kampa napiyeno. Kaeba omegana nao'maeyano, omintiyi. ⁴¹ Piya omogana Isu maya omintiyi: Mata, Mata, kaeba uwomantanamaka abima, uwoma kagi napima kauki nakiyena puma miyene. ⁴² Abeno, ka'ena aogiyena tabera waintiyi. Mariya aebe pi aogi au'wantaga'ena ago maeye. Pipa a-nkapareno, Isu omintiyi.

11

Nunamuka kamana untiye

(Matiyu 6:9-15; 7:7-11)

¹ Pigoya, Isu aebe ka au'i ampima nunamu untiye. Nunamu a'ya pogana, abagi kina'watisa ka'waina maya untiye: Yoniba abagi kina'wapa nunamu ukena kamanapa uwaimintisa puma, kaeba kapa uramo, untiye. ² Piya yogana Isu maya uwaimintiyi:

Tigeba nunamu ukena puntiripa, maya yiyo: Taba, kae kage aota waiyeno. Kibiratakenaenagapa aborawaeyano tabiye.³ A'ya'ma yagaba kaeba nanintarepa tamo.⁴ Kaintanarepa taeba kaintana purata kina'mi nkatupa mae igasompe nkawameta kaeba aguntaenarepa maeragaso. Tamiyo pusnagaba aogima kabiratao, yiyo untiye.

⁵⁻⁶ Piya yiyo uwaimitegina, to kapa mayama amato puma uwaimintiye: Tigetisa ka'waina aseka nkabubu e'ero mparisa kanakana, amikena nakenaba kampa waintakan irosakanaba, wama to ao'yagaramaka uma abage puma maya omikiye: Nao'yagara, ka nao kanamagina e'ero mparisa kanamipa, nakena kampa waintegi, kaoti kabigama nakena tarawa kanaki namega amenoma, abigakiye.⁷ Piya yekana ao'yagaramaba napintisa maya ikiye: Kaeba nanaga ampa tabage pene. Na kabe akugasima, waya'yagara iwaigasapintiba, ayama asima maema kamusuwe, piya ukiye.⁸ Pigoya, naeba yekiri abiyo. Aeba nao'yagaraga ao'maeikuwemaba kampa napikiye. Aeba ebi ebi kamana yekana, abima uwa asima ikibintanaba maema amikiye.⁹ Piya, naeba pabiyama kapa urimekiri abiyo: Tigeba Koti abigaiginaba timikiye. Aguyosagaiginaba au'wapa maema tigeti aborakiye. Kabera aiwakarusinginaba Kotiba aititakiye.¹⁰ Pigoya, a'ya'ma kina'miba Kotiti esota kina'miba maeyawe. Aguyosaga kina'miba agawe. Kabera aiwakaruse kina'mitiba Kotiba ai'itye.

¹¹ Pigoya, tigetisaba ae nttagarama yagarawampa inoyantaga yekanaba, antotapa kuya amikiya, a.¹² Kokore amuka yekana ontaben'i amikiya, a. Aeba kampaye.¹³ We, tigeba antage kina'mitaba yagara aragaripa aogiyena imewe. Piya, mantarisa tibarimpa aeba asagasima esota kina tigepa Aota Awamusapa timikiye, Isu piya untiye.

*Igeba Isuka kewama esegiyena amegina yoga piye, untawe
(Matiyu 12:22-30; Maka 3:20-27)*

¹⁴ Pigoya wasana ka'waina kewama awamu akugasogana kamana kampa yogana, Isuba pi ntagara antabaipisa ke agaruba agasogana, to kake kamana untiye. Piya yogini, wasana igeba agate pam'i puntawé.¹⁵ Pigoya, ka'isamiba Isuka maya untawe: Ke kina'mi wa'egawai Piyesiburu, ae esegiyena amegina keba agaruba igasaye, yuguna,¹⁶ to ka'isa kina'miba amiyo kamana maya omintawé: Kaeba yegana, mantarisa awame'ena aboraka agano, untawe.¹⁷ Piya yuguna, aeba napiyenawaimpa abibebe purintana, maya kamana uwaimintiye: Ka marisa kina igeba kamaena piginiba, a'ya'waemaenawaipa aguya ayigigasigini, igeba atama mikibewe. Pigoya, ka tunkama ma'ena pukibemipa, aokina'miba asorisari puma kampa aogima mikibewe.¹⁸ Piya, Satani aokina'miba pako puma ma'ena pesinta, ayama esegimia miyesine. Pigoya, tigeba naekaba Piyesiburu esegiyena amegina keba igarubaye ye kauwe.¹⁹ Pigoya, naeba kewama Piyesiburutisa esegiyena maema ke agarubaosinta, tiyokinapa aetasa esegiyenaba maema agarubasine. Pika abimagiri, tiyokina'mi kamanatipa eta'maema, piya kampaye ikibewe.²⁰ Piya, Koti esegiyena namegi keba agaruba igasoganaba Koti kabiratakenaenaba tigetiba ago aboraye, untiye.

²¹ Untana Isu to ka amato puma maya uwaimintiye: Ka akentana yagarama ireguwape wanta'wape pumagina, na kuma'wapa kabihekana, a'ya'maenawapa aogima waikiye.²² Pigoya, tabera esegiyena waitantakibi ntagara irosa'maba, aepa'urintana iregu wanta'wape apau'ma, yaga kotankapa pako purikiye.²³ Pigoya, ka'waina aeba kayone kampa punatai'naba, pipa kama punataye. Piya, ka'waina aeba yagarunte kampa ibabuma aki pi'naba, aeba igarubaye, Isu piya untiye.

*Ke kina'ma a'wae puma kanakiye, untiye
(Matiyu 12:43-45)*

²⁴ Pigoya, Isu toka maya untiye: Kewamaba wasanama antabaipisa irosa'ma wama ka'me mpari maruka aguyosakate, kampa waintakana maya ukiye: Namantepa atate kanantoka, pita'i to kake a'wae pumagi wama umikuwe, ukiye.²⁵ Otate a'wae puma wama agaomepa, kana namapa paga puma aogi nama uma agakiye.²⁶ Piyaena agatategina aeba wama ke aokinapa tonarentisa tara umaema kina to kake kamparagaena pe kina ibabekini, kanama pi ntamapi ampikibewe. Aibigina, pi ntagaraba aeba paipa aogi yagara mintanti'naba aintiba kampa aogimagna tabera ata puwakiye, piya untiye.

Aogima mikena kamana untiye

²⁷ Kamana piya uma mintogana, wasana abakapintisa waya ka'waina kega'ye uma maya omintiye: Yakari pugatama nono kaminti waepa, aeba a'muntanabi miyeno, yogana,²⁸ Isu maya untiye: Pi yempepa, pipa Koti kamana abima maema miye kina ige'muntanabi mikibewe, piya untiye.

*Kukantana kamana untiye
(Matiyu 12:38-42; Maka 8:12)*

²⁹ Pigoya, wasana uwoma kina aeti kanama pumaeyuguna, agobima kamana maya untiye: Mamparasa antage kina tigeba kukantanaga ebi ebi punatawe. Pigoya, tigeba kukantanaba tonawanane. Yonati aboranti, pabintana aborakiri agakibewe. ³⁰ Pigoya, pai Ninibe kumatasa kina'mi igeba Yona puntintana agama napintasa puma, ibasa yaga mamparasa kina tigeba Wasanama Ntagaramana pukubontanaba agama napikibewe. ³¹ Pigoya abiyo. Mare takaerisa tabe wae aebe pabiyamagina a'ya'ma kina pako pikena yagaba mampabisa kina'miti kamparaga kamanati abora uritakiye. Pipa uwaba kampaye. Pi kana waepa aebe e'ero maparispa kanama Soromoni aetisa mono abintiye. Piya, ma minto naeba Soromoni ae awametapa kampaye, pipa asugasima mintwu. ³² Piya, toba abiyo. Ainti Koti a'ya'ma kina pako pikibi ntagaba Niniba kumatisa kina aborama mamparisa kina'mi kamparaga kamanati uma abora uritakibewe. Pipa uwaba kampaye. Niniba kumatasa kina igepe Yona aebe wasanarakayankama ige'ma kamana uwaimogini abima igu a'wae puntaka, piya ma minto naeba Yona ae awametapa kampaye. Pipa asugasima mintogiri, pabi ntaga tigeba kampa piyama a'wae pigina, pi Niniba kina uritakibewe, Isu piya untiye.

E'wasa wasana ita aborakena kamana untiye

(Matiyu 5:15; 6:22-23)

³³ Pigoya, Isu to maya untiye: Tigeba kane igi'maba kampa kakantiri, kaborasaba kampa akunewe, pipa kampaye. Tigeba kanepa igi'ma marunkata atagana, na antabaip-intiba e'wasa pekana wasanaba asu agakibewe. ³⁴ Piya, kau'ama kane'wapa kaowe. Kaogapa aogima waintanaba, kau'amapa kanara e'wasa potakiye. Tikaeyakananba kau'amaba pabiyama tunusu wakiye. ³⁵ Pigoya, kagu'ama kane'wa tu'makana tunususanaga aogima kiya kabima miyo. ³⁶ Kiya kabiyegana, kaetiba tununtanaba kapa kampa aborano. Kagu kau'amaba e'wasaenamana waikiye. Pigoya, kane uwaenama e'wasa pemisa puma, kagu kane'amaba e'wasa pugatakana mikibene, Isu piya untiye.

Parasi kinake mono tisa kinakega: Ataena pewe, Isu untiye

(Matiyu 23:1-36; Maka 12:38-40; Aruku 20:45-47)

³⁷ Pigoya, kamana uma miyogana, Parasi ka'waina Isu nanintaga nankapi agega'e untiye. Agega'e yogana, nankapinti ima pabi naninta asu nantiye. ³⁸ Asu naomeka, ayapa kampa wani nkaema aeyobanta naogana, Parasi yagara agategina, uwoma agi napima: Nanabaya pemika monoka kampa napiye, untiye. ³⁹ Piya yogana, Wa'ega aebe abite maya omintiye: We, Parasi kina tigeba, tu'natipa kankabepo aririsamana aeyobawé. Pigoya, tigupipa kuntanariepa ataenaripe pumaema waintiye. ⁴⁰ We, aibo kina tigeba, kampa napiyewo. Koti ariripe antabaipintibe pumarantine. ⁴¹ Pika tigeba antabaipinti waintintana kusi kina imigina tigeti i'nintana kampa waikiye.

⁴² We, Parasi kina tigeba atama mikibewe. Tigeba a'ya'waemaenaripe aisorite wagana, naya tara'mu pegiripa, agentoba Koti amintiri, kaipe marababe a'ya'waema anintabe pabiyama kampa tigeju'a pekiri amintiripa, Kotige atokaema mikenaenagaba nanaga kampa napiyekiri, aogima arupu puma mikenaenaba nanaga agasawe. Pi ariwape agu'wape tarayaga aogimakiri wasiyesinta, aogiyenabi miyesine.

⁴³ We, Parasi kina tigeba atama mikibewe. Nanagabaya mono namapi wa'ega kina'mi yabaera paitama mikenaga yewe. Piya ke'i wa waya uwa kina'mi tigamagini uma i'muntana puritasanaga pintanaga tigu'amaba waiye. ⁴⁴ We, tigeba atama mikibewe. Tigeba wasana iru kaigainta piyama, pita'i wasana igebe kampagini napinta abobori nasi nasi pewe, Isu piya untiye.

Pai poropete kina iyeguma karana itanta kamanane

⁴⁵ Isu aebe kamana piya yogana, kamana ago abinta yagara ka'waina abima maya omintiye: Tisa, kaeba kamana piya yekanaba, kamana ago abinta kina tae uma tarakuriye, untiye. ⁴⁶ Yogana Isuba maya a'wae pomintiye: We, kamana ago abinta kina tigege tiyekuru piyo. Tigeba kuntaenaba wasana ibobori aesaga itategiri, tigeripa uwa mima, aesagabikena tigiba kampa napiyewe. ⁴⁷ We, atama mikibewe. Tiyabamagiba poropete kina iyeguma kaintakiri, tigeba ibaba iyeguma kaisubewe. ⁴⁸ Piya puma, tiyabamagi iyo'maemagiri, ma'enawaika abegana aogi piye. Igeba iyeguma karana itantawé. Pigoya tigeba kamana agowai aeguma kaiyewe. ⁴⁹ Pigoya, pika Kotiba aogima napima kapu maya untiye: Naeba igeti poropetebe aposorobe uwaitauwaginawauguripa, ka'isaba iyeguma ata puwaitakibewe, untiye. ⁵⁰ Pigoya, pipa pai wasana aboranta kanabi, agobima poropete kina iyeguma koranka airigita kananta, pi kaintanaba pipa tigeti kanakiri kamana maekibewe. ⁵¹ Pi ma'enaba pai Eboropisa agobima aboraurite kanama, Sekaraya aepa tabe mono nama antabaipinti aeguma a'ya puntane. Naeba taga

yekiri abiyo. Pi kamaena pi'na kaintawapa mampa ago tigeti ampa aborakana kamana maekibewe.

⁵² We, kamana ago abinta kina, tigeba atama mikibewe. Tigeba mono'ama agowapa kakatamagiri miyewe. Tigeripa kabe ai'ma kampa uma pai'ma abewe. Piya, wa waya pasikena yegiripa, kabeba akunkigasawe, piya uwaimintiye.

⁵³ Pigoya, Isu kamana piya uma a'ya atate abe'i irosaogini, kamana ago abinta kinape Parasi kinape Isuka ataena otama, igeba to kamana to kamana'wa abigategini, ige atakae puma mintantawe. Piya puma mintogini tabera uma abigantawe. ⁵⁴ Pipa maya uma puntawe: Ka kamana awamupisa irugekapa abima kamana otakune, untawe.

12

Kumpari kamanapa a-nkabiyo, Isu uwaimintiye

(*Matiyu 10:26-27*)

¹ Isu aeba kamana uwaimima mintogini, uwoma kina'mi aeti irosa'ma mimagini, kabokabo puma igisa aebabuma mintantawe. Piya puma mintuguna, a'waebuma abagi kina'wampiba maya uwaimintiye: Wasanama pareti kaintanaba isiti atakanaba anosamisa puma, Parasi kina'mi ata kamana'wai piyama anosasanaga kabiyiyo. Naeba pi kumpari kamana'waika uma, obina kamana urimuwe. ² Pigoya, a'ya'ma airarikaenta'enaba a'waigaikiye. Kakama waintintanaba a'ya'ma aborakini abikibewe. ³ Tigeba tununtanabinti ye kamanapa uma yepa, pipa nama nkaboborisa kega'e uma aborakiye, Isu piya untiye.

Ka'waina aeba ka'enaga aekuru peno, Isu untiye

(*Matiyu 10:28-31*)

⁴ Isu piya untana to maya untiye: Nao'mitaba, maya urimuwe: Tau'ama aegukena pikibe kinakaba a-tiyekuruba piyo. Igeba aintiba tonaba kampa puritakibewe. ⁵ Pigoya, to ka'enaga tiyekuruba peno. Pika urimekiri abiyo: Agagabinti tipasanakena esegiyenewa waitantemti ntagara, aeka taga tiyekuru pikibeka yuwe. Owe, piya urimuwe. Piya aeka tiyekuru piyo. ⁶ Piya, kisabentontoba wasana uwaena monentorasa ika pewe. Pigoya Kotiba ikekaba kampa a'yuguba puwaitaye. ⁷ Pigoya, wasana tige ti'no nkabiyapa aeba aisiye. Pikaga tiyekuruba apuntiri uwa miyivo. Tigeba wasanarawe. Inati pa'ma nasi nasi pemi kabarankama ikantanaba tigeba agasawe, piya untiye.

Naegarakibempepa a-kani po, Isu untiye

(*Matiyu 10:32-33; 12:32; 10:19-20*)

⁸ Isu untana to maya untiye: Pigoya, to ka urimekiri abiyo: Ka'waina aeba wasana iyobi uma aboranatakibipa, Wasanama Ntagara naeba pabiyama Koti enisorewampi ige iyobi aepa uma aboratakuwe. ⁹ Pigoya, ka'waina wasanami ige iyobi kakanatakibi'naba, aepa Koti enisorewampi iyobi kakatakuwe.

¹⁰ Pigoya, ka'waina aeba Wasanama Ntagaramanteka ata kasa unatakibipa, aepa aguntaenawapa asu'a pugaikenena waintiye. Piya, ka'waina aeba Aota Awamus'a'ama yogawaka uma ataena potakibipa, aepa aguntaenawapa kampa asu'a pugaikiye.

¹¹ Pigoya, mima mono namapipera, kamanipe kanisorebe ige tibabute waigiripa, aya kamana ukunemaba abima tara taraba a-piyo. ¹² Pi kanabipa kamana ikibepa, pi Aota Awamus'a'ama uma abora timikiye, piya untiye.

A'ya'waema kutankamaka awame kamana untiye

¹³ Pigoya, wasana abakapisa ka yagarama Isupa maya omintiye: Tisa, nagantoba tasibaresimpa kutapa ae maema miye. Pika kaeba omegana pakobuma ka'isaba nae nameno, untiye. ¹⁴ Piya yogana, Isu maya omintiye: Ma ntagara, naepa kiyabe kamana abikena yagarabe miyomaba kampa unatantawa, untiye. ¹⁵ Piya uma kamana ka amato puma maya uwaimintiye: Tigeba aogima napiyiyo. Mone kutankamaka tintawama napi napi pusanaga antapiyiyo, uma urimuwe. Mone kuta abuwakenaenama wasana mukenaenari araku'ma esegi pekiri kampa mikibewe, piya untiye.

¹⁶ Piya uma awame kamana ka maya uwaimintiye: Wasana tabe kota wainta ka'waina aeba yogawapipa nanitaba uomantana aborantiye. ¹⁷ Pigoya, aumabipa mayama napintiye: Aya pukuwe. Ago tabe namapa aeta waintaka aki pukuwema napintiye. ¹⁸ Piya uma maya untiye: Ibaba ago abuve. Naeba aintana namapa akusaba'ma kasa nama tabe puma kikuwe. Kima aintananepe a'ya'waemaenanepe pipi atakana waikiye. ¹⁹ Pigoya piya pugaite maya ukuwe: Uwoma ntaninta wainatantika, migaramagi e'ero kanara uwa mimagi, nakenabe wanipe namagi na'muntanabi mikuwe, untiye. ²⁰ Piya yogana, Kotiba maya omintiye: Kaeba aibo yagaragawe. Ma nkase kaumagampa maegasakana pu'wakibene. Pigoya a'ya'maena maema aki pempentanagapa kebaya maekiye, untiye.

²¹ Isu piya untana to maya untiye: Pigoya, ma kina'miba arirasaenamana napi napi puma aki puntini, Koti nkaobi kusiyena pewe, untiye.

*Arirasaenaga taberapa a-ntapi napi piyo, Isu untiye
(Matiyu 6:25-34)*

²² Isu aeba abagi kinapa maya uwaimintiye: Naeba urimekiri abiyo: Tigeba mike-naenarikaba: Nana maema nakune. Ti'amakaba: Nana tautasaenaba purukunema, uwoma tigiba a-ntapiyiyo. ²³ Piya, naninta wanane. Mikenaenarimpa au'wantaga'enawe. Titasaena wanane. Ti'ama au'wantaga'enawe. ²⁴ Tigeba kabarakaba napiyiyo. Igeba aintanaba kampa puma nanintaba kampa kubewe. Ige'wai nkaintana namankaipa kampa wainteg'ina Koti nanintawaiipa uwa aborama imiye. We, tigeba kabarapa kampaye. Ae aobipa tigeba wasanarawe. ²⁵ Piya, tigeba napiyenaripa waintakiripa mampara to kake amato puma to ka'isa yaga mirite wakibewa, a. Pipa kampaye. ²⁶ Tigeba piyaenaga igiga puntiripa, nana piyema mikenaenagaba uwoma tigiba napiyewe.

²⁷ We, tigeba ya aosa pamika agoba abiyo. Aeba aotasaenawampa ntuguba kampa piye. Pika urimukuwa abiyo. Paipa tabe yagara Soromoni aeba konariyenawantaga yagaramaba aogiyenaba purintomepa, ya aosawamapa kampa againtiye. Kampaye.

²⁸ Piya, yaobintisa a'no mparamintana ibanto piyama aogima aborama, aiba pari pekanu yaku kaiyamipa, pipa Koti yeginu a'nopa aogiyena maraye. We, tigeba kampa agama napiyegana timatit'enaripa uwaenantowe. Piya, Kotiba titasaenarikaba kabirityate.

²⁹ Pigoya, tigu'amaba naninta wani takenaenagaba taberapa a-ntapimagiri, tigeba uwoma tigi a-ntapiyiyo. ³⁰ We, a'ya'ma maga maga kina'miba nae yontanaga napi napi yewe. Piya, pintanarikaba tibarimpa abintegiri uwoma tigi a-ntapiyiyo. ³¹ Pigoya, tigeba Koti kabiratakena mono'ama nkau'wa aborasanaga tigupa paitama ataigina waiyeno. Piya pigina aeba mampara tige'enaba kaga aborarimikiye, piya untiye.

*Mantabinti a'ya'waemaena abuwakena kamana untiye
(Matiyu 6:19-21)*

³² Pigoya Isu to maya untiye: Uwaena tankantontoba, atiyekuruba puma miyivo. Tibarimpa tabe a'mu puma kabiratakiye. ³³ Pigoya tigeba aogimagiri piyaena waintemipa kusigma imiyo. Piya piginiba aogiyenaripa mantabinti uwa waiyekana kopa kampa abararamaba kukuri kampa pikie. Piya, pita'i antota waima esegi pikena waikiye. Piya, ku kina'miba kampa kuntanaba puma maerigasiginaba, umuwamaba kampa nari-gaikiye. ³⁴ Piya, aogiyenaripa waintemi, pi kumaka asi nasi napiyewe, piya uwaimintiye.

Asu aoso sima mikena kamana untiye

³⁵ Isu to kamana maya untiye: Tigeba kairipa arosama amimagiri, e ikigina e'wasa peno. ³⁶ Piya kayokaya yagaramiba wasana wa'ega iba'enarisa a'wae puma kanama uma kabera aiwakarusekini, karu'ena ai'atakena agawa pesa puma miyivo. ³⁷ Pigoya, wasana wa'ega aeba a'wae puma kanama kayokaya yagara igeba iyogaba puma mintigina ba ampa igate a'mu puwaitakiye. Naeba taga taga'ya urimekiri abiyo. Aeba eri'ya kaiwapa amirintana nani'nta yabaera itama naninta imikena kayokaya'ena puwaitakiye. ³⁸ Pi aseka abubuno, marikiyo, kana yagaraba kanama ampa igakibipa iyogaba puma kabima mintigina ampa igategina, tabera a'mu puwaitakiye. ³⁹ Pigoya tigeba agowapa mayama abiyo: Ka kumatasa kina ku kina ma aseka irosakiyema napiyisinta, iyogabama mima nama kuma'waipa kabiyiginaba kuntanaba kampa maeyisine. ⁴⁰ Pigoya Wasanama Ntagara naekaba pabiyama kampa napikibe kanabi, kanakuboka aseyo puma miyivo, piya untiye.

*Kayokaya yagararamisi kamana untiye
(Matiyu 24:45-51)*

⁴¹ Isu aeba kamana piya yogana, Pita abigama maya untiye: Kaeba awame kamana mapa tae tabireka yepera, a'ya'maga yenema abigaogana, ⁴² Wa'ega kamana mayama amato puma untiye: Wa'ega ka'waina kayokaya kina'wampi ige kiyawaika otamagina maya omikiye: Naeba wama umintakanapa, kaeba kiya kabiwaitama asi nasiba naninta ka awameta imima miyo, ukiye. Pigoya, aeba ayama miyekanapa kayaba mono wantaga awamu wasikenena wantagane otaiyo. ⁴³ Piya, aeba yoga otanta pipa aogima puma miyekanaba, wa'ega yagarawapa irosa'magina abekanaba a'mu potakiye. ⁴⁴ Naeba taga taga'ya yekiri abiyo: Aeba pi ntagaraba pipa kiya tabe otama a'ya'maenawatapa kabiyenoma otakiye. ⁴⁵ Pigoya, pi kayokaya yagara aeba wa'eganepa agaropa kampa kanakiyema, antabaipintiba napimagina, karana itamagina, kayokaya kina wabe wayape iyegumagina, nanintabe esegi wanipe nama aibo abo'ena puma, karana itakanaba, ⁴⁶ togana wa'ega yagarawa a'wae puma kanakena kanapa, pi kampa napinta mintakana,

agaronkanto irosa'ma agaruba'ma a'yugu pikena kina ai'aruyenabi atakana ata maru mikiye.

⁴⁷ Piya, kayokaya yagara ka'waina aeba wa'egawampa awamupisa kamana abintana akayukenaena aborakanaba, aepa tabera aegukiye. ⁴⁸ Pigoya ka'waina aeba tabe yagarawampa awamupisa kamana kampa aogima abinta, akayukenaena aborakibi, aepa ise'antora aegukiye. Pigoya, ka'waina aepa piya uwomantana antotapa maekibewe. Pigoya, ka'waina aeba tabe yuga otanta yagaramaba pipa esegi puma to kake aisuma maekiye, Isu uwaimintiye.

*Isu yoga puma a'yikikenpiye
(Matiyu 10:34-36)*

⁴⁹ Pigoya Isu to maya untiye: Naeba mabi esegi yaku kaekena tumintuwe. Piya, ago yakunkama aburama tasanaga nabiye. ⁵⁰ Naeba ka pasoma unatantine. Pigoya ibaba abikenaenaneempaba kunta nabiye. A'ya'ma paitikenaenaba aseyonaba kampa punataka asaba punatakibewe. ⁵¹ Tigeba naekaba ayama napiyewe. Aeba mampabi paruyena aborakena tumintiyema napiyewe. Kampaye, Abiyo: Naeba atataraena aborakena tumintuwe. ⁵² Pika ma kanabipa mayama aborakiye: Ka namapi nayaka'mu kina mikibe'nagiba igeba ma'ena puma, atatara purite wagana pikibewe. Pita'i taramisi naegaraisiginiba kakagamiba imo kamana ukibewo, kakagami naegaraiginisiba taramisiba isimo kamana ukibeso. ⁵³ Pigoya atatara mikibewe. Abage yagarawampage isigeba ma'ena puma, atatara purite wagana pisigina, pabiyama anoge aragawampage isigeba ma'ena puma atatara purite wagana pikibese. Pigoya, aentawampage anatuge isigeba pabiyama ma'ena purite atatara pikibese, Isu piya untiye.

*Kamana'wa abikibe nttagaga untiye
(Matiyu 16:2-3; Maka 8:11-13)*

⁵⁴ Piya uma, wa wayaka maya untiye: Tigeba ma tunusegiripa agamaba yewe: Ka akena piye yegana aeye. ⁵⁵ Ma arawagiri agantiripa yewe: Esegipatakiye yegana pata waye. ⁵⁶ We, kumpari kina mintawe. Tigeba mawamake ibinankamake agowapra abewe. Pigoya ma kamana'ama agowapa nana piyema kampa abibewe pewema, ibigantiye.

⁵⁷ Tigeba nana piyema aogi kipe at kipe kampa agabebewe. ⁵⁸ Pigoya, tigetisa ka'waina kamana ugatakana, kamana abikena yagaramati kampa uma ke'i wantiris, kamanatisipa uma aogi puma aebarota urite waiso. Piya kampa pikibemepa, pi nttagaramaba karu'ena abikena yagaramati uma kamanakapa yekana, irebu kina'wa otakana, kababuma iga'na namapi katakiye. ⁵⁹ Naeba ugamukuwa, abo: Kaeba pi nkiga'na namapi mintanapa uwaba kampa irosa wakibene. Aintiba iretaba amima a'ya kaite wakibene, Isu piya untiye.

13

Kampa a'wae pukibepa purikibewe, Isu untiye

¹ Pi kanabi, ka'isa Karariya marisa kina'mi wa'ega yagaramanta kao'ena puma, muta atakena yagaba ibabute kanama aeguyuguna, Pairati yogini, irebu kina'wampi kana kinapa iyeguyuguni, pi wasana kurape yaga kurape a'yugu puwantkiye. Pigoya wasana igeba irosa'ma Isu pabiya awaga kamana omuguna,² maya uwaimintiye: Tigeba Karariya kinakaba ayama napiyewe. Ige aguntaenamaba to a'ya'ma Karariya kinapa igaintomeka piya puwaitantawema napiyewa, a.³ Piya wanane. Abiyo. Tigege ataenaripa kampa kaite tigu kampa a'wae pikibepa, pabiyama ata maru mpima pu'waewakibewe.⁴ Piya, paipa Sairomu namapa e'ero namapa takumagina, tonagisarisa kakaga umaema kina iyeguntiye. Pigoya, igeeka ayama napiyewe. Ige ataenawaipa to a'ya'ma Yerusaremi minta kinapa igaintomeka, piya puwaitantiyema napiyewa, a.⁵ Piya wanane. Abiyo. Tigege ataenaripa kampa kaite tigu kampa a'wae pikibepa, pabiyama ata maru mpima pu'waewakibewe, piya untiye.

A kampa aenta yawamaka meto kamana untiye

⁶ Kamana piya uma, Isu meto kamana ka maya untiye: Wasana ka'waina yogawapi yamankapa ka ku'maraogana i'ma intiye. Pigoya to yaga wamagina agauka, uma agiyosa agaomepa kampa agantkiye. ⁷ Piya puntana, kayokaya yagarawa maya omintiye: Naeba ma ntawama nka aesanaga kabimaete kanaogana, kaboba kakaga agasaye. Ya aeba nanaga nae yugabinti uwaba taberapa wairite wakiya, a. Aerawane agaiyugaso, omintiye. ⁸ Piya yogana maya omintiye: Naba, kaeba uwa atanto, ma kabuba miyeno. Piya, naeba agobintisa yonintana puma imupaena peno. ⁹ Pigoya, toganaba a aesanaga agaiyo. Aeyakaraba uwa atakuse. Kampa aeyakaraba agai'yugaikuse, untiye, piya kamana Isu untiye.

Isu waya ka sabatira aogi potantiye

¹⁰ Pigoya Isu aeba ka sabatira mono namapi ima mono uwaimintiye. ¹¹ Pigoya, pi ntamapi waya ka mintantiye. Aeba kewama ka'waina antabaipinti mintogana, kaboba tonagisarisa kakaga umaema kabuwa a'ya pogana mintantiye. Piya, ayamagina ituru puma misuwe, uma parokaema nasi nasi puntiye. ¹² Pigoya, Isuba waya pipa agamagina kega'e uma maya omintiye: Waya, kaeba ituru pogana, yonikapa kata wano, untiye. ¹³ Piya uma ayapa a'nota atama yogana, pabigo ituru pumagina Koti a'mu potantiye. ¹⁴ Pigoya, Isu aeba waya pi sabatira aogi puma kaba atantika, pi mpono nama kiye yagarama agama abogana ataena abogana, wa waya maya kamana uwaimintiye: Yogaena pikena kanaba tonaentisa ka'umaema yaga waintiye. Pita kanaigina aogi puritano. Sabatirapa kampaye, untiye. ¹⁵ Piya yogana, Isu kamana mayama a'wae pomintiye: We, kumpari kina tigeba, sabatirapa purumakatino, osirino, namatipisaba iyoba urite wanitiba ibabute wawo. Ago pabiya pewe. ¹⁶ Pigoya, waya mapa aeba Abara'amu nkaga'nuwe. Piya, Satani iga'na ubu atagina kaboba tonagisarisa kakaga umaema kabuwa mima mintantiye. Pigoya naeba ma sabatira ataogiripa aogi tigi napiyewo. Pipa kanarane, uwaimintiye. ¹⁷ Piya uwaimogini, igeba abima inintana ibogini, kamana kampa untawe. Piya, wa waya uwoma kina'miba pintana aogiyena pomeka i'mu puntawe.

Koti kabiratakenaenaga meto kamana Isu untiye

(Matiyu 13:31-33; Maka 4:30-32)

¹⁸ Isu aeba kamana kapa mayama amato puma untiye: Koti kabiratakenaenabaayaenabayaka, nanarapaya meto puma abukune. ¹⁹ Aeba masiteti a'wa piyamawe. Wasana ka'waina yogawati ainka asikitaogana, i'ma yaena peganaba, kabaranckamaba kanama ayampuwatapa ampima anapa kiye, piya untiye. ²⁰ Pigoya, to ka amato puma maya untiye: Koti kabiratakenaenaba ayama to meto puriyakikuwe. ²¹ Aeba paretibi atama kaekenaena agewapa yisiti piyamawe: Piya, waya ka'waina pi yisiti maemagina uwoma parawabinti atama, paegu potama ataogana, kana paretiba anosakiye. Aeba piyama waintiye, untiye.

Uwaena kabintobinti pasikena kamana Isu untiye

(Matiyu 7:13-14, 21-23)

²² Pigoya, Isu Yerusaremi kumati wakena tabe kumatibe uwaena kuma'antontoribe nasi nasi puma mono uwaimintiye. ²³ Pigoya wasana ka'waina mayama abigantkiye: Wa'ega, wasanaba tarantomibaya iba pekini ikibebe, ayabaya pikibewema, abigaogana, Isuba maya omintiye: ²⁴ Uwaena kabintori uma pasikenaba iyampuba pabi pabi puma uma pasiyo. Wasana uwomampi uma pasikena ikibepa, umaba uwa kampa pasikibewe. ²⁵ Piyama na nkagowamaba aeba asima kabe akunkatama mintakiripa tigeba na komari uma, asima mima aiwakaru suma maya ikibewe: Wa'ega kabe a'wairatao, yiginaba maya urimikiye: Tigeba kegitawe. Kampa tigao kinatawe, urimikiye. ²⁶ Urimekiripa, autotapa maya omikibewe: Taeba kaege kaga mima nanintabe wanipe nantompene. Pigoya kumatetiba monopa yuku abintompene, yiginaba, ²⁷ abintanaba maya urimikiye: Piya urimuwe. Tigeba kegitawe. Kampa tigao kinatawe. Tige aguntaena pe kinatawa natate waiyo, urimikiye. ²⁸ Pigoya, Abara'amuwa, Aisakiwa, Yekobuwa, to a'ya'ma poropete kinana, suma, Koti kabiratakena kumati mintikiri igaigina, tigeba tigarubaaigiripa mima, tiwara upaba puma, kub'e'na puma mikibewe. ²⁹ Pigoya, pa nkirosamitisabe tupasemitisabe marenkau'sabe menkau'sabe, pita'isa wasanaba irosa'ma Koti kabiratakena kumati ima naninta nama i'mu pikibewe. ³⁰ Piya, abiyo. Pita'i ka'isa kayokaya kina'mi kiya mikibewe. Piya, ka'isa kiya kina'miba kayokaya kina mikibewe, Isu piya untiye.

Yerusaremi kinaka antara kamana Isu untiye

(Matiyu 23:37-39)

³¹ Pigoya, Isu aeba kamana piya yogana, pabi kanabi Parasi kina ka'isa irosa'ma maya uma omintawe: Eroti kaegukenaga iye. Pika ma mpaba kaito karu'ena wao, untawe. ³² Piya yuguna maya uwaimintiye: Tigeba a'wae puma wama, kana kabu karamapa maya omiyo: Abeno. Naeba ibabe aibe wasana ke kina agaruba igasima kaba itakuboka, magaba yoganepa a'ya wakuwe iye, omo. ³³ Pigoya ibabe aibe magabe naeba ke'i wakuwe. A'yugu uwa mari wakini poropete aegusanaga, Yerusaremi kumati wakini aeguyigina purikibipa kanarane, Isu ae'waka piya untiye.

³⁴ Piya untana to maya untiye: We, Yerusaremi kinane, Yerusaremi kinane, tigeba nana pewema poropete kamaena puwaitama, mono kina tigeti uwaitanta kinapa yaba kasutasa iyeguyewe, a. We, kokorewama awa ki'nunka ibabuma agagapinti itama isamu pemisa puma, naeba tibabuma aki puritakena pogiri, a'a-o urite kanantawe.

35 Abiyo. Pika nama kumatipa atakana agamaena puma kabu isubikiye. Piya, naeba to yekiri abiyo. Naeba titakiri to kake kampa nagamagiri mirite wamagiri, ainti naeka: Wa'egawama nkagera kanaya, aeka ta'mu potano, ukibepa to kake nagakibewe, Isu piya untiye.

14

Sabatira Isu wasana ka aogi potantiye

¹ Pigoya, to ka sabatira Parasi kina'mi kiyé ka'waina Isu nanintaga kega'e yogana, namankapinti iyogini, Parasi kina'miba pabipi kaga mima kamana'waka kabima mintantawe. ² Piya yamoruyena abome kina ka iyogana, Isu agantana, ³ kamana ago abinta kinape Parasi kinape mayama ibigantkiye: Tigeba yiyo. Sabatirapa ma ntagaraba aogi potakupera aya pukune, yogini, ⁴ asaba'wantawe. Piya puguna, kana yagara ayata taku u'ma aogi potama agarubaogana wantiye. ⁵ Piya aogi potamagina, pi mintume kina igepe mayama ibigantkiye: Yagaripe purumakatipera kabinti, sabati yaga tumekiripa uwa ataigina waikibera, pabi sabatira uwa paibigma ikiyema, ibigaogini, ⁶ kamana a'wae puma omikenaga aguyosakate atantawe.

Kaupa a-mpaete iyo, Isu untiye

⁷ Pigoya wasana ka'isa nanintaga kaga igege'a unta kina igebe napiyenawaipisa tabe yagarama yabaeba maema miyuguna igama maya meto kamana uwaimintkiye: ⁸ Kaeba ka'waina iba'ena pikena kagega'e yekanapa, napiyenagapisaba marusa yabaeba maemaba a-mpiyo. Piya pegana tigega'e untatisa ka'isa kina igeisa kae kagasima minta ka'waina irosakana, ⁹ kao'ena agowamaba kaepa maya ampa ugamikiye: Pipa ae yabaewe. Ae'watao, yekanapa, kaeba a'wae puma aintisa yabaera tumpima kani pikibene. ¹⁰ Piya wanane. Ka'waina kagega'e yekanapa kaeba aintisa yabaera miyo. Mintagana kao'ena agowamaba kagama maya ugamikiye: Nao'anto, kaeba ima marusa yabaera paitama asu miyo, piya ugamekana, pi naninta nakibe kina'mi nkiyobi kantawamaba aogi pikie. ¹¹ Pabiyma, ka'waina aeba au maete ikibi'napa tumikiye. Piya, ka'waina ae'wa nkau maete tumikibi'napa maema mesuba potakiye, piya untiye.

¹² Piya untana, wasana igege'a yome ntagara aepa toba maya omintkiye: Kaeba naninta kao'ena puntanapa, kao kinape kaganto ka'nantobe tigerupe, kumakatasu uwoma kuta wainta kinape, a-nkigega'eba yo. Piya, igebe nanintaga igege'a yeginiba, kaepa pabyiyama antota kagega'e uma atukapa kamigina a'ya pikie. ¹³ Pibiya kampaye. Naninta kao'ena puntanapa, kusi kinape karaena nagainta kinape agisa antage miru kinape aorika kinape, piyama igege'a yegini naigina, ¹⁴ antota kampa maenta uwa aogima mintagana, aintiba taga mono kina asikibe kanabi, Koti antota kamekana ka'mu pikibene, Isu piya untiye.

Tabe nanintama mpeto kamana untiye

(Matiyu 22:1-10)

¹⁵ Isu aeba piya kamana yogana naninta naume kina igeisa ka'waina abite maya omintkiye: Koti kabiratakena kumapi naninta nakibe kina i'mu pikibewe, untiye. ¹⁶ Piya yogana, Isu kamana ka maya omintkiye: Wasana ka'waina tabe nanintaena puma aki puntana, wasana uwoma kina igege'a untiye. ¹⁷ Piya puma yokege potate, wasana kana iminti kinati kayokaya yagarawa otaogana wama: Ago kao'enaba puma a'ya atauna kanaiyo, uma uwaimintkiye. ¹⁸ Uwaimogini, igebe a'ya'ma uwa a'yugu kamana uma: A'a-o untawe. Piya, ka'waina aeba maya untiye: Naeba kasa ma ika pumaratoka, pita'i wama yogaenane pukuwe. Pika kaeba tabe yagaragapa uma omegana abima ataba a-punatano, untiye. ¹⁹ Piya yogana to ka'waina maya untiye: Naeba purumaka nayataramu ika pumaratoka pita'i wama uma yoga pukuwe. Pika kaeba wama tabe yagaragapa uma omegana abima ataba a-punatano, untiye. ²⁰ Pigoya to ka'waina maya untiye: Naeba waya maetoka, ayama wakuwe, untiye. ²¹ Piya yuguna, kayokaya yagara aeba abite a'wae puma kanama, tabe yagara pi kamana omogana abima ata puntiye. Ata potamagina kayokaya yagarawa maya omima agarubantiye: Kaeba karu'ena wa'ega wa'ega nasi nasi puma a'ya'ma ki'i wama kusi kinape karaena nanta kinape igisa antage miru kinape, ibaburite kanagini nanintanepa ampa naiyo, untiye. ²² Piya yogana, kayokaya yagara wagaité kanamagina, aeba tabe yagarawa to maya omintkiye: Tabe yagara, kaeba kamana yempesa puwe. Piya popa namapa marupa uwa waiye, untiye. ²³ Piya yogana kana yagarama kayokaya yagarawa maya omintkiye: Pigoya, kaeba to ki'i wama yogari mintakibe kinape kakama kumati wasana mintakibe kinape, tutusuwaitagini kanawaema namantepa ampa pumaeyiyoma uwaimo, untiye. ²⁴ Piya, ka kamana yekiri abiyo. Paitama maru igege'a unta kina, igebe nanintanepa kampa nakibewe, Isu piya untiye.

Isu aegarakena kamanane
(Matiyu 10:37-38)

²⁵ Pigoya, uwoma kina Isu aegarauguna a'wae puma maya uwaimintiye: ²⁶ Ka'waina aeba naege mikena puntanaba, ano abape waya yagarawape, aganto a'nanto amana'mape, igepe aekita puwaitantana, ae'wa nkau'wapa pabiyama aekita potakibi'na, aeba kayokaya yagarane mikiye. ²⁷ Ka'waina aeba kampa maripowa aesaga'urite, kampa naegarakib'nae kayokaya yagarane kampa mikiye, Isu piyama meto kamananuntiye. ²⁸ Piya untana to maya untiye: Pigoya, tigetisa ka'waina tabe nama amato puma kirite ikena puntanaba, marupa ikantanamaka napima, yabankapa maema aisumagina kanara kikube kampabayawema, pi'na nkagowapa abima napikiye. ²⁹ Piya kampa punta, namanka ku'ma kaitantanaba yabaka aguyosagate kasakini, wasanamiba kampa kimaranta namapa agama, kagi potama, ³⁰ maya ikibewe: Ma ntagaraba kampa napimagina aganta namapa ku'ma kaitate kasipama waintiye, piya ikibewe.

³¹ Pigoya, ka marisa wa'ega yagarama to ka marisa wa'ega yagarama aokina'mige kamaena pikena puntini, uwa a'yuguba kampa uma iyegukibekana, aeba paitama maya ikiye: Taeba 10,000 kina mintokini, igeba 20,000 kina mintawe. Pigoya igepeyaya igasima iyeguwaegaikupe, taepaya tagasima taeguwaegaikbewema, napigaitegini kana kamaena pikibewe. ³² Kampa igaintini uwa atate, ayaki kuta timima uwa aiyekana uwa aema paru pukuwe. Piyama wasana agarubakana apa nkakiye, untiye. ³³ Piya untana, amato puma maya untiye: Pigoya tigetisa ka'wainaba aeba ayama a'ya'waemaenawapa kampa kasiwaentapa, aya puma yagaranentanaba puma mikiye. Pipa kampaye, Isu piya untiye.

Kampa iga wainta kayowe
(Matiyu 5:13; Maka 9:50)

³⁴ Pigoya to urimuwe: Kayoba aogi igaenawe. Piya, i'nisama kasigabekapa, aya pekana to kake asabama iga pikkiye, a. Pipa kampaye. ³⁵ Pipa piyaena pikenaba kampa waintegini, uwa mariba asunu kaekasawe. Ageyaga kina'maba ma kamanapa abibebe peno, Isu piya untiye.

15

Sipisipi kaka wanti meto kamanane
(Matiyu 18:12-14)

¹ Pigoya, takisi mone maekena kinape kamparaga kinape Isuti monowa abikena tabera irosa'ma mintantawe. ² Piya puguni, Parasi kinape mono tisa kinape igeba pika abimagini, Isu ata potama aeka maya untawe: Ma ntagaraba kamparaga kina ao'ena puma naninta kapisa naye, piya untawe. ³ Pigoya, pika Isuba meto kamana maya uwaimintiye: ⁴ Tigetisa ka'waina aeba 100-wa sipisipi atama mintakana, ka'antoka kaka wakanaba uwa kaikiya, a. Kampaye. Aeba ka'isaba 99 kuma'waipinti itakini, kabuyena nama mintigina kakawai'naka aguyosagakiye. ⁵ Aguyosama aboratama a'mu puma aesaga uritegina, ⁶ kumati uma irosa'ma aokinaka kega'e uma maya ikiye: Sipisipine kabubi kaka wantipe ago abatamagi ababute kanauwwe. Pika ta'mu peno, ukiye. ⁷ Pabiyama naeba urimekiri abiyo. Wasana 99-wa monota mintiginaba, igekaza pi mantariba a'muntana waikiye. Pigoya, agunta yagara ka'waina agu a'wae pekanaba, aeka mantariba a'muntanaba ima tabera aborrama to a'muntanaba igaikiye, Isu piya untiye.

Mone kaka wanti meto kamanane

⁸ Pigoya, Isu to meto kamana maya untiye: Waya ka'waina nayatar'a'mu mone u'ma mintakana, ka'antoka tumiwananaba kaikiya, a. Kampaye. Aeba kane igi'ma nama paga puma aogima aguyosagakiye. ⁹ Aguyosama aborrama waya aokinaka kega'e uma maya uwaimikiye: Monene kaka'waipa pi ago abatama maeyuwe. Pika ta'mu peno, ukiye. ¹⁰ Pabiyama yekiri abiyo: Mantari Koti nkenisori kina igeba pabiyama agunta yagara ka waina agu a'wae pekiniba i'mu pikibewe, Isu piya untiye.

Yagaranto ka kaka wanti meto kamanane

¹¹ Pigoya, to meto kamana maya untiye: Ka yagarama ntagarawapa tara mintantase. ¹² Mintana aintisa yagarama abawampa mayama omintiye: Kaeba mone kuntaka pakopuma naepa nameganto, yogana, pakopuwaitsantiye. ¹³ Piya pogana, aintisa yagarawampaba ise yaganto mima kotanka a'ya'waemaena aisa'urite e'ero mpari maete wantiye. Pigoya pita'i kupiyona puta nasima mone kutankappa nanintari kasima pusuya puwaegaantiye. ¹⁴ Pusuya puwaegaite mintogana, pi mpariba tabe kabu pogana aeba ka'enawapa kampa waintiye. ¹⁵ Aibogana, ma ago yagara ka'wainati wama uma atokaeyogana, aeba yogana kuma'wati yaga kiye kabintiye. ¹⁶ Piya puntana, aeba yagama ntaninta nakena poginiba a'a-o otantawe.

¹⁷ Piyama mintana maya aogima napintiye: Nabanemba kayokaya kina'mitiba uwoma ntaninta waiyegini nama iga'e pama miyega, naeba yagarawampanaba mata'i ampima naga'enaga purikena puwe. ¹⁸ Pika naeba kuma'neti wama nabanempati irosa'ma maya uma omukue: Naba, naeba aguntaena pogana kaintananempaba kaetibe Kotitibe kunta piya. ¹⁹ Pipa ayama to kake kagorasa yagaragapa mikuwe. Kaeba uwa kayokaya yagaraga nababega mikuwe ukuwema, napintiye.

²⁰ Piyama napima, ase'yo puma abawampati kanantiye. Kanamagina kuma awamori uma irosaogana abawampa ago agate antara puma karu'ena uma aepama amo nantiye. ²¹ Aibogana kana yagaramaba mayama omintiye: Naba, naeba aguntaena pogana kaintananempaba Koti nkaobipe kae kaobipe kunta piye. Pika kae'yagararanawe to kampa ukuwe, untiye. ²² Piya yogana, abawampa: Pigoya aerawane, otate, kayokaya maya uwaimintiye: Tigeba karu'ena wama aogi kai maete kanama ampa amitaiyo. Ayapipa tusapa potantiri, agisa anapa amintiri piyo. ²³ Piya, purumaka nkawaroba apa yaga aeguma kaeyigi nama ta'mu potano. ²⁴ Yagaranepa aeba pu'wantitisa to kake aogaya, pigoya aeba kaka wantitisa to kake aboraya, pika ta'mu peno, untiye. Piya yogini kaema i'mu puntawe.

²⁵ Pigoya, amaru yagara aeba yogari mintogini piya puntawe: Piya yogarisa a'wae puma nama nkaka'i ampima inibe wa'enabe abintiye. ²⁶ Piyama abimagina kayokaya yagara ka kega'e uma: Maipa nana pewema, abigantiye. ²⁷ Aeba maya a'wae pomintiye: Ka'nantogampa kanama irosa'ma, ataanaba kampa pikana aogima mintiye. Pigo irosagina tisibarisimpaba yegi purumaka nkawaro apa yaga aeguma kaeyunema, omintiye. ²⁸ Piyama omogana, amaru yagara aeba amo'na puma namapinti ikenagaba a'a-o untiye. Piya pogana abawampaba kuma awamori tumima aurintiye. ²⁹ Piya pogana kampa abinta, abawampapa maya omintiye: Abeno. Naeba ayaki kabubaya mima kamanakapa kampa aka'yuma kayokaya'enaba pugatauwé. Pugataoganapa, pi kaeba uwa meme awaroba kapa kampa nameka aeguma yaga namaegigeba nama ta'muntanaba kampa pompene. ³⁰ We, aintisa yagaragapa kupiyona puta nasima mone kutankapa pusiya puma asorisari pugaite kanagina, yekini purumaka nkawaro apa yaga aeguma kaetawe, untiye. ³¹ Piya yogana, abawampa mayama omintiye: Yagarane, kaeba asi nasi miyempeka piya mayena gaba kampa aguyosagane, a'ya'maenaba kapiyenaresi waintiye. ³² Piya ka'nantoba aeba pu'wantitisa to kake aogaye. Piya, aeba kaka wantitisa to kake aboraye. Pika tantawama aso'ya peka ta'mu potakana aogi pikkiye, untiyema, Isu piya untiye.

16

Yoga yagaraga meto kamana untiye

¹ Isu abagi kina'wa kamana to ka maya uwaimintiye: Tabé kutantaga yagara ka'waina kiya yagarawa ababuntiye. Pigoya, ka'isa kina'mi aeka maya yuguna aba kari abintiye: Kiya aeba kota maema a'yugu piyema, yuguna abintiye. ² Piya kamana abitegina kega'e uma maya omintiye: Kae kamana maya yega abuwé. Kae piyamagaba kiyeba to kake kampa mikibenema yuwa, esagapa maete kanagara mone kutankama nkagowa aogi peso, untiye.

³ Piya yogana, kana kiya aeba antabinti mayama napima untiye: Ma tabé yagaranempaba yogane nagarubakenaga iye. Aya pukuwe. Yogaena pusagaba naekita piye. Nau'ama iga tumiga peka, wasanamiti nanintaga esuwaitasanagaba nani piye. ⁴ Piya, tabé yagarama yagarasa nagarubakibi kanabipá, a'yugu wasanami ka nabi'ma, namankaipi kampa nababuntanagaba ka nagi napiyoka, pintana pukuwe, untiye. ⁵ Piya utegina, tabé yagarawampa nkireta wainta kinaka kega'e umagina, ka'waina mayama abigama untiye: Kaeba tabé yagaranempa ireta kaetiba ayaki waintiye, untiye. ⁶ Piya yogana aeba maya untiye: Apa tabé tiniba 100-we yogana, mayama omintiye: Pigoya, ma ireta esa maema mara'mima 100 aegugasima 50 kaeyo, untiye. ⁷ Piya untana to ka'waina ampa irosaogana: Tabé yagaranempa ireta kaetiba ayaki waintiye abigantiye. Abigaogana, 100 witi kune, untiye. Piya yogana maya omintiye: Pigoya, ma ireta esa maema 100 aegugasima 80 kaeyo, untiye.

⁸ Pigoya, piya pogana, tabé yagara ata kiya yagaramaka abimagina: Aogi napiyena napima piyema, abima aogi potantiye, Isu untiye. Piya untana pi kamanaka to maya untiye: Mampabisa kina'miba mampabisenaga tabera napi napi pewe. Piya pumagini e'wasaena maenta kina'mipa igasima napi napi pewe.

⁹ Piya yekiri abiyo. Moneba mampabisenawe. Tigeba pika aogima napima pitasa tiyo'enaba puma maema miyigina, mampabi mikena kanati a'ya pikibi ntagaba,

a'ya'waema kutatipa kampa maete Kotiti ikibewe. Pabi ntagaba miyaba mikena kumati asu aogima mikibewe, piya untiye.

¹⁰ Pigoya, Isu to maya untiye: Ka'waina aeba au'wa kampa wainta'ena aogima kanara kabibiki'naba, aeba pabiyama au'wantaga'enaba aogima kanara kabikiye. Piya ka'waina aeba au'wa kampa wainta'ena maema ataena pikibi'naba, aeba pabiyama au'wa wainta'enaba maema a'yugu pikiye. ¹¹ Pigoya tigeba mampabisa kuta aogima kanara kampa maema miyiginaba, mantarisa taga au'wantaga'enaba Koti kapa ayama timikiye, a. Pipa kampaye. ¹² Pigoya, a'yo timinta'ena pi aogima kanara kampa u'ma miyiginaba, tige'enaripa pi Koti ayama timikiye, a. Pipa kampaye.

¹³ Pigoya, ka yagarama tabe yagara taramisi kayokaya'ena kampa kanara pikiye. Aeba ka'wainapa kayone potantana, to ka'wainapa agama aekita potakiye. Piya pumagina aeba ka'wainati uma atokaentana to ka'wainapa akabitakiye. We tigeba pabiyama Koti ntugabe mone kutankama ntugabe ka awameta kanara kampa maekibewe, Isu piya untiye.

Isu aeba Parasi kina'mi kamana untiye

¹⁴ Pigoya Isu aeba pi kamana yogini, Parasi kina igeba mone kutaka ibugai kina abima kamana'wa akayuma kagi potantawe. ¹⁵ Aibuguna maya uwaimintiye: Pi tige wasanami nkiyobi aogi tiyuwa kanta piye. Kotiba tigu'ama nkagoba agama abiye. Wasana ige iyobi i'maete ima mikenaenagaba pi Koti nkaobi ata aguntaena piya.

¹⁶ Piya, paipa Moses ominti ago kamanape poropete kina'mi kamanape kaeta kanan>tagana Yoniba aborantiye. Aboramagina Koti kabiratakena aogi awaga kamana untika, ibaba aboraye. Piya ebi ebi pe'nagiba agasiya puma uma pasawe. ¹⁷ We, mage mantage isigeba a'ya pikenaba untanaba a'ya pikiye. Piya, Koti kamana kapa kampa kakakibikana a'ya'ma uwa waiyaba mikiye, Isu piya untiye.

Waya kaikena kamanane

(*Matiyu 5:31-32; 19:9; Maka 10:11-12*)

¹⁸ Pigoya, ka'waina waya'wa kaite to wae maekibi'naba, kupiyonaba pikiye. Piya, to ka'waina aeba pi kainta wae maekibi'naba, aeba pabiyama kupiyonaba pikiye, Isu piya untiye.

Tabe yagaramage Arasarusige kamana untiye

¹⁹ Pigoya Isu to ka kamana maya untiye: Tabe kutantaga yagara ka mintantiye. Aeba kaiwapa waepe teteba aogiyenamana pu'ma mintana, asi nasi aogi nanintamana namagina igaenabi mintantiye. ²⁰ Pigoya, kusi yagara ka mintantiye. Agewapa Arasarusiwe. Aeba autiba anamosura yagarawe. Pigoya, aeba tabe yagarama ntama kabera waibomekana, ²¹ tabe yagarama ntamapintisa ariyena atuntana tumogana: Pabipa maema nakuwema, napintiye. Waitamintogana karamiba irosa'ma anamopa inteburasa ki'ma nantawe.

²² Pigoya, mima pi kusi yagaraba purogini enisore kina igeba ababute ima abara'amu nkagora atauguna mintantiye. Pigoya ainti pi tabe yagara aeba purogini kaitauguna, ²³ aeba a'abibinti tumima tabera auki naki puma mintantiye. Piya puntana, inati aomaraomepa Abara'amu nkagora Arasarusi pa agantiye. ²⁴ Agantana Abara'amu nkagisuma maya untiye: Abara'amu nabanempagawo, naeba mata'i yakupi nauki naki puma mintuwa, kaeba naeka kantara puma Arasarusi otagana aya nkawarasa wanipi aerite kanama nantebura atakana paru peno, untiye.

²⁵ Piya yogana Abara'amu maya untiye: Yagarane, abeno. Kaeba mara igaenabinti mintanti pipa pabiyama a'ya puwantiye. Pigoya Arasarusi antara'enabinti mintanti, pipa pabiyama a'ya puwantiye. Pigoya pika aeba anta asoyaenabi mpintiya, piya kaeba kauki nakiyenabi mpiyene. ²⁶ Pigoya abakatepi tabe a'abi waintiye. Pika matisamiba tigetiba ayama tumikibewe, a. Piya tigetisamiba matiba ayama ikibewe, a. Pipa kampaye, untiye.

²⁷⁻²⁸ Aiyogana, kana tabe yagarama maya untiye: Nabanempa kanarana, kamanakapa ago abuwe. Piya, ka yekana abo. Maroti nae kumati na'natabarantonto nayaka'mu mintawe. Igeba mata'i auki naki kumati tumisanaga Arasarusi otagana wama tonkiya kamana uwaimeno, untiye. ²⁹ Piya yogana Abara'amuba maya untiye: Kampaye. Mosesbe poropete kina ige mono kamana wainti, pi igeba abiyo, untiye. ³⁰ Piya yogana aeba to maya untiye: Abara'amu nabanempa, pipa kampaye. Purinta kina ka'waina wama uwaimekini kanara igu a'wae pikibewe, untiye. ³¹ Piya yogana maya omintiye: Igeba Mosesbe poropete kina'mibe kamanapa a'a-o yekini, piya purinta kina ka'waina asima wama uwaimemisinta, pabiyama a'a-o iyesine, Abara'amu untiyema, Isu piya kamana untiye.

17

*Aguntaenaga Isu untiye
(Matiyu 18:6-7, 21-22; Maka 9:42)*

¹ Pigoya, Isuba abagi kina'wa kamana maya uwaimintiye: Aguntaena pukena amio'ena asi nasi aborakiye. Aibekana aguntaena aborakibi nttagarama ataenabi mikiye. ² Pipa aeba maya yogurtanto ayakekana kamparagaena pukibemipa, kana ayakikibi nttagara araku'ma tabe yabantama ana'mubi uba'atama tabe wanipi apasanakasinta: Pipa kanara pewe, yesine.

³ Tigeba kiya kabima miyivo. Kao'yagara ataena pekanapa ka abirao. Piya pegana aeba agu a'wae peno. Piya yegana antara kamana ugasakana asu'a pugaso. ⁴ Piya, ka yagaba tonantisa tara umaema aguntaena pugatantana, to kake kaeti irosa'ma tonantisa tara umaema yaga: Naeba nantara puma nagu a'wae puwe, ikibipa, kaea aguntaenawapa uwa asu'a pugaso, Isu piya untiye.

Amatiti'enaga Isu untiye

⁵ Pigoya, aposoro kina'mi igeba Wa'ega Yagara maya esotantawe: Kaeba tamatiti'enarepa maema tabe puratao, untawe. ⁶ Piya Yuguna Wa'ega Yagarama maya uwaimintiye: Taga timatiti'ena uwaenanto waintesinta, maro ntawamaka: Kaeba igiritegina tabe wanipi tumpa waiyeno, yeganaba, tiwamu wasima pabiya pemisine, Isu piya untiye.

Wa'egawama ntuga kamana Isu untiye

⁷ Pigoya, Isu to maya untiye: Tabé yagara ka'waina aeba kayokaya yogurtawa yegaenaba puntana yaga kiye kabintana puma mintakibitisa atamaita kanakanaba, mayaba kanara omikiyo: Kaeba namapinti iyega naninta kao'ena pugameno, omikiya, a. ⁸ Pipa Kampaye. Aeba maya omikiyo: Piya, aogi kai maema amirintana asekasa naninta kaenataga nagasakana, ainti uma kae'enagapa kaema nao, ukiye. ⁹ Pigoya kayokaya yogurtawa aeba yoga otanta pipa pekan, tabe yogurtawampaba uwa abekana aya pikiiye. Pika kampa a'mupa potakiye. Kampaye. ¹⁰ Piya, tige agoba pabiyma waintiye. Tigeba uritanta'ena pi puwaegaitekiripa maya yiyo: Taeba uwa kayokaya yogurtarawwe. Pintana pompepa tae Yugare pune, to naumabisa napima to ka'isaenaba ae yugaba kampa pune, yiyo, Isu uwaimintiye.

Isu nayataramu karu kina aogi puwaitantiye

¹¹ Pigoya, Isu aeba Yerusaremi kumati wakena Karariya maba agaite Sameriya ma awamori uma irosantiye. ¹² Irosa'ma ka kumati iyogini karu kina nayatara'mu igeba pagasari mima agategini, ¹³ kega'eme agisuma maya untawe: We, kiya yogurtawa Isu, kaeba taeka kantara po, untawe. ¹⁴ Piya Yuguna igama: Tigeba wama tipa mono kiye kina iyakiyo, uwaimintiye. Piya yogini, wauguna i'amaba aogi puwantkiye. ¹⁵ Piya puwaogana agate igeftisa ka'waina a'wae puma tabera uma Koti a'mu potama, ¹⁶ Isu nkagisabi parokaema a'mu potantiye. Piya, pi ntagaraba Sameriya marisa yogurtarawwe. ¹⁷ Pigoya Isuba maya untiye: Wasanaba nayatara'mu aogi pene. Ka'isa tonantisa ka megasima kinapa aempaye. ¹⁸ Igeba a'wae puma Kotika: Ta'mu pugatauneha, kampa otanta uwa wagana, to marisa yogurtama abinto kanamagina ampa a'mu potaya, a, piya untiye. ¹⁹ Piya umagina a'wae puma pi ntagarapa: Kamatiti'enagampa aogi pugataya, kaeba asima waoma, omintiye.

Koti kabiratakena yaga aborakibika Isu untiye

(Matiyu 24:23-28, 37-41)

²⁰ Pigoya Parasi kina'mi: Koti kabiratakena yaga ayantaga aborakiye, Isu abigantawe. Abigauguna Isu maya uwaimintiye: Koti kabiratakena yaga aborapa kampagina aborakiye. ²¹ Pintaga mayama kampa ukibewe: Agaiyo. Mata'i aboraye. We, marota'i aboraye, piyaha kampa ukibewe. Abiyo, Koti kabiratakenaenaba tigupi ago aboraye, untiye. ²² Piya umagina, abagi kina to maya uwaimintiye: Tigeba toganaba ka yogurtawa Wasanama Ntagara nagakenagaba tibugagte kampa nagakibewe. ²³ Pi kanabipa naekaba maya urimikbewe: Mata'i taeti aboraye. We, marota'i igeftisa aboraye, igiripa a-nkwaiyo. Piya abigiripa a-nkuma iyegaraiyo. ²⁴ Wasanama Ntagaraba naeba kakamaba kampa irosakuwe. Apayaenena aeba manta ka auka'i apaya pegina to auka'i e'wasa purite wagana pemi, pabi nkawameta naeba aborakuwe. ²⁵ Marupa mamparasa kina'miba ikabinataigini nauki nakiyena tabera punataigina, asaba pi yontana aborakiye.

²⁶ Piya, Nowa mintanti kanabi wasana igeba puntasa puma Wasanama Ntagara nae irosakena kana'nepa aborakiniba, pabiya pikibewe. ²⁷ Igeba nanintaba nantini, wanipa nantini, wayapa ika pumagini, iba'enaba puntini, puma kampa aogima napima

mintuguna, Nowa aeba wanipisa karebi ima paiwaogana wanipa tabera pa'ma ipirinta waegasogini, wabe wayape a'ya'ma pu'waewantawe.

²⁸ Pigoya to Aroti mintanti kanabipa pabiya puntawe. Nanintaba nantini, wanipa nantini, ikantanaba puntini, to kinapa ka'isaenaba imuguni, ika puntini, yoga aintanaba puntini, namapa kintini, puma kampa aogima napima mintuguna,²⁹ ka yaga Aroti aeba Sotomu kumapa akabitate waogana yakupe yakupisa kaguge mantarisa tumima a'ya'ma kinapa wabe wayape iyeguma a'ya kaintiye.³⁰ Piya pi ntaga igeba pika kampa napintasa puma, Wasanama Ntagara nae aborakena kana'nekaba kampa napikibewe.

³¹ Pigoya, pi ntagaba ka'waina aeba namankampa nkabobori mintakibitisaba tumima nama nkantabaipintisaba kotankapa a-mpaeyano. Pigoya, to ka'wainaba pabiya yama yogari mintakibitisaba a'wae puma namankatiba a-nkwano.³² Piya, tigeba Aroti nkanarimpa yabantana puwantemika napima kabiyiyo.³³ Ka'waina aeba mikenaenawa ka abugakibemi'naba pipa agu'amankapa kaikiye. Mikenaenawampa a'a-o otakanaba, agu'amaba aogima waikiye.

³⁴ Naeba yekiri abiyo: Pi nkagogo yaga maruta tara yagara waitamintisiginaba Kotiba ka'wainapa ababurintana to ka'wainapa atakiye.³⁵ Piya, tara wae taramisi naninta kao'ena puma mintisiginaba ka'wainapa Kotiba ababurintana to ka'wainapa uwa atakiye.³⁶ (Piya, yogari tara yagara taramisi mintisiginaba Kotiba ka'wainapa ababurintana to ka'wainapa uwa atakiye, Isu piya untiye.)³⁷ Piya yegini abagi kina'miba: Tabé yagara, pintanaba aeta aborakiyema, abigantawé. Piyama abigauguna Isu meto kamana maya uwaimintiye: Purinta kina'mi nkau waintiti kegeba aki pesa pumawe, untiye.

18

Kiya wae'make kamana abikena yagaramake meto kamanane

¹ Pigoya, abagi kinapa iyekita kampa punta asi nasima igeba esotakibeka, Isu meto kamana ka maya uwaimintiye:² Piya, ka kumata ka kamana abikena yagara mintantiye. Pi ntangara aeba Kotikaba kampa aekuruba puntana, a'ya'ma kinakaba kampa aogima napintiye.³ Piya, pabi kumata kiya wae ka mintantiye. Aeba asi nasima pi kamana abikena yagaramati kanama: Kama kina'nempi ata punatasanaga, nao'maeyoma, ampa omi puntiye.⁴ Pigoya, marupa pi kamana abikena yagaramaba aekita potama kampa ao'maentana, aintiba aeba mayama antabintiba napima untiye: Naeba Kotikaba kampa naekuruba puma, wasanamikaba pabiya kampa napiyuwe.⁵ Pigoya, ma nkawae pu'wanta waepa aeba asi nasi kanama ampa nabigayaba miyekanaba nau'amaba aekita pusanaga iba kamana'wa abima ao'maejuwe, untiyema, untiye.

⁶ Piya umagina, Tabé yagara amato puma maya untiye: Ata kamana abikena yagarama unti kamanapa ago abewo. Pipa ayabayawé.⁷ Kotika kagipe asekape asi nasima aegarakibe kina'mi agisaiginaba Kotiba kanara kampa tiyo'maekiye, a. Aeba agawa puma miyaba'miyigina karu'enaba kampa iyo'maekiye, a.⁸ We, urimuwe: Pipa kampaye. Aeba agarao ntanganto tiyo'maekiye. Piya, aintiba Wasanama Ntagara naeba to kake aborama mabi tumukubopa, igeba imatiti'ena pe kinapa taranto aogima mikibewe, piya untiye.

Parasi yagaramake takisi maekena yagaramake meto kamanane

⁹ Pigoya, ka'isa kina'miba ige'waikaba: Aogi kinatawema napintini, to kina'mikaba: Pipa ata kina tako'yanema napinta, pi igi napiye kinakaba Isuba mono kamana maya umintiye:¹⁰ Tara yagararamisi nunamu ikena tabé mono namapinti intase. Pigoya, kapa Parasiwa, to kapa takisi maekena yagarawa sumawe.¹¹ Parasi yagara aeba asima mima ae'waka mayama napima nunamu untiye: Koti, wasana ka'isa kina'miba kuntana ma'enaba pewe. Kamana kampa aogima abewe. Waya'wa taramisiba atatarenaenaba puma ata aguntaena pewe. Naeba piya kinapa kampaye. Piya takisi maeyi ntangara mare, ae piyamaba kampa mintuwe. Pika naeba na'mu pugatauwe.¹² Piya, a'ya'ma sontarapa tara yagaba naeba monoka napima nanintaba a'a-o uma miyuwe. Piya, a'ya'waemaena maeyopa, naeba pipa pako puma nayatar'a'mupisa agento kamuwe, piya untiye.¹³ Aiyogana, takisi maenta yagara aeba pagasara asima mintana mantari aomarakenagaba ani puma kampa piya puntiye. Aeba aibira aimá maya untiye: Koti, naeba agunta kina miyoka, kaeba kantara punatama nao'maeyo, untiyema, Isu piya untiye.

¹⁴ Pigoya naeba urimekiri abiyo: Pi takisi maenta yagaragaba Kotiba aguntaena mae-gasogana wa'ewati uwa wantiye. Piya pi to ka yagaraba kampaye. Abiyo. Ka'wainaba ae'wa nkau maete iyekanaba, Kotiba merunkaba potakiye. Piya, to ka'waina ae'wa nkage au maete tumekanaba, Kotiba ababuma mesuba potakiye, Isu piya untiye.

*Isu inamu ntakarantonto akayona puwaintiye
(Matiyu 19:13-15; Maka 10:13-16)*

¹⁵ Pigoya igeba inamu ntakarantontowai Isuti ibabute kanantawe. Igeba: Ayapa ita aukaya pikeyema, napima kanauguni abagi kinamiba igate ka ibirantawé. ¹⁶ Piya yuguna, Isuba igege'a uma igeba maya untiye: Tigeba uwa itaigini yakarantonto igeba naeti kanaiyo. Tigeba a-nkakunkitaiyo. Piya miye kina'mikaba Koti kabiratakenaenaba utawattantine. ¹⁷ Naeba taga urimuwa abiyo. Ka'waina aeba yakarantonto miyesa nkawameta kampa Koti aegarakib'i'naba Koti kabiratakenaenama nkagupi kampa uma pasikiye, Isu untiye.

*Kutantaga kiye yagarama Isu aegarakenaga kunta puntiye
(Matiyu 19:16-30; Maka 10:17-31)*

¹⁸ Pigoya kiya ka'waina Isu mayama abigantiye: Aogi tisa, naeba aya pukubotisa Koti nke'wsaenaba maekuwema, abigantiye. ¹⁹ Abigaogana Isu piya omintiye: Nana piyema naeba aogi tisaweba yene. Aogiyenama nkagoba Koti ka'antowe. ²⁰ Pigoya kaeba nayatar'a'mu kamana agoba mayama abene: Kumiyenaba a-poma, wasanaba a-nkaeguma kaiyoma, kuntanaba a-poma, kumpari kamanapa to wainapa a-sotaoma, kano kaba kamana wasiyo. Pipa abintanema, omintiye. ²¹ Piyama omogana kiya yagarama maya untiye: Pipa uwaena yagarantomana pi kamana agoba abima wasita kanantone, untiye. ²² Aiyogana Isuba pi kamana abintana, maya omintiye: Ka'enaba kampa puntana, pintanaba po. Kaeba wama kotakapa to kina imima mone maemagina kusi kina imegana, mantari aogiyena ainta abora kamikiye. Kaeba piya potate kanama ampa naegarao, piya omintiye. ²³ Pigoya, piya omogana kana kiye yagaraba tabe kutankapa uwoma waintomeka, pi kamana abogana kunta abuntiye.

²⁴ Piya pogana Isu agantana pika maya untiye: Tabé kutantaga kina'miba Koti kabiratakena kumati ikenagaba igigaba tabera pewe. ²⁵ Pigoya tabe kamoro yagamaba na'ama agepinti uma pasikenaba pipa esegiyenawé, piya tabe kutantaga kana'mi Koti kabiratena kumati ikenaenaba pipa to awameta, tabe kuntaenawé, Isu piya untiye. ²⁶ Piya yogini abume kina'miba maya untawé: We, pipa kepaya Kotiba au'ima aba pikie untiwe. ²⁷ Piya yuguna Isu maya uwaimintiye: Wasana piya pikenaba kampaye. Koti ka'waina piya pikenaenaba waintiye, piye untiye.

²⁸ Piya yogana Pita maya omintiye: Abo. Taeba wa'erepe a'ya'waemaenarepe kasima takabitate kaegaraune, untiye. ²⁹ Piya yogana, Isu a'ya'ma kinapa maya uwaimintiye: Naeba taga urimekiri abiyo. A'ya'ma kina Koti kabiratakenaenaga aega'magini, pikwa'ewaipé, waya yagarawaipé, igagabagipe, inobagipe, uma itakibe'nagiba ³⁰ igeba pi'nakaba mamparasaenaba agasimagina antotapa mesuba puma Kotiba imikiye. Piya, aintiba mantarisa aogi e'wasaena asu maekiye, Isu piya untiye.

*Purintapisa asima mikena kamana kakagara uwaimintiye
(Matiyu 20:17-19; Maka 10:32-34)*

³¹ Pigoya, Isu aeba nagisarisa tara tumpaema kina'wa igege'a uma ibabute wama maya uwaimintiye: Abiyo. Taeba iba Yerusalem kumati ikune. Iyekana a'ya'waema kamana pai poropete kina'mi Wasanama Ntagara naeka uma mono isapi kaemaranta, pi kamana'ama nkau'wapa aborakiye. ³² Nabanempaba namu'isa kina'miti unatakini, naeguma ata punatama, karana natama, kaisa punatakibewe. ³³ Piya pumagini kasotasa naeguma naiburikbewe. Piya piginaba papa kakaga yaga a'ya peka, purintapisa to kake naogama asikuwe, piya untiye. ³⁴ Aiyogini abagi kina igeba pi kamana kampa abintawé. Kana kamana'ama nkagobe kakawaogini igeba aogimaba pi yome kamanapa kampa napintawé.

*Isu aorika yagara aogatantiye
(Matiyu 20:29-34; Maka 10:46-52)*

³⁵ Pigoya Isu aeba Yeriko kuma agora waogana, ke awamori aorika yagara ka mima a'ya'ma kina wagana pugunaba mone kutaka esuwaitama mintantiye. ³⁶ Piya, aeba abomepa uwoma kina kanagana puguna, aeba ka'isa kina ibigama: Maepa nana pewe, untiye. ³⁷ Piya yogini igeba maya omintawé: Isu aeba Nasaretirisa yagara tagora kanama nasiyema, omintawé. ³⁸ Piya omuguna aeba tabera kega'e uma maya untiye: Isu, kaeba Tebiti nkaga'nú, naeka kantara punatao, untiye. ³⁹ Piya yogini paitanta kina'miba: Paka po, uma kabiraugunaba, aeba ige kamana kampa abinta ebi ebima kega'e uma: Kaeba Tebiti nkaga'nú, naeka kantara punatao, untiye. ⁴⁰ Piya yogana Isuba abite, keta asima mintana: Tigeba naeti ababute kanaiyo, untiye. Yogini aorika yagara aeti ampa aboragana, Isu mayama abigantiye: ⁴¹ Naeba nana pugatasanaga kabiye, abigantiye. Abigaogana, pigo aorika yagarama: Wa'ega, naeba nao agasanaga nabiye, untiye. ⁴² Piya

yogana Isu maya omintiye: Kaoba agano. Kamatiti'enagampa aogi pugataye, omintiye.
⁴³ Piya omogana aowamaba aogi pogana agate Isu aegarantana Koti a'mu potaogini, a'ya'ma kina'miba pintana agategini pabiyama Kotiti i'mu potentawe.

19

Sakiyasi Isu aegarantiye

¹ Pigoya, Isu aeba wama Yeriko kumati wama agaikena puntiye. ² Pigoya, pi kumata ka yagara mintantiye. Agewapa Sakiyasi, aeba takisi mae yume kina'mi paitakena yagara, piya tabe mone kutantaga yagara mintantiye. ³ Pigoya, pi ntagara aeba Isu agakenagaba abugantiye. Piya aeba arogū yagaragana wasanami ainigasuguna Isupa kampa agantiye. ⁴ Aibuntana, karu'ena wasana igaita wamagina yabinti asu mima: Isuba ma ki'i atawaka agakuwema, napintiye. ⁵ Piya pogana, Isu aeba pita'i wantana, aomaraogana iyogana agate maya omintiye: Sakiyasi, kaeba karu'ena tumo. Naeba ibantoba namakapi ampikuwe, untiye. ⁶ Piya yogana, karu'ena tumima a'mu purite Isu aba peginisi namankapinti wantase. ⁷ Piya pusuguni a'ya'ma kina'miba agate ka abi'ma mare-u me-u puma maya untawé: Ae ba nanagabayba agunta yagarama ntamapintiba uma pasiye, untawé. ⁸ Piyoga, Sakiyasiba asima mintana tabe yagara maya omintiye: We Wa'ega abo, ka'isa mone kotantepa pako puma kusi kina imukuwe. Piya, ka'isa kina'mi mpone iparitoppi pi aisarapa to tarawa tarawaki kanabi mesuba puma imukuwe, untiye. ⁹ Piya yogana Isu maya omintiye: Ma ntagaraba Abara'amu nkaga'nuwe. Pika iba ae namapi Koti aogi potakenaena ago aboragina aogi piye. ¹⁰ Pigoya, Wasanama Ntagara naeba atama kaka wanto kina iguyosaga'ma ibabuma aogi puwaitakena tumintone, untiye.

Monera kabinta kina'mi mpeto kamanane

¹¹ Pigoya, Isu aeba Yerusaremi kuma agora ampa irosaogini, kamana'wa abinta kina'mi igeba: Ibanto Koti kabiratakenaganab aborakiyema, napintawé. Piyama napiyuguna, pi Isu meto kamana ka maya uwaimintiye: ¹² Ka kiye yagarama to ka tabe yagaramati wama: Ma kiye asinataka a'wae puma kanakuwe, ute pagaso mari wantiye. ¹³ Wakena puntana, kayokaya kina'wa nayatar'a'mu igege'e uma mone asa ka ka puma imima maya uwaimintiye: Tigeba ma moneba maema yoga pugaka pigi, naeba aintiba a'wae puma kanano, uwaimintiye.

¹⁴ Piya uwaimite waogini, wa'ewatisa kina'miba aekaba iyekita potamagini wasana apa igarubauguni ainti wama tabe yagara mayama omintawé: Kaeba ma kiyerepa kampa miyenema napiyunema, omintiye.

¹⁵ Piya yuguniba, e'ero mparisa yagara kampa abitegina, kana yagaraba kiyaena asitantiye. Aibuguna, kana kiye yagara a'wae puma kanama otategina, kayokaya kina'wa mone iminti, igeke ampa igege'e uma maya untiye: Mone timintopa ago yoga pegana tabe pilbera kampayema, ibigantiye. ¹⁶ Piyama ibigaogana, kayokaya yagara ka'waina aeti kanama maya untiye: We naba-o, mone asaba ka namintampetasa yoga pogana to nayatar'a'mu asa aborama waintiye. ¹⁷ Piya yogana aeba maya omintiye: Kanarane. Kaeba aogi kayokaya yagaragawe. Kaeba uwaenarapa aogima kabi yempeka ibanto naeba nayatar'a'mu kuma kiye ugatakana kabikibene, omintiye.

¹⁸ Pigoya, piya yogana kayokaya yagara to ka'waina kanama maya omintiye: We naba-o, kaeba ka asa namintampetasa yoga pogana to nayaka'mu mone aborama waintiye, untiye. ¹⁹ Piya yogana aeba maya omintiye: Kanarana, nayaka'mu kumatasa kina'mi kiye mikibene, omintiye.

²⁰ Pigoya kayokaya yagara to ka'waina kanama maya untiye: Naba-o, mone asagapa maye, maeyo. Naeba kairasa asaema pasema ataogana waintiye. ²¹ Piyama, naeba kagaopa kaeba kamo yagaraga kana ka'isa kina'mi atantanaban kaeba uwa maeyane. To kina'mi ntugabisaba pipa uwa kubene. Piya pempeka naeba kaeka naekuru pumagi uwa atantogana waintiye, piya omintiye. ²² Piya omogana kiya yagarama maya untiye: Kaeba ata kayokaya yagarawé. Pi kaeka kamanakata koti pugatakuwe. Piya, kaeba taga ago abene, naeba namo yagaranaga, naenepa yoga pumaba kampa maeyoka, ka'isa kina'mi puma abora maraga maekena kaga yuwe. Piya naenepa yoga kampa punta uwa miyogini ka'isa pegana ano nkaboragi nakena kaga yuwe. ²³ Kaeba aya pemika monenepa pisinisi kinapa kampa imekini yoga puma a'mu mponenepa maenataga ampa maeyuwo, untiye. ²⁴ Piya umagina, agorasa kinapa maya uwaimintiye: Tigeba mone asaba apama nayatar'a'mu urinti ntagara amiyo, untiye. ²⁵ Piya yogini igeba: We naba-o, aeba nayatar'a'mu asa ago urintiye, untawé.

²⁶ Pigoya naeba a'ya'ma kinaka urimekiri abiyo: Wasanama urintantana aogima maema mintigipa, to kake maekibewe. Piya, ka'isa kampa aogima maema mintigipa,

ipa'ma kaikiye. ²⁷ Pigoya kama kina'nempiba kiyarepa ampiyoma unata kinapa ibabute kanama naora iyeguyigini pu'wae waiyo, untiye, Isu meto kamana piya untiye.

*Isu yaga akabata Yerusaremi kumati intiye
(Matiyu 21:1-11; Maka 11:1-11; Yoni 12:12-19)*

²⁸ Pigoya, Isu aeba pi kamanapa uma a'ya potate, Yerusaremi kumati irosakena wantiye. ²⁹ Wama Oribesi amupa amentapinti wama Petipaesi kumake Petani kumake agora wantana, tara abagi yagararamisi uwaisitaoginisi paitama wantase. ³⁰ Aeba mayama uwaisimoginisi wantase: Wamagirisu maro kumati wama, tonki aikeri wasanami kampa mima nasi nasi aogaso aikeri uma abatama, iyoba'urite kanaiso. ³¹ Iyobaisigina wasana ka'waina kamana uma: Nana pikena iyobase yekirisiba, maya omiso: Wa'ega yogawa waintegina yegira ampa ababuse yiso, uwaisimintiye.

³² Piya yoginisi kayokaya yagara tara isigeba wama yomesa puntase. ³³ Pigoya, pi tonki yaga aikeri uma iyobausuguni, kana yagama nkababa: Nana pikena iyobase, untawe.

³⁴ Piya yugunisi isigeba: Wa'ega yagarama yogawa waintegina yegira ababuse, untase.

³⁵ Piya uteginisi ababurite Isuti wama, akabatiba kaiwaipa atama ama agutama Isu ababuma mayotauguna mima wantiye. ³⁶ Piya pogini, a'ya'ma kina'miba kaiwaipa akubuma ke'i ama agurite wauguna pi'nna nkabobori wantiye. ³⁷ Aeba wamagina Oribesi amu ararabira kanama ke'i waogini, a'ya'ma aokina'miba i'mu puma, a'ya'waemaena aogiyena pogini agaumeka Koti tabera uma i'mu potentaw. ³⁸ Piya tabera uma maya untawe:

We, Wa'egare Koti nkawamuta taeti kanaika, aeka ta'mu potano.

Mantari anta paruyena waiyekana, inatisa kumati asagayukenaena waiyeno, untawe.

³⁹ Piya uma i'mu pupuni, Parasi kina ka'isa igeba wasana abakapinti mintanta kina'miba maya omintaw: Tisa, kaeba kabagi kina uwaimegini kamanapa pakama miyio, untawe. ⁴⁰ Piya yuguna ige kamana antota maya uwaimintiye: Naeba urimekiri abiyo. Igeba paka puma miyesinta, yabankamaba kamanapa piyama tabera yesine, Isu piya untiye.

Isu aeba Yerusaremi kinaka kube'ena puntiye

⁴¹ Pigoya, Isu aeba Yerusaremi kuma agora irosa'ma agate pi kinaka antara puma kube'ena puntana ⁴² maya untiye: Tigeba ma kanabipa asoyama mikena ki'amapa aogima agasanawe. Tigeba pipa tiyorikatagiri a'ya'waemaenaba kampa aogima agawo. ⁴³ Pigoya tigeba abiyo. Aintiba kanaka a'ya pekini, kama kina'mi irosa'ma minaena puma ke akukasigiri igiga pilikibewe. ⁴⁴ Piya pigina, nama kumatipe a'ya'waemaenariepe, tigege yagararipe iyeguma karana titama aguya aema ataena puritaigiri Koti kanama tiyo'maentintanagaba kampa napiyigini ata puritakibewe, Isu piya untiye.

*Tabe mono namapi ikantana puguna Isu igarubantiye
(Matiyu 21:12-17; Maka 11:15-19; Yoni 2:13-22)*

⁴⁵ Pigoya, Isu aeba wama tabe mono namapati iyomepa, kota ikantana puma mintuguna igaruba'magina, ⁴⁶ maya uwaimintiye: Mono isa'ama maya iye: Mono namantepa nunamu ukena namantana peno, iye. We, tigeba piya pegana kuntana pe kina'mi ntamantana piye, uma igarubantiye.

⁴⁷ Pigoya, pi ntagaba tabe mono namapi asi nasima mono kamana uwaimima mintantiye. Piya pogini, tabe mono kiye kina'mibe, mono tisa kina'mibe, to ka'isa kiye kina'mibe, igeba Isu aeguyigina purikibi kamana untawe. ⁴⁸ Aiyuguna, kamana'wa yogini a'ya'ma uwa kina'miba abima aeka tabera ibuntika, aegukena kipa kapa kampa aborantaw.

20

Kiya kina'mi Isu esegiyenawaka abigantaw
(Matiyu 21:23-27; Maka 11:27-33)

¹ Pigoya, ka yaga Isu tabe mono namapi ima wasana aogi mono kamana uwaimima mintogini, tabe mono kiye kinape mono tisa kinape kabyume kinape aeti kanama,

² mayama abigantiye: Kaeba uramo. Mata'i a'ya'waemaena pempepa, ke ugamegina esegiyenaba pene. Kebaya: Piya poma, ugatagina penema, abigantaw. ³ Piyama abigau-

guna maya uwaimintiye: Naegeba natantigi, ka kamana tibigakiri unamiyo: ⁴ Yoni mono wanipa mantarisauenabera wasanamintanaweme, ibigantiye. ⁵ Piyama ibigaogini, igeba:

Ayawe ukune, untini: Mantarisauenawе yekanaba, aeba nana piyema kamana'wapa kampa abima napiyewe, ikiye. ⁶ Piya: Wasanamintanawе yekiniba, a'ya'ma kina'miba

igeba Yonikaba ka taga poropete yagarawema napintaka, yaba kasutasa taegukibewema, napintaw. ⁷ Aibumagini igeba maya kamana antotapa omintaw: Taeba kampa abintune. Yoni mono wanipa aetasabaya aborantie, untawe. ⁸ Piya yuguna Isu maya

uwaimintiye: Piya, naegeba antotapa kampa urimukuwe. Kenkawamutasa kamanapaya unamegi esegiyenaba puweba kampa urimukuwe, Isu piya untiye.

*Waini Yugara kabinta kina'mi meto kamanane
(Matiyu 21:33-46; Maka 12:1-12)*

⁹ Pigoya, Isu wa waya meto kamana ka maya uwaimintiye: Ka yagarama waini iga'na kurintiye. Ku'atake kana yuga wasanamiba: Kiye kabiyiyo, otate e'ero mpri wama e'ero kanabi umintantiye. ¹⁰ Pigoya, kana waini agutaogana asikikena kana aboraogana, kayokaya yagara: Ka'isa asigi kamigina maete kanaoma, otantiye. Otaogana uma irosaogini, pi waini yuga kiye kina'miba aeguma agarubauguna, kana yogarisaena kampa maenta auka a'wae puma kanantiye. ¹¹ Piya pogana, yoga ababa to ka kayokaya yagara otaugana waogini, pabiyama pi kina'mi aeguma ata potama agarubauguna, kana yogarisaena pabiyama kampa maenta uwa auka kanantiye. ¹² Pigoya, to kakagara ka kayokaya yagarawa otaogana waogini, tabera aeguma awamori maebugaintawe. ¹³ Piya puguna, kana waini yogawama nkababa abite maya untiye: Aya pusuve, otantana: Piya ago napiyuwe, untiye. Ma nabugai ntagarane otakana wakiniba agama agoya potama awamu wasikibewema, napintiye. ¹⁴ Piyama napimagina otaogana waogini agate, kana yoga kiye kina'mi aegukena naga nikintini maya untawe: Ae ma ntuga maesanaga aegugasakana pu'waka, ma ntugaba tae'enaena puwakiye, untawe. ¹⁵ Piya ute apasana'urite kabubinti wama kana waini yuga awamori aeguma kaitantawe, untiye. Isu aeba piya untana pi kamanaka wasana mayama ibigantiye: Yoga agowamaba pi kiye kinapa aya puwaitakiye, a. ¹⁶ Abewo, aeba kanamaba piya kiye kinapa iyegugasima, yogawatapa aogi kiye kina ibabuma itakiye, piya untiye. Piya yogini, igeba: We, igeba kampa piya pikibewe, untawe.

¹⁷ Piya yuguna, Isuba igabebé puma maya untiye: Mono isapisa kamana kapa mayama waintiya, agowapa ayamawe, untiye:

Nama kikena kina'miba ka ya ago kainta yawama iba wa'ega ya asima waintiye, untiye. ¹⁸ To ka mayama amato puma untiye:

Piya, wasana ka'waina pi wa'ega yara aeguma au airisa puma aikiye, iye.

Piya, kana wa'ega yaba abobora takuma tumima aeguma ata puwaikiyema, untiye, Isu untiye.

¹⁹ Piya yogini, mono tisa kina'mibe tabe mono kiye kina'mibe, meto kawana'wapa igecka yomepa abibebe puguna intawamaba ata pogini, pabi ntaga arakurikena pumepa a'ya'ma kinaka iyogaru puma atantawe.

*Takisi monega Isu abigantawe
(Matiyu 22:15-22; Maka 12:13-17)*

²⁰ Pigoya, Isu kamana abite imo'ena purite, pi mono kiye kina'miba Isuka kabintawe. Piya, pi kina'miba kampari otakena kina uwaitauguni wamagini, iyoga'wapa mono iga pumagini kabima mintuguna, awamupisa ka ata kamana aborakiniba abite arakurikena puma kamana abikena kina'mi nkiyapi ataigina kamana otaiyema, untawe. ²¹ Pigoya, igeba ampa Isu mayama abigantawe: Tisa, kamanakampaba aogima parutu pegi abune. Kaeba a'ya'ma kinapa aogi kamana uwaimene. Piya, tabe igi wainta kina'mikaba kaekuruba kampa pempekana, taga Kotitisa aogi kamanapa uwaimene. ²² Piya, kaeba ayama napiye ne: Mono kina'mite taeba Aroma wa'ega yagara Sisa takisi mone amusupera kampaye, untawe. ²³ Piya yuguna, Isuba pi meto kamana'waipa ago abite maya uwaimintiye: ²⁴ Mone ka nayakiyo. Amankape awa'enabe mapa kewema, ibigaogini igeba: Sisantawe, untawe. ²⁵ Piya yuguna aeba maya uwaimintiye: Pigo yewa, Sisantanaba Sisa amiyo. Piya, Kotintanaba Koti amiyo, untiye. ²⁶ Piya yogini, wa waya'mi nkiyobipa kamana'watakaba kampa arakurinta uwa pami ntami puma asaba'wantawe.

*Purintapisa asikenaenaga Isu abigantawe
(Matiyu 22:23-33; Maka 12:18-27)*

²⁷ Pigoya, ka'isa Sarusi kina'mi Isuti kanantawe. Pi kina igeba: Purintapisa asikenaenaba kampa waintiye, uma miyume kinakini, ²⁸ igeba Isuti irosa'ma kamana mayama abigantawe: Tisa, Moseseba kamana awa'ena taeka mayama ka kaentiye: Wasana ka'waina waya maema yagarawa kampa aboratanta pu'wakanaba, to a'nanto kiya maetama aganto antotapa yagara aborono, iye. ²⁹ Pigoya, ka meto kamana ugumukune. Piya, tonarentisa tara umaema aga'na mintantawe. Ige iganto waya maema yagara kampa aboranta, mima pu'wantiye. ³⁰ Pu'waogana, ka a'nanto kiyawapa pabiyama maetate uwa pu'wantiye. ³¹ Pu'waogana, to a'nanto ka'waina pi kiyawapa pabiyama maetate pu'wantiye. Pigoya, pi nkaga'na a'ya'ma tonarentisa tara umaema kina'mi pabi ka wae maeta kanamagini, yagara kampa aboratanta pu'waewantawe. ³² Aitiba pi

kiya wae'waipa pabiyama pu'wantiye. ³³ Pigoya, igeba a'ya'magini pabi ka wae'amana maentawewe. Piya ainti asikena kanabipa ke nkwe'e'ena pikiyema, abigantawewe.

³⁴ Piya yuguna Isu maya uwaimintiye: Ma kanara mampabi wa wayapa maema miyewe. ³⁵ Piya, ainti tabe kanabipa asikena kana aborakibipa, Koti kega'e yekini aborakibi kina'miba wa wayapa kampa maekibewe. Kampaye. ³⁶ Igeba enisore kina miyesu puma mimagini, to kake kampa purikibewe. Piya, Kotiba irubintisa ibage pekini ae araga yagaraena puma mikibewe. ³⁷ Pigoya, paipa Mosese irubisa asima mikena kamana untiye. Aeba yabi yaku nkabusua aboranti, pi kamana kaentana Koti nkageba mayama kaentiye: Naeba Abara'amu, Aisaki, Yekobu ige Koti mintuwé, untiyema, kaentiye. ³⁸ Piya, pu'wantatisa iyogama asikibewema, Mosese aeba pika napima Koti nkageba piyama kaentiye. Piya, Kotiba pu'wanta kina'nane. Aeba iyoganta kina'mi Koti mintegini, esegiyenarasa iyoganta kina uwa miyewe, Isu piya untiye.

³⁹ Piya uwaimogana, mono tisa kiye kina ka'isami pi kamana antota maya untawewe: Tisa, kaeba aogi kamana yene, untini, ⁴⁰ igeba to kake abigakenaba iyekuru puma atantawewe.

Isu Parasi kinapa Karaisiti yagaraga ibigantiye

(Matiyu 22:41-46; Maka 12:35-37)

⁴¹ Pigoya, Isu maya uwaimintiye: Nana piyema Karaisitikaba aeba Tebiti nkaga'nuweba yewe. ⁴² Piya, mono isapi Samu isapipa Tebiti aewapa mayama kaentiye: Inatisa Tabe Yagaramaba Wa'ega yagaranepa: Kaeba nayatakanti miyo omintiye, iye.

⁴³ Piya, aintiba kama kinakapa uwaitakini kae kagisa amentapinti wama mikibewe, omintyema, piyama Tebiti kaemarantiye.

⁴⁴ Pigoya, Tebiti aewapa Wa'eganene otantiye. Aeba aya piyema aga'uwkaba: Wa'eganeneba, untiyemagina Isu ibigantiye.

Mono tisa kina ige'ma kamana Isu untiye

(Matiyu 23:1-36; Maka 12:38-40; Aruku 11:37-54)

⁴⁵ Pigoya, a'ya'ma wabe wayape mima Isu kamana abima mintuguna, abagi kina'wa maya uwaimintiye: ⁴⁶ Tigeba mono tisa kina miyesu nkawametapa a-mpima, uwa aogima miyivo. Igeba e'ero kai amirite ke'i paebuta nasiginu, wasana akiyenabinti wama wa waya igama i'mu puwaitasanaga igu'amaba tabera waiye. Piya puntini mono namapipe taenabikenabipe tabe kina'mi ntabae maema paitama mikenaga yewe. ⁴⁷ Piya untini igeba kiya wae'mi namankaipe kotankaipe uwa paibuntini, kampari nunamuba e'erotia yewe. Pigoya, pi kina'mipa aintiba Kotiba antota'enaba tabera ka ibi'ma kuntaenaba imikiye, Isu piya untiye.

21

Kusi wae ka'waina Kotika a'mu mpone atantiye

(Maka 12:41-44)

¹ Pigoya, Isu aeba tabe mono namapi ampima agaomepa mone kutantaga kina'miba Kotika i'mu mpone kankabebi atauguna, agantiye. ² Piya, yaba kampa wainta abeya wae ka'waina irosa'ma tete monento tara kankabebi atantiye. ³ Piya pogana Isuba agate maya uwaimintiye: Naeba taga urimekiri abiyo, ma nkabeya kusi wae'maba ka'isa kina'mipa igasima moneba ataye. ⁴ Ka'isa kina'miba uwoma mponewai waintegini Kotika i'mu moneba atagana, ma kusi abeya wae aeba monewapa naninta ika puma nakena kampa atanta, a'ya'ma kasiwaegaite uwaraka'ya mintiye, Isu piya untiye.

Mampabisaea a'ya wakena kamanane

(Matiyu 24:1-14; Maka 13:1-13)

⁵ Pigoya, ka'isa kina'miba tabe mono namankamaka maya untawewe: Mono awa'enaba aogiyena potama tauka pugaye, untawewe. Piya yuguna, pika Isu maya untiye: ⁶ Nama agama, ti'mu pentana aintiba kampa waikiye. Ka kana aborakiniba kama kina'mi irosa'ma nama kumatipa akasagasuba kasaigina ka yabankamaba to ka yabankama nkabobora ware'naigina nama tubo aborama waikiye, untiye.

⁷ Piya yogini, igeba mayama abigantawewe: Tisa pintanaba ayantaga aborakiye. Nana kuktantana aboraka agapa kana arosakena piyeba, ukune, untawewe. ⁸ Piya yuguna Isu maya uwaimintiye, tigeba tigu'ama a'yugu purigaisanaga aogima kiya kabima miyivo. Wasana uwoma aborama nae nage uma naeba Karaisiti nawe, yigini, to ka'isamiba kanapa ago arosawaye, ukibewe. Pigoya tigeba piya ukibe kina'mipa a-nkiyegaraiyo. ⁹ Piya, aintiba ma'ena puma esiba kamana abintiripa, a-pami puma tiyekuruba a-piyo. Pintanaba paitama aborawakana, aintisa kanaba agaropa kampa aborama ainti aborakiye, Isu piya untiye.

¹⁰ Piya untana Isu to maya uwaimintiye: Maga maga kina'miba kamaena pigini to ka'isa kina'miba to ka marisa kina uma iyeguyigini kamaena purite wagana pikibewe. ¹¹ Pigoya, imimapá tabera pekana, ka'isa auka'i tabe kabu aborakaná, yonintana tabera aboraurite wagana kana pikiyé. Piya, mantariba ku kantanaba toma toma aborakiri agate tiyekuru puma tabaraba pikibewe.

¹² Pi a'ya'waemaenaba kampa aborantakini, igeba tiraku'ma karana titama ataena puritama, mono namapipe iga'na namapipe tibabuma kamana uritama ata puritakibewe. Pigoya nae nage una ata punatamagini kiya kinake kamana abikena kinake ige iyobi tibaburite wama kamana uritakibewe. ¹³ Pigoya piya pigiri, pi ntaga aogi kamana'nepa uwaimikibewe. ¹⁴ Pigoya ibaba aogima abiyo: Pi ntagaba tigeba ige iyobi una asimaba: Ayama kamana antota ukunemaba, a-ntapiyivo. ¹⁵ Naene tigu timabi tiwamupi kamana'nepa atakana aogi napi napiyenabe aborarimekiri ukibewe. Albigini kama kinatimpiba kamanatipa kampa aegeuma aka'yukibewe, untiye.

¹⁶ Pigoya, pabi ntaga tino tibakibe, tiganto ti'nanto, ka'kura tiyo'mibe kama puritama, iyekita puritama, ataena puritama, tige aruyenabisa ka'isaba tiyegukibewe. ¹⁷ Pigoya, a'ya'ma kina'miba abima intabipa nae nageraka ata puma kama puritakibewe. ¹⁸ Pigoya, ti'no nkabiyapa ka'antoba kampa kaka wakiye. ¹⁹ Piya, tigeba esegima mima tigu timapa to kake maekibewe, Isu piya untiye.

*Yerusaremi kuma ainti ataena pikibi kamanane
(Matiyu 24:15-21; Maka 13:14-19)*

²⁰ Pigoya, aintiba tigeba agakibepa irebu kina kanama Yerusaremi kuma kobe pigiripa agamagiripa: Kuma ai'nere aguya aikená kana agarosaye, yiyo. ²¹ Pigoya Yutiyá mari mikibe kina'miba tiyegaka wama amu mari iyiyo. Piya Yerusaremi kumati mikibe kina'miba pabiyama karu'ena pai'ma wakibewe. Piya uwaena kumati kampa wakibewe. ²² Pigoya pi ataga Koti wasana a'yikiki pemi ntaga aborakiniba, mono kamanapaunta'enamaba esegi puma aborawaekiye. ²³ We, iga'entaga wae'mibe yagararono a'mikibe wae'mibe kamparagama mikibewe. Mampara mikibe kina'miti kuntaena aborakanaba, Koti agobintanaba mampara a'ya'ma mikibe kina'mipa pabiyama aborawaimikiye. ²⁴ Piya, kasotasa irisakibewe. Aibumagini, iga'na ubu'urite wama uwoma to kina'mi nkibakapi metaigini kayokaya'ena puwaitama mikibewe. Piya, namu'isa kina'miba Yerusaremi kumapa aguya aimá mima ataena puyaba'miyigina, ainti namu'isa kina'mi ige'waipa a'ya puwaitakiye, Isu piya untiye.

*Wasanama Ntagara aborakena kamanane
(Matiyu 24:29-35; Maka 13:24-31)*

²⁵ Pigoya, pi ntangaba pape, ope, noribe awame'enawa tonarona aborakiye. Piya mabipa kayo waninkama aiga'yo'ya puma tapo uma agayemisa pekini, a'ya'ma mampabisa kina'miba karu puma iyekuru pikibewe. ²⁶ Pigoya, pi ntangaba mantaba kuru pekana esegiyenawapa iyoba'ma kareko pigini, mara a'ya'ma kina'miba uwoma nkigi napikibewe. Eya, ka'ena mabi aborakenaenaga napima karu puma iyekuru pigina iyonanta'ena pikiyé. ²⁷ Pintana aborakapa, Wasanama Ntagara naeba ibinankama nkagupinti tabe esegiyenantaga e'wasaenanentaga aborakini nagakibewe. ²⁸ Piya, ainti pintana agobima aborakiri, asimagiri tiyowa aisesama agate: Koti tababikena kana agarosaye, yiyo.

²⁹ Pigoya piya untana, Isu meto kamana ka amato puma maya uwaimintiye: Tigeba piki yage, to ka'isa yawamake agoga napiyivo. ³⁰ Piya, a'no mparagiri agantiripa: Kabo yagawe, yewé. ³¹ Piya yesa puma, pi yontana aborakiri agateba: Koti kabiratakena kana agarosaye, yiyo. ³² Naeba taga urimekiri abiyo: Mamparasa kinapa kampa purintigina pi yontanaba a'ya'ma aborakiye. ³³ Pigoya mage mantageba a'ya wakana, kamana'nepa waiyaba waima kampa kakakiye, Isu piya untiye.

Abagi kina'miba aogima kabiyivo, Isu untiye

³⁴ Pigoya, Isu to maya untiye: Asi nasi esegi wani ntama aibo'ena puma mampabisae-naga napi napi puma Kotika tigegu'a pusanaga, tigeba aogima napima kabima miyivo. A'yugu uwasuwa puma mintigina aborasanaga kabima miyivo. ³⁵ Piya, mampabisá kina a'ya'ma kinati pintanaba aborakiye. ³⁶ Piya, asi nasi aogima kabima miyivo. Asi nasi Koti esotaigina esegiyenaba timeno. Piya pigina, pi a'ya'ma ataenamaba uwa tigasakiri, Wasanama Ntagaramante naobi aogima asikibewe, Isu piye untiye.

³⁷ Pigoya Isu aeba a'ya'waema yagaba tabe mono namapi mima a'ya'ma kina Kotitisa aogi kamana uwaimima mintantiye. Pigoya, ase yoganaba Oribesi amuti ima waibutaye. ³⁸ Piya pogini, abaya aseká a'ya'ma wabe wayape irosa'ma Isuti kanama tabe mono namapi ampima aetisa aogi kamana abi puntawé.

22

Yutasi Isu minaga puntiye

(Matiyu 26:1-5, 14-16; Maka 14:1-2, 10-11; Yoni 11:45-53)

¹ Pigoya, yisiti kampa wainta pareti nakena yaga aborakina puntiye. Piya, nakenagana ataoame ntagma nkagewapa Pasobawe. ² Aborakena pogini tabe mono kiye kinake mono tisa kinake igeba a'ya'ma kinaka iyekuru pumagini: Isu ayama aegukune, untawe.

³ Piya umagini mintuguna, Sataniba Isu abagi yagara ka agewapa Yutasi Isikeriyoti, aeba nagisarisa tara tumpaema kina ige arayenabisa yagara, ae antabi pasintiye. ⁴ Piyama pasogana, tabe mono kiye kinake mono irebu kinake igeti aruyenabi wama Isu minaga pekini arakurikibe kamana uwaimintiye. ⁵ Piya uwaimogini igeba abimagini i'mu pumagini, Isu nkaegukena kutaruu mone amikena kamana uma aogi puntawé. ⁶ Piya yuguna kamana'wai wasiyu'ma, wasanamiba kampa agama abuguna kakama minaga pikena apasa puma mintantiye.

Isu abagi kina'wake Pasoba naninta nantawe

(Matiyu 26:17-25; Maka 14:12-21; Yoni 13:21-30)

⁷ Pigoya, yisiti kampa wainta pareti nakena kana aborantiye. Pi ntaga sipisipi kaemagini Pasoba naninta nantawe. ⁸ Pigoya, pi ntaga Isu Pitake Yonike maya uma uwaisintiye: Tisigeba wamagiris, Pasoba naninta maema ai'aru pisigi uma nano, untiye. ⁹ Piya yoginisi isigeba: Ae ntamapi nanintaba maema ai'aru pususe, yusuguna, maya uwaisimintiye: ¹⁰ Abiso. Tisigeba wa'eri ima wasana ka wani kankabe maete wakibi ntagara pabuma aega'urite wa'eri iyisigina, namapinti uma pasekirisiba pabi ntamapi tisigeba uma pasiso. ¹¹ Piya, namapi ima pi namankama nkabapa mayama omiso: Tisa yagara kaeka maya iye: Ae mparunta nabagi kina'mige taeba Pasoba nanintaba nakune, iye, omiso. ¹² Piya omisigina nama mparupa inati tabe maru ka ama agumagina aogi pumaranta tisiyakekirisi, pita'i maema asu ai'aru piso, uwaisimintiye. ¹³ Piya uwaisimoginisi, isigeba wama pi yomesa pumaginisi abatama Pasoba naninta maema ae'arubantase.

Naninta nantini Isu ae'wa nkara'ena puwaiyakintiye

(Matiyu 26:26-30; Maka 14:22-26; 1 Korinti 11:23-25)

¹⁴ Pigoya nakena kana aboraogini, Isuge abagi kina'wampige namapi ampima nantawe. ¹⁵ Piya nantini maya uwaimintiye: Naukikenä kana'nepa agarosagi, Pasoba naninta ma tigege nakenagaba tabera nabiye. ¹⁶ Naeba yekiri abiyo. Naeba Pasoba nanintaba to kake kampa nanta Koti kabiratakena aborakini pi'nna nkantota waikiye, untiye.

¹⁷ Piya umagina, aeba wani kankabe maema, Koti a'mu potama, maya uma imintiye: Tigebe maema marona mona puma naiyo. ¹⁸ Naeba yekiri abiyo: Waini wani to kake kampa nanta mintakanä Koti kabiratakena aborakiye, piya untiye. ¹⁹ Pi kamana umagina pareti maema, a'mu potama, ako puma, maya uma imintiye: Mapa nauna, tigeka uma atauwe. (Naeka napima pipa nama miyiyo, untiye. ²⁰ Pi naninta nauguna waini kankabe maema pabiyama imima untiye: Ma kankabebipa Kotiti aogaso atokaekenä kurante waintiye.)

²¹ Piya, abewo. Nae minaga pikib'i naba aeba naege ka yabaera mima naninta maema nama mintuse. ²² Wasanama Ntagara naeba wasanami nkiwamuta purikenaenaba kampa waintiye. Naeba Koti ke'i namintemiti wakuwe. We, minaga punatakib'i naba aeba antotapa atama miliye, piya untiye. ²³ Kamana piya yogini, abagi kina'mi: Kebaya pikibe kina iyewa, marebiga mebiga puntawé.

Abagi kina'mi tabe yagarara kebaya miliye, untiye

²⁴ Pigoya, abagi kina igeba: Taetisa kebaya tabe yagararepa mintiye, umagini maka untawe. ²⁵ Piya puguna Isu maya uwaimintiye: Mabiswa wa'ega kina'miba ige esegi puma uwa wasanaba aogima kabiwaitagini, uwa kina'miba i'mu puma kayokaya'ena puwaitawé. ²⁶ Pigoya, tigetiba piyaenaba a-nkaborano. Tigetisa tabe kina'miba uwa kina miyesu, pi nkawameta miyeno. Piya, tabe yagara aeba kayokaya kina miyesu, pabi awameta miyeno. ²⁷ Pigoya tigebe napiyyo. Ae'na asugainta'enawé. Wasanami nakibepa mara'mima naninti naki'bina asugainta'enabera, kao'ena pikib'i na asugainta'enawé. Uwa mara'mimagina naki'bina pipa asugainta'enawema, ago abintawé. Piya, naeba tige tibakapi kayokaya kina miyesu puma miyubo.

²⁸ Pigoya, kuntaenama nkagupi miyogiri kampa natate wanta naega'ma nasima miyewe. ²⁹ Pipa nabanempa naepa kabikenaenama nkagowampa unatagi, naeba pabiyama tigepa paitakena kina uritauwe. ³⁰ Piya, tigebe aintiba kabiratakena kumata naege naninta wani ntantiri ti'mu pikibewe. Pigoya, pi ntaga kiya puma mikena yabaera

mima Isureyo kina ige nagisarisa tara tumpaema kina'mi kamanata kabikibewe, Isu piya uwaimintiye.

Pita au'nana kamana omintiye

(*Matiyu 26:31-35; Maka 14:27-31; Yoni 13:36-38*)

³¹ Piya uwaimintiana toba Pitapa maya omintiye: Saimoni, Saimoni, witi ao asari pegina i'nantanawapa pa'wamisa puma, Sataniiba tigepa maema timiyo'ena puritakenaga Kotipa abigaoga, ³² pigo naeba kamati'ti'enaga a'yugu pusanaga kaeka uma nunamu yuwe. Pika kaeba mono kita to kake a'wae puma aogi mimagina, kaokinapa iyo'maema esegi puwaitao, omintiye.

³³ Piya yogana Pita maya omintiye: Wa'ega, kaeba iga'na namapipera purikenaenar- ipera wagapa, kaega'ma wakuwe, untiye. ³⁴ Piya yegana, Isu maya untiye: Pita, naeba ugamekana abo: Kokorewamaba iba asekapa kampa aga untakana, kaeba kakagara kampa agao ntagaraweh unataganah aga ukiye, Isu piya untiye.

³⁵ Piya untana, abagi kina'wapa to ka maya uwaimintiye: Naeba monebe ira'na kutipe tigisanape kampa wainta urita wagiri, wama uma aguyosagantawoma, ibigantiye. Ibigaogini: Piyaba kampaye, untawe. ³⁶ Piya yuguna, maya meto kamana amato puma untiye: Piya, ma kanabipa ibaba tigetisa ka'waina aeba mone waintakanaba, maemagina miyeno. Piya, to ka'waina aeba ira'na ku waintakanaba, arakae puma miyeno. Pigoya, ka'waina aeba ma'ena kasupa aguyosagantanaba, kaiwa ka kasakanah, ika puma pi'naba ka kaso mae ameno. ³⁷ Naeba yekiri abiyo: Naeka meto kamana ka mayama pai kaemarantine: Aeba antage kina'mi nkaruyenabi atakibewema, kaemarantiye. Pigoya pipa nae kamana untakana mampa aboraye, untiye. ³⁸ Piya yegini abagi kina igeba maya omintaweh: Wa'ega, agao, Mampa kasopa tara waintiyema, omuguna Isu: Pabigoye, otantiye.

Isu Kesemani yugabi nunamu untiye

(*Matiyu 26:36-46; Maka 14:32-42*)

³⁹ Pigoya, Isu aeba asi nasi kumapa atategina Oribesi amuti ibomekini, pi nkaseba abagi kina aepa aega'ma intawe. ⁴⁰ Umibometi uma irosa'ma abagi kina maya uwaimintiye: Tigeti timiyo'ena aborakiri ware'asanaga nunamu uma esegi piyo, piya untiye. ⁴¹ Piya utegina, arompari umimagina uma arakabima maya uma nunamu untiye: ⁴² Naba, kaeba ukenaba kanara yegana ma nauki nakiyenaba naparo. Piya, nae napiyenakaba kampaye. Kaeka ntapiyena uma esegi penemawe, piya untiye. ⁴³ (Piya yegana mantabintisa enisore ka tumima tumpa esegi potantiye. ⁴⁴ Piya, napiyenawapa to kunta puwaogana to kake esegima nunamu untiye. Piya pogana, tete aiseba pa'uritegina tipe puma mabi tumintiye.)

⁴⁵ Nunamu ugaite, asima abagi kina'miti wama igaomepa, igeba intara'ena puma iwaita mintantaweh. ⁴⁶ Iwaita mintuguna maya uwaimintiye: Tigeba nana piyema tiwaiba waitamintaweh. We, tigeti timiyo'ena aborakiri ware'asanaga asima tiyogama mima nunamu iyio, Isu piya untiye.

Isu arakurintawe

(*Matiyu 26:47-56; Maka 14:43-50; Yoni 18:3-12*)

⁴⁷ Piya umagina mintogini kama kina igeba kanantaweh. Pigoya, nagisarisa tara tumpaema kina ige aruyenabisah ka yagara, agewapa Yutasi, aeba paitama ibabute Isuti wama uma amo nantiye. ⁴⁸ Amo naogana Isu maya omintiye: Yutasi, kaeba nana piyema Wasanama Ngatara naepa namo nama minaga pene, untiye.

⁴⁹ Pigoya, Isu nkaokina igeba pintana aborakena pogini agate, maya untaweh: Wa'ega kaeba abega, kasotasa iyeguyeno, untaweh. ⁵⁰ Piya yuguna, igetisa ka'waina monota paitanta kiye yagarama kayokaya yagara kasotasa aegumagina ageba ayatakantisa arisakaentiye. ⁵¹ Piya pogana Isu agate: Uwa miyio, untiye. Aibumagina, pi nttagarama nkagiba maemagina mayo atama asu'a potantiye.

⁵² Pigoya, mono namapisa tabe kiye kinape irebu kiye kinape kabiyume kinape, ae arakurikena kananta kina, igeba Isu maya uwaimintiye: Tigeba naeka abeganaba ku kina kanta pogiri, tigeba ma'ena pikena irebu kasutintaga kanama naegukena pewo. ⁵³ We, naeba asi nasi tabe mono namapi mima mono urimone. Piya, pi nttagaba nana piyema kampa narakurintane. We, ibaba tige kanapa aboragina, tununtanama nkesegiyenaba aboraye, Isu piya untiye.

Pita Isuka kampa agantuwe untiye

(*Matiyu 26:57-58, 69-75; Maka 14:53-54, 66-72; Yoni 18:12-18, 25-27*)

⁵⁴ Pigoya, igeba Isu araku'ma ababute wama monota paitanta kiye yagarama ntamapi ababute intaweh. Piya puguna, Pita aeba ainti ika'i wantiye. ⁵⁵ Pigoya, pi kama kina'mi

kagisa kagopi uma pai'ma yaku kaima tapima mintantawe. Umintuguna Pita aeba pabiti wamagini ige ibakapi umintantiye.⁵⁶ Umintogana kayokaya araga ka'waina kanama yaku nkabura agabebé puma maya untiye: Ma ntagaraba aege miyemi ntgarawé, yogana,⁵⁷ Pita awamu abarisa'ma: Waya, naeba aepa kampa agantuwe, untiye.⁵⁸ Piya otate mintogana, kampagina e'ero kanaba kampa mintogana, to ka'waina agate maya untiye: Pi kaebe ige aruyenabisawe, yogana, Pita: Ma ntagara, naeba kampaye, untiye.⁵⁹ Pigoya ainti to ka'waina irosa'ma uma esegi puma maya untiye: We, ma ntagara taga aege mibemine. Aeba Karariya marisawa, yogana,⁶⁰ Pita maya untiye: Ma ntagara, kaebe kamana yempe kamanapa kampa abintuwe, untiye. Piya yogana kokore ka aga untiye:⁶¹ Pigoya, Wa'ega aeba a'wae pumagina Pitati aomaraogana, Pita aeba Wa'egama ominti kamana napintiye. Piya: Kokore aga kampa untakana, kaebe kakagara naeba aepa kampa agao ntgarawé ukibene ominti,⁶² pi kamana napimagina antara purite abe'i irosa'ma wama tabera kuba'ena puntiye.

*Mono kanisore akiyenabi kamana otantawe
(Matiyu 26:59-68; Maka 14:55-65; Yoni 18:19-24)*

⁶³ Pigoya, Isuta kiya kabima minta kina igeba pumireri potama aegumagini,⁶⁴ aowaba airari kaetama aeguntini: Kaebe poropete mintanapa ma kaeguyemi ntgararama nkage-wapa yo, untawe.⁶⁵ Pigoya, igeba to pumireri puma uwoma ata kamana otantawe.

⁶⁶ Piya puguna marogini, tabe mono kiye kinape mono tisa kinape to kaisa kabiyume kinape a'ya'ma aki puma kamana otakena yuguni, Isu ige aruyenabi ababute wantawé. Piya puguni kamana mayama omintawé:⁶⁷ Kaebe Koti utaratanta yagara Karaisiti mintanapa, uma aboraramo, untawe. Piya yuguna aeba maya uwaimintiye: We naeba urimosinta tigu kampa namesine.⁶⁸ Piya, tibigakiripa antotapa kampa unamikbewe.⁶⁹ We, Wasanama Ntagara naeba ibasa yaga tabe esegi yagara Koti nkayatakanti mikuwe. Pi kana'ne ago aboraye, untiye.⁷⁰ Piya yogini, a'ya'ma abite: Kaebe Koti Ntagaragawoma, abigantawé. Abigauguma: Tigeba ago yewe. Pipa naewe, untiye.⁷¹ Piya yogini maya untawe: Nana piyema to kake kamana ukune. Ae'wa nkawamupisa pabigo yegi abune, untawe.

23

*Isu ababute Pairatiti wama kamana otantawe
(Matiyu 27:1-2, 11-14; Maka 15:1-5; Yoni 18:28-38)*

¹ Pigoya, a'ya'ma pi kina'mi Isu Pairatiti ababute wantawé. ² Aeti wamagini agobima kamana maya uma otantawé: Ma ntgararama nkagoba mayama waintiye. Aeba a'ya'waema mampabisa kina'mite kamana akayaratama: Wasana wa'ega yagara Sisa aepa mone a-nkamiyo untana, ae'wakaba: Naeba Karaisiti, wasana wa'ega yagara nawe iye, piya untiye.³ Piya yuguna Pairati: Kaebe Yuta kina'mi Nka'ega yagaragawoma, abigaogana: Pi pabigo yene, Isu untiye.⁴ Piya yogana, Pairati tabe mono kiye kinape to uwoma uwa kinape maya uwaimintiye: Naeba ma ntgararama nkaguuntaenawakaba aguyosagaopa kampa agauwe, untiye.⁵ Piya yogana igeba esegimagini maya untawé: Aeba waya wa esegi kamana uwaimegini igeba pami ntami puma mare-u me-u pegana, kana ma'ena kamana'ama mampabi tabe puma anosawaye. Aeba Karariya marisa agobima pintana purite mata'i a'ya'ma Yutiya mari pabiyaena piye, piya otantawé.

Isu to kake ababute Erotiti wama kamana otantawé

⁶ Pigoya piya yuguna Pairati abite: Ma ntagara aeba Karariya marisawoma, ibigantie.⁷ Piyama ibigaogini igeba owe yuguna: Pipa Eroti kabitemi mpawé, untiye. Piya umagini: Erotiti ababute waiyo, yogini ababute wantawé. Pigoya, Eroti aeba pi kanabipa Yerusaremi kumata a'yo umintantiye.

⁸ Piya ababute wauguna, Eroti aeba Isu agama antawamaba asoya puntiye. Aeba Isu nkawaga kamana abima e'ero ntaga aepa agakenagaba abuma mintomekanawé. Pigoya, aeba maya untiye: Naeba yekana awame'ena ka peka agakuwe, untiye.⁹ Piya umagina Isupa to kamana to kamana abigaoganaba, antotapa kapa kampa a'wae puma omintiye.¹⁰ Aibogini, tabe mono kiye kinape mono tisa kinape mima kamanapa aeka esegima otantawé.¹¹ Piya, Erotibe irebu kina'wape igeba Isu to kake karana atama ata kamana otamagini, wa'ega kai ka maema amitamagini, Pairatiti to kake a'wae puma agarubuguni ababute wantawé.¹² Pigoya Pairatibe Erotite isigeba paipa isimo'enabi mintantamekinisi, pi ntaga isiyó'ena puma paru puntase.

*Pairati maripora aegukena kamana untiye
(Matiyu 27:15-26; Maka 15:6-15; Yoni 18:39-19:16)*

¹³ Pigoya Pairatiba tabe mono kiye kinape to ka'isa kiye kinape wa wayape igega'e yogini kanama aki puntawe. ¹⁴ Piya puguna aeba maya uwaimintiye: Tigeba ma ntagaraba naeti ababute kanamagiri maya yewe: Aeba wa waya akayuma kamana uwaimiye, yega, naeba pi kamanaka tige tiyobi abigaopa, kapa tige ota nkaibo'enawapa kampagi aborauwe. ¹⁵ Piya, Eroti pabiymaya aguyosakate, to kake umagina agarubagiri a'wae puma to naeti ababute kanawé. Abewo. Purikena awametapa ka'enaba kampa puntiye. ¹⁶ Pika naeba yekini, irebu kina'mi eru kasutasa aeguma airisa kasaigina pi kamana'wapa a'ya wakiye, piya untiye. ¹⁷ (Piya, pi ntaninta nakena yagaba aeba iga'nabisa ka yagara iyoba atami puntiye.)

¹⁸ Piya yogini, a'ya'ma pi kina igeba tabe kamana kaga umagini maya untawe: Aeguyegana pureno. Parabasi aepa iga'nabisa iyoba tamo untawe. ¹⁹ Pigoya, Parabasi aeba ka'isa kina'mige kamana akayuma ma'ena pumagina wasana ka aeguma kaiyogini iga'na namapi atantaka, piya untawe. ²⁰ Pigoya, Pairati aeba to kake maya uwaimintiye: Isu uwa atakana wasanaga nabiye untiye. ²¹ Piya yogini igeba to kake esegimagini: Maripora aeguyegana pureno, untawe. ²² Piya yuguna Pairati kamana'wai aka'i yogana kakagaena pogana, maya uwaimintiye: Aeba nana kampara gaenaba pegiri aegukena pewe. Naeba aboganaba ataenawaka purikena awametapa kampa piye. Aibegi, yekini eru kasutasa aegugasigina uwa mikiye, piya untiye. ²³ Pigoya, igeba esegima to kake tabe kamana umagini imo kamana uma maya untawe: Maripora aeguyegana pureno, untawe. Piya a'yugu kamana umagini kiya yagarama kamana aeguntawé. ²⁴ Piya puguna pi kamana abiwaemima Isu purenema uma a'ya atantiye. ²⁵ Piya, kamana'wai wasimagna wasana aeguma kaiyogini iga'na namapi atanta ntagara, aepa iyoba imintana, Isupa ige yumesa puma irebu kina imintiye.

Isu maripora aeguyuguna purintiye
(Matiyu 27:32-44; Maka 15:21-32; Yoni 19:17-27)

²⁶ Pigoya, igeba Isu ababute ke'i wama wasana ka uma abatantawe. Kana yagarama nkagewapa Saimoni, aeba Sairini kumatasa yagarawé. Aeba torisa kanaogini araku'ma Isunta maripo maema asesa atauguna aesagabite Isu nkaka'i wantiye.

²⁷ Pigoya wasana wabe wayape uwoma kina kaga iyega'ma wantawé. Pigoya, uwoma wae'miba intara puma kube'ena puma potantawe. ²⁸ Piya puguna, Isu a'wae puma maya uwaimintiye: Yerusaremi kumatasa wae, tigeba naeka kube'enaba a-piyo. Tigeba yagararike tigerikeka kube'enaba piyo. ²⁹ Abewo. Ainti ka kana aborakiripa maya ukibewe: We, anamo waepi iba'waepe yagara nono kampa iminta waepi igeba i'mu piyo, ukibewe. ³⁰ Piya, pi ata yagaba amu'wamakaba: Tigaba'ma tumima tatikaeyo, untiri, A'abiwamakaba kuya mpaema tapaso, ukibewe. ³¹ We, aoso ya airakuyesa puma naepa naeguntiri, asa yaba aya puwaitakibewe, Isu piya untiye.

³² Pigoya ata pusume yagara tara aeke kaga iyegukena ibabute wantawé. ³³ Piya wama, maba ka agawapa A'no nkayampu, pita'i irosa'ma Isu maripora aeguntawé. Pigoya ata pusume ntagara ayatakanti kapa aeguntini to kapa ayake'masi aeguntini puntawé. ³⁴ Pigoya, Isu mayama nunamu untiye: Nabanempa, igeba nae agoga kampagini abintini maya pewe. Pika ataena punatantanawaipa mae igaso, untiye. Pigoya, irebu kina'mi kaiwapa atuguguna abakapisa ata'urite tete'ena puma amaeri ampaeri puntawé. ³⁵ Pigoya, wasanaba uwoma kina mimagini pintanaba agawaeyuguni, kiya kina igeba ka abi'ma ata potama maya untawé: Wasanami ka'isa kina iyo'maeyamisa puma a'e'wa nkaupa ao'maeyano. Piya, aeba Karaisiti, Koti utaratanti ntagara mintanaba piya peno, untawé. ³⁶ Piya yuguni, irebu kina igeba pabiymagini aeguma, karana atamagini, asa wani amikena puntini maya untawé: ³⁷ Kaeba Yutiya kina'mi Nkwa'ega yagara mintanapa, kaeka kaupa au'iyo, untawé. ³⁸ Pigoya, a'notapa kamana awa'ena mayama kaentawé: Ma ntagara aeba Yutiya kina'mi Nkwa'ega yagarawema kaentawé.

³⁹ Pigoya, ataena punti agunta yagara ka'waina maripora mintana iyo'maemagina ka abi'ma maya untiye: Kaebe piyamagaba Karaisitigawo. Kaeka kaukapa iyoba'atantana tasigepa pabiymaya kaga iyoba tasitao, untiye. ⁴⁰ Piya yogana, to ka ataena punti ntgararama aepa ka abi'ma maya untiye. Kotigaba kampa kaekuru pegina piyaba yeno: Aege kuntaenaba ka awameta ago maeyune. ⁴¹ We, tasigeba aguntaenaresika umagini kanara mantanaba purasitawé. Aepa aguntaenawa kampa wainta yagara uwa yagara aeguyewe, untiye. ⁴² Piya untana, to Isuka maya untiye: Isu, kaebe Wa'ega yagara aintiba irosa'ma naeka napiyo, untiye. ⁴³ Piya yogana Isu maya omintiye: Naeba taga ugamekana abo: Ibanto naege Paratisibi nauka yugabi ampikibene, untiye.

Isu purintiye
(Matiyu 27:45-56; Maka 15:33-41; Yoni 19:28-30)

⁴⁴ Pigoya, kagi abebe papa ibimagina a'ya'ma maba tunusuma waintogana atamaisantiye. ⁴⁵ Pigoya, tabe mono namapi Koti auka'i tabe kairasa akumparanta pipa abakapisa atu'wantiye. ⁴⁶ Atu'waogana Isu aeba esegima kega'e umagina: Naba, naumanepa kae kayapi atauwe, untiye. Piya uteginra purintiye.

⁴⁷ Pigoya, irebu kina'mi kiya ka'waina aeba pintana agama abitegina, Koti a'mu potama maya untiye: Ma ntagara aeba taga aguntaenawa kampa waima aogi yagarawewe, untiye. ⁴⁸ Pigoya, wasana a'ya'ma pintana agakena kanama ampaki punta kina'miba agama abitegini, intara purite a'wae puma wa'ewaiti wantawewe. ⁴⁹ Pigoya, a'ya'ma Isu nkaokinape Karariya marisa aega'ma kananta wayape igeba pagasara mimagini pintana pumepa agantawewe.

Isu kaitantawewe

(Matiyu 27:57-61; Maka 15:42-47; Yoni 19:38-42)

⁵⁰ Pigoya, Yutiya marasa Arimatiya kumatasa yagara ka mintantiye. Agewapa Yosepe, aeba mono kanisore akiyenabisa yagara mintanta, arupu agu yagara mintantiye. ⁵¹ Pigoya, aokina'mi igeba Isu kamana otama aeguyugunaba, aeba aboganaba kampa aogi puntiye. Kampaye. Pi ntagara aeba Koti kabiratakena aborakana agakena agawa puma mintantawewe. ⁵² Pi ntagara aeba Pairatiti wama Isu au maekena wantiye. ⁵³ Pigoya aeba wama abigaogana, owe otaogana wama mariporasa uma akita urite wae kairasa asaentiye. Asaerite wama yaba mpabi wasana aru ka ku'maranta, pita'i Isu metantiye. Pi kana yaba nkaru kaba kasa'ena waintantiye. Pita'iba paipa wasanaba kampa kaintati uma kaintawewe. ⁵⁴ Pigoya pi ntagara sabatira nakena naninta maema ai'aru pikena kana a'ya wakena pemikana: Sabati aborakiye, uteginra Isu karu'ena maema kaintawewe.

⁵⁵ Piya pogini ka'isa wae Isuge Karariya marisa kananta wae'mi Yosepe aega'ma wauguna Isu kabinti metaogini agantawewe. ⁵⁶ Pigoya pintanaba agategini, wa'eri a'wae puma kanama aogi agunta masawae Isu pai'atakena ampa maema yokege puntawewe. Piya pumagini, pi sabati tonarentisa ka'umaema yagaba, mono ago kamana aega'ma abimagini uwa atate mintantawewe.

24

Isu puritapisa aogama asintiye

(Matiyu 28:1-10; Maka 16:1-8; Yoni 20:1-10)

¹ Pigoya, sontara abaya ase marogini, waya igeba aogi agunta masawae maerite wasana aruri wantawewe. ² Wama irosa'ma agaomepa, yaba kabiba a'waewaogana uwa waintantiye. ³ Pigoya, pi kana wasana arubinti uma pai'magini Wa'egawama nkau'waka aguyosa'ma kampa agantawewe. ⁴ Aguyosakategini pamipu puma mintuguna, tara yagarara kaiwaisipa waentana puwama pa kasa puwanta yagara tara igora ampa aborama mintantase. ⁵ Aibusuguni, waya igeba iyekuru puma parokaema mintugunisi pi ntagarara isigebi mayama uwaimintase: Tigeba nana piyemagiri aoganta kinakaba purinta kina'mitiba aguyosagawe. ⁶ Aeba mata'iba kampa mintiye. Ago aogama asiwaye. Karariya mari mintana kamana mayama urimintemi, pika napiyiyo: ⁷ Nabanempaba Wasanama Ntagara naepa aru kina'miti unatakinia maripora naeguyigi, papa kakaga peka naogama asikuwe, Isu untiye. Pika napiyiyo, uwaimintase.

⁸ Piya yusuguni, waya igeba pi kamanawapa napintini, ⁹ wasana arurisa a'wae puma wa'eri wama abagi kina'wa nagisarisa ka tumpaema kinape to ka'isa wabe wayape kana kamana uwaimintawewe. ¹⁰ Pigoya, pi kana wae'mi nkigewipa Mariya Matara kumatasa waena, Yowanawa, to Mariya aeba Yemisi anowampawa, to ka'isa igege kaga miyume waena sumagini, igeba aposoro awaga kamana uwaimintawewe. ¹¹ Uwaimuguna pi kamana abugunaba, kampari kamana kanta pogini kampa aogima abibebe puntawewe. ¹² Pi kamana'ama yuguna, Pita aeba abitegina karu'ena wasana aruri wama ama irosa'magina kana ka awara ibikamagina agabinti agaumepa, kai ae amana pipi waintogana agategina uwoma agi napiritegina wa'eri a'wae puma kanantiye.

Tara yagararami Emaosi ki'i wama Isu agantase

(Maka 16:12-13)

¹³ Pigoya, pabi ntaga Isu nkaokina igevisa tara yagararamisi Emaosi kumati wakena wantase. Pi kumati Yerusaremi kumatasa wamagini nayatara'mu kiromita uma irosa puntawewe. ¹⁴ Pigoya isigebi ke'i wantinisi pintana aborantika kamana uma abigamaka puntase. ¹⁵ Piya utaginisi wausuguna, Isu aewapa isika'i aboraogini kaga wantawewe. ¹⁶ Pigoya isiyoba airari kaegasoginisi kampa aepa aogima agama napintase.

¹⁷ Piya pusuguna isibigama maya untiye: Tisigebi nana kamana uma abita kanase, untiye. Yiginisi, isintara pumaginisi isiyowawamaba murise puma mintantase. ¹⁸ Piya puntirisi isigetisa ka yagara agewapa Kiriyopasi aeba mayama Isu kamana antota

a'wae puma maya omintiye: Kaeba kampa abeno. Yerusaremi kumati ibasa yaga uwoma kina irosa'magini kana kina'mi tabe kamana aboragini abiwaemagini mintagana, kae ka'wainaga ayama kampa abinta mintanema, abigantkiye. ¹⁹ Piya yogana aeba: Nanaena aborayema, isibigaoginisi isigeba maya omintase: Pi Isu Nasareti kumatasa, ae kamanane. Aeba tabe poropete yagara mima Koti nkaobipe a'ya'ma wasanama nkuyobipe esegiyenna puma miyi ntagarawen. ²⁰ Pigoya, tabe mono kiye kinatepe kabiye kinatempibe uma kiya yagarama nkayapi aegukena atagana, maripora aeguma kitauguna purintiye. ²¹ Piya, taeba aeka napi napi puma: Aeba Isureyo kina taeba ataenabisa tau'ima taba puratakiyema ago napintompene. Piyama napiyokini aeguyegana pu'wagi, mintokana kakaga yaga a'ya puwaye. Pipa ayabayawen. ²² Pigoya, ibaba taetisa ka'isa wae igeba taekuru kamana uramewe. Igeba abaya aseka wasana aruri wama uma agapa, ²³ Isu nkau'wa kampa waintegini uma aguyosakate a'wae puma kanama maya yewe: Enisore tara aboraramima: Isu aogama ago asiwaye, piyama uramese. ²⁴ Piya, pi kamanapa abima taetisa ka'isa taokina igeba wama waya'mi yesa pumagini uma agapa, ae'wapa kampagini agawe, piya omintase.

²⁵ Piya omusuguna aeba maya uwaisimintiye: We, tisigeba kampa abeso. Poropete kina'mi kamana kaemarantapa, tigeba nana piyema aibo'enaba puma kampa aogima abibebe pewe, a. ²⁶ Piya, Karaisiti aeba ayamagina kampa puremisinta manta e'wasaenama nkagupipa uma pasisine. Pipa aeba tagane, uwaimintiye. ²⁷ Piya umagina, Mosese kamanape poropete kina'mi kamanape a'ya'ma aeka uma kaemaranta kamana amato pumagina kana kamana agoba kaga uwaisimiwaentiye.

²⁸ Pigoya, igeba wama wakena pume kumati irosantawen. Pigoya, Isu aeba kumapa agaitegina wakena poginisi, ²⁹ isigeba araku'ma maya untase: Ago pankaoba pasikena puma ase ikena piye. Kaeba tasigege mata miyo, untase. Pigoya, isigegi mikenaga owe yuginisi, namapinti kaga intawen. ³⁰ Pigoya naninta nakena mara'mimagine pareti maema a'mu potama ako puma isimintiye. ³¹ Piya pogana, isiyowamaba araoginisi Isu agabebe pusuguna, pabigo Isu kaka wantiye. ³² Aiboginisi, isigeba pi kamanapa uma abigamaka puma maya untase: Ke'i kamana urasimintana mono ago urasimeginaba tasintama abarutama aogi pemi kamana iye.

³³ Piya umaginisi, pabi ntaga asima to kake Yerusaremi kumati a'wae puma wantase. Wama uma irosa'ma ae'wa nkabagi kina nagisarisa ka tumpaema kinape to ka'isa iyokinape aki puma mintuguna uma ibatantase. ³⁴ Piya pusugini igeba to kamana mayama uwaisimintawen: Wa'ega aeba taga asiwigina Saimoni agaye, untawen. ³⁵ Piya yugunisi, isigeba: Pabiyama Wa'egawama ke'i aborarasimima wama namapinti pareti maema a'mu potama apako pegira tasigeba ago agause, piya uma uwaimintase.

Abagi kina'mi Isu agantawen

(Matiyu 28:16-20; Maka 16:14-18; Yoni 20:19-23)

³⁶ Pigoya, abagi kina igeba pi kamana uma mintuguna, Isu aewa abakankaipi aboran-tye. ³⁷ Piyama aboraogini, igeba agamagini pam puma iyekura puma: Kewama aboraye, untawen. ³⁸ Piya yuguna Isu maya uwaimintiye: Tigeba nanaga tiyekuru puma tigu'amaba tara tara piye, a. ³⁹⁻⁴⁰ Mapa naene mintuwene. Tigeba nagisa nayapa agaiyo. Piya pumagiri kanama nauta aukaya puma nagaiyo. Nae'ne ntawen'ntagane. Nae nagasa piyo. Piya, ke kina'ma awasebe ayampube kampa waintiye, umagina agisa ayapa uma iyakintiye. ⁴¹ Piya pogana, igeba intawama aogi pogini kamana'wapa kampa abinta, uwa napi napi puma i'mu puma mintuguna: Nanintaripa ka'isa waintiyo, untiye. ⁴² Piya yogini igeba inoyanta kaemaranta amuguna, ⁴³ aeba maema naogini agantawen.

⁴⁴ Pigoya, to ka maya uwaimintiye: Naeba tigege mama maya uma uwaimima mibuntone: Mosese kamanapipe poropete kina'mi kamanapipe Samu ini isapipe a'ya'ma naeka meto kamana kaemaranta, pipa tagantana puwaikiye, urimintone, untiye. ⁴⁵ Piya uma pi mono agowapa uma aborawaimogini abintawen. ⁴⁶ Aibuguna to maya uwaimintiye: Karaisiti naekaba mayama kaemarantane: Aeba auki nakiyena puma pu'ma, pu'wakibipisa papa kakaga pekana aogama asiwakiye. ⁴⁷ Piya pekini aokina'mi awaga kamana uma a'ya'waema marisa kina mono mono uwaimima, igu a'wae puma aguntaenawaipa uma asu'a pikenaena aborano, uwaimikena wakibewe, mayama kaemarantane. Piya, pi kamana uwaimikena yugaba Yerusaremi kumatasa agobiritegiri wagana kana pubewe. ⁴⁸ Piya tigeba aogi kamana'ne uwaimikena kina'nepa tigewe. ⁴⁹ Pigoya abewo. Nabanempa ka'ena timikenaga untemika ota'kana tumikiye. Pika tigeba ma kumapa a-nkatantiri uwa agawa puma mintigina inatisa esegiyenna tigeta tumekiri wama aogi piyo, piya uwaimintiye.

Isu mantari intiye

(Maka 16:19-20; Aposoro 1:9-12)

⁵⁰ Pigoya pi kamana ugaitegina, wa'erisa ibabute wama Petani kuma agora uma irosa'ma aya nkasabuma: Aogima miyiyo, uma a'mu puwaitantiye. ⁵¹ Piyama a'mu puwaitategina itate intiye. ⁵² Piya pogini, igeba tabera i'muntana purite Yerusaremi kumati a'wae puma wama, ⁵³tabe mono namapi asi nasi uma mima Koti i'mu potantawe.

YONI AOGI KAMANA KAEMARANTIYE

Isu aeba Koti nkawamune

¹ Pigoya, paitaka'ya kamana agoba mintantiye. Pi kamana agoba Kotige kaga mintantiye. Pi kamana agoba aewa Kotiwe. ² Paitaka'ya aeba Kotige kaga mintantiye. ³ Pigoya Koti otaogana, aewa a'ya'waemaenaba aborawaentiye. Ka'enaba to ki'sa kampaye. A'ya'waemaena aborantipa, pipa aewa pogana aborantiye. ⁴ Pigoya, aeba miyaba'enama nkagoba mintantiye. Pi miyaba'enaba wasanamiti e'wasa puratantiye. ⁵ Pi e'wasaenama tununtanabi arawaogana, tununtanama nkagoba kampa airarikaentiye.

⁶ Pigoya, Koti otaogana ka yagara ampa aborantiye. Agewapa Yoniwe. ⁷ Aeba Koti nkomin temu kamana uramikenaga ampa aborantiye. Piya, aeba pi kana e'wasaenama nkagowaka a'ya'ma kina urameka, abima tamatiti pukubompeka Koti otaogana ampa aborantiye. ⁸ Pi Yoni aeba e'wasaenama nkagoba kampaye. Aeba kanama e'wasaenama nkagowaka awaga kamana ukenaga kanantiye.

⁹ Kanaogana, ae aka'i pi e'wasaenama nkagowampa mabi aborantiye. Aborama a'ya'ma maga maga kina'mi kipa ara puratantiye. ¹⁰ Pigoya, mabi ampiyogini, mabisa kina'miba pi mpaba aboranti ntagaraga kampa aogima abimagini agantawé. ¹¹ Piya, aeba mawata aboraoginiba, pi Yuta aokina'miba aepa kampa agoya potantawé. ¹² Pigoya, a'ya'ma agoya pota kina igeba Koti ntagara aragaena pikena ki aborawaimintiye. Pipa ae agega napima aegara kina piya puwaitaye. ¹³ Piya, pi Koti ntagara araga wasanami kurapisabe napiyenabisabe kampagini aborawe. Wasana ka'wainatisabe kampaye. Pi Koti ntagara araga Koti aumawapa imegini aborawe.

¹⁴ Pigoya, kamana agoba aeba wasana aboramagina, awagaenawape tagantanawape pumaema waitantogana mintoga, e'wasaenawape agantompene. Piya, Koti ntagara rawa ka'anto mintogana, otaogana tumpintoga e'wasaenawape agantompene. ¹⁵ Pigoya, Yoniba ae kamana aborama kega'e uma aeka maya untiye: Naka'i ampa aborami ntagara maru mintantine. Aeba pabyama asu nagasima mintiyema, pai urimintone, untiye.

¹⁶ Pigoya, a'ya'ma aogiyenaba pumaema aeti waintoga, awagaenawape toma toma maemagi mintantompene. ¹⁷ Kotiba Moses ke i'ma, ago kamana'wapa omogana uramintiye. Piya, Isu Karaisitipa otaogana, aeba pi nkawagaenawape tagantanawape aboraramintiye. ¹⁸ Wasana ka'waina Kotipa kampa agantine. Pipa kampaye. Koti ntagara, abawampa nkagora miyemi'na, ae abiwapa agantana, awaga kamana'wapa uma aboraramintiye.

Yoni mono wani pai'itanti nttagarama kamanane

(Matyu 3:1-12; Maka 1:7-8; Aruku 3:15-17)

¹⁹ Pigoya, Yerusaremi kumatas Yuta kina'mi ka'isa mono kiye kinape iyo'maeyume kinape uwaitaunguni, Yoniti wamagini: Kaeba kegawema, abigauguna, agowapa uwaimintiye. ²⁰ Aeba agowapa kampa kakanta aborama: Naeba Koti utaratantegiri agawa pe ntagara Karaisitiba kampaye, uwaimintiye. ²¹ Piya uwaimogini, igeba to kake atesumagini mayama abigantawé: Aya yagaragawe. Kaeba Iraiayakawo, yuguna: Naeba aeba kampaye, yogini: Kaeba agawa pompe poropete yagaragawo, yuguna, aeba toba: Kampaye, untiye. ²² Piya yogini, igeba to mayama abigantawé: Kaeba kegawe. Urataga, kanaompe kinati wama uwaimikena pune. Kaekakaba nanawe yenema, abigantawé. ²³ Piyama abigauguna maya uwaimintiye: Poropete AISAYA awa'ena uma kaentipa, pipa naeti esegi piye. Pipa mayamawé: Pigoya, naeba awaga kamana ikena yagara, ka'me mpari mima kega'e umagi, Wa'egawamanta ke'i arupu puma amuyena piyo, yuwe, untiye.

²⁴ Pigoya, Yoniti ampa irosanta kina igeba Parasi kina'mi nkaruyenabisawe. ²⁵ Pigoya, pika to kake abigama maya untawé: Kaeba Karaisiti yagaraba kampaye. Iraiayaba kampaye. Pi utaratanta poropeteba kampaye, piya yempene. Pipa nanaraka wasanaba mono wanipa pai'itane, untawé. ²⁶ Piya yuguna, Yoniba maya uwaimintiye: Naeba wanitasa pai'itauwa, pigoya abakatipi ka aborama mintipa, tigeba aepa kampa aogima agabébe pewe. ²⁷ Pi aeba naka'i kanaye. Agewapa asunagasima waintika, naeba mayamanaba agisa anapa kampa akubo agaikuwe, untiye. ²⁸ Pigoya, pintanaba Petani kumata Yontani waninkama maroteri aborantiye. Pigoya, pita'i Yoniba mima wasanaba mono wanipa pai'itantiye.

Yoniba Isu nkagowa uwaimintiye

²⁹ Pigoya, marogana Isuba Yoniti kanaogana, agate wasana maya uwaimintiye: Agaiyo. Maropa Koti sipisipi awaro kanaye. Aeba a'ya'ma kina'mi nkaguntaenare maema asu'a puragaikibi ntgarawé. ³⁰ Pigoya, pi aeka maya urimintone: Naka'i ampa aborami

ntagara maru mintantine. Aeba pabiyamaasu nagasima mintiyema, piya urimintone. ³¹ Naenepa paipa aepa kampa agabebepuntone. Isureyo kina tige ae awaga kamana urimekiri agowapa abintigi, ampa irosa'ma wanitasa paititauwe, untiye. ³² Piya untana, Yoniba aeka to maya untiye: Aota Awamus'a'ama mantarisa atate, pupunta kanta purite aeti tumpintoga agantone. ³³ Pigoya, naenepa paipa kampa agabebepuntuwagana, wani pai'itao unatanti'naya unamintiye: Awamus'a'nota tumpintakana agakibempe ntagara, aeba wasana Aota Awamusatasada paitakiyema, unamintiye. ³⁴ Pigoya, naeba pi agantoka agowapa abima, aeba Koti ntgarawate, untone.

Isuba tarawatarawaki abagi kina iba puntiye

³⁵ Pigoya marogana, Yonibe abagi yagarawa tarabe pabi mpara asimagini mintantawe. ³⁶ Mintuguna, Isuba pabita'i waogana Yoniba agate: Agaiyo. Koti sipisipi awaroba maroppaye, untiye. ³⁷ Piya yoginisi, isigeba abite Isu aega'ma aka'i wantase. ³⁸ Aka'i wausuguna, Isuba a'wae pumagina isigate, maya untiye: Tisigeba nanaga aguyosagakena kanasema, isibigaoginisi isigeba maya untase: Arabai, kaeba aenkau'i mintane, untase. Pi Arabaiwe untame kamana tae kamanapisa Tisawe yune. ³⁹ Piya yusuguna: Kanama ampa agaiso, untiye. Piya yoginisi, isigeba aege wamaginisi minti ntamanka agausuguna, ago atamaisaoginisi pi ntagaba pabi miyometa mintantase.

⁴⁰ Pigoya, Yoni kamana abima Isu nkaegarantame, kapa agewapa Enturu, aeba Saimoni Pita nka'nanto, ⁴¹ aeba marupa agantowampa Saimoni abatama maya omintiye: Tasigeba Mesaya yagara abatause, omintiye. Pigoya, Mesayawe unta kamana tae kamanapisa Utaratanta yagara Karaisitiwe yune. ⁴² Piya omima, Enturuba ababute Isuti wantiye. Piya pogana, Isuba agate maya untiye: Kaeba Saimoni, Yoni ntgaragawate. Kae kageba Sipawe ugamuwe, untiye. Pi kana agiba a'wae puma Pitawe, pipa yabane, yune.

Isuba Piripike Nataniyerike isiba puntiye

⁴³ Pigoya marogana, Isu aeba Karariya mari wakena aseyo puntana, Piripi abatama: Kaeba naegaraoma, omintiye. ⁴⁴ Pigoya, Piripi aeba Petisaita kumatasawe. Enturube Pitabe isigeba pabi kumatasawe. ⁴⁵ Pigoya, Piripiba Nataniyeri abatama maya omintiye: Mono isapi utarantanta yagaraka meto kamanapa Mosesago kamana kaemaraogini, poropete kina'mi kaemaranta, aepa abataune. Aeba Yosepe ntagara Isu, Nasareti kumatasawe, untiye. ⁴⁶ Piya yogana, Nataniyeriwa mayama a'wae pomintiye: Nasareti kumatasaba ayabayapuma aogiyenaba aborakiye, yogana: Kanama ampa agao, Piripiba piya omintiye.

⁴⁷ Pigoya, Nataniyeriwa Isuti wama uma irosaogana, agantana aeka maya untiye: Agaiyo. Taga Isureyo yagarawate. Antabapintiba kumpariyenawapa kampa waintiye, untiye. ⁴⁸ Piya yogana, Nataniyeriwa: Kaeba aeta mintuwagana nagantampene, untiye. Piya yogana, Isu maya a'wae pomintiye: Piripiba kampa kagega'e untegina, piki ya agobi mintaka kagaone, untiye. ⁴⁹ Piya yogana, Nataniyeriwa abima to maya omintiye: Tisa, kaeba taga Koti ntagara, Isureyo kina'mi Nkwa'egarekawe, untiye. ⁵⁰ Piya yogana, Isuba maya untiye: Piki ya agobi mintaka pi uma aboragamogana, abimagina naegarampepa abeno. Agama abempepa pipa agasawane. Pigoya, to tabenawapa agama abikibene, untiye. ⁵¹ Piya untana to maya untiye: Naeba tagaka urimukuwa, abiyo. Aintiba mantaba a'waiyekana, Koti nkenisore kina'miba Wasanama Ntagara naeti ite tumite pigiri igakibewe, Isu piya untiye.

2

Isu yogana waninkama wainiyena puntiye

¹⁻² Pigoya kakaga yaga a'ya puwaogana, Kena kumata Karariya mari waya iba'enapilkena nanintaena puma aki puntawae. Aibuntini, Isupe anowampape abagi kina'wape kaga itega'e yuguni ampa irosantawe. ³ Piyama a'ya'ma kina'mi aki puma nantini, wainiba nauguna tagankaogana, Isu nkanowampa: Wainiwaipa a'ya wayema, omintiye. ⁴ Piyama omogana Isuba maya omintiye: Ma nkiae, nanaga naepa unamene. Naekana aborakena yagaba ibaba kampaye, untiye. ⁵ Piya yogana, kana anowampaba kayokaya kinapa: Ka'enaga urimekiripa piyo, uwaimintiye. ⁶ Pigoya, pi ntamapipa wani kankabeba tonarentisa ka'umaema yaba kankabebewaintantiye. Piya, Yuta kina'miba monokanapimagini iyapa wani nkaema miyumekaza, pi ntamapintiba waintantiye. Pi kana kankabebewa uwaenantoba kampaye. Abaenarak'a'yane. ⁷ Pigoya, Isuba kayokaya kinapa maya uwaimintiye: Tigeba wani iru'ma pi kankabebi tigayo, yogini, igeba abite wanipa iru'ma kankabebi tiguguna awaitawaentie. ⁸ Piya puguna maya uwaimintiye: Tigeba ibaba ka'isaba ari'urite nanintara kabiyome ntgaramati waiyo, untiye. Piya yogini igeba irurite wauguna, ⁹ kana wainiba pi ntanintara kabiyome ntagara aeba nabigategina,

aetasabaya irurite kanawemaba kampa napintiye. Piya pogini, kayokaya kina wani iru'ma tabe kankabebi tiginta kina, igemana wainiwama nkagoba abibebe puntawe. Pigoya, kana namintara kabiyome ntagara aeba kana waya iba kasamume ntagarapa kega'e uma,¹⁰ maya omintiye: Maru iga wainiba imegini, namagini iga'e pagasigma ainti kampa aogi wainiba imisanawe. Kaeba ayagabaya iga wainiba kakatakana waintegina ainti imene, untiye.

¹¹ Pigoya, Isu aeba Kena kumata Karariya mari awame'ena pikena esegiyenaba agobima aboraogana, e'wasaenawapa aborantiye. Aibogini, abagi kina'wampiba pintana agategini, aepa aega'magini imatiti puntawe.¹² Pigoya, pintanaba a'ya puwaogana, Isuba pi kumatisaba Kapaniyamu kumati tumogini, anobe a'natabarabe abagi kina'wape aege kaga tumiwaentawewe. Pigoya, pitapa uwaena yaganto mintantawewe.

*Ikantana pume kinapa Isu igarubantiye
(Matiyu 21:12-13; Maka 11:15-19; Aruku 19:45-46)*

¹³ Pigoya, Yuta kina'mi Pasoba i'muntanawai agarosaogana, Isuba Yerusaremi kumati ima mintantiye.¹⁴ Aibuntana, tabe mono namankama nkantabaipintiba asu agaomepa, ka'isa kina'mi purumakape sipisipibe kabarape maete wama ikantana puguni, to ka'isa kina'miba mone antota ankami ankami puma mintantawewe.¹⁵ Piya puguna Isuba igategina, iga'na maema kibaru'magina, a'ya'ma wasanabe sipisipibe purumakape iyeguma igarubaogini, pi ntamapisa iyegaka wauguna, kana mone yabaeba apasan'a'ma monewaipa asunukaentiye.¹⁶ Piya puntana, kabara ikantana pume kinapa maya uwaimintiye: Mantanaba maete waiyo. A'yugu piya peganaba, nabanempa ntamankama ikantana namantana piye, untiye.¹⁷ Isu piya pogini, abagi kina'wampiba mono isapi kamana awa'ena waintanti, pika napintawewe: Kae namataka nantabaipintiba yaku nkabusa iye, piya kamanaka napintawewe.

¹⁸ Pigoya, Yuta kina'miba abigama maya untawewe: Kaeba piya pempeka, esegiyenagampa nkagoba aborama awame'ena kapa tayakega agano, untawewe.¹⁹ Piya yuguna, iwamuta u'magina maya uwaimintiye: Tigeba ma tabe mono nama akasabaigipa naeba kakaga yaga a'ya peka, to kake kima a'ya pukuwe, piya untiye.²⁰ Piya yogini, pi Yuta kina'mi maya untawewe: Anasa kinatempiba kaboba 46 kima a'ya puntawewe. Pigo kaeba kakaga yaga kimagina a'ya pikenaga yeno, untawewe.

²¹ Pigoya, Isu mono namankamaka untipa, pipa ae'wa nkau'amaka meto kamana untiye.²² Pigoya, ainti purintapisa asiyogini, abagi kina'miba pi kamana'wapa to ka napimagini, pipa mono isapisa, ae unti kamana, abugunaba tagantana puwaentiye.

Isu aeba a'ya'ma kina'mi nkagowaipa igawaentiente

²³ Pigoya, Isu aeba Pasoba nakena yagaba Yerusaremi kumata mimagina, awame'ena pogini, uwoma kina'miba agategini ae ageraka imatiti puntawewe.²⁴ Piya puguna, Isu aeba wasanaba igabebi puwaentiye, ige iyapisa ae'wantanaba kampa atantiye.²⁵ Pigoya, aeba a'ya'ma wasanami nkago abikenaba wasanapa kampa ibigantiye. Uwaba aewa wasanami nkintabaipintiba igabebemagina agawaentiye.

3

Isuge Nikotimasige kamana untase

¹ Pigoya, Parasi yagara ka mintantiye. Agewapa Nikotimasi, aeba Yuta kiye yagara mintantiye.² Pi ntagara aeba aseka Isuti wama maya omintiye: Tisa, taeba agogapa abune. Kaeba Kotitisa taga tisa yagara aborantane. Piya, wasana ka'waina Kotiba antababi kampa mintegina, awame'ena pempesapa kampa piye, untiye.³ Piya yogana, Isu maya omintiye: Naeba tagaka ugamukuwa, abo. Ka'waina aeba to kake kampa yakari potakanaba, aeba Koti kabiratakenaenaba kampa asu agakiye, untiye.⁴ Piya yogana, Nikotimasiba to maya omintiye: Ka'waina aeba ago anasa puwanti'naba, ayamagina kasapa aborakiye. Ayamagina anowampa nkantabaipintiba uma pasekanababa to kake yakari potakiye, untiye.⁵ Piya yogana Isu maya omintiye: Tagaka ugamukuwa, abo. Ka'waina aeba wanitasabe Awamusatasabe kasa'ena kampa aboranti'naba, Koti kabiratakenaenabipa kampa asu mikiye.⁶ Piya, wasanama aga'e puma yakari potaipa, pipa wasana aogane. Aota Awamus'a'ama yakari potaipa, pipa Awamus'a'ama nkaogane.⁷ Tigeba yakari pikenaena kasa aboraiyoma, yopa, kaeba abimuginapa kuntaba a-po.⁸ Pigoya, pontaba ae'wantanaba piye. Aetasabaya kanate wate piye. Pipa kampa abintane. Agasankapa abepa, pipa pontawewe yewe. Piya yernisa puma, ka'waina aeba Awamus'a'ama yakari potanti'naba, agowapa pabiyama agawe, untiye.⁹ Piya yogana, Nikotimasiba maya omintiye: Pipa ayamagina piyaba pikiye, untiye.¹⁰ Piya yogana, Isu mayama a'wae pomintiye: We, kaeba Isureyo tisa yagara mimagina, pipa kampa

aogima abeno. ¹¹ Naeba tagaka ugamukuwa, abo. Taeba agama abompentanaba aborama urimokiripa, pipa tigeba kamanatepa a'a-o yewe. ¹² Pigoya, naeba mabisaenaga urimogiripa kampa napiyewa, pipa mantari kakama waintintanaga urimekiripa, ayama abimagiri napikibewe. ¹³ Pigoya, wasana mantariba kampa ima uwa asu agaye. Kampaye. Wasanama Ntagara nae ka'anto mantara mintantotisa tumpa pika urimuwe.

¹⁴ Pigoya, Moseseba paipa ka'me mpari kuyapa yara itagintisa puma, Wasanama Ntagara naepa yara ita natakibewe. ¹⁵ Piya pigina, naeti imatiti pikibe'nagiba miyaba'ena aboramagini mikibewe, piya untiye. ¹⁶ Pigoya, Koti aebe a'ya'ma kina'mikaba tabera abugaogana, yagarawapa ka'antowa mintogana, aepa taeti otantiye. Aepa aega'ma imatiti pikibe'nagiba ataenabipa kampa tumpintini, e'wasa maema miyaba mikibewe. ¹⁷ Piya, Kotiba yagarawapa mabisa kinapa kamana uma uratanemaba kampaye. Wasana i'imma iba piyoma otaogana tumintiye. ¹⁸ Pigoya, ka'waina aebe aega'ma amatiti pikibi'naba, aguntaenama nkantota'enaba kampa maekiye. To ka'waina kampa aega'ma amatiti pikibi'naba aguntaenama nkantota'enawapa waitakiye. Piya, Koti Ntagara ka'antowa nkagegaba kampa napima amatiti pikibika aguntaenawapa waitakiye. ¹⁹ Pigoya, pi antota'enama nkagowapa mayamawe: Mabi e'wasaena maete tumintogini, mabisa kina'miba tununtanaga ibugantana, e'wasaenagaba kampa ibiye. Pigoya, pipa nanagawanane. Ataenawai waintika piya puntawe. ²⁰ Pigoya, a'ya'ma kamparagaena pe kina'miba pipa e'wasaenama kama potawe. Igeba kamparagaenawai aborasanagaba kampa ibegini, e'wasaenariba kampa kanawe. ²¹ Piya, ka'waina tagantana pi'naba, aebe e'wasaenabi uma aboraye. Aebe yogawapa Koti nkesegiyenara puntika, uma aboramegini aogima agawe.

Yoniba Isu nkago aborama uwaimintiye

²² Pigoya, Isuba kamana uma a'ya atate, abagi kina'wa ibabogini, Yuta mari ka au'i wama umintantawe. Pita'i umimagine, Isuba mono wanipa pai'itantiye. ²³ Pigoya, Yoni aebe Inoni kumata mima, Serimi agora mima, pabiyama wani pai'itantiye. Piya, pitapa wanipa tabe waintogini, pita'i wasanaba ampa irosauguna mono wani pai'itantiye. ²⁴ Pi nttagaba Yonipa iga'na namapipa kampa aba potentawe. Pipa asawe.

²⁵ Pigoya, Yuta yagara ka'wainage Yoni nkabagi kina'wampige wani pasikenaenaga kamana umagini akayuntawe. ²⁶ Piya pumagini, igeba Yoniti wamagini maya omintawe: Tisa, kaeba Yontani wani maroteri muntukuna, ka yagara ampa irosaogana, agowapa aboramagina uramintampepa, aebe ma kanabipa pabiyamagina wasana mono wani pai'itagini aeti wawaeyewe, untawe. ²⁷ Piya yuguna, Yoniba maya uwaimintiye: Ka'waina Kotiba ka yugawaka kampa otakanaba, aewapa kampa uwaba maekiye. ²⁸ Naeba Koti utaratanta yagara Karaisitiba kampaye. Naeba ae awaga kamana uma aborakena yagara Kotiba unatantegi, paitama kanantone. Piyama urimuwigiri tigeri abintawe. ²⁹ Piya, iba'wae'ma nkawaeewampa aewa maeyagina, ao'yagaramaba ao'maemagina aeka a'mu potaye. Piya, ao'yagaramaba a'mu potaisa puma, aneba na'mu potauwe, Isuka piya untiye. ³⁰ Piya, ae agewamaba anosama tabe pekana, nae nagewamaba tumikiye, Yoni piya untiye.

³¹ Pigoya, inatisa tuminti'naba asuragasiwaeye. Mabisa aboranti'naba mabisaena puntana, mabisaenaga iye. Piya, mantarisa tuminti'naba pipa asuragasiwaeye. ³² Pi nttagarawama a'ya'waemaena agama abinti, pi awaga kamana yeginiba, wasanamiba iyekita puma kamana'wapa a'a-o yewe. ³³ Pigoya, wasanama pi kamanapa abemi'naba, Kotiba taga semi nttagaraga: Owe, iye. ³⁴ Piya, Koti otami'naba, aebe Koti kamana'amana siye. Piya yagarawaka aepa Kotiba Awamusupa atunkapa kampa amikana uwa amiyaba miye. ³⁵ Piya, abawampaba pi yagarawakaba abugagina, a'ya'waemaenaba ae ayapi atawaentiye. ³⁶ Pika ka'waina aebe Koti nttagarawapa aega'ma amatiti'ena pem'i'na, aepa miyaba'enaba ago aboramiye. Piya, to ka'waina aebe Koti nttagarawampa kamana kampa wasiyemi'naba, miyaba'enaba kampa aboramekana, Koti nkamo'enawapa aeti waiyaba mikiye.

4

Isu aebe Sameriya marisa waepa kamana omintiye

¹ Pigoya, Parasi kina igeba Isuka mayama abintawe: Aebe abagi kina uwoma ibabumagina wani pai'itamagina Yonipa asugasayema, abuguna Isu abintiye. ² Piya, Isu aewapa kampa wanipa pai'itantiye, abagi kina'wampika yogini pai'itantawe. ³ Piya, Isuba Parasi kina'mi pi kamana abuguna abitegina, aebe Yutiya maba atate Karariya mari a'wae puma to kakema wantiye. ⁴ Wamagina, pi ki'i aega'urite wama Sameriya maba akata wantiye.

⁵ Pita'i wamagina Sameriya kumapa ka, agewapa Saika, pita'i uma irosantiye. Pi kumapa Yekobu yagarawa Yosepe aminti mpawama nkagora waintantiye. ⁶ Pabita

Yekobunta wani kaba waiyogana Isu aeba kagi abebe uma irosa'ma, ayampu kampa pogana wani ka awara mara'mimagine migarantiye.

⁷ Mintogana, pi kumatasa wae ka'waina wani itikena ampa irosantiye. Irosaogana Isuba: Kaeba wanipa namega nano, omintiye. ⁸ Piya, abagi kina'wapa igeba naninta ika pikena kumati igasuguna, Isuba abintowa mintana kana waepa wanikaba omintiye. ⁹ Omogana, kana Sameriya wae aeba maya untiye: Kaeba Yuta yagaramagaba nanaga Sameriya wae'mantekaba wanikaba nabigane, untiye. Piya, Yuta kinape Sameriya kinape atokaa kampa miyumekana kana wae aeba piya untiye. ¹⁰ Piya yogana Isuba maya omintiye: We, kaeba Koti kao'enama nkagobe pi wanika ugamo nkagonepe kaga kampa aogima abempesinta esunataka e'wasa maekena wanipa kamosine, untiye. ¹¹ Piya yogana, kana wae'ma maya omintiye: Tabo yagara, wani kaba pipa e'erona, kaeba wani itikenaenagapa kampa waintiye, kaeba e'wasa maekena wanika yempepa aetasitikibene. ¹² Tayabama Yekobu ae ma nkwanaki kaba ku'magina, aewape yagara purumakawampibe igeba to wanitaswa wanane. Pabi matasa namagini mintantane. We, kaeba ayamagina Yekobupa agasimagine wanipa kapa maema aborakibene, untiye. ¹³ Piya yogana Isuba maya omintiye: Piya, ma nkwanipa kampa agora tiga'e pakena wanikiri a'ya'ma yagaba nayaba'miyewe. ¹⁴ Pi nae wanipa ka'waina amekana aeba pi nakibipa, aepa wanikaba to kakema kampa abekana uwa miyaba'mikiye. Naeba pi nkwanaki amekana agupi wani nkaru aboramekana miyaba'mikiye, untiye. ¹⁵ Piya yogana, kana wae'ma maya untiye: Tabo yagara, kaeba pi kana wanipa namegana to kakema wanikaba kampa nabeka, mata'i asi nasi kanamagi itiyaba'miyopa kasano, untiye.

¹⁶ Piya yogana Isuba maya omintiye: Kaeba wamagina kawaegampa ababute kanaiso, untiye. ¹⁷ Piya yogana, kana wae aeba: Naeba nawaenempaba kampaye, untiye. Piya yogana Isu maya untiye: Kaeba kawaegampaba kampaye, pipa kanara sene. ¹⁸ Kaeba waba nayaka'mu maegate itate puntampekana, pigo ma mintemi nkwaba pipa aeba kae kawaeba kampaye. Pika kaeba taga kamana yene, omintiye. ¹⁹ Piya omogana, kana wae aeba maya omintiye: Yabe yagarane, naeba ibanto ago abuwé. Kaeba poropete yagaragawe. ²⁰ Pika yega abeno: Tae tuyabamagiba ma nkamuta Koti nkaobi aki puma kamana'wa abeno, yegiri, piya Yuta kina tigeba: Kampaya, Yerusaremi kumata aki puma Koti kamanapa abijo, yewe, untiye.

²¹ Piya yogana Isu maya untiye: Waya, naeba ugamukuwa, abo. Nabanempsa aeba ma nkamatapa kampaye. Yerusaremi kumatapa kampaye. Uwa a'ya'ma mari Koti nkawaga kamana ikena kana agarosakena piye. ²² Tigeba kampa abintiri kampa agantanama kamana yega, taeba pipa abibebe pumagi pune. Mono pipa Yuta kina taeti aboraye. ²³ Pigoya kana ka aborakiya, pipa mampa ago aboraye. Pita'i taga mono kina'miba monota mima igu imawamaba naba nkawaga kamana taga sikibewe. Naba aeba piya mono kina'mika abiye. ²⁴ Piya, Koti aeba amanine. Pika ae awaga kamana ikena monota mima tigu timarasabe tagaka yiyo, untiye. ²⁵ Piya yogana, kana wae aeba maya untiye: Naeba ago abuwé, utaratanta Mesaya aborakiye untapa, aboramagina kamana uma aogi puma arupu puramikiye, untiye. Piya, pi Mesayaba aeba Karaisitiwe. ²⁶ Piya yogana Isu aeba maya untiye: Kamana ugamopa, pipa naewe, omintiye.

²⁷ Pabigo piya yogini abagi kina'wampiba: Tisa, kaeba naninta nao, untawé. Ampa irosa'magini kana wae'mage kamana yusumeka uwoma nkigi napintawé. Piya puntini, nana kamana nanaga omenema abigakena abumepa kunta pogini atantawé. ²⁸ Pigoya, kana wae aeba wani kankabewapa pabita atate kumati karu'ena wamagina wasana maya uwaimintiye: ²⁹ Tigeba kanamagiri ka yagara agaiyo. Aeba a'ya'waemaena punto, pi kamanapa aborama unamiwaeye. Aeba Karaisitibayawe, untiye. ³⁰ Pigoya, igeba pi kamana abite kumatisaba Isuti wawaentawé.

³¹ Pigoya, pi ntigaba abagi kina'wampiba: Tisa, kaeba naninta nao, untawé. ³² Piya yuguna maya uwaimintiye: Naeba ka'isa naninta waintipa tigeba kampa abintawé, untiye. ³³ Piya yogini, abagi kina'wampiba: mare-u me-u pumagini maya untawé: Ke kapa nanintaba maetegina menkaiye, untawé.

³⁴ Piya yuguna aeba maya untiye: Unatanti, ae awamu wasima yogawa puma a'ya pikenaena pi'na nanintanentana piye. ³⁵ Tigeripa mayawe yewe: Opa tarawa tarawaki to a'ya puwakana mata'i nakenaba aborakiye, yewe. We, naeba urimekiri abiyo: Tigeba asaga'yuma tiyo ma'ma yoga agaiyo. Nakena aborakena kanapa mampa agarosaye. ³⁶ Naninta nakena yogarisa maema miyaba'enabi aki pikibi'naba ikantana maekiye. Psya, aintana yoga punti'nabe kana nakena maenti'nabe isigeba kaga isi'mu pikibese. ³⁷ Piya, ma kamana yega tagane: Ka'waina aintana pegina to ka'waina nakenaba maeye. Tara yaga isigeba ka yuga pese, pipa tagane. ³⁸ Naeba tige aintana kampa puntati nakena aki punataiyoma, uritauwe. Yoga pipa ka'isa kina'mi pumarantagana aboranti, pipa tigeba uwa a'na puma maeyawé, Isu piya untiye.

³⁹ Pigoya, Sameriya wae aeba: A'ya'waemaena punto kamanapa pipa aboramagina unamiwaeye, unti kamanaka uwoma pi kumatas a kina'mi abitegini, Isu aegarantaw. ⁴⁰ Pika Isuti ampa irosa'magini igege miyenema esotantaw. Piya puguna, aeba owe uma tara yaga ige kumata mintantiye. ⁴¹ Piya puntana, mono uwaimogini to uwoma kina'mi abibebe puma aegarantaw. ⁴² Piya puntini, kana waepa maya omintaw: Marupa kae yeka mono'wapa abune. Pigoya mapa taerepa agowapa agama abimagi maya yune: Aeba taga a'ya'ma marisa kina tau'ikena yagaraw, yune, untaw.

Isu aeba kiya yagarama ntagaranto kaba atantiye

⁴³ Pigoya, Isu aeba igege tara yaga migait Karariya mari wantiye. ⁴⁴ Wantana aewaka mayamagina abintiye: Koti unti kamana yemi poropete yagarama ka'waina aeba aewa kuma agorapa ageba kampa waintiye, ute, ⁴⁵ pi mpaba atategina Karariya mari uma irosantiye. Piya, Karariya kina'miba kaga Yerusaremi kumati wama aota naninta nakena yagaba yoga pogini agantakini, a'wae pumagina uma irosaoginiba kayone potantaw.

⁴⁶ Pigoya, Kena kumata Karariya mari paipa yogana waninkama wainiyena punti, pita'i to kake a'wae puma wantiye. Pi ntagaba Kapaniyamu kumata tabe yagara ka mintantiye. Pi ae yagara tabe inuntana abogana mintantiye. ⁴⁷ Pigoya, Isu aeba Yutiya maba atate a'wae puma Karariya mari to kake ampa irosaye, piya yuguna abite tabe yagara aeba Kena kumati Isuti wama yagarawa puriken pogana ampa kaba atanema, uma ababute kanakenaga omintiye. ⁴⁸ Omogana, Isuba maya omintiye: Tigeba awame'enabe kasa'enabe agantiri kamana'nepa abima naegarasanganaga napiyewe, untiye. ⁴⁹ Piya yogana, kana yagara aeba: Wa'ega yagarane purisanagawa, karu'ena tumo, untiye. ⁵⁰ Piya yogana, Isuba maya omintiye: Kaeba uwa tumo. Yagaragapa ago kabariye, omintiye. Piya omogana kana yagara aeba Isu kamana abibebe puritegina a'wae puma tumintiye. ⁵¹ Tumogini kayokaya kina'wa ke'i kanamagini igeba: Yagaragapa ago kaba'ma mintiye, omintaw. ⁵² Piya yuguna, kabarome kanaka ibigaogini maya untaw: Aiba papa kagi abeve pogana pi kanabi yoninkapa atawaye, untaw. ⁵³ Piya yuguna, kana yagara aeba agowapa mayama napintiye: Aiba pi kanabi Wa'ega aeba Yagaragapa ago kabariyea unatama utamine, untiye. Piya yogini aewape aokinape Isuti aega'ma imatiti puntaw. ⁵⁴ Piya puguna Isu aeba Yutiya marisa Karariya mari a'wae pumagina wama Kena kumata umima awame'ena puntita to kake uma pogana tara puntiye.

5

Isu aeba ka yagara Petesita kotuta kaba atantiye

¹ Pigoya, Yuta kina'mi aota naninta nakena yaga ka aboraogana, Isu aeba Yerusaremi kumati wamagina intiye.

² Piya, Yerusaremi kuma agora sipisipiwama kabera kotupa ka waintantiye. Age-wapa Yuta kina'mi kamanapisa: Petesitawe, yewe. Pi awamoriba ka kampa punta nama nayaka'mu kimaranta waintantiye. ³ Pi ntamapipa yoni kinape iyorika kinape igisa atena punta kinape migugu kinape uwoma waintaw. ⁴ (Piya puguna ka'isa yagaba Wa'egawamatista enisore ka'waina kana kotupinti tumima airapa pogana kana waninkamaba aiga'yo'ya pogini agate, ka'waina karu'ena paitama tumpa pasomenapa yonintanawapa atawa puntiye.) ⁵ Pigoya, pita'i ka yagara nankitama miyogana kaboba 38 a'ya puwantie. ⁶ Aibogana, Isu aeba uma agaomepa: Kana yagaraba e'ero kanabi waita miyaba'miye, yuguna abitegina, abigama: Kaeba kabarisanganaka kabiyma, abigantiye.

⁷ Piyama abigaogana, kana yoni ntagarama maya untiye: Wa'ega, waninkama aiga'yo'ya peginaba, ke naba pumagina mo nataka tumusuwe. Uwa naene uware ampa ware putagi, waogana pabigo ka'isa kina unagasima kotupintiba tumewe, untiye.

⁸ Piya yogana, Isuba maya omintiye: Kaeba asimagina wasagapa maerite wao, untiye.

⁹ Piya yogana, pabigo au'amaba aogi pogana asimagina wasa'wapa aesagabite wantiye. Aibogini, pi ntagaba Yuta kina'miba sabatira aogi potentaw. ¹⁰ Piya, aogi potaogini pi Yuta kina'mi kana yoni ntagara maya omintaw: Ibaba sabati akuninta yagawa, wasagapa a-mpaete wao, untaw. ¹¹ Piya yuguna maya uwaimintiye: Kaba'ma aogi punatali ntagarama: Wasagapa aesagabite wao, unamima nagarubaye, untiye. ¹² Piya yogini, igeba: Wasagapa aesagabite wao yemi ntagara, agewapa kewema, abigama untaw. ¹³ Piya yuguna, kana kabarome ntagaramaba kampa napintiye. Isu aeba a'ya'ma uwoma kina'mi nkibakapinti aigigipa'ma wagasogana, kampa aekaba napintiye.

¹⁴ Pigoya, ainti Isuba tabe mono namapinti kana yagaraba abatamagina maya omintiye: Kaeba kaukapa aogi puwaya, pi to kake aguntaenaba a-po. Pegana tabe kuntuyena aboragamisanaga pasemagina miyo, omintiye. ¹⁵ Pigo kana yagara aeba Isupa agabeb

potate wama Yuta kina maya uwaimintiye: Kaba natami ntagara agewapa Isuwe, uwaimintiye.

¹⁶ Pigoya, Isu aeba sabatira piya yuga puntitaka Yuta kina'miba igobi pumagini kama potantawe. ¹⁷ Piya puguna, Isuba maya uwaimintiye: Nabanempaba yogaba a'ya'ma yagaba asi nasimagina piye. Piya, naeba pabiyamagi puwe, untiye. ¹⁸ Pigoya, Isu aeba sabatiwai mpaema a'yugu puntana, Kotiti meto pumagina: Aeba nabanempawe, yomeka Yuta kina'miba abima kamparaga potamagini aegukena untawe.

Isu aeba tabage pumagina antota kamana uma aya tatakiye

¹⁹ Pigoya, Isuba maya kamana uwaimintiye: Naeba tagaka urimukuwa abiyo: Naeba yagarawa naene naumabisaba a'ya'waemaenaba kampa puwe. Nabanempa pegi yagarawampa naba agamagi ae pemisa pumagi puwe. ²⁰ Naba aeba yagarawampanteaka abugagina a'ya'waemaena pemintanaba nayakiwaeye. Piya, ibanto tabe yuga nayakeka pekiri, tigeba agama uwoma tigi napikibewe. ²¹ Naba aeba purinta kina ibage pumagina iyogawaitama miyaba'ena imika, yagarawa naene napima wasana miyaba'ena imuwe. ²² Pigoya, naba aeba wasana antota kamanapa kampa uwaitaye. Pi ntugaba yagarawa nae unatantikini, ²³ wasanamiba nabanempa nkage maema asagayuyesa pumagini pabiyama yagarawa nae nageba maemagini asagayukibewe. Piya, ka'waina yagarawa nae nage maemagina kampa asagayukibi'naba aeba naba unatanti'na pabiyama age kampa asagayukiye. ²⁴ Naeba tagaka urimukuwa abiyo: Ka'waina nae kamana wasintana, unatanti'naka amatiti pikibi ntagara, aepa miyaba'ena aboramekana kaintanama nkantotapa kampa maekiye. Piya yagaramaba purinta'enabisa aogamagina miyaba'ena ago maema amiye.

²⁵ Naeba tagaka urimukuwa abiyo: Kanapa ka aborakiye. Pipa ibaba ago aboraye. Pi ntaga purinta kinapa Koti ntagara nae kamana abe kina iyogama asima miyaba'mikibewe. ²⁶ Naba aeba miyaba'enama nkago ai'newane. Piya, yagarawa naepa pabiyama miyaba'enama nkago ai'newa unatantiye. ²⁷ Pigoya, Wasanama Ntagara mintoka, wasana antota kamana uwaitaoma unatantiye. ²⁸ Pi kamana abiginaba kuntaba a-piyo. Kanapa ka atantipa waintiya, pi aborakiniba wasana irubinti waitamiye kinapa nae kiga'e abitegini irosa'ma ikibewe. ²⁹ Piya puntini, aogima mintanta kina'miba miyaba'mikena iyogakibewe. Piya, kamparagama mintanta kina'miba kaintanama uka'ntotapa ena maekena iyogamagini asikibewe, Isu piya untiye.

Kotiba yagarawampa nkagoba maema aborantkiye

³⁰ Piya untana Isu to maya untiye: Nae'ne ntuaumabisa yoga pikenaenaba kampa waintiye. Nabanempa nkawamuta antota kamanapa uma a'ya itauwe. Piya pumagi, antota yuga pekan ka awameta pikkiye. Pipa nae'ne kamanapa kampaye. Unatanti'na e kamana wasimagi tagaka uritauwe.

³¹ Piya, nae nabine agone umagi aborakanaba kampa aogi pikkiye. ³² Nabanempa pi agonepa uma aborakiye. Piya, naeba abima pipa tagane. Aeba agonepa uma aborakini au'wapa agakibewe. ³³ Tigeba Yoni abigauguna agonepa tagaka aborama urimintiye. ³⁴ Pigoya, wasanami agone uma aboraiyemaba pipa kampa yuwe. Ma kamana yopa abimagiri, miyaba kita aema miyigina Kotiba tibabenoma, yuwe. ³⁵ Pi Yoni aeba kane kanta pumagina wasana e'wasa puwaitantiye. Pigoya, tintabaipintiba ti'muntanaba uwaenantora ae e'wasaenagaba puntawe.

³⁶ Pigoya, nae ago uma aborami, aeba Yoni piyamaba kampaye. Aeba to awametane. Naba yogara unatanti, pi ntugawama nkau'wa maema aboraoma, nabanempaba unatantegi tuminto, pi ntuga pogana unatanti agonepa aboraye. ³⁷ Piya, naba unatanti'na pi aewa agonepa uma aborantkiye. Tigeba pi ae'wa nkawamupisa kamanapa kampa abintiri, aowarapa kampa agantiri, ³⁸ unatanti'nante kamana a'a-o umagiri, kamana'wapa tigeba tigutapa kampa atagana waiye. ³⁹ Piya, tigeba mono esapa aisumagiri: Miyaba'ena aboraramikenaga iyema, yewe. Pigoya pi paisa mono'amaba taga nae agoba uma aboraye. ⁴⁰ Piya, tigeba naeti kanama miyaba'ena maeyiyoma, yogiripa uwa a'a-o yewe, Isu piya untiye.

⁴¹ Piya, naeba wasanami i'muntana punataiyemaba kampa yuwe. ⁴² Tigae goba pipa taga abuwe. Tigu'amaba Kotiti abemintanaba kampa waiye. ⁴³ Naeba nabanempa nkawamuta tigetiba tumintogiripa, pipa tigeba uwa kayoneba kampa punatawe. Pigoya, ainti to kina'mi nkige'wai imabisa tigeti ampa irosaigiripa, pi kina igepa kayone puwaitakibewe. ⁴⁴ Tigeba ti'amaka ti'mu puma tabera maete iye kina'mitaba, ayama monotapa mikibewe. Pipa kampaye. Pigoya, Koti abiwa mpima a'ya'waemaenama tabe aeti a'muntana waintikaba pipa aeta tibiye, a. Pipa kampaye. ⁴⁵ Tigeba naekaba: Aeba abawampati kamana uratakiye, a-siyo. Pipa kampaye. Tigeba tao'maekiyema napinta ntagara Moseese, ae kamana kaentipa pipa naeka

kaemarantine. Pigoya, tigeba ae kamana aogima abibebe pesinta, naekaba kaga abibebe pesine. ⁴⁷ Piya, Moses kamana awa'ena tigeba: A'a-o untiri, nae kamanapa ayama abibebe pikibewe, Isu piya untiye.

6

*Isu 5,000 kina naninta imintiye
(Matiyu 14:13-21; Maka 6:30-44; Aruku 9:10-17)*

¹ Isuba kamanapa uma a'ya atate, Karariya kotupa to ka agewapa Taibiriyasi ta'ema maroteri wamagina, ²⁻³ abagi kina'wa iba purite wama amuti imagini mintantawe. Asu mintuguna uwoma kina yonintaran kaba itaogini agantaka, aega'magini wantawé. ⁴ Pigoya, pi ntagaba Yuta kina'mi Pasoba naninta nakena yagaba agarosantiye. ⁵ Pigoya, Isuba ao ma'ma igaomepa pi wasana uwoma kina ampa irosauguna igate, Piripi mayama abigama untiye: Nanintaba aetasa ika pumagi pi kinapa imekana kanara sakiye, untiye. ⁶ Aeba ka'ena pikenaga napimagina uwa amiyo kamana untiye.

⁷ Piya yogana Piripiba maya untiye: Taeba 200 torarasa naninta ika pumagi imekanaba kampa kanarasawaetakiye, untiye. ⁸ Piya yogana, Saimoni Pita nka'nanto Enturu aeba maya untiye: ⁹ Mata'i ka yagarama aeba parentintoba nayaka'muna, inoyantaba tarawa sumagina urintiya, pipa ma uwoma kina'miba ayama kanarasawaetakiye, untiye.

¹⁰ Piya yuguna Isuba maya untiye: Tigeba wasana uwaitaigini aki pumagini mara'miyivo, untiye. Yogini, uwaimuguni, kabu aebaru'magini 5,000 waba mara'ya puma mintantawe. ¹¹ Mara'mintuguna, Isuba kana pareti maemagina Kotiti a'mu potama abagi kina imogini wasana pako pumagini a'ya'ma imintawé. Pigoya, inoyantaba pabiyama nakune igewai yume nkawameta imintiye. ¹² Namagini iga'e pauguna Isuba abagi kina'wa maya uwaimintiye: Aritapa waima ataena pusana kitabiyo, untiye. ¹³ Piya yogini igeba wa'nupura kupa nagisarisa tara tumpaema ku kana naninta aritapa iraguguna awaitantkiye.

¹⁴ Pigoya, wasanamiba pi awame'ena puwaiyakomentana agategini maya untawé: Tabé poropete yagara mabi'aborakiyema untapa, mampaye, untawé. ¹⁵ Piya ute, igeba Isu kobe pumagini iyatasa araku'ma tabé yagarawai asitakena puguna, igabebe potategina itate ae abiwa amuti intiye.

*Isu kotu nkabobori wantiye
(Matiyu 14:22-33; Maka 6:45-52)*

¹⁶ Pigoya atamaisaogini abagi kina igeba kotu nkawamori tumimagine, ¹⁷ Kapaniyamu kumati a'wae pumagini wakenaraka wanipisa karebi intawé. Pigoya ago ase yogana, Isuba pabita mintogini ibiwai wantawé. ¹⁸ Aibuguna, esegi punta pumagina tabera wanipa aiga'yo'ya pogini wantawé. ¹⁹ Piya, nayaka'muno, tonarentisa ka'umaema kiromita pubasanauguna, Isuba wani nka'eti aeta aeta wamagina kana wanipisa kare agora waogini agate pami puntawé. ²⁰ Piya puguna igege'a umagina: Naene kanauwa, tiyekuruba a-piyo, untiye. ²¹ Piya yogini igeba i'mu pumagini, wanipisa karebi ababuguna iyogini wakena pume mpari agar wantawé.

A'ya'ma kina'mi Isuka aguyosagantawé

²² Pigoya, marogini a'ya'ma kina kotu mparoteri mimagini maya untawé: Ai asekapa wanipisa kareba ka'waintoga agatompe, pipipa abagi kina'wapa Isupa atategini ibiwai imagini watawe, untawé. ²³ Piya ute mintuguna, Taibiriyasi kumatisa wanipisa karebi kanama Wa'legawama naninta a'mu potama imintita ae aguyosagata ampa irosantawé. ²⁴ Pigoya, pi kina'miba Isu ae'wakabe abagi kina'wakabe iguyosakate wanipisa karebi ima Kapaniyamu kumati a'wae puma wama pita'i uma aguyosagantawé.

Mantarisa nanintawama kamanane

²⁵ Pigoya, Kotu ma nkauka'i aguyosa'ma abatamagini: Tisa, kaeba ayantaga kanampenema, abigantawé. ²⁶ Piyamagini abigauguna maya uwaimintiye: Naeba tagaka ukuwa, abiyo. Tigeba awame'ena pogiri agakaba pipa kampaye. Naninta timogiri namagiri tiga'e paka, naguyosagawe. ²⁷ Tigeba yogapepa, abararakena nanintawama ntuga wanane. Miyaba nanintawama ntuga piyo. Nabanempa Koti aeba Wasanama Ntagara naepa tigeti unatantika yigipa miyaba nanintaba timukuwe, untiye. ²⁸ Piya yogini maya kamana a'wae pomintawé: Taeba ayamagi Koti ntugaba pusunema, abigauguna, ²⁹ maya uwaimintiye: Unatanti naeti timatit puma naegaraigina, pi'na Koti ntugartanabana peno, untiye. ³⁰ Piya yogini maya kamana omintawé: Nana kukantana pega, agamagi kaega'ma tamatiti pugatakune. Nana aoso'enaba pikibene. ³¹ Piya, tayabamagiba ka'me mpari mana namagini mintantane. Pigoya pi kamana awa'enaba mayama waintiye: Mantabintisa naninta imogini namagini mintantawé, untawé.

³² Piya Yuguna Isu Maya Uwaimintiye: Tagaka ukuwa abiyo. Moseseba mantarisa nanintaba kampa maema aborama imintiye, Koti imintiye. Piya, nabanempa mantarisa taga ntanintaba timiye. ³³ Piya, Kotitisa tuminti'na taga ntanintaba mabisa kina'miti mikenaenaba maema aboraye, untiye. ³⁴ Piya yogini: Wa'ega, kaeba yempe ntanintaba asi nasi pipa tamo, untawe. ³⁵ Piya Yuguna Isu Maya Uwaimintiye: E'wasa maekena nanintaba pipa naewe. Ka'waina aeba naeti ampa atokaekibi'naba, aepa nanintagaba aga'enaba kampa abukkiye. Piya, ka'waina aeba naeti amatiti pikibi'naba wanikaba kampa abukkiye.

³⁶ Piya, naeba ago urimone. Awame'ena pogiripa agantiripa uwa kampa napimagi aegarawe, ago yuwe. ³⁷ Pigoya, nabanempa namemi kina pi ige naetiba ampa irosakibewe. Pigoya, ka'waina aeba naeti ampa irosakapa aepa kampa agaikuwe. ³⁸ Piya, mantarisa tumintopa pipa nae'ne nawamupisa kamana wasikenaba kampaye. Unatanti'na nkawamupisa kamana wasimagi aegarakena tumintone. ³⁹ Piya, unatanti'na ae awamupisa kamanapa naeka mayamawee: Aeba naeti ibabuwaitanti kina'mi a'yugu pusanaga kabiwaitamagi, ainti tabe kanabipa ibage pekini iyogakibewe, unatanti'na ae awamupisa kamanapa piyama waintiye. ⁴⁰ Pigoya ka'waina aeba yagarawa nae nagama amatiti punatakibipa, aeba a'ya'ma yagaba e'wasaenabi miyaba miyeka, ainti tabe kanabipa abage puma asitakuwe, nabanempa awamupisa kamanapa piyama waintegi wasiyuwe, untiye.

⁴¹ Pigoya Isu aeba: Mantarisa nanintaba naewe, yomeka, Yuta kina'miba abimagini ata potantawe. ⁴² Piya puntini maya untawe: Ma ntagaraba aeba Isu, Yosepe ntagarawe. Anoke abakeba pipa taeba isigaompene. Pipa nanaga: Naeba mantarisa tumintuweba, iye, untawe. ⁴³ Piya Yuguna Isuba Maya Uwaimima untiye: Tigeba uwoma kamanapa a-mpare-u me-u puta nasiyo. ⁴⁴ Piya, wasana ka'waina ae'wa nkaumarasa naeti ampa irosakenaenaba pipa kampa waintiye. Naba unatantina paibekana ampa irosakenaenaga waintiye. Pigoya naeba piya yagara aepa ainti tabe kanabipa abage puma asitakuwe. ⁴⁵ Pigoya, poropete kina'mi kamanapa awa'enaba mayama waintiye: Koti aewa wasana mono uwaimikiye, untawe. Pika ka'waina aepa nabanempa mono omima ayakekana abikibi'naba, aeba naeti ampa irosakiye.

⁴⁶ Pigoya, wasanama nkaobisa nabapa kampa agantipa, mantarisa tuminto, nae ka'wainana nabapa agama mintantone. ⁴⁷ Naeba tagaka urimukuwa abiyo: Ka'waina aeba naeka amatiti puma naegarakibi'naba e'wasaena maema miyaba mikiye. ⁴⁸ Pigoya miyaba nanintaba pipa naewe. ⁴⁹ Tiyabamagiba ka'me mpari mana namagini kampa miyaba mintantane. ⁵⁰ Pigoya, mantarisa naninta namagini kampa purikenaenaba pipa mampa naeti waintiye. ⁵¹ Piya, miyaba naninta mantarisa tumintipa pipa naenene. Pika ka'waina aeba naetisa naninta namaginaba asi nasi miyaba mikiye. Piya, nau'hempaba nanintartanta piye. Pipa mabisa kina tigeti miyaba mikena nau'nepa atakuwe, Isu piya untiye.

⁵² Piya yogini, Yuta kina'miba maka kamana umagini mare-u me-u puma maya untawe: Aeba ayamagina au'wapa tameka nakubompeka iye, untawe. ⁵³ Piya Yuguna Isuba Maya Uwaimintiye: Naeba tagaka urimukuwa, abiyo. Tigeba Wasanama Ntagara nae nauke korake kampa nakibepa, pipa tigupipa miyaba mikenaenaba kampa aborakiye. ⁵⁴ Ka'waina aeba nae nauke korake nakibi'naba asi nasi miyaba mikiye. Piya peka naeba aepa ainti tabe kanabipa abage puma asitakuwe. ⁵⁵ Piya, nae naupa pipa taga ntanintawe. Piya, korantepa pipa taga wanine. ⁵⁶ Pigoya nae nauke korake nakibi'naba aeba nae nagora atokaema miyeka naeba pabiyama aege atokaema mikuwe. ⁵⁷ Naba aeba miyaba'enama nkagowampa unataoga tumintoka, aeka umagi miyaba miyokana aeba nae nakibi'naba pabiyamagina naeka uma miyaba mikiye. ⁵⁸ Pigoya, tiyabamagi igebe mana nagaiteginiba ago purintasa puma wanane. We, nae naninta nakibi'naba pipa asi nasima esegima miyaba mikiye. Piya, mantarisa nanintawama nkagoba piyama mintuwe, untiye. ⁵⁹ Isu aeba pi kamanapa Kapaniyamu kumata mono namapi ampimagina uwaimiwaentie.

Miyaba mikena kamanataka Isu ikabitantawe

⁶⁰ Pigoya, abagi kina igetisa uwoma kina'mi pi kamanapa abite maya untawe: Ma kamana abokanaba kunta piya, pipa kebaya abukkiye, a, untawe. ⁶¹ Piya umagini, iyekita kamana yuguna antabaipinti Isuba abite maya uwaimintiye: Kamana pipa abeganaba nanaga kuntaba piye. ⁶² Wasanama Ntagara naeba pai mintantoti a'wae pumagi iyekiripa agaiginaba a'ya pikkiye. ⁶³ Pigoya, tau'ama wanane. Awamus'a'ama mikenaenaba wasanaba aboromagina tamiye. Pi nae urimo kamanapa pipa auma wantaga miyaba'ena wantagane. ⁶⁴ Pigoya tigetisa ka'isa kina'miba pika kampa aogimagine abewe, untiye. Pigoya, Isu aeba monowa a'a-o ikibe kina igecka ago pai abiwaentie. Piya, kuna

pikibi aepe kaga abibebe punti, pika uwaimintiye. ⁶⁵ Pigoya, kamana ka mayama amato puma untiye: Naeba pika maya ago urimuwe; Ka'waina aeba nabanemba kampa ase'yo potentakana, naeti ampa irosa'ma mikenaenaba kampa waintiye, ago urimuwe, untiye.

⁶⁶ Pigoya, pi ntaga abagi kina'wampitisa uwoma kina'miba Isupa iyekita puma atate a'wae puma wantini, to kake kampa nasi nasi puntawé. ⁶⁷ Pigoya, Isuba agorasa nagisarisa tara tumpaema kina'wa ibigama maya untiye: Tigeba pabiyama tikabinatakenaga yewo, untiye. ⁶⁸ Piya yogana Saimoni Pita maya omintiye: Wa'ega, kae katateba kapa keti wakune. Kae ka'wainaga a'ya'ma yaga miyaba kamana urintane. ⁶⁹ Taeba kaeti tamatiti pumagi: Kaeba Kotitisá aota yogurtagawema, abuwé, untiye. ⁷⁰ Piya yogana Isuba maya uwaimintiye: Naeba nagisarisa tara tumpaema kina tibabunto, tigetisa ka'wainaba nanaga ke kina'enaba piye, untiye. ⁷¹ Piya, aeba Yutasi, Saimoni ntagara Isikeriyoti kumatasa, aeka napimagina piya untiye: Aeba abagi kina, nagisarisa tara tumpaema kina, ige aruyenabisa mintana aintiba Isu kuna puntiye.

7

A'natabara Isukaba kampa aogima ntapintawé

¹ Pigoya, Yerusaremi kumatasa Yuta kina'miba Isu aegukena kamana yuguna Yutiya mawaipa atategina Karariya marimana nasi nasi puma mintantiye. ² Piyama mintogana, Yuta kina'mi seri nama kima'ma naninta nanta aota yaga agarosantiye. ³ Aibogini, a'natabaramiba maya omintawé: Kaeba ase'yo pumagina mampa atate Yutiya mari wama mata'i kukantana pempesa puma maroti uma pegini kaokina'miba agaiyo. ⁴ Piya, ka'waina aborakena untanaba aeba kampa kakama míma yogaba pikie. Pipa kampaye. Kaeba piya yuga pikenaga yempeka wama a'ya'ma kina'mi nkaruyenabi aborama pegini agaiyo, untawé. ⁵ Piya, a'natabara igeba aetiba kampa abima imatiti puntini piya untawé. ⁶ Piya yuguna Isuba maya uwaimintiye: Tigeba a'ya'ma yaga pikena puntiripa kanara pikibewe. We, naeba pipa kana'nepa ibaba kampa aborantiye. ⁷ Mampabisa kina'miba tigepa kampa karana puritakibekini, nae karana punatakibewe. Naeba pipa mikenaenawai kamparagaena wainti, pika uma aboraogini igobipa punatawe. ⁸ Tigeba aota yagaba waiyo. Naeba pipa kana'nepa kampa aborantika, ma aota yagaba kampa wakuwe, untiye. ⁹ Aeba piya ute, Karariya mariba mintantiye.

Isuba seri nama kinta aota yagaba uma agantiye

¹⁰ Pigoya, a'natabara igeba aota yaga uma agakena paitama wagasuguna, aeba ainti pasemagina wantiye. ¹¹ Pigoya, aota yaga aboraoginiba, Yuta kina paitawaytamagini miyume kina'miba aguyosagantini ibigama maya untawé: Pi ntagaraba aeba aeta mintiye, untawé. ¹² Piya, a'ya'ma kina'miba aekaba uwoma kamana uma mare-u me-u puntawé. Piya puntini ka'isa kina'miba: Aeba aogi yogurtawé, yuguni to ka'isa kina'miba akayuwaitamagini: Kampaye. Aeba wasanami nkimawama maema a'yugu puwaigasaye, untawé. ¹³ Pigoya, pipa Yuta kina'mika iyekuru pumagini aboramaba kamanapa kampa untawé.

¹⁴ Pigoya, aota yagaba abakapi Isuba tabe mono namapipa imagina wasanaba kamanapa uwaimintiye. ¹⁵ Mono yogini, Yuta kina'miba uwoma nkigi napimagini maya untawé: Ma ntagaraba ayamagina awa'ena aisiye: Aeba awa'ena namapipa kampa mintanti'navé, untawé. ¹⁶ Piya yuguna Isuba maya uwaimintiye: Naeba mono urimopa, pipa nae'nentaba kampaye. Pipa unatanti'na, ae mono urimuwe. ¹⁷ Piya, ma yo mponopa Kotitisabe nae'netisabayaya, pipa Koti nkawamu wasikena ibugai kina'mi abibebe pikibewe. ¹⁸ Piya, ka'waina aeba aewaka napimagina ikibipa, aeba au maete ima kamana ikiye. Piya, ka'waina aeba yoga agowama nkage maete ima a'mu potakibi, pi aeba kampari yogurtara kampaye. Aeba taga ntgarawere, yiyo.

¹⁹ Pigoya, Mosese ago kamana uma aborarimintipa, pipa tigetisa ke kapa wasiwaeye. Kampaye. We, ayagabaya naepa naegukenaba yewe, untiye. ²⁰ Piya yogini, uwa kina'miba maya untawé: Ke kina ka'waina kaege mintegina a'yugu kamana yena, kae kaegukena kinapa kapa kampa mintawé, piya untawé: ²¹ Piya yuguna Isuba maya uwaimintiye: Naeba mata'i kukantanaba ka'anto puntone. Pikaba tigeba nanaga urite taberapa wagana pewe, a. ²² Naeba yekiri abiyo: Moseseba: Yogarari ita ara'ena piyoma, uritantine. We, Moseseba pipa kampa agobintine. Tiyabamagi pai agobintane. Pigoya, i kasakena yuga yagaba sabatira aboragiripa pi ntagegeba pewe. ²³ Pigoya pimpa Mosese ago kamana aemita pigina, au'wa kampa aborasanaga yogurtarimpigi ipa kasakena yugaba pipa pewe. We, naeba pipa ka yagara aogima au'ama kaba atanto, pikaba nanaga abima ataba punatawe, a. ²⁴ Tigeba nanaga agarompa kamana ariwapa yewe, a. Agowapa napibebe pumagiri kamana au'wapa yigina aogi pusanawe, Isu piya untiye.

Igeba ma ntagaraba Karaisitiwe untawe

²⁵ Pigoya, Yeruseremi kuma ago kina ka'isa igeba Isuka maya untawe: Aegukena ye ntagaraba pipa mampaya, agaiyo. ²⁶ Aeba kamana aboraginiba igeba kamanapa kapa kampa otawé. Kiya kina'miba igeba ma kanabipa: Utaratanti ntagara Karaisitiwema, abintini uwa atawa, a. ²⁷ We, taeba kuma agowapa abintune. Pigoya pi ntaga Karaisiti ampa aborakibipa, pipa ka yagaramaba kuma agowapa kampa napikiye. Pipa ayabayawé, untawe.

²⁸ Pigoya, Isu aeba tabe mono namapi mono uma mintogini, piya yuguna kega'e uma maya untiye: We tigeba abibebe pumagiri aborantona, agonepa ago abewe. Tumintopa pipa napiyenepisaba kampa tumintone. Unatanti ntagara aeba taga ntagaragana unataoga tumintone. Tigeba aekaba kampa napima abewe. ²⁹ Piya, naeba ae agrorasa unataoga tumintoka aeka abibebe puntuwe, untiye. ³⁰ Piya yogini, igana namapi ababotakena untawe. Pigoya kana'wapa kampa puntogini iyankamaba kunta pogini atantawe. ³¹ Pigoya, wabe wayape uwoma kina'mi aega'ma imatiti puntini maya untawe: Karaisiti ampa aborakibi ntagaba, pipa uwoma kukantanaba pumagina ma ntgarama kukantanaba kampa asugasima pikibayawé. We, pi ntagaraba Karaisitibayawema, napiyune, untawe.

Isu iga'na utiyema ka'isa irebu kina uwaitantawe

³² Pigoya, a'ya'ma kina'miba Isukaba toma toma kamana yuguni, Parasi kina'miba abitegini tabe mono kiye kina Parasi kina'miba ka'isa monota kabinta kina uwaitauguni kanama iga'na ampa utikena kanantawe. ³³ Piya puguna Isuba maya uwaimintiye: Naeba uwaena yaganto tigege migaita, unataoga kananto ntagara aeti a'wae pumagi wakuwe. ³⁴ Piya, tigeba naguyosakagate kampa nabatakibewe. Wama umikubotiba pipa kampa, wakibewe, untiye. ³⁵ Piya yogini, Yuta kina'mi igeba maya uma mare-u me-u puntawé: Aeba aeta waka aguyosakubompeka iye. Yuta taokina to mari mirite wa kina, igeti wakenaga ibera, to marisa kina mono uwaimikená napintana iye. ³⁶ We: naguyosa'ma kampa nabatakibewe, piya uma umikubotiba, pita'iba kanara kampa wakibewe, piya kamanapa ayaga iye, untawe.

Isu miyaba wanika untiye

³⁷ Pigoya, Yuta kina'mi aota naninta nakena yaga mima a'ya pikena puntini tabe aruyená pumagini mintuguna, Isuba asima mima kega'e uma maya uwaimintiye: Ka'waina wanika abekanaba naeti kanama ampa nano. ³⁸ Piya: Ka'waina aeba naeti amatiti pumagina mikibipa, ae agupisaba wani nkaba aiyeso pemisa puma e'wasa wani pagi kiye, mono isapapa piya kamana kaemarantane, Isu piya untiye. ³⁹ Pigoya, Awamus'a'maka Isuti imatiti punta kina'mi maekibeka Isu untiye: Piya, aeba pi ntagaba manta e'wasaenawampa agupintiba kampa intika, Awamusapa kampa tumintiye.

A'ya'ma kina'mi a'yigimpagini tara aruyena puntawé

⁴⁰ Pigoya, wasanamiba pi kamana abitegini Isuka maya untawe: Aeba taga tabe poropete yagararene, untawe. ⁴¹ Piya yuguni ka'isa kina'miba: Aeba taga Karaisitiwe, untawe. Piya yuguni to ka'isa kina'miba akayuma maya untawe: Pipa Karaisiti aeba ayama Karariya marisaba aborakiye. Pipa kampaye. ⁴² Mono isapipa kamana maya untane: Karaisiti aeba Tebiti kuma ago Petariyamu, pita'i ae aokina'mi ige abakipa aborakiyema, iye, untawe. ⁴³ Wasanamiba Isukaba piya umagini atataru puma tara aruyena puntawé. ⁴⁴ Pigoya ka'isa kina'miba iga'na utikena pumepa iyankama kunta pogini atantawe.

Kiya kina'miba Isuti kampa imatiti puntawé

⁴⁵ Pigoya, monota kabiyume kina'miba tabe mono kiye kina Parasi kina igeti a'wae puma wauguni ibiyama maya untawe: Tigeba nanaga kampa araku'ma ababute kanawema ibigauguni, ⁴⁶ irebu kina igeba: Aeba kamana yemipa, ka'isa kina'mi yesapa kampa iye, untawe. ⁴⁷ Piya yuguni Parasi kina igeba maya uwaimintawé: Pi tigepta pabiyma timaba a'yugu purigasaye, a. ⁴⁸ Tabé Yuta kiye kina Parasi kina taetisaba ka'waina aega'ma atokaeya, a. Pipa kampaye. ⁴⁹ Uwa kina ago kamana kampa abima miye kina, pi ige Koti nkaobi ataenaba pewe untawe.

⁵⁰ Piya yuguna, iyo'yagara ka, agewapa Nikotimasi, pai Isu uma aganti ntagara, aeba maya uwaimintiye: ⁵¹ Tigeba yiyo, Ka yagarama nkagowa kampa abinta kaintanawa kampa aganta, antota kamana uma a'ya atakenaba, ago kamanatepipa kapa waintiya, a. Pipa kampaye, untiye. ⁵²⁻⁵³ Piya yogini, aokina'miba maya untawe: Pigoya kaeba uwa marisa, Karariya marisawa, a. Pipa kaeba ago kamana aisusuma aogima agao. Karariya marisa poropete aborakenaena kampa waintiye, untawe.

8

Kupiyo wae ka Isuti ababute kanantawe

¹ (Pigoya, igeba atate namankaiti wagana puwaeyuguna, Isu aeba Oribesi amuti intiye. ² Marogana pita'isa a'wae pumagina tabe mono namapinti iyogini wasanaba uwoma kina'mi aeti tabera ampa aki puntawé. Piya puguna pita'i mara'mima mono uwaimintiye. ³ Piya pogini mono tisa kinape Parasi kina'mibe igeba ka wae kupiyona pogini abatamagini Isuti ababute wama wasana ibakapi me atama, ⁴ Isupa maya omima untawé: Ma nkwaepa kupiyona pegi agama ababute kanaune. ⁵ Pigoya, Moseseba piya waepa yaba kasutasa aeguma kaiiyiomá, ago kamanapipa uratantiye. Kaeba aekaba ayama napiyene, untawé. ⁶ Pipa uwa amiyo pumagini ka kamana aborama yekiniba kamana otakena untawé. Pigoya, piya yuguna Isu aeba mabi parokaema ayatasá awa'ena kaentiye.

⁷ Kaeyogini to abiga abiga puguna asagayuma maya uwaimintiye: Tigetisa ka'waina aguntaenawa kampa wainta miyemi'na agobimagina yaba kasupa aeguyekiri aeguyiyo, untiye. ⁸ Piya utegina to kake parokaemagina mara kaentiye. ⁹ Piya pogini igeba kamana'wa abitegini kiya kina maru paitama wagasuguni to ka'isa kinapa wama wama a'ya wantawé. Piya puguna kana wae aeba abintowa mintantiye.

¹⁰ Aibogana, Isuba asagayuma agama abigama untiye: Kamana ugata kinapa igeba aetane. Igeba antota kamanapa kapa kampa ugatawa, a, untiye. Piya yogana kana wae'maba: Wa'ega pipa kampaye, untiye. ¹¹ Piya yogana Isu maya omintiye: Pigoya, naegeba antota kamanapa kampa ugatauwa, kaeba uwa wama mimagina aguntaenaba to kake a-po, piyama omintiye.)

Isu aeba agowa uma aborawaimintiye

¹² Pigoya, Isuba wasana kamana to kake amato pumagina maya uwaimintiye: Naeba a'ya'ma mabisá kina'miti e'wasaenawe. Piya, ka'waina aeba nae naegarakibi'naba tununtanabipa kampa wama mikiye. Aeba miyaba e'wasaenawa waitantakana mikiye, untiye. ¹³ Piya yogini Parasi kina'mi maya omintawé: Mapa kaeka nkago umagina aborane. Pipa abokanaba tagantanaba kampa piye, untawé. ¹⁴ Piya yuguna Isuba maya uwaimintiye: We, nae'ne kamana, kanara suwe. Kamana'nepa pipa tagane. Piya, naeba asima kananto kumapa abinta, wakena kumapa abinta puntuwe. Pigoya tigeba kuma agonepa kampa abintawé. Aetapaya wakubo, pipa pabiyama tigeba kampa abintawé. ¹⁵ Tigeba a'yiginkitakena yuga pepa, uwa mampabisenaga napima pewe. Naeba piya yugaba kampa puwe. ¹⁶ We, a'yiginkitakena puntapa, naeba tagantanaba puwe. Naeba pi ntugaba nabintone pikenaenaba kampa waintiye. Naba unatanti'na ae nao'maeyaka pikenaenara waintiye. ¹⁷ Pigoya, ago kamanatipipa mayama waintiye: Tara yagararamisi ka kamana yisigiripa, tagane yiyo, iye. ¹⁸ Pigoya naeba agone uma aboraoganaba, naba unatanti aebé pabiyama uma aborayé, Isu piya uwaimintiye.

¹⁹ Kamana piya uwaimogini: Kabagampaba aempa mintiyema, abigauguna maya uwaimintiye: Tigeba naeka kampa abibebe puntiripa nabanempakaba pabiyama kampa abibebe pikibewe. Naekaba abima napibebe pesinta, nabanempakaba pabiyama napibebe pesine, untiye. ²⁰ Pigoya Isu aeba tabe mono nama mone ataume ntbaewama nkagora mima kana kamanapa untiye. Pigoya kana'wapa kampa aborantogini kampa iga'na utintawé.

Nae wakubo kumatiba kampa wakibewe, uwaimintiye

²¹ Pigoya Isuba to kake maya uwaimintiye: Titate wakiripa tigeba naguyosakate aguntaenarintaga mima purikibewe. Nae wama umikubotiba ayama wakibewe. Pipa kampaye, untiye. ²² Piya yogini Yuta kina'miba igeba maya untawé: Naeba wama umikubotiba ayamagiri wakibewe, piyaba nanaga iye. Ae'wa aeguma kaikenaga yibera nanaga iye, untawé. ²³ Piya yuguna Isuba maya uwaimintiye: Tigeba abetisawa naeba atisawe. Tigeba mabisawa, naeba mampabisaba kampaye. ²⁴ Pika naeba urimuwe: Tigeba aguntaenarintaga mima purikibewe. Nagawa pe ntagara naeka kampa napibebe puntiri, aguntaenarintaga mima purikibewe, untiye. ²⁵ Piya yogini: Kaeba taga kegawema, abigantawé. Abigauguna. Isu maya uwaimintiye: Ma nae pabi ntagaramana, paipa urimintone. ²⁶ Naeba tige aguntaena kaintana kamanatipa uwoma maema miyuwe. Unatanti'na aeba taga kamana siye, pigoya naeba awamupisa abintoka pabiyama mata'i mabipa uma aborauwe, untiye.

²⁷ Piya, abawampaka piya uwaimogini igeba kampa aogimagini abibebe puntawé.

²⁸ Pika Isuba amato puma maya uwaimintiye: Ainti Wasanama Ntagara naepa naegumagiri nasagayukibe ntagaba abibebe pikibewe. Pigoya nae naumanepis-aba a'ya'waemaenaba kampa puwe. Nabanempa unanimi, pabi kamana yuwe.

²⁹ Unatanti'naba aeba naege miye. Naeba a'ya'ma yagaba a'ya'waemaena poganaba abegin aogi pegini naepa kampa nagasawe, untiye. ³⁰ Piya yogini, uwoma kina'mi imatiti pumagini aegarantawé.

Taga kamana aegarakibe'nagiba nare ntare puma mikibewe

³¹ Pigoya aeti imatiti pumagini aegaranta Yuta kina maya uwaimintiye: Tigeba nae nawamu wasima mimagiri nabagi kina'nentana pikibewe. ³² Pigoya, nae taga kamana'ama nkiga'naba iyobatitakiri kanara uwa mikibewe, untiye. ³³ Piya yogini igeba maya kamana a'wae pomintawé: Taeba Abara'amu nkaga'nura mima uwa mintune. Ke kapa kayokaya kina'wapa tababuma iga'naba ubutatantika kaeba: Iga'nara kampa mikibewebe, yene, untawé. ³⁴ Piya yuguna Isuba maya uwaimintiye: Naeba tagaka urimukuwa abiyo. Ka'waina aeba aguntaena pi'naba aguntaenama kayokaya'ena piye. ³⁵ Piya, kayokaya yagaramaba tabe yagarawampa ntama kumatiba asi nasimaba kampa miye. Ae'wa ntagara tubama abawampa ntama kumatiba asi nasimaba uwa miyabapa miye. ³⁶ Pika tigepa Koti ntagara tuba nae kanara iga'na iyobatitakiri uwa mikibewe, yuwe. ³⁷ Piya, Tigeba Abara'amu aga'nurawa, pipa naeba abintuwe. Pigoya, tigeba pipa kamana'nempaba tigetiba asesepagiri naegukenaga yewe. ³⁸ Naeba nabanempatisa kamana abinto pabi suwe. Piya, tigeba tibarimpatisa abintasa suma yewe, untiye.

Tibarimpaba kewe, uwaimintiye

³⁹ Piya yogini igeba: Tae tabarempaba Abara'amuwe, untawé. Piya yuguna Isuba maya uwaimintiye: Tigeba Abara'amu nkaga'nubara taga mintasinta, ae puntemisa pesine. ⁴⁰ Piya, Kotitisa taga kamana abinto pi urimuwe. Piya yogiripa tigeba naegukenaga yewe. Pintanaba Abara'amuba kampa puntine. ⁴¹ Pika tigeba tibarimpala pemisantana pewe, untiye.

Piya yogini igeba maya untawé: Taeba ke'isa kampa aborantompene. Koti aebe tabarempa ka'antowe, untawé. ⁴² Piya yuguna Isu maya uwaimintiye: Koti nkaga'nubara mintasinta naepa kayone punatasine. Naeba Kotitisa tumintone. We, nae'ne ntaumabisaba kampa tumintone. Ae unataoga tumintone. ⁴³ Ayamagiri miyegana kamana'nempaba tigutapa kampa waiye, a. Nae kamana yogiripa, nae kamanaka kampa tibegiri: Kampa abukune, yewe. ⁴⁴ Tige tibarimpala kewamawe. Piya, ae abugaintana tige pikenagaba napiyewe. Aebe pai wasana iyguma ateaña puwaitama mintanti'na mirite kanaye. Aebe taga kamanapa akabitantika agupipa taga kamanapa kapa kampa waintiye. Aebe kumpari kamana'wampaba nakenawantana piye. Aebe kumpari yagaragana kumpariyenama nkaba mintiye. ⁴⁵ Piya, naeba kumpari kamana urimosinta abesine. We, taga kamana urimogiripa a'a-o uma kampa abewe. ⁴⁶ Tigeba nae kaintanaga ka unatakibewa, a. Pipa kampaye. Pigoya naeba pi nkawameta taga kamana ai'newa urimogiripa nanaga kampa abibebe pewe. ⁴⁷ Pigoya ka'waina aebe Kotitiga aboranti'naba kamana'wapa abiwaeye. Tigeba Koti ntagaraba kampa mintiri, kamana'wapa kampa abimagiri aegarawé, Isu untiye.

Abara'amuba kampa aborantoga mintantone, untiye

⁴⁸ Piya yogini, Yuta kina'miba maya kamana a'wae pomintawé: Taeba kaekaba mayawe yune: Kaeba Sameriya yagaragagana, ke kina kantabaipi mintiye. Pipa taeba napiyompepa tagane, untawé. ⁴⁹ Piya yuguna Isu maya uwaimintiye: Ke kinapa nae nantabaipintiba kampa mintiye. Naeba nabanempsa nkage maema asaga'yuyogiri, tigeba pipa nae nageba maemagiri meru nkaba pewe. ⁵⁰ Naeba nagene maema asaga'yukena yugaba kampa puwe. Ka yagara mintikana ae nagenepa uma asaga'yui'na, pipa Koti, aebe antota'enaba pikie. ⁵¹ Naeba tagaka urimukuwa abiyo: Ka'waina aebe nae kamana wasikibi'napa purikenaenaba kapa kampa aboramikiye, untiye.

⁵² Piya yogini Yuta kina'miba maya untawé: We, ibaba abune. Ke kinapa kae kantabaipi mintiye. Piya, Abara'amuba pu'wantegini, poropete kina igeba kaga pu'wantane. Aibuntagana kaeba mayawe yene: Ka'waina aebe nae kamana maema mikibi'napa purikenaenaba kapa kampa aboramikiye, yene. ⁵³ We, tayabama Abara'amuba aebe tabe yagara pu'wanti, ae asugaikenaga yeno. Pigoya, poropete kinapa igeba pabiyama pu'wantana, kaeba ayama taberapa kaupa maete iyene, a, untawé.

⁵⁴ Piya yuguna Isuba maya uwaimintiye: Naeba nau maete iyekanaba kampa kanarasakiye. Nabanempsa minti aebe Kotirene omena, pi ae nagenepa maema asaga'yuye. ⁵⁵ Tigeba aekaba kampa napimagiri aegarawé. Naeba pi napima abibebe puntuwe. Piya, naeba ayama: Kampa agama abintuweba, ukuwe. Piya ukubopa tige awameta kumpari yagara kanta pukuwe. Kampaye, naeba aepa agama abibebe pumagi kamana'wapa wasiyewe. ⁵⁶ Tiyabama Abara'amu aebe kana'ne aborakan agakenagaba tabera a'mu puma mintogana, ainti aboraogana agama a'mu puntine, untiye. ⁵⁷ Piya yogini, Yuta

kina'miba maya omintawe: Kaeba kabogapa 50-ba kampa puntampe'nagaba, ayamagina Abara'amupa agampesine, untawe.⁵⁸ Piya yuguna Isuba maya uwaimintiye: Naeba tagaka urimuwa, abiyo: Abara'amuba kampa aborantoga mintantone, untiye.

⁵⁹ Piya yogini yaba kasu mpaemagini aegukena puguna, Isu aeba iyora kakamagina tabe mono namapintisa iro'wantiye.

9

Aorika yagarama kamanane

¹ Pigoya, Isu aeba ke'i wantana ano nkantabaipintisa aorika yagara aboranta, ae uma abatanitye. ² Piya pogini, abagi kina'miba igeba abigama maya untawe: Tisa, ke aguntaenab pogana aorikapa aboranti, aewapera anoge abage isigewema, abigantaw. ³ Piyama abigauguna Isuba maya uwaimintiye: Pipa kampaye. Aewa kaintanarakabe anoke abake kaintanarakabe kampaye. Koti nkesegiyenama ago aeti aborakibika pabiya yagara aborantine. ⁴ Taeba unatanti'na ntugaba ara pumagi miyeno. Ase yekanaba pabigo a'ya puwakiye. ⁵ Naeba mabi miyo kanabipa naeba mampabi e'wasa puritauwe, untiye.

⁶ Piya ute, mabi kaisa puma ma'magi pumagina, kana aorika yagarama nkaora pai'atantana, ⁷ maya omima otantiye: Kaeba wamagina Sairomu kotupi uma kaukapa wani nkaeyo, untiye. Pigoya Sairomu pi nkageba kamanatepisaba: Otanti mpariwe, yune. Piyama omogana pigo kana yagara aebawamagina autisma uma wani nkaeyogana aoba apina'magina agantie. Piya purite a'wae puma kanaogini, ⁸ aokina'mibe nanintaga esuwaitama mintanti kina'mibe igeba kaga agategini maya untawe: Pipa mara'mima nanintaga esurata pemi ntagara aebayaye, untawe. ⁹ Piya yuguni, ka'isa kina'miba: Aeba pimpaye, yuguni, to ka'isa kina'miba: Kampaye, pipa ae kanta yagara yagarawe, untawe. Aiyuguna, aewapa: Mapa naewe, untiye.

¹⁰ Piya yogini igeba abigamagini maya untawe: Ayamagina kaoba aganema, abigauguna, ¹¹ aeba maya uwaimintiye: Ka yagara agewapa Isu, ae ma maemagini au akiae'magina naora pai'natama maya unamintiye: Kaeba Sairomu kotuti wamagina paso, unamegi naeba wama uma pai'ma naoba agauwe, untiye. ¹² Piya yogini igeba: Kana yagara aeba aeta mintiye, untawe. Piya yuguna aeba: Naeba kampa abintuwe, untiye.

¹³ Aiyogini, kana aorika yagara Parasi kina'miti ababute wantawe. ¹⁴ Pigoya kana aorika yagara Isu au kae'magina aora pai'ataogana aogatantipa, sabatira puntiye. ¹⁵ Piya, Parasi kina igeba to kakema abigama maya untawe: Kaeba aya pumagina kaoba agane, yuguna, aeba: Naonepa marasa pai'atagi naeba wama wani pai'magi nao agauwe, untiye. ¹⁶ Piya yogini Parasi kina'mitis ka'isa kina'mi maya untawe: Kana yagara aeba Kotiba kampa otagini kanantana sabatiwamapa kampa aegaraye, untawe. Piya yuguni to ka'isa kina'miba maya untawe: Aeba agunta yagara mintanaba maya awame'enaba ayamagina pemisine, untawe. Piya uteginatiatara pumagini taru aruyena puntawe.

¹⁷ Piya puntini kana aorika yagara to abigama maya untawe: Kao agagatami, aekaba kaeba ayawe yenema, abigauguna, maya untiye: Aeba poropete yagarawe, untiye.

¹⁸ Pigoya: kana yagara aeba taga aorika mimagina aogaye, yuguni, ka'isa Yuta kina'miba igu'ama tara tara pumagini anoke abakega isigega'e umagini, ¹⁹ mayama isibigama untawe: Yagarari aorika aborantiye yemepa mampayo. Aeba ayamagina aoba agayema, isibigaugunisi, ²⁰ anoge abage isigebi maya untase: Aeba yagararesikara, pipa abintuse. Piya aorika aboranti, pikeba abintuse. ²¹ Pipa ayamabaya aoba agaya, pigo kebaya aoba agataya, pipa kampa abintuse. Aeba anasa kinana, pi ae'wa abigaigina agowapa urimeno, untase. ²² Pipa Yuta kina'mika isiyekuru pumaginisi piya untase. Pigoya Yuta kina'miba maya kamana umagini nikintaw: Ka yagarama Isuka taga Karaisitiwe yekiripa mono namapisaba agarubaiyo, untawe. ²³ Pika anoge abageba isiyekuru pumaginisi: Aeba anasa kinana, ae'wa abigaiyo, untase.

²⁴ Piya yusuguni kana aorika yagara to kake agega'e umagini maya omintawe: Kaeba Koti nkage maema asaga'yuma yo. Taeba yompepa, ma kana yagaraba aeba agunta yagarawa, ae age a-nkasaga'yuyo, untawe. ²⁵ Piya yuguna aeba maya uwaimintiye: Aeba agunta yagarawo, pipa kampa abintuwe. Pigoya naeba naorika mintanto'nana nao agaopa, pipa abibebe puntuwe, untiye. ²⁶ Piya yogini to kake atesuma abigantaw: Nana pugataye. Aya pumagina kaoba agagatayema, abigantaw. ²⁷ Piya yuguna aeba maya uwaimintiye: Naeba ago urimopa, tigeba pipa kampa abewe. Nanaga abara kamanapa urimekiri abikenaga yewe. Tigeba ae abagi kina'ena pikenaga yewa, a, untiye.

²⁸ Piya yogini aomana sumagini maya untawe: Pi abagi yagaraba kaewe. Taeba Mosese nkabagi kinatawe. ²⁹ Mosese Koti kamana ominti, pi abune. Pigoya pi ntagaraba aetasabaya aborama kananti, pipa kampa abintune, untawe. ³⁰ Piya yuguna kana

yagaramaba maya kamana a'wae puwaimintiye: We, pipa pami puntanawé. Nao aganatai ntagaraga aeba aetasabaya aborantiye ye ntagarama naoba aganataye.³¹ Taeba mayama abune, Kotiba agunta kina'mi kamanapa kampa abiye. Piya, ka'waina aeba Koti kamana abima aega'ma awamu wasiyi'na Kotiba abima ao'maeye.³² We, paipa ka yagarama aorika yagara aogatanti kamanapa, ma aborantistasaba kapa kampa abirite kanantompene.³³ Piya, ma kana yagara aeba Kotitisa kampa tumintemisinta, piya yuguba ayamagina pemisine, uwaimintiye.³⁴ Piya uwaimogini kana aorika yagara maya omintawé: Kanogampaba taga agunta yagara yakari pugatanti'naga, tae mono uramikenaga yeno, ute apasana'ma agarubantawé.

Agu'ama aorika kamanane

³⁵ Pigoya, apasana'ma agarubauguna Isuba abintiye. Piya puntana kana yagara abatama mayama, abigama untiye: Kaeba Wasanama Ntagaraba aega'ma kamatiti penoma, abigantkiye.³⁶ Abigaogana kana yagara aeba maya untiye: Wa'ega, kaeba yempepa aeba kewe. Nayakega agabebe pumagi aega'ma namatiti peno, untiye.³⁷ Piya yogana Isu maya omintiye: Pigoya kaeba agao. Kamana ugamopa, pipa naewe, omintiye.³⁸ Piya omogana kana yagarama maya untiye: Wa'ega, naeba kaega'magi namatiti pugatauwe, utegina agisabi uma parokaentie.

³⁹ Piya pogana Isuba maya omintiye: Naeba mabi wasana a'yiginkitakena tumintone. Pika iyorika kina'miba iyo agaigini, iyoyoga kina'mipa iyorkaekibe, pi ntuga pukena tumintone, untiye.⁴⁰ Piya yogini Parasi kina agora mintume kina'miba abitegini: We, taeba taorikano, untawé.⁴¹ Piya yuguna Isuba maya uwaimintiye: Tigeba tiyorika mintasinta aguntaenaripa kampa tigeti waiyesine. We, tigeripa: Taeba taoyagane yeka, aguntaenaripa uwa wairitakiye, Isu piya untiye.

10

Sipisipi kagisawama meto kamanane

¹ Pigoya, Isuba kamana maya untiye: Naeba tagaka urimukuwa abiyo: Ka'waina aeba sipisipiwama kagisa kagopinti uma pasikena kabera kampa uma pasinta, tori kagisa aemita puma wakibi'nakaba, aeba ku ntagara mama, to'wainantana a'yugu maekena yagarawe, yewe.² Pigoya, to ka'waina aeba kaberisa iyegiripa, aekaba pipa sipisipi ki'numpi nkibawaimpawe, yewe.³ Aeba ampa irosaginaba kiya yagaramaba agate kabae ai'atagini sipisipiwampiba awamupisa kamana abewe. Piya pegina yaga ki'nunkapa ige uma igega'e yegini kagisa kagopintisa aeti kana pegana ibabute irosaye.⁴ Ibabute paitawaitama tumegini kamana'wapa ago abima aegarawé.⁵ Pigoya, to yagaraba kampa aegarakibewe. Piya, ae agaba kampa abintaka karu potama iyegaka wakibewe, untiye.⁶ Pigoya, Isu aeba piya meto kamana uwaimogini igeba ayaga kamanapa iye umagini, kana kamana'ama nkagoba kampa abintawé.

Isu aeba aogi sipisipi kiye yagarawé

⁷ Pigoya, Isu aeba to kake uwaimintiye: Naeba tagaka urimukuwa abiyo. Sipisipi ige ikena pi kabeba naewe, untiye.⁸ Pigoya naeba kampa aborantuwigini, aboranta kina igeba pipa ku kina, to wainanta uwa a'yugu maekena kinakini, pika sipisipi igeba iwamupisa kamana'waipa kampa abintawé.⁹ Pigoya, sipisipi kabewaipa pipa naewe. Piya, ka'waina aeba naeti kanamagina kagisa kagopinti uma pasekanaba, Koti ababikiye. Piya pekana, uma pasite irosate puma nanintaba maekiye, untiye.

¹⁰ Pigoya, ku kina kanaipa tonagaba kampa kanaye. Aeba sipisipi kuntana puma iyeguma ataena puwaitakena kanaye. We, nae pi kanaopa, miyaba e'wasaena aborama imekini aogima asoyaenabi pumaeyekini miyyema, tumintone.¹¹ Naeba sipisipirape aogi kiyenawé. Aogi kiye yagaramaba ae'wa nkau'wakaba kampa napinta, kasima sipisipi igeba napima iyo'maeye, untiye.¹² Pigoya ka'waina aeba ikantana yuga pikibi'naba, aeba taga yaga kiyeba kampaye. Piya, aeba kana sipisipi ki'numpi nkibaba kampaye. Aeba agakana kabu kara kanakanaba itate aegaka wagaalikiye. Piya pekana kabu karama ampa sipisipi iba nama igarugarebakiye.¹³ Pigoya aeba uwa ikantana yuga pemika, aeba sipisipigaba abekana uwaena kanta pekana kampa igeckaba napikiye, untiye.

¹⁴⁻¹⁵ Naeba sipisipirape aogi kiye nagini, naeba naopa igaogini igeba naekaba napiyewe. Piya, nababe naebe agama abima miyuse. Pi nkawameta naebe naokina'mibe agama abima miyune. Pika naeba sipisipi igeba napima iyo'maekenaga miyaba'enanepta kaikuwe, untiye.¹⁶ Pigoya, to au'i ka'isa sipisipinepa mintawé. Igeba ma kagisa kagopisaba kampaye. Piya naeba igeba ibabute kanakini kamana'nepa abikibewe. Pigoya sipisipi aruba kana kiyaba pabiyama kanasuma aborakiye.¹⁷ Naeba mikenaenanepa

to kake maekuboka kaekuwe. Pika nabanempapa naeka abiye.¹⁸ Mikenaenanepa ka'wainaba kampa naparikiye. Pipa nae'ne naumanepisa kaikuwe. Naeba mikenaenanane kaikenagabe maekenabe pi esegiyenaba wainatantiye. Piya pukuboka nabanempa unatantiye, untiye.

¹⁹ Isu aeba kamana piya yogini, Yuta kina'miba igeba abite maka umagini atatara puma tara aruyena puntawe.²⁰ Piya puntini igetisa uwoma kina'mi maya untawe: Ke kina antabaipinti mintegina aibo'ena piya. Nanaga tigeba kamana'wapa abima miyewe, untawe.²¹ Piya yuguni to ka'isa kina'miba maya untawe: Kewamaba piya kamanapa kampa untana, pi kewama ka'wainaba iyorika kina'mi nkiyoba kanara agawaitakiya, a. Pipa kampaye, untawe.

Yuta kina'miba Isu ikabitama kama potantawe

²² Pigoya Yerusaremba aota yaga aborantiye. Pipa pai tabe mono nama kabe aiginta kana aborantiye.²³ Pigoya, pi ntaga esiba yaga aboraogana, Isu aeba tabe mono namapinti ka maru agewapa Soromoninta, pita'i waogini,²⁴ Yuta kina'miba ampa kobe pumagini maya omintawe: kaeba nanaga tagu'ama tara taraba puratane. Karaisiti yagara mintanapa agogapa aborama uramo, untawe.

²⁵ Piya yuguna Isuba maya uwaimintiye: Naeba urimogiripa kampa abibebe pewe. Nabanempa nkawamuta yoga po'na nkagonepa uma aboraye, untiye.²⁶ Pigoya tigeba pipa sipisipinentanaba kampa puntiri kamana'nepa kampa aega'ma napiyewe.²⁷ Sipisipinentana puma miye kina'miba kamana'nepa abewe. Piya, naeba igabebé puma abiwaemogini naegarawe.²⁸ Piya, miyaba'ena aborawaimekini kampa purinta, miyaba mikibewe. Igepa nae nayapisa ka'waina iyoba itakenaenaba kampa waintiye.²⁹ Nabanempa naeti ibabuwaitanti kina igecka aboganaba a'ya'waema nkesegiyenapa igasaye. Eya, ka'wainaba nabanempa nkayapisaba kampa igarubakiye.³⁰ We, naebe nababe tasigeba ka'antowe, Isu untiye.

³¹ Piya yogini, Yuta kina'miba yaba kasu mpaema aegukena puntawe.³² Piya puguna Isuba maya uwaimintiye: Aogi Yuguba toma toma nabanempa nkayapisa puriyakogiripa, tigeba nana ata pogiri yaba kasupa maema naegukena pewe, untiye.³³ Piya yogini, Yuta kina'miba pabigo awamuta u'magini maya omintawe: Aogi yuga pempekaba kampaye. Kaeba wasanaraka miyempe'naga Koti akayasotama, kaegaka: Kotinawe, yempeka kaegukenagaba yune, untawe.

³⁴ Piya yuguna Isu maya uwaimintiye: Ago kamanatipipa: Tigeba Koti kanta pewema, untiye.³⁵ Piya, Koti kamana maru aboranti kina igecka Koti kanta puma miyewe. Eya, mono'amaba kampa paga pakiye.³⁶ Pigoya, nabanempa utanatama, aewa unataoga mabi tuminto, pika naeba Koti Ntagaranawe, yuwe. Pipa tigeba nanaga: Koti akayasotaneba, naekaba yewe, a.³⁷ Piya, naeba yoga popa, pi agaigina nabanempa ae awameta kampa pekiripa, kamana'nepa a'a-o yigina kanarasaisine.³⁸ Pigoya, naeba ae yuga puwe. Piya, tigeba kamana'ne kampa tibegiripa, kanara yoga poka napima aogima abibebe piyo. Piya puntiri tigeba mayaga aogima napiibebe puma piyo: Nabanempaba naege miyegi, naeba pabiyamagi aege miyuwe yo kamanapa aogima abiyo, untiye.³⁹ Piya yogini iga'na utukena puguna igaitegina wagaintiye.

⁴⁰ Aibuntana, Isu aeba Yontani wanipa ta'ema maroteri wama pai Yoni wani pai'itama mintanti, pita'i wama umintantiye.⁴¹ Pita'i umintogini, a'ya'ma uwoma kina aeti ampa irosa'ma mare-u me-u puma maya untawe: Yoniba awame'enaba pipa kampa puntine. We, a'ya'waema kamana ma ntagaraga Yoni untemipa, pipa tagane, untawe.⁴² Piya tegini uwoma kina'miba Isu aega'ma imatiti puntawe.

11

Arasarusi pu'wantkiye

¹ Pigoya Petani kumata ka yagara mintanti, agewapa Arasarusi, aeba yonintana abogana mintantiye. Pigoya, Mariyage Matage isigeba a'nantoge anonantoge pabi kumatasawe.² Piya, Mariya pi ae Wa'ega agunta wani pai'atama a'no nkabiyatasa agisaba aebago pogaintiye. Pi ae ao'manto Arasarusi yonintana abogana waitamintantiye.³ Piya poginisi, anonantoge a'nantoge isigeba Isuti kamana maya uma atausuguna wantiye: Wa'ega, kaeba abo. Kao'yagara aeba yonintana abegini waitamintiye, uma atausuguna wantiye.⁴ Piya pogana Isuba pi kamana abite maya untiye: Pi nkinuntana wasana uwa purikenaba kampaye. Koti a'muntana aborakiyema untiye. Koti Ntagarawa nae i'mu punatakenaenaga pi yonintanaba aboraye, untiye.

⁵ Pigoya, Matakabe a'nantokabe Arasarusikabe Isupa igekaza tabera abuntye.⁶ Pigoya, yonintana abiye kamana abitegina, mintantita tara yaga to kake mintantiye.⁷ Piyama

mintana, abagi kina'wa maya uwaimintiye: Maeyigi, Yutiya mari a'wae pumagi wano, untiye.

⁸ Piya yogini abagi kina'wampiba maya omintawe: Tisa, Yuta kina'miba maganto yaba kasutasa kaegukena untana, pipa nanaga mapa igetiba to kake a'wae puma wakenaga yene, untawe. ⁹ Piya yuguna Isuba maya a'wae puwaimintiye: Aseba kampa unta, papa uwa tantiye. Piya, ka'waina aebe ara ke'i nasemipa kampa uma aesama aeguye. Aebe e'wasa pekana a'ya'waemaenaba kanara agakiye, untiye. ¹⁰ Piya, ka'waina aebe aseka ke'i wagina uma aesama aegukiye. Aebe tunutanabinti wama ayama a'ya'waemaenaba agakiye, a. Pipa e'wasaenaba kampaye, untiye.

¹¹ Piya untana kamana ka mayama amato puntiye: Abiyo, tao'yagara Arasarusiba awaitamintika, pi naeba wama uma abage pukuwe, untiye. ¹² Piya yogini abagi kina'miba maya untawe: Wa'ega, awaitamitipisa to agama asikiye, untawe. ¹³ Isu aebe ago purome meto kamana yogini, igeba uwa awaitamintegina iyemagini kampa abibebe puntawe.

¹⁴ Piya puguna Isuba uma aboroma uwaimintiye: Arasarusi ago pu'waye. ¹⁵ Naeba pita'i kampa wama umintogana pu'waika tigekaba nantawamaba aogi piye. Tigeba aogima timati piwikeka pintanababoraya, maeyigi aeti wano, untiye. ¹⁶ Piya yogana Tomasi, to ka agiwapa Agaiyawe unta, aebe abagi aokinapa maya uwaimintiye: Taeba wama tisage kaga uma purukune, untiye.

Isu aebe abage pikena miyaba'enama nkagowe

¹⁷ Pigoya, Arasarusiba arubinti waintogana, tarawa tarawaki yaga a'ya puwaogana Isuba uma irosantiye. ¹⁸ Pigoya, Petani kumapa pi Yerusaremi kuma'ama nkagora tumairira waintantiye. ¹⁹ Pitasa Yuta kinapa a'ya'ma Matake Mariyake isi'nanto pu'waomeka tugu nkisigakena wantawe. ²⁰ Piya puguna, Mataba: Isu ampa irosaye yuguna, abitegina, Mariyaba namapinti mintogana, ke'i wama uma abatantiye.

²¹ Uma abatama maya omintiye: Wa'ega, kaebe mata'i mintampesinta, na'nantoba kampa puremisine. ²² Piya, ibantoba naeba kaekaba abuve. Piya mayaenagaba Kotiti esotaganaba abigamikiye, untiye. ²³ Piya yogana Isuba: Ka'nantoba aogama asikiye, untiye. ²⁴ Piya yogana Mataba maya untiye: Ainti tabe kanabi aogama asikibi, pipa abintuwe, untiye. ²⁵ Piya yogana Isuba maya omintiye: Abage puma asitakena miyaba'enama nkagoba naewe. Pika ka'waina naeba naega'ma amatiti pikibi'naba purikibipa aumawapa awa waiyaba mikiye, untiye. ²⁶ Piya, ka'waina aebe aogama mintana amatiti puma naegararakibi'naba kampa purinta miyaba mama esegi pikkiye. Kaebe pi kamanapa abibebe peno untiye. ²⁷ Piya yogana Mataba maya untiye: Wa'ega, owe. Koti Ntagara, Karaisiti pai mabi aborakiye unta, pipa kaewema, nagutasa abibebe puwe, untiye.

Isu kube'ena puntiye

²⁸ Piya kamana untana a'nanto Mariyaka kega'e uma obina suma maya omintiye: Tisa kanantana kagega'e iyema, omintiye. ²⁹ Omogana, Mariyaba abite pabigo asima Isuti wantiye. ³⁰ Pigoya, Isu aebe kuma awamori Mata kamana omometi mintantiye. ³¹ Piya pogana Mariya aebe karu'ena asima waogini, Yuta kina namankapi tugu nkampintume kina'miba: Wasana aruri kube'ena pikena waye, ute aega'magin wantawe. ³² Pigoya Mariyaba kuma awamori tumima Isu mintometi wama agama agisabi tumpa parokaema maya omintiye: Wa'ega, kaebe mata'i mintampesinta na'nantoba kampa puremisine, untiye. ³³ Piya uma kube'ena pogini, Yuta kina aega'ma waume kina'miba ae ao'maemagin kaga kube'ena puguna, Isuba igate abima antarapa tabera puntiye.

³⁴ Piya puntana: Aeta kaitawema ibigaogini igeba: Wa'ega, kanama ampa agao, untawe.

³⁵ Piya yuguna Isu aebe kube'ena puntiye. ³⁶ Piya pogini Yuta kina'miba agate maya untawe: Agaiyo. Agu'amaba tabera aeti waintiye, untawe. ³⁷ Piya yuguni ka'isa kina'miba maya untawe: Aorika yagara ka aogatantikana Arasarusi kaba atakenaba igiga pegina puripera ayabiye, untawe.

Arasarusi abage puma aogatantiye

³⁸ Piya yuguna, Isu tabera antara pumagina kana arura uma irosantiye. Kana wasana yabaeba yaba nkagepinti waintogana awaba tabe yabantamatasa aigunkatauguna waintantiye. ³⁹ Pika Isuba: Yabapa a'waiyyiyo, yogana, kana pu'waome ntgarama nkamana'ma Mata aebe maya untiye: Wa'ega, ago tarawa tarawaki waimagina ago agunta iye, untiye. ⁴⁰ Piya yogana Isu maya omintiye: Kamana ugamopa kampa abibebe pena, a. We, kaebe naega'ma kammatiti punatagana, Koti nkesegiyenawampa nke'wasaenaba aborakana agao, ugamone, untiye. ⁴¹ Piya yogini yabapa a'waiyuguna Isuba inati aoma urintana mayama nunamu untiye: Naba, kaebe nunamunepa abempuka na'mu pugatauwe. ⁴² Kaebe nunamunepa a'ya'waema yagaba abempuka pipa abintuwe. Naeba

uwa ma wasana minta kina'mi kae unatauku tuminto, pi igutasa abibebe piyema kamana piya ugamuwe, untiye.

⁴³ Piya untana taberasa kega'e umagina: Arasarusi, kaeba irosa'ma iyo, untiye. ⁴⁴ Piya yogana purinta yabaewama intiye. Agisa ayapa kairasa kibarugintini, aowaba pabiyama kairasa asaemaraume, pikaba Isuba maya uwaimintiye: Kaiba iyobakasigina wano, yogini piya puntawe.

Isuba purikiyema uma esegi puntawe

(Matiyu 26:1-5; Maka 14:1-2; Aruku 22:1-2)

⁴⁵ Pigoya Yuta kina, Mariya kananta kina, igeftisa uwoma kina'miba Isu pintana pome agate: Aeba Karaisitiwe, uma imatiti puma aegarantawe. ⁴⁶ Piya puguni, ka'isa kina'miba Parasi kina'miti wama Isu pome pi kamana uma uwaimintaw. ⁴⁷ Piya puguni tabe mono kiye kina'mibe Parasi kina'mibe pi kamana abite mono kanisore kina igega'e uwaema maya untawe: Kana yagara aeba awame'enaba uwomantana piya, aya pusune. ⁴⁸ Taeba uwasuwa potamagi mintakini a'ya'ma kina'miba ae kamana abima aegaraigini Aroma kina'miba kama puratama tabe mono namatepe wasanabe a'ya'ma tapawaerikbewe, untawe. ⁴⁹ Piya yuguna, ige iyo'yagara ka, agewapa Kayapasi, aeba pi kabubipa monota paitanta kiye yagara mintantiye. Aeba maya untiye: Tigeba tigu napi napiyenari kampa wainta mintaw. ⁵⁰ Wasana ige ataaena pusanaga, ae ka'wainanto a'ya'ma kina'mika uma pu'magina iyo'maeyakan a'ya penoma, kampa abintawa, a, untiye. ⁵¹ Pi kamanapa napiyenawapisaba kampa untiye. Koti otaogana meto kamana maya untiye: Aeba pi kabubipa monota paitanta kiye yagara mintomeka: Isu aeba a'ya'ma kina'mika purenema, taga otantika meto kamana untiye. ⁵² Piya, Yuta kina ige ibiba kampaye. Koti ntagara araga a'ya'ma maga maga mirite wa kina, ige a'ya'ma ibabuma aki puwaitakini ka aruyena puma miyyema, otantika, piya untiye.

⁵³ Pigoya pintaga kiya kina'miba Isu aegukenaenagaba agobima nikintaw. ⁵⁴ Pika Isuba Yuta kina'mi nkiyoriba to kake kampa nasintiye. Aeba ka'me mpari agora kumapa ka, agewapa Eparaimi, pitai abagi kina'wapa ibabute wama umintantawe.

⁵⁵ Pigoya, Yuta kina'mi Pasoba yaga agarosaogini, a'ya'ma uwaena kuma'antontorisaba a'ya'ma uwoma kina agunta kamana'wai uma aogi pikena karu'ena paitama Yerusaremi kumati intawe. ⁵⁶ Piya puntini tabe mono namapinti Isuka aguyosakate maya uma mare-u me-u puntawe: Tigeba ayawewe yewe. Aeba aota yagaba kanakipera kampaye, untawe. ⁵⁷ Piya, tabe mono kiye kina'mibe Parasi kina'mibe igeba maya kamana uma esegi puntawe: Ka'waina aeba mikibiti agantanaba kanama ampa urameka iga'na uteno, untawe.

12

Mariya aeba agunta masawae Isu pai'atantyiye

(Matiyu 26:6-13; Maka 14:3-9)

¹ Pigoya, tonarentisa ka'umaema yaga waintogana, ainti Pasoba naninta nakena yaga aborantyiye. Piya, pi ntaga Isuba Petani kumati uma irosantiye. Aeba pi kumata Arasarusi purintapisa aogatantita uma irosantiye. ² Uma irosaogini, Isupa naninta kao'ena potaunguna Mataba iso'ma imogini Arasarusige kaga mimagini nantawe. ³ Piyama mintuguna Mariyaba tabe masawae kankabe aogi agunta wani, agewapa nati, pi tabe ikantaga, pi maema Isu nkagisari pai'atama a'no nkabiyatasa aebago pogaintiye. Piya pogana kana namapintiba aogi agunta uwaentiye. ⁴ Pigoya, abagi yagara ka, Yutasi Isikeriyoti, aeba kuna yagara, ae maya untiye: ⁵ Agunta wani pitasa 300 tora maema kusi kina imekana aogi pusawanwe, untiye. ⁶ Aeba pi kamanapa kusi kina'mika napimagineba kampa untiye. Aeba waba mponera kabimagine mima moneba maema kaka pome ku ntagaragana, pika untiye.

⁷ Piya yogana Isuba maya untiye: Tigeba ma kana waepa kaba a-nkabiraiyo. Aeba agunta wanipa nauti pai'ataka purekini kainatakena, pika utanatama maema atama miyine. ⁸ Piya, kusi kinapa tigege asi nasi miyaba mikibewe. Pigoya, naeba tigegeba e'erotapa kampa mikuwe, untiye.

Mono kiye kina'mi Arasarusi aeguma kaikena kamana untawe

⁹ Pigoya, Yuta kina'miba pi kumati mintiye kamana abite, a'ya'ma uwoma kina papita'i uma irosantaw. Pigoya, Isu ae abintogaba kampaye. Arasarusi purintapisa aogatanti, aeke kaga agakena ampa irosantaw. ¹⁰ Pigoya, pipa tabe mono kiye kina'miba Arasarusike kaga aegukena kamana untawe. ¹¹ Piya, Yuta kina a'ya'ma uwoma kina'mi aeka uma wama Isuti uma atokaentaka piya puntawe.

*Isu Yerusaremi kumati iyogini i'mu potama ababuntawē
(Matiyu 21:1-11; Maka 11:1-11; Aruku 19:28-40)*

¹² Pigoya, marogini uwoma kina aota yagagini karu'ena Yerusaremi kumati ampa irosanta kina, igeba Isu kanaye kamana abintawē. ¹³ Piya kamana abite yanta aerisa maete ke'isa uma kabima ababikena wantawē. Wama uma ababuntini maya uma i'mu potama untawē:

We, Wa'egawama nkawamuta taeti kanaika ta'mu potano.

Aeba Isureyo kina'mi tabe yagarawē, untawē.

¹⁴ Pigoya, Isu aeba tonki aikeri aborama amuguna akabata mara'mima wantiye. Pipa ago kamana mayama waintanti pabi nkawameta puntiye:

¹⁵ We, Saiyoni kumatasa kina, tigeba a-tiyekuruba piyo. Agao. Tabē Wa'ega Yagarari tonki aikeri akabata mima tigeti kanaye, piya untiye.

¹⁶ Pi kamanapa abagi kina'wampiba pi ntangaba kampa napima abibebe puntawē. Ainti Isuba inati e'wasaenawati a'wae puma iyogini, pi kamanakaba napima mayama abibebe puntawē: Pipa aeka mono isapi kaemaranta, pabinkawameta pintanaba potantawema, napintawē. ¹⁷ Piya, aeba Arasarusi kega'e yogana arubintisa irosa'ma iyogini aganta, pi uwoma kina'mi ige pi kamanapa uwaimintawē.

¹⁸ Pigoya, pi awame'ena punti nkawaga kamana abinta, uwoma kina'mi ke'i wama uma abatantawē. ¹⁹ Piya puguni, Parasi kina'miba maya uma igewai mayama mare-u me-u puntawē: Abewo. A'ya'ma kina'miba aeti wama pabigo aegaraka taeba ka'enaba kanara kampa potakune, untawē.

Ka'isa Kariki kina'mi Isu agakenaga ibuntiye

²⁰ Pigoya, Yuta kina Yerusaremi kumati aota yagaba Koti mpono abikena iyume kina'mi ige abakapintiba to marisa Kariki kina ka ka'miba kaga umima abintawē. ²¹ Piya puntini, igeba Piripi aeba Karariya marisa Petisaita kumatasa yagara, aeti wama maya omintawē: We naba-o, taeba Isu agakenaga yunema, omintawē. ²² Piya omuguna, Piripiba wama Enturu omoginisi, kaga Isuti wama pi kamanapa omintase. ²³ Omusuguna Isu maya untiye: Wasanama Ntagara mana e'wasaena maekena yaga pabigo ampa agarosama aboraye, untiye. ²⁴ Piya untana to maya untiye: Tagaka urimukwu abiyo. Witi aipa mabi kampa antaganaba kampa iranta uwa waiyikana, mabi amaranaganaba i'ma nakenaba toma toma uwoma aboraye. ²⁵ Pabiyamagina, ka'waina aeba mikenaenawa abugakibipa a'yugu potakiye. Piya, to ka'waina aeba mabi mima mikenaenawa kampa abikibemi'naba esegima miyaba'ena aboramikiye. ²⁶ Ka'waina aeba nae kayokaya'ena pikena untanaba, naegarano. Piya, nae mikubo nagora kayokaya kina'nepa miyeno. Ka'waina aeba nae kayokaya'ena punatakanaba, aepa nabanempaba tabe agi omikiye, Isu piya untiye.

Igeba Wasanama Ntagara asaga'yukibewe, untiye

²⁷ Pigoya Isu to maya untiye: Mapa nagu'nempaba pamī puma tabaraba piye. Pika nanawe ukuwe. Naeba: Naba, pintana aboranamemipa nau'ima maenagaso, piyaba kampa ukuwe. Kampaye. Pi ntaga aboranamenema unatantampene. ²⁸ Pika naba, kaeba yegana kagegapa tabe puma aborano, untiye. Piya yogana mantarisa maya kamana tumintiye: Pi nageba ago tabe puma aborantikana to kake pabiyama aboraurite wakiye, untiye. ²⁹ Pigoya, agora mintume kina'miba abite: Antaru iye, untawē. Piya yuguni, ka'isa kina'miba: Enisore ka'waina kamana omiye untawē.

³⁰ Piya yuguna, Isuba pabigo iwamuta u'ma maya uwaimintiye: Kamana pipa nae nao'maekena kamana kampaye. Tige tiyo'maekena kamana uma aboraye, untiye.

³¹ Pigoya, mapa mabi atatara pikena kana aboramikana mampabisa tabe yagara aepa aebasanakiye. ³² Ibaba mabi mintokini, aintiba igeba yara naeguma asaga'yunataigipa, pi ntangaba a'ya'ma kina igege'a' uma ibaibekini naeti kanakibewe, untiye. ³³ Pipa purikena meto kamana'wa piya untiye.

³⁴ Piya yogini, wasana aki puma mintume kina'mi igeba maya omintawē: Taeba mono isapī maya kamana aisuma abune: Karaisiti aeba kampa purinta uwa miyaba miliyema abuna, kaeba nanaga: Wasanama Ntagara aepa aeguma asaga'yukibewe, yene. We, Wasanama Ntagara aeba kewe, untawē. ³⁵ Piya yuguna, Isuba maya kamana a'wae puwaimintiye: Kane e'wasaena aeba abakatipipa uwaena yaganto e'wasa pikie. Pika tununtanama titikaesanaga yaku e'wasaena wairitantakiri aeti aborama miyivo. Ka'waina aeba tununtanabi wantanaba kepa kampa agabebe piye. ³⁶ Pi kane e'wasaena wairitantika tigutasa pi e'wasaena aega'ma ae tuntana piyo, uwaimintiye. Isu aeba piya kamana uwaimite wama kakama umintantiye.

Uwoma Yuta kina'miba Isukaba kampa imatiti puntawē

³⁷ Pigoya Isu aeba awame'enaba toma toma uwomantana iyora pogini agantiniba, uwa aetiba kampa aega'ma imatiti potentawe. ³⁸ Pipa poropete yagara Aisaya ae kamana'ama esegi penema piya puntawe: Aeba kamana mayama kaentiye: Wa'ega, kawaga kamanaka yokanaba, ke abibebeba piye, iye.

Pipa Wa'egawamatisa esegiyena ke ayakegana napiyema, kaentiye. ³⁹ Piya, igeba iyorika pumagini, Isu kamanapa kampa aogima abibebe puntawe. Pipa Aisaya kamana mono isapi ka waintomeka puntane. Pipa mayamawé:

⁴⁰ Kotiba iyo atikaewaigasima igu'amapa akumpa yaba kanta puwaitantine, iye.

Piya pogini, igeba a'ya'waemaenaba kampa agama napibebé puntane, iye.

⁴¹ Igupa a'wae pigi aogi pusanaga akumpa puwaitantine, untiye.

Aisaya pi kamana Isuka untipa ae e'wasaenawa agantana untiye.

⁴² Pigoya ka'isa monota paitanta kina'miba Isupa igu kayone potantini, pigo: Parasi kina'miba mono a'a-o uratama tagarubakibewe, uma iyekuru puma kakantawé. ⁴³ Piya, Igeba Kotiba ige'wai maema asaga'yusanagaba kampa ibuntiye. Igeba wasanami ige'wai maema asaga'yuwaitasanaga tabera ibugaogini iyekuru puma kakantawé.

Isu wasanaba pako pikibi kamanane

⁴⁴ Pigoya, Isuba kega'e uma maya untiye: Ka'waina aeba naega'ma amatiti punatakibipa, aeba nae nabiba kampaye. Unatanti'na aeke kaga aega'ma amatiti potakiye, untiye.

⁴⁵ Piya, ka'waina aeba nae ka naga'naba unatanti'na aepe kaga agaye. ⁴⁶ Piya, e'wasaena naeba mampabi tumintone. Ka'waina aeba naega'ma amatiti pikibi'naba tununtanabipa kampa miyaba mikiye, untiye. ⁴⁷ To ka'waina aeba kamana'ne abimagina a'a-o uma kasakapa, antota'enaba ibaba kampa amukuwe. Piya, naeba wasana antota'ena imikenaba kampaye. Naeba aogi puwaitakena mabi tumintone untiye. ⁴⁸ Piya, ka'waina aeba nae a'a-o unatama kamana'ne kaikib'i'na, kamana uma a'ya pikena kanapa aepa aboramikiye. Eya, kamana yopa pipa ainti tabe kanabi, kamana uma a'ya pikenaenaba aepa aboramikiye, untiye. ⁴⁹ Naeba kamana yopa nae'nne naumanepisaba kampa yuwa, naba unatanti'na a'ya'ma kamanapa piya yoma unamintegi uma aborauwe, untiye.

⁵⁰ Pigoya naeba abintuwe. Awamupisa kamana'ama a'ya'ma yaga aogima miyaba'enaba maema aboraye. A'ya'ma kamana uma aboraopa nabanempa yoma unamintisa puma yuwa, Isu piya untiye.

13

Isu abagi kina'wa nkigisa wani pai'itantiye

¹ Aota yaga Pasoba aboraogana, Isuba ae'waka mayama napima abintiye: Naeba maba atate nabati a'wae puma ikena kana agarosayema, napintiye. Piyama napintana, mabi a'ya'waema aokina'wa agu kao'ena puwaitata kanantiye: ² Pigoya, aseka naninta nakena aki puma mintuguna, ka mayaena aborantiye: Saimoni ntagara Yutasi Isikeriyoti aeba Isu kuna penema Sataniba ae antabai pinti napi napiyena atantiye. ³ Piya pogana Isuba aeba mayama abintiye: Naba aeba a'ya'waemaenaba nayapi atawaeye. Piya, naeba Kotitisa tumintoka to kake Kotiti a'wae puma ikuwema, napintiye. ⁴ Piyama napintana, naninta mintumetisa asima e'ero kaiwapa aboborasaba atagasima to ka kai maema amintiye. ⁵ Piya pu u'ma wani tu'napi ti'atama, pabigo agobima abagi kina'wa nkigisa pai'itantiye. Piya puwaitama, akapi kirintome kairasa aebago puwaigaintiye.

⁶ Piya puwaitata Saimoni Pitati uma irosaogana, maya omintiye: Kaeba Wa'egawamaga, nagisanepa wani nkaekenaga yeno, untiye. ⁷ Piya yogana Isuba maya omintiye: Ma pontanama, pi nkagoba ibaba kampa abempekana, mintana aintiba abikibene, untiye. ⁸ Piya yogana Pitaba maya untiye: Ibabe asabe nagisanepa taga kampa pasikibene, untiye. Piya yogana Isu maya omintiye: Naeba kampa paikatakanapa, naegeba kampa atokaema mikibene, untiye. ⁹ Piya yogana Pitaba maya untiye: We, Wa'ega, piya untanapa nagisari manapa kampaye. Nayatipe na'notipe kaga paso, untiye. ¹⁰ Piya omogana Isuba maya omintiye: Ka'waina auti wani pasikibi'naba ainti agisa mana pasekanaba a'ya'ma autisa nare ntare puwaewakiye. Pigoya tigeba a'ya'waemaba kampa nare ntare puwaentawé, untiye. ¹¹ Aeba kunaenawapa abibebe pu u'ma maya uwaimintiye: Tigeba a'ya'waemaba kampa nare ntare puwaentawé, Isu untiye.

¹² Igisaba waninkama a'ya itate, e'ero kaiwapa to kake maema pu u'ma mara'mima maya uwaimintiye: Naeba pi puritaontanama nkagoba abewo. ¹³ Tigeba: Tisa, Wa'egawe, unamewe. We, piya kinati mpintogiri pipa kanara unamewe untiye. ¹⁴ Piya, naeba Tisa, Wa'egarimpana tigisaba pai'titauwa, tige tigeri pabiyama tigisariba wani nkaeta wama kayokaya kina miyigina kanarasano. ¹⁵ Naeba pintanaba puriyakuwa, tigeba iba tiyakontanaba pabiyama puma miyivo. ¹⁶ Naeba tagaka ukuwa abiyo: Kayokaya yagara ka'waina aeba tabe yagarawampa nkawameta agasimaginationa, mikenaenaba pipa kampa

waintiye. Piya, yoga kina ka'waina yogawama nkabawampa ae awameta asugasima mikenaenaba pipa kampa waintiye, untiye.¹⁷ Pigoya pi kamanapa aogima abibebe pumagiri pabi nkawameta miyiginaba aogi pikkiye, untiye.¹⁸ Naeba a'ya'ma tigekaba kampa yuwe. Kibi'ma ibabuwaitanto igeka abibebe puntuwe. Pigoya, mono kamana awa'nama nkau'wapa mayama aborakiye:

Naege naninta kaga nai nttagarama aeba agisa wanta naekiye unti, pi kamana'ama nkau'wapa aborakiye, untiye.

¹⁹ Piya, pintanaba kampa aborantegi, ibaba pika urimuwe. Piya, ainti pintana aborakiripa, kanara tigeba abimagiri: Aeba pi aobi pompe ntagarawema, naega'ma timatiti punatakibewe.²⁰ Piya, naeba tagaka urimukuwa, abiyo. Ka'waina aeba yogara otanta'naba ababuma kayone potakibi'naba, yoga ago nae nababumagina aogi punatakiye. Piya, ka'waina aeba nae nababuma aogi punatakibi'naba, unatanti'na ae aogi potakiye, Isu untiye.

Isuba Yutasika uma aborantiye

(*Matiyu 26:20-25; Maka 14:17-21; Aruku 22:21-33*)

²¹ Isu aeba pi kamana untana, aumawamaba tabera kunta abuntiye. Aibogana aborama maya uwaimintiye: Naeba tagaka ukuwa abiyo. Tigetisa ka'waina naepa kuna punatakiye, untiye.²² Piya yogini, abagi kina igeba ankaobi aobi puwaentini: Pipa kekabaya iye, uma kampa napintawe.²³ Pigoya, abagi yagara ka Isu nkagora mintanto, aeba naekaba tabera abugaome ntagara,²⁴ naeka Pitaba ayataswa awame puma maya untiye: Abigagana ugameno. Kekabaya iye, untiye.²⁵ Piya yoga naeba Isu nkagora parokaema maya untuwe: Wa'ega kaeba keka yene. Yuwagana,²⁶ Isuba maya untiye: Pareti wanipi nkaema amekana maekibi ntagara, pi aeka yuwe, untiye. Piya ute pareti wanipi nkaema Saimoni ntagara Yutasi Isikeriyyoti, ae amogana maentiye.²⁷ Piya maema naogana Sataniba antabaipinti uma pasintiye. Piya pogana Isuba maya omintiye: Pikena yempentanaba pipa karu'ena po, untiye.

²⁸ Piya kamana omogini pi kaga mintume kina'miba pi kamana agoba kampa abibebe puntawewe.²⁹ Piya puntini ka'isamiba maya untawewe: Yutasi aeba mone pokisire maema kabima miyikana aota yagasaena ika penema otadera, kusi kina mone imenema iyema, napintawewe.³⁰ Piyama napiyuguna, Yutasiba pareti nagaite pabigo irosa'ma asekawagaintiye.

Isu aeba kasa kamana ago untiye

³¹ Yutasiba wagasogana Isuba abagi kina'wa maya uwaimintiye: Mapa Wasanama Ntagara nae e'wasaenane aborakiye. Piya, naeka uma Kotitisa e'wasaenaba kaga aborakiye.³² Naeba Kotitisa e'wasaena maema aborantoka Koti aewa nae e'wasaenaba pabiyama maema aborakiye. Pi kanapa agaru ntagantu pabigo aborakiye, untiye.³³ Piya untana, to maya untiye: We, yakaraki'nuntepa, naeba agaru ntagantu tigege mikuwe. Piya, aintiba naguyosagakibewe. Yuta kina uwaimintosa puma, tigepta pabiyama urimukuwe: Nae wakubotia pabiyama kampa wakibewe.³⁴ Pigoya, ma kasa ago kamana urimukuwe: Wasana agu kao'ena puwaitama kayone puwaitaiyoma, yuwe. Naeba agu kao'ena puma kayone puritama miyosa puma, pabiyama tigeba agu kao'ena puma kayone puwaitama miyiyo, yuwe.³⁵ Agu kao'ena puma kayone pigini, wasanamiba tigaiginaba nae naokina'ne kanta piyo, Isu piya untiye.

Pita Isu akabitakena kamana untiye

(*Matiyu 26:31-35; Maka 14:27-31; Aruku 22:31-34*)

³⁶ Piya yogana, Saimoni Pita abigama maya untiye: Wa'ega, kaeba aeta wakibenema, abigaogana Isuba maya untiye: Nae wakubotiba pipa ma nttagaba kampa wakibene. Ainti mintana pita'iba wakibene, untiye.³⁷ Piya yogana Pitaba maya untiye: Wa'ega, naeba nanaga kaka'iba kampa kaega'ma wakuwe. Naeba kaeka uma mikenaenamena kanara kaikuwe, untiye.³⁸ Piya yogana Isuba maya omintiye: Kaeba naeka uma mikenaenagapa kaikenaga yeno. We, naeba tagaka ugamuwa abo: Kokorewamaba kampa aga untakana, kaeba kakagara uwame unatakibene, Isu untiye.

14

Isu aeba wanana Kotiti ikena kene

¹ Pigoya, Isu to kamana maya untiye: Tigepta tigu'amaba tabaraba puma pamiba a-piyo. Tigepta Koti aega'ma timatiti puntiri, naepa pabiyama naega'ma timatiti piyo, untiye.

² Nabanemba kumatiba namapa uwoma wairite wantiye. Pi kapa kampa waintemisinta kampa urimosine. Piya, naeba maruntaki'ena puritakena wakuwe, untiye.³ Piya, wama

maruntaki'enari puritate, to kake a'wae puma kanama tibabute wakiri, nae mikuboti kaga umikibewe, untiye.⁴ Piya, wakubo pi kipa ago agawe, untiye.

⁵ Piya yogana Tomasi maya omintiye: Wa'ega, kaeba aeta wakibene. Pipa taeba kampa abintune. Pi kipa ayama agakune, untiye. ⁶ Piya yogana Isuba maya omintiye: Kepe taga ntanamape miyaba'enamape agowapa naewe. Nae nagaite nabati uma irosakenaenaba kampa waintiye. ⁷ Tigeba naepa nagabebe puma yesinta, nabanempapa pabiyama agabebe pesine. Pigoya mapa nabanempapa agobimagiri agantiri, naepa nagama aeka abibebe pewe, untiye.

⁸ Piya yogana Pripipa maya untiye: Wa'ega, kaeba kabapa tayakega agama abekana a'ya peno, untiye. ⁹ Piya yogana Isuba maya omintiye: Pripipi, naeba e'ero ntaga tigege miyoganapa, kaeba kampa nagabebe pena, a. We, ka'waina aeba nae nagai'naba nabapa agaye. Piya, kaeba nanaga: Wa'ega, kaeba kabapa tayakega agano, yene, a. ¹⁰ Kaeba mayamaba kampa abeno: Nababa naege miyegi, naeba pabiyama nabanempage minta, kamana urimopa pipa nae'ne ntaumanepisaba kampa urimuwa, nabanempa nagupi mpima esegiyena aboranamegi, a'ya'ma yugaba puwe, untiye. ¹¹ Naeba nabage miyogana, nababa pabiyama naege miyeba, abibebe piyo. Pi kamanapa abigina tagantana peno. Piya, kamana'nempa kampa kanarasaritakiripa, a'ya'waema yuga pontananempa abima timatiti pigina kanarasaritano, untiye.

¹² Naeba tagake urimukuwa abiyo: Nae naega'ma amatiti pikibi'naba, yoga posa puma pabiyama pikkiye. Pigoya pabinkantoba kampaye. Naepa asunagasima pikiye, untiye. Pipa nanagawe. We, naeba nabati ikuwe. ¹³ Iyekiri tigeba nae nagega'e uma esikibe nkawameta timukuwe. Pipa nabanempa e'wsaena yagarawa naeka uma aborakibika umagi piya pukuwe. ¹⁴ Pigoya, nae nagega'e uma esunataigipa, owe uma aborarimukuwe, untiye.

Isu: Aota Awamusaa otakana tumikiye, untiye

¹⁵ Pigoya, Isu to maya untiye: Tigu napi napiyenaripa naeti atama naegarantiripa, nawamu wasiyiyo. ¹⁶ Piya pigipa naba esotakan to tiyo'maema esegi puritakena otakana tumima tigege asi nasi mayaba'mikiye. ¹⁷ Pipa taga kamana'ama Nkawamusane. Mampabisa kina'miba igeba kampa agabebe puntini, kampa abibebe puntini pepa, kanara kampa maekibewe. Pipa tigeba aeka abintawe. Aeba tigege kaga mintiya, aintiba tintabaipinti ampikiye, Isu piya untiye.

¹⁸ Pigoya, naeba titate wakiri, kintarama misanaga tigeti to kake a'wae puma kanakuwe. ¹⁹ Agaro ntanganto ka waintikana, pi a'ya pekiniba mampabisa kina'miba to kake kampa nagakibewe. We, tigeba nagakibewe. Naeba aososima miyaba miyekiri tigeba pabiyama aososima miyaba mikibewe, untiye. ²⁰ Pigoya, pi kanabipa nabanempaba naege kaga miyeka, naeba tigege kaga mikuwe. Pipa tigeba naege atokaema miyekiri agabebe pikibewe, untiye. ²¹ Ka'waina aeba ago kamana'nne aogima mpaema mima aegarakibi'naba, aeba agu kao'ena punatakiye. Piya, ka'waina aeba nae agu kao'ena punatakanaba, aepa nabanempaba pabiyama agu kao'ena potakiye. Piya, nae'nepa agu kao'ena potamagi agonepa uma aborakan aeba nagakiye, Isu untiye.

²² Piya yogana Isikeriyoti yagara wanane. To ka Yutas, ae aukaba, abigama maya untiye: Kaeba ayama agogopa taetimanapa maema aborantana to ka'isa mampabisa kina'mipa kaka waitakenaga yenema, abigantiye. ²³ Piyama abigaogana Isuba maya kamana a'wae pomintiye: Ka'waina aeba agu kao'ena punatakibi'naba, kamana'nne abima aega'ma wasikiye. Piya pekana nabanempaba aepa pabiyama agu kao'ena potakiye. Aibekara kaga aeti ampa irosa'ma miyaba'mikuse, untiye. ²⁴ Piya, to ka'waina aeba agu kao'ena kampa punatakibi'naba, kamana'nepa ayabaya aeba abima aega'ma wasikiye. Pipa kampaye. Pigoya, ma kamana abepa nae'netisaba kampaye. Naba unatanti, aetisawe, Isu untiye.

²⁵ Pigoya naene tigege mintapa, piya kamanapa urimone, untiye. ²⁶ Pigoya ainti esegima asiritakena Aota Awamusaa, aepa nabanempaba nae nawamuta otakana tumima a'ya'ma kamana napa urimikiye. Piya puntana, nae urimo kamana pipa uma to aososirimikiye, untiye.

²⁷ Naeba nanta paruyenane tigeti ataritauwe. Mampabisa kina'ma nkanta paruyenena wanane. Nae'ne paruyenena timuw. Pika tigu'amaba tabaraba puma tiyekuruba a-peno. ²⁸ Naeba wama uminta, ainti to kake a'wae puma kanakuwe, urimogiri ago abewe. Piya, Tigeba tigupa naeti atama yesinta, pipa nabati ikuwo pi abimaba, tinta wamaba asoya pemisine. Nababa aeba naepa asunagasima mintika napima piya pusawanwe, untiye. ²⁹ Pintanaba kampa aborantegi, maru paitama urimuwe. Pintana aborakiripa maya yiyo: Kamana uraminti'na nkau'wapa aboraye, yiyo. ³⁰ Naeba mapa uwoma kamana kampa amato puma urimukuwe. Mampabisa tabe kumpari yagara kanakena ase'yo pikana,

kanama naeta ampa asesepa'urikiye. ³¹ Piya, naeba naba agu kao'ena potauwa, pika mampabisa a'ya'ma kina'mi agabebema abikibeka yoga unatanti puwe. Pigoya, tigeba asiyigi wano, Isu uwaimintiye.

15

Isu aebe taga waini iga'na agowe

¹ Pigoya, naeba taga waini iga'na agowe. Piya, nabanempaba waini yuga wama nkabawe. ² Piya, ka amawama naeti a'wa kampa aentana uwa waiyeginaba, agayugasaye. Piya, to ka amawama a'wantaga wainteginaba, kasama arosagina anosama to uwoma a aeyanema kabitaye. ³ Piya pemisa puma naeba mono urimogiri abima asoya puma mintawe. ⁴ Piya puma, tigeba naege miyigi, naeba pabiyama tigege mikuwe. Waini amawamaba agowamati kampa atokaema waintakanaba a'wapa kampa aekiye. Kampa aeyemisa puma tigeba naetiba kampa atokaema mintiripa, au'wapa kampa maema aborakbewe.

⁵ Pigoya, waini iga'na agoba naewe. Amanepa tigewe. Ka'waina aebe naege atokaema miyekapa naeba aegeba pabiyama atokaema mikuwe. Pigoya, pi'naba anopa tabenama aborakiye. Tigeba naetiba kampa atokaema mintiri, a'ya'waemaena pikenaenaba kampa waikiye, untiye. ⁶ Piya, ka'waina aebe naeti kampa atokaema miyekapa agaikuwe. Eya, waini amawamapa kasagana asaginiba, kibi'ma yakupi kasagana tamisa pabi nkawameta potakiye, untiye.

⁷ Pigoya, tigeba naeti atokaema mima kamana'nemba aega'magiri, esunatakibe nkawameta timukuwe untiye. ⁸ Tigeba au'wapa uwomantana maema aborama, nae naokina'nentana puma miyiginaba, nabanempaba tabe a'muntana aborakiye. ⁹ Pigoya, nababa naepa agu kao'ena punatagi, naeba pabiyama tigepe kao'ena puritauwe. Pika tigeba agu kao'enanapi miyivo. ¹⁰ Naeba nabanemba nkawamupisa kamana wasiyu'ma, ae agu kao'enabi miyuwe. Tigeba pabiyama nawamupisa kamana'nne wasimagiripa, nae agu kao'enanepi mikibewe, untiye. ¹¹ Pigoya, na'muntananempaba tigeti ta'ema waiyenema, ma kamanapa urimiwaeyuwe, pika ti'muntanaripa aborama anosama abae peno, untiye.

¹² Pigoya, nawamupisa kamanapa mayama urimuwe: Naeba agu kao'ena puritaosa puma, tigeba agu kao'ena puma miyivo. ¹³ Pigoya, ka'waina aebe ao'mika uma mike-naenawa kasima iyo'mae kibi'naba, pipa a'ya'ma to agu kao'ena pikenaenapa asugaikkiye. ¹⁴ Piya, yoga uritao pipa pigipa, tigeba naokina'nene urimukuwe, untiye. ¹⁵ Naeba tigaopa kayokaya kina kantaba kampa pewe. Kayokaya yagaramaba tabe yagarawampa unabaijinti kamanapa waintipa, pipa kampa abiye. Naeba pipa nabanempatisa kamana abinto, pabi nkawameta uma aborama urimiwaentoka tigama naokina'nene urimuwe, untiye.

¹⁶ Pigoya, tigeba naepa kampa naba punatantane. Naeba tige tiba puritantone. Pika tigeba wama yogara umima au'wa maema aboraiyema, uritantone. Pigoya, maema au'wa aboraigina waiyaba waiyeno. Piya puntiri nae nagera naba esotakibe nkawameta timikiye. ¹⁷ Piya, naeba ago kamanapa maya urimuwe: Tigeba tiyokina agu kao'ena puwaitaiyo, Isu untiye.

Igobi Isupa potentasa puma abagikinapa puwaitakibewe

¹⁸ Pigoya, mampabisa kina'mi igobi puritaigiripa, mayama abiyo: Wa'ega Yagara aepa paipa pabiyama agobima igobi potentakini pewe, yiyo. ¹⁹ Pigoya mampabisa kina'mi ige aruyenabi uma pasesinta, kayone puritasine. Naeba pipa ige aruyenabisa kibi'ma tiba puntogiri to awameta puma miyegini igobi puritawe. ²⁰ Naeba kamana ka maya urimintonra, pika napiyiyo: Kayokaya yagarama tabe yagarawampa asugasima mikenenaenaba kampa waintiye: Piya, igeba naepa igobi punatama ma'ena punatantakini, tigepe igobi puritama ma'ena puritakibewe. Igeba nae kamanapa a'a-o untakini, tigepe pabiyama a'a-o uritakibewe. ²¹ Naba unatanti'nama nkagegaba kampa napiyekini naeka uma pabiyia igobi puritakibewe. ²² Naeba igegetiba kampa tumima agoba kampa uwaimintosinta, aguntaena kampa wainta miyesine. Pigoya ago aborama awaimintone. Ibaba aguntaenawai kakakena kipa kampa waiye, untiye. ²³ Piya, ka'waina aebe agobi punatakibi'naba, nabanemba pabiyama agobi potakiye. ²⁴ Naeba abakawaipipa toma toma ntugaba ka'isa kina'miba pesa puma yogaba kampa asugasima puntosinta, aguntaenawai kampa wainta miyesine. Piya, mapa kana yugaba ago pogini agawaentiniba uwa naepa igobi punatantini, nabanempapa pabiyama kaga igobi potawe. ²⁵ Piya pegana mono isapipa kamana ka mayama wainti, pi'na esegi piye: Igeba uwaraka'ya igobi punatantawe, iye. Pipa iba esegi piye, untiye.

²⁶ Pigoya, esegi puritakena taga kamana'ama Nkawamus, nabati mintika, aepa otakana nabatisa tumima agonepa uma aborakiye, untiye. ²⁷ Piya, tigeba yoga agobintotasa naege mirite kanantasa puma, pabiyama agonepa uma aboraiyo, Isu untiye.

16

¹ Piya untana to maya untiye: Timatiti'enari kaisanagaba kampa nabegi, ma kamanapa urimuwe, untiye. ² Piya, mono namapisaba tigarubantini, agaro ntaganto tiyeguma kaintini puma: Kotinta aogi yuga pune, uma piya pikibewe. ³ Nabake naeke agoresipa kampa abekini, tigeba pabiyama puritakibewe. ⁴ Naeba kamana maru aborama urimopa, pi ainti aborakiripa: Aeba pika pai uramintine, yiyo. Piya, paipa tigege uwa minta, karu'enaba kampa urimintone. Titate wakena punta, piya urimuwe, piya untiye.

Aota Awamus'aama nkagowapa aborantiye

⁵ Piya untana Isu to maya untiye: Mapa unatanti'na aeti wakena poganaba, nana pegina tigepisa ka'wainaba: Kaeba aeta wakibenema, kampa nabigaye, a. ⁶ Piya kamana urimo'na, uwa tintabaipintiba tintara'enamaba pumaeyagiri kampa nabigawe, untiye. ⁷ Naeba taga kamana ukuwa abiyo: A'wae puma ikubopa, pipa tigeti au'wa aboranema ikuve. Piya kampa iyosinta, pipa tige tiyo'maekenaeaba kampa tumisine. Imaba, naeba otakana tigetiba tumikiye. ⁸ Tumekini, wasanami nkagowai maema mayama abikibewe: Aguntaena waintiya, arupuyena waintiya, a'ya'waemaenama nkagowa maema aborakenaena waintkiye, ukibewe. ⁹ Aguntaenama nkagoba mayama waintkiye: Nae kampa naega'ma imatiti pem'inaba aguntaenaba piye, untiye. ¹⁰ Arupuyenama nkagoba mayama waintkiye: Naeba titate nabati arupu puritakenaga iyekiri, tigeba to kake kampa nagakibewe, untiye. ¹¹ Ago maema aborakenaenaba pipa mayama aborakiye: Mampabisab tabe yagara ae aebasanakana, pi'na nkagoba aborakiye, Isu untiye.

¹² Naeba uwoma kamana waintemipa, pipa ma kanabi urimekiripa ayama maewaekibewe. Pipa kampaye. ¹³ Taga kamana'ama Nkawamus'aamaba, aeba pipa tumimagina asi nasi tagantanaba puriyakikiye. Piyama ae'wa nkaumabisaba kamanapa kampa urimikiye. Uma abintemisa suma aborama urimikiye. Piya, ainti pi aborakibintanagaba pipa uma aborarimikiye. ¹⁴ Pipa naetisa kamanapa mae u'ma aborama urimikiye. Pintanamaba nae tabe nagi aborakiye. ¹⁵ Nabati a'ya'waemaena waintemi, pi'na nkagoba naewe. Pika: Aeba nae kamana maema aborama urimikiyema, urimuwe, Isu piya untiye.

Antara'enamaba a'wae puma a'muntana aborakiye

¹⁶ Piya untana Isu to maya untiye: Uwaena yaganto waintika, pi a'ya peka wakiri naguyosagakibewe. Piya, pi'na nkaboboriba kanapa agaronkanto waintika, a'ya peka kanakiri nagakibewe untiye. ¹⁷ Piya yogini, ka'isa abagi kina'miba mare-u me-u puma maya untaw: Aya kamanaka mayaba iye: Uwaena yaganto wainti, pipa a'ya peka wakiri naguyosagakibewe, iye. Pi'na nkaboboriba kanapa uwaenanto waintika, pipa a'ya peka kanakiri nagakibewe, iye. Piya, to kapa: Nabati ikuwe, yipa, ayagabaya iye, untaw. ¹⁸ Piya untini to kake maya untaw: Kanapa agaro ntaganto wainti, pipa nanaga iye. Ae yemi kamana'ama nkagoba taeba kampa napiyune, untaw.

¹⁹ Piya untini abigakena puguna, Isuba igabebi puntana maya uwaimintiye: Kamana maya urimoka uma abewe: Agaro ntaganto waintika, pi a'ya peka wakiri naguyosagakibewe. Pigoya pi'na nkaboboriba pabiyama agaro ntaganto waintika, pipa a'ya pekaka kanakiri nagakibewe yo kamana mare-u me-uba pewe, a. ²⁰ We, naeba tagaka urimukuwa abiyo: Tigeba tabe kub'e'na puma tintara'ena pigini, mampabisab kina'miba i'mu pikibewe. Piya pigina tige tintawamaba iba kunta pumagiri, aintiba a'wae puma tabera ti'muntana pikibewe, untiye. ²¹ Pigoya, waya ka'waina aeba yagara yakari pikena kana aboraginaba tabera aukiye. Pabigo yagara yakari potagina, aukemintanagaba toba kampa napiyikana, yagara aboramika anta asoya puma a'mu piye, untiye. ²² Piya pemisa puma tigeba ma kanabipa tintara'enabi mikibewe. Mintigi, to kake a'wae puma ampa tigakiripa, tinta asoyaena aborakiye. Pigoya, pi tinta asoyaenaba ka'wainaba kampa tipatikiye, untiye. ²³ Piya, pi ntagaba ka'enagaba kampa nabigakibewe. Kampaye. Naeba tagaka urimukuwa abiyo: Tigeba nae naba a'ya'waemaenaga esotaiginaba nae nageraka uma aborarimikiye. ²⁴ Paipa tigeba nae nage umaba kampa aisuma maentane. Pigoya mapu nunamu uma maeyigina, tinta asoyaenarimpaba aborama abae peno, Isu piya untiye.

Isu aeba mampabisabenaba asugaintiye

²⁵ Pigoya, Isuba to maya untiye: Kamana urimita kanama mintantopa, pipa meto kamana urimintone. Piya, aintiba meto kamanapa to kake kampa urimukuwe. Naeba

nabanempa nkago uwa aborama urimukuwe. ²⁶ Pigoya, pi ntangaba tigekaba naene kampa nunamu yekiri, tigeba nae nageraka nunamu ukibepa nababa aewa napima tiyo'maekiye, untiye. ²⁷ Naeba Kotitisa tuminto, pi kamanapa abibebe pu u'ma, agu kao'ena punataka naba ae ba pabiyama agu kao'ena puritama tiyo'maekiye, untiye. ²⁸ Pigoya, naeba nabapa atate mabi tumintone. Pika mampaba atate nabati to kake ikuwe, untiye.

²⁹ Piya yogini abagi kina'miba igeba maya omintawé: Mappa meto kamanapa kampa yempékana uwa aborama uramene, untawé. ³⁰ Piya, kaekaba mayama abune: Wasanamiba kabigasanaga kampa iyobi sempene. Kaeba a'ya'waemaenaba abiwaeyene. Piya peka kaeba Kotige kaga miyempetisa kanantampenema abima kaega'ma tamatiti pune, untawé.

³¹ Piya yuguna Isuba maya uwaimintiye: Ibaba taga naega'ma timatiti punatawo. ³² Abiyo. Kanapa ka waintikana pi agaro aborakiniba, naepa natate aibarara puma kuma'waiti wagana puwaewakibewe. Pigoya, nataigipa nabinepa kampa mikubokana, nababa naege mikiye, untiye. ³³ Tigeti paruyena waiyenema, pi kamanapa urimuwe. Piya, tigeba mabipa kuntaenabi mikibewe. Pigoya, naeba mampabisena naba ago asugauwe. Pika napima tigu'amaba esegi puma waiyeno, Isu piya untiye.

17

Isu aeba abagi kina'mika nunamu untiye

¹ Pigoya, Isu aeba pi kamanapa uma a'ya atate, mantari aoma urintana, maya uma nunamu untiye: Naba, kana'nepa ago aborawayá, kaeba yagaraga nae nageba maema asaga'yuyega, naeba pabiyama kae kage maema asaga'yuyeno, untiye. ² Piya, kaeba maga maga a'ya'ma kina'mi tabe agowai unatantampene. Piya puntana wasana naeti iba puwaitantampe nkawameta igepe miyaba'ena aborama imoma unatantampene, untiye. ³ Pigoya miyaba'enama nkagoba pipa maya ki waintiye: Wasanami Koti taga ka'antowema kaekaba napintini, piya naekaba unatantampe. Isu Karaisitiwema piyama napiyiginaba, miyaba'ena aborawaimeno, untiye. ⁴ Yoga unatantampipa, pipa puma a'ya pumagi mabi kageba asaga'yuyuwe. ⁵ Pigoya, maba kampa aborantoga, manta e'wasaañenentaga mintantona, pabiyama to kake a'wae puma namega maema kaora myieno, untiye.

⁶ Piya untana to maya untiye: Mampabisa kina ibabuma namintampe kina'mi, kae agogapa aborama uwaimeno. Igeba kae kaokina mintuguna igepe nae namintampena. Pika igeba kae kamanapa aogima aegarantane. ⁷ Piya, a'ya'waemaenaba wainatantipa pipa kaetisaena manane. Igeba pipa abibebe pewe. ⁸ Kaeba a'ya'ma kamana unamintampe, pipa naeba ago uwaimintogini, igeba abima maentane. Piya, paipa kaegé kaga minta kanantokaba igeba taga abibebe pewe. Piya, kae unataugu naeba kanantokaba igeba abima imatiti pugatawe. ⁹ Naeba igeke uma nunamu ugatawe. Namu'isa kina'mika umaba kampa esugatawuwe, namintampe kina'mika uma esugatawuwe. Igeba kae kaokinane. ¹⁰ Piya, a'ya'ma kina'nepa pipa kae'enawe. Piya, a'ya'waema kinakapa pipa nae'enawe. Pika igeba nae nageba maema asaga'yukenaena aborama waintiye, untiye.

¹¹ Pigoya, naeba mabi mikenaenane pabigo a'ya piye. Igeba pipa mabi amato puma mintigi, naeba kaeti ikena puwe. Aota naba, kaeba aogima kabiwaitagini, igeba kae kagera miyiyio. Pi kagiba ago nae namintampene. Piya tasigeba ka'ena pumagira miyomesa puma, kaeba kabiwaitagini, igeba ka awameta mikibewe, untiye. ¹² Pigoya, igege minta, kae kageraka kayone puwaitantone. Pi kagiba ago nae namintampene. Piya puma kiya kabiwaitauwagini kapa kampa itama atenaena puntane. Piya, mono isa'ama nkau'wa aborasanaga, a'abibisa yagara, ka'wainanto ataena puntiye. ¹³ Pigoya, ibaba kaeti ikena punta, mata'i kamana'ne piya uwaimekana nae na'muntananepa igeti ta'ema wama pumaewakiye, untiye.

¹⁴ Piya, naeba kamanaka uwa'imogini maema miyeginiba, namu'isa kina'miba igobi puwaitawé. Naeba mampabisaba kampa mintuwe. Igeba pabiyama mampabisaba kampa mintagini piya igobi puwaitawé. ¹⁵ Piya, kaeba mabisa ibabomaba kampaye. Aguntaenaraká iyo'maeyoma ugamuwe, unti untiye. ¹⁶ Piya, nabupa mabipa kampa pantiye, piya pabiyama igepe mabipa ibupa kampa pantiye, untiye. ¹⁷ Pigoya, kae taga kamana agoba ige igupi aota atagana waiyeno. Kamanakapa pipa taga kamanane. ¹⁸ Paipa kaeba unatauku, kanama mampabisaba kina'mi ige abakapi ampa mintantosa puma, pabiyama naeba uwaitakini igeba wama mampabisaba kina'mi ibakapinti umikibewe, untiye. ¹⁹ Piya, naeba nagu'naumaba kaeti utawaitama igepe iyo'maeyuwe. Igeba tangantana puma igu'imaba kaeti ataiyema, piya puwe, untiye.

²⁰ Pigoya, naeba ige'amanakaba kampa esugatauwe. Mono uwaimekini abima naega'ma imatiti punatakibe kina, igecka kaga esugatauwe, untiye. ²¹ Piya, igeba igupa kata atama atokaema miyyiyema, ugamuwe. Naba, kaeba naege miyeka, naeba pabiyama kaege miyuwe. Pabiyamagini igeba tasigege kaga misanaga nabiye. Piya pigini, mampabisa a'ya'ma kina'miba ige agowai igama, kae unatakuu kananto, pipa abima kaega'ma imatiti piyo, untiye. ²² Tasigeba ka'antong mintuse. Pabiyama igeba igupa kata atamagini miyijo. Piyama miyiyema e'wasaenaba namintampe, pipa imintone, untiye. ²³ Naeba igege miyekana kaeba naege miyegini, igeba igutasa paib'u'ma atokaema paga'ena puma miyijo. Piyama miyigini, namu'isa kina'miba ige agowai igama, kae unatakuu tuminto pipa abibebe piyo. Piya, naepa agu kao'ena punatantana, igeba kaga puwaitampe, pipe kaga abima esegi piyo, untiye.

²⁴ Naba, namintampe kina igeba nae mikubota kaga misanaga nabegi, ugamuwe. Pigoya pai maba kampa aborantogana agu kao'ena punatamagina e'wasaenaba namintampe, pi naege mima agama i'mu piyo, untiye. ²⁵ Naba, aogiyenama nkagogawee. Mampabisa kina'miba kaekaba kampa abibebe puntawee. Piya, naeba kaekaba abibebe pogini, naokina'miba kaega unatakuu tuminto, pipa abima esegi pewe, untiye. ²⁶ Naeba kage kawaga kamanaka uma aborawaimintosa puma, to kake aborama uwaimima mikuwe. Piya, agu kao'ena nae punatantampsesa puma, pabiyama igegeti waiyeka kata mikubompeka, kamanakapa to kake pabiyama uwaimima mikuwe, Isu untiye.

18

*Isuba Kesemeni yugabi mintogini arakurintawe
(Matiyu 26:47-56; Maka 14:43-50; Aruku 22:47-53)*

¹ Pigoya Isu aeba pi kamanapa uma a'ya atate abagi kina'wa ibabute kumatisa tumima, Kitoroni wani ta'ema, to mari yoga waintometi pita'i wantawee. ² Pigoya Isube abagi kina'wape pita'iba asi nasi aki puma mimi pumekana, Yutasi kuna yagara, aeba pi kana yugaba agantiye. ³ Pigoya pita'i mintuguna, Yutasiba Parasi aruyenabisabe tabe mono kiye kina mitisabe irebu kinape ibabogini kane'waipre ma'ena kasupe maete ampa irosantawee. ⁴ Irosauguna, Isu aeba pintana potakenaenaba pipa abintanaba, igori wama: Tigeba keka aguyosagawema, ibigantiye. ⁵ Piyama ibigaogini igeba: Isu Nasareti kumatasa yagaragawee, untawee. Piya yuguna: Naeba pipa maye, untiye. Pigoya, Yutasi kuna yagara aeba igege kanama ibakapinti ampintantiye.

⁶ Pigoya Isuba: Naeba pipa maye, uwaimoginiba igeba ika'isa wama ware'nantawee. ⁷ Piya puguna to kake: Tigeba keka aguyosagawema, ibigantiye. Piyama ibigaogini igeba: Isu Nasareti yagaragawee, untawee. ⁸ Piya yuguna Isuba maya uwaimintiye: Naeba ago urimuwe. Naeba maye. Naeka naguyosagantiripa ma kinapa itaigin i waiyo, untiye. ⁹ Piya yogana kamana maya unti, pi nkau'wa aborantiye: Namintampe kina igeba kapa kampa itakuwe unti, pi nkau'wa aborantiye.

¹⁰ Pigoya, Saimoni Pita aeba kasopa urintome, pi abamu kantibisa a'yubumagina tabe mono kiye yagarama kayokaya yagarawapa aeguma ayatakantisa agiba arisakaintiye. Kana yagarama nkagewapa Maokasiwe. ¹¹ Piya pogana Isuba maya omintiye: Kasokapa kabamu kantibisa maema paka puro. Nabanempa nauki nakiyena atanatantintanaba pipa a'a-oba kampa ukuwe, Isu untiye.

Igeba Isu ababute Anasiti wantawee

¹² Piya puntini, irebu kinape kiyawaipe Yuta kina'mi nkirebu kinape, igeba Isupa araku'ma iga'narasa kirokaemagini, ¹³ Anasi ntamapinti ababute wantawee. Piya, pi kabubi Yuta kina'mi paitama mono kiyewaimpa, agewapa Kayapasi, aeba Anasi nkaraga maentiye. ¹⁴ Pigoya, Kayapasi aeba Yuta kina Isuka maru maya uwaimintiye: Ka yagarama pu'magin a'ya'ma kina iyo'maeyakana kanarasano, untiye.

*Pitaba Isuka kampa agantuwegema uwame untiye
(Matiyu 26:69-70; Maka 14:66-68; Aruku 22:55-57)*

¹⁵ Pigoya Isu ababute waugunisi, Saimoni Pitabe to ao'yagara ka'wainage aega'ma ika'i wantase. Piya, ao'yagaramaba tabe mono kiye yagaraba agantiqa, aeba Isu aega'ma nama nkantabapiinti kaga uma pasintawee. ¹⁶ Pigoya, Pita aewa pi kagisa awari asima mintantiye. Piya pogana, ao'yagaraba tabe mono kiye yagarama ntamapinti mintometisa tumima, kagisa kabe kiye araga aeba omogana, kabe ai'ataogana kagisa kagopinti ababogana. Pita uma pasintiye. ¹⁷ Piya pogana kabe kiye araga aeba Pita agama maya omintiye: Kaeba pipa mare ntgarama nkabagi kina'mi nkaruyenabisawe, untiye. Piya yogana aeba: Naeba kampaye, untiye. ¹⁸ Piya, kayokaya kinape irebu kinape igeba esiba

ibogini, yaku kaema tapimagini mintuguna, Pita aeba ige ibakapinti wama pabiyama yakuta tapintiye.

*Tabe mono kiye yagarama Isu abigantkiye
(Matiyu 26:59-66; Maka 14:55-64; Aruku 22:66-71)*

¹⁹ Pigoya, monota paitanta kiye yagaramaba Isupa abagi kina'wakabe kamana uwaim-intana punti, pika abigantkiye. ²⁰ Abigaogana, Isuba maya kamana a'wae pomintkiye: Naeba kamanapa a'ya'ma kinapa aborawaimone. Naeba kakamaba kampa yoka, Yuta kina'mi uwa mono namapipe tabe mono namapipe aki pumagini mintagapa kamanapa uwaimi puntuwe. ²¹ Pipa nanaga naepa nabigane. Kamana uwaimogini abe kina, igecka yegini yosa puma ugamigina abo. Igeba kamana'ne uwaimogini ago abintaweye, untiye. ²² Piya yogini, irebu kina mintume igeftisa ka'waina Isu nkgemiti aema maya untiye: Kaeba paitanta mono kiye yagaraba nanaga piya kamanapa omene, a, untiye. ²³ Piya yogana Isuba maya kamana untiye: Antage kamana yekanapa agoba yega abeno. Piya, aogi kamana yoganapa nanaga naeguyene, untiye. ²⁴ Piya yogana, Anasiba yogini Isupa aya kirokaetama monota paitanta kiye yagara Kayapasi aeti ababute wantaweye.

*Pitaba Isupa kampa agantuwe wema tokake uwame untiye
(Matiyu 26:71-75; Maka 14:69-72; Aruku 22:58-62)*

²⁵ Pigoya, Saimoni Pitaba aeba pi ntakuta tapima mintogini, abigama maya untaweye: Abagi kina'wampi ige aruyenabisa kapa kaewoma, abigantaweye. ²⁶ Abigauguna uwame uma: Naeba kampaye, untiye. Piya yogana, paitanta kiye yagarama kayokkaya yagara ka, Pita age arisakainti ae agaya aeba maya untiye: We, kaeba yogabinti aege kaga mintaka kagaone, untiye. ²⁷ Piya yogana, Pitaba to kake a'a-o uma esegima uwame yogana, pabigo kokore aga untiye.

*Igeba Isu Pairatiti ababute wantaweye
(Matiyu 27:1-2, 11-14; Maka 15:1-5; Aruku 23:1-5)*

²⁸ Pigoya marogini, Isupa Kayapasi ntamapintisaba ababute paitanta kiye yagarama ntamapi intaweye. Igeba Yuta kina'mi nkakumparanta'ena akayayekini Pasoba nantinta a'a-o uragaisanagawemaba wasanami kiye Pairati ntamapintiba kampa intaweye. ²⁹ Piyamagini igeba abe'i mintuguna, Pairatiba irosa'ma igeftisa tumima ibigama maya untiye: Ma ntagaraba nana aguntaena pegiri ababute kanawema, ibigantkiye. ³⁰ Ibigaogini igeba maya untaweye: Aeba agunta yagara kampa mintemisinta, kaetiba kampa ababute kanaompesine, untaweye. ³¹ Piya Yuguna Pairatiba maya uwaimintkiye: Tigeripa ababute wama ago kamanati wainti nkawameta kamanapa otaiyo, untiye. Piya yogini Yuta kina'miba maya omintaweye: Pipa ka yagara aeguma kaikenaenaba taepa akutatantane, untaweye. ³² Yuta kina igeba piya yuguna Isu aewa purikena kamana'nti, pi ki'ama nkau'wapa aborantkiye.

³³ Pigoya, Pairatiba nama nkantabaipinti ima Isu nkagegaa'uma maya untiye: Kaeba taga Yuta kina'mi Nkwa'ega yagaragawoma, abigaogana, ³⁴ Isuba maya untiye: Pi kamanapa kaega kaumagapisa yepera ka'isa kina'mi ugamegana unatane, untiye. ³⁵ Piya yogana Pairatiba maya untiye: Pipa naeba Yuta yagaraba kampaye. Kaeka kaokampibe tabe mono kiye kinakampibe igeba kababute naeti mekatawa, kaeba nana pekiniwe, untiye.

³⁶ Piya uma abigaogana Isuba maya untiye: Naeba mampabisa tabe yagaraba kampaye. Piya, mampabisa tabe yagara mintosinta irebu kina'nempiba akentana pumagini nao'maeyagini Yuta kina'miba ayamagini nayakuresine. Naeba mabisa tabe yagaraba kampaye. Naeba tonaraka kabiyone, untiye. ³⁷ Piya yogana Pairatiba maya untiye: Pigoya kaeba aota Wa'ega yagaragawo, yogana, Isuba maya untiye: Pabigo yene. Naeba taga kamana mabi uma aborakena tumima Wa'ega yagara mikena aborantone. Piya, a'ya'ma kina'mi taga kamana wasiye kina'mi nawamupisa kamana'ne abewe, untiye. ³⁸ Piya yogana Pairatiba maya untiye: Pipa nana taga kamana'nti, untiye.

*Pairatiba Isu maripora aeguyiyo untiye
(Matiyu 27:15-31; Maka 15:6-20; Aruku 23:13-25)*

Piya utegina, Pairati abe'i irosa'ma to kake Yuta kina'miti tumima maya uwaimintkiye: Naeba ma ntagarama kaintawakaba aguyosagauwe, untiye. ³⁹ Pika ka yekiri abiyo: Tigeba Pasoba yaga yega, taeba iga'na kina kapa iyoba timi pompene. Piya, mapa abigini kanarasakapa Yuta kina'miti tabe yagararipa iyoba'atakana uwa miritanoma, ibigantkiye. ⁴⁰ Piyama ibigaogini, igeba tabe kamana uma maya untaweye: Kampaye, ae'nane. Parabasi iyoba tamo, untaweye. Pigoya Parabasi aeba to kina'mintanaba uwa a'yugu maentana pome kamparaga yagaraweye.

19

¹ Pigoya Pairati piya yogini, irebu kina'miba Isu eru kasutasa aeguntini, ² ake iga'na maema antarage ima a'nota taminoku'ena potantawe. Piya puntini, wa'ega kina'ma tete kai kaga maema potantawe. ³ Piya potamagini agora arabama mima amiyo puma: Yuta kina'mi Wa'ega, aya pene, untawe. Piya untini aowabi aeguntaw.

⁴ Piya puguna Pairatiba Yuta kina'miti to kake irosa'ma maya untiye: Naeba otaogana tigeti tumemipa, naeba kaintanawakaba aguyosagauwa, tigeri agowapa agaiyo, untiye. ⁵ Pigoya, Isuba ake taminokupe tete kaibe potaumentaga irosa'ma abeta tumpitogana Pairatiba iyakima: Ma ntagaraga agama aogima napiyiyo, untiye. ⁶ Pigoya tabe mono kiye kina'mibe irebu kina'mibe igeba agategini, esegi kamana uma: Maripora aeguyo, maripora aeguyo, untawe. Piya yuguna, Pairatiba iwamuta u'ma maya untiye: Naeba kaintanawakaba aguyosagauwa, tige tigeri ababuma mariporapa aeguyiyo, untiye. ⁷ Piya yogini Yuta kina igeba maya untawe: Aewaka naeba Koti Ntagaranawe yemi'na, pipa piya kinapa pu'waiyoma, ago kamanatepipa untaka, purekana esegi peno, untawe. ⁸ Piya yuguna, Pairati aeba pi kamana abima to tabera aekuru puntiye. ⁹ Piya puntana, to kake nama nkantabaiinti ababute, abigama maya untiye: Kaeba aetasa aboratampene, untiye. Piya yogana Isuba kampa a'wae pomintiye. ¹⁰ Piya pogana Pairatiba maya omintiye: Kaeba kamanapa kampa unameno. We, naeba yekana mikenaenabe purikenaenabe esegiyenaba pipa namintapa, kaeba kampa abeno, untiye. ¹¹ Piya yogana Isuba maya omintiye: Inatisa yagara Koti kampa owe ugatantemisinta, naepa ka'ena kampa punatampesine. Piya, kaeti unata kina'mi kaintanawaimpaba kaepa asugagasaye, untiye.

¹² Piya yogana, Pairatiba pi kamana abite Isu uwa atakena yogini, Yuta kina'miba imo kamana umagini maya untawe: Kaeba kana yagara ae uwa atateginapa, to kake Sisa nkao'yagaraba kampa mikibene. We, aewaka tabe yagara mintuwe yemipa, tabe yagara Sisa agobi potaye, untawe. ¹³ Pairatiba pi kamanapa abite karu pumagina, yogini Isupa ababute tumuguna kamana uma a'ya pikena yabaewata mara'mintantiye. Pi kana yabaeba yabatasa yarage pumarantane. Pi kana yaragewama nkageba Iburu kamanapipa Kabatawe, untawe.

¹⁴ Pigoya, Yuta kina'miba igeba marekiniba Pasoba mikenagini ase'yo puma wantaw. Piya puguna kagi abebe pogana Pairatiba Yuta kina maya uwaimintiye: Taberagararipa mampaya agaiyo, untiye. ¹⁵ Piya yogini igeba tabe kamana uma maya untawe: Aeba kampa miyeno, kampa miyeno, maripora aepa aeguyo, untawe. Piya yuguna Pairatiba: We, tabe yagarari yekana maripora purenema yewo, untiye. Piya yogini, tabe kiye kina'mi igeba maya kamana a'wae pomintaw: Aeba tae tabe yagaraba kampaye. Aroma kumatasa Sisa ka'anto ae miratantie, untawe. ¹⁶ Piya yuguna Pairatiba abima paru puwaitamagina, Isu maripora purenema owe uwaitantie.

Igeba Isu maripora aeguntaw

(*Matiyu 27:32-44; Maka 15:21-32; Aruku 23:26-43*)

¹⁷ Pigoya, irebu kina'miba igeba maripo maema Isu amuguna aesaga'urogini, maba ka agewapa A'no nkayampu, Iburu kamanapipa Korikota, pita'i ababute wantaw. ¹⁸ Ababute wama maripora pita'i aeguntaw. Piya, agunta yagara taraba kaga isiyeguma to auka'i to auka'i puwaitsantini Isupa isibakapi atama arabawaitantaw.

¹⁹ Pigoya, Pairati yogini Isu nka'nota maripora mayama awa'ena kaema atantaw: Isu Nasareti kumatasa, Yuta kina'mi Nkwa'ega Yagarawema, kaema atantaw. ²⁰ Pigoya, Isu aegunta mpaba pipa tabe kuma agora waintomeka Yuta uwoma kina'mi pita'i wagana puntiniba, pi kana awa'enaba aisuntaw. Pigoya kana awa'ena kaentapa Iburu kamanapisabe Aroma kamanapisabe Kariki kamanapisabe kaemarantaw. ²¹ Piya puguni, Yuta tabe mono kiye kina'miba igeba Pairati maya omintaw: Kaeba Yuta kina'mi Wa'ega yagarawemaba, a-kaeyo. Piyama: Naeba Yuta kina'mi Wa'ega Yagarawaw, ae'waka untineba, kaeyo, untawe. ²² Piya yuguna, Pairatiba: Ago kaegasoka uwa waikiye, untiye.

²³ Pigoya, irebu kina'miba Isu maripora aeguntini, autasaena maema a'yigimpagini tarawa tarawaki'ena puma urintaw. Piya, tabe kaiwapa puguninta'enaba kampa wain-togini, ²⁴ maya untawe: Pipa paga waintika atugekanaba ataena pusnaga, tete'ena puma ka yagarama maeyano, untawe. Piya puguna mono isapisa kamana ka mayama wainti, pi'na esegi puntiye: Igeba nautasaena pakon purintini, kainetapa tete'ena pukibewema, unti, pipa esegi puntiye.

²⁵ Piya, irebu kina'mi piya puntaw. Piya puguna, Isu maripo agobipa mayama mintantaw: Anowampawa, anowampa nka'nanto Mariya aeba Keropasi nkwaena, to Mariya Matara kumatasa, sumagini mintantaw. ²⁶ Pigoya Isu anoibe abagi yagara abugaome naeba mintuwaguna tasigategina, anowampa maya omintiye: Waya,

mapa yagaragane, untiye. ²⁷ Piya untana, abagi yagarana maya unamintiye: Mapa kanogampawe, untiye. Piya unamoga naeba pi ntaga Isu nkanopa agamagi ababuma aogi potentuwe.

Isu pu'wantiye

(*Matiyu 27:45-56; Maka 15:33-41; Aruku 23:44-49*)

²⁸ Pigoya Isu aeba yogawapa a'ya pogana abite mono kamana'ama esegi penema maya untiye: Naeba wanika nabkiye, untiye. ²⁹ Pigoya, kankabe ka asa wanipa awaitama waintogini, kai atuta maema ae u'magini asara kitama awamuta mayotauguna nantiye. ³⁰ Pi asa wani nantana kega'e uma: Pabigo ibanto yoganepa a'ya waye, untiye. Piya yoganra a'nopa kirosaogana aumawapa mesugaintiye.

Irebu yagaramaba Isu irerasa ayatabi aerasibantiye

³¹ Pigoya, pipa Pasobarasaena maema aogi pikena yagagini, pi ntigaba tabe sabatigini, Yuta kina'mipa kana wasana maripora iyegunta kina sabatira waisanagaba kampa ibuntiye. Piya pogini, igeba Pairatiti wama igisaba aega'yuma akitama kaikenaga uma abigantawe. ³² Abigauguna, owe yogini, irebu kina igeba agunta yagara tara Isuke isiyegunta ka'waina ayampuba aega'yuntini, to ka'wainapa pabiyama aega'yuntini puntaw. ³³ Piya puta Isuti ampa irosa'ma agaumepa: Aeba ago pu'wantiye, umagini agisaba kampa aega'yuntaw. ³⁴ Piya puguna, irebu yagara ka'waina ayatabi irerasa aerasiba ataogana, pabigo korape antipe pagintiye. ³⁵ Pigoya, naeba pipa naonepisa agabebe puntoka, ma kamana taga suwe. Eya, naeba abintuwe. Pi taga kamana yopa, pipa tigeba abibebe puma timatit puma aegaraiyo, untiye. ³⁶ Piya, mono kamana ka mayama wainti, pi'na nkau'wapa aborama esegi penema pintanaba aborantiye: Igeba ayampuba kampa aega'yukibewe, untiye. ³⁷ Piya, mono kamana to kapa mayama waintiye: Igeba ayata aerasabantanati iyomarakibewe, pi untu kamana'ama nkau'wapa aborantiye.

Isu kaintawe

(*Matiyu 27:57-61; Maka 15:42-47; Aruku 23:50-56*)

³⁸ Pigoya, Yosepe Arimatiya kumatasa yagara aeba Isu ao'yagara mintantiye. Pigoya, Yuta kina'mika aekuru puma amatiti'enawapa kampa aborama kakama mintantiye. Pigoya, a'ya puwaogana pi ntagara aeba Pairatiti wama Isu ntabaewa akitakena uma aborama omintiye. Omogana, Pairatiba owe otaogana wama iyobantiye. ³⁹ Pigoya Nikotimasi, aseka Isuti wanti ntagara, aeba aogi agunta masawaepa kuntaenawapa 50 kirogaramurasa maete wama uma ao'maema, ⁴⁰ Isu nkauti pai'atama wae kairasa asagakokintase. Piya, Yuta kina'miba wasana yabaeba pabiya puwaitabuntaw. ⁴¹ Pigoya Isu, aegunta mpa nkawamoriba yogaba ka waintantiye. Pita'i yabapinti ka wasana aruwema ku'maranta waintantiye. Pita'iba wasanaba kampa kaiwaitantane. Pipa uwa kasa'ena waintantiye. ⁴² Pigoya, Yuta kinapa Pasoba yaga agarosaogini, pikana wasana aruba agarota waintoginisi, isigeba, Isu nkau'wapa maete pita'i metantase.

20

Isu aogama asiwantiye

(*Matiyu 28:1-8; Maka 16:1-8; Aruku 24:1-12*)

¹ Pigoya, marusa yaga sotara, Mariya Matara kumatasa wae aeba aruri agakena abaya aseka irosa'ma wantiye. Wama uma irosa'ma agaomepa, yabapa a'waiwaogana uwa waintantiye. ² Piya pogana, agate karu'ena wama Saimoni Pitape to ka Isu abugaome ntagara naepe uma urasimima maya untiye: Wa'ega yabaewapa ago isu'urewe. Piya pega taeba aguyosa'ma kunta pure, untiye.

³ Piya yogira, Pitabe pi to ao'yagarana tasigeba wasana aruri wantuse. ⁴ Ke'iba karu'ena wama naeba Pitape ogaita karu'ena wama uma irosantuwe. ⁵ Uma irosa'maba a gepintiba kampa uma pasinta uwa uma ibikama agauwapa, wae kai asagakoki-maranta'enamana waintoga agantue. ⁶ Piya pogana, Pitabe ainti kanama uma irosama, antabai pinta uma pai'ma wae kai asagakokimaranata'ena mana agantie. ⁷ Pigoya, Isu nka'nota asaetaume kaiba to ka'isa kaigeba kampa waintogana, abiwa akarakima ataogana to ka auka'i waintogana agantie. ⁸ Piya pogana ao'yagara naeba maru arura uma irosauwapa, uma pai'ma pabiyama agawaemagi abibebe puntuwe. ⁹ Pigoya, Isu purintapisa aogama asikiyema, mono isapisa kamana ka wainti, pipa kampa napintuse. ¹⁰ Piya pumagira, tasigeba to kake a'wae pumagira kumati wantuse.

Matara kumatasa Mariya aeba Isu agantiye
(*Maka 16:9-11*)

¹¹ Pigoya, Mariya aebe wasana aru agora mima kube'ena puntiye. Kube'ena puntana wama awara uma ibikama agaomepa, ¹² enisore tara wae kaiwaisintaga mintusuguna isigantiye. Ka'wainaba Isu nka'no ataumeti miyogana, to ka'waina agisa ataumeti mintantiye. ¹³ Pigoya, isigeba mayama untase: Waya, kaeba nanaga kube'enaba penema, abigausuguna, aebe maya untiye: Wa'egane isu'urite tori wagasaga aguyosagauwe, untiye. ¹⁴ Piya ute a'wae puma Isu aewa agantiye. Agantanaba Isu aowarapa aogimaba kampa agabeb puma agantiye.

¹⁵ Piya pogana, Isuba abigama maya untiye: Waya, kaeba keka aguyosa'ma kube'enaba pene, untiye. Piya yogana, aebe kana yogawama nkaba mintiyema, napima maya omintiye: Tabe yagara, kaeba wasana isu'ma tori maete metantanapa yega abite wama umaeyano, untiye. ¹⁶ Piya yogana Isuba: Mariya, untiye. Yogana aebe a'wae puma Yuta kamanapisa: Arabonai, untiye. Pipa tae kamanapisa: Tisawe, untiye.

¹⁷ Piya yogana Isuba maya omintiye: Nabanempatiba kampa intuwa, nautapa antaukaya po. Kaeba wama naokina maya uwaimo: Nae nababa pipa tige tibawe. Piya, nae Kotiba pipa tige Kotiwe. Pika aeti ikuwe, iyema uwaimo, untiye. ¹⁸ Piya omogana, Mariya Matara kumatasa wae aebe a'wae puma wama, abagi kina'wa maya uwaimintiye: Naeba Wa'egapa agauwe, utegina kamana omome kamanapa uwaimintiye.

Abagi kina'mi Isu agantawe

(Maka 16:14-18; Aruku 24:36-49)

¹⁹ Pigoya sontara aseyogini, abagi kina igebe Yuta kina'mika iyekuru puma, aki puma nama kabe kitama mintantawe. Mintuguna Isuba ige ibakapi ampa aborama mima maya uwaimintiye: Paruyenaba tigeti waiyeno, untiye. ²⁰ Piya ute ayatarabe ayatabe iyakintiye. Piya pogini, abagi kina'miba igebe Wa'ega agamagini intawamaba aogi puntiye. ²¹ Piya puguna to kake uwaimintiye: Paruyenaba tigeti waiyeno, untiye. Piya untana to maya untiye: Naba nae unatantemisa puma, pabiyama naeba tigepa uritauwe, untiye. ²² Piya untana pukawaitamagina: Tigeba Aota Awamusma maeiyio, untiye. ²³ Piya untana to maya untiye: Tigeba wasanami nkaguntaenawai uma asu'a puwaigasiginaba asu'a puwakiye. Kampa uma asu'a piginaba waewaitakiye, Isu untiye.

Tomasiba Isu agantiye

²⁴ Pigoya, Isu abagi kina'wa aborawaiminti ntagaba, ka abagi yagara nagsarisa tara tumpaema ige aruyenabisa, kampa mintantiye. Ae agiwapa Tomasiwe. To ka agiwapa Agayawae, omintawe. ²⁵ Piya, ka'isa abagi kina ao'miba igebe Tomasiwe. Taeba Wa'ega agaune, untawe. Piya yuguna maya uwaimintiye: Naeba kamanatipa abogana taga kantaba kampa piya. Nae'nne ntaonepisa ayapi antotasa aegunta, pi abura agama nayatasa abura aukaya puma, nayatasa ayatara aukaya puntapa, tagane ukuwe, untie.

²⁶ Pigoya, to kake sonta aboraogini abagi kina igebe Tomasiwe kaga namapinti aki puma kabe kitama mintantawe. Mintuguna Isuba abakankaipi to kake ampa aborama mintana maya uwaimintiye: Paruyenaba tigeti waiyeno, untiye. ²⁷ Piya untana a'wae puma Tomasi maya omintiye: Kaeba kaya nkamarasa nayata aukaya puma agao. Piya, kayakatasa nayatara aukaya puma agama to kake kagu'ama tara taraba a-puma, naega'ma kamati po, untiye. ²⁸ Piya yogana Tomasi maya untiye: Kaeba Wa'egane, Kotinekawe, untiye. ²⁹ Piya yogana Isuba maya omintiye: Kaeba nagamagina kamati po naegarana, a. We, kampa nagama naega'ma imatiti pe kina, igebe i'muntanabi mikibewe, untiye.

Yoni ma nkisapisa ago kamana kaentiye

³⁰ Pigoya, Isuba to uwoma awame'enaba abagi kina'mi nkiyora punti, pipa ma nkisapipa kampa kaewaentuwe. ³¹ Kaemaranto mapa pipa mayaga kaemarantone: Tigeba aisuma abima Isu aebe Karaisiti, aebe Koti Ntagara minti, pi kamana abibebe puma ae'wa aega'ma timatiti pikibepa, ae awamuta miyaba'ena maema mikibewe, untiye.

21

Tonaentisa tara umaema abagi kina'mi Isu agantawe

¹ Pigoya, ainti Isu nkabagi kina'wa Taibiriysi kotu nkawamora mintuguna aborawaimintiye: Aeba ampa aborawaiminti pa mayamawe: ² Saimoni Pitawa, Tomasi to ka agiwapa Agaiyawa, Nataniyeri aebe Karariya mari Kena kumatasawa Sebeti ntagara tarawa, to Isu nkabagi yagara tarawa sumagini, piya kina'mi kaga mintantune. ³ Piya mimagi, Saimoni Pita ao'mipa maya wamintiye: Naeba inoyanta aekena wauwe, untiye.

Piya yogi taeba: Taegeba kaga wakune, untune. Piya ute wanipisa karebi ima wantune. Wama umima pi nkasekapa inoyantaba kampa aentune.

⁴ Piya puma mintuwakana marogana, Isuba kepari ampintantiye. Ampintogira Isu nkaowarapa kampa aogima agabebema agantune. ⁵ Piya puwakana tabigama maya untiye: Yakaraki'nupa, inoyantaripa kapa waintiyoma, tabigantiye. Tabigaogira taeba: Kampaye, untune. ⁶ Piya yuwakana mayama kega'e uma uramintiye: Wanipisa karewama nkayatakanti kukopa motama inoyantaba aeyiyo, untiye. Yogi kukopa motauwakana inoyantaba uwoma ira'waiyogira, taeba kanara kampa paibu maete intune. ⁷ Piya pumagira, Isu nkabugaome nkabagi yagara naeba Pita maya omintuwe: Wa'egarepa piye, untuwe. Yuwagana Saimoni Pitaba kaiwapa akubotama inoyanta aeyometisa, pi Wa'egawe kamana abite autasaenaba maema purite wanipinti pa'yo puma tumima wantiye. ⁸ Pigoya, abagi kina to ka'isa taeba pi kepari awamori mintumetisa wanipisa kareba pubasanaurite kukopa inoyantage paiburite wantune.

⁹ Pigoya, kepari ima uwa mari mayena agantune: Yaku e'nora inoyantabe paretibe kaemaranta tama miyogira agantune. ¹⁰ Wama uma irosa'ma Isu maya uramintiye: Inoyanta aeyepa ka ka maete kanaiyo, untiye. ¹¹ Piya yogana, Saimoni Pita aeba wanipisa karebi ima kukopa uwa mari paibogana intiye. Piya pomepa kuko antabaipintiba tabe inoyantaba 153 waintantiye, piya pomepa kukopa kampa airisa'wantiye. ¹² Piya pogana Isuba maya uramintiye: Tigeba ampa naninta nabisugaito yiyo, untiye. Yiginiba, a'ya'ma abagi kina'miba: Kaeba kegawemaba, kampa abigantune. Piya, taeba: Aeba Wa'ega yagarawema, ago napintune. ¹³ Pigoya, Isu ampima kana inoyantabe paretibe maema pakō puma imintiye.

¹⁴ Piya, purintapisa aogama abagi kina'wa aborawaimogana kakaga puntiye.

Isu Pitaka sиписипине нанита имо, омитиye

¹⁵ Pigoya, taeba naninta nagasuwakana, Isuba Saimoni Pita maya omintiye: Saimoni, Yoni ntagara, kaeba ma kinapa asugasima tabera kagupa nameno, untiye. Piya yogana Pitaba maya omintiye: Owe, Wa'ega, kaeba abene. Naeba kaekaba nabiye, untiye. Piya yogana Isu maya omintiye: Kaeba Sipisipi awaro kinunte kabiwaitama naninta imo, untiye. ¹⁶ Piya untana to kake maya omintiye: Saimoni, Yoni ntagara, kaeba kagupa nameno, untiye. Piya yogana Pita maya omintiye: Owe, Wa'ega, kaeba abintane. Naeba kaekaba nabiye untiye. Piya yogana Isu maya omintiye: Kaeba Sipisipi kinunteta kiya kabiyo untiye. ¹⁷ Piya untana to kake kakagara omima maya untiye: Saimoni, Yoni ntagara, kaeba naekaba taga kabiyoma, abigantiye. Abigaogana Pita: Naekaba taga kabiyoma yome kamana abite, antawamaba ata pogana maya untiye: Wa'ega, kaeba a'ya'waemaenaba abiwaentane. Naeba nagu kaeti atama paibutopa, pipa abintane, untiye. Piya yogana Isu maya omintiye: Kaeba sиписипи kinunteta kiya kabiy, untiye.

¹⁸ Piya untana to maya untiye: Tagaka ugamuksu abo: Kaeba aoso yagara mintanapa, kaega ir'a'nukupa arakae pu u'ma, ke'iba pit'a'i mata'iba nasikenaga kabeninaga wama nasi nasi pene. Pigoya ainti karenarantanapa, kaya tara aebara pegana, to yagarama kaegapa maema amigatama, kampa wakena napikipempe ki'i kababute wakiye, untiye. ¹⁹ Piya, Isu aeba Pita ainti purikena ki aborama omintiye. Purikenaenawampaba Koti nkage asaga'yuyenema, untiye. Kamana piya untana Pitakaba: Ampa naegarao, omintiye.

²⁰ Piya yogana, Pitaba aeba a'wae puma Isu nkabugaome nkabagi yagara naeba aka'i wauwagana nagantiye. Piya, naeba paipa Pasoba naninta nanta ntagaba na'nopa Isu nkaibiria aisage puma abigama maya untuwe: Wa'ega, kaepa ke kunapa pugatakiyema abiganto, ²¹ pi ntagarara aka'i wauwagana Pitaba nagantana Isupa abigama maya untiye: Wa'ega, ma ntagarara pipa aya pikiyema, abigantiye. ²² Abigaogana Isuba maya omintiye: Aeba uwa mintaka naeba a'wae puma kanakena abimogana wainteginapa, ae kaba nanaga yene. Kaega uwa kanama ampa naegarao, untiye. ²³ Pigoya, ka'isa mono kina'miba igeba naekaba maya uma kamparaga puntawé: Ma nkabagi yagara aeba kampa purikiye, untawé. Pigoya, Isu aeba pipa naekaba: Kampa purikiye kamana kampa untine. Kampaye. Aeba maya kamana'amana untine: Aeba uwa mintaka naeba a'wae puma kanakena abimogana wainteginapa, ae kaba nanaga yene, untine. ²⁴ Piya, abagi yagara mana nae ma kamanapa abibebe pumagi, ma esapa kaentuwe. Pigoya, mono kina'miba naekaba kamana'wapa taganema abune, untawé.

²⁵ Pigoya, Isuba toma toma puntipa esa'nepinti kampa kaeyuwe. Pipa esa'amana waewaeyemisinta, naeba abopa wasanamiba kampa aisuwa a'ya pesine, Yoniba piyama kaentine.

APOSORO KINA'MI YOGAWAI PUNTA KAMANANE

Aota Awamus'a tumikena kamanane

¹ Teyopiro, tabe yagarane, paipa ka esa kaema kamintopa, pi Isu a'ya'ma yoga punti, aogi kamana uwaiminti, pi kamana ugamtintuwe. ² Piya, aeba yogawapa agobima purite waogana, ikena kana'wapa aboraogana, Aota Awamus'a'ama otaogana, Isu pai uwaitantemti aposoro kina to kake kamanapa uwaimogana, Koti ababogana mantari intiye. Pi kamanapa kaewaentuwe. ³ Pigoya, aeba tabera aukima pu'magina, to kake aogama mima, pi aposoro igeba agowa agakibeka aeba 40 yaga mima kakate aborate puwaimima, Koti kabiratakenaenaga uwaiminti, pi kamanape kaga kaentuwe. ⁴ Piya, ainti igege ampima maya kamana uwaimintiye: Tigeba Yerusaremi kumapa a-kasiyo. Nabanempatisa aogi kamana, pai abinta kamana, to kake naeba urimintogiri abinta, pi au'wa aborasanaga pita agawa puma miyiyi. ⁵ Yoniba aeba uwa wanitaka'ya paitantiye. Piya, nae kanapa kampa e'ero puntaka, Aota Awamusatasasa paititakuwe. Pita'i pika agawa puma miyiyi, Isu piya uwaimintiye.

⁶ Pigoya, aki punta kina'miba maya uma abigantawe: Pigoya, Isureyo kina pai mintantasa puma, kaebe kaga aki purataga tabe kina mikunoma, abigauguna, ⁷ Isu maya uwaimintiye: Pipa tige'enaba kampaye. Nabanempa, aewa napima kanapa atagina waintiye. ⁸ Piya, tigekaba maya urimuwe: Tigeti Aota Awamus'a tumima esegiyena aborarimekiri, nae nawaga kamana ukena kina'ena pikibewe. Piya, Yerusaremi kumatibe, Yutinya maribe, Sameriya maribe, urite waigina ma nkatuti uma kanarasakiye, intiye.

*Isu mantabinti intiye
(Maka 16:19-20; Aruku 24:50-53)*

⁹ Isu piya kamana ute, iyora ase'yo puma ikena pogana ababuntiye. Ababogana, ibinankama atikaewaogini aguyosagantawe. ¹⁰ Pigoya, igasoginiba mantari iyogini agagaite mintugunisi, tara yagarara wae kaiyaga, igegeti ampa aborama mintinisi, ¹¹ maya uwaimintase: Karariya kina, tigeba nanaga mantariba tiyoma'ma miyewe. Isupa tigeba ago agantagana, titate iyegina ababute mantari iye. Pi aeba iyegiri, agasa puma, aintiba to kake a'wae puma tumekiri agakibewe, piya untase.

Yutasi ae antota wasana ka ababuntawe

¹² Pigoya, aposoro kina igeba ka amutisa, agewapa Oribesi, pi Yerusaremi agora amutisaba, a'wae puma tumima Yerusaremi kuma waintometi wantawe. Pi e'ropa Yuta kina'miba sabatirapa wabumekini, ¹³ pita'i wama kumati ima, ige mibume ntamapi asu mintantawe. Pi yare puma, inata kimaranta namapi asu mintantapa, mayamawé: Pitawa, Yoniwa, Yemisiwa, Enturuwa, Piripiwa, Tomasiwa, Patoromayowa, Matiyuwa, Aopayesi ntagara Yemisiwa, namu'isa kiya kina igarubakaikenä abugai ntagara Saimoniwa, to Yemisi ntagara Yutasika, suma mintantawe. ¹⁴ Pi kina'mi ka iyuma pumagini, Isu nkanowampa Mariyabe, to ka'isa waepe, Isu nka'natabaramibe, kaga mima nunamu una mimi puntawe.

¹⁵ Pi kanabipa ka yaga, Isu nkaegaranta mono kina, 120 kina irosa'ma mintuguna, Pita asima maya kamana untie: ¹⁶ Nao'mitaba, pai Aota Awamus'a'ama Tebiti nkawamu aseyo potaogana, Koti nkesapi kaemaranti pi'na Yutasika au'wa aboraneme, untie. Pi Yutasika aeba Isu arakurikena kina iyakinti ntagarawé. ¹⁷ Pi ntagara aeba taetisa, mono yugarapa ake kaga otantine, Pita piya untie.

¹⁸ Pigoya, pi ntagara aeba ataaenawataswa mone maema kasuguna, maba maema aeti atauguna, pita aibagobama abararamagina, akapisa muru'magina antaba kurima unu kaewantiye. ¹⁹ Aibogini, Yerusaremi kumatasa a'ya'ma kina'miba abitegini, kana mawama nkageba Aketama, piya kamanatepipa Kora mpawé, untawé.

²⁰ Pigoya, Pita Yutasika maya untie: Paisa mono ini Samu isapi, awa'ena mayama kaemaranta waintiye: Nama kuma'wapa uwa waiyeno. Piya to ka'waina a-mpiyeno, untie. Pigoya Samu isa'amaba to ka maya untie: To ka'waina aborama, ae antotapa yogawapa maeyano, untie.

²¹⁻²² Pigoya, Yoni mono wani pai'ataogana, Isu yogawa agobinti, pi kanabipa aeti uma airokaema, aega'ma miyuwakana mantabinti intiye. Piya, Isuba abakatepi miyogini, ka'isa kina'miba taege nasinta kina'mipisa ka asitakaná, taege kanarasakiye. Pai kaemaranta kamanaka napiyigi, ka aboratama miyeno. Piya yagaraba, ke aboramagina tuo'maeyaka Isu purintapisa asintemi, pi awaga kamanapa yekana kanara pisie, untie.

²³ Pita piyama yogini abite, tara yagarara isigama aborantawé. Ka'waina nkagewapa Yosepe Yasitasi, to agewapa Pasabasiwe. Piya to ka'waina nkagewapa Matayasiwe.

²⁴ Isigama aborawaisitantiniba, maya uma nunamu untawe: Wa'ega, kaeba a'ya'ma kina'mi nkigu'ama agawaekena yagaragawe. Pika kaeba ma tara yagarara, isigetisa ka'waina tayakega otakana, ²⁵ Yutasi mono yugawape aposoro agibe atate purikena ki'wati tuminti, ae maruta miyeno, untawe. ²⁶ Piya nunamu umagini, iya nkatauguna Matayasi aboraogini, aposoro nagsarisa ka tumpaema kina'mige mima yoga penema, otantawe.

2

Aota Awamus'a tumintiye

¹ Isu kaitate mintuguna, tonarentisa tara umaema sonta a'ya puwaogana, Pentikositi naninta nakena yaga aboraogini, Isu nkabagi kina igeba ka namapi aki puma a'ya'ma mintantawe. ² Mintuguna, pontaba aga yemisa puma, mantarisa tabera puma aga urite tumintiye. Tumimagina mintume ntamapi pai'magina pumaewantiye. ³ Piya pumagina, yaku nkantebugantaena aboraurite, wa waya nki'nota aibariyate purite wagana puntiye. ⁴ Piya pogana, Aota Awamus'a amaba igupi tumima pumaewamagina, intebuba a'wae puwaigasogini, to kamana to kamana urite wagana puntawe.

⁵ Pigoya, pi ntagaba Yerusalem kumata a'ya'ma marisa Yuta kina, mono waintaga kina'mi, ampa mintantawe. ⁶ Pigoya, igeba iwamupisa aga abite, tabera irosa'ma ampa aki puma pam'i puntawe. Piya puguni, pi a'ya'ma kina kamana'waipisa kamana yuguni abitegini, ⁷ pam'i ntami puma uwoma nkigi napimagini maya untawe: Ma kamana ye kina, igeba Karariya kina amanane. ⁸ Igeba ayamagina to kamana to kamanapisaba yega kamana, agomitaba abune. ⁹ Taeba Patiya kinana, Mita kinana, Iramu kinana, Mesopotemiya marisa kinana, Yutiya marisa kinana, Kapatosiya marisa kinana, Pontasi marisa kinana, Esiya marisa kinana, ¹⁰ Pirisiya marisa kinana, Pampiriya marisa kinana, Isipi marisa kinana, Sairini ma agora Aribiya marisa kinana, a'yo ampintanta kina Aroma Yuta kinana, Aromapisa Yuta ibabunta kinana, ¹¹ Kariti kinana, Arebiya kinana, sumagi, taeba a'ya'ma mima, kamanatepisa Koti nkesegi puma aogi pumaranti kamana yega, abokanaba iga piye, untawe. ¹² Piya, a'ya'ma kina'miba piya umagini, pam'i ntami puma uwoma nkigi napima, mare-u me-u puma maya untawe: We, mapa nanaenabaya aboraye, yuguni, ¹³ pigo to ka'isa kina'miba pika akaya sumagini, maya untawe: Igeba waini wani kampa iga'e pasuma nagaitegini, aibo kamana yewe, untawe.

Pita kamana uwaimintiye

¹⁴ Pigoya, Pitaba to aposoro kina nagsarisa ka tumpaema kina'mi abakapi asima mima, a'ya'ma kinapa tabe kamana maya uma aborama uwaimintiye: Yutiya kinape Yerusalem a'ya'ma kina ampintanta, naeba urimekiri aogima abiyo: ¹⁵ Tigeba taekaba maya yewe: Igeba waini wani nagaitegini aibo'ena pewe, yepa, pipa ibanto kasa maregi, waini wanipa kampa nantune. ¹⁶ Pigoya, poropete yagara Yoweri awa'ena mayama kaenti, pi'na esegi piye:

¹⁷ Koti aeba maya iye: Aintisa kana agarosakapa Aota Awamus'a nepa a'ya'ma wa wayapa ari'ma imekini, yagara aragarimpi ainti aborakena kamana, poropete kina'mi yesa puma ukibewe. Piya, aoso kina'miba kasa'enaba agaigini, anasa kina'miba aogi amunta agakibewe, iye.

¹⁸ Pigoya, pi kanabipa nae kayokaya kina, wa waya, Awamus'a nepa ari'ma kanarasama imekini, poropete kina'mi yesa kamana ukibewe, iye.

¹⁹ Pigoya, naeba yekana, inati mantariba tona kasa'ena aborakiye. Piya, abetisa mariba awame'ena aborakiye. Korape yakupe kunka ibinape tiye kuruyenamana aborakiye, iye.

²⁰ Pa nkaoba tu'ma wakiye. Piya, o'aowamaba kora ki wakana, pi ainti Wa'ega Yagarama kanaba agasayaena aborakiye, iye.

²¹ Aibekini, Wa'egawama agisigina, pi kina'mi nki'ima aogi pikiy, poropete Yoweri piya untiyema, Pita piya uwaimintiye.

Isu nkago uwaimintiye

²² Uwaimintana, Pita to maya untiye: Isureyo kina, naeba urimekiri abiyo: Isu, Nasareti kumatasa yagara aeba tiyobi Koti esegi potaogana, abakatipi esegiyenabre awame'enabe kasa'enamana Kotitisa ago pogana, pintana agoba aboraogiri agantaw. ²³ Pi aeka Kotiba paitaka'ya napiyogana waintantika, uma a'ya ataogiri, pabi nkawameta tigeba pintana potama, kama kina imuguni, maripora aeguyuguna purintiye. ²⁴ Pigoya, kana yagaraba Koti aeba purintapisa asitantiye. Piya, aukima purikenaena agaruba agasogana, pi purikenaenamaba aepa kampa to arakurikiye. ²⁵ Pigoya, Tebitiba Koti nkonomome kamanaka maya untiye:

Naeba Wa'ega Yagara, kagabebe pumagi kampa natane. Kaeba naori asima mimagina nao'maeakanaba, ka'enamaba kampa napasanakiye, iye.

²⁶ Pigoya, pika nantawama aogi pegi, nawamupisa na'mu pugatauwe. Piya, nau'amaba aogiyenaneka napi napi puma miye, iye.

²⁷ Kaeba naumanepa kampa atagana, purinta kina ige kumatiba waikiye. Piya, Aota Yagarapa kampa atagana abararakiye. Pika na'mu pugatauwe, iye.

²⁸ Kaeba aogima miyaba ki nayakima, naege kaga mikibempeka naeba na'mupa tabera puwe, Tebiti piya untiye.

²⁹ Piya, nao'mitaba, naeba tayabama Tebiti, aeka taga urimuwe. Aeba purogini, kaitantu aruwapa ma mpara agama abima miyune. ³⁰ Aeba poropete mintana mayama napintiye: Ainti Koti aeba aintisa ayabama nae kabima mintanto mparuta mirite waiyemagina, uma esegi punatantiye. ³¹ Piya pipa napimagina, Koti ataogana, utaratanta yagara Karaisitika meto kamana maya untiye: Aeba purinta kina'mi kumatiba asayapa kampa atagana umikiye. Piya, au'wapa kampa abararakiye. Aeba to kake aogama asiwakiye, untiye. ³² Pigoya, Isupa Koti purintapisa asitaoga, taeba taorepisa agabebé puma agantompene. ³³ Pigoya, abawampa nkayatakanti asitama tabe potaogana, Aota Awamus'a'wapa abawampa utatantemipa amogana, atagoana tumintemintana, tabera ampa aboraogini agawe. ³⁴ Pigoya, Tebiti aewapa mantabintiba kampa intipa, maya kamana ka untiye:

Wa'ega Yagara aebe nae Wa'egane piyama omintiye: Kanama nayatakanti ampiyegina, ³⁵ kama kinakapa kagisabi aki puwaitakini, kagisara aebabiyo, piya omintiye.

³⁶ Pika Isureyo kinapa a'ya'ma mayama abima esegi piyo: Isu maripora aegunta, Koti aepa Wa'ega, aepa Karaisiti, asitantegina mintiye, Pita piya uwaimintiye.

Uwoma kina'mi igu a'wae puma mono wani pasintawé

³⁷ Pigoya, Pitaba inta paibu'ma kamana piyama uwaimogini, iyekuru puma, ae'wape to ka'isa aposoro kinape mayama ibigantawe: Nao'mitaba, taeba aya pekana aogi pikkiye, untawe. ³⁸ Piya yuguna, Pita maya uwaimintiye: A'ya'ma tigeba tigu a'wae puma, Isu Karaisiti ae ageraka mono wani pasiginaba, aguntaenaripa asu'a puwakana, Koti Aota Awamusapa timikiye. ³⁹ Tigetipe tiga'nugipe, a'ya'ma ainti aborakibe kinape, Wa'egare Kotiba aeti uma atokaekenaga tigega'e ukibi kina, pi tige Aota Awamusapa utaritantiye, Pita piya untiye.

⁴⁰ Piya umagina, Pita to ka'isa kamana amato puma, ige'ma kamana maya uwaimintiye: Iba ataena pe kina, ige aruyenabisa a'wae puma ataigna-o, tibabikiye, untiye. ⁴¹ Pigoya, pabi ntaga 3,000 kina igeba Pita mono kamana yome abibebe puguni, mono wani pai'itauguni, Isu nkaokina'miti uma airokaentawe.

Isu nkaegaranta kina kaga mintantawé

⁴² Pigoya, aposoro kina'miba mono abikenabe, Isu nkau nakenabe, nunamurape asi nasi aki puma mintantawé. ⁴³ Piya, Koti nkawame'ená aposoro kina'mi pumeka, a'ya'ma uwa kina'miba iyekuru puguni, pi aposoro kina'miba kasa'enabe awame'enabe uwoma tonarona puntawé. ⁴⁴ Pigoya, a'ya'ma pi aegaranta kina'mi kaga mintini, a'ya'waemaenaba pipa wabantanarene, untawé. ⁴⁵ Pigoya, ka'isa kina'miba ige'enawaipa to kina imimagini, mone maema, iyokina kusi puma miyume kina, pako puma imintawé. ⁴⁶ Pigoya, asi nasi tabe mono namapi aki puma, imaba kata atama mimagini, au nakenaba igeawai ntampi aki puma nama mintantawé. Pigoya, nanintagaba aogima pako puntini, intawama asoyaenabi nama mimagini, Koti nkage asaga'yuma mintantawé. ⁴⁷ Piya puguni, ka'isa kina'miba igama i'mu puwaitantawé. Pigoya, Wa'ega aebe wasana imaba yoga pogini, monoka ibogini, asi nasi ae aruyenabi ibabuma atokae itantiye.

3

Agisa pu'wanta yagara asitantiyé

¹ Pigoya, ka yagaba Pitage Yonige isigeba atamaita nunamu ukena kana aboraoginisi, tabe mono namapi intase. ² Pigoya, pi tabe mono nama kabera ka yagara, ano nkantabaip-intisa agisa pu'wanta yagara aboranti mintantiye. Pigoya, kana kabewama nkageba Nauka kabiye, untawé. Pigoya, pi ntgararama nkaokina'mi asi nasi ababute wama, tabe mono namankama kabera metauguna mima, wasana mono nama pasikena ite tumite pugunuba, mone kutaka esuwaitama mintantiye. ³ Pigoya, Pitage Yonigeba tabe mono namapi ikena iyusuguna, isigategina pabiyama esuwaisitantiye. ⁴ Esuwaisitaoginisi, isigeba aepa agabebé puntini, Pita maya omintiye: Kaeba tasige tasigao, untiye. ⁵ Piya yogana, pi agisa pu'wanta yagara aebe: Ka'ena namikenaga yese, uma esegima isigabebe puntiye. ⁶ Piya pogana, Pita maya omintiye: Mone kuta naeba kampa wainatantiye. Piya,

ka'ena wainatanti, pipa kamukuwa, maeyo. Isu Karaisiti, Nasareti kumatasu, ae awamuta ugamekana, asima ke nasi nasi po, untiye.⁷ Piya umagina, ayatakantisa u'ma asitantiye. Aibotaogana, pabigo agisa aga'naba aibarutaogana, pa'yo puma asintiye.⁸ Piya pogana, ke nasikenaenawaka a'mu pumagina, pa'yo pa'yo pumagina, Koti nkage asaga'yuma isigege kaga tabe mono namapi intawe.⁹ Piya puguni, a'ya'ma kina'miba agategini maya untawe:¹⁰ Mono nama, Nauka kabera, mone kutaka esuratama miyemi ntagara pimpaye, untawe. Piya, aogi pomeka agawaemagini tabera pami ntami puntawe.

Pita pi mono namapinti kamana uwaimintiye

¹¹ Piya puguni, Pitake Yonikeri kana yagara uma atokaeyogini, a'ya'ma kina tabe mono namankama nkawari, ka maruta agewapa Soromoni nkagu namantana pumaranta auka'i, pita'i isigeti karu'ena uma aki puma mintantawe.¹² Piya puguna, Pitaba igantana wasana maya kamana uwaimintiye: Isureyo kina, tigeba nanaga ma ntagaraga pami puma, tabera tasigabebe puma miyewe. Mantanaba tasige monotesikabera, esegiyenaresimpa ke nasi nasi pikenaenaba aboramuse. Pipa kampaye.¹³ Piya, Abara'amu, Aisaki, Yekobu, tayabamage, ige Koti, aeba yagarawa Isu ae asu againtika, ma ntagara nauta aogi pegiri agawe. Tigeba pi aepa tigobi potama, kama kina'mi nkiyapi ataunguna, Pairatiba uwa atakenaga yogiripa, tigeba asu againta ntagaraga: A'a-o, untawe.¹⁴ Piya, aota arupuyenaya wantaga aogiyenama nkagowa, aepa kiyaba: A'a-o, otaunguna, wasana aeguti ntagarari uwa atanema uma paru potantawe.¹⁵ Piya puguna, mikenenaenama nkagowapa aeguntawae. Aeguyuguna, Koti purintapisa asitaoga, taorepisa agabebe puma agantompene.¹⁶ Pigoya, tigeba agama abiyo. Isu aega'magira agega napiyogana, ma ntagara Isu nkawamutaka esegiyena aboramegina kaba'ma mintiye. Piya, Isuti tasimatiti pogana, Koti abimagina tiyora aogi potaye.

¹⁷ Pigoya, nao'mitaba, naeba abintuwae. Tigebe kiya kinatimpibe kampa napinta, aibo'enarimpa ata potantawe.¹⁸ Piyama ata potauguna, Kotiba utaratanta yagara auki naki puma purikibika, pi kamana poropete kina'mi nkiwamupi ataogini, uma kaemaranta, pi'na esegi puntiye.¹⁹ Pika tigeba tigu a'wae pumagiri, paisa mikenenaenariqa tikabitaiginaba, aguntaenariqa aebago purigasakanaba, Wa'egawamatista aoso esegiyena tigupi aborakiye.²⁰ Pigoya, tigu a'wae piginaba, Kotiba Isu, utaritanta yagarawa Karaisiti, otakana tumimagina mikenaganapa aborarimikiye.²¹ Piya, pi Isupa mantawama kakataogana mintogana, Koti aeba paitaka'ya a'ya'ma aota poropete kina'wampi nkiwamupi ataogini, untasa puma a'ya'waemena aborakiye.²² Pigoya, Mosese kamana maya untiye: Wa'ega Kotiba, aeba tige aruyenabisa ka poropete nae piyama aborarimekana, kamana urimikibi abiyo.²³ Pigoya, pi poropete kamana'wa kampa abikibe kinapa Kotiba kamana abikena kina'mi nkaruyenabisa igaruba'magina, iyeguma kaikiye, Mosese piya untiye.²⁴ Pigoya, poropete ka'isa Samuweri miyogini mirite kananta, igeba pabiyama ma kanabisa kamana uma kaentawe.²⁵ Pigoya, poropete mintanta, pi ige iga'nugita tigeba, piya Koti tiyabamagige paibu'ma atokaemaranti, pi paibutikenenaenama nkagoba, pi tegewe. Koti aeba Abara'amuge paibu'ma atokaentana, maya omintiye: Naeba kaga'nugipa akayona puwaitakana, pi akayonamaba a'ya'ma maga maga kina kanarasa waitakiye.²⁶ Tigeba Kotiba yagarawapa asitama otaogana, maru Yuta kina tigeti ampa aborantiye. Piya, tigeba aguntaenariqa tikabitaiginaba, akayonaba puritakiye, Pita piya uwaimintiye.

4

Pitake Yonike isiraku'urintawae

¹ Pigoya, Pitage Yonige isigeba wasana kamana uwaimima mintusuguni, mono kiye kinape, mono nama irebu kina'mi tabe yagarabe, Sarusi kina igebe, kaga isigeti irosantawe.² Piya, isigeba wasana mono kamana uwaimintinisiba: Isu aeba purintapisa aogantika kamana uwaimintase. Pi aogaome kamana uma aborasuguni, abugunaba ataena puntiye.³ Igeba isiraku'magini, ago atamaisa waogini, iga'na namapi isitaugunisi waimarausuguna, piya aiba marekini kamana uwaisitakena puntawe.⁴ Pigoya, Pita mono yogini, abinta kina igetisa uwoma kina'mi abibebé puma, Isu ae aokina'miti uma atokaeyuguna, waba 5,000 puntiye.

Pitake Yonike isibabute wama kamana uwaisitanta

⁵⁻⁶ Piya maroginiba, Yuta monota kiye kinape, kabiyume kinape, tisa kinape, monota paitanta kiye yagara agewapa Anasibe, Kayapasibe, ka Yonibe, Aresantabe, to ka'isa tabe kiye yagarama nkaokinape, Yerusaremi kumata aki puma miyuguni,⁷ aposoro yagara taraba isibabute iyugunisi, iyobi asima mintusuguni, isibigama maya untawe: Nana esegiyenara, ke nkawamutasa kamanataka pi esegiyenaba pese, piya uma isibigantawe.

⁸ Piyama isibigauguna, Aota Awamus'a'ama Pita nkagupipa pumaeyogana, kamana mayama uwaimintiye: Tigeba tabe Isureyo kinape, monota kabiye kinape, a'ya'ma yekiri abiyo. ⁹ Tasigeba ma nkagisa pu'wanta yagara ao'maema kaba ataoigiripa, pika tigeba: Ayama kaba atasema, urasitawé. ¹⁰ Pika naeba uma aborakiri, tigebe Isureyo kinape a'ya'ma abiyo: Isu Karaisiti, Nasareti kumatasa, tige maripora aeguyuguna purogana, Koti purinta kina igetisa abage puma aogatantegina asima mintiye. Ae esegiyenara ma ntagaraba kaba'ma au'amaba aogi pegina mintiye. ¹¹ Pigoya, Wa'ega Isugaba paisa kamana maya waintiye: Nama kikena kina, tigeba mapa ata yabanema kaintagana, pi ntabankamaba ibaba aogi wa'ega yaba kanta esegi puma mintiye, piya untie. ¹² Piya, tau'ikenaenaba wasanamiti kapa kampa waintiye. Piya, ka yagarama nkageraka uma atokaema aogi pikenarapa, pipa mabipa kampa waintiye. Isu ae abiwa tau'ikena yagarawe, Pita piya untie.

Wa'egawama kamanaka kampa a'a-oba ukuse, untase

¹³ Pigoya, Pitage Yonige isigeba abikena namapipa kampa wanta, uwa yagara taraginisi, igeka kampa karuba punta kamana esegima yusuguni, abima pami puntawé. Piya, isigeba Isuge mintantame, pipa ago isigabebe puntawé. ¹⁴ Pigoya, pi kaba atantame ntagara, aeba isigegé kaga mintogini, aepe agamagini pi kamana a'wae puma uwaisimikena aguyosagantawé.

¹⁵ Aguyosagategini uwaisitaugunisi abe'i irosa'ma tumpintusuguni, pi mono kanisore kina igewai maya uma, mare-u me-u puntawé: ¹⁶ Taeba ma ntagara taraba ayaena puwaisitakune. Isigeba awame'ena puma aboraginisi, Yerusalem kumatasa kina'miba isiwaga kamana ago abiwaegasawé. Pika ayama airari kaekune. Pipa kampaye. ¹⁷ Pigoya, pi kamana'ama a'ya'ma kumati wagana puma abae pekini, wasanami abisanaga, kamana esegima uma isiyekuru pugasakinisi: Pi ntagaragaba to kake wasanaba a-nkuwaimiso uma akunkaisitakune, untawé. ¹⁸ Piya ute, isigega'e uma maya uwaisimintawé: Tisigeba Isu nkagebe wasanaba kamana'wape to kake a-nkuwaimiso, uma akunkaisitawé.

¹⁹ Aiyugunisi, Pitage Yonige isigeba pi kamana antotapa mayama a'wae puma uwaimintase: Tige tigeri napimagiri abiyo. Tige kamana wasite Koti kamana a'a-o yiginaba, Koti nkaobi agowamaba abekanaba aogi pikio, piyama ibigantinisi, ²⁰ to maya untase: Piya, pi agama abintompentanaba kakatama mikenaenaba kampaye, untase. ²¹ Piya yugunisi, to kake isiyekuru kamana uwaisimima isitaugunisi wantase. Piya, pi kumatasa a'ya'ma uwa kina'miba, pi ntagara kaba atausume, pintana agama abite Koti i'mu potaomeka, igeti kunta puma, aposoro isigepa ka'enaba kampa puwaisitawé. ²² Pigoya, pi nkagisa pu'wanta yagara aeba nankitama miyogana, kaboba 40 poginisi aogi potentase. Aibusuguni agantaka yewe, untawé.

Kamana esegima ukibeka nunamu untawé

²³ Pigoya, Pitake Yonike uwa isitaugunisi, isigeba wasana akiyenabisaba irosa'ma isyo'miti wama, tabe mono kiye kinake monota kabiyyume kinake kamana uwaisiminta, pi kamana uwaimiwaentase. ²⁴ Piya, pi kamana igebe abite, kaga kamana uma, Kotiti nunamu uma maya untawé: Wa'ega, kaeba mantabe mabe wanipe a'ya'ma pipisa kinape atawaentampeka, ²⁵ Aota Awamus'a'ama otaukuna, aeba tayabama Tebiti, kayokaya kinaka, awamu aseyo pogana, kae kamana maya untie:

To marisa kina'miba nanaga igobipa taberapa punatagini, nana pegina naekaba mamparasa kina'mi uwa kaba tabera kanabirawé, iye.

²⁶ Wa'ega Yagara naepe, Karaisitinepe, mabisa wa'ega kina igebe kama purasitakena iyakana urewe, iye. Piya, kiya kina igebe aki puma kama purasitakena'naga nikewe, kae kamana kapa Tebiti piya kaentiye.

²⁷ Piya pika, ma kumatapa taga aota yagaraga Isu, Wa'ega asitampe, aepe kama potakena, Erotibe, Pontiyasi Pairatibe, to marisa kinape, Isureyo kina igege wanaga nikintawé. ²⁸ Pigoya, pi kaega tonkiya kamana uma asaemarantampe, pi nkawameta pewe. ²⁹ Pigoya, Wa'ega, ma iyekuru kamana'waipa asu'a pugasima, kayokaya yagaragapa esegiyenaga tamega, monokapa karu kampa punta uwaimeno. ³⁰ Piya pekana, kayapa asabuma yoni kinapa kaba itama, tonarona awame'enabe kasa'enabe puwaiyakegini, aota yagaraga Isu, aeka uma aboraurite wano, nunamu piya untawé.

³¹ Piya nunamu yuguna, aki puma mintume ntamankama kurukuru puntiye. Aibogana, Aota Awamus'a'ama igupi pumaeyogini, kampa iyekuru punta, iwamu asoyaenabis a Kötì kamana'wa wasanaba uwaimintawé.

Isu nkaegaranta kina'mi intabarima mintantawé

³² Pigoya, Isu nkaegaranta kina'miba igupa kata atama paibu'ma mintantawe. Piya, a'ya'waemaena waintomekaba: Kae'enawe, nae'enaweba, kampa untawe. Pipa kapi'enarene, uma mintantawe. ³³ Pigoya, aposoro kina'miba Wa'ega Isu purintapisa asintemi, pi nkawaga kamanapa esegima uma mintantawe. ³⁴ Piya, paruyena apaena aboraogini, pi kina aogimagini iyo'ena puntawe. Ige abakapipa ka'waina kusiba kampa mintantiye. Mawaipe iyotasaenawaipe to kina imima mone maemagini, ³⁵ aposoro kinati atantawe. Piya puguni, igeba ka'isaenaga aguyosagaume kina pakobuma imibuntawe.

³⁶ Pigoya, ka yagara, ka agewapa Yosepewema waintometa, aposoro kina igeba to ka agi Panabasiwe omintawe. Pi kana agiba tae kamanapisa Esegima aurikena yagarawewe, omintawe. Pi ntagara aeba Aribai tupisa, Saiparasi marisa yagarawewe. ³⁷ Aeba mawapa to kina imimagina, mone maema aposoro kina igebe a'ya'ma atawaentiye.

5

Ananayasige Sapairage tara a'wararamisi kamanane

¹ Pigoya, to ka yagara agewapa Ananayasi, aeba waya'wa Sapaira, aege uma abiriteginisi, ma kuma'wapa wasana imima mone maema, ² pika napi napima, ka'isaba kakatantinisi, to ka'isaba maete wama aposoro kina igebe atamagina: A'ya'ma maete kanauwe, untiye. ³ Piya yogana, Pita maya omintiye: Ananayasi, kaeba nanaga Sataniba kantabaipinti pumaewagina, napimagina Aota Awamusua amiyo kamanapa uma, kuma magampa ikantanaba ka'isaba maema kakane. ⁴ Ma kumakapa uwa kae'enaga atagana waisanawewe. Piya, uwa ikantanana mone maema, piya mayaena pikenaba pipa piya pusanawewe. Kaeba kantabaipintiba ayama napiyene. Kaeba amiyo'enaba pene, untiye. ⁵ Piya yogana, Ananayasi pabigo abintana, ware'nama purintiye. Pigoya, agama abinta kina igebe iyekuruyenaba tabera aborawaintiye. ⁶ Piya pogini agate, masimabimiba asima, kairasa asagakokima wasirite uma kaintawewe.

⁷ Piya, pi ntaga ainti anarimpa kampa abinti, uwa mintiyemagina, kanama ampa irosantiye. ⁸ Ampa irosaogana, Pitaba mayama abigantiye: Ma kumatisimpa nkikantanaba pabi nkasa'anto kanayoma, abigaogana, pigo aeba: Pabiayaki antowe, untiye. ⁹ Piya yogana Pita maya omintiye: Tisigeba nana piyema ka'masa tisigiba Wa'egawama Nkawamusapa amiyo pikenagaba napiyese. Kawaepa ago kaiyewe. Pi kina igeba kabe akanti mintawewe. Igeba kaepa pabiyama kaigatakipewe, untiye. ¹⁰ Piya yogana, kana waepa abite, pabigo agisabi ware'nama purintiye. Aibogini, masimabi igeba namapinti ima agaumepa pu'waintogini, wasirite wama awae kaitaumeti uma kaitantawewe. ¹¹ Pigoya, a'ya'ma Isu mpontona ai'aru pume kina'miba a'ya'ma isiwaga kamana abinta kina'mige, igeba tabera iyekuruba puntawewe.

Toma toma awame'ena puma aborantawewe

¹² Pigoya, aposoro kina'miba toma toma awame'enabe kasa'enabe wasanamiti uwoma puntawewe. Piya puguni, Isu nkaegaranta kina igeba imaba kata atamagini, tabe mono nama marupa ka agewapa Soromoni, pita'i aki puma mintantawewe. ¹³ Pigoya, a'ya'ma uwa kina'miba iyekuru pumagini, igegeba kampa ampa aki puntawewe. Aibumagini, pi Isu nkaegaranta kina'mi nkige asaga'yuntawewe. ¹⁴ Pigoya, wabe wayape uwoma to kina'mi mono abima, Wa'egawamatua uma amato puma mintantawewe. ¹⁵ Piya, ka'isa iyokina yoninta ibome kinapa, wasabe ama'waipe wasirite, ke'i me-ita menkita puntini, maya untawewe: Pita aeba nasi nasi pekanra, amankapa ampa ama nkaiwaitakini kabarikibewe, ute piya puntawewe. ¹⁶ Piya, Yerusaremi kuma'ama nkagora ka'isa kumatisaba uwoma kina'mi irosa'magini, yoni kinape kegina intabaipinti minta kinape ibabute kana kana puguni, a'ya'ma iyo'maema aogi puwaitantawewe.

Enisorewama iga'na namapisa aposoro iyoba itantiye

¹⁷ Pigoya, pintana aboraogana, monota paitanta yagara aebe, a'ya'ma aege miyume Sarusi tupisa kinape, igeba igobipa tabera puntawewe. ¹⁸ Aibumagini, aposoro kina ata puwaitamagini, iraku'ma ibabuma iga'na namapi itantawewe. ¹⁹ Piya puguni, pita'i waita mintuguna, aseka Wa'egawamatisa enisorewama kabe ai'itama, ibaburite tumima maya uwaimintiye: ²⁰ Tigeba tabe mono namapi ima, a'ya'ma kina aogaso asima miyaba mikena kamana uwaimima miyivo, uwaimogini, ²¹ abitegini abayara tabe mono namapi ima mono untawewe.

Pigoya, monota paitanta yagarabe aege miyume kinape igeba aki pumagini, a'ya'ma Isureyo mono kanisorege kiye kinape igege'a yuguni irosantawewe. Piya puntini: Kamana atauguna, iga'na namati wama aposoro kina ibabute kanaiyema, untawewe. ²² Piya yuguni, irebu kina igeba iga'na namati waumepa, kana aposoro kinapa uma agaumepa, kampa mintuguni uma agagategini, igeba a'wae puma wama uma maya untawewe: ²³ Taeba

wama uma irosa'ma agaompepa, kabeba tonkiya puma kimatanta'enayaga waintegini, kiya kabima mintaga uma igaune. Aibumagi, kana kabe aimma ima iguyosagaompepa, kana kinape kampa igaune, untawe.²⁴ Piya kamana yuguni, mono irebu kina'mi tabe yagarabe, tabe mono kiye kinape, igeba kana kamanaka uwoma nkigi napimagini: Pipa nana aborakena piye, untawe.²⁵ Piya yuguna, ka yagara ampa irosa'ma maya uwaimintiye: Iga'na namapi itanta kinapa igeba tabe mono namapi wasana mono uwaimima mintawé, untiye.²⁶ Piya yogini, irebu tabe yagara aebe irebu kina ibaburite wama, aposoro kina paruyenabiswa uma ibaburite kanantawé. Pigoya: Iyeguyekiniba, a'ya'ma kina'miba yaba kasutasa taegukibewe, umagini iyekuru puma, kampa kaso iyegunta uwa ibaburite kanantawé.

Aposoro kina kampa karuba punta kamana untawe

²⁷ Pigoya, mono kanisore kina'mi nkakiyenabi me itauguni mintuguna, monota paitanta yagarama maya kamana uwaimintiye:²⁸ Taeba pi ntangarama nkageba wasanaba a-nkuwaimiyoma akunitompesa, kamanatimpaba Yerusaremi kumatiba to kake uma abae pegiri, nanagabaya tigeba kana yagarama kaintanaba tae taipi maema me nkatakena pewe, untiye.²⁹ Piya yogini, Pitabe ka'isa aposoro kina'mibe igeba kamana mayama a'wae pomintawé: Wasanama kamana wasintini, Koti kamana a'a-o ukenaenaba, pipa kampa waintiye.³⁰ Tigeba Isu yara aeguma aibu atauguna, tayabamagi ige Koti, ae abage puma asintantiye.³¹ Asitamagina, Koti aewa nkayatakanti ababute ima, tabe paitama yagara, tau'ikena yagara asitantiye. Pigoya, ma Isureyo kina, taeba tagu a'wae piginaba, aguntaenarepa asu'a puragaikenaga iye.³² Pigoya, pi nkawaga kamanaka Aota Awamus'a'amabe taebe: Owe, yune. Pi Aota Awamus'a aepa Koti awamu wasiye kina'wa imiye, piya untiye.

Kameriye: Uwa itaiyema, uma paru puwaitantiye

³³ Piya kamana uwaimogini, intawamaba asabama ata pogini, aposoro iyegukena untawé.³⁴ Pigoya, kana akiyenabi Parasi yagara ka mintantiye, agewapa Kameriye, aebe mono tisa Yagara, a'ya'ma kina ae age mesu asagayuye. Aebe asima yogini, aposoro kina igebe abe'tumima a'yó mintuguna,³⁵ aebe aokinapa maya kamanapa uwaimintiye: Isureyo kina, nao'mitaba, tigeba ka'ena ma kina puwaitakena puntiripa, aogima napigate puwaitaiyo.³⁶ Paipa ka yagara agewapa Tiytutasi, aebe: Nae wasana wa'egari paitaritama miyuwe, piya yogini, 400 kina aeti uma atokaentawé. Pigoya, aewa aeguyuguniba, aokina'miba iyegaka aibarara pumagini, yogawaipa kaintawé.³⁷ Pigoya, ainti Karariya mari ka yagara agewapa Yutasi, aebe tage aisuratanta pi kanabi, wasana imo atikeba'ma paita itaogini, ma'ena agobima puntawé. Piya puguni, aewapa aeguntini, aokinapa iyeguma igarubantawé.³⁸ Pika ma kamana urimekiri abiyo: Tigeba ma kinapa uwa itaigini miyyiyo. Igeba kamanape yogabe igewai igitasa napima piginaba, a'yugu puma kampa waikiye.³⁹ Piya, Koti nkesegiyenara kana yuga agobima pigiripa, uwa piya pugate itakibewe. Tigeba yogawai agu'ya aimagiri, Koti aewapa kama potasanaga tige'ma kamana urimuwe, untiye.

Aposoro kina Isu nkageraka iyeguntawé

⁴⁰ Piya uma uwaimogini, igeba abugunaba kanara pumagini, aposoro kina kega'e yuguni akiyenabi iyuguni, eru kasutasa iyeguntawé. Iyegumagini: Wasana Isu nkage awaga kamana a-nkuwaimiyoma, akunkitama uwaitaunguni uwa wantawé.⁴¹ Uwaitaunguna, Wa'egawama nkageraka iyeguma ata puwaitauneka, igeba intawamaba abima asoya puma i'mu puritegini, pi kanisore kina'mi nkakiyenabiswa irosa'ma wantawé.⁴² Piya, asi nasi tabe mono namapipe wasanami ntamapipe: Isu aebe utaratanta yagara Karaisitiwe, uwaimimagine, pi mpono kamana uwaimiyaba mima kampa kaintawé.

6

Ka'isa kina aposoro iyo'maeiyemba ibabuntawé

¹ Pigoya, pi kanabipa abagi kinapa uwoma puntini, asi nasi naninta pako puma imintiniba, Kariki kamana unta Yuta kina'mi nkabeya waepa kampa aogima iyo'maeiyuguni, pika Yuta ma ago kina igeba abuguna, kampa aogi pogini kamana untawé.² Piya puguni, nagisarisa tara tumpaeme aposoro kina, igeba a'ya'ma Isuti atokaenta kina ibabuma aki puwaitama maya uwaimintawé: A'yugu taeba naninta pako puma imikena yuga wasinta, Koti kamana ukena yuga kasakanaba kampa aogi pikiyi.³ Pika nao'mitaba, tigeba tonarentisa tara umaema kina tigeti abakapi, aogi napiyena waintaga kina, Awamus'a'ama intabai pinti pumaenta kina, igaigina aogi pekiripa kibi'ma ibabiyo. Piya pigi, taeba arirasa yuga pi uwaitakini piyo.⁴ Piya pigi, taeba nunamurape mono kamana ukenaenarape esegima peno, untawé.⁵ Kamana piya yuguni, a'ya'ma pi aki punta kina igeba abuguna

kanarasa waentiye. Aibogini, wasana mayaki kibi'ma ibabuntawe: Sitibeni aeba agupipa amatifi'enabe Aota Awamusape awaitama wainta yagarawa, Piripiwa, Porokorasiwa, Nikanowa, Timoniwa, Pamenasiwa, Nikorasi aeba Antiyoki marisa paipa Yuta aruyenabi ampa pasinti ntagarawa, sumagini,⁶ pi kina igeba aposoro kina'mi igora asima arabama mintuguni, iyapa i'nota araku'ma, nunamu uma a'mu puwaitantawe.

⁷ Piya puguna, Koti kamana'amaba tabera anosaurite wagana puntiye. Aibogini, uwoma Yerusaremirusa kina aegaranta kina'miti irosa'ma to kake atokaema mintantawe. Pigoya, uwoma mono kiye kina'migeba aogi kamana abima, Isu aega'ma aogima mintantawe.

Yuta kina'mi Sitibeni kamana otantawe

⁸ Pigoya, Kotiba awagaenabe esegiyenabe Sitibenipa uwoma amogana waitantogana, wasanamiti kasa'enabe awame'enabe toma toma esegima puntiye. ⁹ Pigoya, to ka'isa Yuta kina'mi, ka mono agewapa: Kampa irakurinta kina uwa kina, ige aruyenabisa ka'isa kinape, Sairini kinape, Aresanteriya kinape, Sirisiya kinape, Esiya kinape, igeba aki puma Sitibeni ka abi'ma maka otantawe. ¹⁰ Pigoya, Awamus'a'ama aogi napiyena Sitibeni amogana, aogi kamana yogini, igeba ae kamanapa kampa akayuntaw. ¹¹ Piyama igiga pugate wasana kumpari uwaigasuguni, igeba Sitibeni uwa kampari kamana otama, maya untaw: Ma kana yagara, aeba Mosesenge Kotike isige kamana uma akayasotagi abompene, untaw. ¹² Piya yuguni, uwa kinape, mono tisa kinape, monota kabiyume kinape, piya uma imo atikebakasuguni, mina'ma Sitibeni araku'urite mono kanisore kina'miti wantaw. ¹³ Piya, maru paitama iyokina igeba Sitibeni kampari kamana otakena kina kamana uma yokege puwaimuguni, pi kina igeba maya untaw: Ma ntagara aeba ago kamanatepe, ma tabe aota mono kumatepe, uma ataena potayaba miye. ¹⁴ Taeba maya yegi abompene: Isu, Nasareti kumatas, aeba ma kumapa aguya aima, Moses Koti nkago kamana uma aboraramintemi, pi kamanapa maema a'wae pukuwe, iye, piya kampari untaw. ¹⁵ Pigoya, pi mono kanisore kina igeba Sitibeni aobi nkara agaumepa, aowamaba enisorewama nkaoganta puwantiye.

7

Kamanapa Sitibeni uwaimintiye

¹ Pigoya igeba piya kampari yuguna, monota paitanta kiye aeba Sitibeni abigama maya untiye: Kamana yepa tagano, yogana, ² Sitibeni maya untiye: Tabo kina'nepe, nao'mitabe, kamana yekiri abiyo: Tayabama Abara'amu, aeba Arani kumatiba kampa wanta Mesopotemiya mari mintogana, E'wasa Kotiwama aboramima, ³ maya omintiye: Kaeba magape kaope itaga, naeba maba ka kayakekana, pita'i wama umiyo, untiye. ⁴ Piya yogana, aeba pi kamana abite Kaotiya mawapa atate, Arani kumati wama umintantiye. Pita'i umintogana, abawampa purogana, pi kumapa atategina, Kotiba ka ma ayakogana, mampa ma tige maema minta mari ababute kanantiye. ⁵ Ababute kanama, maba kampa agorapa amima, uwa akitama toba kampa takaya amintiye. Aeba aga'nugibe ainti maekibeka uwa iwaga uma utawaitantiye. Pipa yagarawa kampa mintomeka, uwa piya otantiye. ⁶ Piya untana, Koti to ka kamana maya untiye: Kaga'nuguba kaboba 400, to kina'mi mpari a'yo umima kayokaya puma ataena mikibewe, pai untiye. ⁷ Pigoya, to kamana ka mayama amato puma untiye: Kayokaya kina ibabikibe kina, igeba antota'ena imekini, kaga'nugipa itaigini ma mpari kanama naeti mono punatama mikibewe, piya pai untiye. ⁸ Pigoya, Abara'amu pi kamana abite, abagi kina'wa ae utatantapa, i kasanema Koti otaogana, yagarawa Aisaki aborama mintogana, tonarentisa kakaga umaema yaga a'ya pogana piya puntiye. Pigoya Aisaki aeba Yekobu aboratantiye. Piya pogana, Yekobu aeba tayabamagi nagisarisa tara tumpaema kina aborowaitantiye.

⁹ Pigoya, tayabamagi igeba i'nanto Yosepe igobi potama, moneraka imuguni Isipi mari ababute wantaw. Piya puguna, pita'i wama umiyogana, Kotiba aege mima, ¹⁰ ataaenabintisa ababumagina agu kao'ena potama mono aisa potaogana, Isipi wasana wa'ega yagara Parao, aeba agama aogi potamagina, ae'wa ntama kumatape aokin'a'mitape kaga kabima miyenema, tabe kiye yagara asitantiye. ¹¹ Asitaogana mintogana, kaboba puma a'ya'ma Isipibe Kenani maribe tabe kabu puntaw. Piya pogini, tayabamagi igeba iga'enaga pu'ma mintantaw. ¹² Piya puntini, Yekobu aeba: Isipi mari naninta waintiye, yuguna abite, tayabamagi uwaitaogini pita'i wantaw. ¹³ Pigoya, to kake a'wae puma wauguna, Yosepeba agabarami agowapa uma aborowaimogana, Paraooba aborantemi, agowapa abintiye. ¹⁴ Pigoya, Yosepe yogini abawampa Yekobupe a'ya'ma aokinape, to a'ya'ma wabe wayape 75 kina, ibabute wantaw. ¹⁵ Pigoya, Yekobu aeba Isipi mari wama umima purintiye. Piya, yakaraki'nunka tayabamagiba igeba pabi mpari pu'waewantaw. ¹⁶ Puruguni, kana wasana iyampuwaipa akitaurite kanamagini, Sikemu

kumata, Emo ae yakaraki'nu igetisa maba ka wasana iru ma, Abara'amu monerase ika pumaranti, pita'i kaiwaitantawe.

¹⁷ Pigoya, Koti Abara'amu kamana ominti, pi kamana'ama aborama, esegi pikennagana agarosakena poganaba, igeba tabera Isipi mariba aborantawe. ¹⁸ Piya puma mintuguna, Isipi kina'mi tabe kiye yagara aoso ka aborantiye. Aeba Yosepe puntintanaba kampa napintiye. ¹⁹ Pigoya, pi tabe kiye yagara, aeba tayabamagi minaga pogini ataena puntawewe. Piya puma yogini, yogurtawaipa abe'i itauguni aeguwaewantawe. ²⁰ Pi kanabi Moses aborantiye. Pi kana yagarawaipa Koti nkaobi aogi e'wasa auwayaga yagarantowe. Pigoya, abawampa ntamapinti kakatama miyuguna, opa kakaga puntiye. ²¹ Aibogini, uiwa mari kakatauguna, Parao nkaragama kana yagara abatama, ababuma ae'wa ntagaraganta puma kabitantiye. ²² Piya pogini, Parao nkaokina igeba kamana agoba omima ayakuguna, abima kamana'wape yoga pomentanabe esegima aogiyena'mana puntiye.

²³ Piyama mintogana, kabowapa 40 pogana, aokina Isureyo kina igama abikenagaba agu'amaba aseyo pogana wantiye. ²⁴ Wama Isipi yagara ka'waina Isureyo yagara ka aeguyogana agate, pi ao'yagara ao'maemagina, pi kana Isipi marisa yagaraba ara aeguntiye. ²⁵ Piya puntana maya untkiye: Naeba naokina Parao nkayapisa iyoba itaoma, Kotiwama unafantemi, pipa abibebe pikibebe ayabayawe, yogini, igeba pipa kampa abibebe puntawewe. ²⁶ Pigoya, maroganaba to kake wama, Isureyo yagara taramisi ma'ena pusuguna uma isibatama, isi'aima ataraitsitama maya uwaisimintiye: Ma ntagara tara, tisigerisibe ka kina mintasa, nanaraka ma'enaba pese, untkiye. ²⁷ Piya yogana, pi ma'ena agobima ao'yagara aegunti, aeba Moses aebasana'ma kamana mayama a'wae pomintiye: Kaeba tasige kiyabe wa'egarepe kebaya ugatantiye. ²⁸ Aiba Isipi yagara aeguma kaitampese puma, nae naegukenga yeno, untkiye. ²⁹ Piya yogana, Moses aeba pi kamana abite aegaka wama, Mitiya mari wama to kina'mige umintantiye. Pita'i umima, waya maeyogana yagarawapa tara aborantase.

³⁰ Piya, kaboba 40 to kake migaita, ka'me mpari wama Sainai amu ararabiri umintogana, Wa'egawamatisa enisore ka'waina akiyatobisa yaku nkabu antabaiinpinti aboramintiye. ³¹ Piya pogana, Moses aeba nanaenamabayaa piyema, agabebema agakena waogana, Wa'egawama kamana mayama aborantiye. ³² Naeba kayabamagi, Abara'amu, Aisaki, Yekobu, ige Kotinawe, yogana, Moses aeba pi kamana abima tabaraba puma parokaema mintantiye. ³³ Mintogana, Wa'egawama maya omintiye: Mara aeyempela, pipa aota mawee. Pika kagisa anapa akubo. ³⁴ Naokina Isipi mari karana itama miyegini, nagisuma kube'ena purite kanaga, abirite kanaogana a'ya pegi, piya mampa iyoba itakena tumuwe. Pika kaepa Isipi mari ugatakana wama uma ibabikibene, Koti omintiye.

³⁵ Pigoya, wasanami igeba: Moses, kaepa kebaya kiyabe wa'egarepe miyoma ugatantiye, piya uma, a'a-o otauguna, Kotiba pi ntagara ae paitama iyoba itakiyema umagina, enisorewa otaogana, yaku nkabu antabaiinpinti aboramima yoga pipa otantiye. ³⁶ Piya pumagina otaogana, wama uma ibabute kanantiye. Piya, awame'enabe kasa'enabe puma miyogana, Isipi maribe, pi tete wani ta'ema wanti mparibe, ka'me mparibe, kaboba 40 piya puma nasi nasi puma ibabuma kanantiye. ³⁷ Pigoya, Moses aewa tayabama Isureyo kina maya uwaimintiye: Koti aeba tiyokina'mi abakapisa poropete nae kanta yagara ka aboramimikiye, piya untkiye. ³⁸ Piya, ka'me mpari aki puguna, Sainai amuti ima enisorewama nkawamupisa waiyaba kamanapa abima, uwaimogini abinta'nagi uramintawewe.

³⁹ Pigoya, tayabamagi igeba pi ntagarama kamanapa kaitegini, aewapa uma ata potate, Isipi mari a'wae puma wakenaga napimagini, ⁴⁰ Eronipa maya omintawewe: Kaeba kotintana puma tamegana, pi'nai paitarataka a'wae puma wano. Moses aeba Isipi marisa tababuta kananti'na, aetapaya wagasagi, kampa agaune, untawewe. ⁴¹ Piya umagini, purumakankama iyapisa potamagini, muta atama iya nkaeguma, pintana i'mu potentawewe. ⁴² Piya puguna, Kotiba akabiwaitaogini, igu'amaba a'yugu pogini, pa, nori, o'ama mpono untawewe. Piya pika poropete kina'mi nkisapa kamana mayama waintkiye: Isureyo agoba, tigeba kaboba 40 ka'me mpari mima, yagabe to ka'isaenabe aeguma kaema, naeti agunta kampa abasa'natantane, iye.

⁴³ Tigeba amani Moroko ae mono nama kima wasintane, iye. Piya, to amani Arepanika, nori ae pumarantintawewe, utegini, ae kamana wasintane, iye. Pintanama wa'egarintana puritaogiri, nunamu otakena aogima kampa puntane, iye. Pi aguntaenaga naeba yekini, kama kina'miba tibabute Pebironi mari merigaikibewe,

Koti untii kamana poropete kina'mi kaentawewe.

⁴⁴ Pigoya, tayabamagi igeba ka'me mpari kairasa Koti mpono nama kima'ma, ae-sagabite nasi nasi puntawewe. Pipa Koti Moses aowa ayakimagine uma aboraminti, pabi nkawameta kima'ma, aetisa mono wasintawewe. ⁴⁵ Pigoya, pi kai nama tayabamagi igeba

piyama kirite kanauguna, Yosuwa paitawaitaogini, mata'i to marisa kinapa igaruba iga-sogini, tayabamagi igeba maema kairasa mono kima, pita mintuguna Tebiti aborantiye.⁴⁶ Piya, Yekobu ae Wa'ega Koti, aeba Tebitipa kao'ena potaogana, pi abimagina: Tabé mono nama kigatasuwoma, abigantiye.⁴⁷ Piya aewanane. Soromoni Wa'egawamanta tabe mono nama kitantiye.

⁴⁸ Pigoya, Inatisa Yagara aeba wasanami nkiyatasa kimaranta namapipa kampa miye. Pika poropete nkawamupi kamana mayama atantiye:

⁴⁹ Mantaba naemu yabaewa. Piya, maba pipa nagisanepa ae abobora aema mimagi, a'ya'waemaenaba kabiyuwe, iye.

Namapa, aya namapaya ka kinataigma kanarasakiye. Piya, marupa ayamabaya ka abora namigina aogi pikie, iye.

⁵⁰ Naeba nayantepisa mantabe mabe maema aborawaentuwe. Pipa kampa abewo, piya uma, Wa'egawamaba poropete kina'ma nkawamupi ataogana, piyama kaentiye.

⁵¹ Pigoya, kamana kampa abima aibo kina tigega, tigu tige kampa waintantikiri, tiyabamagi puma mintantasu pumagiri, Aota Awamusakaba: A'a-o, otamagiri ataena puma miyewe. ⁵² Tiyabamagiba ae poropete yagara uwaba aogima atantawe. Pipa kampaye. Arupuyenama Nkagowa aborakibi, meto kamana unta, pi kina igeke kaga iyeguntawé. Piya, ainti aewa aboraogiripa, minaga puma aegukenaenaba pi tige puntawé. ⁵³ Kamana ago enisore nkawamupisa unti, pipa tigeba maema a'yugu potamagiri aeguntawé, Sitibeni piya uwaimintiye.

Sitibeni yaba kasutasa aeguntawé

⁵⁴ Pigoya, Sitibeni kamana piyama uwaimogini, intawamaba ataena pogini igobipa tabera puntawé. ⁵⁵ Pigoya, Sitibeniba Aota Awamusa'amaba agupipa pumaewaogana, mantari aomaraogana iyogana, agaomepa Koti nke'wasaenabi Koti nkayatakanti Isu mintogana agantana, maya untiye: ⁵⁶ We, naeba manta a'waiyegi, Wasanama Ntagara Koti nkagora mintegi agauwe, untiye. ⁵⁷ Piya yogini, imo kamana uma, ige akumpa aeguma apasana urite wama, ⁵⁸ kuma awamori uma irosa'ma, yaba kasutasa aeguntawé. Piya puntini, kamana otanta kina'miba igeba e'ero kaiwipa atama, ka yagara, agewapa Soro, ae agisabi aki potama atamagini, Sitibeni aeguntawé. ⁵⁹ Pigoya, Sitibeni yaba kasutasa aeguyuguna purintana, nunamu maya untiye: We, Wa'ega Isu, kaeba naumanape maerega pureno, untiye. ⁶⁰ Piya uma, araka pima to kake tabe kiga'e uma maya untiye: Wa'ega, kaeba ma aguntaenawaiipa mae igaso, uma purintiye. Aeguyuguna purogana,

8

¹ Soroba agategina antawamaba aogi puntiye.

Isu nkaegaranta kina igezi kamaena agobintawe

Pigoya, pi nttagaba Yerusaremi kumatasa, monota ai'aru pume kina tabera karana'ena agobima puwaitauguni, igeba iyegaka pai'ma aibarara puma, Yutiya, Sameriya mari wagana puwaewantawé. Aposoro kina ibiwai Yerusaremi kumatapa mintantawé. ² Piya, mono kina ka'isa igeba Sitibeni kaitategini, kube'ena puma intara'ena potantawé. ³ Piya puguna, Soro aeba pi monota ai'aru pume kina karana itama, namaka namaka aigupama, wa waya ibaisusu puma iga'na namapi itama mintantiye.

Piripiba Sameriya kumata mono yuga puntiye

⁴ Pigoya, mono pasinta kina igarubagainta kina igeba a'ya'ma kumati wagana puma, wasana mono kamana uwaimirite wantawé. ⁵ Piya puta, Piripiba Sameriya kina'mi kuma ai'nera irosa'ma, Karaisiti nkawaga kamana uwaimintiye. ⁶ Uwaimogini, a'ya'ma wabe wayape uwoma kina'mi kamana'waka ibogini abimagini, awame'enaba toma toma pogini agamagini, ka ima pumagini i'mu potantawé. ⁷ Piya, aeba keba uwoma igarubaogini, wasana intabaipintisa tabera: A-e, a-e, ute irosa'wauguna, nanki kinape igisa iya ataena ibunta kinape kaba itantiye. ⁸ Aibogini, pika kana kumatapa i'muntanaba tabera aborantiye.

⁹ Pigoya, pi kumata kiyo'ena pome nttagara, agewapa Saimoni mintantiye. Aeba maya uma mibutaye: Naeba naona kina'nepa tagane, untiye. Piya uma, Sameriya marasa kinapa pami puwaigasogini,¹⁰ ima minta kinake tumima minta kinake aeka abugunaba iyogini, maya uma mintantawé: Ma amani yagaraba Koti otanti nttagara esegiyena agowe, untawé. ¹¹ Piya yuguna, aona kina'maba e'ero kanabi piya pogini, pami pumagini aeti uma airokaema mintantawé. ¹² Miyuguna, Piripiba Koti kabiratakena aogi kamanape, Isu Karaisiti nkawaga kamanape uwaimogini abibebe puma, wabe wayape a'ya'ma mono wani pai'waentawé. ¹³ Piya puguna, Saimoni aebe pabiyama pi mono abima wani pai'ma,

Piripige kabo puma nasi nasi pogana, awame'enabe tabe esegiyenabe pogana, agama uwoma nkagi napima mintantiye.

Pitage Yonige Sameriya kumati wantase

¹⁴ Pigoya, Sameriya kumatasa kina'mi Koti mpono abuguni, pi iwaga kamana Yerusaremi kumati aposoro kina'miti waogini abintawé. Piyama abitegini, Pitake Yonike uwaisitaugunisi tumintase. ¹⁵ Tumpa irosa'maginisi: Aota Awamusá igeti tumenema, Wa'ega esotantase. ¹⁶ Piya, igeba Isu nkagera mono wanipa pasintaka, Aota Awamusapa igetiba kampa tumogini, uwa mintantawé. ¹⁷ Pigoya, aposoro tara isigeba isiya i'nota atausuguna, igetiba Aota Awamusá tumpintantiye.

¹⁸ Pigoya, kana Saimoni agaomepa, aposoro isigeba wasanami nki'nota isiya atausuguna Aota Awamusá tumogana, isigategina mone maete isigeti uma irosa'ma, ikapukena puwema, mayama isibigantiye: ¹⁹ Tisigeba naepa pabiyama pi nkesegiyenaba namisigi, to ka'isa kina'mi nki'nota nayantepa atakana, Aota Awamusá'wapa tumpiyeno, umagina isibigantiye. ²⁰ Piyama isibigaogana, Pita maya omintiye: Kaeba Koti nka'muntanaba monerasa ika pikena yempe'nagiba, monegantaga kaegapa ata puwakibese. ²¹ Piya, pipa kae'enaba kampaye. Kantawamaba Koti nkaobi kampa aogima parutu piye. ²² Kaeba maema pi ata pikenaenagapa kaite, kagu a'wae puma Wa'ega esotagana, kagupi egaenaga waintemipa asu'a pugagasano. ²³ Naeba kagaopa, kaepa egaena ataena asaenagampa kagibe puntiye, Pita piya omintiye. ²⁴ Omogana, Saimoni maya a'wae puma omintiye: Tisigeba naeka uma Wa'ega esotaisigina, nau'imagina pi yementanaba kampa abora nameno, untiye.

²⁵ Pigoya, aposoro isigeba a'ya'ma wabe wayape Wa'egawama kamana esegima uwaimiteginisi, Yerusaremi kumati a'wae puma wantase. A'wae puma wantinisi, Sameriya uwoma kumati aogi kamana uwaimita wantase.

Piripi Aperika yagara ka mono omintiye

²⁶ Pigoya, Wa'egawamatisa enisore ka'waina Piripi maya uma omintiye: Kaeba aseyo puma kagi Yerusaremi kumatisa Kesa kumati tume ki'i tumo, piyama omintiye. Piya pi ki'i ka'me mpari waye. ²⁷ Piyama omogana, Piripiba aseyo puma wantiye. Piya, Itiyopiya maba piya tabe wae ka mintanti, agewapa Kantesi, ae tabe yagaraba, mone kuta tabe kiye yagaraba aeba Yerusaremi kumati mono kamana wama intiye. ²⁸ Piya, a'wae puma wakena osiwama paibute wakena karewapi wantana, poropete Aisaya ae kamana awa'ena aisintiye. ²⁹ Piya pogana, Awamusá'ama Piripi maya omintiye: Ke'i kaeba wama, maro kare uma abatao, untiye. ³⁰ Piya yogana, Piripiba wama uma abatama, pi ntagara aeba poropete Aisaya ae kamana awa'ena aisogana, abima mayama abigantiye: Kamana aiselep'a, pi agowapa abeno, untiye. ³¹ Piya yogana, aeba maya untiye: Ka'waina kampa unamintakapa, naenepa ayamagi kanarapa abukuwe, untiye. Piya umagina, Piripi omogana karebi ima kabobuma mintantase. ³² Kamana awa'ena aisinti, pipa mayamawe:

Sipisipi aegukena ababesa pumagini, uma ababuma aegukibewe. Piya, to sipisipi aya kasa kina'mi nkigora: Kae-gae, kampa unta waiyisa puma, kamana kampa unta mikiye.

³³ Igeba karana potama, parutu kamanapa kampa otakibewe. Mampabi aege mikibe kinapa kamana'wapa kampa abikibewe. Igeba mabi miyaba'enawapa ago mae-gasigina ikiye, pi nkisapisa kamana aisintiye.

³⁴ Piyama aisuntana, kana tabe yagara aeba Piripi maya uma abigantiye: Kaeba yega abeno. Poropete aeba kekabaya piyaba iya, aewakabé to ka'wainakabaya iye, untiye.

³⁵ Piyama yogana, Piripiba abite, poropete yagarama kamanapi aigima Isu nkaogi kamana omintiye. ³⁶ Piya uta wama, wanita uma irosantase. Piya puntana, tabe yagarama maya untiye: Agao. Wanipa mampa waintiye. Mono wanika yekanapa kanara pai'natakiben, uma abigantiye. ³⁷ (Pigoya, Piripi maya untiye: Taga abima, kagupa aeti amegapa kanarane, yogana, antota maya omintiye: Isu Karaisiti aeba Koti Ntagarawé. Pipa abibebe puwe, omintiye.)

³⁸ Pigoya, kareba pita atate, Piripibe kana tabe yagarabe waniti tumima, Piripiba kana yagara wani pai'atantiye. ³⁹ Piya wanipisa iyunusuguna, Wa'egawamatisa Awamusá'ama Piripi ababute waogana, tabe yagara aeba to kake kampa agantana, antawama asoyaen-abisa ke'wati wantiye. ⁴⁰ Pigoya, Piripi aeba Asito kumati irosaogini agantawé. Uma irosa'magina, pitasa agobima kumaka kumaka aogi kamana uwaimita wama, Sisariya kumata uma irosantiye.

Soro agu a'wae pumagina Isu aegarantiye

¹ Soro aebe Wa'egamati atokaenta kina kama puwaitama, karana itama iyegukena agi napintiye. Aibumagina, monota paitanta kiye yagaramati wama kamana yogana: ² Soro ao'maeiyemba, esa kaema, Tamasiko kumata miyume Yuta kina'miti kaema amintiye. Amogana maete marota'i wama, Wa'egawamatisa kasa ki aega'ma miyume kina ibatama, wabe wayape iyakana u'ma ibabute Yerusaremi kumati kanakena wantiye.

³ Piya wama Tamasiko kuma nkagora uma irosakena pogana, mantarisa apayaena tumima tumpa e'wasa potantiye. ⁴ Aibogana, mabi ware'nama mima, kamana ka mayama abintiye: Soro, Soro, kaeba nanaga karana punatama naeguyene, yogana, ⁵ Soroba mayama abigama untiye: Wa'ega, kaeba kegawe, yogana, aebe maya untiye: Karana punatama naeguyempe, Isu naewe. ⁶ Pigoya, kaeba asima mare kumati wagini, pita'i piya pikena kamanapa ugamilikbewe, omintiye. ⁷ Pigoya, wasana aege wanta kina igeba kamana kampa unta, uwa mintantawe. Piya, igeba kamana'amaba abintaw. Piya, to ka'enaba kampa agantawe. ⁸ Piya, Soroba asima agaomepa, aoba tunusuwaogana kampa agantiye. Aibogini, aokina'mi ayakana urite, Tamasiko kumati ababute wantaw. ⁹ Pigoya, pita'i kakaga yagaba uwa aorikaema mima nanintabe wanipe kampa nanta, uwa a'a-o uma mintantiye.

¹⁰ Pigoya, Tamasiko kumata Isuti atokaenta yagara ka mintantiye. Agewapa Ananayasiwe. Aepa Wa'egawama amonta patama: Ananayasi, piya aegae' yogana, abite: Wa'ega, naeba maye, untiye. ¹¹ Piya yogana, Wa'egawamaba amato puma maya untiye: Kaeba parutu ki'i wama, Yutasi ntamapi ima, ka Tasasi kumatasa yagara, agewapa Soro, ae uma abatao. Aeba ibanto nunamu uma miye. ¹² Aeba agu'amaba mayaena agantiye: Ka yagara, agewapa Ananayasi, aeti uma irosa'ma ao agakena ayapa a'nota ataye, piya agantiye, untiye. ¹³ Wa'ega aeba kamana piya uma omogana, Ananayasi maya untiye: Wa'ega, pi ntagaraba tabera yega abuwe. Aeba kaege atokaenta kinaka Yerusaremi kumatapa karana'enaba aseyonaba kampa puwaitaye. ¹⁴ Pigoya, mata'iba pabiyama kae kage kawaga kamana yompe kinapa iga'na taepa taibu'urite wanema, tabe mono kiye kina'mi igeba otawe, untiye. ¹⁵ Piya yogana, Wa'egawama maya omintiye: Kaeba uwa wao. Pi ntagaraba yoga kina'ne otauwe. Aeba nage nawaga kamana'ne namu kinape wasana wa'ega kinape Isureyo aruyena igeti, yogane purite wama mikiye. ¹⁶ Piya peka, naeba nage nawaga kamana'neka uma awaenama nkagupi miyenema, otakana abikiye, piya untiye.

¹⁷ Pigoya, Wa'ega aeba piya yogana, Ananayasi aeba wama namaka yome, pita'i ima Soro nka'nota ayapa atama, maya untiye: Soro, nao'yagara, Wa'ega Isu ke'i aboragamiti, ae unatagi kanauwe. Kaeba kao agagana, Aota Awamus'a amaba kae kagupi pumaeyanoma iye, untiye. ¹⁸ Piya uma omogana, pabigo aobi aobariyanta kinatomepa aigaga paogana, agamagina asima iyogana, mono wani pai'ataogana, ¹⁹ naninta nama esegi puntiye.

Soro mono yuga Tamasiko kumata agobintiye

Pigoya, Soro aebe pi kumatasa Isuti atokaenta kina igege uwaenanto mima, ²⁰ pabigo karu'ena Tamasiko kumata Yuta kina'mi mpono namapi ima, Isu nkawaga kamana uma maya uwaimintiye: Isu aebe Koti Ntagarawewe, untiye. ²¹ Piyama uwaimogini, abima pami pumagini maya untawe: Yerusaremi kumati pi nkagi yegana, pitaka karana itaurite, mata'iba pabiyama iga'na taibu'urite, tabe mono kiye kina'miti wakena kananti'naba, pipa ayama a'wae uyenaba piye, untawe.

²² Pigoya, Soro aebe esegiyena maemagina: Isu aebe taga Karaisitiwe, uma, pi kamana agoba uma aborama aogi pogini, Tamasiko kumata Yuta kina mintanta uwaimogini, abima uwoma nkigi napintaw.

²³ Piya, ka'isa yagaba pogini, Yuta kina'mi Soro aegukena naga'nikintaw. ²⁴ Piyama wa naga'nigi'urite, kibira arape asekape minaena puma aegukena kabiyuguna abite, ²⁵ wakena pogini, aseka aokina'mi ababute wama, yabatasa kibi kimarantati imagin, wa'nu kupi ira'atama iga'na ubu'atama u'yobaso puguna, tumima wagaintiye.

Soro Yerusaremi kumati umintantiye

²⁶ Piya puguna, Soro wama Yerusaremi kumata uma irosa'ma, Isuti atokaenta kina igeti uma amato pikena yogini, a'ya'ma kina igebe iyekuru pumagini, atokaenti ntgarawemaba, kampa napintaw. ²⁷ Piya puguna, Panabasi ao'ena potama, ababute aposoro kina'miti wama, Isu Soro ke'i aboramima kamana omogana, Tamasiko kumata Isu nkawaga kamana tabera uma aboranti, pi kamana uwaimintiye. ²⁸ Piya uwaimogini abuguna, igege Yerusaremi kumati nasi nasi puma mintantiye. ²⁹ Mima, Wa'egama nkage

awaga kamanapa kampa karu punta wasanaba uwaimintiye. Piya, Kariki kamana abinta Yuta kina'miba mono uma abigamaka puntiniba, kamana a'waebu puntawe. Pi kina'mi ige aegukena yuguni,³⁰ aokina'miba abite Sisariya kumati ababute tumima metauguna, wama Tasasi kumata uma irosantiye.

³¹ Piya pomeka, a'ya'ma Yuta mari, Karariya mari, Sameriya mariba, igeti paruyena aboraogini, monota ai'aru pume kina'mi to kake esegi puma mintantawe. Igeba Wa'egawamatyi uma airokaeyuguna, Aota Awamus'a'maba intabaipintiba esegi puwaitantiye. Piya pogini, to wabe wayape uwoma kina'mi mono namapipa igege ampa pai'ma tabe puwantawe.

Pita Iniyasi kaba'atantiye

³² Pigoya, Pita aeba a'ya'ma mari nasi nasi puta puta, Kotiti atokaenta kina Arita kumata mintume kina, igeti uma irosantiye. ³³ Irosa'magina, pita'i ka yagara agantiye. Agewapa Iniyasi, aeba aga'na asawaogana nankitama miyogana, kaboba tonaentisa kakaga umaema puwantiye. ³⁴ Pigoya, Pita mayama omintiye: Iniyasi, Isu Karaisiti aogi pugatama kabakataye. Asima amakapa akubuma akarakiyo, omintiye. Piyama omogana, pabigo asiwantiye. ³⁵ Piya pogini, a'ya'ma Arita Saroni kumatasa kina'miba agamagini, igu a'wae puma, Wa'egawama tuntana puma aegarantawe.

Pita Tabita ao agatantiye

³⁶ Pigoya, Yopa kumata Isuti atokaenti nkwaepa ka mintantiye. Agewapa Tabita, piya Kariki kamanapipa Tokasiwe. Kamanatepipa Esawe. Aeba asi nasi aogiyenamana pumagina, a'ya'ma wabe wayape ka'isaenaga aguyosagame kinapa aogima iyo'maema mibutaye. ³⁷ Pigoya, pabi ntagaba Tokasi aeba yonintana aboramogana purintiye. Purogini, autiba wani pai'atama nama ka marupi metauguna waintantiye. ³⁸ Pigoya, Arita kumapa pipa agarota waintomeka, atokaenta kina igeba Pita awaga kamana abite, wasana tara uwaisitaugunisi, aeti Yopa kumati wama maya omintase: Kae kababute, tae wa'eri karu'ena wanema kanause, untase.

³⁹ Piya yusuguna, Pitaba abima aseyo puma, isigege wama uma irosa'ma, wasana yabae waintometi ababute intawe. Iyogini, abeya wae'iya a'ya'magini kobe puma mimagini, intara'ena puma Tokasi aogama mintana kai pagumpa iminti, pipa ayakiwaentawe.

⁴⁰ Piya puguna, Pitaba uwaitaogini, abe'i irosa'ma tumiwaegasuguna, arakabima nunamu untiye. Nunamu uma a'ya atate, aowaba a'wae puma kana wasana yabae waintometi agau'ma maya omintiye: Tabita, kaeba asiyo, untiye. Piya yogana, ao apina'ma Pita agama asima mara'miyogana, ⁴¹ Pita ayata u'ma asitantiye. Asitantana, Kotiti atokaenta kinape pi abeya waepe kega'e yogini, iyuguna Tokasi aogatama a'wae puma imintiye.

⁴² Pigoya, pi awaga kamana Yopa kumatapa abae puma anosaogini, uwoma kina'mi Wa'egawama mpono aegarantawe. ⁴³ Pigoya, Pitaba uwoma ntaga Yopa kumata to ka Saimoni, purumaka ari pome ntagara, aege mintantiye.

10

Enisore ka'waina Koniriyasi kamana omintiye

¹ Pigoya, Sisariya kumata ka yagara, agewapa Koniriyasi, mintantiye. Aeba Itari marisa irebu kina'mi kiye yagara mintantiye. ² Pigoya, aewape aege mintanta kinape a'ya'ma igeba Kotika karu pumagini, monotapa aogima mintantawe. Pigoya, Yuta kinapa monebe kotape imima aogima iyo'maentana, asi nasiba Kotiti esotama ampa aboraogana, atega'e: Koniriyasi, untiye. ⁴ Piya yogana, aekuru puma: Wa'ega, nanagawae, untiye. Piya yogana, aeba maya untiye: Nunamube kao'enagape Kotiti iyeginia, abima aogi pugataye. ⁵ Pika kaeba Yopa kumati wasana uwaitagini wama, ka yagara agewapa Saimoni, aoso agiba Pita, ae uma ababute kanaiyo, uwaitao. ⁶ Aeba auka Saimoni, purumaka ari pemintagara, ae namapi wani nkawamori a'yo umintakiya, uma ababute kanaiyo uwaitao, uma omintiye. ⁷ Enisorewamaba kamana piyama omite waogana, kayokaya yagara tarawa, irebu kina'wampitisa mono waintaga yagara kana, suma, igege'a uma, ⁸ pi kamanapa uwaimiwaetama, Yopa kumati uwaitaogini wantawe.

Wa'egawama Pita amonta ki'i ka'ena ayakintiye

⁹ Pigoya, pi kina igeba wama ke'i uma waimarategini, maroginiba to kake wama kuma agora uma irosakena puguna, kagi abebe pogana, Pitaba nama nkabobori ima nunamu asu untiye. ¹⁰ Nunamu asu yogana, aga'ena abogana, yogini naninta kao'ena potauguna, aesaroen'a puma ayampuga kampa abogana, amonta mayaena agantiye: ¹¹ Mantaba a'waiyogana, ka'ena kaiba taberaka'ya atunkatapa iga'na ubu'atama atauguna, mabi tumintiye. ¹² Pigoya, kana antabaipintiba yaga kuya kabara uwoma toma toma kina

atamagina pugasanaogana mintometa tumogana,¹³ maya kamana aborantiye: Pita, kaeba asima aeguma nao, yogana,¹⁴ Pita maya untiye: Wa'ega, naeba uwa a'yugu kina'mi ntanintabé i'ni ntanintabé kampa naontanawé, untiye.¹⁵ Piya yogana, to kake maya kamana aborantiye: Kotiba uma aogi piya, pi ntanintagaba kaeba uma ataba a-po, untiye.¹⁶ Pintana kakagara aboraogana, pabigo pi kaiba mantari a'wae puma intiye.

¹⁷ Pigoya, Pitaba pi kasa'ena agaomeka, uwoma nkagi napiyogini, pabigo kana Koniriyasi nkaokina igeba wa'eri uma irosa'ma, Saimoni ntamaka ibigata wama uma abatamagini, kabera uma asima mimá,¹⁸ agega'e uma aguyosa'ma maya untawe: Saimoni, aoso agiwapa Pita, aeba ma ntamapi mintiyo, piya untawe.¹⁹ Pigoya, Pita pi kasa'ena agaomeka napi napima mintogana, Awamus'a'ama maya omintiye: Kaeba abo. Kakaga kina kanama ampa kaguyosagawe.²⁰ Pika kaeba irosa'ma timimagina, igege wakenagaba a-kuntaba po. Pi kinapa nae uwaitaogini kanawé, omintiye.²¹ Piya omogana abite, Pitaba kana kina'miti irosa'ma tumima, maya untiye: Naguyosagapa naeba maye. Nanaga kanawé, yogini,²² pi kina igeba maya omintawé: Irebu kina'mi kiye yagara Koniriyasi uratagi kanauna. Aeba Kotika karu puma aogiyenabi miyegini, a'ya'ma Yuta kina'miba aeka abeganaba, aogi pemí, aeti aota enisore ka'waina aboramáma, kaeka namankapi kanama ampa kamana ugamekana aboma, omegina, tagarubagi kanaune, untawe.²³ Piya yuguna, Pitaba namankapi ibabuwaitama, pi nkaseká aogima kabiwaitaogini waimarantawé. Waimarauguna, maroginiba, aeba Yopa kumatasa ka'isa Isu mpone abinta kinape, kaga wantawé.

Pita Koniriyasi ntamapinti intiye

²⁴ Pigoya, igeba ke'iba ka ase uma waitategini, wama Sisariya kumata uma irosantawé. Pigoya, pita Koniriyasi aeba ae tunkape to ka'isa aokinape igege'a uma, igawa pumagini mintuguni uma irosantawé.²⁵ Uma irosa'ma, Pitaba namapinti iyogana, Koniriyasiba kanama agisabi ampa parokaema, a'mu potantiye.²⁶ Aibogana, Pitaba ababuma asitama maya omintiye: Asiyó. Naeba wasanawanawé, omintiye.²⁷ Piya kamana utaginisi, namapinti ima wasana aki puma mintuguna, asu igama maya uwaimintiye:²⁸ Tigeba Yuta kina tae agoba abintawé. Taeba to marisa kina tigege tao'ená puma umisanagaba akutatantane. Pigoya, naeba tigekaza a'yugu kina i'ni kinaneba kampa uritakuwe. Kotiba agowapa unamima nayakintika,²⁹ naeba kamanatipa kampa akayunta, uwa kamanan wasima kanauwe. Pika naeba ibaba tibigauwe: Tigeba nanaga nagega'e yega kanauwema, ibigantiye.

³⁰ Piyama ibigaogana, Koniriyasiba maya omintiye: Naeba kasa'ena agategi mirite kanaogana, tarawa tarawaki yaga a'ya piye. Pi kamana ugamukuwe. Naeba atamaita nunamu yuwagana, ka yagara kaiwapa wae'wae puwanta naeti aborama,³¹ maya unamitaye: Koniriyasi, Kotiba nunamugapa abima, wasana mone kotatasa iyo'maeyampekaba abima aogi pugataye.³² Pika kaeba Yopa kumati wasana uwaitagini, Saimoni, aoso agiba Pita, ababute kanaiyo. Aeba auka to Saimoni, purumaka ari pemí ntagara, ae namapi miyemi, kana namankapa wani nkawamori waintiye. Pi kana Pitaba mata'i kanama ka'isa kamana ugamenó, yega abituwe.³³ Pigoya, naeba pika wasana uwaitaogini, kaetiba watagana, kaeba kamana'nepa abima, kanampeka nantawama aogi piye. Pigoya, mapa Wa'egawama kamana ugaminti, pi yega abenemagi Koti nkaobi aki puma mintune, piya untiye.

Pita Koniriyasi ntamapi mono uwaimintiye

³⁴ Pigoya, Pitaba awamu aseyo puma maya uwaimintiye: Koti aeba wasana taukaba abeginaba iyegina tumeginaba kampa piye. Pipa abibebe puwe.³⁵ Piya, toma toma kina'mitsa ka'isa kina'miba aeka karu puma aega'ma, ae aobi aogima miyiginaba, igege'e ukiye.³⁶ Kotiba Isureyo kina taeti kamana au'wapa maema aboranti, pi nkawaga kamana tigeba abewe. Aeba Isu Karaisiti, a'ya'waemaenama Nkwa'ega otaogana, paru aogi kamanapa uramiwaentiye.³⁷⁻³⁸ Pigoya, Yuta mari aboranti, pi nkawaga kamana mayama abewe: Yoni aeba wasana mono waninkama kamana uwaimogini abuguna, Isu, Nasareti kumatasa, ae Koti Aota Awamusape esegiyenawape amogana, Karariya mari mono yugawapa agobintiye. Piya, a'ya'ma maba ainkima nasi nasi puma wasana iyo'maentiye. Aibumagina, a'ya'ma ke kina'ma intabapinti minta kinapa aogi puwaitantiye. Kotiba ao'maema, wage aetaogana pi ntugaba puntiye.³⁹ Pigoya, Yuta kina tae maribe Yerusaremi kumatibe unti puntintanaba, pipa taeba agama abiwaentune. Pigoya, ainti maripora aeguyuguna purintiye.⁴⁰ Pu'ma mintogana, kakaga yaga a'ya pogana, Koti abage puntiye. Abage puma asitaogana, aborate kakate puntiye.⁴¹ Pigoya, a'ya'ma kina'mitiwanane. Wasana aogi kamana'wa ukena kina Koti pai ibabumartanti, taetimana aborantiye. Pi purintapisa asiyoga, aege naninta kaga nama, kamana ampa uma abintompene.⁴² Pigoya, Kotiba aepa aoso kina purinta kina tae tabe kiya yagara

asitantiye. Pi nkawaga kamana a'ya'ma kina uma aborama uwaimiyoma, uratantiye. ⁴³ Pigoya, aeka napima imatiti pikibe kina age awaga kamana'waka uma aguntaenawaipa Koti asu'a puwaigaikiye. Pipa a'ya'ma poropete kina ige uma aborantawe, Pita piya untiye.

To marisa kina'miti Aota Awamusapa tumintiye

⁴⁴ Pigoya, Pita piya yogini, a'ya'ma abima mintume kina igitu Aota Awamusapa tumintiye. ⁴⁵ Pigoya, Koti to marisa kina'miti Aota Awamusapa ti'ma imogini, ka'isa Yuta kina, Isu nkaegaranta Pita abagi punta kina, igeba agate pami puntawewe. ⁴⁶ Piya, to marisa kina'miti Awamusapa tumogini, to kamana to kamana umagini Koti uma tabe potauguni, abima pami puntawewe. Piya puguna, Pita maya uwaimintiye: ⁴⁷ Taeti Aota Awamusapa tuminti, pabiyama ma kina'miti tumemika, mono wanipa kampa akunkitakune, untiye. ⁴⁸ Piya uma yogini, ao'miba ibabuwaitama Isu Karaisiti nkagera mono wani pai'itantawewe. Piya puguna, igeba Pita arakuruguni, ka'isa yagaba igege mintantiye.

11

Pita Yerusaremi kina awaga kamana uwaimintiye

¹ Pigoya, aposoro kinape Isu nkaegaranta kina Yutiya mari mintume kinape, igeba namu'isa kina'mi Koti kamana aegaranta, pi nkiwaga kamana abintawewe. ² Piya abuguna, Pitaba Yerusaremi kumati a'wae puma iyoginiba, Isu nkaegaranta i kasanta kina'miba aeka abugunaba kunta ibogini, ³ maya omintawewe: Kaeba nana pikena to mari wama, i kampa kasanta kina'migeba nanintaba nane, untawewe.

⁴ Piya yuguna, Pitaba pintana aboraminti, pi kamanapa agorasa agobimagine, maya uwaimintiye: ⁵ Naeba Yopa kumata nunamu uma mintuwagana, napiyenanempa a'wae poga, amontagantaena agauwapa, mayaena aboranamoga agantuwe: Piya ka'ena tabe kaigantaena atupa maema kabobuma, iga'nara ubu maranta, pi mantabintisa pubasanauguna tumima, nagora tumpa irosantiye. ⁶ Tumoga, agabebe puma igama pakobuma mayama agantuwe: Antabaipintiba tonaronna kina, yagabe kabubintisa kina kuya kabara a'ya'ma kinapa pita agantuwe. ⁷ Pigoya, naeti kamana mayama aborantkiye: Pita, kaeba asima aeguma nao, untiye. ⁸ Piya yoga naeba maya untawewe: Wa'ega, pipa kampaye. Naeba uwa a'yugu kina'mi ntanintabé i'ni ntanintabé kampa naontanawewe. ⁹ Piya yuwagana, mantarisa ebi ebi kamana to kake maya untiye: Pipa Kotiba uma aogi pegina, kaeba uma ataba a-po, untiye. ¹⁰ Piyaena aboraoga, kakaga pogana, kana a'ya'waemaena mantari a'wae puma intiye. ¹¹ Pigoya abiyo. Pintanaba kakawaogana, pabigo Sisariya kumatisa kakaga kina apa naeti wama nama mintuwampe, pita'i uma irosantawewe. ¹² Uma irosauguna Awamus'aama maya unamintiye: Kaeba igege wakenaga ata kagiba a-ntapima wao, unamintiye. Piya yoga, wauwagini ma taokina tonaentisa ka'umaema kina'miba nabagi pugu, wama uma irosa'ma irebu kina'mi kiye yagarama ntamapi iyuwakana, ¹³ maya kamana uramintiye: Nae namapi enisorewama aboranamima maya unamintiye: Kaeba Yopa kumati apa igarubagini, Saimoni, aoso agiba Pita, uma ababute kanaigina, ¹⁴ kamana urimekiri kaebe kao'mibe tigeba abigina, Kotiba ti'ima aogi puritakiye, piya unamiyema, kana kiye yagara unamintiye. ¹⁵ Pigoya, naeba mono uwaimuwagana, pai taeti Aota Awamusapa tumintisa puma, pabiyama igitiba tumintiye. ¹⁶ Piya poga, naeba pi agategi, Wa'egawama kamana maya unti, pipa napintuwe: Yoniba uwa wanitaka'ya paititantiye. Piya naeba Aota Awamusataso paititakuwe untika, napintuwe. ¹⁷ Pigoya, taeba Wa'ega Isu Karaisitika napima tamatiti puwakana, pintanaba tae-isa puntiye. Pabiyama to marisa namu kinape i'muntanaba puwaitama, Aota Awamusapa imintiye. Pipa naeba ayama Kotipa kepa akunkatakawewe. Pipa kampaye, Pita piya untiye.

¹⁸ Piya uwaimogini, igeba abima intaba paru pogini, Koti i'mu potama maya untawewe: We, Kotiba to marisa kina igu a'wae puma, miyaba mikenenaenga igegeba uwaitayeye, piya untawewe.

Antiyoki kumata mono aborantkiye

¹⁹ Paipa Sitibeni pu'waoganaba tabe kuntuyena aborantkiye. Piya pogini, Isu nkaegaranta kinape iyegaka pai'ma wama, Pinisiya, Saiparasi, Antiyoki mari umima, Yuta kina'amana mono kamanapa uwaimima mintantawewe. ²⁰ Pigoya, ige abakapisa Saiparasi kinape Sairini kinape Antiyoki kumati irosa'ma Kariki kina igege, pabiyama kamana uma abirite, Wa'ega Isu mpono kamana uwaimintawewe. ²¹ Piya, Wa'egawamaba esegiyena imogini uwaimuguni, uwoma kina'mi abima igu a'wae puma Wa'egawama tuntana puntawewe.

²² Pigoya, pi kamana Yerusaremi kumati waogini, monota ai'aru pume kina igeba abite, Panabasi otauguna Antiyoki kumati wantiye. ²³ Wama uma irosa'ma agaomepa, namu'isa uwoma kina'mi Isu aegarauguna uma igama, Kotitisa awagaena igeti aboraoome, agama antawama aogi pogana, Wa'egawamatyi uma airokaema mikibeka ige'ma kamana esegima uwaimintiye. ²⁴ Piya, Panabasi aeba aogi yagarawe. Agupipa Aota Awamusape amatit'enawape pumaema waitantogana, pi namu'isa kina igaogana antawama aogi puntiye. Piya, kana kumatapa uwoma kina'mi Wa'egawama tuntana puntawe.

²⁵ Pigoya, Panabasi aeba Tasasi kumati wama, Soro uma abatakena wantiye. ²⁶ Wama uma ababoginisi, Antiyoki kumati kanantase. Kanama ampima monota ai'aru pume uwoma kina'mige mima, ka kaboba mono uwaimintase. Pigoya, Antiyoki kumatasa wasanamiba Isuti atokaenta kina ige igewaipa Karisiteni kina'nema uma aborantawe.

²⁷ Pi kanabipa, poropete kina Yerusaremi kumatisa Antiyoki kumati tumintawe. ²⁸ Pigoya, igevisa ka, agewapa Agabasi, aeba Awamusama otaogana a'ya'ma mari nanintaga tabe kabo pikibe, pi kamanapa untiye. Piya, pi kana kaboba Aroma kina'mi wa'ega yagara Korotiyasiba, aeba mintogana aborantiye. ²⁹ Pigoya, Antiyoki kumatasa Isuti atokaenta kina igeba pi kamana abite, mone iyotasaenawai waitomepa aki puma, Yutiya mari iyo'miti ataigina wakibika, uma esegi puntawe. ³⁰ Pigoya, mone maema aborama aki puntapa, Panabasike Soroke isimugunisi, maete wama aegaranta kinata kabiyyume kina'wai me imintase.

12

Erotiba Yemisi aeguntana, Pita araku'urintiye

¹ Pi kanabipa, wasana wa'ega yagara Erota monota ai'aru pume kina ka'isa, karana itama agasiyaena puwaitantiye. ² Piya puntana, yogini Yoni nkaganto Yemisipa kasotosa aegugasuguna purintiye. ³ Piya pogini, uwa Yuta kina'mipa iga ibogana igama, Pitapa pabiyama yogini, yisiti kampa wainta paretia nakena yaga arosaogini, araku'ma iga'na utintawe. ⁴ Pi Pasoba yaga, i'kena yaga, a'ya pekanaba, Yuta kina iyakima aegukenga napima yogini, iga'na namapi atama, irebu kinapa tonagisaris ka'umaema kina'mi kiya kabintawe. ⁵ Pigoya, Pitaba iga'na namapi mintogini, monota ai'aru pume kina igeba asi nasi aeka napima Kotiti nunamu uma mintantawe.

Enisorewama iga'na namapisa Pita iyoba'atantiye

⁶ Pigoya, Erota aeba marekanaba wasana iyakikena yaga aboranti, pi nkasekapa irebu yagara taramisi isigeba isibakapi Pita iga'na tara ubu'atama waimarantkiye. Piya, to irebu yagara taramisi nama kaberi kiya kabima mintantase. ⁷ Pigoya, Wa'egawamatisa enisore ka'waina pabigo aborama asiyogana, namapa e'wasa puwantyiye. Piya pogana, enisorewamaba Pita abekintata aukayama abage puma: Ke karu'ena asiyo, yogana, Pita nkayapisa iga'naba iyobantiye. ⁸ Piya pogana, enisorewama maya omintiye: Kautasaenaba maema pu u'ma, kagisa anapa maema igiyo, untiye. Piya pogana, enisorewama to kake omintiye: Mu'mu kaigapa maema pu u'ma naegarao, yogana, ⁹ aega'ma wantana, enisorewama pomentanaga abogananab amonta ki'i pusuyena puntiye. ¹⁰ Pigoya isigeba to ka kabira piyama mintugunaba igasima uma pasite puta, kumati tabe kabi kimaranta, pita uma irosausuguna aewa uwa a'waiwaoginisi tumintase. Tumima ke'i wantinisi, karu'ena enisorewama Pita megaite wagaintiye.

¹¹ Piya pogana, Pita age'magina maya untiye: Mapa napiyuwe. Wa'ega aeba enisorewa otagina, Erota nkiga'nabisabe Yuta kina'mi nkigobintanabisabe iyoba nataye, piyama napintiye. ¹² Pita aeba piyama napigaitae age urite wantiye. Wama Yoni Maka ae ano, agewapa Mariya, ae namata uma irosantiye. Pita'i uwoma kina'mi aki puma nunamu uma mintantawe. ¹³ Pigoya, Pitaba komari umima kabera aiwakarusogana, kayokaya araga ka, agewapa Arota, aeba: Kebaya aiwakarusiye, ute tumima, ¹⁴ Pita kamana'wata abite, kabe kampa aiginta uwa a'mu purite, nama nkantabaipinti ima: Pita kanama kabera ampintiye, uma uwaimintiye. ¹⁵ Uwaimogini, igeba abite maya untawe: We, kaeba aibo kamana yene, yuguna, aeba a'no pako puma esegima untiye: Me, ae asima mintiye, untiye. Piya yogini igeba: Pipa amankapa pemintanaga yene, untawe. ¹⁶ Pigoya, Pita aeba to kake aiwakarusuma miyogini, kabe ai'ma aewa nkagamagini pamipuntawe. ¹⁷ Piya puguna Pitaba aya tugupa pumagina: Kamanapa pakama miyiyoma, uwaimintana, Wa'egawama iga'na namapisa iyoba atama ababunti, pi nkawaga kamanapa uwaimimagina, to ka maya untiye: Tigeba ma kamanapa Yemisipe to ka'isa taokinape uwaimiyo, untiye. Piya ute, aeba tori iro'ma wagaintiye.

¹⁸ Piya marogini, irebu kina igeba Pitaka aisakate: Nana puwaye, ute, iyekuru puma pamipuntawe. ¹⁹ Piya puguna, Erota Pitaka aguyosakategina iga'na namapi kampa

aganta, irebu kina uwaitaogini, aseka kabima mintume kinapa iyeguntawé. Piya pugaite, Eroti aeba Yutiya maba kaite Sisariya kumati tumima mintantiye.

Eroti nkantota'ena aboramintiye

²⁰ Pigoya, pi kanabi, Taya Saironi kumatasá kinapa Eroti tabera ka ibirantiye. Piya, pi kuma ago kina igeba irosa'waema: Paru puratanema, wasana wa'ega yagarama kiya yagarawa, ka agewapa Parasitasi, ae omuguna, antawamaba aogi pogana, kana wasana wa'ega yagaramati wama kamana'waipa omintiye. Piya, igeba ka'isaenawai ankima ankamienawaipa tisa'waogini, pi to kake kabu puma airokaekena irosantawé.

²¹ Pigoya, Eroti aeba kamana a'wae puma uwaimikena kana iminti, pi ntaga aborao-gana, wasana wa'ega awa'ena pu u'ma, kamana ukena yabaera ima mima, pi kina'mi aki puma mintuguna kamana uwaimintiye. ²² Uwaimogini a'ya'ma kina'miba aomana suma maya untawé: Kamana pipa wasanama kamanapa kampaye. Pipa Koti kausu kamana yene, untawé. ²³ Pigoya, Erotiba pi kamanaka abima aogi puntana, Koti nkageba kampa maema asaga'yuyogana, Wa'egawama enisorewa otaogana aeguyogana, aupinti kimparaogana pu'wantiyé.

²⁴ Piya, pabi ntaga Wa'egawama mpono'amaba anosama abae purite wagana puntiye.

²⁵ Pigoya, Panabasibe Sorobe isigeba Yerusaremi kumata pi uwaositantasa puma pugaite, pabe nkawameta Antiyoki kumati a'wae puma wakenaba, Yoni Maka ababusuguni kaga wantawé.

13

Igeba Soroke Panabasike mono Yugara uwaisitantawé

¹ Pigoya, Antiyoki kumata monota aruyenabi poropetebe tisabe mintantawé. Piyama: Panabasiwa, Simiyoni aeba to ka ominta nkagiwapa Tunu Ntagarawa, Arusiyasi aeba Sairini kumatasawa, Maneyeni aeba wasana wa'ega yagara Eroti aege kaga agayagaya puma mima anosantina, Sorowa, sumagini aruyenabi mintantawé. ² Pigoya, ka yagaba Wa'egawama nkagisuma nakenaba a'a-o uma aki puma mintuguna, Aota Awamus'a'ama kamana maya untiye: Panabasike Soroke yoga uwaisitantopa, pi pikibemeka maema aseyo puwaisitaiyo, untiye. ³ Piya yogini, pika nanintaba a'a-o uma nunamu uma mima, iyapa isi'nota atama akayona puwaisitama, mono Yugara uwaisitaugunisi wantase.

Saiparasi mari wama mono kamana untase

⁴ Pigoya, Aota Awamus'a'ama piyama uwaisitaoginisi, isigeba wama Serusiya kumata tumpa irosa'ma, wanipisa karebi ima wama Saiparasi uma irosantase. ⁵ Pigoya, pi mpari irosa'ma, Saramisi kumati uma pita'i Yuta kina'mi ige mono namapi ima Koti kamana uwaimintase. Yoni Maka aeba isigge kaga wama isiy'o'maentiye.

⁶ Pigoya, a'ya'ma pi mpari nasima, Peposi kumata uma irosantawé. Pita'i uma irosa'ma, Yuta yagara, ka kiyo'ená pikena yagara, kampari poropete mintanti, agewapa Pa-isu, ae uma abatantawé. ⁷ Pi ntagara aeba kiya ka, agewapa Sesiyasi Porasi, ae ao'yagara mintantiye. Pi kiya yagara aeba aogi napi napiyena wantaga yagara, aeba Koti kamana abikenaga abogana, Panabasike Soroke isigega'e yiginisi kanantase. ⁸ Kanausuguna, pi kana kiyo'ená pome ntagara, Kariki kamanapipa agewapa Erimasi, aeba kiya yagarapa Isu mpono a'a-o otama akunkisitantiye. ⁹ Pigoya, pi ntaga Sorokaba, aoso agiba Poro, aepa Aota Awamus'a'ama antabi pumaemagina aseyo pogana, Erimasi aragamagina maya omintiye: ¹⁰ Kaeba kewama ntagarawé. Kaeba arupuyenama kama potane. A'ya'ma kumpari'ená kamparagaenagampaba kagupipa pumaenatiye. Kaeba Wa'egawama nkaogi ki maema a'yugu puma, ataena pumagina akunene. ¹¹ Pika Wa'egawama nkesegiye-nawampa nkagowapa agao. Kaeba kao karu karumpa'wakana, ka'isa yagaba arapa kampa agama mikibene, untiye. Piya yogana, pabigo ibinankama ata potaogana, aoba tikaeyogana aya nkurupa nkurupa pogini, ayata urikena puntawé. ¹² Pintana aboraogana, kiya yagaraba Wa'egawama nkesegiye-nawata agategina, monokaba pami puma abogana, aogi pogana aogima abibebe puntiye.

Poroba Pisiriya Antiyoki kumata mono uwaimintiye

¹³ Pigoya, Porobe aokinape igeba Peposi kumapa atate, wanipisa karebi ima to kake wama, Pampiriya mari Pega kumata uma irosantawé. Pitasa Yoni Maka aeba itate Yerusaremi kumati a'wae puma kanatiye. ¹⁴ Pigoya, igeba Pega kumatasaba wama, Pisiriya mari Antiyoki to auka pita uma irosantawé. Pita uma irosa'ma, Yuta kina'mi sabatiba kaga mono namankaipi ima mintantawé. ¹⁵ Pigoya, pi monota tabe kina igeba Moses kamanake, poropete kina'mi kamana awa'enake, ka'isa aisuma a'ya atate, mayama uwaimintawé: Tao'mitaba, mono kamana ka napintiripa yigi abeno, untawé.

¹⁶ Piya yuguna, Poroba asima aya nkasa puma paru puwaitama, maya uwaimintiye: Isureyo nao'mitabe Kotika karu pe kinape, kamana urimekiri abiyo. ¹⁷ Isureyo kina taete Koti, aeba tayabamagi ibabuma kibi itama, Isipi mari mimagini tabe kina aborantawe. Piya puguna esegeiyenawatasa pita'isa ibabute kanama, ¹⁸ ka'me mpari nanintaba imima iyo'maema miyogana, kaboba 40 puntiye. ¹⁹ Pigoya, Kenani mariba tonarentisa tara umaema kina igarubakasima yogini, tayabamagiba igeba pi mpaba pakobuma, iyota iyota puma maema mintantawe. Piya puguna, kaboba 450 a'ya puntiye. ²⁰ Pigoya, Kenani mari mintunguna kiya aborawaimogini mirite wauguna, poropete Samuweri aborantiye.

²¹ Pigoya Samuweri mintogini, wasana wa'egawaika yuguna, Kotiba Penisameni nkaga'nubara igetisa Kisi ntagara Soro asitaogana, kaboba 40 kabiwaitama mintantiye. ²² Pigoya, aeba atate, Tebiti wasana wa'egawai asitantiye. Pigoya, aeka maya kamana uwaimintiye: Naeba Yesi ntagara Tebiti agama, aeka naumawamaba aogi pegi, aeka yekana nae yuga a'ya'ma wasikena yagarane mikkiye, Koti piya untiye. ²³ Pigoya, Tebiti nkaga'nubara igetisa Isureyo kina tae aogi tau'ikena yagara ka aborakibi, awaga kamana unti, pi'na au'wantaga'ena penema, Koti yogana, Isu aborantiye.

²⁴ Pigoya, wasana abakapi aboranema, maru Yoniba a'ya'ma Isureyo kina'mi igu a'wae piyemagina, mono wanipa pai'itakena kamana uwaimintiye. ²⁵ Pigoya, aeba ke otanta a'ya wakena puntipa, pita aeta wama wasana maya uwaimintiye: Aewa uma unatapa, pi ntagaraba aeba naeba kampaye. Aeba ainti kanakiye. Naeba uwa yagara kanaoka, agisa anapa akubotakena ayabaya pukuwe. Aeba Wa'ega yagarawe, Yoni piya untiyemagina, Poro uwaimintiye.

²⁶ Piya untana, to maya untiye: We, naokina'ne, Abara'amu nkaga'nu, tigebe to ka'isa Koti karu pota kina, yekiri abiyo: Tau'ikenaga aogi kamana pi taeti otantiye. ²⁷ Yerusalem kina, ima minta tumima minta kina'miba Isupa kayoneba kampa potantawe. Piya kampa puguna, poropete kina'mi meto kamana a'ya'ma sabatirapa aisuma abompe, pipa esegi puntiye. Piya, aeka ata kamana otama uma a'ya atantawe. ²⁸ Igeba Isu kaintanawakaba aguyosakate, Pairatika uwa yuguna aeguntiye. ²⁹ Pigoya, mono kamanapi umaranta, pabi nkawameta puma, maripora iyoba'ma aru kabi kaitantawe. ³⁰ Piya puguna, Kotiba purintapisa asitantiye. ³¹ Aibogini, aege Karariya marisaba Yerusalem kumati kaga kananta kinapa uwoma ntaga aborawaimintiye. Aborawaimogini, aganta kina igeba pi nkawaga kamana'wa uwaimikena kina'ena puma, mampa mintawe. ³²⁻³³ Pigoya, Koti tayabamagi pi utawaitanta, pipa Kotiba Isu asitaogana, iyabamagi taeti au'wa aboranti, pika tintawama asoya kamana urimuse. Pika mono ini Samu tara, Koti umarant kamana mayama kaemarantiye: Yagaraneabwe, Kaepa iba aboragatauwe, yogana, kaemarantiye.

³⁴ Pigoya, Isu purintapisa asitantikan, aeba aintiba to kake pu'ma abararakenaenaba kampa maema aborakiye. Pika Kotiba kamana maya untiye: Naeba Tebiti aogiyenaba utatantokana, pi'na au'wapa waiyaba waiyaba'ena timukuwe, untiye.

³⁵ Pika mono ini Samubi to ka mayama waintiye:

Kaeba aota yagaragapa naepa a-ntataga abararano, piyama kaentiye.

³⁶ Pigoya, Tebiti aekaba kampa kaentiente. Ae agowapa abintune. Aeba Koti yoga kamana otanti, pipa aokina igezi puma a'ya atate purintiye. Purogini, ayabamagi ige kabi kaitauguna, au'ariwapa abararantiye. ³⁷ Pigoya, Koti asitanti ngatara, aeba kampa abararantiye. ³⁸ Pigoya, naokina, naeba urimekiri abiyo. Aguntaenaripa Isu ka'waina maema asu'a purigaikenaga yune. ³⁹ Mosese kamana ago kamana'amaba kaintanariipa asu'a purigaikenaba pugagate atantiye. Pika Isuti uma airokaeyiginaba, kanara maema a'ya'waemaenaripa asu'a purigaikiye. ⁴⁰ Poropete ka'waina kamana unti, pi'na tigeti esegi pusnaga a'wae piyoma, tige'ma kamana urimuwe. Kamana mayamawewe:

⁴¹ We, mono'ama akaya se kina, tigebe agabebé puma uwoma tigi napiyigina ataena puritakiye, iye.

Naeba tige kanabipa, ka aota yuga pukuwe, iye.

Pigoya, ka yagarama pi ntuga kamana urimekiripa, pipa tigebe kampa aogima abima wasikibewemagina, poropete yagarama kaemarantiyema, Poro piya untiye.

⁴² Pigoya, Poroge Panabasige isigeba mono namapisa irosa'ma tumusuguni, wasanamiba to ka sabatira pabi kamana uwaimikibemeka untawe. ⁴³ Pigoya aruyenabisa tumima, uwoma Yuta kinape to marisa kina Yuta kina iyegaranta ka'isa pi mpono kinape, Poroke Panabasike isiyegarauginisi, Koti awagaenabi pasema mikibeka, ige'ma esegima tabe kamana uwaimintase.

⁴⁴ Pigoya to sabati aboraoginiba, pi kumatasa kina igeba Koti kamana abikenaba, a'ya'ma tabera irosantawe. ⁴⁵ Irosauguni, Yuta kina'miba ige abima, igobipa tabera puwaisitama, Poro kamana akayuma karana potantawe. ⁴⁶ Piya pugunisi, Poroge

Panabasige esegi kamanapisa maya uwaimintase: Yuta kina, tigeba Koti kamana maru uwaimiyoma untapa, ma tigeri a'a-o uma miyaba'enamakaba kampa tabiyema, yegana, agoripa aboraika titate to marisa kina'miti wama pi aogi kamana igepe uwaimukuse.⁴⁷ Piya, Wa'ega aeba pika napima maya uramintiye:

Naeba tigeba namu'isa kina'mi e'wasaena amikena uritantoka, i'kena kamana mirite wama, ma tuti uma mima a'ya piyo, Wa'egawama untiye, isigeba piya untase.

⁴⁸ Piya yusuguni, pi to marisa kina igeba abuguna intawamaba asoya pogini, Wa'egawama kamana'wapa aseyo puma i'muntanabisa abima maentawé. Pigoya, igeba miyaba'ena utawaitanta, pabi nkawameta igebe pi kamanapa wasintawé.

⁴⁹ Aibuguna, kana marapa Wa'egawama kamana'amaba abae puma anosaurite wagana puntiye. ⁵⁰ Pi kumatasa kiya kina'mige ka'isa mono abume tabe waya'iyabe, igepe Yuta kina'mi kumpari kamana uma imo atikeba'magini, iyo'maema Poroke Panabasike ma'ena puwaisitama, nama kuma'waipa akunkisigasima isigarubaugunisi wantase. ⁵¹ Wantinisi, isigisarisa i'nipa aiwaka pusuguna tumoginisi: Aguntaenaripa wairitan, otate, Aikoniyamu kumati wantase. ⁵² Wausuguna, a'ya'ma Isuti atokaenta kina ige igupipa i'muntana Aota Awamusá pumaerite wagana puntiye.

14

Aikoniyamu kumata mono untase

¹ Pigoya, Poroje Panabasige isigeba Aikoniyamu kumata uma irosa'ma, pabiyama Yuta kina'mi mpono namapi ima mono yusuguna, au'wa aborantiye. Piya pogini, Yuta kinape Kariki kinape uwoma kina'mi Isu aegarantawé. ² Aibuguni, Yuta kina ka'isa igeba pi mpono kamana a'a-o uma, pabi namu'isa kina imo atikebauguni, aposoro igobi puwaisitanta. ³ Pigoya, isigeba uwoma ntaga pabi kumata mima, Wa'egawama mponowapa karu kampa punta uwaimima mintantase. Piya pusuguna, Wa'egawama kayone kamana'wapa aborawaisimima, esegiyena isimoginisi awame'enabe kasa'enabe toma toma puntase. ⁴ Pigoya, kana pi kumatasa kina'miba pakobuma, ka'isa Yuta kina'miti uma atokaeyuguni, ka'isa kina'miba aposoro yagara tara isigeti uma airokaentawé.

⁵ Pigoya, ainti ka'isa namu'isa kinape, Yuta kinape, kiya kina'wai igeba aposoro ata puwaisitama, yaba kasutasa isiyegukena pugunisi, ⁶ abite isiyegaka pai'ma, Arikioniyama wantase. Pigoya, pita'i Arisitera, Tebi, kuma tara waintusumetibe, to ka'isa isigorasa kumatibe, ⁷ wama pita'i aogi kamana uwaimima mintantase.

Arisitera kumata mono yuga puntase

⁸ Pigoya, Arisitera kumata agisa taraba pu'wanta yagara ka mintantiye. Aeba ano nkantabaiintisa pabiya yagara aboranta, ke nasi nasipa kampa puma uwa awaitami puntiye. ⁹ Pigoya, Poroba mono yogana abima mintogana, aeti agabebé puma, agowa mayaya abintiye: Ma ntagara aeba aogi pikena amatiti'ena waintiyema, napintiye. ¹⁰ Piyama napimagina, obina kamanapisa maya omintiye: Kaeba kagisagapa aema asima turu puma miyo, omintiye. Piya yogana, kana yagara aeba pabigo asima nasi nasi puntiye.

¹¹ Pigoya, a'ya'ma uwoma kina'miba Poro pomentana agate, kega'e uma Arikioniyama kamana'waipisa maya untawé: Amani kina isigeba wasana i maerite, abakatepi aboranta mintase, untawé. ¹² Piya untini, Panabasikaba aeba amani ka, agewapa Susi, ae aukantana puntawé. Piya, Poro aeba tabe kamana'yaga yagaragini, Emisiwe untawé. ¹³ Pigoya, Susi ae mono namapa kana kuma'ama nkawamori waintantiye. Piya, pi mpono nama kiye yagara aeba yogini, pi kumatasa kina'mi nki'muntana isimimagini purumaka kaema muta isitama, agunta pasaisitakena puma, kana aposoro yagara tara puntawé. ¹⁴ Aibugunisi, Panabasibe Porobe isigeba pi abite, tabera pami puma isitasaenaba atutu puntinisi, wasana ipasara puta wama maya untase: ¹⁵ We, ma kina, tigeba nana pewe. Tasigeba tige miyesa puma wasanawé. Tigeba kumpari monopa tikabitate, miyaba Koti aeti una airokaekibeka, aogi kamana'wapa urimuse. Ae mantabe mabe wanipe a'ya'ma tonaronaba maema aborawaetantiye. ¹⁶ Pigoya, ago mirite kananta, pi kanabi namu'isa kina abiwaimogini, igu'ama miyaba kipa toma toma aborama mintantawé. ¹⁷ Pigoya, a'yuguba kampa puritaikana, agowa abiyema, agu kao'ena puritamagina, yegina kabe pape ka awameta aemagina, a'ya'ma nanintaba aboragiri, nama ti'mu puma miyewe, piya untase. ¹⁸ Pigoya, aposoro isigeba e'ero ntaga esegi kamana piya uma, paru puwaitama aka'yuwaitausuguni, taena puma muta isitakena pumepa uwe atantawé.

Poro yaba kasutasa aeguntawé

¹⁹ Pigoya, pita'i mintusuguni, Yuta kina'mi Antiyoki kumatisabe Aikoniyamu kumatisabe irosa'magini, wasana imo atikebauguni, iyo'maema Poro yaba kasutasa aeguntawé.

Aegumagini: Ago puriye, umagini kuma nkawamori paibumaete wantawe. ²⁰ Piya puguna, pita'i waintogini, Isuti atokaenta kina irosa'ma, aeti uma karare puma agaunguna, aogama asima kumati intiye. Pigoya maroganaba, Panabasige Tebi kumati wantase.

²¹ Wama pita'i aogi mono kamana yusuguni, wasanaba uwoma kina'mi abibebe pugunisi, Isu tu ibabuntase. Piya pumaginisi, to kake a'wae puma wama, Arisitera, Aikoniymu, Antiyoki kumati ampa irosa irosa puta puta kanantase. ²² A'ya'ma kumati irosa'ma kamana uwaimusuguni, Isuti atokaenta kina igebe abite esegima imatiti pugunisi, ige'ma Wa'egawama atokaema mikibeka kamana uwaimima maya untase: Taeba ataena puratama, tauki nakiyenama abobori mima, Koti kabiratakena kumati ikena ki uma aogi puratantine, untase. ²³ Pigoya, a'ya'ma kumati monota ai'aru pume kina'mibisa kiya kina'wai ibabuma uwaitama aboramaginisi, naninta a'a-o uma mima nunamu uma akayona puwaitama, imatiti punta mono yugaga Wa'egawamatitantase.

Isigeba a'wae puma to Antiyoki kumati wantase

²⁴ Albumaginisi, Pisiriya maba agaite wama, Pampiriya mara uma irosantase. ²⁵ Pita'i uma irosa'ma, Pega kumata mono uwaimite, Ateriya kumati tumintase. ²⁶ Pita'i tumima, wanipisa karebi ima wama, to Antiyoki kumata uma irosantase. Pi kumatasa monota a'aru pume kina igebe Wa'egawama nkawagaenabi isitama, yoga uwaisitaugunisi agobima purite wantase. ²⁷ Pabigo kanama irosa'ma, monota ai'aru pume kina igega'e uma aki puwaitama, Koti esegi puwaitsitaoginisi yoga pusuguna, to marisa kina'mi mono'ama agupi uma pasinta, pi kamana uwaimiaentase. ²⁸ Pigoya, isigeba pi kumata Isuti atokaenta kina ige abakapi uwoma nttagaba mintantase.

15

Tabe ai'aruyena Yerusaremi kumata aborantiye

¹ Pigoya, Yuta marisa kina ka'isa Antiyoki kumati tumima, Isu mpono abinta kina maya uwaimintawe: Tigeba Mosese kamana uma tipa kampa kasaiginaba, Wa'egawamatiba kanara kampa tibabikiye, untaw. ² Piya yugunisi, Poroge Panabasige ka ibi'ma, tabera maka yusuguni, pi kumatasa mono kina'mi maya untaw: Porobe Panabasibe to ka'isa kina, tigeba aposorobe monota kabiyyume kinape Yerusaremi kumati minta, igeti pi kamana maete wakibewe, piya uma uwaitantaw.

³ Pi kumatasa monota ai'aru pume kina'mi piya uma uwaitauguni wantini, wama Pinisiya, Sameriya ma againtiniba, pita'i Isu mpono abinta kinapa maya uwaimita wantaw: To marisa uwoma kina'mi mono abewe, uwaimuguni, abima tabera i'muntanaba igetiba aborantiye. ⁴ Aibogini, wama Yerusaremi kumata uma irosauguni, monota ai'aru pume kinape aposorobe monota kabiyyume kinape, igepe ibabuma aogi puwaitauguni, igebe Wa'ega esegi puma iyo'maeyogini, to marisa kina'miti mono yuga puguna au'wa aboranti, pi nkawaga kamana uwaimintaw. ⁵ Pi kamana uma a'ya puguni, ka'isa Isu nkaegaranta Parasi kina maya untaw: To marisa kina'miba mono abikena puntiniba, itapa a'aitama, Mosese kamana agoba wasiwaeyiginaba kanarasakiye, untaw.

⁶ Piya yuguni aposorobe monota kabiyyume kinape pi kamana umagina, aogi pukena to aki puntaw. ⁷ Aki pumaginisi, uwoma kamana yuguna, Pita asima maya uwaimintiye: Nao'mitaba, to marisa kina'miti nasima aogi kamana uwaimikenaa, pipa Kotiba tige aruyenabisa nae naba punatantegi, pai agobima uwaimuwagini abima Isu nkaegarantaw. Pipa ago abintaw. ⁸ Pigoya, Koti aeba tagu'ama agabebe puma Yuta kina tae Aota Awamus taminti, pabiyama to marisa kina imima agoba tayakiye. ⁹ Igeba aeka napima imatiti piginaba, igu'amaba wae'wae pekan, tae puratantis puma, pabi nkawameta igepe puwaitantie. ¹⁰ Pika tigeba nanaga Kotipa agasima, tigeba kuntuyenaba aesaema, to marisa Isu nkaegaranta kina'mi ibotapa itakenagaba yewe. Pi kuntuyenaba taebe tayabamabe kampa abaebune. Pipa kampaye. ¹¹ Taeba mayama abune: Aogi pikenaenaba pipa Yuta kina taebe, to marisa kinape, kaga Wa'ega Isu tau'ikena yagara, ae awagaenawaka uma aogi pune, Pita piya untiye.

¹² Pitaba kamana piya uwaimogini, a'ya'ma aki punta kina uwa pasema mintantaw. Mintuguna, Porobe Panabasibe isigeba Koti to marisa kina'miti awame'enabe kasa'enabe isiyakoginisi puntame, pi kamana uwaimintase. ¹³ Pigoya, uwaimima a'ya atausuguna, Yemisiba kamana maya uwaimintiye: Nao'mitaba, kamana yekiri abiyo: ¹⁴ Koti aeba to marisa ige aruyenabisa wasana ibabekini, aewa mpono abikena kina'ena pikena ki to mari aboranti, pi kamana Saimoni yegi abune. ¹⁵ Pigoya, ae kamana'amaba kamana ago kamanapi uma paibuntiye. Poropete ka'waina Wa'egawama yome kamana mayama kaentiye:

¹⁶ Naeba a'wae puma, Tebiti ae nama abararami, pi aoga aogasosima aogi pukuwe, iye.

¹⁷ Piya pekini, wasana igeba Wa'ega naeka kega'e uma naguyosa'magini nabatakibewe, iye.

Pigoya, to marisa kina igeba nage nawaga kamana ukena kina'nentana pikibewe, iye.

¹⁸ Wa'ega naeba kamana piyama uma aboraurite ima mintanto'nana, pipa yuwe, poropete yagara piyama kaentiyema, Yemisi untiye.

¹⁹ Pigoya, Yemisiba poropete kamana napima mayama amato puma uwaimintiye: Taeba to marisa kina Kotiti a'wae puma igu ame kina'mipa, kuntuyenaba kampa imenema yuwe. ²⁰ Igeka kampari kotintana a-mpaemagini, ankagaba ankagabaenaba a'a-o umagini, kobama kampa ima maema pu'wami kinape korape a'a-o umagini, a-ntaiyema esegi puma, pi kamana'anto esa kaema imukunema, uwaimintana, ²¹ to ka maya untiye: Mosese kamana pi iyabamagibe iga'nugibe paitaka'ya agobima, a'ya'ma kumaka kumaka aisurite kanama mintantane. Piya, ibaba pabiyama a'ya'ma sabatirapa mono namapipa aisuma, a'ya'ma kina'miba abewe. Pika pi a'yugu pusanaga tagu'amaba tara taraba a-peno, Yemisi piya untiye.

To marisa kina'mi nkisa kaema ataunguna wantiye

²² Pigoya, uwaimogini aposorobe monota kabiyume kinape a'ya'ma pi monota ai'aru pume kinape, abuguna aogi puma asoya pogini, igevisa tara yagara uwaitsaugunisi, Poroke Panabasike isibabantase. Ka yagarama, agewapa Yutasi, to ka agiwapa Pasabasiwa, Sairasiwa sumaginisi, monota paitakena yagara tara isibagi puma, kaga Antiyoki kumati waiyema, uwaitantawae.

²³ Piya puntini, esa ka maya uma kaema imuguni maete wantawae: Aposorobe monota kabiyompe kinape, taeba taokina to marisa Antiyoki kumatasabe, Siriya marasabe, Sirisiya mari minta kinape, tige ta'mu puritama, ma nkisapa ataritaune. ²⁴ Taeba kampa abintokini, mata'isa ka'isa kina'mi tigeti ima kamana urimima, tigu'ama a'yugu purigasuguri, tigeti atatarata kamana aborantiye. ²⁵ Pigoya, taeba pi abite aki puma, taetisa tara uwaitsaukinisi, tabugai ntagara tara, Panabasike Poroke, isibagi puma iyewe. ²⁶ Pi ntagara tara, Wa'ega Isu Karaisiti aeka uma isi'waisipa kaintase. ²⁷ Pigoya, pi wasana isibabumaraumpe, Yutasige Sairasige isigeba ima isiwamupisa kamana urimisigiri, abiyo. ²⁸ Aota Awamuska taeti waintegi, taeba maya kamana yune: Taeba to ka'isa kuntuyenaba kampa tige tikabapipa atakune. Pintanamana piyo: ²⁹ Tigeba kampari kotintana amikenaenabe, yaga korape, kobama kampa imu maema pu'wami kinape, pi ntanintaga a-ntaiyoma ankagaba ankagabaenaba a'a-o uma kaitegiri, aogima miyijo. Pintana tikabitakibepa, aogima mikibewema, esapa kaema imintawae.

³⁰ Pigoya, pi nkisa isimima isigarubauguni, igeba pi nkisa maete tumima, Antiyoki kumata uma irosa'ma, monota ai'aru pume kina igege'e uma aki puwaitama, kana esapa imintawae. ³¹ Imuguni aisuma abite, paru kamana kaema imume, pika intawamaba asoya puntiye. ³² Pigoya, Yutasige Sairasige isigeba poropete puntase. Piya pumaginisi, uwoma aogi kamana Isu mpono abinta kinapa uwaimima esegi puwaitantase. ³³ Pigoya, igege miyusume kanaba a'ya pogini, pi isiyokina'miba intawama paruyenabisu isitaugunisi, uwaitsaugunisi, wausume kina igezi a'wae puma kanantase. ³⁴ (Sairasiba aewa au-mawampa aega'ma, Antiyoki kumata umintantiye.) ³⁵ Aibusugunisi, Poroge Panabasige isigeba Antiyoki kumata to kake amato puma mima, Isu nkaegaranta ige iyo'maema, mono uma Wa'egawama kamana wasana uwaimima iyakintase.

Poroce Panabasige isigeba pako puntase

³⁶ Pigoya, aintiba Poroba Panabas Maya omintiye: Tasigeba mono kayokaya'enara wama yuwagini, a'ya'ma kumatisa tasiyokina aboranta, igeba ayamabaya miyewe. Pika wama abukuse, untiye. ³⁷ Piya ute, Panabasiba Yoni Maka aege kaga wakenaga untiye.

³⁸ Pigoya, Maka aeba paipa isigeye wama Pampiriya mari kasa yugari uma irosa'ma, isitate a'wae puma kanantika, Poro aeba piya yagaraga aboganaba kampa aogi puntiye.

³⁹ Piya pumaginisi, isimawamaba tabera tara tara puma pako puntase. Pako puma, Panabasiba Maka ababoginisi wama wanipisa karebi ima, Saiparasi mari wantase.

⁴⁰ Pigoya, Poro aeba ao'maeyanta kina'wapa Sairasi ababogini, pi Isu mpono abinta kina'miba: Waisiginaba, Wa'egawama kabirisitakiye, uma uwaitsaugunisi wantase.

⁴¹ Wamaginisi, Siriya mabe Siriya mabe againtinisiba, monota ai'aru pume kina iyo'maema esegi puwaitata wantase.

16

Poro aeba to ka mono Yugara wama puntiye

¹ Pigoya, Poroba Sairasi ababute wama, Tebi kumati wamaginisi, Arisitera kumata uma irosantase. Pigoya, Arisitera kuma pitapa Isuti atokaenta yagara ka uma abatantase.

Agewapa Timoti, aeba anowampaba Isu nkaegaranta Yuta wae, piya abawampa Kariki agararawe.² Piya, Arisitera'isa kinape, Aikoniyanu kumatisa kinape, pi Isu nkaegaranta kina igeba Timoti ae agoba aseyo puma, Poro omintawewe.³ Omuguna, Poro aeba aekaba abogana, aege kaga wanema, omintiye. Pigoya, pi mpariba Yuta kina mirite wanta, igeba kana yagarama nkabawampaba Kariki yagarakini abiwaentaka, pika Poroba igeka napima, kana yagarama nkau kasama, Wa'egawamatisa ara'enaba potantiye.⁴ Pigoya, kumaka kumaka nasi nasi puma, aposorobe monota kabiyume kina'nibe, Yerusaremi kumata tonkiya kamana uma atantapa, monota ai'aru pume kina wasiyoma, uwaimite wantase.⁵ Piyama yoga puguna, monota ai'aru pume kina'mi imatit'enaba aborama esegi pigini, a'ya'ma yagaba to ka'isa kina abima igege atokaentawewe.

Poro aeba Masetoniya yagara agantiye

⁶ Pigoya, Pirisiya mabe Karesiya mabe agaite, Esiya manto abeti wama mono kamana ukena yuguna, Aota Awamus'aama pi ki'i a-nkwayioma, akunkaitantiye.⁷ Aibogini, wama Misija ma awamori uma irosa'ma, ka auka'i aigigi pa'ma, Pitiniyi mari wakena yuguna, Isu Nkawamus'aamaba pabiyama kampa owe uwaitantiye.⁸ Piya pogini, Misija maba agaite wama, kayo wani nkawamori Torowasi kumata uma irosantawewe.⁹ Pita'i uma irosa'ma, Poro asek'a amonta mayaena agantiye: Masetoniya yagara ka'waina aeti aborama mima, agisuma maya omintiye: Kaebe Masetoniya mari ima tao'maeyo, omintiye.¹⁰ Pigoya, Poro pintana agaogapa, aege aokin'a'mitabe maya untune: Koti aeba: Masetoniya mari wama aogi mono kamana uwaimiyoma uramiye, untune. Piya ute, pabigo wakena aseyo puntune.

Tete kai pome wae Aritiya Isu kamana aegarantiye

¹¹ Pigoya, aseyo puma wanipisa karebi ima, Torowasi kumapa atate agasi agasima wama, Samotaresi uma irosantune. Pigoya marogapa, pitasa wama Niyaporosi kumata uma irosantune.¹² Pigoya, pitasa wanipisa karebisa tumima, wama Piripai kumata uma irosantune. Pipa Masetoniya mari tabe kuma ka, Aroma kina'mi kuma agona puma mintantawewe. Pi kumata ka'isa yagaba mintuwakana,¹³ sabati aboraoga maya umagi, pi kuma nkagora waniti tumintune: Kuma nkawamori waniti tumima, Yuta kina'mi nunamu ye kuma ka waintika, tumpa agakune, untune. Piya ute, tumima waya aki puma mintugu, tumpa ibatama, mara'mima kamana uwaimintune.¹⁴ Pigoya, ige aruyenabisa to marisa wae ka'waina, aeba Kotitisa aogi kamana abima mintantiye. Agewapa Aritiya, ae yuga aogi tete kai pome wae, Tiyatira kumatasa, pi kana wae Wa'egawama agu aumawamaba aseyo pogana, Poro kamana yoganaba aogima abintiye.¹⁵ Pigoya, aewape aokinape mono wani pasintini, maya uramintiye: Tigeba nagantaga Wa'ega ae tuntana poka, nae namapi kanama miyyiyo, ute, tonkiya poga, awamu wasima intune.

Poroke Sairasike iga'na namapi isiba puwaisitantawewe

¹⁶ Pigoya, maroga nunamu ukena kumati tumuwakana, kayokaya araga ka'waina tabantantiye. Kana araga aeba kegina wantaga mima, kakanta'enaba uma abora putamagina, aeba igevisa ikantana uwoma maemagina, kabitaome kina'mipa imibutaye.¹⁷ Pi ae tabatama, Porope taepe taega'magina, kega'e maya untiye: Ma kinapa Koti ima minti tabe yagara, ae kayokaya kina mima, tau'ikena ki'amaka urimima tiyakiywé, untiye.¹⁸ Piya kega'e asi nasima uyaba'miyogana, Poro aeba pika aekita puma, kana kegina a'wae puma maya omintiye: Naeba Isu Karaisiti ae awamuta ugamekana, aragawae'ma nkantabisa irosa'ma wao, yogana, pabigo irosa'ma wagaintiye.

¹⁹ Aibogini, kana aragawae'ma kabitaome kina'miba mone kuta aborama, imomentana pabigo kampa to kake aboraogini agate, Poroke Sairasike ka isibi'ma, isibabute kuma akanti kiya kina'mi nkau'i isibabute wama,²⁰ kiya yagaramiti uma kamana uwaisitama, maya untawewe: Isigeba Yuta yagara taramisi, ma kumateti kanama ataena puratase.²¹ Piya pumaginisi, awame'naba kasa'ena pese. Aroma kina'mitaba a'yugu pompentana, a'yugu maema miyompentana, piya ampa aborase, untawewe.²² Pigoya, uwoma kina mintume kina'miba igobipa tabera puwaisitama isiyegukena puguna, kiya yagara aeba kaiwaisipa atisa puwaisigasima, yogini eru kasutasa isiyeguntawewe.²³ Eru kasutasa tabera isiyegumugasima, iga'na namapi isibabuwaitsitama, kiya yagara aepa: Kabeba esegima kigasima pasema kabiwaitsitanema, omintawewe.²⁴ Omuguna, iga'na namapa abakapisa marupi isitama, isigisaba ya atuta kirokae isitama, isitaoginisi waintase.

²⁵ Pigoya, asek'a nkabubu Poroge Sairasige isigeba ini nunamu uma Koti isi'mu potantase. Piya pusuguni, iga'na namapiswa ka'isa kina'miba isiwanusa aga abintawewe.

²⁶ Piya pusuguna, pabigo imimapa tabera pogana, kana iga'na namankamaba kurukuru pogana, a'ya'ma kabeba a'waiwaogana, a'ya'ma kina'mi nkigisa iyapisa iga'naba iyoba wantiye.²⁷ Piya pogana, iga'na nama kiye yagara aeba awaibintisa pam'i puma asima,

kabeba a'waiwaentogana agama: Iga'na kina ago pai'ma wawaegasawe, ute, yoginka abamu kantabintisa a'yubuma, aewa au'wa aerisakena puntiye.²⁸ Piya pikena pogana, Poro tabera maya kega'e uma untiye: Kaukapa a-nkaguya aiyo. Taeba a'ya'ma uwa kanara mintune, untiye.²⁹ Piya yuguna, kana kiya yagara aeba ao'mika eka yogini, igi'ma amuguna, nama nkantabaipinti karu'ena wama aekuru puma, tabaraba purite ima, Poroke Sairasike isigisabi asu parokaentiye.³⁰ Aibuntana, nama nkantabaipintisa isibabute tumima isibigama maya untiye: Tabe yagara tarane, nau'ikenaga ayama aogi puma misuwema, isibigaognisi,³¹ isigeba maya omintase: Wa'ega Isuka kamati puma aegarakibemppe aogi pugatakini, kao'miba pabiyamagini aogima mpikibewe, untase.³² Piya ute, aepe aokinape Wa'egawama mpono kamana uwaimintase.³³ Uwaimusuguna, kana kiya yagara aeba pabi aseka isibabuma, eru kasutasa isiyegunta'enaba wani pai'ma aeyoba isigasimagina, yoginisi ae'wape aokinape mono wani pai'itantase.³⁴ Piya pusuguna, ae'wa ntamapi isibabuwaitsama yogini, kao'ena puma isimintawe. Pigoya aewape aokina'miba Koti ae tuntana pumeka, intawamaba aogi puntiye.

Poroge Sairasige irosa'wantase

³⁵ Pigoya maroginiba, kamana umarisakena kina'mi igeba irebu kinapa ka'isa uwait-auguni, wama iga'na namatasa kiye yagara maya omintawe: Kaeba tara yagarara uwaisitaganini waiso, yuguna,³⁶ pi kana kiya yagarama Poro maya omintiye: Naeka uwaisitaganini waisoma, kiya yagarama kamana atagina kanaya, pika tisigeba kanara wama umiyiso, yogana,³⁷ Poro irebu kinapa maya uwaimintiye: Igeba agoresipa kampa abinta wasana aruyenabi tasiyeguma, tasu airisa purasitama, iga'na namapi tasibabur-asitawe. Tasigeba Aroma yagara tara mintuse. Pabiyama tasigepa kampa kotiyena purasitanta, tasiyeguma uwa ataeña purasitawe. Pigoya mapa nanaga waisomaba, kakamaba urasitawe. Pipa kampaye. Igewai kanama ampa tasibabigiraba wakuse, untiye.

³⁸ Poro kamana piya yogana, irebu kina'mi a'wae puma wama, kiya yagarape to tabe kinape uwaimuguni igeba kana yagara tara isigeba Aroma aruyenabi aborantame, pi kamana abite iyekuru puntawe.³⁹ Iyekuru pumagini, kana yagara taramisiti kanama intara kamana uwaisitama, iga'na namapisa isibabute tumima, kuma'waipa atate waisema, uwaisimintawe.⁴⁰ Piya pugunisi, isigeba iga'na namapisa irosa'ma tumima, Aritiya ntamati wama, Isu mpono abume kinapa igama i'hana kamana uwaimite wantase.

17

Tesaronaika kina'mi isiyegukena puntawe

¹ Pigoya, Poroge Sairasige isigeba Ampiporisi kumape Aporoniya kumape isigaite, Tesaronaika kumata uma irosantase. Pita'i Yuta kina'mi mpono nama ka waintantiye.² Pigoya, Poro aeba pubomesa puma kakaga sabatirapa mono namankaipi ima, igege paisa mono isapisa kamana uma abintawe.³ Piya puntana, mono kamana awa'ena ka'isa pi'n'a agowapa aborama uwaimintava, maya untiye: Koti nkutararatanta yagara auki naki pumagina, pu'wantitisas asikiyema, mono kamanapi untane. Pigoya, Isu age awaga kamana urimuwe. Aeba taga Karaisitiwe, untiye.⁴ Pigoya, ka'isa kina'miba pi kamana abibebe pumagini, Poroke Sairasikeri uma atokaentawe. Pigoya, Kariki kina igeba Kotika iyekuru puma aegaraume kina'miba uwoma igeti uma amato puntawe. Pigoya, tabe kina'mi ige waya'i'yabe a'ya'ma ka'isaba kaga abintawe.

⁵ Pigoya, wasana uwoma kina'mi mono abuguni, Yuta kina igeba abima intawamapa ikimagini, ka'isa kama kina uwaitauguni, igeba a'ya'ma wabe wayape imo kamana yuguni, pi kumatasa kina'mi agasya puguni, isiguyosa'ma, Yasoni ntamapinti karu'ena ima Poroke Sairasike isiguyosantawe. Aibuntini, kana yagarara isibabuma wasana iyobi isitakena untawe.⁶ Pigoya, isiguyosa'ma Yasonibe Isu mpono abinta kina ka'isabe ibabute, kuma kiye kina'miti ibabute wantawe. Piya puntini, maya uta wantawe: Maga maga kina igu'ama maema kamparaga puwaitata kanama taeke ata puratakena ampintawe.⁷ Aibegana, Yasoniba ibabuma aogi puwaitaye. Piya, igeba wasana wa'ega yagararempa Sisa kamana'wa maema a'yugu potama, aogaso wa'ega Isu ae awaga kamana yegana, anosama abae piye, untawe.⁸ Kamana piya umagini, kana kumatasa kinape kiya kinape imo atikebauguni,⁹ pi kiya kina igeba Yasonibe aokinape uwaitauguni, i ikantanaba mone imuguni, uwa itauguni wantawe.

Poroge Sairasige Periya kumata yoga puntase

¹⁰ Pigoya, Isu mpono abinta kina'miba Poroke Sairasikeba aseka uwaisitaugunisi, Periya kumati wantase. Pita'i uma irosa'ma, Yuta kina'mi mpono namapi ima mono untase.¹¹ Pigoya, pi kumatasa Yuta kina igeba paru kinane. Tesaronaika kumatasa

kina ige kanta kinapa kampaye. Pika monopa igu aseyo puma abintawe. Piya puntini, kamana'waisi nkagowa abibebe pikenaba asi nasima iyekita kampa punta, mono esapa aisuma abintawe.¹² Pigoya, igitisa uwoma kina'mi Isu aegarantawe. Piya, Kariki kiye kina'mi nkwayape to ka'isa kinake igiteti uma amato puntawe.¹³ Pigoya, Poro mono uwaimogini abuguna, pi awaga kamana'ama Tesaronaika kumati waogini, pika Yuta kina'mi abintawe. Abite, Periya kumati kanama kuma ago kina'mi imo atikeba'ma, igu'ama maema a'yugu puwaigaintawe.¹⁴ Piya puguni, Isu mpono abinta kina igeba Poro otauguna, pi kumapa atate wama kayo wanita uma irosantiye. Sairasige Timotigeba isigeba pabita mintantase.¹⁵ Pigoya, Poropa wasanami igeba mabi ababute wama, Atenisi kumata metauguna maya uwaimintiye: Tigeba a'wae puma wama ima yiginisi, Sairasige Timotigeba karu'ena kanaiso, uwaisimiyo, yogini igeba wama uma uwaisitantawe.

Poro Atenisi kumata kamana uwaimintiye

¹⁶ Pigoya, Poroba Atenisi kumata isigeka isiwaga puma mintana, kumpari kotiba tabera wairite waogana, agama agu'amaba tabera yaku tantiye.¹⁷ Pigoya Yuta kina'mi mpono namapi ima, Yuta kina igewaippe Kariki kina ka'isa Yuta kina iyega'ma mintanta kina igege kaga mono kamana uma abintawe. Pigoya, asi nasi kumati wasana ibatamaba, pabiyama mono uwaimintiye.¹⁸ Pigoya, pi kumatasa mono kina igewaippe Epikuriyani kinape Sitowiki kinape, pi kina'mi ige Poroge maka untawe. Aibuntini, ka'isa kina'miba Poroka: Ma kamana yagara aeba nana kamanapaya uramiye, untawe. Pigoya, to ka'isa kina'miba: Aeba aoso amani'ama awaga kamana uramiye, untawe. Pigoya, Poro aeba Isu awaga aogi kamanape purintapisa asikena pi kamanape yoginiba piya untawe.¹⁹ Piya umagini, maba ka agewapa Ariyopagasi, pita'i ababute ima, maya untawe: Kaeba aoso kamana yempepa, pipa nanawe yene.²⁰ Pipa aoso kamana abune. Pika agowa yega abeno, untawe.²¹ Pigoya, a'ya'ma Atenisi kumatasina kinape to marisa a'yo ampintume kinape, igeba asi nasi kasa kamana abite, pabi kamana mare-u me-u puntawe.

²² Pigoya, Poroba aeba Ariyopagasi kanisore kina'mi nkiyobi asima mima, wasana maya uwaimintiye: Atenisi kumatasa kina, naeba agoripa mayama agauwe. Tigeba asi nasi amani'amaka napi napi puma miyewe.²³ Piya, naeba wa'eriti nasi nasi puma amani'enaripa agakena nasimagi, ima ka aratara pi awa'ena mayama waintegi aisuve: Mapa kampa agantompe kasa wa'ega, ae'enawe, aisuve. Pigoya, kana kasa wa'egaba kampagiri abinta, aeti mono'ena pota, ae ago urimekiri abiyo.

²⁴ Koti ma aboratama pi'n'a abobori a'ya'waemaena toma tomantana atawaentiye. Pi ae mantawamate mawamate agoba mintiye. Pigoya, aeba wasana ayapisa kimaranta namapipa kampa miyabapa miye.²⁵ Piya, ka'enaga aguyosagagina wasanama aborama amikenaenaba kampa waintiye. Pipa kampaye. Aewa maga maga kina tae mikenaenabe taumabe a'ya'waemaenabe tamiwaeye.²⁶ Pigoya, wasana aipa ka'anto aboratama yogana, aepisa a'ya'ma marisa kinapa aboraurite wagana puntawe. Pigoya, aborama mirite wakubompeka, kanape ape aima aewa uratantiye.²⁷ Pigoya, pi tagutasa aguyosagate wama, aewa uma abatakubompeka napima, Wa'ega Koti piya puntiye. Pigoya, aeba pagasa'iba kampaye. Abakatepi wasana ai'niratama miye.²⁸ Piya pegi: Taeba miyemintanama nkai'niratatagi mima a'ya'maenaba pune. Tigeisa abinta kina ka'isamiba pabiyama: Taeba Wa'egawamapisa aborantompene, untawe.²⁹ Pigoya, wasana taeba Koti ntagara mintunemaba, a'yugu napima, korirasabe siribarasabe yabatasabe, Koti amankapa pumagini aogi awa'ena pewe. Pika Kotitisa aborantompene taeba Kotika abekanaba, pi nkawametapa a-peno.³⁰ Paipa abikenaenaba kampa abima mirite waugunaba, Koti tigama, ataba kampa puritanti, pi kanaba ago a'ya puwantyiye. Pigoya ibaba a'ya'ma maga maga kina tigu a'wae piyomagina, urataye.³¹ Pigoya, kana ka atantegina waintiye. Pi ntugaba maga maga kina agorepa maema aborama, tagu antotapa ka awameta tamikiye. Pigoya, wasana ka'waina pi ntuga penema, purintapisa abage puma, Wa'ega asitama, agowapa purayakintiye, Poro piya uwaimintiye.

³² Pigoya, Poro aeba purintapisa asikena kamana yogini, ka'isa kina'miba uma ata potauguni, piya to ka'isamiba: Pi kamanapa to ka yagaba yega abeno, untawe.³³ Piya yuguna, Poroba itate wantiye.³⁴ Pigoya, tarantomi Poroti uma atokaema Isu aegarantawe. Igetisa ka Ariyopagasi kanisore yagara, agewapa Taiyonisiyasi, piya waya ka agewapa Tamarisibe, to ka'isabe kagane.

18

Poro aeba Korinti kumata mono yuga puntiye

¹ Pigoya, Poro aeba Atenisi kumapa atate, Korinti kumati wantiye. ² Pita'i Yuta yagara ka abatantiye. Agewapa Akura, aeba Pontasi mari aboranti, pigoya waya'wapa Pirisira,

aege Itariya mari mintusuguna, wasana wa'ega yagara Korotiyasiba, Yuta kina Aroma kuma akunkitama igarubantiye. Pigoya, isigeba pi kumapa atate, aoso Korinti kumata wama mintusuguna, pita'i Poroba isige uma isibatantiye.³ Pigoya, Poro aeba seri nama pome ntagaragana, Akura aeba pabiyama pabi ntuga pomeka, namankapi mama ao'maeyoginisi kaga puntase.⁴ Pigoya, Poroba a'ya'ma sabatirapa Yuta kina'mi mpono namapi ima, Yuta kinape mono uwaimima, aegarakena kamana uwaimintiye.

⁵ Pigoya, Sairasige Timotigeba isigeba Masetoniya marisaba a'wae puma kanausuguna, Poroba mono yugaba esegima puntiye. Piya puntana, Isu aeba taga utaratanta yagara, pi agoba Yuta kina aborama uwaimintiye.⁶ Piya uwaimogini, igeba kamana'wapa uma kamparaga puma, aeka ata potauguna kaiwatisa i'nipa asari pogana tumogana, Yuta kinapa maya uwaimintiye: Ataena pikibe, pi kaintanaba nae'enaba kampaye. Tige'enaenawe. Pika mampa nakabiritate to marisa kina'miti yoga pukuwe, untiye.⁷ Piya ute, ka yagara agewapa Titiyasi Yasisi, aeba Kariki yagarama Koti mpono aega'ma mintanti, ae namapi ima mintantkiye. Kana yagarama ntamapa Yuta kina'mi mpono namankama agora waintantiye.⁸ Pigoya, pi Yuta kina'mi mpono nama kiye yagara, agewapa Karisipasi, aeba aokinape igeba mono abima Wa'ega aegarantaw. Aibuguni, Korinti kina getisa uwoma kina'mi mono abima mono wani pasintawe.

⁹ Pigoya, ka aseka Wa'egawama aboramima Poro maya omintiye: Kaeba karuba a-puntana, monopa umaba a-kaso.¹⁰ Piya, ma kumatapa nae naokinapa uwoma kina mintaka, uma miyo. Naeba kaege kaga miyokini, wasanamiba ataanaba kampa pugatama kampa kaegukibewe, piya untiye.¹¹ Piya uma omogana, Poro aeba Korinti kumata Koti kamana uwaimima mintogana, opa tonagisarisa kakaga umaema a'ya puntiye.

¹² Pigoya, ainti Kariyo aeba Akaiya mari tabe kiye yagara puma mintogini, Yuta kina igeba kaga asima Poro kama potamagini, ababute pi kiya yagaramati wama kamana otantawe.¹³ Ababute wama kampari uma maya untawe: Ma ntagara aeba a'ya'ma wa waya imiyo kamana uma, Kotitisa kasa mono wasiyoma uwaigasima miyema, kampari otantawe. Piya yuguna,¹⁴ Poroba kamana ukena pogana, Kariyoba akayotama, Yuta kina maya uwaimintiye: We, Yuta kina, ma ntagara aeba kaintana kunta'ena aboramisibi, kamanatipa abosine.¹⁵ Pigoya, tigeba uwa kamanatitake kamana agoritake monotitakeraka uma otawe. Pika tigeri kamana'wapa uma a'ya ataiyo. Pipa nae yugaba kampaye, untiye.¹⁶ Piya uma otanti ntamatasa igarubaogini,¹⁷ wasana igeba to ka Yuta kina'mi nkini namatasu kiye yagarawai, agewapa Sositenis, aepa araku'ma kiya yagarama ntama kabe awara tabera aeguma, ataena potantawe. Piya puguna, kiya yagaraba igama uwasuwa puwaitantiye.

Poro a'wae puma Siriya Antiyoki kumati wantiye

¹⁸ Pigoya, Poro aeba Korinti kumata mimagina, ainti a'wae puma wakena puntanaba, mono abinta kina igecka: Aogima miyivo, uwaitate, wanipisa karebi ima, iyoginisi Pirisirabe Akurabe isigeba aega'ma kaga wantawe. Pigoya, Poro aeba Koti nkaobi uma esegi potama, Senkeriya kumata uma irosa'ma mama, a'nopu agabu pukaintiye.¹⁹ Pigoya, igeba Siriya mari wakenaraka wanipisa karebi ima, pitasa kaga wama Epesasi kumata uma irosa'ma, aokina tara isitategina, Poroba Yuta kina'mi mpono namapi ima, Yuta kina'mige mono kamana uma abintawe.²⁰ Pigoya, Yuta kina'miba: Taege mikune, uma arakurikena yuguna, maya uwaimintiye:²¹ A'a, kampaya, Koti abi namekapa to kake tigeti a'wae puma kanakuwe, uwaitate, igecka: Aogima miyivo, uwaitate, Epesasi kumati wanipisa karebi to kake ima wama,²² Sisariya kumata uma irosantiye. Pitasa wanipisa karebintisa tumima, Yerusaremi kumati ima, monota ai'aru pume kina'mi: Aogima miyivo, uwaimite, Antiyoki kumati to kake a'wae puma wantiye.

Poro to yugara waogana kakaga agobintiye

²³ Pigoya, Poro aeba Antiyoki kumata uwaenanto migate, mono kayokaya'enara to kake wantiye. Piya puma, Karesiya, Pirisiya maba isigaite to kumati to kumati wantana, Isu nkaegaranta kina kamana uwaimima esegi puwaitantiye.

²⁴ Piya pogana, Epesasi kumati Yuta yagara ka irosantiye. Agewapa Aporo, aeba Aresanteriya kumata aboranti, pi kana yagaraba tabe abikenaena wantaga, paisa mono isapi aismuna abibebe puwaentiye.²⁵ Piya pogini, Wa'egawama ominta monopa aogima abintiye. Pigoya, to ka'isa kina'mi Yoni mono wani pai'tanti awaga kamanape, Isu nkagawaga kamanape, omuguna abimagina, Isu nkagogoba kampa napintiye. Pigoya, pi ntagara Karaisiti aborakibi kamanape esegima aogima uwaimintana, aborantiemaba kampa napintiye.²⁶ Pigoya, ka yagara Yuta kina'mi ige mono namapi ima pabiyama monopa kampa aekuru punta, agowapa aogima untiye. Pita'i pi mpono yoginisi, Akurage Pirisira isigeba abite kayone puma agoya potamaginisi, Koti nkagoba aogi uma arupu

pomintase. ²⁷ Piya pusuguna, Akaiya mari wakena pomepa, Isu nkaegaranta kina igeba ae napiyenawapa esegi potamagini, marota'isa Isu nkaegaranta kina ige'ena esa mayama kaentawe: Ma ntagara aeba tigeti wakiripa, kayone potaiyoma, kaentawe. Esa piyama kaema amuguna, wama Korinti kumata uma irosa'ma, Koti kayonena puwaitantemi mono kinapa mono yugarapa tabera iyo'maentiye. ²⁸ Pigoya, paisa mono kamana awa'ena agowapa ku'magina: Isu aeba taga utaratanta yagara Karaisitiwema, pi agowapa wasana iyobi uma aborama uwaimima, Yuta kina'mi kamanapa maema a'wa puma maba atantiye.

19

Poroba Epesasi kumata yoga puntiye

¹ Pigoya, Aporo aeba Korinti kumata mono yuga piyama puma mintogana, Poro aeba ka'isa mari ainkima nasi nasi puta, Epesasi kumata uma irosa'ma Isu nkaegaranta kina ka'isa uma ibatama, ² ibigama maya untiye: Tigeba mono abima, Aota Awamusma maentabe ayabayawe, yogini, igeba maya untawewe: Kampaye. Aota Awamusma minti, pi awaga kamana'wapa kampa abintune, untawewe. ³ Piya yuguna, to kake ibigantiye: Tigeba ke nkagera mono wanipa pasintopene, untawewe. ⁴ Piya yuguna Poroba maya uwaimintiye: Yoni aeba wasanami ige igu a'wae pikibeka wani pa'ilitama maya uwaimintiye: Naka'i kanama miyemi'na, aeka abima napima aegaraiyo, untiye. Pi kamana Isuka untiye, Poro piya untiye. ⁵ Piya yogini, wasanamiba kana kamana abite, mono wanika yuguna, Wa'ega Isu nkagera pa'ilitantawewe. ⁶ Wani pasuguna, Poroba i'nota ayapa ataogana, Aota Awamusma'ama igegeti tumpima, intebu a'wae pugasogini to kamana to kamana uma poropete kina'mi usuma agowapa untawewe. ⁷ Pigoya pi kana wabe wayape a'ya'ma nagisarisa tara tumpaema puntawewe.

⁸ Pigoya, Poro aeba Yuta kina'mi mpono namapi asi nasi imagina, monopa karu kampa punta, opa kakaga mima uwaimima mintantiye. Piya puntana, Koti kabiratakena kamana'ama nkagoba uma aborawaimintiye. ⁹ Piya pogini, ka'isa kina'miba igu'ama esegi pumagini, Isu mpono ikabitama, monota akiyenabi kasa mono kika uma ata puguna, Poroba uwa itantiye. Piya pumagina, Isu nkaegaranta kina ibabuma aki puwaitama, asi nasima ka yagara Tiranasae ae awa'ena namapi mono uwaimima iyakima mintantiye. ¹⁰ Piya puma, kaboba tara mima pogini, ainkima Esiya mari Yuta kinape Kariki kinape mintume kina igeba a'ya'ma Wa'egawama mpono awaga kamanapa abiwaentawe.

Siwa ae yakaraki'numpi kamanane

¹¹ Piya puguna, Kotiba Poropa esegi potaogana, awame'enaba agasiya toma tomantana ayapisa puntiye. ¹² Pigoya pi ka wasanamiba Poronta autasaenaba maeritegini wama, yonintana ibome kina'mi ita u'ma aukaya puguni, yonintanawaipa itawaogini kaba'ma aogi puguna, intabaipintisa ke kina'miba irosa'ma iyegaka wantawewe.

¹³ Pigoya, Yuta kina tonarona tusa kina a'ya'ma maba ainkima nasi nasi pumagini, ka'isa Wa'ega Isu nkagera atama ke kinaka maya uwaimintawewe: Isu nkage awaga kamana Poro yemi, ae awamuta esegima ugamekana atate wao, untawewe. ¹⁴ Pigoya, tabe mono kiye yagarama ntagara ka, agewapa Siwa, ae yakaraki'nu tonantenta tara umaem kina'mi piya puntawewe. ¹⁵ Piya puguna, ka kewama kamana mayama a'wae puwaimintiye: Isupa abibebe puntawewe. Piya, Poro nkageba abintuwewe. Tigeba aetasa kinatawe, untiye. ¹⁶ Kewama piya umagina, kana yagara aisepaogana esegi puma, kana yakaraki'nu iyeguma kaiwaipa aerutu puwaigasima kora kasu tyeguyogini, ika namapintisa irosa'ma iyegaka wagaintawewe. ¹⁷ Piya pogini, ainti Epesasi kumata mintanta kina, Yuta kina'mibe Kariki kina'mibe abite tabera iyekuru pumagini, Wa'ega Isu nkagege'a eba asaga'yuntawewe. ¹⁸ Pigoya, Isu nkaegaranta kina uwoma kina irosa'magipi, pai ataena punta pi kamana intawawa aseyonabisa uma aborawentawewe. ¹⁹ Pigoya, uwoma kina'mi kiyo'ena asebena puma esa u'ma miyume, pi isapa maete kanama wasanami nkiyobi ampa yaku kaentawewe. Piya isa'ama nkikantanawapa maema aki puntasinta, 50,000 tora puntesine. ²⁰ Pigoya, wasanamiba piya puguna, Wa'egawama mpono'amaba aborama anosaurite wagana puma esegi puntiye.

Epesasi kumata amani waetaka maka untawewe

²¹ Pigoya, Poro aeba piyama yoga puma a'ya ataogana, Awamusma otaogana Masetoniya mabe Akaiya mabe agaite, Yerusaremi kumati wakenaga untiye. Piya puntana maya untiye: Naeba Yerusaremi kumata uma irosa'magipa, to kake kanama wama Aroma kumata uma irosakuwe, untiye. ²² Pigoya, wakena puntanaba, abagi yagara tara Timotike

Irasitasike uwaisitaoginisi, Masetoniya mari paitama wantase. Piya pusuguna, aewapa Esiya mara to kake amato puma uwaenanto mintantiye.

²³ Pigoya, pi ntagaba Epesasi kumatapa mono'ama kama potama, kasa mono ki akuntawewe. ²⁴ Monerase konariyena pome ntagara ka mintantiye. Agewapa Timiteriyasi, aeba Atemisi amani wae'wampa amankapa aogiyena uwaenantontoba siribarasa puma ataogini, wasanamiba monerasa ika puguna, aewape aokina'mipe moneba uwoma aborawaimogini, a'ya wakiyemagini kama potentawewe. ²⁵ Pigoya, Timiteriyasi aeba aokina ige'a' uma aki puwaitama maya uwaimintiye: Nao'mitaba, tigeba yogarepa pi'na moneba aborama tamemi, pipa abintawewe. ²⁶ Pigoya, ka yagara kanama ampintiye. Poro ae, tigeba ae agoba agama abewe. Aeba Epesasi kumatasabe Esiya marisa ka'isa kinapa tabera igu'amapa maema a'yugu puwaigasima maya uwaimiye: Wasana iyapisa pumaranta koti pipa kumpari'en, au'wa kampa wainta'enawe, uma uwaimiye. ²⁷ Aeba piya pekana, yogarempaba au'wapa kampa waikiye. Tabé kotire Atemisi ae wa'eba kasipama ataena pikkiye. Piya, Atemisi ae'wa nkage awaga kamana'wapa tumima ataena pikkiye. Piya pekini, Esiya marisabe to ka'isa marisa kina'mibe a'ya'ma ae kamana abima aegaraompe'na, age awaga kamanapa a'ya'ma kaka wakiye, piya untiye.

²⁸ Pigoya, Timiteriyasi aeba aokina piya uwaimogini abite, igupipa igobintanamaba awaitaogini, kega'e uma maya untawewe: Epesasi kumatasa Atemisi aeba amani tabewe, piya untawewe. ²⁹ Piya umagini, kana kumapipa tabe kiga'e umagini, tabe kamana a'ya'ma kina'mi untawewe. Piya ute, a'ya'ma asima wama akiyena pubume kumati uma aki pikena wantini, igeba Kaiyasike Arisitakasikeba kaga isiraku'ma isibabute wantawewe. Kana yagara taraba Masetoniya yagararaginisi, Poro aega'ma kaga nasi nasi puntawewe. ³⁰ Pigoya, Poroba abite kana wasana aki pumeti wakena pogini, Isuti atokaenta kina'mi akayotantawewe. ³¹ Piya, ka'isa Esiya marisa kamani kina Poro aokina'miba, Poroti kamana atauguna waogini, uma esegi puma kampa wasana aruyenabipa wanema akunkatantawewe.

³² Pi kana kina'mipa napi napiyenawaipa a'yugu puwaogini, ka'isamiba ka kamana uma kega'e yuguna, to ka'isa kina'miba to kamana uma kega'e untawewe. Piya yuguni, uwaena kina'miba kana aki pume kamana'ama agowapa kampa aogima abintawewe. ³³ Kana wasanamiba piya puguni, Yuta kina'miba Arekisanta abubasanauguna, kana kina'mi abakapi wantiye. Aibogini, ka'isa kina'miba kamana agoba omuguna, Arekisanta aeba aya tugupa puwaitama, kamana antotopa wa waya a'ya'ma uwaimikena puntiye. ³⁴ Pigoya, wasanamiba kamana abima, aepa Yuta yagara agabebé pumagini, a'ya'ma kega'e umagini, maya untawewe: Atemisi aeba Epesasi kumatasasa wa'ega tabewe, piya uma e'erotu tu awa kega'e untawewe.

³⁵ Piya yuguna, pi kumatasa kusikusi yagara aeba kamana'waipa uma paru puma, kayone puwaitama maya uwaimintiye: Ma kumatasa Epesasi kina, tigeba ago abintawewe. Ma kumapa tae wa'ega Atemisi ae ago kumane. Piya, akuninta yabapa mantarisatupuma mata'i tumintine. ³⁶ Pigoya, wasanama kana kamanapa kampa akayukiye. Pika tigeba uwa paka puma, a'yuguyenaba a-piyo. ³⁷ Tigeba tara yagarara isibabute kanantapa, pipa isigeba mono namapisa ka'ena maema a'yugu puma kuntana pikena kampa kanantase. Piya, wa'ega waete Atemisi, ae akayasotakenaba kampaye. ³⁸ Pigoya, Timiteriyasibe yoga kina'wampibe kaga ka yagaramage kamana'wai waintakiniba, kamana ukena yaga aborakini, kiya kina mintati igitet uma yiyo. ³⁹ Tigeba ka'isa kamanati waintakiripa, kiya kina'mi akiyenabi maete waiyo. ⁴⁰ Piya, taeba ibasa yagaba maka uma ma'ena puma ataena pikena pune. Piya pompekini, wasana wa'ega kina'mi abite tagega'e uma tabigaigipa, kamana antotopa nana kamana uwaimukune, untiye. ⁴¹ Kana kusikusi yagarama piya ute igarubaogini, kana akiyena pumepa atate wantawewe.

20

Masetoniage Kariki marige Poro wantiye

¹ Pigoya, kamana uma maka yumepa pabigo paka puwauguna, Poroba Isu nkaegaranta kina ige'a' uma, i'nana kamana esegima uwaimite, Masetoniya mari wantiye. ² Maba pi againtanaba, monota ai'aru pume kina mirite wanta, ige to kake ige'ma kamana uwaimita, wama Kariki mari uma irosantiye. ³ Irosa'magina, pita'i opa kakaga migaita, kayo waniti tumima, wanipisa karebi ima Siriya mari wakenaga yogini, Yuta kina igeba aegukena kamana yuguna abitegina, atate Masetoniya mari mabi wantiye. ⁴ Pigoya, mayaki kina'mi ke'iba abagi puntawewe: Periya kumatasa Sopata, aeba Pirasi ntagarawa, Tesaronaika kumatasa Arisitakasige Sekantasigewa, Tebi kumatasabe Kaiyasige Timotigewa, Esiya marisabe Tikikasige Toropimasigewa sumagini, ⁵ piyaki kina'mi paitamagini, Torowasi kumata tagawa puma mintantawewe. ⁶ Tau'ikena yaga, yisiti kampa wainta

pareti nakena yagaba a'ya poga, Piripai kumati wanipisa karebi ima, nayaka'mu yaga wama Torowasi kumata uma irosantune. Pita'i irosa'ma, tonarentisa tara umaema yaga mintantune.

Poro Torowasi kumata ka yagara asitantiye

⁷ Pigoya, taeba sontara ara naminta nakena aki puntune. Piya puwakana, Poro aeba marekanaba wakena uma mono kamana uma miyogana, aseka nkabubu puntiye. ⁸ Pigoya, kana mintuwampe aboborasa marupipa kanepa uwoma nkigi atauguna tantiye. ⁹ Piya puguna, ka yagara agewapa Yutikasi, aeba Poroba monopa e'erotia yogana, abaku kabira mima awai pegu pumagina awaintiye. Awaita mintometisa abaku kabirisa ware'nama, mabi tumpa aeguwaiyogini, asitaumepa ago araginaka yogini, inatisa kakaga maru pumarantatisa tumima aeguyomeka ara aeguntiye. ¹⁰ Piya pogana, Poroba tumima aepa'ma asitama wasana maya uwaimintiye. Tigeba a'tiyekuruba piyo. Aumaba uwa waintegina aogaye, piya untiye. ¹¹ Piya utegina, namapinti ima pareti akobuma imite nate puntiye. Nagaite, igege to e'erotia mono uwaimogini abima mintuguna marintiye. Marogana itate wantiye. ¹² Kana wasanamiba kana yagaraba aogaogini namankapinti ababute wamagini, intawamaba tabera paru puma aogima asoya puntawe.

Poro Mairitasi kumati wantiye

¹³ Pigoya Poro yoga, taeba wanipisa karebi ima Asosi kumati paitama, pitasa aba pikena wauwakana, aewapa uwa mari pi kumati wantiye. ¹⁴ Pigoya, Asosi kumati wama uma tabataoga, wanipisa karebi ima arupu puma wantune. Wama Mitirini kumata uma irosantune. ¹⁵ Pitasa wama marogapa Kayosi uma irosa'ma agaitegi, pabigo pitasa wama to ka yagara Semosi uma irosa'magi, pitasa wama marogapa Mairitasi kumata uma irosantune. ¹⁶ Piyama, Poro aeba Pentikositi yagaba Yerusaremi kumata uma irosakena yomekana, pika wanipisa karebi wama Epesasi kumapa agaite, Esiya mintakana kana'wa a'ya puwasanaga agaite, wama Mairitasi kumata uma irosantyi.

Epesasi kinapa i'nana kamana uwaimintiye

¹⁷ Pigoya, Mairitasi kumata uma irosantana, kamana ataogini wama Epesasi kumataswa monota kabiymye kina ibabute kanantawe. ¹⁸ Kanama irosauguna, Poroba kamana maya uwaimintiye: Naeba Esiya mari irosa'ma, pabigo tigeti yogane agobima puma mintanto, pipa agorasa abintaw. ¹⁹ Naeba nagega'enepa maete tumima mimagi, nantara'enabi mpima Wa'egawama kayokaya'enaba puma mintantone. Piya, Yuta kina igeba karana natama ataena punataugu, ma'enabi mpintantone. ²⁰ Pigoya, kamana tige urimikenabu kapa kampa airari kaeyuwagana waintantine. Tige aogi piyema, mono kamanapa uwoma akiyenabipeti ntamapipe urimima tiyakima mintantone. ²¹ Piya puma, taeba Kotiti tagu a'wae puma, Wa'egare Isu Karaisitipi tamatiti puma mikubompeka, Yuta kinape Kariki kinape esegima urimima mintantone. ²² Pigoya, mapa Aota Awamus'a'ama nabaibemika, Yerusaremi kumati wakuwe. Pigoya, wama maroti uma irosakana, piya mayaena abora namikibipa, pipa kampa abintuwe. ²³ Uwa iga'na natakenaenage nanta naulikenaenage maroti nagawa puma waintiye. Pipa a'ya'ma kumati uma irosa ampa irosa poganaba, Aota Awamus'a'ama piyama uma aboranamegi abuwe. ²⁴ Pigoya, naeba nau'neka aboganaba uwaenanganta pemika kampa naekuruba puwe. Naeba nanta aseyonabisa nagisa aeta aeta wama nayakikibi ki'i a'ya pukuboka nabiye. Pigoya, Koti kao'ena agoya kamana uma arakuboka, Wa'ega Isu unatantiye. Yoga, pipa puma aogi pusanaga naumawamaba tabera waiye.

²⁵ Pigoya, ma ka yekiri abiyo. Naeba Koti kabiratakena urimima, abakatipi miyogiri, nagapa pipa aintiba to kake naorapa kampa nagakibewe. ²⁶⁻²⁷ Naeba Koti mpono kamana atantipa, pipa a'ya'ma urimiwaentuve. Kapa kampa kakauwagana waintantine. Tige aruyenabisa ka'waina pi kamana kampa abikibipa, kaintanawampa nae'enaba kampaye. Ae'enawane. ²⁸ Tige tigeri kiya pumagiri, monoka yagarutipa pabiyama kiya kabiwaitaiyo. Aota Awamus'a'ama ige kiyewema uritantika, tigeba Wa'egawama mponota ai'aru pe kinapa kuratasa ika puwaitantika, igepe igama kiya puwaitaiginu pasema miyivo. ²⁹ Naeba abintuwe. Naeba titakanaba, kabu kara awamana tige tibakapi irosa'ma, yagarupa kampa uwaba itakiye. ³⁰ Piya, tigeti tibakapisa wasana asima mono'ama maema a'yugu puma, Isu nkaegaranta kina igewaiti tiba puritakena tutusuritakbewe. ³¹ Pika tigeba a'ya'waema yaga aogima kabiyyo. Piya, kaboba kakaga asekape arape nantara'enabisa ti'nana kamana tiyota tiyota urimikenaenabu kapa kampa kasuwagana tumintiye. Pika tigeba napima miyivo.

³² Pigoya, mapa Kotiti titama awagaena agoya kamana'wata aki puritauwe. Aeba esegiyenama nkagowampa a'ya'ma aeti atokaenta kina Koti aogiyena imemisa puma, igepe aintiba mantarisa aogiyenaba to ka'isa kinake kaga Koti timekiri maekibewe.

³³ Naeba mone kotatikaba kampa esuritantuwe. ³⁴ Naenentabe nao'mintabe tae'ena ise'ena naya tararasa yoga puwagana aboraoga maentompe, tigeba pipa abintawé. ³⁵ Naeba a'ya'ma yuganepa ago tiyakintuwe. Pipa esegima puma kampa esegi pe kina iyo'maeyano. Piya punta, maya kamana Wa'eغا Isu aewa untika, napiyeno: Amemi nttagaramaba to ka maeyami nttagarama nka'muntanawapa asugasaye, iyema, Poro piya untiye.

³⁶ Pi kamana ugaite, Poro araka pimagina, kaga pi kana kiya kina'mige nunamu untiye. ³⁷ Nunamu yogini, aepa'ma kube'ena potama amo nantawe. ³⁸ Piya puguna, aeba kamana maya uwaimintiye: Tigeba naorapa kampa to kake nagakibewe, yomeka, tabera intaba ikintiye. Aibogini, ababute wama wanipisa karebi metauguna wantiye.

21

Poro Yerusaremi wakena wanipisa karebi intiye

¹ Pigoya, taeba igepta itate, ka wanipisa karebi aobibi puma wama Kosi uma irosa'magi, pitasa to yagaba marogapa Arosi wamagi, Patara kumata wama uma irosantune. ² Pitasa to ka wanipisa kareba, Pinisiya mari wakena poga, uma abatama pabipi ima wantune. ³ Wama Saiparasiba tayake'masi waintoga uma agate uwa agasimagi, Siriya marisa auka'i wama Taya kumata uma irosantune. Pita wanipisa karebisa kotapa metaoga, ⁴ taeba kumatima ima, Isuti atokaenta kinapa asu ibatama, tonaentisa tara umaema yaga igege mintantune. Piya, Awamus'a'ama: Poro ata potakibeka, uwaimogini, igeba: Poroba Yerusaremi kumatiba a'yugu wasanaga, a-nkwaoma omintawe. ⁵ Pita mintuwakana, wakena yaga aboraoginiba, wa wayape araga yagarabe pi kumatasa arosa'ma, a'ya'ma kina tababugu kepari tumintune. Pigoya, pi kepariba tarakabima nunamu uma: Pigo miyioyu uwaitategi, ⁶ wanipisa karebi ima wauwakini, igeba a'wae puma kumati intawe.

Poropete Agabasi Poroka meto kamana untiye

⁷ Pigoya, Taya kumatasa wama Toromesi kumata uma irosauwakana, wanipisa karebi wakenaenaba a'ya puntiye. Pigoya, pita'i mono kina uma ibatama, ka aseka igege waintage. ⁸ Marogapa wama Sisariya kumata uma irosa'ma, mono kamana uwaiminta nasume ntagara Piripi, uma abantantune. Piripi aeba aposoro yuga iyo'maenta kina, tonaentisa tara umaema kina, ige aruyenabisawe. Ae namapi intune. ⁹ Ae aratagawaepa tarawa tarawaki mintantawe. Igeba poropete kina'mi kamana uma mintantawe.

¹⁰ Pigoya, pita'i mintuwakana, Yuta marisa poropete yagara ka kanantiye. Agewapa Agabasi, aeba taeti ampa irosantiye. ¹¹ Irosa'ma, pabigo Poronta abamu kanti maema, aewa nkagisa aya kirokaentana maya untiye: Aota Awamus'a'ama aeba mayawe iye: Ma kantiwama nkababa, aeba Yerusaremi kumata wama uma irosakini, Yuta kina'miba maya potama, to marisa kina'mi nkiyapi atakibewe, iyema untiye. ¹² Kamana piya yoga, taebi kana kumatasa kina'mibe: Poroba Yerusaremi kumatiba a-nkwanema, ubesuma omintune. ¹³ Omuwakana maya untiye: Nanaga taberapa kube'enaba punatamagiri, nae nantawamapa maema ataena punatakenaga yewe. Naeba Yerusaremi kumati iga'na namapi nkamana ikenagabe, Wa'eغا Isu nkageraka purikenagabe, kaga aseyo puwe, untiye. ¹⁴ Piya yoga, to kamana omuwakanaba kampa aboga, atate maya untune: Wa'egawama nkabikibika aborakibemipa ta'mu pukune, untune.

Yerusaremi mono kiye kinapa kamana uwaimintiye

¹⁵ Pigoya, ka'isa yaga a'ya puwaoga, Yerusaremi kumati ikena aseyo puntune. ¹⁶ Pigoya, Sisariya kumatisa Isuti atokaenta kina ka'isa tababugu, ka Saiparasiba yagara, agewapa Nesoni, aeba pai Isu nkagaranti, ae namapi tababute meratantawé. ¹⁷ Pigo ampin-tuwakini, Yerusaremi kumatasa mono kina'miba agoya puma kao'ena puratantawé.

¹⁸ Piya maroganaba, Poroba Yemisi ntampapi tababoga intune. Ima mintuwakini, monota kabiyume kina'mi a'ya'ma irosa'waentawé. ¹⁹ Irosauguna, Poroba iyata u'ma, Koti ao'maema esegi potaogana to marisa kina'miti mono yuga pogana, au'wa aboranti, pi kamanapa a'ya'ma uwaimintiye.

Poro kamana abite tabe mono namapi intiye

²⁰ Poro aeba kamana uwaimima a'ya ataoginiba, Koti nkage asaga'yuma maya omintawé: Tao'yagara Poro, kaeba abo. Yuta kinapa uwoma kina'mi Isu nkaega'ma ae tuntana puma mintawé. Pigoya, igeba a'ya'ma Mosese kamana ago tumisanaga esegima wasiyewe. ²¹ Piya puntini, kae kamana mayama kanagini abewe: Yuta kina, to marisa kina'mi abakapi miye kina, igeba Mosese kamanapa a-nkuma uwa kasiyoma, uwaimene. Piya untana, yagarawaimpigi itapa ara'enaba a-puwaitaiyema, Yuta kina taetentanaba ampaema miyiyoma, uma akunkitanegini yewe. ²² Pigoya, Yerusaremi kumati kanampe, ma kumatasa kina igeba kae kawaga kamana abiwaeyaka, pipa aya pukune. ²³ Pika taeba

kamana ka ugamukubompentana po. Taeti tarawa tarawaki kina mintawe. Igeba Kotiti uma esegi potama, i'no nkabiyia kampa agagupanta uwa mintawe.²⁴ Pigoya, taeba igeti ugatakana, ige awameta piyaena puma, kaema agunta abasakena ikantana puwaitagini, kaema i'nopa agagupakibewe. Kaeba piya pegini, kagamagini kaeka mayama abikibewe: Kamana'wa kanaoga abintompe, pipa kumparine. Aebe Moses kamana ago aogima wasima miye, ukibewe.²⁵ Pigoya, to marisa Isu nkaegaranta kina igepa pai kamana untompe, pi kamana esa kaema imintompene: Wasanami yaga aeguma kumpari koti kaema agunta abasa'atape, korape amema abaema puremi kinape a-ntaiyoma, gabama kamparagaena pikenaenabe kaite aogima miyyome, pi kamana uma esegima esa kaema imintompene, untawe.²⁶ Piya yuguna, Poro aebe kamana'wai abima, tarawa tarawaki kina igeti uma iyegaraogini, maroginiba i awaena purite tabe mono namapinti intawe. Ima Poroba kamana uma esegi pumaraome kanapa a'ya kaikena puguna, kaema agunta abasakena aborakibi kanaka, kiya kina igepa uwaimintiye.

Poro tabe mono namapi mintogini arakurintawe

²⁷ Piya uwaimogini, tonarentisa tara umaema yaga uwa mikenaga unta, pipa a'ya pikena pogana, Poroba tabe mono namapi mintogini, Esiya marisa Yuta kina igeba aepa agate tabera imo kamana yuguni, wasanaba a'ya'ma wabe wayape asimagini Poropa arakurintawe.²⁸ Piya puntini tutusuwaitama untawe: We, Isureyo kina, kanama ampa tao'maeiyio. Ma ntagara aebe maga maga nasi nasi puma Yuta kina taepa kama puratama, kamana agorepe tabe mono namatepe ma uma ata potama miye. Piya pumagina, ka'isa Kariki kina ibabute tabe mono namatepi ampa pasegini, ma aota nama i'nantana potawe, piya untawe.

²⁹ Pigoya, Poro aebe Epesasi kumatasa yagara Toropimasi aege kumati nasi nasi pogini, agantaka: Poroba ababute tabe mono namapi iyema napintaw. ³⁰ Piyama napima yuguni, a'ya'ma Yerusaremi kinapa pami pumagini, a'ya'ma kinapa karu'ena kanama aki pumagini, Poro araku'urite tabe mono namapisaba irosa'ma, abe'i tumintini, karu'ena kabe akunintawe.

Aroma kumatasa kiye aebe Poro ababuntiye

³¹ Pigoya, wasanami Poro ababuma aegukena puguna, awaga kamana Aroma irebu kina'mi tabe kiye yagara aeti waogana: A'ya'ma Yerusaremi kina'miba ma'ena pikena pewema, abintiye.³² Kamana piyama abite, pabigo irebu kinape irebu kina'mi kiye kinape ibabogini, karu'ena kana kina'miti wantawe. Piya puguni, Yuta kina'mi Poro aegu miyumetisaba pi tabe kiye yagarabe irebu kina'wape uma irosauguni, igate uwa atantawe.³³ Piya atauguna, kiya yagara aebe agora kanama, irebu kina'wa uwaitaogini Poro ampa arakuruguna, kana kiya yagarama maya uwaimintiye: Iga'na tara maete kanama ampa kirokaeyiyo, untana: Mapa kewe. Aebe nanaena piyema, ibigantkiye.³⁴ Ibigaogini, uwoma kina wabe wayape abite mintuguni, ka'isa kina igeba ka imo kamana uma tabera yuguni, to ka'isa kina'miba to kamana imo kamana tabera untawe. Piya puguna, tabe kiye yagara aebe kana kamana'ama nkagoba kampa aogima abintana, yogini irebu kina igeba Poro ababute igewai ntamapinti wantawe.³⁵ Pigoya, Poroba kana namata uma irosa'ma namapinti ikena pogini, wasanamiba kobe puma ke akukasuguni, irebu kina igeba Poro aepa'ma wasirite intawe.³⁶ Piya puguni, a'ya'ma kina igeba iyega'ma wantini, maya untawe: Pi ntagaraba aeguma kaiyiyo, piya untawe.

Poro aewa nkagowa Yuta kinapa uwaimintiye

³⁷ Pigoya, Poropa ababute nama nkantabaipinti ikena puguna, irebu kina'mi tabe kiye yagara aepa abigama maya untiye: Abo. Kamana ka ugamukuwe, yogana, kana kiya yagarama pami puma maya untiye: Kaeba Kariki kamanapa ayama abintane.³⁸ Naeba napiyopa pai Isipi yagara ka'waina kama tukabikena irebu kinapa 4,000 kina ibabute ka'me mpari wantemi, kae pi ntagaragabera, to yagaragawema, abigantkiye.³⁹ Abigaogana Poro maya omintiye: Naeba Yuta yagararanawe. Piya, Sirisiya marisa Tasasi tabe kuma wainti, pitasawe. Kaeba abinamega, kamana uwaenanto wasana uwaimeno, yogana,⁴⁰ abimogana, Poro aebe kabera asima aya nkamatagina, pakama mintuguna, Yuta kamana'waipisa kamana uwaimintiye.

Poroba Yuta kinapa kamana uwaimintiye

¹ Pigoya, Poroba maya uwaimintiye: Nao'mitabe tabe kina'nempitabe, nae'ne ago urimekiri abiyo, agobima uwaimintiye. ² Piya uwaimogini, Yuta kina igewai kamanapisa abitegini, kamanapa to asaba'magini mintantawe.

³ Piya mintuguna, Poro amato puma maya uwaimintiye: Naeba Yuta yagara, Sirisiya mari Tasasi kumata aboranto ntagaranawe. Pigoya, ma kumata ampima anosantone. Tisa yagara Kameriya aeba mono unamoga, tayabamagi ago kamana'waipa esegima abiwaentuwe. Pigoya, tige ibaba pesa puma, naeba pabiyamagi Koti aega'ma esegi puntuwe. ⁴ Pigoya, kasa mono ki'i wa kina igepe wabe wayape tabera karana puwaitama, ubu'magi iga'na namapi itabumagi, ka'isaga otaogini iyeguntawé. ⁵ Monota paitanta kiye yagaramabe, a'ya'ma monota kabiyume kanisore kinape, igeba nae agoba abintawé. Piya, igeba naokina'mi nao'maekena isa kaema namugu, Tamasiko kumati maete wama, marota'i mono kina uma ibatama, iga'na ibu'urite Yerusaremi kumati ibabute antota'ena maekenaenara kanaiyema ibabukena wantuwe, untiye.

Poro aeba Isu nkaegaranti kamana uwaimintiye

⁶ Pigoya, Poro to maya untiye: Piya, naeba ke'i wama kagi abebe Tamasiko kumata uma irosakena puwagana, mantabintisa e'wasaena pabigo tumima tabera e'wasa punatantiye.

⁷ Piya pumagina, napasanaoga mabi ware'nama mima, maya kamana yoga abintuwe: Soro, Soro, kaeba nanaraka karana punatata nasene, untiye. ⁸ Piya yoga, naeba: Wa'ega, kaeba kegawe, yuwagana, maya unamintiye: Naeba karana punatata nasempe, Isu, Nasareti kumatasá yagaranawé, untiye. ⁹ Aiyogini, wasana naege wanta kina igeba e'wasaenamana agantini, kamana unamintipa pipa kampa abintawé. ¹⁰ Pigoya, naeba: Wa'ega, nana poma unatane, untuwe. Piya yuwagana, Wa'egawama maya unamintiye: Kaeba asima Tamasiko kumati wagana, ka yagarama a'ya'waemaena utagatantopa kayakima ugameno, untiye. ¹¹ Pigoya, yaku e'wasaenamana naoba aeri kaegasogana tunusuwaogini, nao'mi ige nayata urite Tamasiko kumati nababugu wantuwe.

¹² Pigoya, pi kumata ka mono waintaga yagara mintantiye. Agewapa Ananayasi, aeba mono ago kamana wasima miyogini, Yuta kina pabi kumata mintume kina igeba aeka abugunaba aogi puntiye. ¹³ Pi ntagara aeba naeti asu irosa'ma maya unamintiye: Nao'yagara Soro, kaeba kao agao, untiye. Piya yoga, pabigo na apina'ma ae agantuwe. ¹⁴ Naeba agauwagana kamana maya unamintiye: Tayabamagi ige Koti ae kababumagina, abugaintanaga ugamaha, arupu yagarawa agama, awamupisa kamana'wa aboma, ugataye. ¹⁵ Pigoya, kaeba pi agama abempentanama nkawaga kamanapa a'ya'ma maga maga kina uwaimirite waoma, ugataye. ¹⁶ Pigoya, mapa ayama uwa miyegana e'ero pikieye. Kaeba asima, Isuka: Nao'maeyo, omegana, mono wani paikatakana aguntaenagapa asu'a peno, unamintiye. Poro piya untiye.

Kotiba Poropa to marisa kina'miti wanema otantiye

¹⁷ Pigoya, Poro to amato puma maya untiye: Pigoya naeba a'wae puma Yerusaremi kumati wama, tabe mono namapi ima nunamu asu uma, ¹⁸ amonta agauwapa Wa'ega aboranamoga agantuwe. Agauwagana maya unamintiye: Ma kumatasá kina'miba kae Kawamupisa nawaga kamana abimagineba: A'a-o, ukibewe. Pika kaeba karu'ena Yerusaremi kumapa atate pai'ma wao, untiye. ¹⁹⁻²⁰ Piya yoga, naeba kamana mayama a'wae pomintuwe: Wa'ega, naeba kaegaranta kinapa iga'na ibu'magi a'ya'ma mono namapintisa ibabumagi, eru kasutasa iyeguntone. Piya, kawaga kamana unti ntagara Sitibení aegukena puntini, kaiwai atama aki potaagu kiya kabintuwagini, aeguyugu agamagi na'mu puntuwe. Pipa ma kumatasá kina'miba abiwaentaka, kae kawaga kamanapa kanara uwaimusuwo, untuwe. ²¹ Piya yuwagana, Wa'egawama maya unamintiye: Kaeba aseyo pega, pagasa mari to kina'miti naeba ugatakana wao, unamintiye, Poro piya untiye.

Aroma kumatasá kiya yagarama Poro kabitantiye

²² Pigoya Poro piya yogini, igeba ige takae puma mintantawé. Aibuguna, Poroba to kina'miti wakenaga yogini, tabera imo kamana uma maya untawé: Piya yagaraba aeguma kaiyo. A'yugu aeba mara uwa mikiye, untawé. ²³ Piya uma imo kamana tabera umagini, kaiwaipa atama pare pare pumagini, i'ni akae'ma abobori mayo maebuntawé.

²⁴ Piyama maebuguna iyogana, tabe kiye yagarama yogini, irebu kina namankaipinti Poropa ababute intawé. Ababute iyuguna: Nanaraka imo kamanapa taberapa yewe, uma: Agowapa maema aboratama eru kasutasa aeguyiyema, uwaitantiye. ²⁵ Pigoya, igeba iga'na agisa ayata kirokaitauguna mimagina, Poroba kiya yagarawai maya uma abigantiye: Tigeba Aroma kina ae'wa nkagoba kampa abiganta, eru kasutasa aeguyiginaba pipa kampa kanarasakiye, untiye. ²⁶ Piya yogana, irebu kiye yagarawa abite, aeba tabe kiye yagaramati wama maya omintiye: Aya pikibene. Aeba taga Aroma yagaranawé iyema, omintiye. ²⁷ Piyama omogana, tabe kiye yagara aeba Poroti wama abigama maya untiye: Kaeba yo. Kaeba taga Aroma yagaragawo, yogana, Poroba: Pipa tagane, untiye. ²⁸ Piya yogana, tabe kiye yagara aeba maya untiye: Naeba uwoma mpone kasima Aroma kina'ena puntuwe, yogana, Poroba maya a'wae pomintiye: We, naeba piyaba kampa

puntuwe. Ampa yakari punatantemi, Aroma ago yagarawanawe, untiye. ²⁹ Piya yogini abite pam i pumagini, Poro aegukena kina'mi pabigo uwa atantawe. Pigoya, irebu kina'mi tabe kiye yagara aeba: Poro taga Aroma yagarawema abite: Nanaraka piya potauwema, aekuru puntiye.

³⁰ Pigoya marogana, Aroma kumatasa kiye yagara aeba Yuta kina igeba nanaraka Poropora kampari otawema, pi agowa abikena yogini, tabe Yuta mono kiye kinape a'ya'ma mono kanisore kinape aki puntawé. Aki puguna yogini, irebu kina igeba Poro iyoba'atauguni ababute tumimagini, akiyenawaipi iyobi asitantawé.

23

Poro mono kanisore akiyenabi kamana untiye

¹ Pigoya, Poro aeba Yuta kanisore kina igabebe puma kamana maya uwaimintiye: Nao'mitaba, naeba Koti nkaobi kayokaya'enaba kamparagaenaba kampa punta, purite kanama mintantoka puma miyuwe, untiye. ² Piya yogana, monota paitanta kiye yagara Ananayasi aeba wasana Poro agar mintume kina ige: Awamu airisaiyo, uwaimintiye. ³ Piya uwaimogana Poro maya omintiye: Arigautapa aogi pegina, kagukau'amaba ago abararaye. Kotiba kaepa kaegukiye. Kaebe nana piyema ago kamana'ama maema parutu pikena yuga puntana, pi ago kamana akayuma naeguyiyema uwaimenema, omintiye. ⁴ Piyama omogini, wasana agora mintume kina'mi maya untawé: Ayama kaebe Koti mponota paitanta kiye yagarawaka uma ata potane, untawé. ⁵ Piya yuguna Poroba maya untiye: Nao'mitaba, naeba paitanta kiye yagaraba aepa kampa aogima agabebé puntuwe. Mono isa'ama maya iye: Kaeba kiya kinakapa a-nkuma ataba potao, iye. Naeba pi kamanapa abintuwé, untiye.

⁶ Pigoya, kiya kina ka'isa Sarusi kina mintumepe to ka'isa Parasi kina mintumepe, pipa Poroba napimagine, pi akiyenabi kamanapa tabe puma maya uwaimintiye: Nao'mitaba, naeba Parasi yagarawanwe. Piya, Parasi kina'mi tupisa aborantuwe. Purintapisa asikenena wainti, pi kamana wasiyoka ka'isa kina'miba kamana unatawe, untiye. ⁷ Kamana piya yogini, Parasi kina'mibe Sarusi kina'mibe igeba akakayo'na puguna, kiya kina'mitiba atatará'ena aborantiye. ⁸ Piya, Sarusi kina igeba purintapisa asikenabe, enisore kinape, amani kinape, pika abugunaba tagantanaba kampa puntiye. Parasi kina'miba a'ya'ma pika taga untawé. ⁹ Pigoya, pika akiyenawaipi tabe kamana maka untawé. Piya untini, Parasi kina'mi ige iyo'maeyume mono tisa kina ka'isa asima esegi kamana uma maya untawé: Taeba ma ntgararama atenaga abompepa kampaye. Enisorepera amani kina'ma kamana omintakapa ayawé kamana otakune, untawé.

¹⁰ Pigoya tabera maka yuguna, kana tabe kiye yagara aeba Poro uma paibu puma akisebasanaga aekuru pumagina, yogini irebu kina'mi kanama, wasana abakapintisa Poro ampa ayakana uma paibute namankaipinti ababute intawé.

¹¹ Pigoya, pabi aseka Wa'egawama Poro agar aboramima maya omintiye: Kaebe mata Yerusaremi kumata kamana'ne uma aborampsé puma, pabi yama Aroma kumati uma aborao. Pika napima esegima miyoma, omintiye.

Yuta kina'mi Poro aeguma kaikena kamana untawé

¹² Pigoya marogini, ka'isa Yuta kina'mi aki puma kamana uma esegi pumagini maya untawé: Taeba Poro aeguma kaikune. Kampa aeguntapa nanintabe wanipe kampa nakune, uma esegi puntawé. ¹³ Wasanaba 40-wa kina'mi ige atokaemagini piya untawé. ¹⁴ Pigoya, pi kina'mi tabe mono kiye kina'mitibe monota kabiyume kina'mitibe wama umagini aborawaimima maya uwaimintawé: Taeba nakenaba a'a-o uma mima, Poro aegugaite pintanaba nakunema uma esegi pune. ¹⁵ Pika tigebe to ka'isa kanisore kinape, Aroma kiye yagaramati kamana mayama ataignina wano: Kaebe Poro tae akiyenabi otagananakanaka, kamana'wapa to kake uma aogi penoma, omiyo. Piya, kamanati abima piya pekapa taeba Poropka ke'i aegukune, piya untawé.

¹⁶ Pigoya, Poro nkamagantawampa kana aegukena kamanapa abitegina, irebu kina'mi ntamapi ima Poropora uma omintiye. ¹⁷ Omogana, Poropora irebu kina'mi kiye yagara ka kega'e uma maya omintiye: Kaebe ma ntgaranto ababute Aroma kiye yagaramati wagana kamana ka omeno, untiye. ¹⁸ Piya yogana, pi ntgaranto aeba kana yagaramato ababute tabe kiye yagaramati wama maya omintiye: Iga'na namapisa yagara Poro, aeba nagega'e uma unamegi: Ma ntgaranto kamana ugamenema aba pogara kanause, untiye. ¹⁹ Piya uma omogana, tabe kiye yagara aeba kana yagaramato ayakana urite abiri metamagina: Aya kamana unamikibenema, abigantiyé. ²⁰ Piyama abigaogana, kana yagaramato maya omintiye: Yuta kina'miba aiba kaeti kamana atagatakena uma abewe. Igeba kaeka Poro kanisore akiyenawaipi ababute wama agowa maema aboraoma, kumpari ugamikibewe. ²¹ Ugamiginapa, kamana'waipa a-nkabo. Wasanaba

40-wa kina'mi Poro aeguma kaikenaga umagini, ke'i minaena puma mintawe. Igeba nanintabe wanipe a'a-o uma mimagini, Poro aegugaite pintanaba nakenaga uma esegi pewe. Piya puntini ago aseyo puma, kae kamanaka agawa puma mintawe, omintiye.²² Piyama omogana, tabe kiye yagara maya uma otantiye: Kaeba kamana aborama unamempepa, pipa wasana kapa a-nkuwaimo, piya omimagine agarubantiye.

Igeba Poro ababute Sisariya kumati wantawe

²³ Pigoya, Aroma kiye yagara aeba irebu kina'mi kiye yagara tara isigega'e uma maya uwaisimintiye: Tisigeba yisigini, irebu kina igisarasa wakena kinapa 200-wa, osi akabata wakena kinapa 70-wa, wanta ire urikena kinapa 200-wa sumagini, pi'nagiba aseyo puma, aseka naeni kirokira Sisariya kumati waiyo.²⁴ Poronta osi yaga, mara mikenena potaiyo. Piya potamagiri, pasema kabimagiri kiya yagara Pirikisi aeti ababute waiyo, untiye.

²⁵ Piya umagina, pi kiya yagarama nkisapa ka maya uma kaentiye:²⁶ Naeba Korotiyasi Arisiyasinawe. Kaeba pi mparisa kiya yagarane Pirikisi, kae'ena esa mampa kaeyuwe.²⁷ Piya, Yuta kina igeba wasana ma ka araku'ma aegukena pugu: Aeba taga Aroma yagarawema, piyama abite, naebe irebu kinape wama iyapisa iyobatompene.²⁸ Pigoya, kamana otanta pi ago abikenaga, Yuta kanisore kina'mi nkakiyenabi ababute watone.²⁹ Ababute wamagi ago kamana'waitaka otaugu mayama abitone: Pi ka'ena mono ige'ena maema a'yugu puwaitayema, otatawe. Piya, kampa ataena pogana iga'na namapi mikena ikape aegukena ikape kampa waintiye.³⁰ Pigoya, igeba minaena puma Poro aegukena yega abite, kaeti otaogana iye. Piya, kamana ota kina igepe pabiyama uwaitakin kaeti ima kamana'waipa ugamilibewe, piyama kaema omintiye.

³¹ Pigoya, irebu kina igeba kiyawaimpa nkawamu wasimagine, Poropa aseka ababute wama Antipatirisi kumata uma irosantawe.³² Pigoya marogini, irebu kina igeba namankaiti a'wae puma kanauguni, osi akabata mima waume kina ibiwai Poropa ababute wantawe.³³ Wama Sisariya kumata uma irosa'magini, pi kumata kiya yagaraba esapa memimagine, Poropa ae aora ababute ampa asitantawe.³⁴ Pigoya, kiya yagarama esa aisuntana, Poro ma agowaka abigaogana: Naeba Sirisia marisawe, untiye.³⁵ Piya yogana abite maya omintiye: Kamana ugata kina kanama ampa irosaigi, kae kamanapa ukune, untiye. Piya uma irebu kina uwaimogini, tabe yagara Eroti kimaraome aki pukena namapi ababute mesutamagini kabintawe.

24

Yuta kiye kina'mi Poro kamana otantawe

¹ Pigoya, ainti nayaka'mu yaga a'ya pogana, monota paitanta kiye yagara Ananayasibe, to ka'isa monota kabiyume kinape, to ka kamana unta yagara agewapa Tetarasibe, igeba Sisariya kumati tumima, Poro kamana pi kiya yagarara uma ukena aborantawe.

² Pigoya, kiya yagaraba Poroka kega'e yogana ampa irosaogana, Tetarasi aeba kamana otama maya omintiye: Aogi kiya yagarare Pirikisi, kaeba kanarama kabirataka aogi paruyenabi miyune. Piya, kaokina taeka abima tara puma tao'maeyakana,³ taetiba a'ya'ma kumatiba a'ya'waemaenarnaba aogi puwaeyamika kaeka abokanaba aogima asoya piye.⁴ Piya kamana yekana, e'ero pusanaga kaeba paru puma abiramega kamana aronkanto ugamen. ⁵ Ma ntagaraga abokanaba aeba maka uma kani'ena wantaga, a'ya'ma mari miye Yuta kina igepe igu'ama maema a'yugu puwaigasaye. Piya pumagina, Nasareti yagarama tupi tabe yagara miye.⁶ Pigoya, tabe mono namatepa i'nintana potakena pegin, abatama arakuritune. (Piya putompeka, taeba ago kamanatetaka kotiyena potauwakana,⁷ pigo irebu kina'mi tabe yagara Arisiyasi aeba kanama ampa esegi pumagina, tayapisa tapa'ma agarubakasima,⁸ kamana yoga, otaompe kinapa kaeti ampa aborama ugamure.) Pika kaega aepa abigama, ae agoba abima a'ya'ma otaompe kamanapa aogima abo, Tetarasi piya untiye.⁹ Piya yogini, Yuta kina'miba ao'maema kana kamanapa uma esegi puntawe.

Poro aeba Pirikisi kamana omintiye

¹⁰ Pigoya, kiya yagara aeba Poro ayataswa awame poyakogana, kamana maya untiye: Kaeba mampara uwoma kaboba kabima miyempe, pipa napimagi kamana'nepa nantawama aogiyenabisu ukuwe.¹¹ Naeba Yerusaremii kumati mono nama pasikena asu mintogana, nagisarisa tara tumpaema yaga a'ya piye. Pi kamanaka wasana ibigagini ugamilibewe.¹² Tabe mono namapipe, to ka'isa mono namapipe, kumatibe, ka'wainageba maka uma uwoma kina'migeba ma'ena puwaginiba kampa kapa nagantawe.¹³ Ma kina'mi kumpari unatama kamana ugame, pi au'wapa ayama kayakikibewe. Pipa kampaye.¹⁴ Pigoya, to ka uma aboramekana abo. Kasa ki'ama pako piyemagini yepa, pipa taga pabiya pone. Piya, a'ya'ma mono ago kamanape poropete

kina'mi kamanape abima aega'magi, tayabamagi ige Koti kayokaya'ena potauwe.¹⁵ Piya, ainti arupu kinape antage kinape purintapis asikena kana aborakibika, ma Yuta kina'mibe naeba kaga napi napi puma agawa puma miyune.¹⁶ Piya pumagi, Koti nkaobipe wasanami nkiyobipe kamparagaena pusana ka kabima miyuwe.

¹⁷ Pigoya, naeba kaboba ka'isa to mari mima, monotaka ka'isa kusi kina iyo'maekena monebe, Koti amitompentanabe, maema aki pumagi, Yerusaremi kumati wasana taokina igitet maete kanantone.¹⁸ Piya, nau'nempa aogi penema puma kunka kaema agunta abasakena aseyo puma tabe mono namapi ima mintuwagini nabatantawe. Pita'i wasanaba kampa aki puma, kampa maka kamanapa untuwe.¹⁹ Esiya marisa ka'isa Yuta kina'mi igege pita'i mintantone. Piya, igitet nae kamana waintakiniba, mata'i kanama kae kaobi ampa unataiyo.²⁰ We, pi kanisore kina'mi nkakiyenabi aya ata kamana'ne aborakiniba, ma minta kina'miba ugamikibewe.²¹ Piya, naeba ige abakapi mima ka kamana'anto kega'e yuwagana kampa aogi puntiye. Pipa mayamawé: Purintapis asikenaena waintika, pi kamana wasiyoka kamana unataga abakatipi mampa mintuwe, untuwe, Poroba piya untiye.

²² Pigoya, kiya yagara Pirikisi aeba kasa mono'ama ki awaga kamana abibebe puntika, aeba Poro kamanapa kampa uma uwa atategina, maya uwaimintiye: Irebu kina'mi tabe kiye yagara Arisiyasi aeba Yerusaremi kumatisa tumeka, kamanatipa uma a'ya pukuwe, untiye.²³ Piya ute, irebu kina'mi kiye yagara maya omintiye: Tigeba Poro kiya kabitama esegimaba iga'na namapipa a-nkataiyo. Piya, ao'mi a'muntana amikena pigiripa, a-nkakuno, piya omintiye.

Poro aeba tara kabu iga'na namapi mintantiye

²⁴ Pigoya, ka'isa yaga a'ya puwaogana, Pirikisi aeba Yuta wae'wa Turusirage kaga mima, Poropora kega'e uma omogana, Karaisiti Isu mponopa aegarakena kamana uwaisimintiye.

²⁵ Pigoya, Poroba arupu puma mikenaenabe, au'ama kabima mikenaenabe, antota'ena aborakibi kamanape yogana, Pirikisiba aekuru puma Poro maya omintiye: Kanarana, wao. Ainti to kake yega abukuwe, yogini, toba iga'nabi menkatantawe.²⁶ Pigoya, pi kiya yagaraba: Poroka uwa mone ika puma namikibayawe, umagina, asi nasi agega'e uma aege kamana uma abintase.²⁷ Piya pogana, kaboba tara a'ya pogana, kiyaba to ka, agewapa Posiyasi Pesitasi, aeba Pirikisi mparu maeyogana, Pirikisiba Yuta kina apa kamana uwaimite, Poroba iga'na namapi mintogana, atate wantiye.

25

Aroma wa'egawama kamana'nepa abikiye, Poro untiye

¹ Pigoya, Pesitasiba kabiliki mpari ampimagine, kakaga yaga migaita Sisariya-isa wama Yerusaremi kumati intiye.² Ima asu irosaogini, Yuta kina'mi tabe mono kinape to ka'isa kiye kinape aeti uma irosa'magini, Poroka kamana omintawé.³ Piya omimagine, igeba: Poro otaganaya Yerusaremi kumati kananoma, esegima abigantawé. Igeba ke'i mina a'ma Poro aegukenga napimagine, kiya yagarapa piya omintawé.⁴ Piya yuguna, Pesitasiba maya uwaimintiye: Poro aeba Sisariya kumati iga'na namapi mintegi, naeba aro ntangato pabita'i a'wae puma tumukuwe. Pita'i tumpa agakuwe.⁵ Tigeba Poro kamana otakena puntiripa, tigetisa kiya kina naege kaga tumima, igeba kamanapa otaiyi, untiye.

⁶ Piya ute, tonaentisa kakaga umaema yagawo, naya tara'mu yagawo, Yerusaremi kumati migaita, Sisariya kumati wama tumintiye. Piya maroganaba, kamana ukena namapi ima mara'mintana, yogini Poro ababute intawé.⁷ Namapinti iyogini, Yerusaremi kumatisa Yuta kina'miba kobe pumagini esegima kamana otantawé. Piya kamana otaume'na au'wapa kampa aborantie.⁸ Piya yuguna, Poroba kamana'wai aegumagine maya untiye: Naeba Yuta kina'miti ago kamanatiye, tabe mono namatiye, Aroma tabe wa'egari Sisape, kapa kampa aguntuba potauwe, untiye.⁹ Piya yogana, Pesitasi Yuta kinape uma paru puwaitama Poropora abigama maya untiye: Kaeba abega, Yerusaremi kumati kababute ima pita'i kamanakapa uma a'ya penoma, abigantie.¹⁰ Piyama abigaogana, Poroba maya omintiye: Tabé wasana wa'ega yagara Sisa ae kamana namapi mintogana, nae kamanapa mata uma a'ya pegana, pipa kanarane. Kaega agonepa abintane. Naeba Yuta kina atenaeba kapa kampa puwaitantuwe.¹¹ Naeba atenaeba kapa maema aboraosinta, naegukena yekapa naukaba kampa karuba posine. Pi igeba kumpari kamana unataka, uwa intawama paru puma aogi penema, unataganaba, kampa aogi pikiiye. Pika tabe wa'ega Sisa kamana'nepa uma a'ya penema yuwe, Poro piya untiye.¹² Piya yogana, Pesitasi aeba kanisore kina'mige kamana uma abirite, Poro maya omintiye: Tabé wa'ega yagara Sisaka yempeka, kaeba Sisati wagana kamanakapa abenoma, omintiye.

Pesitasi Poroka Agaripa abigantkiye

¹³ Pigoya, ka'isa yaga a'ya puwaogana, wa'ega yagara Agaripabe anonanto Penisibe isigeba Sisariya kumati tumima Pesitasi isiyo'ena puntase. ¹⁴ Pigoya uwoma ntagaba isigeba aege mintusuguna, Pesitasi Poro kamana pi wa'ega yagara omintana, maya omintiye: Pirikisiba iga'na yagara ka atate wagina mintiye. ¹⁵ Piya, naeba uma irosa'ma Yerusaremi kumati iyuwagana, tabe mono kiyebé monota kabiye Yuta kina'mibe igeba naeti ampa aki puma: Kana yagara aeguyegana purenona, unamugu, ¹⁶ naeba kamana antotapa maya uwaimintuwe: Aroma kina taeba uwa kamanatakaba ka yagaraba kampa uwa aegukune. Marupa taeba kana yagarabe ota kinape kaga igega'e uma, torisa kamanape torisa kamanape kaga abimagita antota'ena otakune, uwaimintuwe. ¹⁷ Piya uwaimuwagini, Yuta kina'miba naeti kanauguna, pabigo maroga igepe aepe kamana abikena namapi ampa mara'mimagi aki puwaitantone. ¹⁸ Pigoya, kamana ota kina'mi asimagine, ae aguntaenawapa uma aborakibewe, yuwagini, kampagini uma aborantawe. ¹⁹ Piya, igebe, wasana purinta ka agewapa Isu, aeba asima mintiye, Poro iye. Pi yi kamanape mono'waika imo kamanape untawe. ²⁰ Pigoya, naeba piya kamanaka kunta pumagi, Porokaba: Yerusaremi kumati iyega, kamanakapa pita'i uma a'ya penoma, omintuwe. ²¹ Omuwagana, Poro aeba: Wa'ega yagara Sisa kamana'nepa uma a'ya natakiye, untiye. Pigoya Poro aeba Sisati wakena yaga aborakapa, naeba yekana iga'na namapi ataogana agawa puma mintiye, Pesitasi piya omintiye. ²² Piya uma omogana, Agaripaba maya untiye: Naeba pi ntagara ae kamana ka yeka abisanaga nabiye, untiye. Piya yogana, Pesitasiba: Kanarakana aiba abikibene, untiye.

²³ Pigoya marogana, Agaripabe Penisibe isigeba isiwa'enaba aogiyea purite akiyena namapi iyusuguni, irebu kina'mi tabe kiyebé pabi kumatasa tabe kinape kaga intawe. Iwaeyuguna, Pesitasi yogini Poro ababute intawe. ²⁴ Ababute iyuguna, Pesitasiba kamana maya uwaimintiye: Wasana wa'ega yagara Agaripabe, wasana ka'isa naokinape, kamana'nepa abiyo. Ma minti ntagara aekaba a'ya'ma Yuta kina'miba Yerusaremi kumatibe mata'ibe tabera imo kamana uma: Aeba a-mpiyeno, untawe. ²⁵ Piya yugu, naeba agauwapa aeba aeguma kaiyemantanaba kampa puntiye. Pigoya, tabe wa'ega yagaramaka yemika aeti otakana wakiye. ²⁶ Pigoya, kamana au'wapa aguyosa'magi, tabe kiyebé yagarane mpanta esa kaekenagaba kunta pumagi, ma ntagaraba wa'ega Agaripa kaeti ababuma, a'ya'ma ma kina'miti tiyobi ataogana mintiye. Pigoya, tigeba agowapa maema aboraigipa kamana'wapa kaeyakana wakiye. ²⁷ Piya, naeba iga'na yagara ka'waina kaintanawampa kamana kampa kaenta Sisati uwa otakana wasanaga, aboganaba kampa aogi pikkiye, piya untiye.

26

Poroba Agaripa nkaobi kamana untiye

¹ Pigoya, Agaripaba Poro maya omintiye: Kaega agogapa yega abeno, omogana, Poroba aya nkasa puma kamana'wa maya omintiye:

² Yuta kina'miba asi nasiba kamana'amana unatama miyewe. Pika ka'isa wa'ega yagara Agaripa, kae kaobi ibaba usanaga nantawama aogi piye. ³ Pi kae Yuta kina monotaka maka yompentanaba to ka'isaena pompentanarempa nkagoba abintana, pika kaeba abima paru puntaga, kamana'nepa yeno.

⁴ Pigoya, naeba inamu ntagaranto maneta anosama Yerusaremi kumata ampimagi, naeba kamana aogima abima anosauwagini, ago nagana abintawe. ⁵ Pika Yuta kina pai naganta'nagiba mikenaenanempa nkagoba agantawe. Naeba Parasi yagara mono'ama nkanontana punta kina, ige aruyenabi mintantone. Piya, agone agama abinta kina'mi ampa yegana kanarasa misine. ⁶ We, Koti tayabamagi utawaitantintanaga agawa puma miyuwe. Pika naepa kamana unatata. ⁷ Piya, pi kamana'ama nkau'wa aboranema, Isureyo aruyena nagsirisa tara tumpaema kina igebe naebe Kotiti mono uma asekape arape agawa puma miyune. We, wa'ega yagara, agoba pitaka Yuta kina'miba kamana unatawe. ⁸ Koti aeba purintapisa asiratakiye. Pipa tigeba abeganaba, nanaga kampa pusuba piye.

⁹ Pigoya, naeba Isu, Nasareti kumatasa, ae age awaga kamana aguya aiyekana a'yugu penema yoganepa uwomantana puntone. ¹⁰ Yerusaremi kumata piya puntone. Piya, tabe mono kiyebé kina igebe yuwagini esa namugu, Kotiti atokaenta kina tabera karana itamagi, iyeguma iga'na namapi ibabuwaitamagi, puriyemagi piya puwaitama naege owe puwaitantone. ¹¹ Yuta kina'mi ige mono namaka namaka nasi nasi puma, pi kina iyeguyuwagini, Isu nkage uma ata potayema uwaitantone. Pigoya, naeba esegima karana puwaitama, pagasa kumati wama iyeguma igarukareba'ma mintantone, Poro piya untiye.

Poro aewa Isu nkaegaranti kamana uwaimintiye

¹² Piya untana, Poro to maya untiye: Piya puwagini, tabe mono kiyē kina'mi igeba esa namima unataugu, Tamasiko kumati wakena wantone. ¹³ Wauwagana kagi abebe pogana, mantarisa yaku e'wasaena ka tumima nae'nepe naokina'mipe e'wasa puratantiye. We, wa'ega yagarane, pankama nke'wasaenaba asugasima to awameta agantewe. ¹⁴ Pigoya taeba mabi ware'na mima, kamana ka Yuta kamanapisa naeba mayama abintone: Soro, Soro, kaeba nanaraka karana punata nasima miyene. Kaeba akenanaenara aeguma erutaka'ya puma kaeka kauka kauki nakiyena pene, unamintiye. ¹⁵ Piya unamoga, naeba: Wa'ega, kaeba kegawe, yuwagana, maya unamintiye: Karana punata nasima miyempe Isu naewe. ¹⁶ Piya, kaeba asima kagisa aema miyo. Naeba ma kayokaya kina'ne kababikena aboragamuwa, pika kaeba ma agampentanaba pipa ainti kayakekana agakibena, pika nae nawaga kamana ukēna kina'nentana puma miyo. ¹⁷ Naeba Yuta kina'mike to marisa kina'mikega uma kau'ima kao'maekuwe. Piya, to marisa kina'miti ugatakana, ¹⁸ uma iyo agawaitagini, tununtanaba agama ikabitate e'wasaena maekibewe. Piya, Satani esegi yugaba kaite Kotintana pikibewe. Piya, aguntaenawaipa asu'a puwagini, naeti imatit puma aota minta kina'mi nkaruyenabi uma pasikibewe. Pikaga ugatauwe, unamintiye, Poro piya untiye.

Mono yuga punti kamana Agaripa omintiye

¹⁹ Poro kamana piya untana, to amato puma maya untiye: We Agaripa, wa'ega yagaraneka, naeba pi mantarisa kamana abima wasiyu'ma, ²⁰ pika maru Tamasiko kumatasa kinape, Yerusaremi kumatasa kinape, Yutiya ma ago kinape, a'ya'ma to marisa kinape, igeba a'ya'ma igu a'wae pumagini Kotika uma igu a'wae pikenaenama nkau'wa maema aboraiyema, pika mono uwaimima mintantone. ²¹ Piya puwagini, Yuta kina'miba tabe mono namapisa naraku'ma naegukena puntawé. ²² Pigoya, Koti aewa nao'maerite kanagi, mono kamana untopa uma miyuwe. Piya puma mata mimagi, wasana ima minta kinape tumima minta kinape a'ya'ma urimuwe. Pipa aoso kamana'nane. Poropete kina'mibe Mosesebé Koti aborakibintanaga kaemaranta, pi kamana yuwe. ²³ Pi Koti utaratanti ntagara Karaisiti, aeba tabera aukima purenema otanta, pipa ago purinta kina igitisa paitamagina asima, Yuta kinape to marisa kinape e'wasa kamana'wa maema aborawai menema otanta, pi kamana wasiyuwe, piya untiye.

Poro Agaripa Isu nkaegarakena kamana omintiye

²⁴ Pigoya, Poro aeba agowapa uma arupu pumagina kamana piya uwaimogana, Pesitasiba tabera kega'e uma maya untiye: Poro kaeba aibo yagaragawe. Esapa uwoma aisekana abikenaenagampaba a'yugu piye, untiye. ²⁵ Piya yogana, Poroba maya omintiye: We Pesitasi, kaeba tabe yagarane, naeba aibo yagara kampa mintuwe. Naeba arupu kamana taga suwe. ²⁶ Piya, kamana yo'na agowapa wa'ega yagaramaba kanara abintiye. Aeta aseyo puma yuwe. Pi yontanaba kakantanabi kampa aborantiye. Pikaba wa'ega yagaramaba agewama aowamaba agama abiwaentiye. ²⁷ We, wa'ega yagara Agaripa, kaeba poropete kina'mi kamanapa abibebe puntano. Naeba ago abintuwe. Kaeba abibebe puntane, untiye. ²⁸ Piya yogana, Agaripaba Poropa maya omintiye: Kaeba agaro ntaganto naeba aega'ma Karisiteni yagara mikuwoma, napiyempene, untiye. ²⁹ Piya yogana, Poroba maya untiye: Aro ntagantowo, e'ero ntagawo, kaebe, a'ya'ma nae kamana ibanto abe kinape, kaga nae nabemika tigeba nae posa puma aegaraiyoma, yuwe. Iga'na kina mintokaba kampa yuwe. Monoka yuwe, untiye.

³⁰ Piya yogini, wa'ega yagarabe, pi kiya yagarabe, Penisibe, a'ya'ma to ka'isa kinape, asima wagana puntawé. ³¹ Wagana puntini, mare-u me-u pumagini maya untawé: Ma ntagara aeba aeguma iga'na pemintanaba kampa piye, piya untawé. ³² Pigoya, Agaripaba Pesitasi maya omintiye: Kana yagara aeba Sisaka kamana'wapa uma a'ya atanemaba kampa yemisinta, kaeba kanara iyoba atakana wama uwa miyemisine, untiye.

27

Aroma kumati wakenaga Poro metauguna wantiye

¹ Pigoya, Aroma kina'mi mpuri wakena yaga agarosaogini, igeba yuguna, Aroma irebu kina'mi kiyē yagara, agewapa Yuriyasi, aeba Sisa ae aruyenabis, aeba Porope to ka'isa iga'na kinape ibaboga, taeba wanipisa karebi intune. ² Pigoya, pi wanipisa kareba Ataramitiyamu kumatasaue. Pipa Esiya mawama awamorisra kumati nasi nasi pikena wanipisa karewe. Pigoya, pi kana wanipisa karebi ima, Masetoniya yagara ka, agewapa Arisitakasi, Tesaronaika kumatasa yagara, aege kaga wantune. ³ Pigoya, maroganaba Saironi kumati waogana, Yuriyasiba Poropa kayone potama abimogana, kumati ima aokina igaogini ke'i nakena nanintaba amintawé. ⁴ Pigoya, pi kuma atate kayo wanita

to wauwagana, ponta kanama tamo akase poga, atate wauwampetisa purite kanama tababute Saiparasi ma agori aegago puma wantune.⁵ Wamagi, Sirisiyabe Pampiriya mabe isigaite wama, Arisiya mari Maira kumata uma irosantune.

⁶ Pita'i uma irosauwakana, irebu kiye yagarama to ka Aroma wakena wanipisa kareba aguyosagantiye. Aguysa'ma ka Aresanteriya kumatisaba ka agantiye. Agategina, tababoga pita'i intune.⁷ Ima wanipisa kareba uwoma ntaga pase pasema waoga, wama Naitasi kuma waintome agora uma pasema uma irosantune. Piya puwakana, pontawama tamota aima tarakasoga, atate to ka ki'i wantune. Wamagi, Kariti ma agori aegago puma wama Sarimoni kuma agaite wamagi,⁸ to pasema wama, Aresiya kuma agora wamagi, ka kuma agewapa Aogi Migarakena Kuma, pita'i uma irosantune.

⁹ Pigoya, uwoma ntaga a'ya puwaogana, Yuta kina'mi naninta a'a-o ukena yaga wagasogana, ponta pumagina wani aiga'yo'ya pukena yaga aboraogana, pika Poroba kamana maya uwaimintiye:¹⁰ Nao'mitaba, ma to kake wakubompe, pika aboganaba kanara ima wamapa kampa piye. Wanipisa kareba ataena puma, wasanabe kotape kaga kayo wanipinti tumisanaga abima tara pumagi yuwe, untiye.¹¹ Piya yogana, irebu kina'mi kiye yagara aebla Poro kamana a'a-o uma, kana pubasanaome ntagarage aba karige isige kamana abintiye.¹² Pigoya, kana kayo wani agaumepa, kana wanipisa kareba pita'iba ponta pomepinti kampa aogima miyemapa puntiye. Aibogini Kariti mari amana wani waintometi, agewapa Pinikisi, pita'i wama umintakanagaba pontaba puwaka wakune, untawe. Pigoya, kana Pinikisira ka wanipisa kare metakenaenaba aogiyenaganan Pontaba aogima ai'nima kakakune, untawe.

Waninkama aiga'yo'ya puma iprintakena puntiye

¹³ Pigoya, tako'isa pontaba uwaenanto pogini, kana wanipisa kare kiye kina'miba wakena untini, wanipinti asaekenena, agewapa anka, paibuguna iyoga, Kariti kayo wani aega'ma awamori wantune.¹⁴ Wauwakana, kana ma agobisa tabera iguguya pumagina, kana iguguyankama nkagewapa Tareyo,¹⁵ pi'na pumagina wanipisa kareba a'ware'nagasogini aogi pikena pugagate atantawe.¹⁶ Piya poga, taeba karu'ena to manto aka'i wama, agewapa Kota, pita'i wauwakana, wanipisa karewama nkamana karento kayo wanipinti tumikena poga,¹⁷ esegima paibuwakana abobori iyoga, wanipisa kare aigurisanaga iga'na kima asaema esegi puntune. Pigoya, yabapa Aperika agora ima asu airukisanaga, seriba paibuguna tumogana, uwa iguguyankama a'wae poga wantune.¹⁸ Pigoya, iguguyapa esegima pumiyogana, maroga kotopa ka'isaba kayo wanipinti kasuwakana tumintiye.¹⁹ Piya, to kake marogini wanipisa karebintisaena iyora waintomentana maema pabiyamagini maebuguna tumintiye.²⁰ Asekape kagipe ka'isa yagaba tabera aiguguyapa puma miyogana, pape noribe kapa kampa aboraoga a'yugu wamagi, agate abikenaenarempaba a'yugu puma akunkaoga, taeba toba mapa kampa mikunema, untune.

²¹ Pigoya, wasanamiba a'ya'ma kina uwoma ntaga nanintaba kampa nanta mintuguna, Poroba wama abakankaipi uma asima mima maya uwaimintiye: Nao'mitaba, tigeba kamana'ne abitasinta, pipa Kariti mari mintokana, esegiyenaba kampa aboraramima kotatepa ataenaba kampa pesine.²² Pigoya, ibaba tinta paru piyo. Wasanaba kampa pu'waokana, wanipisa kareba abiwapa ataena pikiye.²³ Piya, iba aseka agonempa Koti, ae age asagaya'yuvo ntagara, aebla ottagana naeti tumpa aborama,²⁴ maya unamiye: Poro kaeba a-kaekuruba po. Kaeba wa'ega yagarama Sisati uma irosakana, ibaba Kotiba a'ya'ma kaege wa kinapa kaga tiyo'maeyakiri ataenaba kampa purikibewe, unamiye.²⁵ Piya, nao'mitaba, tige tintawamaba paru peno. Naeba Kotikaba nagu'ama tara taraba kampa puwa, kamana unamemi pipa esegi pikiye.²⁶ Pigoya, wanipisa kareba to marisa wanipi ima aigasabakiye, piya uwaimintiye.

²⁷ Pigoya, Etiria kayo wanipinti uwa nasi nasi puma mintuwakana, nagsarisara tarawa tarawaki tumpaema yaga a'ya pogini, asekape wanipisa karebisa kina'miba igeba maba pabigo agarosakena kanta pune, piya uma,²⁸ wanipinti motama makagakena iga'na atauguna tumogini, maema agaumepa 120-piti puntiye. Aibogini, ise'anto wama to kake motama agaumepa 90-piti puntiye.²⁹ Piya, yabati uma taegusanagawema iyekuru pumagini, kana aka'isa anka tarawa tarawakipa wanipa atauguna tumogini, agarosama marima pankao iyenem, nunamu uma mintantawe.³⁰ Mintini, pubasanaume kina igeba kana wanipisa kareba atate pai'ma wakena napimagini, amana karento atauguna tumogini, kumpari uma maya untawe: Taeba amoti anka ka takana tumikiye, untawe.³¹ Piya yuguna, Poroba irebu kina'mi kiye yagarabe aokinape maya uwaimintiye: Pubasana kina'miba pai'ma iyegaka waigiri, tigeba kayo wanipi tumima naisuwaewakbewe, untiye.³² Piyama uwaimogini, irebu kina'mi ubu'maranta iga'na arisagasuguna, kayo wanipinti tumogini uwa atantawe.

³³ Pigoya marisanaga agawa puma mintana, Poroba a'ya'ma kina maya uwaimintiye: Tigeba ti'amaka tiyekuru pumagiri nanintaba kampa nanta a'a-o uma uwa mirite kanagana, nagisarisa tarawa tarawaki tumpaema yaga a'ya piye. ³⁴ Pika ibantoba naninta naiyo. Naninta nama esegi pumagiri, uwa mariba kanara ima mikibewe. Piya, ti'no nkabiyapa kapa kampa tumima a'yuguba puma kaka wakiye, untiye. ³⁵ Piya ute, a'ya'ma agantuguna, pareti ka maema Koti a'mu potama apako puma nantiye. ³⁶ Naogini agate, intawamaba paru pogini pabiyama nawaentawe. ³⁷ Pigoya, kana wanipisa karebi wasana mintantompepa 276-wa kinane. ³⁸ Piya, naninta nama iga'e paurite, kana wanipisa karebintisa witi naninta kupa maema kayo wanipinti maebuguna, wanipisa kareba ase'yo puma intiye.

Wanipisa kare ataena puntiye

³⁹ Pigoya marima pankao iyogini, kampa aganta kuma agantawé. Piya pumagini, ka au'i yaba kampa waintometi agategini, wanipisa kareba pita'i wama kepari ikena puntini. ⁴⁰ igeba a'ya'ma anka iga'naba arisauguna kayo wanipinti tumogini, seriba paibusguna iyogini, aebasanakenaena iyoba'magini, kepari aobibi pumagini wantawé. ⁴¹ Aebasanakenagaba esegima igiga puguna, kana wanipisa kareba mara tamakaema esegi puma waintantiye. Aibogana, kayo waninkamaba aiga'yo'ya purite ainti kanama kana wanipisa kareba aeguma ataena puntiye. ⁴² Ataena pogini, iga'na namapisa kinapa nagosa aima iyegaka wasanaga, irebu kina'miba iyeguma kaikena untawé. ⁴³ Piya yuguna, kana irebu kina'mi kiyawaimpa Poroka uma akayuwaitama, yogini nagosa airite wakena kina'miba paitama kayo wanipinti pa'yo puma, nagosa airite kepari intawé. ⁴⁴ Pigoya, ka'isa igeba ya aboborape wanipisa karewama nkatunkatape maema airite wantawé. Piya pumagini, a'ya'ma kepari uwa iwaegaintawé.

28

Poro aeba Morota mari ampintantiye

¹ Pigoya uwa mari iwaeyuwakini, wani nkagoba ka agewapa Morota yugu abintune. ² Piya puwakini, pimparasa kina'miba tabera kayone puratantawé. Piya, ka aema esiba tabogini yakupa kaerataugu tapiwaentune. ³ Pigoya, Poroba yaku nkibisa kibi'ma kaeyomepa, kana ibisapinti ma mintomentaga maema kaeiyogana mu'mu pogana, irosa'ma Poro nkayata oka'ma agigi puntiye. ⁴ Aibogini, pimparasa kina'miba kana ma'ama ayapi aba naogini agate, mare-u me-u pumagini maya untawé: Ma ntagara aeba kyo yogurtagan, kayo wanipinti kampa tumima puremitisa mata'i uwa mari iyegin, arupuyenama nkantota'ena aboramiye, untawé. ⁵ Piya yuguna, Poroba kana mapa ayapisa airubuma yakupi maebotate, kampa abanasuma mintantiye. ⁶ Piyama mintogini, igeba pabigo arogū pekanabaruk'ena ware'nama purekini agakena agawa puma mintantawé. E'eropa mintumepa to ka'enaba kampa aboramogini agategini: We, ma ntagara aeba amanine, untawé.

⁷ Pigoya, mintantompe pi agora tabe yogurtawai agewapa Pabiriyasi ae ma kuma waintantiye. Pigoya pi ntaramarama ntamankapi taba puratama aogima tao'maeyoga, kakaga yaga mintantune. ⁸ Mintuwakana Pabiriyasi nkabawampapa yonintana aentabaenabe au yakupe taogana mintantiye. Piyama mintogana, Poroba abite namankapinti ima, ayapa a'nota atama nunamu uma aogi potantiye. ⁹ Piya pogini, pi awaga kamana abite, pi kana marasa kina'mi ka'isa yoni kinapa kana kana puguna, pabiyama kaba itantiye. ¹⁰ Aibogini, pi'na antotapa wasanamiba uwoma a'muntanaba tamintawé. Piya puguna, wakena yaga aboraoginiba, ke'i nakena nanintabe to ka'isaenabe wanipisa karebi ataratantawé.

Poro Aroma kumata uma irosantiye

¹¹ Pigoya, pi kana mara mintuwakana opa kakaga a'ya poga, to ka wanipisa karebi ima wantune. Pi wanipisa kareba Aresanteriya kumatisa, amotapa amani agayagaya yagara taramisi isima pumaranta, pi nttagaba tae mintuwampeta ankwaitogana, iguguyapa a'ya puwaoga, pita'i ima wantune. ¹² Wama Sairakusi kumata uma irosa'ma, kakaga yaga pita mintantune. ¹³ Pitasa wama Arisiyamu mari ainkima mintuwakana, marogana taka'isa ponta pumagina tapasanakasoga, ka yagawa, to ka asekana, suma wama Putiyorí kumata uma irosantune. ¹⁴ Irosauwakini, pi kumatasa mono kina'miba tagega'e yugu, tonautensa tara umaema yaga igege mintantune. Piyama migaita, pitasa to kake wama Aroma kumata uma irosakena wantune. ¹⁵ Pigoya, pi kumatasa mono kina'miba: Piyama kanawé, kamana abite, karu'ena ka'isamiba kanama Apiyasi maketi kumata ampa tabatantawé. Piya to ka'isamiba kakaga situwa wainta kumata ampa tabatantawé. Piya puguna, Poroba igategina Koti a'mu potamagina, antabinti abima asoya puntiye.

¹⁶ Pigoya, Aroma kumata uma irosauwakana, kiya yagaraba yogini iga'na namapipa Poroba kampa aba potantawe. Irebu yagara ka'waina kiya kabitaogana uwa namapi mintantiye.

Poro Aroma kumata aogi mono kamana untiye

¹⁷ Mintogana kakaga yaga a'ya puwaogana, Yuta kina'mi kiye kina igege'a yogini, irosauguna kamana maya uwaimintiye: Nao'mitaba, naeba Yuta taokinapa ataena kampa puwaitanta, tayabamagi ige kamanapa kampa maema a'yuguba puntone. Piyama kampa puwagini, uwa a'yugu igeba pita'i Aroma kumatasa kina'miti unatauguni, Yerusalem kumata iga'na nautintane. ¹⁸ Piya, Aroma kina igeba nae kamana ago uma aborakenagaba kaintananekaza aguyosagantawe. ¹⁹ Aguyosakate iyoba natakena yuguni, Yuta kina'miba esegima aka'yuyugu: Tabe kiye yagara Sisa, aeba kamana'nepa uma a'ya penema, untone. Piya, Yuta kina tao'mi ige kamana mata'i maete kanama uwaitakenaba kampa kanatone. ²⁰ Pigoya, pika naeba tigama tigege kamana uma abenema tigege'a yogiri irosawe. Piya, naeba napima Isureyo kina a'ya'ma agawa puma miyompe, aetaka uma naya ku'nataga mintuwe, untiye. ²¹ Piya uma uwaimogini maya untawe: Marota'i Yuta kina magoreti miye kina'miba kae kamanapa kampa kaema tamintawe. Piya, ka yagaraba kampa otauguna, kanama kae antage kamanapa kampa yegi abintune. ²² Pi kamana maema miyempepa, pipa kaega yega abenema yune. Piya, pi nttagarama tupisa kina igekaza: Maga maga kina'mi uma kamparaga puwaitaga abune, untawe.

²³ Kamana piya ute kana atantawe. Pigoya, pi ntaga aboraogini uwoma Yuta kinapa Poro ntamapi aki puntawe. Aibuguna, abayabiso agobima Koti kabiratakena kamana uwaimima mintogana ase untiye. Aibuntana, Mosesebe poropetebe aogi awaga kamana uma kaemaranta, Isuti au'wa aboranti, pi kamana agoba uma wasana imatiti'enawaipa aborama esegi penemagina uwaimintiye. ²⁴ Piya uwaimogini, ka'isa kina'miba kamana'wapa abima abuguni, to ka'isa kina'miba kampa abima aogi puntawe. ²⁵ Piya pumagini, to kamana to kamana yuguna, Poroba ka amato puma uwaimogini a'wae puma wantawe. Pi uwaiminti kamanapa mayamawé: Aota Awamus'a'ama poropete yagara Aisaya otaogana, tayabamagi aogi kamana maya uwaimima tigeka taga kamana maya untiye:

²⁶ Kaeba mamparasa kina'miti wama Kotitisa kamanapa maya uwaimo: Kamanapa abikibepa, tigeba kampa aogima agowapa abibebe pukibewe, iye. Piya, to ka'isaenaba agakibepa, tiyowamaba agowapa kampa aogima napikibewe, iye.

²⁷ Pabiayamagini, mamparasa kina igu igeba akunkatama iyorka mintawe, iye.

Aibeka, iyo agakenaba pugagate, pipa kampaye.

Igeba abima napikenä pugagate, pipa kampaye.

Igupa a'wae pigi, aogi puwaitasanagaba kampa ibiye, iye. Pika uwaimoma, omintiye.

²⁸ Piya, naeba urimekiri abiyo. Koti aogi tau'ikenaenaba aborantemipa, pipa to marisa kina'mintana piye. Igeba kanara abima i'mu pikibewe, untiye. ²⁹ (Kamana piya uwaimogini, igeba a'wae puma mare-u me-u puta wantawé.)

³⁰ Pigoya, Poroba kaboba tara Aroma kumata aewa ntamapi miyogini, wasanamiba pita'i umagini agabuntawé. ³¹ Uma agauguna, Koti kabiratakena kamanape, Wa'ega Isu Karaisiti kamana agobe, kampa aekuru punta aogima uwaimima mintantiye.

AROMA KINA'MI NKISA PORO KAENTIYE AROMA

Poroba aposoro Yugawa agobintiye

¹ Naeba Porona, Isu Karaisiti kayokaya yagararanawe. Aeba naepa aposoro unatama: Kotitisa aogi kamana uwaimoma, naba punatantiye.

² Paipa Koti aewa poropete kina'wampi uwaitaogini, au'wa aborakibi kamanapa paisa mono isapi kaemarantaw. ³ Pi aogi kamanapa yagarawampaka kaemarantaw. Piya puguna, au'wapa Tebiti ae tupi ampa aborantiye. ⁴ Aota agu'wapa Koti ntagara mintantiye. Pika agoba purintapisa asintika, Isu Karaisiti aeba Wa'egare esegima aboraramintiye. ⁵ Piya pogana, awagaenawaka uma aposoro yugaba taepa tamintiye. Piya, Karaisitika maga maga kina mono uwaimigini abima timatiti puma wasiyoma, uratantiye. ⁶ Piya, tigeke kaga Isu Karaisiti ae tu uritantina, pabiyama abimagiri wasiyiyo.

⁷ Pigoya, Aroma kina, Koti nkabugai kina mintaw. Aeti atokaenta kina'wapa, a'ya'ma tigeti ma nkisapa kaeyuwe. Tabarempa Kotibe Isu Karaisitibe, isigetisa awagaena puma paruyena tigeti waima waiyeno.

Poroba Aroma kina igakena puntiye

⁸ Maru mayama ukena puwe: Tigeba mono maema aegaraka, a'ya'ma maga maga kina'mi abegana aogi pemika, a'ya'ma tigeke na'mu puma, Isu Karaisiti nkagega'eraka Kotinempa na'mu potauwe. ⁹ Pigoya, naeba Koti kayokaya'ena punta, yagarawampa nkaogi kamana uma aborakenaba a'ya'ma esegiyenonetasa pogana, agonepa Koti abemika a'ya'ma yagaba nunamu yopa, tigekega esuritaewe. ¹⁰ Naeba esotaokana abekana kanarasakanaba, aro ntaganto kepa aboranameka tigetiba wakuwemagi omuwe. ¹¹ Piya, naeba tige ampa tigamagi, Aota Awamus'a'ama a'muntana timekana, tigu tonkiya puritasanaga nabiye. ¹² Pipa mayamaw: Timatiti'enarimpaba nao'maeyakana, nae namatiti'enanempaba tige tiyo'maeyakana, a'ya'ma esegi puratasanaga nabiye.

¹³ Pigoya nao'mitaba nae nabemika abiyo. Naeba to marisa kina'miti posa puma, pabiyama tigeti mono yuga uma puma ka'isa a'aema aborakenaga, uwoma ntaga tigeti wakena kamana yuwe. Pigoya, wakena yoganaba ka'isaenama ke'ne akuntatagi, atate miyuwe. ¹⁴ Pigoya, Kariki kina'mitibe to kina'mitibe uma mono aborawaymoma unatantegi, pabiyama abikenaena wainta kinapa kampa wainta kinape, igeke mono iretanepa waintiye. ¹⁵ Piya waintegina, pabiyama Aroma kina tigekeba aogi kamana urimikenagaba, nagu'amaba aseyo piye.

Aogi kamanapa Koti nkesegiyenaw

¹⁶ Pigoya, naeba aogi kamanakaba nanipa kampa pokana, pipa Kotitisa esegiyenama tau'ikiye. Piya, marupa Yuta kina'miti aborantikana, to marisa kina'mitibe kaga aborama, tamatiti pompe kinapa a'ya'ma tau'ikiye. ¹⁷ Piya, tamatiti pokana, aogi kamana'watasa Koti arupu puratakenaenaba maema aborawaeyagi to tamatiti puyaba miyune. Pika Koti kamana ka maya iye: Ka'waina amatiti pukibi'napa, Koti arupu potakana e'wasaenabi miyaba mikiyema, iye.

A'ya'ma kina'miba Kotipa ikabitaw

¹⁸ Pigoya, Koti amo'enawapa mantarisa ampa aborama, a'ya'ma kamparagaena puma ataena pe kinapa antota'ena imikiye. Piya, pi kina'miba ataenawaitasa tagantanaba maema kakakinapa, antota'ena imikiye. ¹⁹ Koti nkagoba kampa kakamaba waiye. Koti aewa maema aborawaeyagini agantanaba agawe. ²⁰ Pigoya, Koti nkesegiyenawape wa'egawamantanabe waiyaba miyogana, paitaka'ya a'ya'maena mampabisena pumarantine. Piya, Kotipa kampa agapa, a'ya'ma yaga pumarantemintanaba aogima agawe. Agagana, Kotiba mintika wasana abikena kipa kampa akuniye. Kampa akunegina, aib'o'enawai kakakena kipa kampa waintiye.

²¹ Piya nanagawanane: Igeba Kotikaba abintapa, taga Kotikaba kampa napima, ageba kampa maema asagayuma, i'mupa kampa potawe. Kampaye. Napiyenewaimpaba aibonabo pegina, igu'amaba a'yugu puma tununtanama asaewaitaye. ²² Piya, igeba: Taeba abinta kinatawe utegini, Koti nkaobi aib'o'ena pewe. ²³ Piya pumagini, kampa pu'wakena Kotiba, ae e'wasaenaba ikabitamagini, ama koti iyapisa potama, pu'wakena wasanabe kabarape yagabe kuyabe, ae aoga potamagini agisewe.

Koti atate tonarona kamparaga pewe

²⁴ Piya pegana, Kotiba i'ni ntapiyenewai aegaraka igasaye. Igasagini, i'nintana aega'magini igewai i'ama maema ata potawe. ²⁵ Piya, igeba Koti taga agoba ikabitama,

a'wae puma kumpari kamana maeyawe. Piya puntini, Koti pumarantintanamaka agisuma kayokaya'ena potamagini, kampa napiyewe. Piya, pi aborantemi nttagarama nkage maema asagayuma miyaba miyeno. Tagane.

²⁶ Pigoya, wasana igeba Koti ika'intaesi potagana, igasagini kamparaga i'nintana pewe. Piya, waya'miba waya'waena arupuyenaba kaita a'wae puma antage'enaba pewe. ²⁷ Piya, wamiba pabiyama waya'waena arupuyenaba kaitegini, a'wae puma kupiyonama intabaipintiba tabe yaku nkiragini, iyo'mige kamparagaena puma kaga kampa ini pewe. Aibegana, aibo'ena pikenaenawaimpa antotapa igu i'amapa pipa aguya alkenaena maeyawe.

²⁸ Ige napiyenewaiimpaba Kotikaba kampa ibegina, Kotiba igasagini, igeba kamparaga napiyenawaipa maema antage'ena pewe. ²⁹ Piya pegina, a'ya'ma aguntaenabe kaintanabe, to wainantanagaba abugaintanabe ataena pikenaenabe, igegeti pumaewaye. Piya, to waina mparatu mikenaenabe, wasana aegukenaenabe, ma'ena pukenaenabe, amiy'o'enabe, wasanamika kampari uwaigaikenaenabe, igegeti pumaewaye. Igeba wasana ika'i kamana uwaitantini, ³⁰ akaya suntini, Koti kama potentini, kamana kampa abintini, igebigo'ena puntini, igewai maete intini, ataenaba kasa'ena aborantini, inogi ibagi kamana akayuntini, ³¹ napiyenewai kampa aogima napintini, igewai kamanapa kampa wasintini, iyokina kampa agu kao'ena puntini, to kinapa pabiyama kampa intara puwaitawe. ³² Pigoya, igecka Koti nkarpulu kamana'amaba maya iye: Piyama aguntaena pukibi'napa aeguyigina pureno, iye. Pabi kamana igeba abibebe puntiniba, kampa aega'ma: Aerawane, yewe. Piya umagini, aguntaena pumagini, to kina'mi piya pentanaga: Kanarane yegana, aguntaenawaimpa tabe piye.

2

Koti kamana ukenaenaba arupu pukiye

¹ We, nao'yagara, nanaga to kinapa kamana uwaitane. Nanaga to waina nkaupipa pima yene. Kaegeba pabiyia pene. Piya, to waina nkaupi pima yempepa, pipa kaeka kaupi pima yene. Amentanti kayokayo yagara miyempekana, aibo'enaga kakakena kipa kampa waintiye. ² Piya, piya pe kinapa kamparaga antota'ena Koti imekana kanarasama arupu pukiye. Pipa abune. ³ We, nao'yagara, piya pe kina'mipa ipi pima yene. Kaegapa nanaga pintanaba pene. Napima Koti nkantota'ena agaite kaegaka wampena, a. ⁴ Piya, Koti anta paruyena pugatama, kampa karu'ena ika pugatama, agoya pugatama, tabera aogima kabigataye. Kae napiyempepa uwaena kanta piya, a. Kaeba kagu a'wae poma, Koti anta paruyena pugatamipa, pipa kampa aogima napiyeno.

⁵ We, kantawamaba esegi pegina kagupa kampa a'wae punta, kamparaga ikapa tabera akibene. Piya, Koti nkamo'ena aborakibi nttagaba arupu antota'ena aborakan, kamparaga ikapa a'ya'ma maekibene. ⁶ Piya, Kotiba a'ya'ma kina miyompentanarempa nkawameta ikantanaba eta'ma airamikiye. ⁷ Pigoya, paebuma miye kina, e'wasaena maekena puma Koti nka'muntanabu mikena puma miyaba'enaga napima asi nasi aogiyena pe kina, igepe miyaba'enaba imikiye. ⁸ Pigoya, ige'enawaika napiye kina, tagantanaba ikabitama ataenaba wasiye kina, igegetiba ka ibirakenaenabe amo'enabe aborawaekiye. ⁹ Piya, a'ya'ma ataena pe kina, Yuta kina marupa pugaite to marisa kinape, igegetiba iki nakiyenabe tabe iyekuruyenabe kaga aborawaiimikiye. ¹⁰ Piya, a'ya'ma aogima miye kina, Yuta kina marupa pugaite to marisa kinape, igegetiba e'wasaenabe paruyenabe kaga aborawaiimima a'muntanaba imikiye. ¹¹ Kotiba tabe agi wainta kinape uwa kinape kaga a'yigi tatama antota'ena tamikiye.

¹²⁻¹³ Pigoya, Yuta kina'miti Koti nkago kamana waintegini, a'ya'ma aguntaena pe kina igepe ago kamanatasa Kotiba a'yigi nkitakiye. Piya, ago kamana uwa igerasa abikibe kina, igeba Koti nkaobi kampa arupu punta kina mintawe. Ago kamana wasikibe kina'mi igemana aogima asoyaena pikibewe. Pigoya, to marisa kina'miti Koti nkago kamana kampa waintegini, a'ya'ma aguntaena pe kina, igepe uwa igaikiye. ¹⁴ Piya, to marisa kina'miti ago kamana kampa waintegini, igeba napiyenewaitasa ago kamana kampa abinta kina'miba igewai ago kamana abinta kina kanta pewe. ¹⁵ Piya pegana, Koti igupi ago kamana kaemarant'i na aboraye. Piya pegina, napi napiyenewaimpa ka'isa yagaba: Ataena pewe, uwaitantana, to ka'isa yagaba: Aogiyena pewe, uwaita piye. Piya pegana, pi ago kamanapa uma aboraye. ¹⁶ Pigoya ainti ka yagaba Koti otakana, Karaisiti Isuba wasanami kakanta kamanapa uma aborama a'yikikiye. Pi nttagaga naeba aogi kamanapa yuwe. Pabi nkawameta aintiba aborakiye.

Mono ariwa maema mikenaenaba kampaye

¹⁷ Pigoya, kaegakaba nanawe yene: Naeba Yuta yagara mimagi, Koti nkago kamana abima aogima aega'ma, Koti tuntana puma mintuwe, uma kau maete ima miyeno.

¹⁸ Kaeba Koti nkabugaintanagaba abintane. Piya, ago kamana ugamuguna abintampeka, arupuyenagaba owe yene. ¹⁹⁻²⁰ Piya puma, kaegakaba maya yene: Naeba Koti nkago kamana'ama agobe tagantanawape abintoka, kanara iyorka kinapa kepa iyakimagi, tununtanabi miye kinapa kanara e'wasa puwaitamagi, kampa abinta kina kanara uma arupu puwaitamagi, ama'mana ntagara iyakikena yagararanawe, yeno. ²¹ Kaeba piya kamana yempe'naga, kaeba wasana kamana uwaimintanapa, kaegakeba kampa abena, a. Kaeba wasanamika: Kuntanaba a-piyoma uwaimintanapa, kaegakeba kuntanaba pena, a. ²² Kaeba: Kumiyenaba a-piyoma uwaimintanapa, kaegakeba kumiyenaba pena, a. Kaeba ama kotikaba kampa kabegin, ama koti ntamapisaenaba uwa maeyana, a. ²³ Kaeba: Naeba Koti nkago kamana abintuwe, uma kaukapa maete ima mintanapa, aguntaena puma ago kamanapa akayuma, Koti nkageba ata potana, a. ²⁴ Piya, Koti kamana'amaba maya iye: Yuta kina, tige'enaenaga to marisa kina'miba Koti nkagega'eба akayasotawe, iye.

Taga ara'ena tagu'amantanawe

²⁵ Pigoya, kaeba Koti nkago kamana wasiyegana, kau kasakena ara'ena kanara peno. Aibegana, ago kamana akayuyeganaba, kauta ara'ena pumaranta'enaba pipa kumpari'enawe. ²⁶ Piya, to marisa yagara, ara'ena auta kampa wainta yagarama, Koti kamana agoba wasiyemipa, aeba au kasama ara'ena punta yagara kanta piye.

²⁷ Pigoya, Yuta kina, tigeti ago kamana'ama nkawa'ena waintemika tipa kasantapa, nanaga kamana agoba akayuyewe. Piya, to marisa kampa i kasanta kina'mi, kamana agoba aegara'nagi, aintiba tipi pima kamanapa uritakibewe.

²⁸⁻²⁹ Pigoya, wasanama ari autasa Yuta kina'mi nkara'ena maenti'na, aeba Koti nkaokina Yuta yagara kampaye. Aeba antabaipinti Koti nkaokina mintipa, pipa taga Yuta yagarawewe. Piya, au kasakenaenaba pipa taga ara'enaba kampaye. Koti taga ara'enaba pipa agu'amantanawee. Pipa ago kamana ariwapa wasikenabu kampaye. Pipa agowa wasikenawee. Wasanama piya pemipa, mampabisa kina'mi iyobinanee. Koti nkaobi tabe agiba waiye.

3

Ataenamaba aogiyenaba kampa apirintakiye

¹ Pigoya, Yuta kina'miba aya puma to marisa kinapa igasawe. I kasama ara'ena pe kina aya puma igasawe. ² We, Yuta kina'miti uwomantana aogiyena aborantiye. Iba ka urimukuwa, abiyo: Yuta kina'mipa Kotiba awaga kamana'wa uwaimima: Aogima kabiyyio, uwaimintiye. ³ Tagane. Ka'isa Yuta kina'miba kana kamanapa kampa aega'magini akayuntawe. Piya puntakana, Kotiba aewa nkuwaimintintanaba kampa akatikiye. ⁴ Pipa kampaye. We, a'ya'ma kina'miba kumpari kamanapa yegana, Koti ae abintowapa a'ya'ma yagaba taga kamanapa iye. Pika mono awa'ena kapa Kotikaba maya iye: Kaeba a'ya'ma kamanakampaba arupu puwaye. Wasanami kamana ugataiginapa asu igaikibene, piya iye.

⁵ Pigoya, wasanami ataenarepa agantiniba: Koti ae abiwapa arupuyenawee ukibewema, yewo. Pika ayama usune. Kotiba aguntaena pompentanama antota'ena tamekanaba kampa aogi pikiiye, usuno. Pipa kampaye. Pipa wasanami ntapiyenawee. ⁶ Piya, Kotiba antotapa arupu kampa puratasinta, aya pesine. Aintiba a'ya'ma maga maga kina'mitentanaba a'yigi tatakiye. ⁷ Pigoya, wasanami kumpariyenanepta agantiniba, Kotintanaga aogi tagantanawee, umagini, agega'e asagayukibewema, yewo. Pipa kumpariyenawee. We, naeba aguntaena pekanaba, kamparaga ikantepa namikiye. ⁸ Pigoya, ka'isa kina'miba tae yompe kamanaka akayasuratapa: Pipa aguntaena pekanaba aogiyenama nkau'wa aborakiyema yewema, yewo. Pipa kampaye. Piya ye kina'mi ata ika mpaentini, pipa kanara maezikibewe.

Arupu yagaraba kapa kampa mintiye

⁹ Pigoya, ma Yuta kina tae agoba ayama waintiye. Taeba to marisa kinapa asu igasima, pipa to awameta miyuno. Piyaba kampaye. Taeba ago yune. Yuta kinape Kariki kinape taeba kaga aguntaenama tagasaye. ¹⁰ Pigoya, pika mono isa'ama maya iye: Ka aogi arupu yagaraba taga kampa mintiye. Kampaye, iye.

¹¹ Ka'wainaba mono ago abinta kina kapa kampa mintegina, Kotipa aguyosa'ma atokaekenaba kapa toba kampa mintiye, iye.

¹² Igeba arupu kipa a'ya'ma kaitegini, ata kina'ena pegana, igetisa ka'waina aogiyenaba kampa puntine. Kampaye, iye.

¹³ Wasana iru kawama aka pisa puma, imemawama aguntaenaba pumagini, intebuwam-aba a'wae puma kumpari'enawa pewe, iye.

Piya, ma'ama kiyo'ena kanta puma, iwamu epewamaba kamanapa iye, iye.

¹⁴ Imo kamanape asa kamanape iwamupi pumae waintiye, iye.

¹⁵ Igeba karu'ena wama wasana iyeguma kaikenaga aseyo puntini, ¹⁶ a'ya'ma yagaba uwomantana aguya'aimagini, tabe kuntuyena wasana imintini, ¹⁷ wasanamiba paruyenama kipa kampa agawe, iye.

¹⁸ Igeba Kotikaba kampa iyekuruba pewe, mono isa'amaba piye iye.

¹⁹ Pigoya, taeba mayama abune: Ago kamana'amaba, pi kamana agora minta, Yuta kina, tae agorepa uma aboraye. Piya pekana, a'ya'ma maga maga kina'mite aguntaenaraka Kotiba kamanapa uratakanaba, kampa ka'wainaba kamanapa ukiye. ²⁰ Ago kamana'amaba aguntaenarepa aboraramiye. Piya pikana, ago kamana aegarakibikaba, ka'wainaba Koti nkaobi arupu agiba kampa maekiye. Pipa ago abune.

Isuti imatiti pe kina'miba arupu kinane

²¹ Pigoya, ibaba Koti arupu puratakena kipa ka maema aborantiye. Piya, Mosesago kamana'wa tayakikene arupu kipa kampa aboraye. Pinane, Mosesebi poropete kina'mibe arupuyena aborakibi ki'amaka awaga kamana untawé. ²² Pi kipa mayamawé: Isu Karaisititi imatiti pe kina'miti Koti arupu puratakena kipa aboraye. Piya, a'ya'ma mono aega'ma abibebe pe kina, taeti aboraye. Piya, agorepa kampa atarama waintegi, ²³ taeba a'ya'ma kina aguntaena puntompeka, Koti nke'wasaenarapa kampa kanarasamaba kampa miyune. ²⁴ Pigoya, Kotiba aewa awagaena puratama, Isu Karaisitipa a'muntana tamogana, yogawataso torebata ika puma arupu puratantiye. ²⁵ Piya, Koti otaogana, Isu pu'magina, korankataso ika puratama, imatiti pe'nagipa aguntaena asu'a puwaitakiye. Pigoya, aguntaenawaipa paipa Kotiba kampa karu'ena ika punta, otaogana Isu tumpa pu'ma asu'a puratama, Koti nkarupuyenawapa aboraramintiye. ²⁶ Piya puntikana, Kotiba ibaba arupuyenawapa aboraramima, Isuti amatiti pi'nakaba arupu potauwe, uma tayakiye.

²⁷ Pigoya, Yuta kina'mita tagega'e maete ikena kipa aempa waintiye. Kampaye. Pi kipa kampa waintiye. Ago kamanatakaba tagega'e kampa maete ikibikana, Isuti tamatiti pukubompe, pabitunga tao'maekiye. ²⁸ Pika maya kamana abekana waiyeno: Ago kamana wasikenaenarakaba kampaye. Amatiti'enaraka wasanaba arupu agiba maeye.

²⁹ Pigoya, Koti aeba Yuta kina'mite tabi Kotiwanane. To marisa kina'mi Kotibewe. ³⁰ Aeba Kotirepa ka'anto minti'na, Yuta kinape to marisa kinape kaga tamatiti'enaretaka arupu tagiba tamiye. ³¹ Pigoya, taeba tamatiti'enareka uma ago kamanapa kasuno. Pipa kampaye. Taeba ago kamana maema ituru pune.

4

Kotiba Abara'amukaba: Arupu yogurtawé, omintiye

¹ Pigoya, Abara'amu arirautasa Yuta kina'mite tayabamawe. Aekaba ayawe ukune.

² Piya, Abara'amu aeba aogi potantintanarasa arupu yogurtawé Koti nkaobi miyemisinta, aewa age maete iyemisine. Pipa kampaye. Koti nkaobipa piya pukenaenaba kampa waintiye. ³ Piya, Abara'amukaba mono isa'ama maya iye: Abara'amu aeba Koti aega'ma amatiti pogana, pika Koti: Arupu yogurtawé otantiye, iye. ⁴ Pigoya, ka'waina yu'na puma ikantanaba maeyakapa, pi nkikakaba a'muntanaweba kampa yune. Kampaye. Pipa yogurtawasaenawé. Piya, tau'ikenaena yogurtawasaenaba kampaye. ⁵ Pigoya, kamparaga ika kina arupu puwaitakena yogurtawé, pipa Kotiwe. Piya, ka'waina Koti aega'ma amatiti pekanaba, yogurtakaba kampaye. Amatiti'enawataka arupu yogurtawé otakiye. ⁶ Pigoya, yogurtakawanane. Kotiba arupu yogurtawé otami'nakaba, Tebiti paipa pabiya puma akayona potama, aeka mayama kaentiye:

⁷ Wasanami nkantage'enawipa Koti maegasima, aguntaenawaipa airari kaegasakini i'muntanabi mikibewe.

⁸ Piya, Wa'egawama aguntaenawaka kampa kamana otakibi'naba, aeba a'mu peno, Tebiti piya untiye.

⁹ Pigoya, ma a'muntanaba pipa i kasanta kina'minta, ibiyenawanane. Pipa i kampa kasanta kina igekenawé. Piya, taeba Abara'amupa Kotiba amatiti'enawaka: Arupu yogurtawé, otantiye. Pi kamanapa abune. ¹⁰ Abara'amuba ayama mintogana, Kotiba: Arupu yogurtaweba otantiye. Piya, aeba au kasagasima mintoganapera, uwa mintoganawé. Owe, aeba au kampa kasanta uwa mintogana, Kotiba: Arupu yogurtawé, otantiye. ¹¹ Pigoya, paipa aupu kampa kasanta mintana, pi ntagaba Abara'amu amatiti pogana, Kotiba: Arupu yogurtawé, otantiye. Piyama otaogana, pika au kasama ara'ena puntiye. Aibuntika, i kampa kasanta kina'mi Koti aega'ma imatiti pekaba, Kotiba: Arupu kinatawe, uwatayé. Uwaitamikaba, Abara'amu aeba marusa iyabamawé. ¹² Pigoya,

Abara'amu au kampa kasanta mima amatiti'enama ki aegarantemisa puma, i kasanta kina'mi kaga imatiti pekaba, Abara'amu taga taga iyabamawe.

Kotiti imatiti pe kina'mika kamana esegi puntiye

¹³ Pigoya, Kotiba Abara'amuke aga'nubaramike a'ya'ma maba maekibewema, utawaitantiye. Pipa ago kamana wasiyogana kampaye. Amatiti'enawaka Koti: Arupu yagarawe, otamagina: Maba maekibewema, utawaitantiye. ¹⁴ Pipa mayamawe: Ago kamanapa aegara'nagiba maba maeyasinta, imatiti pikenaenaba uwa waiyegina, Koti utawaitantintanamaba aibo'ena pegana uwa waiyesine. ¹⁵ Taeba abintune: Ago kamana'amaba aguntaenaraka Koti nkamo'enawapa aboraye. Piya, ago kamana kampa waintemisinta, kamparagaenaba kampa aboramisine.

¹⁶ Pigoya, Abara'amu nkaga'nubara miyompeka, taeba Kotipa aega'ma tamatiti pokana, awagaena puratama utaratantintanaba tamiye. Piya, ago kamana abe'nagi ige ibiyenawanane. Abara'amu puntisa puma aega'ma imatiti pe'nagikenawe. Piya, Abara'amu aeba a'ya'ma mono kina'mite tayabamawe. ¹⁷ Pika mono isa'ama maya iye: Naeba kaepa uwoma to kina to kina'mi nkiyabamantana pugatauwé, Koti piya untiye, iye. Pigoya, Abara'amu aegaranti Koti, aeba purinta kina'mi imaba imima, kampa aboranta'enagaba kega'e yegina aborawaeye. Piya pemi Koti nkaobi utaratantintanaba waima esegi piye.

¹⁸ Pigoya, pai Koti Abara'amukaba maya omintiye: Kaga'nugiba igeiba uwomatakaya'ya aborakibewema, omintiye. Piyama omogana, Abara'amuba: Uwoma to kina to kina'mi nkiyabamamikibene kamana abitegina: Ago anasanawema, kampa napinta, Koti kamana napi napi puma a'mu puntiye. ¹⁹ Piya, aeba 100 kabu pogana, au'amaba purinta kina kanta puntiye. Piya pogana, waya'wapa Sera pabiyama ago aentarama yagaraenaba kampa pemakana puntiye. Piya pogana, Abara'amu agantanaba, amatiti'enawapa kampa kainta uwa waintantiye. ²⁰ Koti otanti kamanapa abimagina, amatiti'enawapa kampa kasima, tara tara agiba kampa napintiye. Piya puntana, Koti nkageba asagayogana amatiti'enawapa esegi puntiye. ²¹ Piya, utamarantintanama nkau'wapa Koti aewa aborakiyema, esegima napintiye. ²² Abara'amu aeba piya puntika, Kotiba amatiti'enawa agama: Arupu yagarawe, otantiye.

²³ Pigoya, mono isapi: Arupu yagarawe, otantipa, Abara'amu ae abintogaba kampa untine. ²⁴ Taekega kaga untine. Piya, Wa'egare Isu purintapisa asinti, pi Koti aeti tamatiti potakanaba, pabiyama aeba tagama: Arupu kinatawe, uratakiye. ²⁵ Piya, aibo'enare maeragasmeka Kotiba otaogana Isuba pu'ma, arupu puratakibika purintapisa asintiye.

5

Koti: Arupu kinatawe, urataye

¹ Piya, taeba tamatiti'enaretaka Kotiba: Arupu kinatawe uratagi, kaga Kotiti paruyenabi miyune. Pi paruyenaba Wa'egare Isu Karaisiti aborama tamintiye. ² Piya, Isu aewa awagaena pukena kipa a'wairatagi, awagaenara miyune. Aibumagi, Koti nke'wasaenabi mikenaga ta'mu puma napi napi pune. ³ Piyama, kaga kuntaenabi miyompekega ta'mu pune. Taeba ago abune. Kuntaenabi mikenaenamaba tantawamapa maema esegi potaka, kampa taekita pukune. ⁴ Tantawamaba esegima waimaginaba, tara tagiba kampa napikune. Tara tagiba kampa napinta mima, Koti tamikena utaratantintanaga napima agawa pukune. ⁵ Kotintanaga agawa pekanaba, tanintanaba kampa tabukiye. Piya, Kotiba Aota Awamusia tamintegina, aeba Koti nkagu kao'ena tagupi ari'atantika tanintanaba kampa tabukiye.

⁶ Pigoya, paipa taeba kampa esegi puntuwakana kana'wa arosaogana, pabi ntaga Kotiti takabita uwampe kina'miteka Karaisiti aspiratakenaga purintiye. ⁷ Pigoya, kebaya uwa arupu kina'mitakaba pu'magina i'ikiye. Pipa kampabayawe. Piya, kebaya aogi tao'yagara ka'wainatakaba purikiye. Tarawo ka'antoma pu'mabaya au'ikiye. ⁸ Pigoya, aguntaena puma miyuwakana, Koti yogana, Karaisiti taetaka purogana, pabiyama Koti agu kao'enawa maema taeti aborantiye. ⁹ Piyama korankatasra taekaba: Arupu kinatawe uratantana, pi'na nkaboboriba Koti nkamo'enawatasra tau'ima aogi puratakiye. ¹⁰ Eya, taeba Koti kama potama miyuwakana, yagarawapa purometasra Kotiba maema ae'wati atokaeratantiye. Piyama atokaeratamagina, pi'na nkaboboriba miyaba'enawatasra tau'ikiye. ¹¹ Pigoya, abiwakaba kampaye. Piya, Wa'egare Isu Karaisiti ntugarasa atokaeratantika Kotiti ta'mu puyaba mikune.

Atamu purikenaena aborantegina, Isu miyaba'ena aborantiye

¹² Pigoya, taeba ago abune: Marupa wasana ka'waina aguntaena agobiyogana, mamparasa kina'miteti aborantiye. Pigoya, aguntaenamaka uma purikenaena aborantiye. Piya, a'ya'ma kina'miba aguntaena puwaentaka, purikenaenamaba a'ya'waema igetiba

abae pumagina aborantiye. ¹³ Pigoya, mono ago kamanapa kampa aborantogana, maru aguntaenaba wasanamiti aborama waintantiye. Ago kamanapa kampa waintomeka, aguntaenaba uwa wairite kanama waintogana, Kotiba kamana kampa uwaitaogana wasanaba uwa purintawe. ¹⁴ Piya, Antamube, ae aguntaena puntisa kampa punta yakaraki'nunkampibe, kaga purita kanauguna, Moses aborama ago kamana uramintiye. Pigoya, marusa Antamu aeba ka'ena aborantemisa puma, to aintisa yagara Karaisiti, to ka aborantiye.

¹⁵ Pigoya, Koti aboramintintanabe Antamu nkaibo'enawape isigeba ka awametapa kampaye. Piya, ka yagarama nkaibo'enaraka uwoma kinapa pu'waewantawé. Piya puguna, Koti nkawagaenawapa asugasima, uwoma kina maema paru puratantiye. Piya, Isu Karaisiti aeba ka'waina, awagaenawatasu uwa taeti aboramimma paru puratantiye.

¹⁶ Pigoya, Antamu nkaguntaena aintanawape, Koti nkaboraramintintanabe, isigeba ka awametapa kampaye. Piya, kamana ka'anto aeemita puma akayuyogana, Koti antota'ena puma at ika aboramintiye. Piya pogana, Koti paruyenaboramintintanabe uwoma aibo'enarepa asu'a puma arupuyenaboramintiye. ¹⁷ Eya, ka yagarama aibo'ena pogana purikenaenamaba asuragaintika, kapa kampa uwaba mikiye. Aibogana, Koti nkawagaenamaba arupuyenaboramintintanabe, isigeba ka awametapa kampaye. Piya, kamana ka'anto aeemita puma akayuyogana, Koti antota'ena puma at ika aboramintiye. Piya pogana, Koti paruyenaboramintintanabe uwoma aibo'enarepa asu'a puma arupuyenaboramintiye. ¹⁸ Eya, ka yagarama aibo'ena pogana purikenaenamaba asuragaintika, kapa kampa uwaba mikiye. Aibogana, Koti nkawagaenamaba arupuyenaboramintintanabe, isigeba ka awametapa kampaye. Piya, kamana ka'anto aeemita puma akayuyogana, Koti antota'ena puma at ika aboramintiye. Piya pogana, Koti paruyenaboramintintanabe uwoma aibo'enarepa asu'a puma arupuyenaboramintiye. ¹⁹ Eya, ka yagarama kamana aeguma akayuyometa'ka uwoma kina'mitete aguntaenaboramintiye. Pabiyama to ka yagarama kamana wasiyometaka uwoma kina'mitete arupuyenaboramintiye.

²⁰ Pigoya, ago kamanapa tamogana aibo'enarepa aborawaentiye. Aguntaenamaba aboraurite iyogana, awagaenawampa asugasima pumaerataye. ²¹ Eya, a'ya'ma kina'miti aguntaenamaba purikenaenamaba maema aborantisa puma, pabiyama a'ya'ma kina'miti Koti nkawagaenawampa nkarupuyenamabampiyaba e'wasaena maema aboramamegina kabirataye. Pipa Isu Karaisiti, Wa'egarempa ntugarasawé.

6

Taeba Karaisitige kaga purintompene

¹ Pi kamana'ama nkagowakaba nanawe ukune. Aguntaenamaba ntuga pekanaba Koti nkawagaenamaba aborama asugaikiye, piya ukuna, a. ² Pipa kampaye. Taeba pu'magi aguntaenaboga ago kasune. Piya, ayama to kake taogama aguntaenamaba ntuga puyaba mikune. Pipa kampaye. ³ Mono wani pai'ma Karaisiti Isuti atokaentompe'nagita, purikenaenawapi pai'ma atokaentune. Pikaba kampa napiyewo. ⁴ Pipa mayamawé: Purikenaenawapi paitatama, aeke kaga tarubinti kairatantiye. Piya, tabarempa aeba e'wasaenawatasu Karaisiti purintapisa asitaogana, mintisa puma, taeba pabiyama aosoosima to awameta miyaba mikubompeka asiratantiye.

Taeba Karaisitige kaga e'wasaenayaga mikune

⁵ Taeba Karaisitige atokaemabampiyama abune: Paisa tagupa Isuke kaga maripora aeguntaka, tagu tau'ama nkaguntaenamabampiyama abune: ⁶ Taeba mayama abune: Paisa tagupa Isuke kaga maripora aeguntaka, tagu tau'ama nkaguntaenamabampiyama abune: ⁷ Taeba mayama abune: ⁸ Taeba mayama abune: ⁹ Karaisitige atokaemabampiyama abune: ¹⁰ Taeba mayama abune: ¹¹ Taeba mayama abune: ¹² Taeba mayama abune: ¹³ Taeba mayama abune: ¹⁴ Taeba mayama abune: ¹⁵ Taeba mayama abune: ¹⁶ Taeba mayama abune:

¹ Taeba Karaisitige atokaemabampiyama abune: ² Taeba mayama abune: ³ Taeba mayama abune: ⁴ Taeba mayama abune: ⁵ Taeba mayama abune: ⁶ Taeba mayama abune: ⁷ Taeba mayama abune: ⁸ Taeba mayama abune: ⁹ Taeba mayama abune: ¹⁰ Taeba mayama abune: ¹¹ Taeba mayama abune: ¹² Taeba mayama abune: ¹³ Taeba mayama abune: ¹⁴ Taeba mayama abune: ¹⁵ Taeba mayama abune: ¹⁶ Taeba mayama abune:

Taeba arupuyenamabampiyama abune: Karaisitige purintompene

¹ Taeba Karaisitige atokaemabampiyama abune: ² Taeba mayama abune: ³ Taeba mayama abune: ⁴ Taeba mayama abune: ⁵ Taeba mayama abune: ⁶ Taeba mayama abune: ⁷ Taeba mayama abune: ⁸ Taeba mayama abune: ⁹ Taeba mayama abune: ¹⁰ Taeba mayama abune: ¹¹ Taeba mayama abune: ¹² Taeba mayama abune: ¹³ Taeba mayama abune: ¹⁴ Taeba mayama abune: ¹⁵ Taeba mayama abune: ¹⁶ Taeba mayama abune:

Taeba arupuyenamabampiyama abune: Karaisitige purintompene

¹ Taeba Karaisitige atokaemabampiyama abune: ² Taeba mayama abune: ³ Taeba mayama abune: ⁴ Taeba mayama abune: ⁵ Taeba mayama abune: ⁶ Taeba mayama abune: ⁷ Taeba mayama abune: ⁸ Taeba mayama abune: ⁹ Taeba mayama abune: ¹⁰ Taeba mayama abune: ¹¹ Taeba mayama abune: ¹² Taeba mayama abune: ¹³ Taeba mayama abune: ¹⁴ Taeba mayama abune: ¹⁵ Taeba mayama abune: ¹⁶ Taeba mayama abune:

kampa abewo. Tigeba to wainati uma atokaemagiri awamu wasiyigina, kayokaya kina'wa tibabekiri kabiritakiye. Piya, aguntaena wasikibepa kayokaya kina'wa mima purikena ikantanaba maekibewe. Mono wasikibepa kayokaya kina'wa mima arupu ikantanaba maekibewe.¹⁷ Tigeba aguntaenama kayokaya'ena purite kananta kanaba, ibaba a'ya waye. Mono ago urimima tiyakinta, pabi nkawameta tigeba abima wasiyeka, Kotipa ta'mu potaune.¹⁸ Tigeba aguntaenabisa akariyobatitagiri arupuyenama kayokaya kina'ena puma miyeka, ta'mu potaune.¹⁹ Piya, napiyenarimpaba kampa aogi pegi, wasanami kamanata awame puma ago yone. Tigeba paipa tigisa tiyatipa uwa atauguna, i'nintanama kayokaya'ena pogiri antage'ena toma toma puta ima mintantawe. Pai mintantasa puma, ma kanabipa tigisa tiyatipa uwa ataigina arupuyenama kayokaya'ena pekiri aota miyijo.

²⁰ Pigoya, paipa aguntaenama kayokaya'ena puntapa, arupuyenama wasikenaenaba tigeti kampa aborantiye.²¹ Piya, pai puntantanagaba ibaba tini pewe. Pipa nana au'wapa aboraogiri maentakawe. Pipa kampaye. Pintanama nkantota ikankapa purikenaenawe.²² Pigoya, ma kanabipa aguntaenama nkiga'naba akariyobatitantika, Koti kayokaya kina'ena puntawe. Piya puntaka aota mikena au'wapa maemagiri, antota ikankapa maema miyaba mikibewe.²³ Piya, aguntaenama nikkantanaba purikenaenawe. Pigoya, Wa'egare Isu Karaisititi atokaeyompeka Kotiba miyaba'ena uwa tamiye.

7

Awamus'a'ama kasa kita miyijo

¹ We, nao'mitaba, tigeba ago kamana abinta kina'mititi ma kamanapa urimuwe: Ago kamana wasikenaenaba purekanaba a'ya waye. Pipa kampa abewa, a.² Piya, waya ka'waina aebe awaewampa aogama mintakanaba, ago kamana'amaba: Awaegi airokaema miyeno, iye. Piya, awaewampa pureginaba, ago kamana'amaba: Wa waya ka kina kanta puma miyementanaba a'ya waye, iye.³ Pigoya, ka wae'ma aebe awaeba uwa aogama mintegina, atate wama to wa umaeyamipa, aebe kumi waene. Awae pu'wakanaba ago kamanatapa kampa uma atokaeyakana, to wa maekibipa, kumi wae kampa mima kanara mikiye.

⁴ We, nao'nempitaba, pi kamanapa mayamawe: Karaisiti nkauke atokaema kaga ago kamanati pu'wantagana, to kakemaba kampa tirakuriye. Piya, taeba Kotiti au'wapa aborakenaga to wainati atokaeratantiye. Pi purintapisa asinti ntagarari atokaeratantiye.

⁵ Pigoya, paipa paisaenabi mintantompe, pi kanabipa agunta napiyenarempaba yogawa puma tauti waiyogana, tagisa tayankambaba ago kamana akayuma, aupa purikenaenaba maema aborantine.⁶ Piya, ibaba paisa isa'ama kipa takabitama Awamus'a'ama kasa kita mikenaga, taeba ago kamanati pu'waokana tarakurinta'enaba iyoba tatantiye.

Aguntaenama ata purataye

⁷ Pigoya, pikaba nanawe ukune. Ago kamanapa pipa aguntaenawe, ukuna, a. Pipa kampaye. Ago kamana kampa waintesinta aguntaenamempa agoba kampa abosine. Ago kamana'ama: To wainantanagaba a-kauka po, kampa yemisinta, nauka pukenagaba kampa napiyosine.⁸ Piya, aguntaenama ke irogana, Koti untu kamana'ama nantabintiba ata tonaronaga nabikenaenaba aborigi, aguntaenaba puwe. Pigoya, ago kamana kampa waintesinta, aguntaenamaba purinta kina kanta puma kampa naupipa pima yesine.⁹ Paipa ago kamana naeti kampa waintometa, kanara aogima mintantone. Piya puma Koti untu kamana abuwaganaba, aguntaenamaba naeti aboraogana nauma nagupa pu'wantiye.¹⁰ Piya, pi Koti untu kamana'amaba: E'wasaenaneta kanaoga agauwantanama utanataogana, nauma nagupa pu'wantiye.¹¹ We, Koti untu kamanapa abuwaganana, pi kamanatasaga aguntaenama ke i'ma namiyo puma naeguntiye.¹² Piya poga taeba agantune: Ago kamana'amaba antage'enaba kampa puma aota waiye. Piya, Koti untu kamana'amaba aota waima arupu puma aogiyena piye.

¹³ We, pipa aogi kamana'ama naeguntiye, a. Pipa kampaye. Aguntaenama naeguyoga purintone. Piya, aguntaenama aogi kamanataka uma naeguntika agowapa taga aborantkiye. We, aguntaenama Koti untu kamanapa a'wae puma to tabe aguntaenaba piye.

Aguntaenamabe aogiyenamabe kaga tae taipi yoga piye

¹⁴ Pigoya, taeba mayama abune: Ago kamanapa pipa inatisaenawe. We, naeba mampabisa yagara mima aguntaenama kayokaya kina miyuwe.¹⁵ Piya, nabugaintanaba kampa punta, pi kampa nabugaintanaba puwe. We, nae pontanama nkagowapa kampa aogima abuntuwe.¹⁶ Piya, kampa nabugaintanaba popa, naumanepipa ago kamanakaba kanarane, yuwe.¹⁷ Piya, antage'ena popa, pipa naene naumabisaba kampa pogana, aguntaenama nagupi waima tutusunatagi, puwe.¹⁸ Naeba mayama

abuwe: Nae'ne ntaupintiba aogiyenaba kapa kampa waima aboraye. Piya, aogiyenagaba nabegi, pipa au'wa maema aborakenaenaba nayapisaba kampa puwe.¹⁹ Naeba aogiyena pusanagaba nabegi kampa puwe. Piya, ataenaba kampa pukena pontanaba uwa puwe.²⁰ Pabiayamagi, kampa nabemintanaba nayapisaba popa, naenepa kampaye. Aguntaena nagupi waintintanama tutusunatama piyaenaba piye.

²¹ Pigoya, mayama agoba agauwe: Naeba aogiyena pusanagaba nabegina, ataenamaba naeti aborama waiye. ²² We, nae nagupintiba Koti nkago kamanakaba nabugaye. ²³ Pigoya, nagisa nayati ka'enaba wainti, pi'na napiyenanempapa kama potama iga'na ubu'nataye. Piya, nagisa nayapinti waintemi aguntaenama iga'na punatama miyegi, ae kayokaya'ena puma miyuwe. ²⁴⁻²⁵ Piya pumagi, naeba napiyenonetasa Koti nkago kamana wasinta, nau'netasaba aguntaenaba wasiyuwe. Piya, naeba a'yugu yagarawanwe. Nau'ne pu'wakena antota'enaba kebaya iyoba'natakiye. We, Isu Karaisiti Wa'egarempa aeba iyoba'natakiye. Pika Kotiti na'mu potano.

8

Karaositiba aguntaena maeragasima Awamus'a tamiye

¹ Pigoya, ibaba Karaisiti Isuti atokaentompe kina, taeti ata ikapa kapa kampa aboramikiye. ² Piya, Karaisiti Isuti atokaeyuwakana, Awamus'a'ama, aeba miyaba'enama nkago, aeba aguntaena purikenaenama nkagobisa iyobatantatiye. ³ Pipa mayamawé: Taeba mampabisabia kina'miteti esegiyenarepa kampa waiyegina, ago kamana'ama kampa tau'iye. Piya, ago kamana'ama kampa pemintanaba Koti aewa piye. Aeba yagarawa otaogana kanama ampa agunta kina'mite nkawameta aborama, tae aguntaenama nkantota ika puratama asu'a puragaintiye. ⁴ Piya, ago kamana'ama nkarupuyenama nkau'wapa aboranema otaogana, taeti, paisa kipa kaite Awamus'a'ama ki'i waompé kina'miteti aborama ika puratantiye.

⁵ Pigoya, paisa ki aegara kina'miba napiyenawaipaba mampabisauenari atokaeyagina, pi Awamus'a'ama ki aegara kina'miba napiyenawaimpaba Awamus'a'amantari uma atokaeye. ⁶ Piya, mampabisauenari atokaeya kina'mitiba pu'wakenaenaba aborakan, pi Awamus'a'amatí atokaeya kina'mitiba miyaba e'wasaena waima paruyena waikiye. ⁷ Piya, wasanama napiyenawampaba mampabisauenari atokaeyi'naba Kotipa kama potamipa, pipa nanagawe. Aeba Koti nkago kamanapa kampa wasima, pipa kampa piyaenaba kanara pemika, kama potaye. ⁸ Piya, paisa ki'i aega'ma nase kina'mikaba Kotiba kampa a'mu puwaitakiye.

⁹ Pigoya, Koti Nkawamus'a'ama tigupi mintika, pipa mampabisauenamatiba kampa atokaenta, Awamus'a'amatí atokaema mintawé. Piya, ka'waina aeba Karaisiti Nkawamus'a'ama mintemi'naba Karaisiti nkaokinapa kampa miye. ¹⁰ We, aguntaenama tipa aeguyegina Koti nkaobi ago pu'waye. Piya, Karaisitiba tigupi mintegiripa, tigeba Koti nkaobi arupu kina'ená puma, tigu timawamaba aogama miye. ¹¹ Piya, Isu purintapisa asintemi ntágarama Nkawamus'a'ama tigupi miyaba miyekana, Karaisiti Isu asintemi'naba otakana, tigupi miyemi Awamus'a'wapa ti'ama purintapisa pabiyama asiritakiye.

Awamus'a'ama Koti ntagaraena purataye

¹² We, nao'mitaba, iretare waintipa, pipa arirasaenama nkiretaba kampa waintika mampabisauenari uma atokaenaba kampaye. ¹³ Piya, tigeba arirasaenamanati uma atokaekibepa purikibewe. Piya, tigeba Awamus'a'amatí atokaema mintiri, ae esegiyenawatasara arirasaena pentanaba aegugasimagiri, e'wasaenara miyaba mikibewe.

¹⁴ Pigoya, Koti Nkawamus'a'ama paitama ke'i iregini wa kinapa, igeba a'ya'ma Koti ntagaraena puma miyewe. ¹⁵ Eya, Koti aeba taekuru puma iga'na kina kanta kinapa kampa tababuma, ae yagaraena puma miyompe kinapa taba purataye. Piya puratagi, taeba aeka: Naba-o, naba-o, taga kega'e yune. ¹⁶ Piya, taeba Koti ntagara araga ki'nú mintune. Pi kamanapa Aota Awamus'a'amaté tae tagupe kaga aboraye. ¹⁷ Piya, Koti ntagara aragawa mintapa, aintiba Kotintanaba kanara maekune. Eya, Isuge kaga kapi'ená maekune. Pigoya, taeba mata'i Isuge kaga tauki nakiyena aesaga pukubompepa, aintiba aege kaga e'wasaenaba maekune.

Aintiba tabe e'wasaena maekune

¹⁸ Pigoya, naeba kamana a'yigimpa abopa, ibanto tauki naki puma kuntaena maeyompentanaba anagiyenawé. We, aintiba e'wasaena taeti aborakibintanaba asugasisma tabera waikiye. ¹⁹ Piya, Koti ntagara ki'nupa taeti e'wasaena aborakibi ntágaga, a'ya'maena Koti pumarantintanaba iyowa asagayuma agama aobi puma miyewe. ²⁰ Eya, a'ya'waemaenaba kamparagama waintana ataenaba piye. Pipa ige napiyenawaipisaba

kampaye. Koti aewa iga'na ubu'itagini piyama waiyewe. Pipa ainti aborakenaenamaka aobi puma miyewe.²¹ Piya, pabi ntagaba Koti pumarantantanaba iga'nabisa abararakibintanaba akariyobakasima, Koti ntagara araga ki'nu nke'wasaenayaga kaga tababeka mikune.

²² Piya, taeba abune. Waya'ma yagaraena pikena pegina: A-e, a-e, uma miyemisa puma, a'ya'waemaena Koti pumarantantanamaba kaga ikegini miyewe.²³ Pintanama wanane. Taepe kaga taukegi miyune. Piya, maru yawama aosa pagina agagana aintiba a'wapa aeyamisa puma, marupa Kotiba awamusupa piyama tamimagina: Yagaranene, uratantiye. Piya pegi, ibanto tauki nakiyena maema tagupi: A-e, a-e umagi, Koti taupa tumpaema ae yagara asiratakibi nttagaga taeba aobi puma miyune.²⁴ Piya puma, Koti taba pukiyema aobi pompeka tau'intiye. Piya, au'wa aboramisinta kampa aobi pompesine. Aboramintanagaba wasanamaba kampa aobi piye.²⁵ Piya, aobi pompentanama nkau'wapa kampa aboramika, taeba aobi puma mintapa tara tagiba kampa napikune.

²⁶ Pabiya puma, Awamus'a'ama amuntanareka uma tao'maeayamika tara tagiba kampa napikune. Piya, nunamu aogima ukubompentanaga kampa abibebe pompeka Awamus'a'ama aewa tao'maeayagi, wasanama kampa yisiya puma: O-o, yokana, Kotiti maete iye.²⁷ Piya, Awamus'a'ama aeba Koti nkabugaintana aega'ma Kotiti atokaentompe kina taepa tao'maema, kamanatepa maete iye. Piya pegana, tagu'ama agabasasa yagara, Koti, aeba Awamus'a'ama ntapiyenaba aogima abintiye.

²⁸ Pigoya, Kotiti tagu amompe kina, abugaintanaga untuka aegaraompe kina, taeti a'ya'ma aboramintintanaba Koti ae aogi puma esegi purataye. Pipa ago abune.²⁹ Piya, marupa taeba aegarakubomppeka Koti abogana kanarasaogana, taepa yagarawa ae aoga ka'masa piyema uratantiye. Piya pogga, taeba a'natabaraena uwoma pekana, aewapa pi tagantontana puma mikiye.³⁰ Piya, Koti aeba uratanti nkawameta tababuntiye. Tababunti nkawameta arupu puratantiye. Arupu puratanti nkawameta e'wasa puratantiye.

Koti nkantara'enamaba kampa tatakiye

³¹ Pigoya, Koti piya pemintanaga maya ukune: Kotiba ao'ena puratakanaba, kebaya asuragaikiye, a. Pipa kampaye.³² Piya, Kotiba ae'wa ntagaraga kampa aemaranta taeti tao'maeyanema, otantiye. Pi otanti ntagara aeba ka'isa aogiyenaba akutatakiya, a. Pipa kampaye.

³³ Pigoya, Koti tababemi kinapa kebaya kamanapa uratakiye. Pipa kampaye. Kotiba aewa: Arupu kinatawema, uramiye.³⁴ Piya, ke taepa tapasanakiye, a. Kampaye. Karaisiti Isu aeba taeka purogana asitaogana, ima Koti nkayatakanti asu mimagina, nunamu uma tao'maema miye. Aeba kampa taepa tapasanakiye.

³⁵ Pigoya, Karaisiti nkagu kao'enabisa kebaya tagarubakaikiye, a. Tauki nakiyerenaro, taekuruyenarenaro, karana puratakenaenawo, kabo pukenaenawo, tauka mikenaenarenaro, kamparaga puratakenaenawo, kasu taegukenaenawo, Karaisiti nkayapisaba ke tagarubakaikiye, a. Pipa kampaye.³⁶ Pintanaga taeki mono isa'ama maya iye: We, Koti, kaetaka a'ya'ma yagaba taeguyega purune, iye.

Piya, igeba tagaga, yaga aeguyesa kina mintokini taegukena pewe, iye.

³⁷ Pipa aerawane. Agu kao'ena puratanti ntagara, Karaisiti, ae esegiyenawatas pi ata puratamitanamapa asugasima aboramia miyune.³⁸ Pika naeba mayama abibebe puwe: Ka'enamaba Koti nkagu kae'enabisa kampa tagarubakaikiye. Purikenaenabera mikenaenawo. Kampaye. Enisorebera toma toma paitanta kinane. Ibanto waintintanabera ainti aborakibintanabera to ka esegiyenawo. Kampaye.³⁹ Inatisaenabera mabintisaenawo. Pipa kampaye. Wa'egare Isu Karaisititi atokaentompeka ka'ena aboramintanaba Koti nkagu kao'enabisaba kampa tagarubakaikiye.

9

Poro Isureyo aokina'mika antara puntiye

¹ Pigoya, naeba kumparipa kampa uma, Karaisiti kina'mana taga kamana yekiri abiyo: Aota Awamus'a'ama agonepa abegi, kamana ubebe puma urimuwe.² Naeba Yuta naokina'mikaba taga nantara'enaba nantabaipintiba asi nasiba tabera puwe.

³ Igeba mono waintag'a'ena puma mantari ikenaenaba piyama uwa waintemisinta, igeba uma Karaisititia nagaruba'ma ata ikantanawaipa namemika, naeba nabie, yosine.⁴ Piya, igeba Isureyo kina, Koti ntagaraena pe kinane. Piya puma, e'wasaenaba igeti aboramagina uma esegi pukena kamanape, ago kamanape, monota mikenaenabe, ainti aborakenaenagaba umaranta'enaba igeti aborantiye.⁵ Piya, iyabamagi igeba mono agona puma mintantawe. Piya puguna, ige tupisa Koti utaratanta yagara, Karaisiti,

aborama wasanaenaba puma a'ya'waemaenama nkai'ne Koti miyegi, agega'e maema asagayuyaba miyeno. Tagane.

Mono waintage kina igeba Koti nkaokinane

⁶ Pigoya, ka'isa Yuta kinapa kampa aegaragana: Koti kamana'amaba uwaena kanta piyeba, a-siyo. Pipa kampaye. Piya, Isureyo tupisa aboranta kinapa ka'isa Isureyo kinataka'yapa taga kampa mintawe. ⁷ Piya, Abara'amu ae kuratasa aboranta kina igeba taga Koti nkaokinena kampa puwaentawe. Pika Koti Abara'amupa maya omintiye: Ugamintontanama nka'wapa Aisakiwe. Ae aga'nubara taga kae'enaenamana pukibewema, omintiye. ⁸ Pi kamana'ama nkagoba mayama waintiye: Arirautasa aboranta kina'miba Koti ntagaraenaba kampa puwaentawe. Piya, Koti utaratanta kamana aegarantompe kina, taemana taga Abara'amu tuntana puntune. ⁹ Piya, Koti otanti kamanapa mayamawe: Kaboba ka a'ya puwaka naeba to aborakana, Seraba masi dagara yakari pukiye, piya untiye.

¹⁰ Pigoya, abiba kampaye. Piya, tayabama Aisaki ntagaraena aga'e pogana, Arebekapa Koti aebe kamana maya omintiye: ¹¹⁻¹² Tara yagaraena puwaitsigana, agantowampa a'nanto aka'i mima kayokaya'enya potanaoma, omintiye. Piya, isigeba kampa aborama aogiyanabe kaintanabe kampa puntusuguna Kotiba pi kamana untiye. Piya, Kotinta esegi kamana'watasa aeti atokaekenaga aboramagina, kana dagara tara isige puma mikenaenawaisikaba kampaye. Kotiba aewa ntapiyenaba aega'ma piya untiye. ¹³ Pika mono isa'ama kapa maya iye: Naeba Yekobuka nabegi, Isopa kama potauwe, untiye, iye.

¹⁴ Pigoya, pikaba nanawee ukune. Kotiba arupuyenaba ka'isa kampa piye, ukuna, a. Pipa kampaye. ¹⁵ Koti aebe Mosesepa maya omintiye: Naeba ka yagaramaka nantara potakena puntapa nantara potakuwe. Piya, to ka dagara ao'maekena puntapa ao'maekuwe, untiye. ¹⁶ Pika wasanamita pukena pompentanagabe napiyompentanagabe kampa napinta, ae'wantanaga napima antara'ena purataye. ¹⁷ Piyama Koti Parao kamana ominti, pipa mono isapi mayama kaemarantane: Naeba kaeti esegiyenanepta maema aborakana nage nawaga kamana'nempaba a'ya'ma maga maga kina'miti aboranema uma asigatauwe, untiye, mono isa'ama piya iye. ¹⁸ Piya, Kotikaba mayama abiyo: Koti aebe ka yagaraga antara potakena puntanaba, pipa antara potakiye. To ka dagara napiyenawa akunikenka puntanaba, akunikiye.

Mono ago kina'mi ika'intaesi potantawe

¹⁹ Pigoya, kaeba maya unamikibenema napiyuwe: Koti nkabugaintanaba wasanamaba kampa aibasanagina, nana pegina aguntaenarekaba kamanapa uratayema, nabigakibene. ²⁰ We, kaeba wasanagawe. Ayama antotapa Kotipa omikibene. Pipa kampaye. Aboragatanti ntagaramapa: Nanaga pi nkawametapa aboranatanema omikibena, a. ²¹ We, kabo pemi ntagara aebe a'marasa akae'ma tara kabu puma, kapa naukaena puntana, to kapa uwa anagiyenaba piye. Pi'naba kamparaga piya, a. Kampaye. Pipa ae'enawane.

²² Pigoya, Koti aebe amo'enawapa maema aboraka, a'ya'ma kina'mitaba esegiyenawata agakubompeka, paebuma miye. Piya, aintiba amo ikantana imima kaitakibi kina'mikaba, ibaba tabera agoya puwaitama paebuma uwa itamipa, ae'enawane. ²³ Piya, pi ntugarasa a'ya'ma kina'mite taobi ae antara'ena utaratanti kinapa tabera e'wasaenawa aboraramukiye. ²⁴ Piya, aeti atokaeyiyema tagega'e yi kina, paipa e'wasaenarakka utaratantine. Yuta kina ibintogaba kampaye. To marisa kinape kaga atokaekibe kinakega utaratantine. ²⁵ Pigoya, pikaba Koti yogana poropete Oseyea kaemaranti nkisapi maya iye: Paipa to marisa kinakaba: Naokina'nepa, kampa untoka, ibantoba: Naokinane, uwaimukuwe, iye.

Paipa kampa nabunti kinakaba ibantoba: Nabugai kinatawe, uwaimukuwe, iye.

²⁶ Piya: Nae naokinapa kampa mintawe uwaiminto kinakaba: miyaba Koti ntagarawewe, uritakuwe, iye.

²⁷ Piya, Aisayaba Isureyo kina'mika antara'ena pumagina maya untiye: Isureyo kina igeba wani nkawamori kepa kampa aisempesa puma, pi kanara mikibepisa Kotiba tara kina'antu i'kiye, iye. ²⁸ Pi ntagaba Wa'egawamaba kamana'waipa tumpa arisa'ma a'ya igasima, mampabisa kina'mi ikankaipa imikiye, untiye. ²⁹ Pigoya, pikaba Aisayaba ainti aborakibintanaga to maya untiye: Mantarisabe Wa'ega Yagara aebe kampa antara puma uwaena Yuta tankantonto uwa kampa itasinta, Sotomu kinape Komora kinape ige a'ya wantasa nkawame pesine, untiye.

Yuta kina'miba arupuyenma akenaga igiga puntawe

³⁰ Pigoya, pikaba nanawe ukune, a. Maya ukune: To marisa kina'miba arupuyena maekenagaba paipa kampa ebi ebi yuga puntakini, ibaba imatiti'enawaitasa arupuyenaba maeyawе. ³¹ Piya, Isureyo kina'miba ago kamana'ama nka'wapa arupuyena maekenaga ebi ebi yuga puma ago kamana wasintapa, igewai ntugarasaba ago kamana'ama nka'wapa kampa aborama maeyawе. ³² Nanagawe. Pipa mayamawе: Igeba imatiti'enarakaba kampaye. Uwa mikenaenawaitaka ebi ebi puma maekena puntawе. Pipa kampaye. Mikenaenarasaba arupuyenaba kampa maekenaenawе. Piya, ke'isa yabankama igisa aimisa imagini ware'nasa puma, arupuyena maekena kipa kampa aogima agantawе. ³³ Pika mono isa'ama maya iye: Abiyo. Saiyoni kuma, Yuta kina'mi kuma, pita atao ntabapa wasana igisa aimisa'ma ware'nakena esegi yaba atauwe.

Pi ntabankama aega'ma amatiti pikibi'naba anipa kampa pikiye, untiye, iye.

10

Isureyo kina'miba Kotitisa arupuyenaba kampa maentawе

¹ Nao'mitaba, Yuta naokina'mi nki'ikenaga nagupintiba tabera nabegi, pika Koti esotauwe. ² Naeba uma igabébe puma mayama igauwe: Igeba Koti ntuga pukenaba esegima puntiniba, agowapa kampa aogima agawe. ³ Piya, arupu puratakena kipa Kotitisa aboraogini, kampa napinta igewai pukena kika aguyosagantawе. Piya pumagini, Koti nkarupuyenaba kipa ikabitama antantawе. ⁴ Pigoya, a'ya'ma tamatiti pompe kina'miteti Karaisitiba ago kamana'ama ki'wapa akutagasagi, arupu tagiga'e maeyune.

Koti ae abemika a'ya'ma kina ibabukena piye

⁵ Pigoya, Mosese aeba maya kamana kaentiye: Ago kamana'ama nkarupuyenaya wasiyaba miyemi'naba, aeba e'wasaenara miyaba mikiye, untiye. ⁶ Pigoya, tamatiti'enama nkarupuyenawakaba ka kamana mayama waintiye: Piya, kebaya nao'maeyanema mantari ima Karaisitipa ababute tumikiye kamanapa, kaega kaumabisaba a-so. ⁷ Piya: Kebaya nao'maeyanema purinta kina'mi kumatitumpa Karaisitipa purinta kina'mitisaba ababute ikiye kamanapa, a-so. ⁸ Piyaba kampaye. Tamatiti'enama nkarupuyenawaka kamana mayama waintiye: Mono pipa pagasa'iba kampa waintiye. Pi kamatiti kamana ugamina kayakompenatanaba kawamupipe kagupipe waintiye. ⁹ Piya, wasanami nkiyobi: Isu aeba Wa'eganene, kawamupisa umagina, Koti aepa purintapisa asitama kamintika kagupinti aogima abegana, kaepa kau'iyeno. ¹⁰ Piya, kagutasa Isu nkaega'ma kamatiti puntana, Koti nkaobi arupu kina mikibene. Kawamutasa wasanami nkiyobi ae age asagayuyegana kau'ikiye. ¹¹ Pika mono isa'ama maya iye: Ae aega'ma amatiti pikibi'naba kampa anipa pikiye, iye. ¹² Pigoya, Yuta kinape to marisa kinape Koti nkaobi pakoba kampa punta ka'masa puma miyegana, Wa'egaba a'ya'ma kina'mite Nkwa'egawе. Piya, aeka agisokana a'ya'ma kina aogima kabirataye. ¹³ Piya: Wa'egawama nkage uma agisikibi'napa Kotiba au'ikiye, iye.

¹⁴ Pigoya, aeti kampa aega'ma amatiti pem'i'naba, ayama agisikiye. Piya, mono'wapa kampa abemi'naba, ayama aega'ma amatiti pikiye. Piya, monopa kampa uwaimekiniba, ayama abikibewe. ¹⁵ Piya, Kotiba mono uwaimikena yugarapa kampa uwaitantakiniba, ayama uwaimigimi abikibewe. Pipa kampaye. Pigoya, pika mono isa'ama maya iye: Aogi kamana maete wa kina'miba naukaena pewe, iye.

Isureyo kina'miba aogi kamanapa kampa aegarantawе

¹⁶ Pigoya, aogi mono kamanapa ka'isa kina'miba kampa abewe. Pika Aisaya maya untiye: Wa'ega, kamana yoganaba taepisa ke abima aegarayema, abigantiye. ¹⁷ Pigoya, taeba mayama abune: Karaisitika awaga kamana yegini, pi aogi kamana marupa abimagini imatiti pewema, abune.

¹⁸ We, ka'isa kina'miba monopa kampa abintawema, napiyuwe. Pipa kampaye. Igeba ago abintawе. Pika mono isa'ama maya iye:

Koti nkawaga kamana pumarantintanama nkawamusa agawamaba a'ya'ma maba kanarasa waentine, iye.

Aogi awaga kamana'amaba matuka matuka abae puwaentine, iye.

¹⁹ Pigoya, to kake mayama napiyuwe: Isureyo kina'miba igeba kampabaya agoba aogima abibebe puntawema, napiyuwe. Pipa kampaye. Igeba ago abintawе. Pika Moseseba kamana mayama kaenti, pipa maru ukwe:

Naeба uwa kina ibabekini asurigasigiri, monotaka abima tintawama ata punatakibewe, Koti iyema, untiye.

Piya, to marisa aibo kina ibabekiripa timo pukibewe, iyema, untiye.

²⁰ Pigoya, Aisayageba kampa aekuru punta maya uma aborantiye:

Kampa naguyosa'ma mintanta kina'mi nabatantawé, Koti piya iyema, untiye.

Piya, naeka kampa nabigama mintanta kina igeti aborantone, iyema, untiye.

²¹ Pigoya, Isureyo kina'mikaba to maya uma kaentiye:

Naeba e'ero kanabi kamana akayuma iyekita punata kina'mikaba nayakoga puwaitama mintantogini, a'a-o uma pumireri punatantane, iyema, kaentiye.

11

Koti Isureyo kina tarantomiti awagaena aborawaitantiye

¹ Pigoya, pikaba naeba maya yuwe: Kotiba aokinapa igasima ataena puntina, a. Pipa kampaye. Naegeba Isureyo yagararanawé. Abara'amu, pi nkiga'nabisa, Penisameni nkaruyenabisa aborauwe. ² Piya, Koti pai kibi'ma ibabuntu nkaokinapa kampa igaikiye. We, tigeba Iraiya kamana mono isapi kaemarantapa kampa aisumagiri abewo. AeBa Isureyo kina'mikaba amo puma Kotiti kamana mayama uwantantiye: ³ We, Wa'ega, igeba poropete kinakapa iyeguwaegaintini, kaeti arata yare pumaranta akusabakaintawé. Piya puntakini, naeba nabinto mintogini naegukena yewe, untiye. ⁴ Piya yoganaba, Kotiba aya kamana a'wae pomintiye. AeBa maya omintiye: Nae'neti ibabumara'o'nagiba 7,000 kina, abe'isa kina'mi koti Peyeripa kampa irakabintane, Koti piya untiye. ⁵ Piya, ma kanabipa pabiyama ka'isa Isureyo kina'miba kampa ikabitaganá Koti awagaenawatasá ibabiye. ⁶ Pipa ige yoga puma esegiyena petasaba kampaye. Koti awagaenawatasá puwaitaye. Piya, esegiyenawatasá ibabesinta, awagaenabá awagaba kampa pesine. ⁷ Pigoya, pikaba nanawé ukune. We, Isureyo kina'mi ibugaintanabá kampa aborantawé. Koti kibi'ma ibabuwaitanta kina'miba ago maeyagini, a'ya'ma to kina'miba igu'ama akukasima esegi puma mintawé. ⁸ Pigoya, pika mono isa'ama maya iye:

Koti aeBa igu'amapa maema a'yugu puntana, iyoba aerikaewaitama, igeba akunkaitata kanaye, iye.

⁹ Piya, Tebiti aeBa pikaba ka maya uma kaentiye:

Igeba i'mu ntanintawai nama: Koti nkaobi aogiyena punema napiyigina, kobakena iga'na kanta puwaitama, kuko'ama pisa puma, yaga kaganta pekini, ware'naigina antota'ena aborwaimikiye, iye.

¹⁰ Piya, iyo tunusuwigini kampa aogima agawa, kaeba ikaba aegayotagini miyaba miyivo, untiyema, iye.

Kotiba to marisa kina ibabuntiye

¹¹ Pigoya, pikaba naeba maya yuwe: Yuta kina igeba igisa aimisa'ma ware'nasa puma, monota ware'namagini agora ikabitantawé, a. Pipa kampaye. Igeba aibo'ena puma mono kipa kasuguna, Kotiba i'kena kamanapa to marisa kina'miti aborantiye. Piya pogini, to kina'mi abigini Isureyo kina'miba igamagini, intawama igobi pekini igege ankagasigasi piyemawe. ¹² Pigoya, mono aibo'ena puma kasantenawaimpa maga maga kina igeti mono au'wa maema aborantiye. Piya, Kotintana kasima amuntanawaimpaba to marisa kina igeti mono au'wa maema aborantika, taeba mayama aogima abune: Aintiba Koti agowapa a'waitama Isureyo kina a'ya'ma ibabuwaitaika, tae taobi to awameta maema aborakiyema, abune.

¹³ Pigoya, ibaba to marisa mono kamana abinta kina tigeba ma kamana urimukuwa, abiyo: Naeba to marisa kina'mi nkaposoro miyo'nana, pi ntuganepa asagayuyuwe.

¹⁴ Piya, Yuta naokina'né abimagini igobi pekini ankagasigasi piyema pi ntugane asagayuyoka, igeppa ka'isa iisanaga nabiye. ¹⁵ Eya, Isureyo kina igaintika, Kotiba maga maga kinapa ae'wati atokaewaitantine. We, ainti ibabukibipa, purinta kina'miba iyoganta kina'mi pesa puma kasa kanta pewe, ukibewe. ¹⁶ Pigoya, Yuta kina paipa pareti kao'ena puntapa, marupa uwaena paretinto Kotipa amintapa, a'ya'waemaena ae aobi kanara aota puntiye. Piya pesa puma, Yuta kina'mi nkiyabama, ige iga'nubaraba Koti nkaokinane. Piya, ya abuwapa Koti nkaobi aota waimagina, pabiyama amawapa aotane.

¹⁷ Pigoya, Yuta kina'miba aogi oribi ya kanta puma mintagana, ka'isa amawapa a'warikasima, tigeba kabubintisa ata oribi yawama nkamawa kanta puma minta, maemagina ampa amato puritigiri, oribi yawama nkabu'watasa aogi apaba maeyawé.

¹⁸ Pikaba tipa a-mpaete iyiyo. Piya, ti'mu puntiripa, mayama aogima napiyivo: Amawamba abu'amapa kampa apaba amiye. Abu'amaba amawamapa apawapa amikaba aogima napiyivo.

¹⁹ Pigoya, pikaba tigeba maya ukibewe: Kotiba tae maema amato puratakenaga ka'isa amawapa a'wari'ma maebugasagina kanara piyema, ukibewe. ²⁰ Pipa tagaka ukibewe. Igeba monoti kampa imatiti puntaka, a'warikaintiye. Piya, timatit'ena manataka asiritagiri aogima miyewe. Pika tigeba tipa a-mpaete intiri, tiyekuru piyo.

²¹ Pigoya, Koti aebe aogi yawama nkamawapa kampa uwa atanta a'warikaintiye. Piya, ige puntasa puma kampa timatiti pukibepa, kaga a'waritigaikiye. ²² Pigoya, tigeba Koti nkantara'enawakaba agasiyaenawakabe aogima abiyo. Piya, ae ika'intaesipota kina'miti agasiyaena aborantana, kampa atate wanta Koti nkantara'enawata mikibe kina'mitiba, tigeti au'wapa aborarimikiye. Piya, tigeba aeti kampa atokaekibepa, kaga arisa'ma maeburigaikiye. ²³ Pigoya, Yuta kina igegeba iyekitaenawaipa kaite igu a'wae piginaba, Kotiba to kake amato puma asaewaitakiye. Eya, pikaba kanara abintiye. ²⁴ Piya, paipa tigeba kabu oribi yawama nkamawa mintuguna, Kotiba arisa'ma tibabuma usa oribi yamara amato puritantine. Tigeti nkagoba kampaye. Piya, Yuta kina'miba usa oribi ya kanta puma mintagana, ige'wai nkabuta amato pukibipa, pipa to awametane.

Kotiba a'ya'ma kina'mite kao'ena purataye

²⁵ Nao'mitaba, tigeba napiyenari aega'ma aibo nabo pusanaga ma kakanta kamana aborarimukuwa, abiyo: Isureyo kina ka'isa igeba mono abikaena igu akumpa esegi potama mirite wakini, to marisa ibabukibi kinapa pai'waekibewe. ²⁶ Piya pai'waewaigini, a'ya'ma Isureyo kina'miba i'ikiye. Pika mono isa'ama maya iye:

Saiyoni kumatasa A'yigitatama Tababikena Yagara ka aborama, Yekobu tupisa kampara-gaenawai paga puma maebu igaikiye, iye.

²⁷ Pi nttagaba naeba aguntaenawaipa asu'a puwaigasimagi, utawaitanta'enaba igegetiba aborawaimukuwe, Kotiba piya untiye, iye.

²⁸ Pigoya, Isureyo kina igeba mono kamanaka Koti kama potawe. Piya pegana to marisa kina'miti au'wapa aboraye. We, iyabamagika Kotiba agu kao'enaba puwaitagini, Isureyo kina ae aokina mintawe. ²⁹ Piya, Koti aebe a'muntana imintintanabe utawaitantintanabe aeba tonaba kampa pumagina, Yuta kinapa ibabiye. ³⁰ To marisa kina tigeba paipa Koti kamana akayuma mintantawe. Piyama mintuguni, Yuta kina igeba kamana'wa akayuma ika'intaesipotauguna, tigeti Koti a'wae puma antara'enawapa aborarimintiye. ³¹ Pigoya, Yuta kina igeba kamana akayuma mintawe. Aintiba tige mintast puma pabiya puma Koti nkantara'enawapi mikibewe. ³² Piya, Koti aebe kamana akayukubompeta a'ya'ma kina utarataye. Utaratama, a'ya'ma kina'miteti antara'enawa aboraramiken, piya piye.

³³ We, Kotintanabe napiyenawape abikaenaenawape e'erota pumaema waintiye. Piya, kamana otakenaenama nkagoba kebaya ukiye. Pipa kampaye. Napima pukenaenama nkagoba kebaya agakiye. Pipa kampaye. ³⁴ Pi'ka mono isa'ama maya iye: Eya, Wa'egawama ntapiyenaba ae nttagarama abiye. Pipa kampaye, iye.

Piya, kamana yeginaba ae nttagarama kapa ao'maeye. Pipa kampaye, iye.

³⁵ Piya, ae nttagarama Kotipa maru ka'enaba amintitaka iretawapa amikiye. Pipa kampaye, iye.

³⁶ Piya, a'ya'waemaenaba aepisa aboraye. A'ya'maenaba ae esegiyenarasa uwa waiye. A'ya'waemaenaba ae'enawane. We, ae aegae'sasagayuyaba miyeno. Tagane.

12

Taeba tautepa Koti ameno

¹ Nao'mitaba, naeba Koti nkantara'enawaka uma mayama esuritauwe: Tigeba titipa Kotiti aoganta muta atama, aota mima ae aobi aogima miyoyo. Pi'na mono maema mikenaenama nkau'wantana peno. ² Piya, tigeba mampabisa kina nasisuba a-puma ka'masapa a-piyo. Kampaye. Tigeba napiyenaripa maema a'wae pigma, to tiga kanara peno. Piya pikibepa, Koti nkabemintanaba aogima agakibewe. Piya, aogiyenawape aukaenawape aota'enawape agama maekibewe.

Taeba Koti nkuratanti ntuga peno

³ Pigoya, Koti nkawagaena namintika ka ka urimukuwe, abiyo: Tigepisa ka'waina aewaka abekanaba taberapa a-nkiyeno. Koti a'yipimpa amatiti'ena ka ka iminti, pabi nkawameta peno. Pikaga asu agaikenaba a-ntapima, aogima napiyyio. ⁴ Taeba maya abune: Ka tautasa a'ya'ma auka'iba ka'masa ntugaba kampa pune. ⁵ Piya pompepa, taeba a'ya'ma kina'mita Karaisititi atokaema ka tau'ena puma miyokana, toma toma ntugrapa pako puratagi, to kina kanta puma miyone. ⁶ Pigoya, Koti awagaenawa aboraramima toma toma ntugrapa utarataye. Utaratamika a'yuguba kampa pukune. Piya, ka'wainaba Koti nkesegiyenabisa mono uma aborantana, pipa amatiti'enawampa ase'yona waitanti nkawameta peno. ⁷ Piya, to ka'waina aeba kayokaya puntanaba, pipa aogima peno. To ka'waina aeba mono tisa yuga puntanaba, pabi ntuga aogima peno. ⁸ To ka'waina wasana asitakena puntanaba, aogi yuga puma asitano. To ka'waina aeba yabankatasa wasana iyo'maentanaba, awaga yagara miyeno. To ka'waina aeba

paitawaitama miyintanaba, aumaba asagarare puma miyeno. Piya, to ka'waina aeba wasanaga antara puntanaba, a'muntanabisa ao'maeyano.

Paru kao'enama kamanane

⁹ Pigoya, agu kao'ena puwaitakena puntiripa, ago'enaba a-piyo. Aguntaenaba tikabitama aogiyenamati uma atokaeyyo. ¹⁰ Tigeba tiyo'mige atokaema kayonenabi miyiyio. Piya, tiyo'mi nkige tigeba ka ka maete iyiyo. ¹¹ Mono yugarikaba a-tiyekita puma asagarare puma miyiyio. Awamus'a amaba tintabaipinti aburakiri, Wa'egawama kayokaya yuga piyo. ¹² Tigeba ti'muntanabisa Wa'egagaba kabiyyo. Tiki nakiyena aborarimekiriwa esegima mintiri, asi nasi nunamu uma miyiyio. ¹³ Kotiti atokaenta kina'miti ka'isaenawai kampa waiyekiripa, iyo'maeyyo. Namu kina kanaigiripa, tigeba aogima kabiwaitaiyo.

¹⁴ Pigoya, wasanami pumireri puritaigiripa, akayona puwaitaiyo. Pumireripa antotapa a-puwaitama, akayonamana puwaitaiyo. ¹⁵ Pigoya, wasanami inta asoyaena pigiripa, iyo'maema tinta asoya piyo. Kube'ena pigiripa, iyo'maema kube'ena piyo. ¹⁶ Pigoya, ka kina'ena puma paruyenabi miyiyio. Ti'amaba inatapa a-nkiyekiri, tumima minta kina'mige ka awameta miyiyio. Nae nabintone aogi napiyena waintiyemaba, a-ntapiyyiyo.

¹⁷ Pigoya, ataena puritaigiripa, antotapa ataenaba a-puwaitaiyo. Wasanami nkinyobi agoya puwaitamisa piyo. ¹⁸ Tigeripa ma'ena pukenagaba toma toma kina'mige igege a-ntapiyyiyo. Pipa kampaye. Ke waintakiripa, tigeba paru puma ka kina'ena puma miyiyio. ¹⁹ We, nao'mitaba, kaintana puritaigiripa antota'enaba a-puwaitamagiri, uwa ataigina Koti nkamo'enawataka waiyeno. Pika mono isa'ama maya iye: Kaintanama nkantota yugaba, pipa naene pukuwe, Wa'ega aeba piya untiye, iye. ²⁰ Pika mono isa'ama maya iye: Kama kinakapa aga'ena abekanapa, nanintaba amo. Wanika abekanapa, wanipa amo. Piya pikibempepa a'nota yaku irarata'ena potagana ani pukiye, iye. Pipa aegaraiyo. ²¹ Piya, a'yugu ataenamaba tigeba tigakiye. Tigeba aogiyena pumagiri ataenaba agasiyo.

13

Kamani kina'mi kamanapa aegaraiyo

¹ Pigoya, a'ya'ma kina'mitaba kiya kina'mi nkimentanti miyiyio. Pipa kiyaenaba Koti maema imintemi ntuga pewe. Pipa uwa wasanami nkiwamutasaba kampaye. Igeba Koti nkawamutaka mirite kanawe. ² Piya, ka'waina aeba kiya kina'mi kamana akayuyemi'naba, Koti otanti'nakeba kaga aibasanaye. Aibasanakibe kina'miba igeba Kotitisa ata ika maekibewe. ³ Piya, wasana kanara aogima miye kina igeba kiya kina'mikaba kampa iyekuruba pewe. Ataena pe kina igeba iyekuru pewe. Piya, tigeba kiya kina'mikaba kampa tiyekuru puntiripa, aogiyenamana piyo. Piya pigina, Tigewamaba ige iyobi aogi peno. ⁴ Piyama, kiya kinaka: Aogima kabiwaitaiyoma, Koti uwaitantiye. Piya, tigeba ataena pusanaga tiyekuru piyo. Igeba paroya ntoginkaipa uwaba kampa urintawe. Igekaba: Ataena pe kina naetisa antota'ena imiyoma, Koti uwaitantiye. ⁵ Piya pika, kiya kina'mi nkimentanti miyiyio. Antota imu'enaga tiyekuru pikenaenaga wanane. Tintawama nkawamu aega'ma piya piyo.

⁶ Pigoya, igeba Koti kiya Yugara uwaitantika kabiratawe. Pikaba takisi imewe. ⁷ Piya, tigeba utaritantintanaba aega'ma aogima piyo. Takisi maekena kinapa takisiripa imiyoma. Kotataka takisi maekena kinapa takisiripa imiyoma. Asugasima minta kina'mi nkimentanti miyiyio. Tabi igiyaga kina'mi nkigeba maete iyiyo.

Agu kao'enaba mono'ama nkagowane

⁸ Pigoya, uwa au'wa kampa wainta'enama nkiretaenaba a-piyo. Iretaenari ka'anto waintipa, pipa tigeba wasana agu kao'ena puwaitakenaenawe. Agu kao'ena wantaga mikibi'naba ago kamana'ama nkau'wa ago aboraye. ⁹ Pigoya, Koti paipa ka'isa kamanapa maya untine: Kumiyenaba a-piyo. Wasana a-nkaeguma kaiyyo. Kuntanaba a-piyo. To wainantanagaba tikaba a-piyo. Pi kamanape to ka'isa unti kamanape, pi'na agowaipa mayamawe: Tigeti ti'ama kao'ena potasa puma tiyokinapa pabiyama puwaitaiyo. ¹⁰ Piya, agu kao'ena wantaga miyemi'naba aeba ao'yagaraba ataenaba kampa potaye. Piya, agu kao'ena pem'i'naba ago kamana'ama nkau'wapa aboraye.

Arupu ki'i waiyo

¹¹ We, tigeba mono abe kina'mitaba, kana'ama nkagoba abewe. Tiwaibisa tiyogama asikena, pi kana aboragiri abewe. Tamatiti puntompe kanabipa Wa'egawama tau'ikenaenaga aobi puntompene. Piya, tau'ikena kana ibaba agarosaye. ¹² Piya, ase uma a'ya pekana agarosama marikiye. Pika tununtanaripa akubugasimagiri, iregu arakaebuma e'wasaenara miyiyio. ¹³ Taeba ara miye kina kanta puma aogima miyeno. Piya, esegi wani ntama aibo'ena pikenaenabe ma'ena pikenaenabe a-piyo. Kupiyona

pikenaenabe to i'nintana pikenaenabe a-piyo. Maka kamana ukenaenabe tigobintana pukenaenabe to kake a-piyo.¹⁴ Ti'ama ata napiyenagaba a-ntapima aegaraiyo. Tigeba Wa'ega Isu Karaisititi atokaema, aepa ti'ama nkanapa maema piyo.

14

Taeba tao'mi mikenaenawaipa a-nkayikeno

¹ Pigoya, mono aega'ma amatiti'enawa magimagi pem'i'napa ababuma tiyo'ena potaiyo. Wasanama ntapiyenarasa monotakaba kamanatasa ma'enaba a-puma, ababuma aogi potaiyo. ² Piya, ka'waina aeba amatit puma a'ya'maena nantanta: Pipa Kanarane yegino, to ka'waina amatiti'enawapa magimagi pem'i'naba awaseba kampa naye. ³ Pigoya, naninta nami ntagararama kampa nami ntagaragaba abima ataba a-potano. A'a-o uma kampa nami ntagaramaba a'ya'maena nami ntagaraga abima kamanapa a-nkotano. Pi kina'mipa Kotiba ibabiye. ⁴ Piya, tigeba ayama to kina'mi ntuga pem'i ntagaragaba kamanapa otawe. Pipa kampaye. Aeba aogi pikiy, ata pukiy. Pipa abagarima, ae'enawane. Piya, Wa'ega aeba ao'yagarara kanara esegi potakibipa aogima mikiye.

⁵ Pigoya, ka yagarama mono kanabi ka yagagaba napima: Asugasima tabe yagawe, iye. Piya yegino, to ka yagaramaba napimagine: A'ya'ma yaga ka'masa piyema, aeba iye. We, pi nttagaga napima ka ka kina'mitaba tigeti ntapiyen aegaraiyo. ⁶ Piya, ka yagarama ka yagaga napima: Tabe yagawe yemi ntgararamaba, aeba Wa'egawamaka napima piyaba iye. Naninta nami ntagara aeba Wa'egawamaka napimagine piyama naye. Piya puntana Kotikaba: Na'mu pugatauwe, iye. Piya, a'a-o uma kampa nami ntgararamaba aeba pabiyama Wa'egawamaka napima: A'a-o, iye. Piya untana Kotikaba: Na'mu pugatauwe, iye. ⁷ Pigoya, taetekaba: Miyuneba, a-siyo. Puruneba, a-siyo. Pipa tae'enaenaba kampaye. ⁸ Miyompepa Wa'egawamantana pune. Piya, mikubompope purukubompope taeba Wa'egawamantana. ⁹ Pika Karaisitiba pu'ma aogamagina, purinta kinape aoganta kinape kaga Wa'egarentana puratakena puntiye.

¹⁰ We, tigeba nanagabaya tiyokina'mi ntasikenenaenawaikaba kamanapa uwaitaw. Nanagabaya tiyokina'mikaba abima ataba puwaitaw. Taeba a'ya'ma Koti nkaora aborakana, agorepa uma aborakiyema kampa napiyewo. ¹¹ Pika mono isa'amaba maya iye:

Naeba taga kauwe. Aintiba a'ya'waema kinapa irakabinatakibewema, Wa'egawamaba piya iye.

A'ya'ma kina'mi nkiwamu'amaba Koti nkagisukibewe, iye. ¹² Piya puma taeba abune: A'ya'ma ka kina'mitaba Kotiti agore uma aborakubompeka, uratantine.

Taeba tao'mipa ataenaba a-puwaitano

¹³ Pigoya, pika taeba tao'mikaba ipi pima kamanapa a-nkuwaitano. Pipa kampaye. We, aogima napima taokina'mikaba igisa aibasanakaikenaenabe i'ware'nakenaenabe taeba a-puwaitaigiro. ¹⁴ Naeba Wa'ega Isuti atokaema mima mayama abima esegi puwe: Ka'enaba i'nintana pikenaenaba kampa waintiye. Pigoya, ka'waina aeba ka'maenaba i'nintanawema napima pemipa, aewapa i'nintana piye. ¹⁵ We, tigeba ka'isa naninta namagiri tiyo'mi ntapiyena ata puwaitapa, tigeba agu kao'enabipa kakema kampa wawe. Piya, a'yugu tigeba pi ntaninta naigina, tiyo'yagaramaba tigama ata pusanaga napima aogi ki'i i'ataiyo. Ae asitakenaga Isuba purintiye. ¹⁶ Piya, tige aogi mikenaenaritaka a'yugu to kina'mi tikayasuritasanaga aogima kabiyiyo. ¹⁷ Piya, naninta nakenaenamabe wani ntakenaenamabe mono'ama nkagoba kampaye. Pipa Aota Awamus'a amati atokaema arupu puma mikenaenabe, paruyenabi mpikenaenabe, ta'muntanabi mpikenaenabe, pipa Koti kabiratina nkau'wane. ¹⁸ Piya, ka'waina aeba Karaisititi kayokaya'ena potakanaba, Kotiba agama a'mu potakini, wasanamiba agamaginiba: Aogi yagarawe, otawe.

¹⁹ Piya puma, taeba paruyena aborakibi ki'i aega'ma, tao'mi nkintaba esegi puwaitano.

²⁰ Pigoya, a'ya'ma nanintaba aogi nakenaenaw. We, a'yugu taeba nanintaraka uma Koti ntugaba aguya'aikune. A'yugu taeba ka'isa naninta nakini, tao'miba ware'nasangaw. Pipa Koti nkaobi ataenaw. ²¹ Piya, tiyo'mi maema ware'nasangaw, igeka uma awasebe, waini wanipe, to nabe: A'a-o yiginaba, pipa kanarasakiye. ²² We, pikaba napiyenaripa Koti nkaobi maema miyigina tigeti waiyeno. Ka'waina aeba ka'enaga abekana kanarasakan, antabintiba abima ataba kampa puntana, asoya pekanaba aogi pikiy. ²³ Pigoya, to ka'waina aeba abima tara tara agi napimagine nakibemipa, aewa aogi napiyenab kampa aegarakiye. Piya, ae'wantanama kamanapa otakiye. Eya, ae'wa aogi napiyena akayuyi'naba Koti nkaobi aguntaenaba piye.

15

Taeba Karaisiti ntapiyena aegarano

1 We, monota esegiyenarentaga kina'mitaba anu kina igama iyo'maema kuntae-nawaipa aesagabeno. Taete ntapiyenaba a-nkaegarano. ² Taeba taokina'mi igecka napimagi, aogimagi, monota esegi pikibeka iyo'maeyano. ³ We, Karaisiti aeba ae'wa ntapiyenaba kampa aegaraye. Pika mono isa'amaba ae awamutasa kamana maya iye: We, Koti, iyekita pugata kina'miba iyekitaenawaipa naeti aborantine, piya untiye, iye. ⁴ Pigoya, pai mono kamana uma kaentapa, pipa taeka ago abibebe piyoma kaemarantane. Pi kamana'ama nkagoba esegi puratamaka taeba paebuma mima Koti taba pukibitaka aobi puma mikune. ⁵ We, Koti aeba asiratama esegi puratakena agowe. Aeba Karaisiti Isuti atokaema tiyo'mige kaga mikenaga tiyo'maeyano. ⁶ Piyama tiyo'maeyagiri, tigeba ka tiwamu'ena puma, Wa'egare Isu Karaisiti nkabawampa, Koti, ae age asagayuyiyo.

Karaositiba Yuta kinape to marisa kinape kaga tao'maentiye

⁷ Karaositiba aeba agu kao'ena puma tiba puntisa puma, pabiyama tiyo'mipa ibabiy. Piya pukibepa, Koti nkageba asagayukibewe. ⁸ Naeba mayaga yuwe: Koti aeba tayabamagipa ka'isa kamana utawaitantiye. Pi kamana'ama nkau'wa aborakenaga Karaositiba aeba tumpa i kasanta kina'miti aborama kayokaya'ena puntiye. ⁹ Ibintogaba kampa tumintine. To marisa kina'miba igegeba Koti nkantara'enawapa agama ae age asagayuyiyema tumintiye. Pika mono isa'ama maya iye:

Naeba to marisa kina'mi nkikapi kamanakapa aborama, inibisaba kagega'eba asagayukuwe, piya untiye, iye.

¹⁰ Pigoya, mono isa'ama to ka maya iye:

To marisa kina, tigeba Koti nkaokina'mige ti'mu piyo, untiye. iye.

¹¹ Pigoya, to kapa maya iye:

Aya'ma to marisa kina'mitaba, Wa'egawama nkagega'eba asagayuyiyo, iye.

Piya, a'ya'ma toma toma kina'miba age asagayuyeno, piya untiye, iye.

¹² Pigoya, to ka kamana Aisaya mayama kaentiye:

Tayabama Yesinta aubutaso asaewaba pakiye, iye.

Pi ntagaramaba asima mima to marisa kina'mita kabiwaitakiye, iye.

Piya pekini, to marisa kina'miba aeti uma atokaema i'mu pukibewe, iyema kaentiye.

¹³ Pigoya, Koti aeba tamatiti'enarempa nkagoba mintiye. Aeba timatiti'enarika ti'muntanabe paruyenabe tabera aborama timekiri, Aota Awamus'a'ama nkesegiyenabi mima, aeti atokaekenaga aobi pigina, Kotiba pintanaba pumaeritano.

Poroba a'muntanabisa mono yugaba puntiye

¹⁴ We, nao'nempitaba, tigeka ago abibebe pogana kanarasaye. Piya, tigeti aogiyenaba pumae waintegiri, tigeba mono agoba kanara abibebe puma, anka'o'mae ao'mae pumagiri aogi napiyena tiyo'mipa imikena pewe. ¹⁵ Pigoya, Koti awagaena namintika, naeba naekuru kampa punta, tigegu'a pusanaga ka'isa kamanapa esegima tigeti kaeyuwe. ¹⁶ Piya, to marisa kina'miti Isu Karaisiti mpono kayokaya yagara mama mima Koti nkaogi kamana uwaimoma unatantika, Koti awagaenaba namintiye. Pipa namoga, aeti muta atama to marisa kina ibabute kanakena puwe. Piya pekana, Aota Awamus'a'ama aota puwaitakana Kotiba a'mu puwaitanema, yuwe. ¹⁷ Naeba Karaisiti Isuti atokaema mima Koti ntuga poka, kanara tabera Kotiti na'mu potauwe. ¹⁸ We, Karaisiti esegiyena namoga puwagana au'wapa aboranti, pika yuwe. Tonagaba kampa ukuwe. Piya, ae esegiyenara to marisa kina'miba iyakuwagini, mono kamanapa wasintane. Nawamutatasabe nayatasabe yoga pumagi, ¹⁹ awame'enabe kasa'enabe aboramagi, Aota Awamus'a'amatisa esegiyena mae u'ma, to marisa kina'mi mono abima wasiyiyema, yogaba puntone. Yerusaremi kumatasa agobima Karaisiti nkaogi mono'wapa uwaimirite wama Iririkamu mari uma irosantone. ²⁰ Piya, naeba to kina'mi kimaranta abobora kisanagaba kampa nabuntine. Karaisiti nkage awaga kamana kampa uma irosanti kina'miti wama mono kamana uwaimikena puntone. ²¹ Pika mono isa'ama maya iye:

Ae kampa aganta'nagiba agowapa agakibewe, iye.

Aeka kampa abinta'nagiba agowapa abikibewe, iye.

Pi nkawameta uwaimintone.

Poro aeba Aroma kinapa igasanaga abuntiye

²² Pigoya, pi mono uwaimikena yugaba uwoma waiyegini, uwaena yaga tigeti ikenaba pi ntugama ke'nepa akuntatantiye. ²³ We, uwoma kabuba tigeti wama tigasanaga nabuntine. Pigoya, mapa ka'isa mariba yoganepa a'ya pemika, ²⁴ Sipeni mari wakena punta tigetiba uma irosakuwe. Uma irosa'ma, ka'isa yaga tigege umiyekana nantawamaba asoya pekiri, nao'maeyigi naeba Sipeni mari kaga wakuwe.

²⁵ Pigoya, ma kanabipa Yerusaremi kumati ima, Kotiti atokaenta kina'mintana iyo'maekeenaena maete iyuwe. ²⁶ Piya, Masetoniya kina'mibe Akaiya kina'mibe intawama aseyonabisa mone aki puma, Yerusaremi kumatasa Kotiti atokaenta kina kusi kina'minta, ige'ena aki potaga, maete iyuwe. ²⁷ Piya, igeba inta aseyonawaika piya pegana kanarasaye. Eya, to marisa kina igeba Yuta kina'mitisa taga mpmono kaga abintaka, iretaba igetiba waintiye. Pi ireta imeka kotankaitasa iyo'maeayagana kanarasaye. ²⁸ Pigoya, pi kana iretawama nkau'wapa maete ima, mesu imekana a'ya pekapa, tigeti wama tigata, Sipeni mari wakuwe. ²⁹ We, naeba abintuwe: Tigeti kanakubopa, Karaisiti nka'muntanaba pumaema wainatantaka, ima tigeti asu aborakuwe.

³⁰ We, nao'mitaba, tigeba Wa'egare Isu Karaisitigabe, Awamus'aama nkagu kao'enawakabe napima, naekega kaga Kotiti nunamu esegima yigina nao'maezano. ³¹ Nunamu yigini, Yutiya mari mima kamana kampa aegara kina'mi nkiyapisa Kotiba akaruyoba'natano. Piya, tigeba nunamu yigini, to marisa kina'mi intawama aseyonabisa mone aki potaigi, pipa Yerusaremi kumatasa Kotiti atokaenta kina me imekanaba iga ibeno. ³² Piya pigi, ainti Koti abemika, naeba na'muntanabisa tigeti ima migarakana paru nabeno. ³³ Pigoya Koti, paruyena agowamaba, aeba a'ya'ma tigege miwaeyano. Tagane.

16

Poro aeba Aroma kumatasa ao'mika: Aya pewe, untiye

¹ Pigoya, tamanapa ka agewapa Pibi, aeba Senkeriya kumatasa monota ai'aru pe kina iyo'maema miyemi, ² pi ae uma irosakiripa, nae nabemika, tigeba Kotiti atokaenta kina pesa puma, Wa'egawamaka uma ababigina tikapi miyeno. Pi kana wae aeba nae'nepe uwoma kina'mipe kaga kabiratakiri, aeba ka'enaga kunta pekiripa ao'maeyiyo.

³ Pigoya, Pirisikage Akurageba Karaisiti Isu ntugara nao'maeynamo ntagara taragaba: Aya pese iyema, uwaisimiyo. ⁴ Pi isigeba purikenaenagaba kampa napinta naeka umaginisi nao'maeysaga, na'mu puwaisitaue. Pipa nabawanane. A'ya'ma to marisa monota ai'aru pe kina'mibe kaga ta'mu puwaisitaune. ⁵ Pigoya, isige namapi monota akibe kina'mikaba kaga: Aya pewe iyema, uwaimiyo.

Nabugami ntagara Epinitasi, aeba Karaisititi atokaema Esiya mari paitawaitami ntagaraga: Aya pene iyema, omiyo. ⁶ Mariya, aeba araga ntuga puma tiyo'maeynamo nkwaekaba: Aya pene iyema, omiyo. ⁷ Antoronaikasige Yuniyasige, isigeba Yuta nao'yagara taragaba: Aya pese iyema, uwaisimiyo. Isigepe naepe iga'na namapipa kaga taba puratantane. Piya, isigeba naepa isika'i natamaginisi paitama Karaisititi atokaema aposoro kina'mi nkiyobi kanara puntamene.

⁸ Nabugai ntagara Ampiriyetasi, aeba Wa'egawamati atokaenta yagaragaba: Aya pene iyema, omiyo. ⁹ Ebani, Karaisiti ntugara tao'maenta yagara, aeba nabugai ntagara Sitakisibe, isigekaba: Aya pese iyema, uwaisimiyo. ¹⁰ Aperisi, aeba Karaisiti nkaobi kanara'ena puma againti ntagaragaba: Aya pene iyema, omiyo. Arisitoburasi ae tunkampikaba: Aya pewe iyema, uwaimiyo. ¹¹ Erotiyoni, aeba Yuta nao'yagaragaba: Aya pene iyema, omiyo. Nasisasi ae tupisa Wa'egawamati atokaenta kina'mikaba: Aya pewe iyema, uwaimiyo.

¹² Tarapinage Taraposage, isigeba Wa'egawama ntuga peme wae taragaba: Aya pese iyema, uwaisimiyo. Tabugai ntagara Pesisi, aeba pabiyama Wa'egawamati araga ntuga pemi ntagaragaba: Aya pene iyema, omiyo. ¹³ Arupasi, aeba Wa'egawama nkaega'ma tabe puma miyemi ntagara, aeba anowampabe, pi nkwaepa nanontana punatami, isigekaba: Aya pese iyema, uwaisimiyo. ¹⁴ Asinkiritasibe, Pirigonibe, Emisibe, Patorobasibe, Emasibe, igege miye taokinape, igeckaba: Aya pewe iyema, uwaimiyo. ¹⁵ Pirorogasibe, Yuriyabe, Neriyasibe, ae amanape, Orimpasibe, a'ya'ma Kotiti atokaenta igege miye kinape, igeckaba: Aya pewe iyema, uwaimiyo. ¹⁶ Tegeba tiyo'mipa monotaka tiyapa imiyo. Pigoya, a'ya'ma kumatasa Karaisiti mponota ai'aru pe kina'miba tigeka: Aya pewe, uritawe.

Ka'isa kina'miba monopa akayuyewe

¹⁷ We nao'mitaba, esuritakiri abiyo: Ka'isa kina'miba atataraena maema aborama tigeti wasana ware'nakenaena aborawe. Piyama tige abinta mpmono akayuye kina, igecka aogima kiya kabimagiri tikabiwaitaiyo. ¹⁸ Piya kina'miba igeba Wa'egare Karaisititi kampa yogaba pewe. Kampaye. Igeba ige'wai nki'ama ntapiyenawai aega'ma, iga kamanape igecki nkaobi kamanape uma imiyo puma, ari itasa aegara kina'mi nkiyobi airarikaeyawe. Pi kina'mipa tikabiwaitaiyo. ¹⁹ We, mono abima wasiye tiwaga kamanatipa, pipa a'ya'ma kumati wagana pegi, naeba pika na'mu puritaue. Piya, nae nabemika, aogiyenamaka abikenaenarintaga kina mimagiri, ataenamakaba a-ntapiyivo.

²⁰ Piya piginabe, Koti, aeba paruyenama nkagowama, aro ntaganto Satanipa tigisa amentapinti aebasakaikiye. Pigoya, Wa'egare Isu nkawagaenawa tigeti waima waiyeno.

To ka'isa kina'miti: Aya pewe uma, kamana atauguna wantiye

²¹ Nao'maenta yagara Timotibe, Yuta naokina Arusiyasibe, Yesonibe, Sosipatabe, igeba tigekaba: Aya pewe, yewe. ²² Naeba Tetiyasina, Poro nkawamupisa kamana mae u'ma ma nkisapa kaemagi, pabiyama Wa'egawama nkagega'e uma: Aya pewe, yuwe. ²³ Kaiyasi, aeba naepe a'ya'ma monota ai'aru pe kinape namankatapa aogima kabima miyemi ntagarama: Aya pewe, iye. Erasitasiba aeba ma kumatasa kamani kina'mi ntaba nkaesukena yagara, aebe tao'yagara Kowotasibe, isigeba pabiyama: Aya pewe, yese.

²⁴ (Pigoya, Wa'egare Isu Karaisiti nkawagaena a'ya'ma tigeti waima waiyeno.)

²⁵ Pigoya, Koti esegi puritakenaenama nkagowe. Pika aogi mono kamana uma aborarimintopa, pipa Isu Karaisiti ae awaga kamanane. Pi mpono kamana e'ero ntaga kakama wairite kananti, ²⁶ pi kamana'ama nkagoba ibaba aborawaeye. Piya, miyaba Koti nkawamuta poropete kina'miba kamana awa'ena kaemarauguna, Koti yogana, pi kamanapa a'ya'ma marisa kina'miti wagana puntine. Igeba abima wasima imatiti piyyiyema wagana puwaentine. ²⁷ Pigoya, Koti ae abiwapa abikenaenama nkagowe. Eya, Isu Karaisitika napima Koti nkagega'e asaguyaba miyeno. Tagane. Poro piya isa kaentiye.

KORINTI KINA'MI NKISA POKA KAENTIYE (KA YAGANE)

¹ Naeba Porona, Karaisiti Isu nkaposoro Koti nkabemika unatantiye. Piya, naebe tao'yagara Sositenisibe, ² tasigeba Korinti kumatasa Koti mponota ai'aru pe kina'mititi ma nkisapa kaeyuse. We, tigeba Karaisiti Isuti atokaeritama aota puritantiye. Piya, tae Wa'egaba a'ya'ma kina'mi Nkwa'ega mintiye. Eya, maga maga Wa'egare Isu Karaisiti nkagega'e uma aegara kina, igeke tigekerma ma nkisapa kaeyuse.

³ Pigoya, tabarempa Koti, Wa'ega Isu Karaisiti, isigetisa awagaenabe paruyenabe tigeti waiyeno.

Korinti kina igit mono au'wa aborawaentiye

⁴ Pigoya, tigeba Karaisiti Isuti atokaeyuguna Kotiba awagaenawapa timintiye. Pika naeba tigeka asi nasi na'mu potama omuwe. ⁵⁻⁶ Piya, Karaisiti kamana uma aborarim-intompe kamanapa tikapintiba au'wapa esegima aboraye. Eya, tigeba aeti atokaemagiri, a'ya'ma mono ukenaenabe abikenaenabe to ka'isa aogiyenabe aepisa maema miyewe. ⁷ Piyama maema mimagiri, tigeba mono'ama nkau'wapa kapa kampa aguyosagawe. Piya, Wa'egare Isu Karaisiti aborakibi nttagaga agawa puma puma mimagiripa, ka au'wapa kampa aguyosagawe. ⁸ Piya, aeba a'ya'ma yagaba aogima kabiritakan, Wa'egare Isu Karaisiti kanabi kamanatipa kampa waikiye. ⁹ Eya, Kotiba yagarawa Isu Karaisiti, Wa'egare, aeti ka tintabarikenena naba utaritamagina, tagantana puma aogima kabiritaye.

Korinti kina'miti monoka atatarrena aborantiye

¹⁰ Nao'mitaba, naeba Wa'egare Isu Karaisiti nkagewata ma kamanapa yuwa, abiyo: Tigeba kamanapa atatarrena naba a-nkaboraiyo. Kampaye. Tigeba ka napiyena puma aki puma, ka'masa puma mima ka tintabariyyo. ¹¹ We, nao'mitaba, tikapi maka kamana aborama waintemi, pipa Korowe nkaokina'miba yugu abintone. ¹² Pi kamana'ama nkagoba mayama abuwé: Tigetisa ka'wainaba: Naeba Poro mpono aegara kina'nawe, iye. Piya, to ka'wainaba: Aporo nkaegara kina'nawe, iye. To ka'wainaba: Pita nkaegara kina'nawe, iye. Piya, to ka'wainaba: Naeba Karaisiti nkaegara kina'nawe, iye. ¹³ We, pipa ayamawe. Ke Karaisitipa pako potantipe, a. Poronaba, naeba tigeba maripora pu'ma tiyo'maentuwa, a. Nae nageraka wani pasintawa, a. Pipa kampaye. ¹⁴⁻¹⁵ We, tigeba naeka: Aeti atokaema ae agera mono wani pasintompene, usanaga, naepa kampa nabiye. Piya, naeba kampa wanipa paititantoka Kotiti na'mu potauwe. Piya, Karisipasike Kaiyasike isige isibi pai'isitanone. ¹⁶ Pigoya, to kapa mayama napiyuwe: Setepana nkaokina igeke pai'itantone. To ka'isa pai'itantokaba kampa napiyuwe. ¹⁷ Pigoya, Karaisitiba: Mono wani pai'itaomaba, kampa unamima: Mono kamana uwaimoma, unatantine. Eya, Karaisiti mparipo kamana'ama nkagowapa maete tumisanaga, iga kamana yesa puma a-suma, mono kamana'amana uwaimoma, unatantine.

Karaisiti aeba Koti nkesegiyenawe

¹⁸ Pigoya, a'abibinti tumikibe kina'miba: Maripo kamanapa ata kamanane, yewe. We, tau'ikibi kina'mitaba, taeba mayama abune: Pi maripo kamana'ama nkagoba Koti nkesegiyenawema, abune. ¹⁹ Pikaba mono isa'ama kamanapa maya iye: Naeba aogi napiyena pe kina'mi nkiga napikenena nawaipa aeguyekana tumikiye, iye. Piya, abikenaena waintaga kina'mi nkabikenaenawaipa maema a'yugu puwaitakuwe, untiye, iye.

²⁰ Piya, Kotipa agasi ntapiyena yaga yagaraba aempa mintiye, a. Ago kamana abinta yagaraba aempa mintiye, a. Kamana aogima a'wae pukena yagaraba aempa mintiye, a. Pipa kampaye. Mampabiso kina'mi ntapiyenama nkagowapa ataenawema, Kotiba tayakintiye.

²¹ Piya, wasanamiba igewai ntapiyenabisa Koti nkagoba kampa napikibewema, Kotiba aewa aogima ntapintiye. Piya, mabisa kina'miba mono kamanaka: Aibo kamanane, yewe. Piya yegana, mono aboraompe kamanatasa Kotiti imatiti pe kinapa i'ikenaga aogima iye. ²² We, Yuta kina'miba awame'ena agasanaga ibiye. Kariki kina igeba wasanama ntapiyena abisanaga ibiye. ²³ We, taeba piyaba kampa tabegi, taeba Karaisiti yara aegunta mpono yune. Piya, pi kamanapa Yuta kina igeba abegana, igisa aimisa imegini ware'nasa puma ataenaba pegana, to marisa kina'mi abepa: Aibo kamana kanta piye, yewe. ²⁴ Pigoya, Koti ae'wati atokaeyiyema uwaitai kina, pipa Yuta kinape Kariki kinape, kaga Karaisitika abimagini, igeba: Karaisiti aeba Koti nkesegiyenabe napiyena nampa nkagowape miyema, yewe. ²⁵ Piya, wasanami Kotika: Aibo'ena piye

yepa, pi nkaibo'enawampa wasanami ntapiyenawaipa asu igasaye. Eya: Koti aeba magimagiyea piye yepa, pi mpagimagiyenawampaba wasanami nkesegiyenawaipa asu igasaye.

²⁶ Nao'mitaba, Kotiti kampa atokaenta ntagaba, aya kina tigeba mintuguna tigega'e uma tiba puritantiye. Pipa mayamawe: Tigepisaba tarantomi mampabisa napiyenaba aogima maema mintantawe. Tigepisaba tarantomi mamparapa esegiyenaba maema mintantawe. Tigepisaba mampara tarantomi tabe igiba aborama mintantawe. ²⁷ Piyama mintuguna, mamparasa aogima ntapiye kina'mi nkini pusanaga, aibo kanta puma miye kinapa Kotiba tiba puntiye. Mampara esegi puma miye kina'mi nkini pusanaga, magimagi kinapa tiba puntiye. ²⁸ Piya, wasanami nkiyobi kampa agega'e waimaenabe ataenabe kampa aboraintanabe, Kotiba utawaitama maete ima, mampabi agega'e waintintanama airisakasagina tumiwaye. ²⁹ Eya, mabisa kina ka'wainaba Koti nkaobi au maete isanaga, piya puntiye. ³⁰ Piya, Koti aeba tigeba Karaisiti Isuti atokaeritama e'wasaena timimagina, Karaisitipa tae napiyenareka atantine. Piya aeba wasana arupu puma aota puratama taba puma ika puratakena ketene. ³¹ Pigoya, pikaba mono isa'amaba maya iye: Ka'waina a'mu pukena untanaba, Wa'egawama nkau maete ima a'mu potano, iye.

2

Poroba maripo yawama kamana uma aborantiye

¹ Nao'mitaba, naeba tigeti irosa'ma Koti nkage awaga kamana urimintopa, aogi napiyenetasabe tabe kamana'netasabe kampa aborarimintone. ² Naeba to ka'isa kamanapa kampa uma, Isu Karaisiti nkago kamana'amana urimikena napintone. Piya, aeba yara purinti kamana urimintone. ³ We, pai tigege mintantopa, esegiyenanepe kampa waima tabera naekuru puma tabaraba puma mintantone. ⁴ Piya, monopa urimintopa, aogi napiyenayaga yagarama kamanapisaba kampa napiyenaripe a'wae puntone. Kampaye. Awamus'a'ama nkesegiyenarasa aboraramintuwe. ⁵ Piya, a'yugu timatiti'enarimpa wasanama kamana'amati atakibewe. Koti nkesegiyenamanati ataiyoma, piya puntone.

Koti kakamaranta kamanapa Awamus'a'ama aboraramintiye

⁶ We, Kotitisita aogi napiyenagaba taga sune. Eya, mono aogima abinta kina'miba pipa abintawe. Pipa mabisa napiyenaba kampa uma, mabisa kiye kina'mi ntapiyenaba kampa yune. Kampaye. Mampabisa kina'mi ntapiyenaba nagariwakiye. ⁷ Pigoya, taeba Koti kakanta kamana'ama nkagoba uma aboraune. Piya, pi e'wasa puratakena kamanapa Kotiba paitaka'ya, ma kampa aboranti ntagaba, napima wasanamu nkiyobi kakantemine. Pipa ibaba uramega agowapa uma aboraune. ⁸ We, mampabisa kiye kina'miba pi kamana'ama nkagoba kampa abibebe puntawee. Abibebe puntasinta, e'wasa Wa'egaba maripo yarapa kampa aeguntasine. ⁹ Pikaba mono isa'amaba maya iye:

Wasana aorasa kampa agama, agebisa kampa abima, antabaipinti kampa napiyemintanaba, pipa Kotiba aborama, ae agu kao'ena pota kina, ige'ena Koti maema ai'aru puwaitaye, iye.

¹⁰ Pigoya, pi kamana'ama nkagoba Kotiba otaogana Awamus'a'ama uma aboraramintine. Eya, Awamus'a'ama a'ya'maenama nkagowapa abiwaemagina, Koti kakamaranta kaga abintiye. ¹¹ Piya, ka'waina ao'ma nkagutasa agowapa abikiya, a. Pipa kampaye. Agu'wama nkagowama aewa abikiye. Pabiyama wasana Koti nkagoba kampa uwuba abeginia, Koti Nkawamus'a'wampa abiwa abiye. ¹² Piya, taeba mampabisa awamusupa kampa maeylene. Kampaye. Taeba Koti Nkawamus'a'wampa abiye. ¹³ Eya, Koti aboraramintemintanama nkagoba kampa wasanami ntapiyenabisa aboraune. Kampaye. Pi nkagoba Awamus'a'ama uramegi uma aboraune. Piya, Awamus'a'ama taga kamanapa uwaimokini, Awamus'a'ama kina'miba abewe.

¹⁴ Pigoya, Awamus'a'ama kampa wainta yagaramaba Koti Nkawamus'a'ama nkaboraramintanaba kampa maekiye. Pipa kampaye. Aeba pika abekanaba: Aibo kamanane, umagina kampa aogima abikiye. Kampaye. Pipa Awamus'a'amatasa agoba abokana, uwa kina'mi abikenaenaba kampaye. ¹⁵ Piya, Awamus'a'wantaga yagarama a'ya'maenama nkagoba agama kanara a'yikikiye. Aibekana, Awamus'a'ama kampa wainta kina'miba pi ntagarama nkagoga aibosabo pikibewe. ¹⁶ We, mono isa'amaba maya iye: Wa'egawama ntapiyenaba kebaya a'ya'ma abima amato puma omikiye, iye. Pigoya, taeba Karaisiti ntapiyenaba maema miyune.

3

Mono yuga pe kina'miba Koti ntuga pewe

¹ We, nao'mitaba, Awamusia waintaga kina'mi kamanapa uwaimintopa, pabiyma tigepe paipa kampa urimintone. Pipa kampaye. Marusa napiyenayaga kina uwaimosa puma tigepe paibuma urimima, tigeba inamu kanta puma Karaisitintanabipa mintug, paibuma urimintone. ² Eya, naeba esegi nanintaba kampa timima, inamu ntagara nono amemisa puma kamanapa paibuma urimintone. Piya, esegi naninta nakenaba paipa kampa kanara puntiri, ibaba piyaba kampa pewe. ³ We, tigeba marusa napiyenayaga kina kanta puma mintiri, kampa esegima abintawe. Piya, tigeba tigobipa tabera puma maka kamana ukena aborantiripa, tigeba marusa napiyenayaga kina kanta puma miyewe. ⁴ We, tigepeka'wainaba: Naeba Poro nkaegarao kina'nawe yegin, to ka'wainaba: Naeba Aporo nkaegarao kina'nawe yemipa, tigeba uwa kina kanta puma miyewe.

⁵ Pigoya, nanawema tigeba napiyewe. Aporo aeba aya yagarawema, Poronteka aya yagarawema, napiyewe. We, tasigeba yoga kinatasawe. Piya, Wa'egawamaba urasitantemti ntuga puma mono urimuwagiri, abima Kotiti timatiti puntane. ⁶ Piya, naeba aintana puwagana, Aporo aeba yonintana pogana, Kotiba aborataogana i'ma au'wa aborantkiye. ⁷ Piya, aintana pem'inakaba a-so. Ae agega'eba kampaye. Yonintana pem'inakaba a-so. Ae agega'eba kampaye. Koti ae abintowa pegina i'ma au'wa aboraye. Aeka yo. ⁸ Pigoya, aintana pem'i nabe yonintana pem'i nabe, isigeba pemepa ka'masa pese. Piya, yogawaisimpa pemesa puma nakenaba antotapa pabiyma maekibese. ⁹ Eya, tasigeba Koti ntuga ka yuga pogiri, tigeba Koti ntuga mintiri, Koti kimaranti ntama mintawe. Tasige'enaba kampaye.

Yogarempa nkagowapa aborakiye

¹⁰ Pigoya, Kotiba unatantemti ntuguba naeba puwe. Piya, na kikena kina'mi pesa puma, naeba Kotiti maruntana aogi potaogini kiyewe. Pigoya, tigeba ka auka'isa amato potama kintiri, ka ka kina'mitaba aogi potama kabiyiyo. ¹¹ We, Isu Karaisiti aeba tige marune. To ka maruntana pukenaba toba kampaye. ¹² Piya, pi mparuta wasanamiba korirasawo, siribarasawo, aogi yabatasawo, yarasawo, kabirasawo, a'norasawo, amato puma kikibewe. ¹³ Pigoya, a'ya'ma na kiye kina'mi ntugawama nkagowaipa ka ka aborakiye. Piya, ainti tabe kanabipa yakutasa agowaipa aborakiye. Eya, pi tabe yaku kaemagina, yogama nkagowapa aogiyenawo aya pumabaya aborakiye. ¹⁴ Pigoya, ka'waina pi mparuta kiyekana yakunkamaba kampa tawaenta uwa waiyekanaba, aogi ikanka mpaekiye. ¹⁵ Piya, to ka'wainanta yakunkama tawaeyakanaba, ikankapa kampa maeyakana, aewapa ao'maema yakupisa iso'atama uwa au'ikiye.

Wasanama nkageba a-nkasagayuyiyo

¹⁶ We, tigeba Koti nkaota nama miyegana, Koti Nkawamus'aama tikapi miyaba miye. Pikaba kampa abintawa, a. ¹⁷ Pigoya, tigeba Koti mpono nama mpimagiri, pipa aota nama mpintawe. Pika ka'waina aeba Koti ntamapa ata potakibemipa, Koti aepa antotapa ata potama kaikkiye.

¹⁸ Tigeba tigutimpapa amiyo'enaba a-piyo. Piya, tigetisa ka'waina aeba: Wasanama kamana aogima abo ntgararanawema napiyemipa, pi ntapiyenaba kasano. Eya, mam-pabisena kampa abe kina kanta puma mintanaba, taga abikenaenaba inatisa maezano. ¹⁹ We, mabisa napiyenaba Koti nkaobipa aibo'enawe. Pika mono iss'amaba kapa maya iye:

Napiyenayaga kina'miba igewaintana pegana, Kotiba ige'wai ntapiyenarasa a'wae puma ko pawaitaye, iye.

²⁰ Piya untana to kapa maya iye:

Wa'ega aeba wasanami ntapi napiyena abemipa, anagiyena kanta puwaye, iye.

²¹ Pika abima, mabisa kina'mi nkigeba a-mpaete iyeno. We, a'ya'maenaba tigeti Kotiba ataye. ²² Piya, Porontepe, Aporope, Pitape, mabisenabe, aoganta'enabe, purinta'enabe, waintantanabe, aborakenaenabe, a'ya'maenaba Kotiba tiyo'maema aborantipa, tige'enawe. ²³ We, tigeba Karaisitintanarawa, Karaisitiba Kotintanawe.

4

Wasanamiti wanane, Wa'egawamati mono yuga pune

¹ Pigoya, tigeba taeka napimagiri: Karaisiti kayokaya kina mima, Koti kakanta kamana'ama nkago aborakena kiyewema, taeka napiyiyo. ² Pigoya, kiya kina'mikaba yogawaitapa aogima kabiyiyma, iba puwaitama uwaitaweh. ³ We, tigebera wasana akiyenabi ka'waina naeka kamana unatakibepa, pipa abekana nae naobi au'wantana

kantaba kampa pikiye. Eya, naenekeba agonekaba kamana kampa ukuwe. ⁴ Piya, nae aibo'enanekaba kapa kampa napintapa, pikaba: Arupu yagara mintuwemaba, kampa ukuwe. Kampaye. Nae unatakenaenaba Wa'egawama ntuga kana unatakiye. ⁵ Pigoya, Wa'egawama kanapa kampa aborantemitapa, tigeba pintanaba a-nka'yikiyo. Kampaye. Wa'egawama aborakibipa, tununtanabi kakantintanaba maema aranta'enara atama, wasanami ntapiyenaba kaga maema aborakiye. Piya, pabi ntagaba Kotiba a'ya'ma kina'miteti antota a'muntanaba a'yigitatakiye.

Korinti kina'mi igewai nki maete intawe

⁶ Nao'mitaba, naeba Aporoke naeke tasigeresika yuwe. We, tigeba a'ya'ma kiya kina'mikaba napima, mono isapisa kamana aega'ma a-nkasugasi tungkasagi purataiyo. Pikaba tigu maete ikenaenaba a-piyo. ⁷ Pipa tabe tigiga'eba ketisa maeyawe, a. Tigeti waintintanaba Kotitisaba nana kampa maeyawe, a. Kotitisena maentiripa, pipa nanaga ago kina kantaba puma titipa maete iyewe, a.

⁸ We, tigeba mono'ama iga'e pam kina kanta puma miyewe. Tigeba uwaena yaba mpaeya kina kanta puma miyewe. Tigeba ago tagasima, wa'ega kiye kina kanta puma miyewe. We, tigeba taga wa'ega kiye kina kanta puma kabiyesinta, taeba tigeti atokaema kaga kabiyompesine. ⁹ Pigoya, taeba Koti nkaposoro kina miyokini, asi nasiba mabisa kina'mi nkiyobipe ensiore kina'mi nkiyobipe taeguyewe. We, wasanamiba ika'isa paibuma iyeguyegini pure kina kanta puma miyiyoma, Koti uratantibayawema, napiyuwe. ¹⁰ Piya, wasanami nkiyobi taeba Karaisititiba aibo pompe kina miyokiri, tigeba Karaisititi atokaema aogima abe kina kanta puma miyewe. Tigeba esegi kina miyega, taeba magimagi kina miyune. Tigeba wasanami nkiyobi tige wainta kina miyega, taeba tuminta kina kanta puma miyune. ¹¹ Piya, paipa agobima mirite, ibageba pabiyama taeba nanintagabe wanikabe taga'ena tabemintaga, aogi kai kampa amirinta kusi puma mintokana, kamaena puratagan, nama kumatepa kampa waiyegi aogimaba kampa miyune. ¹² Piya, tayapsa araga ntuga taere pune. Pigoya, wasanamiba ata kamana urataga taeba akayona puwaitaune. Karana purataga uwa itaune. ¹³ Akayasurataga paru puwaitaune. Piya, wasanami nkariyena kanta purataga, taeba ibaba wasanami nkiyobi i'ni kina kanta puma miyune.

Poro Korinti kina'mi nkibantana puntiye

¹⁴ Pigoya, ma nkisa kaeyopa, tinintanara aeritakenawanane. Esegi puritakenaga ma kamanapa kaema nabugai ntagaranempititi urimuwe. ¹⁵ We, Karaisitintanaga ukena kinapa uwaena mintapa, ibantana pe kinapa taranto mintawe. Eya, tigepa naeba mono kamana urimuwigiri, Karaisiti Isuti atokaeyugu, nae nabintone tibantana puntopa mintuwe. ¹⁶ Piya, monota nae posa puma miyiyoma, uritauwe. ¹⁷ Naeba pika uma Timotipa otaogana tigeti waye. Aeba Wa'egawama nkawamu wasiyegina, nabugai ntagarane mintemi, aepa otaogana tigeti waye. Wamagina, kumaka kumaka ampima a'ya'ma monota ai'aru pe kina'mi nkaruyenabi uwaiminto kamana'ama nkagoba ampa urimikiye.

¹⁸ Pigoya, tigetisa ka'isamiba naeka: Kampa kanakiye, umagini igebigo'ena puta nasewe. ¹⁹ We, Wa'egawama abemika, naeba aro ntaganto tigeti wakuwe. Wamagi, igebigo'ena pe kina'mi kamanapa kampa abinta, esegiyenawaipa ayakipaya waintiyema agakuwe. ²⁰ Piya, Koti kabiratakenaenama nkagoba, pipa uwa kamanapa kampaye. Pipa esegiyena maema aogima mikenaenaw. ²¹ Pigoya, tigeba naekaba nanaga tibiye: Arupu puratakena kasu maete kanao, yebera: Agoya puma agu kao'ena puratakena kanaoma, yewe.

5

Waya'warara atarakenaena tabera waintantiye

¹ Tige tikapi kumiyenaba tabera aborama waintiye, yega abuwe. Piya, ka'waina abawampa nkxae maeye, yega abuwe. We, piyaenaba abe'isa kina'mi nkikapipa kampa aboragina, to awametane. ² Pigoya, tigeba nana pegiri igebigo'ena pewe, a. Ayamabaya tigeba kampa tintara'ena puntiri, pi pemtanga kampa agasawe. ³ Pigoya, naeba nau'nepa pagasara mintogana, nagu'nempsa tigege mintiye. Piya, tigege miyosinta, pi pemtaka kamana yosa puma, ibantoba Wa'ega Isu nkagega'era otaosine. ⁴ Piya, tigeba aki pigina, nagu'nempsa tigege ampintakan, Wa'egare Isu ae esegiyena timekiri, maya uma otaio. ⁵ Kana yagaramaba au'wapa Satani nkamekana paisaenawapa ata potakana, anti Wa'ega Isu kanabi agu'wapa Koti ababeno, uma otaio.

Ataena pemi'napa kasiyo, untiye

⁶ Pigoya, titipa uwa maete iyepa, pipa kamparagaena pewe. We, yisiti pisa puma asaena amanankantoba nakenabinti atraigina, a'ya'ma asabawaewakiye. Pika kampa napiyewe, a. ⁷ Pigoya, tigeba Koti nkaobi aota kina mintiripa, tikapintisa asaenaba aisa'ma maegasisma, aota naninta kanta puma miyiyi. We, tau'ikena sipisipi awaropa antotae'naretapa aeguntane. Pi imputapa Karaisitiwe. ⁸ Pigoya, tau'ikenaenagaba kao'ena puma aogima ta'mu peno. Piya, nanintabisa asaenawapa kasisa puma, wasana ata puwaitakenaenabe aguntaenaripe kasimagiri, aogi Pasoba naninta nasa puma, parutu'enabe tagantanabe maema kao'ena puma nama ti'mu piyo.

⁹ Pigoya, kupiyona pe kina'migeba ka kina kanta pumaba a-mpiyiyoma, esa'nepa kaema timintone. ¹⁰ Piya, mamparasa kupiyona pe kina'mikaba kampa untowe. Igebe, mampabisenaenaga ibugai kinape, ku kinape, ama koti nkaegara kinape, igekaba kampa untowe. Kampaye. We, mamparasa kinapa igasasinta aempari wasine. ¹¹ Piya: Mono yagarawanwe, yemi ntagarama kupiyona pemipa, aegeba kapipa a-mpiyiyoma, kaerimintuwe. Eya, kupiyona pemipa, mampabisenaenaga abugami, ama koti nkaegarami, akaya kamana yemi, esegi wani ntama aibo'ena pemipa, kuntana pemipa, pabiya pe mpono kina'migeba kapipa a-mpimagiri, igege kapipa nanintaba a-ntaiyoma, kaerimintuwe. ¹²⁻¹³ We, abe'isa kina kamana uwaitakenaenaba nae'enaba kampaye. Pipa Kotintanawwe. Piya, monota ai'aru pe kina'mitaba tikapintisa ata pe kina'mipa kamana uwaitakenaenaba tige'enawe. Eya, aguntaena pemipa ntagaraba agarubakasigma tikapintiba a-mpiyeno.

6

Tikapinti ata kamana aborakiripa, tigeripa aogi piyo

¹ Tigetisa ka'waina ao'mika amo kamana otamipa, aeba Kotiti atokaeya kinapa iyemita puma, abe'isa kina'mi nkuyobi kana kamana otaginaba, ayamabaya kampa anipa piye, a. ² We, Kotiti atokaeyompe kina taeba a'ya'ma mamparasa kina'mi kamana a'yikikune. Pipa tigeba kampa abintawa, a. Piya, a'ya'ma kina'mi kamanapa aintiba a'yikikibuka, tikapinti anagi kamana'anto aboraipa, tigeba kampa abae pewa, a. ³ Piya, aintiba taeba enisore kina'mi kamanapa a'yikikune. Kampa abewa, a. We, tae mikenaenarepa arupu pukenaga abae pune. ⁴ Pigoya, tigeti kamana aboragiripa, nana pegiri monota ige kampa wainta kina'miti wagana, uma a'ya tigasawe. ⁵ We, tigeba kamana'nepa abigina tini penoma, urimuwe. Piya, monotasa tara yagararamisi kamanapa aborakanaba, tige tikapipa a'yikikena napiyena wantaga yagara kapa kampa mintiye, a. ⁶ We, tigetisa ka'wainabe ao'mibe isimo kamana aborakinisiba, Isu kampa aegaranta kina'miti waisigina uma a'ya isitakibepa, pipa kamparagaenawwe.

⁷ Tigetikapipa kamana aboraipa, pi'na monotipa aeguyeginna tumiwaye. Piya, ataena puritagiripa, ayama tigeba kampa uwa itawe, a. Tige'enaba a'yugu uwa maeyagiripa, nanaga tigeba kamana uwaitawewe, a. ⁸ We, tigegeba antage'ena pumagiri, tiyotimpipa ataena puwaitama, ige'enaba a'yugu uwa maeyewe. Pipa kamparagaenawwe.

⁹ Pigoya, aru'ena pe kina'miba Koti kabiratakenaenabipa kampa ubasikibewe. Pipa kampa abintawa, a. Pika tigeba tara tara tigiba a-ntapiyivo. Piya, kumiyyena pe kina'mibe, ama koti nkaegara kina'mibe, kupiyona pe kina'mibe, wami waya kanta puma kupiyona pe kina'mibe, ¹⁰ kuntana pe kina'mibe, mampabisenaenaga ibugai kina'mibe, esegi wani ntama aibo'ena pe kina'mibe, akayasuwaita kina'mibe, iyeguma kuntana pe kina'mibe, piya kina'miba Koti kabiratakenaenabipa kampa ubasikibewe. ¹¹ Pigoya, paipa ka'isamitaba pabiya puma mintantapa, ibaba kampaye. Piya, monotaka paititama, aota puritama, arupu puritantine. Eya, Wa'ega Isu Karaisiti ntugaraka Kotirempa Nkawamusatasayi piyama aogi puritantine.

Tauteka Koti nkagega'e asagayukune

¹² Pigoya: A'ya'ma tae pukenaenaba kanara pukune, yepa, pipa kanarane. We, pi'naba ka'isenaenaba kampa tiyo'maekiye. Eya, a'ya'ma nae pukenaenaba kanara pukuwe, yopa, pipa kanarane. We, a'yugu ka'isenaenaba pekanra iga'na punatasanagawee. ¹³ Piya, nakenaba tantawama ntanawa, tantawamaba nakena maekenaenawewe, yepa, pipa tagane. We, Kotiba tarayagapa kaga isigaikiye. Piya, taupa kumiyyena mantanaba kampaye. Pipa Wa'ega mantana utatantine. Piya, Wa'ega aeba tau'amantanawee. ¹⁴ Pigoya, Kotiba Wa'ega asitantemisa puma, esegiyenawatasa taepa asiratakiye.

¹⁵ Pigoya, titipa amato amato puma Karaisiti nkaukanta puma, pipa kampa abewa, a. Piya, Karaisiti nkautasa ka'isa kasamagipa, kumiyyena pemisa puma tona aegaraiyoma, otasuwa, a. Pipa kampaye. ¹⁶ Piya, wasana ka'waina kumi wae'mage atokaeyamipa, isigeba ka aukanta puma miyese. Pikaba tigeba kampa napiyewe, a. Pigoya, pikaba Kotiba maya untiye: Isigeba ka isi'ena puma mikibese, piya untiye. ¹⁷ Piya, ka'wainabe Wa'egamati ato kaeyamipa, aege ka isimara miyese.

¹⁸ Tigeba kumiyenaba kasigina aegaka wano. Piya, ka'waina ka'isaena aguntaena pemi'naba ka awameta piye. Piya, kumiyyena pemi'naba aeba to awameta puma, ae'wa nkagupa ata potaye. ¹⁹ Pigoya, titipa Aota Awamusapa mpono namane. Pipa kampa abintawa, a. Eya, pi Aota Awamusapa tigupinti miyenema, Kotiba timigaintemine. Piya, tigeba tige'enaripa kampaye. ²⁰ Tigeba tabe ikatasa Kotiba ika puritantemi, tigeba ae'enawane. Piya puntika, tigeba tititasa Koti nkagega'eba asagayuyiyo.

7

Waya'wararamisi kamanane

¹ Tigeba esa namintiri, kamana nabigataga, pika mayama aborakiri abiyo: Ka yagarama waya kampa maenta uwa mikena puntanaba, kanara pikiye. ² Pigoya, kumiyyena pusnaga, wamiba ka ka wayati maema miyigina, wayamiba pabiyama wa ka ka maema airokaema miyijo. ³ Piya, wama nkaupa anarantawe. Aeba a-nka'a-o otano. Pabiyamagina, anarimpa nkaupa awaentawe. Aeba a-nka'a-o otano. ⁴ Eya, wayamaba ae'wa nkaupa kampa kabiye. Pipa awaentawe. Pabiyamagina, wama ae'wa nkaupa kampa kabiye. Pipa anarantawe. ⁵ Piya, waya'warara tisitisipa uwa akunikenaba a'yuguba a-piso. Pigoya, ka napiyena pumagirisi, arontaganto tisipa akumpa nunamu ukena yuga pisigina, kanara peno. Piya, ayugu tisita kampa kabiysisigina Sataniba tisimiyo pusnaga, a'wae pumagirisi tisipa kata airokaeyiso, naeba piya yuwe. ⁶ Pi kamana nabigaka, uma esegi puritamaba kampaye. Uwa urimuwe. ⁷ We, a'ya'ma nae miyosampa age kina misanagaba nabiye. Pipa aerawane. Koti aewa uma, ka ka kina'miteti awagaena tamima tonarona yugara urataye.

⁸ Pigoya, age kinape kiya waepe, tigeba maya yuwe: Tigeba nae miyosa puma age kina mikibepa kanarasakiyema, yuwe. ⁹ We, pi kina'miba i akunikenesa esegiyena kampa waintakiniba, waya'waena piyo. Eya, intabaipinti kumiyyenaga yaku irasanaga, waya'waena puma miyijo.

¹⁰ Pigoya, waya'wa, tige kamana ukuwa, abiyo. Piya, pipa nae kamana'nane. Wa'egawama nkawamutasa kamanane: Piya, waya ka'wainaba awaewampapa a-nkagasano. ¹¹ Pigoya, awaewampapa ago againtakanaba, age wae uwa miyeno. Kampa akanaba, ampa'maeta awaeti wano. Pabiyamagina, wamageba waya'wapa a-nkagasano.

¹² Pigoya, to ka'isa kina'miba kamana'ne yekiri abigina, Wa'egamanta kampaye. Nae'nentana peno: Piya, mono yagara ae wae kampa Isu nkaegaranta miyemipa, kana wae'ma aege misanaga abekanaba, a-nkagasano. ¹³ Piya, mono wae ae awae kampa Isu nkaegaranta miyemipa, kana awaewampa aege misanaga abekanaba, a-nkagasano. ¹⁴ Pipa mayamawe: Mono abinta wae'ma ae'wa nkawaewampa aota'nama uwaesagina, mono abinta yagara ae'wa nkanara aota'nama uwaesa piye. Piya, pika yagararimpi aota miyewe. Piyama kampa waintisinta, igeba abe'isa kina kanta puma miyessine. ¹⁵ Pigoya, kampa aegaranta wamabe, wayamabe, atate wagaikibipa, uwa atate wagaikkiye. Ae'enawane. Pika mono abinta kina'mitiba kamanapa kampa waikiye. Eya, Kotiba: Paru puma miyiyoma, tagega'e uma taba puntine. ¹⁶ We, waya, kaeba kawaegampa mono ki'i abaibegana kanakibe, kampabayawe. Pikaba napiyena, a. We, kaeba wayakapa mono ki'i abaibegana kanakibe, kampabayawe. Pikaba napiyena, a. Pigoya, Koti: Paru puma miyiyoma, taba puntine.

Tigege'a e-mpaete ima Koti utaritanta'enara miyijo

¹⁷ Pigoya, a'ya'ma ka ka'mitaba Wa'egawamaba utaritantintanaba aega'ma miyijo. Piya, Koti tiba punti ntagaba maruti mpiyentanaba a-nkuwa kasiyo, yuwe. Pi kamana'nepa a'ya'ma monota ai'aru pe kina'mipa uwaimiwaeyuwe. ¹⁸ Piya, ka'waina aeba aupa kasama ara'ena puma mintanaba, aba puntemika ara'enaba a-kasano. To ka'wainaba ara'ena kampa puma mintanaba, aba puntemika ara'enagaba a-seno. ¹⁹ Eya, ara'ena puma mikenaenabera, ara'ena kampa puma mikenaenabe, au'wantaga'enaba kampaye. Koti nkunti kamana wasikenaenaba, pi'na taga au'wantaga'enawe. ²⁰ Pigoya, ka'wainaba ka yugara mintakana Koti kega'e uma aba pekanaba, pabita uwa miyeno. ²¹ Piya, kaeba kayokaya puma mintukuna kaba puntemika, abima kuntaba a-puma miyo. We, akariyobakatakana: A'a-oba, a-suma uwa wao. ²² Piya, ka'waina aeba kayokaya puma mintegina Wa'egawamaba aba pegina, aeba Wa'egawama nkaobi uwa kina kanta puma miye. Piya, to ka'waina aeba uwa kina mintegina Wa'egawamaba aba pegina, aeba Karaisiti kayokaya kina kanta puma miye. ²³ Pigoya, tigeba tabe ikatasa Kotiba ika puritantika, wasanami ntapiyenama kayokaya'enaba a-piyo. ²⁴ Piya, nao'mitaba, tigeba ka ka pai mintuguna tiba puntemipa, pabi ntuga uwa mima kanara Kotiti atokaema miyijo.

Age kina'mi kamanane

²⁵ Aragawae igecka Wa'egama nkawamutasa kamana kampa maema mintokana, Wa'egawama antara'ena punatama taga ntagara aboranatanti, nae'ne kamana urimekiri abiyo: ²⁶ Ma kanabipa kuntaena uwaena aboraika, ka'waina waya kampa maenta uwa mikibipa, aogi pikie. ²⁷ Pigoya, wayake ago atokaentampepa, pipa a-kaso. Kaeba age mintanaba, pipa wayakaba a-so. ²⁸ Pigoya, kaeba waya maeyampepa, aguntaenaba kampa pene. Piya, aragawae'ma wa maeyampipa, aegeba aguntaenaba kampa piye. We, way'a-waena pe kina'miba mamparasa kuntuyena aborarimisanaga piya, yuwe.

²⁹ We, nao'mitaba, kamana'nepa mayamawe: Kanapa ago agarosawaye. Piya, kana aronkanto waintika, waya maeya'nagitaba waya kampa maenta miyesu puma, Wa'egawamantanaga napima miyiyo. ³⁰ Piya, kube'ena pe'nagiba, kube'ena kampa punta kina kanta puma miyiyo. Ti'muntana pe'nagiba, i'muntana kampa punta kina kanta puma miyiyo. Ika pe'nagiba, tigeba kota kampa wainta kina kanta puma miyiyo. ³¹ Mamparasaenara yoga pe'nagiba, mampabisa esegiyena kampa pe kina kanta puma miyiyo. Eya, mampabisaenaba a'ya wakena piye. Pika Wa'egawamantanaga napima miyiyo.

³² Piya, mampabisa uwaenaenama napiyenari paibusanaga kampa nabiye. Pigoya, waya kampa maenta mono yagaramaba Wa'egawamati uwaena agi napima, Wa'egawama nkabemintana pukena piye. ³³ Piya, mono yagarama waya maentanaba, mampabisaenaga napima waya'wampa nkabemintana piye. ³⁴ Piya puntana, tara agi napegina napiyenawampaba pako piye. Piya, age wae'miwo, age aragawae'miwo, igeba monoka napima Wa'egawama nkabemintana puma igewai nkigupe ipe aota mikenaga kabiywewe. Piya, mono wae'ma wa maentanaba, mampabisaenaga napima awaewampa nkabemintanaba piye. ³⁵ Pigoya, kampa iga'naba kiritakena puma, naeba pi kamanapa tiyo'maeckenaga yuwe. Piya, tigu napiyenaripa arupu puritama, tonagaba kampa napima Wa'egawamati atokaeyiyoma, yuwe.

³⁶ Pigoya, ka yagarama aeba aragawae'wapa ata potama kampa wara atantakanaba, aeba anosakana awaeba karu'ena maekena pekanaba, ae abintana aega'ma karu'ena aeta atano. Pikaba aguntaenaba kampaye. ³⁷ Pigoya, to ka'waina aeba napiyenawapa aogima kabima mima agutasa esegi pumagina, aragawae'wampa kamana abima ata potakena kampa waintakanaba: Uwa mikiye, untanaba, kanara pukiye. ³⁸ Piya, pika ka yagaramaba aeba aragawapa wara atakibipa, aogiyena pukiye. Piya, to ka'waina aeba aragawapa kampa wara atakibipa, aogiyenaba asugaikiye.

³⁹ Pigoya, waya'ma nkawaewampa uwa mintakanaba, awaege atokaema miyeno. Awae purekanaba, to ka waba maekena puntanaba kanara maeyano. Maekena puntanaba, Wa'ega aegaranta yagara maeyano. ⁴⁰ Pigoya, nae napiyopa aeba age wae uwa mikibipa, a'muntanawapa asugaikiye. Pabi kamana yopa, Koti Nkawamusna naeti waintika yuwe.

8

Ama kotiti agunta pasa'ata kamanane

¹ Pigoya, ama kotiti kaema agunta pasa'atama nakena maema na kamana yuwe: Piya, taeba ago abune. Ama kotiba au'wantagapa kampaye. Koti ae ka au'wantagane. ⁵ Piya, mantabintibe mabintibe uwaenaenarako kotoiwe, yewe. Eya, igeiba amanippe wa'egawaipe uwaena waiyegina, ⁶ taetiba Koti tabarempa ka'anto miratagina, Wa'ega, Isu Karaisiti, ka'anto mirataye. Piya, Koti aeba a'ya'maenaba aborawaentegi, taeba aeti miwaeyune. Piya, aeba Wa'egare nkayatasu a'ya'maena aborawaentegi, taeba ae yugarasa e'wasaba maema miyune.

⁴ Pigoya, ama kotiti kaema agunta pasa'atama nakena maema na kamana yuwe: Piya, taeba ago abune. Ama kotiba au'wantagapa kampaye. Koti ae ka au'wantagane. ⁵ Piya, mantabintibe mabintibe uwaenaenarako kotoiwe, yewe. Eya, igeiba amanippe wa'egawaipe uwaena waiyegina, ⁶ taetiba Koti tabarempa ka'anto miratagina, Wa'ega, Isu Karaisiti, ka'anto mirataye. Piya, Koti aeba a'ya'maenaba aborawaentegi, taeba aeti miwaeyune. Piya, aeba Wa'egare nkayatasu a'ya'maena aborawaentegi, taeba ae yugarasa e'wasaba maema miyune.

⁷ Pigoya, ka'isa kina'miba igecka pi nkagowapa kampa kanara abibebe pewe. Pi kina'miba igecka paipa ama kotiti kaema agunta pasa'atamagini tagantana pune, uma nantawee. Igeba nantasa pumagini iba nantiniba, igeba paisaenaga napiyegana magimagi napiyenawaipa ata puwaitaye. ⁸ Tagane. Nanintawamaba Koti nkaobipa kampa asiratakana aogiba pukiye. Piya, nakanaba tagega'ewamaba kampa asugaikiye. Kampa nakanaba kampa tumiakiye. Kampaye.

⁹ We, tigeba aogima kabiyyiyo. A'yugu abikenaenaripa magimagi kina'mi nkigisa aimisa kaisa pekiri monoka ware'nakibewe. ¹⁰ Piya, monoka esegima ntapiye kina'mitaba,

tigeba ama koti mpono namapinti wama mara'mima naninta nagana, kampa esegi puma napiyenawantaga yagarama tigama kampa pami punta, aeba ama kotiti agunta pasa'ata ntakenaba naya, a. ¹¹ Piya, a'yugu tige napiyenaritasa pi magimagi mono yagarama ntapiyenawapa ata potawe. We, pi tiyo'yagarama au'ikenaga Karaisiti pu'magina aba potagiri, tigeba ata potawa, a. ¹² Eya, tigeba piyama tiyo'mi magimagi napiyenawaipa ata puwaitapa, aguntaena puwaitamagiri, Karaitsikeba aguntaena potawe. ¹³ Piya, naeba piyama nakena nakanaba nao'yagaraba aguntaenabi ware'asanaga, naeba to kakema pi nkawaseba kampa nanta a'ya'ma yaga uwa mima nagarikuwe. Eya, a'yugu naeba piya pekana nao'yagara aguntaenabi ware'asanagawe.

9

Mono yuga pe kina'mi mikena kamanane

¹ Pigoya, ka'enama naraku'ma ke'nepa akuniya, a. Naeba aposoroba kampa mintuwa, a. Naeba Wa'egare Isupa kampa agantuwa, a. Wa'egama ntuganempa nkau'wapa tigeba kampaya, a. ² We, Wa'egama nkaposoro mintogiri, tigeba a'ne mpintawé. Piya, naeka: Aposoro kampa mintiyema, ka'isa kina'mi yepa, pipa aerawane. Tigeba ago abintawé. Naeba tige aposorona.

³ Pigoya, kamana unata kina'mika mayama antota uwaimuwe: ⁴ Piya, taeba tigetisa: Naninta wani a-mpaeyiyoma, uratantiye, a. ⁵ Piya, to ka'isa aposorobe, Wa'egawama nka'natabarabe, Pitabe, igeba waya'waipa mono Yugara iba purite wantasa puma: A-piyoma, uratantiya, a. ⁶ Piya, naebe Panabasibe tasibintoga: Tisiyatasa yuga a-kasima, mono yugabisa naninta a-mpaeyisoma, urasantiya, a. ⁷ Pigoya, ae nkirebu yagaramabaya ae'wa mponerasaba ikantana pukiye, a. Kebaya aintana pegina au'wapa aboraginaba, kampa maema naye, a. Kebaya purumaka kabintana, kampa nono'wa maema naye, a.

⁸ Pi yo kamanapa wasanami kamanataka yubera, Koti nkago kamana'amaba pika kaga iye. ⁹ Eya, Moses ago kamana kapa mayama kaemarantiwa waintiye: Purumakankama witi nakena aerapa'ma nakiriba, a-nkakunkagasiyo, Koti iyema, kaemarantiye. We, Koti aeba purumakankama ibiga napima untipera, wasana taeka untiye. ¹⁰ Pipa taeka untine. Piya, o'ena pe kina'mibe, naninta nagaregini maeya kina'mibe, igeba kaga yugawaitasa maekenaga agawa pukenaba kanarane. ¹¹ Piya, taeba tigeti ampa inatisaenaba tigupinti aintana puntompeka, antota tigetisa arirasaena maeyanema napiyegana, kunta piya, a. ¹² Eya, to ka'isa kina'miba tigetisa naninta kota maeyaga, tae pi ntuga agobintome'nagitaba maeyompesinta, kanara posine. Pigoya, taeba kampa piyaba pune. Piya, Karaisiti mpono yugawa akunkatasanaga tigetisa naninta kota maekenaenaba kasimagi, uwa tumima pugara miyune. ¹³ Pigoya, tabe mono namapi yoga pe'nagiba igeba mono namapisa nanintaba nawe. Piya, aratara kaema agunta pasakena yuga pe'nagiba igeba aratarasaena maema nawe. Pipa tigeba kampa abintawé, a. ¹⁴ Pabiaymaba, aogi mono kamana yompe kina taeba pi mpono yugarasa mikena arirasaena maeyiyoma, Wa'egawama uratantine.

¹⁵ Piya, pi uratantintanaba naeba kampa maeuyewe. Kampaye. Tigeba ibaba kabirataiyoma, kampa napinta kaeyuwe. Kampaye. We, a'yugu tige'ena maeuyakan, na'muntananepta maete tumisanaga kampa nabiye. I'mima purukubopa kanarane. ¹⁶ Piya, mono kamana uwaimokaba, nae nageba kampa maete ikiye. Kampaye. Naeba pi mpono yugaba kampa posinta, ata maru mpiyosine. Naetiba to kipa kampa waintiye. ¹⁷ Eya, nae'ne ntapiyenarasa pi ntugaba posinta, ikapa maeyosine. Piya, nae'ne ntapiyenarasa kampa maentoka, kiyaenara punatantegi, ¹⁸ nana ika mpaeyuwe, a. Ikantepa mayamawé: Naeba mono yuga puma antota arirasaena kampa maenta, na'muntanabiswa pi kamana wasana uwa uwaimopa, pi nta'muntananepta nae ikantene.

Poro aeba wasanami kayokaya puwaitantiye

¹⁹ Pigoya, a'ya'ma kina'miti iretanepa kampa waintipa, a'ya'ma kina'mita kayokaya'enaba uwa pumagi, mono uwaimima uwaena kina iba pusanaga nabiye.

²⁰ Piya, Yuta kina iba pukenaga, ige iyobi Yuta kina kanta puntone. Piya, naeba paisa mono kamana'ama nkiga'na yagara kampa minta, pi paisa ago kamana wasiye kina iba pukenaga, ige iyobi wasiye kina kanta puntone. ²¹ Piya, ago kamana kampa abinta abe'isa kina iba pukenaga, ige iyobi abe'isa kina kanta puntone. Naeba Koti nkago kamana kampa ataopa, Karaisiti nkago kamanapa aega'ma piya puntone. ²² Piya, magimagi napiyena pe kina iba pukenaga, ige iyobi magimagi kina kanta puntone. Eya, ka'isamipa toma toma ki'isa i'ikenaga, naeba toma toma kina miyesu puma ige iyobi toma toma puntone. ²³ Piya, mono kamana maema aborakenaga pabiya pumagi, mono a'muntanabi kaga mikenaga puwe.

Esegima a imarantata uma irosao

²⁴ Tigeba ankagasi agasi pukenaba agawa, a. Piya, a'ya'ma yagaramiba karu'ena wama ankagasi agasi puma, ka'waina igasima a'muntana maeyamipa, kampa agawa, a. We, tigegeba pabiyama mara esegima wama a'muntanaba maeyiyo. ²⁵ Pigoya, piya yagarami igaikena a'muntana maekenaga, ibemintanaba maete tumima ipa kabiwaitawe. Piya pepa, awasawakenaena maeyawe. We, taeba mantarisa agora waiyaba ta'muntanaba maekune. ²⁶ Pigoya, naeba ke'i karu'ena waopa, kampa uwa mari aganta arupu puma agaurite wauwe. Piya, ma'ena puma asugaikena puntapa, uwa mariba kampa nayapa maebuwe. ²⁷ Piya, naeba wasana mono uwaimigaitegi, togana ware'asanagaba ma'ena kina'mi pesa puma nae'ne ntaupa esegi potamagi kabiuyewe.

10

Pai tayabamagiti aborantemintanaba ke'i tayakikenaenawe

¹ Nao'mitaba, a'yugu pintanamaka kampa napisanaga ma kamanapa urimukuwa, abiyo: Pai Koti nkibinankama tayabamagipa a'ya'ma airarikaewaitaogini wama tabe wani ta'entawewe. ² Piya puguna, Moseseti atokaekenaga ibinatasabe wani ta'entantanarasabe Koti a'ya'ma paitawaitantiye. ³ Piya, Awamus'a amaba naninta aborawaimogini, igeba kaga a'ya'ma nata wantawewe. ⁴ Piya, Awamus'a amba wani aborawaimoginiba, pike kaga nata wantawewe. Eya, Awamus'a amba imintemi ntabapisa wanipa maema nantawewe. We, pi ntabapa Karaisitiwe.

⁵ Pigoya, pi kina'miba kamparaga puguna, Kotiba uwoma pi kina'mikaba kampa a'mu puwantama, ka'me mpari iyeguyogini pu'wantawewe. ⁶ Pigoya, ataena ige puntasa tae pusanaga, Koti ige puwantintanaba purayakintiye. ⁷ Piya, igegetisa ka'isamiba ama koti kayokaya puntasa puma, tigeba a-piyo. Pika mono isapiipa mayama kaentine: Wasana igeba mara'mima kao'ena puma nantini, asima yagawamata wa'ena puntawema, kaentiye. ⁸ Piya, igegetisa ka'isamiba kumiyyena puntasa puma, a-piyo. Igeba piya puntini, ka yaga wasana 23,000 pikaba purintawewe. ⁹ Piya, igegetisa ka'isamiba Wa'egawama nkamiyo puntasa puma, a-piyo. Igeba piya puguna, ma'ama ibanaogini pu'waewantawewe. ¹⁰ Piya, igegetisa ka'isamiba Kotika imo'ena puntasa puma, a-piyo. Igeba piya puguna, wasana iyegukena enisore otaogana iyeguyogini pu'waewantawewe.

¹¹ Pigoya, pintana igegetisa aborantemintanaba wasanamite a'yugu ige puntasa pusanaga, Koti purayakintiye. Piya, ibasa yaga a'ya wakenabipa, tae miyompe'nagiteka otaogini pi kamanapa mono isapi kaemarantane. ¹² Pintanarak: Naene esegima asima miyuwema napiyemi'naba, ware'asanaga kabima miyeno. ¹³ Tigeti timiyo'ena aborata kanantempipa, pipa wasanami nkesegiyenawaitaka ka'masa puma aboraye. Pigoya, Koti aeba tagantana puma, kabiyeckana timiyo'enamaba esegiyenaripa kampa aparikiye. Eya, Koti aeba tiyo'maema aguntaenamaba kampa maema tipasikenka ki'i kaga aborarimekiri, pi ki'i aega'ma asima esegima miyivo.

Wa'egawamape kewamape kaga isiyegarakenaenaba kampa waintiye

¹⁴ Nabugai kina'nempitaba, nae yo kamana abima, ama koti tikabitama wagasiyo. ¹⁵ Piya, tigeba aogi napiyenayaga kina mintawewe. Piya pegi, ma kamana yopa, aogima pak'o puma abiyo: ¹⁶ Piya, waini kankabebisa wanika Kotiti ta'mu potama naompepa, Karaisiti kora paitaratakenagaba kampa napiyewa, a. Paretia apako puma naompepa, Karaisiti nkaukeba kabo puratakenagaba kampa napiyewa, a. ¹⁷ We, paretiba ka'antowewe. Piya, uwaena kina'mitaba taeba ka paretia namagi, ka au'ena puma miyune.

¹⁸ Pigoya, Isureyo kina'mi pentanaga napiyivo: Yaga kaema Kotiti agunta pasa'atapa, pi ntagogawama nkau na kina'miba aratara kaeya kina'miti airokaema kaga Kotiti i'mu pewe. Pipa kampa napiyewa, a. ¹⁹ Piya yo kamanakaba ayama napiyewa: Ama koti aeba au'wantagan, a. Ama kotiti kaema agunta pasa'atapa tiyo'maekiya, a. Pipa kampaye. ²⁰ Piya, abe'isa kina'miba kaema agunta pasa'atapa, Kotitiba kampaye. Ke kina'miti agunta pasa'atawewe. We, tige ke kina'miti uma atokaesanaaga kampa nabegi, yuwe. ²¹ Piya, Wa'egawama kankabebisa nate, ke kina'mi kankabebisa nate pukenaenaba, pipa kanarapa kampa pukiye. Piya, Wa'egawamati atokaema ara nanintaba nate, ke kina'miti atokaema nate pukenaenaba, pipa kampa kanara pukiye. Pipa kampaye. ²² We, taeba ataena pekanaba Wa'egawama nkantawamaba agobi puratakiya, a. Tae esegiyenamaba ae esegiyenabaa asugaikiya, a.

Tigetintanaba a-ntapima Wa'egawamati napiyivo

²³ Pigoya, a'ya'maena pukenaenagaba kanarane, yewe. We, ka'isaena pukubompentanamaba kampa tao'maekiye. Eya, a'ya'maena pukenaenagaba kanarane, yewe.

We, ka'isaena pukubompentanamaba kampa esegi puratakiye. ²⁴ Tigeba tigetikaba antapima, tigege miye kina'mikaba aogima kabiwaitama iyo'maeiyio. ²⁵ Pigoya, tigeba ika kumatasa awase ika puntiripa: Aetasawemaba, a-nkibigama, uwa maema naiyo. A'yugu ibigaigina napiyenarimpa ata pusanaga, uwa maema naiyo. ²⁶ Pika mono isa'amaba maya iye: Mampabe a'ya'maena waintintanabe, pipa Wa'egawamantanawe, iye.

²⁷ Piya, ka'waina kampa amatiti punta yagarama kao'ena puritantana kega'e yekiri wakena puntiripa, kanara wama naninta timikibintanaba uwa maema naiyo. Aetasawema ibigaigina napiyenarimpa ata pusanaga, uwa maema naiyo. ²⁸ Piyama nama miyiginaba, ka'waina aebe: Ma ntanintaba ama kotiti kaema agunta pasa'atantintanawe, yekiripa, urimikibi ntagaragaba napima pipa a-ntaiyo. ²⁹ Piya, tigeti ntapiyena ata pusanagaba kampaye. Urimikibi ntagarama ntapiyena ata pusanaga yuwe. Piya, taeba Koti nkaobi a'ya'maenaba pune. We, nae pukubontanaba ayamabaya to yagarama napiyenewapipa a'yigimpa nagakiye. ³⁰ Piya, naeba Kotiti naninta nama na'mu potakubokaba, nana piyema ka'wainaba abima ata punatakiye, a.

³¹ Pigoya, tigeba nantinta nantiripe, wani ntantiripe, to ka'isaena puntiripe, a'ya'waemaena pukibentanagaba Koti nkagega'e uma asagayuma piyo. ³² Piya, Yuta kina'mi nkiyobipe, Kariki kina'mi nkiyobipe, Koti mpono ai'aru pe kina'mi nkiyobipe, paebuma miyivo. A'yugu pami puma ware'asanaga iyobi paebuma miyivo. ³³ Piya, a'ya'ma kina'mi nkiyobi nae pukubontana agaigina kanara penemawe. Nae'nentanaba kampa aogima puwe. Kampaye. Naeba uwaena kina i'iyekana Kotiba iba penemawe. Piya, nae posa puma, paebuma miyivo.

11

Monotaka i'nota atikaekenenaewe

¹ Eya, naeba Karaisiti ki aegaraosa puma, tigeba pabiyama nae ki naegaraiyo.

² Pigoya, tigeba a'ya'ma yagaba nae unto kamana napimagiri, mono urimintoka aogima wasiyewe. Pika abogana kanarasaye. ³ Pigoya, nae nabemika ma kamanapa aogima abiyo: A'ya'ma wami nkai'neba Karaisitiwe. Waya'mi nkai'neba iwaegiwe. Karaisiti nkai'neba Kotiwe. ⁴ Piya, ka'waina aebe kai maema a'nontaga atikaetanta mima nunamu ukibino, Koti nkawamutasa kamana uma aborakibino, aebe a'i'newapa nkageba ata potakiye. ⁵ Piya, ka wae'maba kampa kai maema a'nontaga atikaetanta mima nunamu ukibino, Koti nkawamutasa kamana uma aborakibino, aegeba ka'masa puma a'i'newapa ata potakiye. Eya, waya'ma a'o nkabiya aiyagaiba kasisa puma kasaaisinta, ka'masa puma a'i'newapa ata potasine. ⁶ Piya, ka wae'maba kampa kai atikaetanta mintanaba, abiyapa kasagasan. Piya, aebe kasama aiyagaiba kaekibika ani puntanaba, kai maema a'noti atokaetanta miyeno. ⁷ Pigoya, wamaba Koti nkauga puma mima, ae age asagayukenawe. Pika wamaba a'nopa a-nkatikaezano.

Pigoya, waya'maba aebe wama nkage asagayukenawe. ⁸ Piya, marupa Kotiba waya'ma nkautasaba waba kampa aborantine. Kampaye. Wayapa wama nkautasa aborantine. ⁹ Piya, waya'ma nkao'maeyanemaba, waba kampa aboratantine. Kampaye. Wayapa wama nkao'maeyanemaba aboratantine. ¹⁰ Piya, wama amentanti mintika waya'maba a'nota atikaema ara'ena potama mimagina, enisore kinakaba piyaba puma miyeno. ¹¹ Piya, Wa'egawama nkaobipa waya'amanapa kampaye. Wamanapa kampaye. ¹² Piya, maru wayapa wama nkautasa aboratantegina, ibaba waya'mi nkitasawa waba aboraw. Piya, a'ya'maena Kotipisawe.

¹³ Pigoya, tigeripa napima a'yigimpa agaiyo: Waya ka'wainaba kampa kai maema a'nontaga atikaenta mima Kotiti nunamu ukibipa, kanarasakiya, a. ¹⁴ Piya, wa ka'wainaba waya'ma pisa puma a'o nkabiya e'ero atama miyekanaba, pabiyama agaiginaba kampa aogi puma au'ama mpaema ata potaye. ¹⁵ Piya, ka wae'maba a'o nkabiyapa e'ero atama mikibemipa, aogi awa'enawane. Eya, Koti e'ero nkabiyatasa atikaetenema atantine. ¹⁶ Pigoya, ka'waina aebe ma kamana akayukena pekiripa, mayama napiyyiyo: Pi yo kamanapa taebe a'ya'ma Koti mponota ai'aru pe kina'mibe aega'ma, to kakeba kampa punema, napiyyiyo.

Monoka aki puma mintini nanintaraka ata puntawé

¹⁷ Pigoya, to ka'isa kamana urimintapa tigega'eba kampa asagayukuwe. Piya, tigeba aki puma aogiyena kantaba kampa punta ataaena pewe. ¹⁸ Piya, monoka aki peganaba, tikapipa atatarauenaba aboraye. Piyama unamega aboganaba, uwaenanto tagantana kanta piye. ¹⁹ Atatarauenaba pipa uwaba kampaye. Piya, tikapi mono'ama nkago tagantana maenta kinapa aboraigiri agakibeka atatarauenaba aboraye. ²⁰ We, tigeba Wa'egawama nkara naninta nakenaga aki puma anagi'ena pewe. ²¹ Piya, tigeti ntaninta maete ampa irosa'ma kampa akiyena punta, uwa tige ka ka nawe. Eya, ka'wainaba aebe aga'ena

abegin, to ka'wainaba waini wani uwaena namagina aga'e pagina aibo'ena piye. ²² We, tigeba naninta wani ntakena puntiripa, namatipintiba kampa nawa, a. Tigeba Koti mponota ai'aru pe kina'mikaba anagiyena pewema, napima, kusi pe kina'mi nkige maete tumewa, a. Pikaba nanawe urimukuwe. Tige tigeba maete isuwa, a. We, piyaenaba kampaye. Tigeba ata pewe.

Ara nanintawama kamanane

(*Matiyu 26:26-29; Maka 14:22-25; Aruku 22:14-20*)

²³ Pigoya, pi karnana urimintopa Wa'egawamatisa maentone. Pipa mayamawé: Wa'ega Isupa Yutasí aeba minaga'ena potanti nkase marupa pareti maema, ²⁴ Kotiti a'mu potama, apako puma maya untiye: Mapa nau'nepa tiyo'maekeñawa, naeka napima nama miyivo, untiye. ²⁵ Pigoya, igeba naninta nauguna, waini kankabe pabiyma maema maya untiye: Ma kankabebisa korantetasa kasa ara'ena aborama puritauwe. Pabiyma nantiripa, naeka napima nama miyivo, untiye. ²⁶ Piya, tigeba pi paretibe wainibe nantiripa, Wa'ega purinti kamanapa uma aborama mimagiri mirite wama, tumikibi ntaga uma nagarikiye.

²⁷ Pigoya, pika ka'waina aeba Wa'egawama paretibe wainibe anagi'ena potama nami'naba, aeba Wa'egawama nkaupe korankape i'nintana potama maete tumiye.

²⁸ Piya, ka'waina aeba paretibe wainibe nakeda puntanaba, maru'enaba ae'wa nkagowapa a'yigimpa aogi pugaite napima nano. ²⁹ Piya, ka'waina aeba Wa'egawama nkaubaba kampa aogima napima paretibe wainibe uwa nami'naba, ae'wa nkaib'o'enawampa aboramégina kamana aepi waive. ³⁰ Eya, pintanama nkagowama tigepisa ka'isamiba yonintana ibegini magimagi pegana, ka'isamiba pu'wawe. ³¹ Piya, taere nkagorepa a'yigimpa agama aogima pompesinta, kampa kamanatepa waiyesine. ³² Eya, Wa'egawamaba agorepa aborama a'yigitatamitasa arupu purataye. Piya pumagina, mampabisa kina'mikeba kampa mintakana a'yigimpa tagarubakaisanaga, arupu purataye.

³³ Piya nao'mitaba, tigeba naninta nakeda aki puntiripa, ka'isamika iyobi puntigini kanaigirino. ³⁴ Eya, ka'waina aeba aga'ena abekanaba ae'wa ntamapi nano. A'yugu aki pukibepi kamana maerimisanagawe.

Pigoya, toganaba tigeti naene wamagi, to ka'isa kamanapa arupu puma urimukuwe.

12

Awamus'a'ama tonarona yuga piye

¹ Nao'mitaba, Awamus'a'ama aboraramintintanaga aibosabo pusanaga urimukuwa, abiyo: ² Tigeba ago abintawé. Paipa tigeba abe'isa kina mintiripa, kamana kampa unta ama kotiti tiba puritauguri aega'ma wagana kana puntawé. ³ Piya, nae nabemika aogima abiyo: Ka'waina nkagupipa Koti Nkawamus'a'ama mintakanaba, pi ntagaramaba: Isupa pumireri potauwema, kampa ukiye. Piya, to ka'waina nkagupipa Aota Awamus'a'amaba kampa mintakanaba, pi nttagaramaba: Isu aeba Wa'egawema, tagapa kampa ukiye.

⁴ Pigoya, Awamus'a'ama toma toma aboraramemipa, Awamusapa ka'antowe.

⁵ Wa'egawama toma toma yogaba aboraramemipa, Wa'egaba ka'antowe. ⁶ Kotiba esegiyenawapa toma toma aboraramemipa, Kotiba ka'anto mima, esegiyenawapa a'ya'ma yugawa pukenaenaba a'ya'ma kina'mitete aborama tamiaeye. ⁷ Pigoya, Kotiba Awamusapa aborama ka puma a'ya'ma kina'mite tao'maekeñaga tamiaeye.

⁸ Eya, Awamus'a'ama otagina ka'wainaba monoka aogima ntapima iye. Piya pegina, pabi Nkawamus'a'ama otagina to ka'wainaba mono'ama nkagoba aogima abima iye. ⁹ Piya, pabi Nkawamus'a'ama otagina to ka'wainaba amatiti'enaba tabera puma miye. Pi ka Awamus'a'ama otagina to ka'wainaba yoni kina kaba itakena esegiyenaba maeye. ¹⁰ Piya, Awamus'a'ama otagina, ka'wainaba esegiyena aboragina, to ka'wainaba Koti nkawamutasa kamana aogima aboragina, to ka'wainaba toma toma awamus'a'ayikikenena maema aboragina, to ka'wainaba amiyo namiyo sukena kamana iyegina, to ka'wainaba pi kamana abima a'wae piye. ¹¹ Piya, a'ya'ma pi tamintintanaba pabi Aota Awamus'a'ama aewa aborama tamiae. Aewa nkabemika ka ka kina'mitete aborama tamiae.

Ka au'ama nkatkunka uwainkai pune

¹² Pigoya, wasanama nkaupa ka'anto waiyegina, agisa ayapa uwaenaenawe. Piya, uwaenaenawa waiyegina aupa ka'antowe. Piya pisa puma Karaisiti nkagisa aya mpintune. ¹³ Eya, ka Awamusataso paitaratagi, ka au mintune. Piya, Yuta kinape Kariki kinape kayokaya kinape uwa kinape, a'ya'ma aegaraompe kina'mitaba ka Awamusapa maemagita, ka tuntana pune.

¹⁴ Piya, au'amaba ka'antoba kampaye. Uwaenaena wantaga'enawe. ¹⁵ Piya, agisamaba: Naeba aya kampa mima au'amantanaba kampaye, ukibipa, ayama aupa kaite abiwapa mikiye, a. ¹⁶ Piya, agemaba: Naeba aoba kampa mima au'amantanaba kampaye, ukibipa, ayama aupa kaite abiwapa mikiye, a. ¹⁷ We, aupa aomana waiyesinta, ayama abompesine. Aupa agemana waiyesinta, ayama agunta pigaompesine. ¹⁸ Pigoya, Koti aeba napimagina au'ama nkagisa ayapa aborama aewa nkabomeka ka ka antantine. ¹⁹ We, a'ya'ma au'amaba ka'ant'o waiyesinta, autakayapa ayama miyesine. ²⁰ Pipa kampaye. Agisa ayapa uwaena waiyegina aupa ka'antowe.

²¹ Piya, nana piyema aowamaba ayanakamapa: Kae kampa mintagapa kanara mikuwemaba, omikiye, a. Piya, nana piyema a'nonkamaba agisawamapa: Kampa mintisigipa kanara mikuwemaba, uwaisimikiye, a. ²² Kampaye. Tau'ama nkaturuka anuntanawema napiyompe, kampa waiyesinta, tau'amaba kampa aogima miyesine. ²³ Piya, tau'ama nkaturukamaka tumiyema napiyompe, pipa aogima kabiyune. Eya, tau'ama nkatu kakantatapa aogi awa'enarasa airarikaeyune. ²⁴ Piya, aogi tau'ama nkaturuka igeba kanarane. Pabiymagina, Koti aeba a'ya'ma tau'ama nkaturuka atokaetamagina, tuminti nkaturukamaka nkageba maete iye. ²⁵ Piya, tau'ama nkaturukamaka kampa atatara punta, ka'ena puma ka ka iyo'maeye. ²⁶ Pabiymagina, ka atunkamaba kuntaena abipa kaga kuntaenaba ibiye. Eya, to ka atunkamaba nkageba maete iyipa, a'ya'maba kaga i'mu puwaekibewe.

²⁷ Pigoya, tigepa kaga aki puritama Karaisiti nkau'ena puritagiri atunkapa ka ka mintawé. ²⁸ Pigoya, Koti aeba ae tuntana punta taetisa wasanaba mayama utawaitantine: Maru'enaba aposoro kinana, pikalisa poropete kinana, pikalisa tisa kinana, pikalisa esegiyena aborakena kinape, yoni kaba itakena kinape, wasana iyo'maekena kinape, yogara kabiratakena kinape, tonarona kamana amiyo sukena kinape, sumagina, taetisa utawaitantine. ²⁹ Pigoya, a'ya'ma taepa aposoro utaratantina, a. Poropete a'ya'ma utaratantina, a. Tisa a'ya'ma utaratantina, a. Esegiyena aborakena kina a'ya'ma utaratantina, a. ³⁰ Yoni kaba itakena kina a'ya'ma utaratantina, a. Tonarona kamana amiyo sukena kina a'ya'ma utaratatina, a. Pi kamana a'wae pukena kina a'ya'ma utaratatina, a.

³¹ Pigoya, Awamus'aama asugasima yuga tamintika tigeba ebi ebi piyo. We, to ka aogi kipa tiyakikubopa, asu igaikiye.

13

Agu kao'ena pukenaenawe

¹ Pi tiyakikubo kipa mayamawe: Piya, naeba agu kao'ena kampa punta, tonarona wasanami kamanapisabe enisore kina'mi kamanapisabe mono yosinta, pero aga yabe'ya aga yemisa puma naeba Koti nkaobi uwa kamana yosine. ² Piya, naeba agu kao'ena kampa punta, Koti mpono kamana aborakenaenama nkesegiyena maema a'ya'ma kakanti kamanape a'ya'ma napiyenabe absinta, naeba Koti nkaobi uwa yagara miyosine. Piya, naeba agu kao'ena kampa punta, amu pugabarakaikenä namatiti'ena wainatatemisinta, naeba Koti nkaobi uwa yagara miyosine. ³ Piya, naeba agu kao'ena kampa punta, a'ya'ma kutantepa kusi kina menkimima iyo'maeyosinta, Koti nkaobi aogi ikantana kampa maeyosine. Eya, agu kao'ena kampa punta, monotaka nau'nepa ataogana yaku tamisinta, Koti nkaobi aogi ikantana kampa maeyosine.

⁴ Piya, agu kao'ena pemi kina'maba amo'ena kampa punta pasema mima, kayonena piye. Agu kao'ena pemi kina'maba kampa agobi pegina ankagasigasi puma, ae'wa nkaupa kampa maete iye. ⁵ Agu kao'ena pemi kina'maba wasanami kamanapa kampa akayunta, aebig'ena kampa punta, ae'wantanaga kampa napinta, amo'ena kampa karu'ena punta, ata antota'ena amikenagaba kampa napiye. ⁶ Ataena aboraginaba, agu kao'ena pemi kina'maba antara pumagina, tagantana aboraginaba, a'mu piye. ⁷ Piya, agu kao'ena pemi kina'maba a'ya'ma kuntaenaba aesaga'ma, a'ya'ma yaga amatiti'ena puma, a'ya'ma yaga Kotiti atokaekenaga napima, a'ya'ma kuntuyenabipa esegima asiye.

⁸ Pigoya, mono kamana uma aborakenaenaba a'ya wakana, tonarona kamana ukenaenaba a'ya wakana, napiyenarepa a'ya wakanaba, agu kao'enaba kampaye. Uwa waikiye. ⁹ Pipa mayamawe: Napiyenarepa pipa atunkane. Aboraompe mono kamanatepa pipa atunkane. ¹⁰ Piya, agowapa aborakanaba atunkapa a'ya wakiye. ¹¹ Piya, paipa inamu mintapa, inamu kamana uma, inamu ntantabarima, inamuntana puntone. Pi pumagi, naeba anosantapa inamuntanaba kaintone. ¹² We, ibaba taowa agakena karasibisaba kampa aogima agaompeka, ainti pi ntagaba Koti nkaowaba agabebé puma agakune. Piya, ibaba atunkapa agaoka, aeba agone aogima agamisa puma aintiba naeba agowa aogima

agakuwe. ¹³ Pigoya, tamatiti pukenaenabe, Kotiti atokaekena napiyenabe, agu kao'ena pukenaenabe, pi kakagaenama waiyaba miyegina, agu kao'enamaba asugasaye.

14

Awamus'a'ama aboraramemintanama nkagoba agu kao'enawe

¹ Tigeba agu kao'enayaga mikenaga ebi ebi pumagiri, Awamus'a'ama aboraramemini ntuga pukenaga napiyiyo. Eya, Koti nkawamutasa kamana uma aborakenaga abigina asugasimaena peno. ² Piya, ka'waina aeba tonarona amiyo sukena kamana yemipa, aeba wasanamipa kampa uwaiminta Koti omiye. Eya, wasanamipa pi nkagoba kampa abegana, aeba Awamus'a'ama kakanti kamana Koti nkaobi uwa iye. ³ Piya, to ka'waina Koti nkawamutasa kamana uma aborawaeyamipa, aeba wasanami nkigupa esegi puwaitama asiwaitamagina, paruyena puwaitaye. ⁴ Pabiyamagina, amiyo kamanapisa yemi'naba ae'wa nkigupa esegi potagina, to ka'waina Koti nkawamutasa kamana uma aborawaeyami'na aeba a'ya'ma monota ai'aru pe kina'mi nkigupa esegi puwaitaye. ⁵ Pigoya, tigeba amiyo sukena kamanapisa uwaeyigipa abekanaba aogi pikiye. We, Koti nkawamutasa kamana uma aboraigipa, pipa abekana aogiyenarak'a'ya pukiye. Piya, Koti nkawamutasa kamana uma aborawaeyami ntagaramaba amiyo sukena kamana ukema kinapa asu igaintiye. Pigoya, ka'waina aeba amiyo sukena kamanapisa yekana, to ka'waina a'wae puma yekanaba, pipa kanarane. Piya pemipa, a'ya'ma monota ai'aru pe kina'mi nkigupa esegi puwaitakiye. ⁶ We nao'mitaba, naeba tigeti wama amiyo sukena kamana'amana yosinta, ayama tiyo'maeyosine. Naeba tigeti wama kakanti kamanano, abikena kamanano, Koti nkawamutasa kamanano, tiyakikena kamanano, uma ararimikubopa kanara tiyo'maekenaenawe.

Mono kamana'ama nkagoba aogima aboraiyo

⁷ Pigoya, yabe'yawama nkagabe kabu wae'ama nkagabe kampa aogima ukibipa, ayama wasanamiba aogima abikibewe, a. ⁸ Pikuriwama kampa aogima aga yekiniba, ayama irebu kina'miba abitegini wama ma'enaba pukibewe, a. ⁹ Piya, tigeba pabiyama to kamanapisa kamana yiginaba, ayamabaya tiyo'miba abikibewe, a. Pipa kampaye. Kamanatipa ugasigina uwa mari wagaikiye. ¹⁰ Pigoya, a'ya'ma maga maga kamanapa toma toma waita wantipa, uwaba kampaye. A'ya'ma kamanapa agowantagane. ¹¹ Piya, ka'waina aeba kampa ago abukubo kamanapisa untanaba, naeka napima to marisa yagaraweye, aekaba pabiyama napima to marisawe ukuwe. ¹² We, tigetiba agowapa pabiyama waintiye. Piya, Awamus'a'ama nkesegiyena tigeti aborakenaga yepa, pipa kanarane. Pigoya, to marisa kina kanta puma misanaga, tigeba monota ai'aru pe kina esegi puwaitakena esegiyena maekenaga ebi ebi piyo.

¹³ Pigoya, ka'waina amiyo sukena kamanapisa ikibi'naba, aeba agowapa abima a'wae pukena esegiyenaga nunamu otagana aborano. ¹⁴ Piya, naeba amiyo sukena kamanapisa nunamu yopa, pipa naumanempaba yegina, napiyenanempaba uwa a'yugu piye. ¹⁵ Pika ayama pukuwe. Piya, naeba naumanetasina nunamu umagi, napiyenonetasa kaga ukuwe. Naeba naumanetasina ini umagi, napiyenonetasa kaga ukuwe. ¹⁶ Piya, tigeba kampa pabiya puma timamanatasina Kotiti ti'mu potaiginaba, ka kampa abintakibemi ntagaramaba kamanatipa aibosabo pute, ayamabaya tiyo'maema: Tagane, ukiye, a. Pipa kampaye. ¹⁷ We, tigeba ti'mu kamana aogima yepa, aya pegiri tiyo'yagarapa kampa esegi potawe, a. ¹⁸ Pigoya, naeba Kotiti na'mu potauwe. Pi amiyo sukena kamana'nempaba tigeta asurigasaye. ¹⁹ We, pipa aerawane. Naeba akiyenabi amiyo sukena kamanapisa e'ero kamana ukemaba aerawane. Piya, nae nabemika, akiyenabi napiyenepisa tarakamana'antuo uwaimekini abiye puwe.

²⁰ We nao'mitaba, napiyenarimpaba inamu kantaba a-peno. Kaintanaripa inamu kanta puma mimagiri, napiyenarimpaba anasa kina kanta puma aborano. ²¹ Pigoya, mono ago kamanapipa Wa'egawamaba maya untiye:

To kina'mi kamanapisabe namu'isa kina'mi nkiwamutasabe naeba ma kinapa kamana'ne uwaimekini, igeba ikabinatama kampa abikibewe, Wa'egawama piya untiye, iye.

²² Piya, amiyo sukena kamanapa mono kina'mintana wanane. Yigina, pipa kampa imatiti pe kina'mi pami pukenaenawe. Eya, Koti kamana uma aborakenaenabe abe'isa kina'mintanaba kampaye. Pipa mono kina'mintanawee.

²³ Piya, monota ai'aru pe kina'miba ampa aki puma to kamana to kamanapisa ampa amiyo suginiba, abe'isa kina'mibe kampa imatiti pe kina'mibe ampa tigantiniba: Aibo'nabo pewe, ukibewe. ²⁴ Piya, tigeba aki puma Koti nkawamutasa kamana uma aborama mintingina, kampa amatiti pemi kinano, abe'isa kinano, tigeti ampima mono kamanatipa abekiniba, pi kamana'amaba ae aupi pima agowapa uma ae aobi aborakibewe. ²⁵ Piya, kamana'wapa agupi kakantipa aborama arawaeyakanaba, Arawaeyakanaba,

aowamaba mabinti maete tumimagina Koti nkagega'e uma asagayumagina: Taga, taga, Koti aeba tigege mintiye, ukiye.

Monota aki pikenaenaba arupu puma aborano

²⁶ We, nao'mitaba, pikaba aya pewe. Tigeba aki puntiripa ka'wainaba mono ini yegina, to ka'waina mono kamana urimeginha, to ka'waina Koti nkawamutasa kamana uma aboragina, to ka'waina amiyo sukena kamana yegina, to ka'wainaba pi kamana a'wae piye. Pintanaba pepa, mono kina esegi puwaitakenaga napima piyo. ²⁷ Piya, amiyo sukena kamanapisaba kamana ukena puntiripa, uwaenamiba kampaye. Tara kakagami ukibewe. Piya, ka ka yigina, ka'wainaba agowapa a'wae puma urimeno. ²⁸ Pigoya, kamana a'wae pukena kina aisakateba, amiyo sukena kamanapa a-suma, paibuma mima Kotiti uwa yeno. ²⁹ Pigoya, Koti nkawamutasa kamana untiripa, pabiyama tara kakagami yigiri, to ka'isamiba pi kamanapa a'yikiyo. ³⁰ Pigoya, ka'wainaba aeba minteginha Awamus'a'ama agupi mono atagina ukena puntanaba, maru kamana yemi'naba nagariyekanaba yeno. ³¹ Piya, a'ya'ma kina'miba mono abima esegiyena maekenaga, tigeba Koti nkawamutasa kamana ka ka uma kanara aboraiyo. ³² Eya, Koti kamana uma abora kina'miba igewai nkaborantanarapa kabiywewe. ³³ Eya, Koti aeba napiyenarepa kampa a'yugu puratama, aeba agoya Kotiwe.

Pigoya, to ka'isa Kotiti atokaeha kina'mi nkakiyenabi pesa puma, ³⁴ tige akiyenabi waya'iyaba kamanapa paka puma miyivo. Piya puma, paisa ago kamana wasima waya'iyaba kamana kampa untiri wami nkimentanti miyivo. ³⁵ Piya, waya'miba mono akiyenabi kamana uma intintana aborasana, igeba ka'isaena abikena puntiniba, namankaipi iwaegipa ibigaiyo. ³⁶ We, ayama napiyewe. Koti kamana'amaba tigetisa aborantina, a. Tibinto abegana ka'isamiba kampaye, a.

³⁷ Pigoya, tigetisa ka'wainaba ae'waka Koti kamana unta poropetewo, Awamus'a'wantagano, napiyintanaba, kamana kaema timo kamanapa Wa'egawama nkunttemika, aewa abibebe peno. ³⁸ Piya, ka'waina aeba ma kamana'nekaba kampa owe yekanaba, ae'wa kamanakaba owe a-seno. ³⁹ Piya, nao'mitaba, tigeba Koti nkawamutasa kamana uma aborakenaga ebi ebi pumagiri, amiyo sukena kamana ukena kipa a'nkakuniyo. ⁴⁰ Eya, a'ya'ma yugaba arabama pigina aborama arupu peno.

15

Isu purite asinti kamanane

¹ Pigoya, nao'mitaba, aogi kamana urimuwigiri abintaka, to kake tiyogaritakena puwe. Pi aogi kamana urimuwigiri, tigeba maemagiri asima atokaema esegi puntawe. ² Piya, aogi kamana uriminto kamanapa kampa uwaba abima kainta, araku'ma upube punta, pi kamanatasat Kotiba ti'ikenaba piye.

³ Piya, mono ai'ne kamana nae maema urimintopa, pipa mayamaweh: Karaisiti aeba mono isa'ama untisa puma aguntaenareka antota purintiye. ⁴ Aeba purogini arubi kaitauguna kakaga yaga a'ya pogana, mono isa'ama untisa puma purintapisa asitantiye. ⁵ Aepa asitaogana Pita nkaobi uma aboramagina, pitasa tonagisarisa tara tumpaema kina'wampi nkiyobi aborantiye. ⁶ Pitasa mono kina 500 kina'mi nkiyobi aboraogini kaga agawaentaweh. Piya, igepisa ka'isamiba ago pu'waganha uwaenami iyogama mintaweh. ⁷ Pitasa Yemisi nkaobi aboramagina, pitasa a'ya'ma aposoro kina'mi nkiyobi aborantiye.

⁸ Pigoya, a'ya'ma kina'mi nkika'i inare ntagara kanta puma aposoro aborauwaganha, nae naobi aboraoga agantuwe. ⁹ Piya, naeba aposoro kina'mi nkikapi uwaenantora miyuwe. Naeba Koti mpionota ai'aru pume kina'mipa karana puwaitantoka, wasanamiba aposorowe unamikenaenaba kampa kanara piye. ¹⁰ Pigoya, naeba Koti nkawagae-nawatasat aposoronaba puntone. Piya, awagaenawampa naeti ataenaba kampa poga, naeba yoga punto'naba pipa igekeba igasaye. Nae nagu'ama kampa pogana, Koti nkawagae-nawampa naeti wainti, pi'na puntiye. ¹¹ Piya, naeba, igebayo, mono kamana urimintompea, tigeba kanara abima aegarantaweh.

A'ya'ma kina'mita asikena kamanane

¹² Pigoya, Karaisitiba purintapisa asinti kamana taeba a'ya'ma yompepa, nana piyema tigetisa ka'isamiba: Purinta kina'mi asikenaenaba kampa waintiyema, yewe, a. ¹³ Piya, purintapisa asikenaenaba kampa waiyesinta, Karaisitiba kaga kampa asintesine. ¹⁴ Piya puma, Kotiba Karaisitipa kampa asitantesinta, mono ukenaenarepe timatiti'enariepe kaga a'yugu pemisine. Pi nkamanapa kampaye. ¹⁵ Piya, purintapisa asikenaenaba kampa taga waiyesinta, Kotiba Karaisitipa kampa asitantesine. We, taeba pi asitanti kamana umagi, kampa piya asitantesinta, taeba Koti kamana taga kampa aboraompesine. ¹⁶ Piya, purintapisa asikenaenaba kampa waiyesinta, Karaisitiba kaga kampa asintesine.

¹⁷ Eya, Karaisiti aepa purintapisa kampa asitantesinta, timatiti'enaripa a'yugu pegina aguntaenaripa wairitasine. ¹⁸ Piya, kampa asitantesinta, Karaisiti atokaema mima pure kinapa igeba kaga uwa pu'ma ata puwasine. ¹⁹ Eya, taeba ma mpabinkamana Karaisiti atokaeyompentana waiyesinta, igaikena tantara'ena taeti waiyesine.

²⁰ Pigoya piyamaba kampaye. Karaisiti aepa taga purintapisa asitaogana, purinta kina'mipa paitawaitama asima mintiye. ²¹ Piya, purikenaenaba ka'waina agobiyogana, pabiyma purinta kina asikenaenaba to ka'waina agobintiye. ²² Eya, a'ya'ma kina'mititi Antamuge atokaekenaenare waintika, purune. Pabiyma Karaisitige atokaekenaenare waintika, taogama mikune. ²³ Pigoya, mayama arabama asikune. Karaisiti aeba paitama asintika, taeba Karaisititi atokaeyompe kina'mitiba ae aborakibi ntagaba asiyekana, ²⁴ tae tako'i nagarikiye. Piya, Karaisitiba asugasima a'ya'ma to esegiyenaba paitanta'enabe kabikenaenabe maegasima, kabiratakenaenara tabarempa Koti nkayata menkatakana nagarikiye. ²⁵ Piya, Karaisiti kabiratakenaenaba mirite kanama, a'ya'ma kama kina'wapa agisa amentapinti atama aerapakananagarikiye. ²⁶ Eya, a'ya'ma kama kina'wapa maegasimagina, ika'i purikenaenaba kaga maegaikiye. ²⁷ Piya, Kotiba a'ya'waemaena puma agisabi aki potantiyema, mono isa'ama piya iye. Pigoya, a'ya'waemaena puma agisabi aki potanti kamana'ama nkagoba taeba abokana, Koti taegeba agisabi kampa mintiye. Kampaye. Aeba aki puratagi, Karaisiti nkagisabi mintune. ²⁸ Pigoya, ainti Koti aeba a'ya'waemaenaba agisabi aki puratakanaba, yagarawampa ae agisabi a'ya'maena aki puratakibiki ntagarama nkagisabi ae'wa nkaupa menkatakiye. Piya pekanaba, Kotiba a'ya'waemaenama nkai'ne mikiye.

²⁹ Pigoya, tigetisa ka'isamiba purinta kina'mi nkiyo'maekenaba mono wanipa to kakema maeyawe. We, purintapisa asikenaenaba kampa waintiye, yepa, pipa nana piyema piyamaba maeyawe. ³⁰ Piya, purintapisa asikenaenaba kampa waintiye, yepa, nana piyema taeba taupa ata puratakena ki'i asi nasi nasune. ³¹ We, nao'mitiba, Karaisiti Isu Wa'egarempati naeba tigeckaba na'mu potamagi, mayama tagaka urimuwe: Naepa a'ya'ma yaga purikenaenamaba agarosanatagi miyuwe. ³² Piya, Epesasi kumata kabu kara kanta pe kina'mi kamaena punatatakaba mabisa ikapa nana maekuw. Pipa kampaye. We, purintapisa asikenaenaba kampa waintakapa: Aiba agora pu'wakubompeka ibaba iga nanintabe wanipe nama aogima miyeno, a.

³³ Pigoya, a'yugu timiyo puritakiri abiyo: Ata pe kina'mige nasigini, aogiyenaripa ata puritakibewe. ³⁴ Eya, tigeba tigu'ama pami puma arupu puma mima, aguntaenabatoba a-piyo. We tigetisa ka'isamiba Kotika aibosabo peka, pipa abima tini piyoma, yuwe.

Tau'ama asikibipa toma pukiy

³⁵ Pigoya, ka'isamiba maya yewe: Purinta kina igeba aya pumabaya asikibewe. Aya iga puma asikibewe, piya yewe. ³⁶ Pipa aibo kamanane. We, aintana potaganaba mabinti pu'wasu pumagina iraye. ³⁷ Piya, aintana puntiripa, tigeba witi aorasawo, to ka aorasawo, maema aintana potaganaba, ayampuwampa iraye. Pipa tonaw. Pi nkaempurasaba kampa aintanaba pewe. ³⁸ Piya, Kotiba aewa otagini aorasa ae'wa nkayampuwapa iraye. Piya, ka ka aintanamaba ae'wantana aboraye. ³⁹ Piya, arirasaenama nkagoba pabiyma ka'antoba kampa waintiye. Wasanamite taupa pipa tomene. Yagawama nkaupa tomene. Kabarankama nkaupa tomene. Inoyantama nkaupa tomene. ⁴⁰ Piya, mantabinti miye kina'mi nkipa tomene. Mabinti miye kina'mi nkipa tomene. Piya, mantara waita wantemintanama nkawa'enawapa tomene. Mara waita wantemintanama nkawa'enawapa tomene. ⁴¹ Piya, pankama nke'wasaenawapa tomene. O'ama nke'wasaenawapa tomene. Norimi nke'wasaenawaipa tomene. We, norimi nke'wasaenawaipa ka'mapa kampaye. Toma toma waintiye.

⁴² Pigoya, purintapisa asikenaenama nkagowapa pabiyaenawe. Piya, mamparasa taupa kaikenena waintegina, asiratakibi tau'amaba kampa abararakenaenawe. ⁴³ Piya, kaikenena tau'ama nkageba maete tumegin, asikibemi tau'ama nkageba maete ikiye. Kaikena tau'amaba magimagi puma waintegina, asikibemi tau'amaba esegima aborakiye. ⁴⁴ Kaikena tau'amaba ma au'yagane. Asikibemi tau'amaba manta au'yagane. Piya, mabisa tau waintikaba pabiyma manta tau aborakiye.

⁴⁵ Pikaba mono isa'ama maya iye: Marusa yagara aboranti, Antamu, aeba agu'amantaga asintiye, iye. Pigoya, aintisa Antamu, pipa Karaisiti, aeba e'wasaena tamikena yagara aborantiye. ⁴⁶ Piya, mantarasaenamababa kampa paitantiy. Mabisa tau'ama paitagina mantarasaenarepa ainti aboraye. ⁴⁷ Piya, marusa yagaraba marasa pumarantikanababisa kina'enapuntiye. Aintisa yagaraba aeba pipa mantabintisawe. ⁴⁸ Piya, mabisa kina'mitiba pi mabisa yagara kanta pune. Mantari tage wainti kina'mitiba pi mantarasa yagara kanta pune. ⁴⁹ Piya, mabisa yagarama nkaoga puntompeka, pabiyma mantarisa yagarama nkaoga pukune.

⁵⁰ Nao'mitaba, ma kamana yopa abiyo: Mabisa tautempaba Koti kabiratakenaenabi kampa ubasikiye. Eya, awasakenaenamaba waiyaba'enabipa kampa ubasikiye. ⁵¹ Abiyo. Kakanta kamana kapa aborarimukuwe: A'ya'maba kampa pu'waekubompeka, pikuriyama aga yekapa a'ya'maba a'wae puma to tauga aborakune. ⁵² Piya, pikuriyama aga yekapa aoromo pisa puma karu'ena purinta mono kina'miba asima to kampa abararakibewe. Piya, a'ya'ma kina taeba a'wae puma to tauga aborakune. ⁵³ Piya, abararanta tau'amaba a'wae puma miyaba'ena maeyano. Eya, puriyaba tau'amaba a'wae puma miyaba e'wasaena maeyano. ⁵⁴ Pigoya, abararanta tau'amaba a'wae puma miyaba'ena maentini, pi puriyaba tau'amaba a'wae puma miyaba e'wasaena maeyigina, pabi ntagaba mono isapisa kamana'ama nkau'wapa aborakiye. Pipa mayamawe: Aoganta'enamaba purikenaena atarayegina nagariye, iye.

⁵⁵ Purikenaenama nkesegiyenaba aempaye, iye.

Purikenaenama nkre wantawapa aempaye, iye.

⁵⁶ Piya, aguntaenamaba purikenaenama nkwantapa waintegina, mono ago kamana'amaba piyama aguntaenamaba nkesegiyenaba taeti aboraye. ⁵⁷ Pigoya, Koti aeba Wa'egare Isu Karaisiti otaogana, purikenaenama nkesegiyena atarama tao'maentika, Kotiti ta'mu potano.

⁵⁸ We, nabugai ntao'mitaba, pika tigeba esegima asima aebebe puma miyivo. Tigeba ago abintawe. Wa'egawamati araga ntuga piginaba, aeba uwaba kampa tigaikiye. Piya, Wa'egawama ntugagaba a-tiyekita piyo.

16

Mono kina iyo'maekena mone aki pikena kamanane

¹ Pigoya, mono kina iyo'maekena mone aki puntiripa, Karesiya marasa monota ai'aru pe kina piyama ke i'ma iyakosa puma aki piyo. ² Piya, a'ya'ma sontara marusa yagaba mone maema menkatantata ka ka'mita tigetitanabisa timata timata maema menkaki piyo. Piyama tipipigarusanaga ai'aru pugaka pigi kanano. ³ Tigeti irosakubopa, wasana uwaitakibe'nagiba igepe esa imima uwaitakini, ti'muntanaripa Yerusaremi kumati maete wakibewe. ⁴ Piya, pika naeba wamagi, naege kaga ibabute wakune.

Korinti kina uma igakenaga Poropaa abuntye

⁵ Pigoya, naeba Masetoniya maba akapi uwaesamagi tigeti wakena puwe. Piya, pi ki'i wakuwe. ⁶ Pigoya, naeba tigeti wamagi ka'isa yagaba ampikuwe. We, e'ero ntagabaya ampimagi, tabe esibaba a'ya waka, wakiri tigeba ke'i wakena nao'maeyigi piti matiba wakuwe. ⁷ Naeba ibaba uwa uma aronkanto tigata wakenaba pipa kampa nabiye. Piya, Wa'egawamaba abintaka tigetiba e'erotia ampiuboka yuwe. ⁸ Naeba mata Epesasi kumata mintakana, Pentikositira naninta nakena yaga arosakapa tigeti kanakuwe. ⁹ Piya, mata'i Wa'egawamaba mono ki aogima iregina tabe yugaba aboranamiye. Piya, mata'i mono'ama kama kinapa uwaena mintawe.

¹⁰ Pigoya, Timotiba tigeti wakiripa, tiyo'ena potaigina aekuruyena kampa punta miyeno. Eya, naeba Wa'egawama ntuga posa puma aeba piye. ¹¹ Pika aepa atikabitamagiri, naeti ataigina pasema kanano. Eya, naebe to ka'isa mono kina'mibe aobi puma miyune.

¹² Pigoya, tao'yagara Aporopaa, aepa to ka'isa mono kina igege tigeti wanema, esegima otaoopa, pikaba ibaba kampa abiye. To ka yagaba kepa kanara agamaba, tigeti wakiye.

To ka'isa kamanane

¹³ Pigoya, tigeba tigupa aogima kabima mima, timatit'enabi esegima asima, waraka'ya mpima esegi piyo. ¹⁴ A'ya'maena pentanaba agu kao'enayaga piyo.

¹⁵ Pigoya, nao'mitaba, tigeba ago abintawe: Setepana tupa igeba Akaiya mari marupa mono kamanatapa aborantane. Piya, ige'wai ntapiyenabisa Kotiti atokaeya kina iyo'maekena puntane. ¹⁶ Eya, piya pe kinape to ka'isa araga mono yuga puma monoka tiyo'maeya kinape, paebuma igegeta paitakena kina'waintana piyo. ¹⁷ Pigoya, Setepanabe Potunatobe Akaikobe, igeba naeti irosauguna nantawama aogi puntiye. Igeba tige marupa nae nagupinti pumaewamagini, ¹⁸ naepe tigepe kaga tanta paru puratantawe. Tigeba piya kina'mi nkige abigina aogi peno.

¹⁹ Pigoya, Esiya auka'isa monota ai'aru pe kina'miba: Aya pewe, yewe. Akurabe Pirisikabe isige namapi monota ai'aru pe kina'mibe, igeba Wa'egawamaka uma tabera i'mu puritama: Aya pewe, yewe. ²⁰ A'ya'ma mono kina'miba kaga: Aya pewe, yewe. Tigeba mono kinape ka ka ankayankamimi piyo.

²¹ Naeba Poronawe. Naeba: Aya pewema, nae'ne ntayapisa kaeyuwe. ²² Pigoya, ka'waina aeba Wa'egawamaka aekita potakibemipa, ataigina Kotiba agarubakaikiye. We,

Wa'egarepa, kaeba ampa aborao. ²³ Wa'ega Isu nkawagaenawapa tigeti waima waiyeno.

²⁴ Karaisiti Isuka agu kao'enanepa tigeti puritauwe. Tagane.

Poro piya isa kaentiye.

KORINTI KINA'MI NKISA PORO KAENTIYE (TARA YAGANE)

¹ Naeba Porona, Karaisiti Isu nkaposoro Koti nkabemika unatantiye. Piya, naebe tao'yagara Timotibe, tasigeba Korinti kumata Koti mponota ai'aru pe kina'mitibile, Akaiya mari Kotiti atokaeya kina'mitibile, tigeti ma nkisapa kaeyuse.

² Pigoya, tabarempa Koti, Wa'ega Isu Karaisiti, isigetisa awagaenabe paruyenabe tigeti waiyeno.

Koti Poro ao'maejomeka a'mu potantiye

³ Pigoya, taeba Wa'egare Isu Karaisiti nkaba Koti ta'mu potama agiseno. Piya, tabarempa aeba antara'enama nkagowe. Pi Kotirempa aeba agoya puratakenama nkagowe. ⁴ Piya, taeba a'ya'ma tauki nakiyenabi mpiyompeka agoya purataye. Eya, Koti agoya puratamisa puma taeba pabiyama iki nakiyenabi mpiye'hagipa kanara agoya puwaitaiyoma tao'maeye. ⁵ Piya, Karaisiti ae kuntuyenama nkatkunkapa tabera taeti aboraisa pumagina, pabiyama Karaisitibisa agoyaenawapa taeti tabera aboraramiwaye. ⁶ Piya, taeti tauki nakiyenaba aboraramemipa, pipa tigeka agoya puritama ti'ikenaga aboraramiye. Kotiba agoya puratamipa, pipa tigeka agoya puritakenaga aboraramiye. Piya, tae puratamisa puma aborariminti kuntaenaba kaga aesaga'ma paebuma miyigina Koti pi nkagoyaenawapa puritakiri miyijo. ⁷ We taeba tigeka tara tara tagiba kampa napinta, mayama napima esegi pune: Tigeba kuntaenarepa asima kubo pukibepa, taegeba kaga agoyaenarapa asima kabo pukibewema, abuntune.

⁸ We nao'mitaba, taeba Esiya mari miyuwakini tauki nakiyenaba tabera aboraraminti, pika aibo pusanaga kamana urimekiri abiyo: Pita'iba kuntaenama agasiga puratama esegiyenarepa asuragasima taerari kaeyoga: Mikenaenarepa nagariwakiyema, napintune. ⁹ Piya, taeka: Iyeguyigini puriyoma, utaratantisa puma aboraramintiye. Pipa uwaba kampaye. Taeba taete nkesegiyenarekaba kampa napinta Kotiti atokaekenaga aboraramintiye. Eya, Koti aeba purintapisa asiwaitakena esegiyenawa nkwaainta yagaramati esegima tamatiti potakenaga aboraramintiye. ¹⁰ Piya, taeguyigi purikenaena pi ataenabisa Kotiba taba puratantiye. Piya, aintiba to kakema taba pukiye. Eya, esegima aeti tamatiti pekanra to kakema taba pikiye. ¹¹ We, tigegeba nunamubisa tao'maeyiyo. Piya pigina Kotiba uwaena kina'mi ntunamu abintana agoya puratakiye. Agoya puratagiri uwaena kina'mitaba tigeba pika ti'mu potaigina kanarasano.

Poro aeba Korinti kinapa ata kamana kampa uwaimintiye

¹² Piya, taeba mantanaga ta'mupa pune: Taeba mampara a'ya'ma kina'mi nkikapipa aogima ntasimagi, pabiyama tige tikapi asugasima aogima ntasintompene. Piya, taeba aota puma Koti pisa puma tagantana puntune. Mabisa kina'mi ntapiyenamaba kampa aboramagi, taeba Koti nkawagaenabisa kamanatepa aborantune. Eya, tagu taumarempaba: Pipa tagantanawe, iye. ¹³ Ma kamanapa tigetiba kaeyompepa, agowapa pipa kampa kakantiye. Kampaye. Kaema timopa asuma abiyo. Piya, nae nabemika tigeba agowapa abiwaekibewe. ¹⁴ Eya, paipa tigeba ka'isa abintakina nae nabemika abiwaeyiyo. Piya pikibepa, Wa'ega Isu kanabipa taeba tigeka ta'mu pukubompesa puma tigeba taeka ti'mu pukenaga napiyyo.

¹⁵ Piya, tigeba pikaba kanara napikibewema abibebe punta, paitama tigeti wakuwe, untone. Pipa kayone puratakenaga tara yaga tigeti aborakuwema napintone. ¹⁶ Eya, naeba pabiyama napimagi paitama tigeti wama urigaitegi Masetoniya mari wakuwema napintone. Piti umigategi to kakema a'wae puma Masetoniya maba agaite to tigeti kanakiripa, Yutiya mari wakenaga nao'maeiyoma napintone. ¹⁷ We, naekaba nanawee yewe. Pi kamana'nepa naeba tara nagi napinta a'yugu kamana untona, a. We, naeba ka'ena pikena pontanaba, pipa mampabisa kina'mi yesa suwa: Owe, owe, kampaye, kampaye, kaga yesa suma yuwa, a. We, pipa kampaye. ¹⁸ Kotiba tagantana puma tao'maeiyoga taeba urimintompe kamanatepa owebe kampayebe kaga kampa untune. ¹⁹ Piya, naebe Sairasibe Timotibe taeba Koti Ntagara Isu Karaisitika kamana urimintune. Piya, Karaisiti aeba tara agi kampa napinta, owe a'o-kaga kampa untiye. Kampaye. Aewapa owe uma asi nasiba tagantana piye. ²⁰ Eya, a'ya'ma Koti utaratanti kamanapa Karaisiti owe uma au'wapa aborawaeye. Pika taeba Koti kamanapa abimagi, Karaisiti nkagerapa taeba tagane uma Koti nkageba asagayuyune. ²¹ Piya, Kotiba tigepe taepe Karaisititi kaga atokaeratamagina esegima asiratama yogaretapa utarataye. ²² Piya, a'e'wa nkara'ena puratama Awamus'a'wapa tagupipa ataoogana tumintiye. Piya, aintiba a'ya'waemaena aboraramikenaga awame'ena taminti, pipa Awamusane.

Poroba kampa agaropa igetiba wantiye

²³ Pigoya, naeba Korinti kumatiba wama namo'ena puritasanaga kampa wantone. Piya, kamana'nepa Koti pipa abintegi taga taga yuwe. ²⁴ We, taeba timatiti'enaritapa tabe kina kanta puritakenagaba kampa yune. Kampaye. Taeba tiyo'maeyakiri ti'muntanabi miyiyoma, yune. Piya, tigeba timatiti'enayaga esegima asima mintapa, pipa abuntune.

2

¹ Piya, naeba tigeti wama tinta ataena to kake aborarimisanaga napima kampa wantone. Kampaye. ² Piya, naenepa tinta ata puritakiripa, ae'nagita nae nantaba asoya punatakibewe, a. Piya, tige asoya punatakibe'nagitipa, nana piyema naeba tige tintaba ata puritakuwe, a. Pipa kampaye. ³ Piya, naeba wakiripa, tigeba asoya punatakibe'nagitipa nanta ataena aboranamisanaga naeba arupu puritakena isa'nepa pai kaerimintone. Piya, naeba tige kaba mayama napintone: Nae nantawamaba asoya pegina tige tintawamaba kaga asoya piyema, napintone. ⁴ Piya, nae nantawamaba tige kaba tabera nauki nakiyena pegina kunta nabegi tabera kube'ena puma marusa isapa kaema timintone. Piya, tinta ata puritakena wanane. Agu kao'enanepa tigeti tabera waintegi, pi'na aborarimikenaga kaema timintone.

Aguntaena maegainti ntagaraba to kake tiyo'ena potaiyo

⁵ Pigoya, ka'waina tinta kuntaena aborarimemipa, aeba nae'amana nane. Tigeti kuntuyena aborarimintiye. We, a'yugu naeba esegi kamanapa uwa yuwa, aeba tigetibe naetibe kaga ka'isa kuntuyenaba aboramintiyema, yuwe. ⁶ Pigoya, aeba agu a'wae piya, antota'enawa tikabitakenaeniripa tigeba a'ya'ma uwa ataiyo. Pipa pabigoye. ⁷ Piya, ibaba tigeba a'wae puma asu'a potama to kakema tiyo'ena potaiyo. Eya, tabe kuntuyenama aerarikaesanaga to kakema tiyo'ena potaiyo. ⁸ Pika naeba to kakema agu kao'eniripa aboramiyoma, esuritauwe. ⁹ Piya, a'ya'maenagaba tigeba kanara nawamupa wasiywero, kampayoma abisanaga esa paipa kaentone. ¹⁰ Piya, tigeba ka'waina kaintana atunkapa agaikibepa, pipa naegeba kaga agaikuwe. Piya, kainto kaintanaba pipa naeba Karaisiti nkaobi kaintone. Eya, tige tiyo'maekenaga pabiyama kaintone. ¹¹ Pipa Satani tamiyo pusanaga piyaba puntone. We, aeba ata puratakena napiyaba miye. Pikaba taeba aibo'enaba kampa puma, kabiyeno.

Poroba Torowasi kumata kuntaena abuntye

¹² Paipa naeba Karaisiti nkawaga kamana ukenga Torowasi kumata ampa irosauwagan, Wa'egawamaba kepa pita i'natantiye. ¹³ Aiboga, na'nanto Taitasipa pi kumatapa kampa agauwagana naumanempaba pikaba kampa aogima pasema mintantiye. Piya poga, naeba Torowasi kinapa igaite Masetoniya mari kanantuwe.

Koti nkesegiyenaba asugaikenaenawe

¹⁴ Pigoya, Koti aeba Karaisiti ntugarasa paitaratagi, kama kinatepa igasune. Pikaba ta'mu potano. Piya, aeba yogaretaka uratagini wasanami tae yugarasa Karaisitipa agagana, aogi aguntaena a'ya'ma mariba pi'naba piye. ¹⁵ Eya, taeba aogi agunta kanta puma miyokana Karaisitiba kaeyagina Kotiti iye. Pi nkaguntamaba i'ikena pe'nagi nkikapi aboramagina, kaiwaitakena pe'nagi nkikapipa kaga aboraye. ¹⁶ Piya, agora purikibe kina'mitiba pipa ata purikena agunta kanta puma aboraye. Piya, to ka'isa kina'mitiba, e'wasa maenta kina'mitiba pipa aogi e'wasa agunta kanta puma aboraye. We, pi ntugaba ke pekana kanarasakiye, a. ¹⁷ We, taeba ka'isa uwaena kina kantaba kampaye. Ige Koti kamanatasa pisini yugawaipa pesapa kampa pune. Kampaye. Taeba tagantana pompeka Kotiba yogaretapa utaratagi, taeba Karaisititi atokaema Koti nkaobipa kamana'wapa taga uma aboraune.

3

Kasa mono yuga kinane

¹ We, taeka: Igewai asagayukena pewema, napiyewa, a. Taeba ka'isa kina pesa puma, wasanami tage asagayuntini isa kaema tamigi tiyakisuna, a. Tage asagayukena isa tigeba kaema tamigi wasanaba iyakisuna, a. ² Pipa kampaye. Tagega'e asagayukena isapa tigewe. Piya isapa kaemarantapa, tigupi waiyegini, a'ya'ma kina'miba ago agama aisumaginai taekba aogima abewe. ³ Piya, taeba tigeti yoga pokiri, Karaisiti nkisa'ena puguna pi'na nkagowapa arantiye. Piya, pi nkisapa inkirasa wanane. Pipa e'wasa Koti Nkawamusatasakaemarantine. We, yaba nkisata nane. Wasana igupi kaemarantine.

⁴ Piya, pi yo kamana'ama nkagoba mayamawe: Taeba Karaisiti ntugarasa Kotiti atokaema tara tagiba kampa napiyune. Kampaye. ⁵ We, pi ntugarapa tae esegiyena kampa waintegi, tae tayapisa taeba ka'enaba kampa uwa abae puma pune. Kampaye.

Koti ae abintowa esegiyenawapa tamegi yogarepa abae puma pune. ⁶ Eya, Koti aeba kasa'ena utaratamagina taepa pi kasa monotapa yoga kina urataye. Piya, pai yaba nkisata kaemaranti ago kamana nane. Awamusatasaka mono aborama pi ntugara utarataye. Eya, pai yaba nkisata kaemaranti kamana'amaba wasanaba aeguma kaiye. We, Awamusa'amaba kasa'ena aborama wasanamipa aoganta e'wasaba imkiye.

⁷ Pigoya, paipa Koti aeba ago kamana'wapa yaba nkisata kaema imogana, iwa'enawaimpa aogiyenaba puntine. Eya, pi ntugara Koti nke'wasaenamaba Moses nkaowabipa e'wasa puwantiyi. Piya, pi nke'wasa nagarikena pogini, Isureyo kina'miba aowabi kampa uwa aganta paroakantawe. We, pi paisa ago kamanapa aogi iwa'enabisa aboramagina purikenaenamaba arawantiye. ⁸ Aibogana, Awamusa'ama aborami aoganta'enamaba iwa'ena taberaka'yapisa aboraye. Pipa to awametane. ⁹ Eya, ata ikantaga kamana aboranti ntugara e'wasaenaba puntegina, we, arupu puratakena kamana aborai ntugara e'wasaenawapa tabera asugasima waiye. ¹⁰ We, pikaba maya yuwe: Kasa'enaba e'wasarakayane. Piya, paipa e'wasaenara aborantintanaba ibaba e'wasaena kampa wainta kanta puma waiye. Eya, kasa'enamaba paisaenaba asugasima tabera e'wasaña piye. ¹¹ Eya, nagarikenaba aeba e'wasaenayaga pai aborantiye. We, waiyaba mikenaba aeba tabe e'wasaenayaga waiyegina kanarasayé.

¹² Piya, Koti utaratanti waiyaba mikenenaagaba taeba aobi puma miyompeka taeba kampa taekuruba pune. Kampaye. ¹³ We, taeba Moses puntemisapa kampa pune. Piya, aeba kai atutasa aowabipa aerarikaetama, Isureyo kina'miba e'wasaenawa nagarikena pogana agaagina ani pusnaga kakantiye. ¹⁴ Piya, napiyenawaipa akumpa esegi puwaitagini igeba paisa utawaitanta ago kamana aisepa, agowapa kampa aogima ntapiyewe. Kampaye. Piya, kana kai atupa iyora uwa waintegini kampa maegasima agawé. Kampaye. We, wasanamitaba Karaisititi atokaeyakanma maegasaka agakune. To kipa kampaye. ¹⁵ Eya, igeba paipe ibasa kanabipe Moses kaemaranti kamana aisepa, kai atunkama napiyenawaipa aerarikaeyagini kampa napiyewe. ¹⁶ Aibegina, ka'waina agu a'wae puma Wa'egawamati atokaeyamipa, pi kai atupa maegasagina agaye. ¹⁷ We, Wa'egaba aeba Awamusane. Piya, Wa'egawama Nkawamusa'amaba ka'wainati miyegini, ka'enamaba pi ntagaraba kampa arakuriye. Kampaye. Aeba aogima uwa miye. ¹⁸ Pigoya, aogima uwa miyompe kina'mite taowabisaka kaiba ago maegasagi agaune. Piya, Wa'egawama nke'wasaenamaba taeti aboragi pemonta kanta puma pakasa piye. Eya, a'ya'ma yagaba tagu a'wae puta iyegi, taeba e'wasaenawapa maeta ima ae kanta puma aborakena pune. Piya, Wa'ega, aeba Awamusa'ama, aeba piyaba purataye.

4

Kotiba mantabintisaenaba tautasa aboraye

¹ Pigoya, Kotiba antara'ena aboraramima ae'wa nkago aborakena yugarapa uratantegi, pikab kampa taekitaba pune. ² Piya pumagita, kakakena tanintanaba takabigasima kumpari kipa kampa nasima, Koti kamanapa kampa antage'ena potaune. Kampaye. Taeba Koti nkaobi taga kamanatak'a'ya uma aborakini a'ya'ma kina'miba yogarepa agamaginii taeka intabai pintiba aogima ntapiyewe. ³ Piya, kana mono yompepa, pipa igaikená kina'mi nkiyobinkamana kakasu piye. ⁴ Eya, mampabisa ama koti aeba kampa imatiti pe kina'mi ntapiyenawaipa airarikaewaitamagina, Karaisiti nke'wasaenamana nkawaga kamana'ama igupipa ubasegini Koti nkara'enawapa agasanaga airarikaewaitaye. Piya, Karaisiti aeba Koti nkamatatakyane. ⁵ We taeba mono urimompepa, pipa taerekaba kampa urimune. Kampaye. Isu Karaisiti aeba Wa'ega miyegi, taeba Isuka kayokaya kinati mpiyune, pipa urimima miyune. ⁶ Piya, Koti aeba paitaka'yá: Tununtanabisa aroa, yogana arantiye. Pi untí Koti nke'wasaenawampaba ibaba tagupi araye. Eya, Koti nke'wasaenamaba Karaisiti nkaobisa aboragi agabebé pune.

⁷ Piya, taeba magabu kanta puma miyokana, pi mantabintisa e'wasaba tantabaipi waiye. Piya, taetisa aogiyenaba aboramipa pipa tae'ena wanane. Aeba Koti nkesegiyenaraka'yá tae tauta aboragini agawé. ⁸ Piya, wasanamiba tonarona tauki nakiyena aboraramepa, kampa akutatawe. Kuntaena aboraramekaba, kampa taekitaba pune. ⁹ Igeba kama puratakaba Kotiba kampa tagasaye. Igeba taeguyegá ware'naokanaba tao'maeyagi to ka asima yogaba pune. ¹⁰ Piya, a'ya'ma yagaba Isu mpiriyaba mikenenaenawapa tae tauta ampa aborakenaga tae tautepa Isu purintemi ki'i wama miyune. ¹¹ Eya, a'ya'ma yaga mampara miyompe ntugara Isukaba igeba ata purataga, taeba purikena ki'i nasune. Piya, Isu mpiriyaba mikenenaenawampaba tae purikena taupisaba aborakenaga piyama nasune. ¹² Pipa mayamawé: Taetiba purikenaenamaba yoga pegina, pi ntugara tigetiba miyaba'ena ago aboraye.

¹³ Pigoya, paipa ka'wainaba amatiti puma mono isapipa mayama kaentiye: Naeba namatiti poka kamana uma aborauwe, untisa puma, taeba tamatiti puma mono kamana yune. ¹⁴ Piya, taeba mayama abibebe pune: Wa'ega Isu purintapisa asinti, aeba taepa pabiyama Isuge purintapisa asiratamagina, tigepe taepe kaga ae'wa nkagora taba puratakiyema, abintune. ¹⁵ Piya, a'ya'ma taeti aboraramintintanaba pipa tiyo'maekenaenawe. Piya, Koti nkawagaenamaba wagana kana pegini, uwaena kina'miba abima tabera i'mu puma Koti nkage asagayuviyo.

Mabiso kuntuyenamaba aogi e'wasaena aborakiye

¹⁶ Pikayema taeba kampa taekitaba pune. Kampaye. We, tau'amaba paka paka abararagina, a'ya'ma yagaba tagu'amaba paka paka aososiye. ¹⁷ Piya, tauki nakiyena taeti aborawaeyamipa pipa uwa aro nttaganto puwama, tabe e'wasaena taeti aborama, tabe kuntuyenaba asugasima waiyaba mikiye. ¹⁸ Piya, taeba taorasa agaompentanagaba kampa napiyune. Kampaye. Taeba taorasa kampa agaompentanaga, pika taeba kamanapa yune. Pikaba kampa taekitaba pune. Eya, taorasa agaompentanaba pipa aro nttaganto waiyekana, taorasa kampa agaompentanaba pipa waiyaba mikiye.

5

Mabiso namapa tauteka mantabisa nama mpaekune

¹ Pigoya, taeba mayama abintune: Mampabi ibaba seri nama kanta puma tau mintompepa, pipa maegasigipa: Aerawane, ukune. Piya, Kotiba ka esegi namatepa kima'ma mintikana aborama tamikiye. Pi ntamapa wasanamiba iyatasaba kampa kimarapa ntamapa mantara uwa waiyaba waikiye. ² Piya, taeba mampabi pi ntamapi mima kube'enaba puma miyune. We, taeba mantabinti wainti ntamatasa kai kanta puma amirisana tabugaye. ³ Eya, uwa tauka misanaga pintana purisanaga tabugaye. ⁴ Piya, taeba ma seri namapi miyompeka, taeba: A-e, a-e, uma kube'ena puma miyune. We, paisa tau kasakana wanane. Taeba to aogaso tau'ena pu u'ma misanaga tabiye. Piya pekana aoganta e'wasaenamaba purikenaenarepa nawagaikiye. Pikaba tabugaye. ⁵ Piya, aoganta'enara yokege puratai ntagara aeba Kotiwe. Piya, aeba marupa Aota Awamusapa tamintegi, ainti a'ya'maena tamikenaenagaba taeba abibebe pune.

⁶ Piya, taeba pika abima pero puma miyune. Pipa mayama abune: Ibasa yaga Wa'egamage kuma'watiba kampa miyompekaba mamparapa tau'amaba namate kanta peginiyunema, abune. ⁷ Piya, ma kanarapa taobisa agantompentana wanane. Taeba uwa tamatiti puma mono ki'iba nasune. ⁸ Pika abima pero pune. Piya puma, taupa kaite Wa'egamage ampisanaga tabugaye. ⁹ Piya, ma ntamatepi miyompepe, kaite aege miyompepe, taeba yokege puma Wa'egawama nkabugaintana wasiyekana a'mu puratano. ¹⁰ Piya, taeba a'ya'ma kina'mitaba Karaisiti nkantota'ena aborakena aemu yabaera irosakune. Aibekana, tau'yaga pompentanaba a'yigitatama a'ya'ma ka ka kina'miteka ikapa aogiyenawo, ataenawo aboraramikiye.

Poroba wasana Kotiti atokaekena yuga puntiye

¹¹ Piya, taeba Wa'egamaka taekku pukenagaba napima, wasanamikaba imatiti piyema yogaba pune. Piya pokanaba Kotiba agorepa tagawaeye. Piya tintabaipipa pabiyama agorepa tagawaeyanema, napiyuwe. ¹² Piya, ma kamana yompepa, pipa tae taupa tiyobi to kakema kampa maete iyune. Kampaye. Tigebe abiginaba taekaba aogima ntapima, wasanami nkiyoriha ti'muntanaba aborano. Eya, i'ama nkasagayuntini igupa kampa napiye kina'mi nkiyoriha taekaba abima ti'mu piyo. ¹³ Piya, wasanami nkiyobi taeba aibosabo pompepa, aerawane, taeba Koti ntuga pune. Wasanami nkiyobi taeba aogima ntapiyompepa, pipa tiyo'maekenaenawe. ¹⁴ We, Karaisiti nkagu kao'enawampa kabirataye. Pikaba taeba aogima napimagita mayama abibebe pune: A'ya'ma kina'mite nkantotapa ka yagarama ago purintiye. Piya, aeti atokaekenaga a'ya'ma kina'mitepa mampabisenaara ago puruntunema, abune. ¹⁵ Piya, miyaba miye kina'miba taetentana wanane. Aeti atokaema miyaba miyompeka purintiye. Eya, aeti atokaesanaga a'ya'ma kina'miteka purogana asitantiye.

¹⁶ Piya, ibasa yagaba taeba wasanami ntapiyenabisa wasanapa kampa a'yigi nkitauene. Kampaye. Piya, paipa Karaisitikaba wasanami ntapiyenabisa a'yigi nkatan-tune. We, ibaba kampaye. Aeba to awametenema, abune. ¹⁷ Piya, ka'wainaba Karaisititi atokaeyamipa aeba to auga puwaeye. Paisaenawampaba nagariwigina, we, aoganta'enawampa aborawaeye.

¹⁸ Pipa a'ya'ma aoganta'enaba Kotintana manane. Piya, aeba Karaisiti ntugarasa taepa maema aeti atokaeratama ka tantabarirantiye. Piya pumagina, aeba ka tantabarikenya Yugara uratantiye. ¹⁹ Eya, Karaisiti ntugarasa Kotiba ae'wa ntuga puma

mabisa kina'mite nkaibo'enarepa aewake ka tantabariratantiye. Piya pumagina, aeba ka tantabarikena kamanapa tayapisa aboranoma uratantiye.²⁰ Pika taeba Karaisiti nkaogi agoya kamana'wa ukena kina miyokana, Kotiba kamana'wapa tawamutasa esegima urimiye. Piya, taeba Karaisiti ntugaraka mayama esuritaune: Tigeba Kotiti atokaema ka tintabarima miyiyoma, uritaune.²¹ Piya, Karaisitiba aguntaenawapa kampa waintipa, tae agunta asu'a puratakenagaba otaogana agunta yagara kanta puma purintiye. Aiboga, taeba Karaisititi atokaemagi yogawataso Koti nkarupu kina aborakena pune.

6

Aposoro kina'mi kuntaenawaipisa mono aborantawe

¹ Piya, taeba Kotige ka yuga pompe kina'mitaba, kamanapa esegi kamana urimima: Tigeba Koti nkawagaenawapa maentapa, a-nkuwa ataiyoma, urimune.² Piya, aeba maya kamanapa untiye:

Aogi kanabipa kamanakapa abimagi, wasanami nki'ikena yagaba kao'maentone, untiye, iye.

We, aogi kanarapa iba aboraye. We, tau'ikena yagaba ibanto aboraye.

³ Pigoya, wasanami tae Yugaga uma ata pusnagaba taeba ka'enaba igisabi ware'nakenaenaba kampa puma kabiyune.⁴ Piya, taeba Koti kayokaya kina mimagi aogi yugarepa tonaronabisa aborariyakima miyune. Piya, taeba tauki nakiyenarepe kuntaenarepe kamparagaenabi mpikenenaenabe pasema aesaga'ma asima esegi pune.

⁵ Eya, kasotasa taeguma, iga'na puratamagini, tabe kamana uratawe. Aerawane. Taeba araga ntuga puma, aogima kabima mimagi, nanintagaba i'mima agorepa aboraune.

⁶ We, tabe nare ntare puma mimagi, abikenaenarepa aogima aborama, kampa karu'ena tao'mipa kamana uwaitama, kayonena puma agorepa aboraune. Eya, Aota Awamusati atokaema mima, agu kao'ena au'wantaga mimagi,⁷ taga kamana'amana uma, Koti nkesegiyenaba aboramagi miyune. Piya, taeba Koti nkrapuyenaba kaso kanta puma tayatakantibe tayake'masibe pu'ma miyune.⁸ We, ka'isa kina'miba tageba asagayuyegini, to ka'isamiba maete tumewe. Ka'isamiba ata kamana uratagini, to ka'isamiba: Aogi yuga pewema, uratawe. Ka'isamiba taekaba: Kumpari kinanema, napiyepa, pipa kampaye. Taeba tagantana pune.⁹ Uwoma kina'miba tagapa, agorepa kampa aogima agawe. Taeba purikena kina kanta pompepa, uwa taogama miyune. Taeguyepa, kampa purune.¹⁰ Piya, taeba intara'ena pe kina kanta puma mima, asi nasiba ta'muba pune. Taeba kusi kina kanta puma mima, mono kutatepa eta'ma ima uwoma kina imune. Eya, taeba kota kampa wainta kina mima, a'ya'mena wainta kina kanta puma ta'mu puyaba'miyune.

¹¹ We, Korinti kinapa, agu kao'enayaga puritamagi, tantabaipisa kamanapa aborawaerimune.¹² Taeba agu kao'ena puritakenaenaba kampa akunune. Kampaye. Taeba kanara agu kao'ena puritaokiri, tigeba agu kao'enaripa akunega ka'enaba kampa puma miyune.¹³ We, araga yagarane kanta puma miyepa, tigeba antotapa tigupa ataigina taeti kananoma, urimuwe.

Taerepa Koti ntama mpintune

¹⁴ Pigoya, kampa imatiti punta kina'migeba ka kina kanta pumaba a-mpiyiyo. We, ayama antage'enambe arupuyenamabe ka'enaba pukiye, a. Kampaye. Ayama e'wasaenamabe tununtanamabe ka'enaba pukiye, a. Pipa kampaye.¹⁵ Piya, ayama Karaisitige kewamageba napiyenawaisipa ka'masa puma mikibese, a. Kampaye. We, ayama amatiti pem'i'nabe kampa pem'i'nabe isigupa ka'masa puma mikibese, a. Pipa kampaye.¹⁶ Piya, ayama Koti mpono namake ama kotigeba maema atokaekibese, a. Pipa kampaye. Abiyo. Miyaba Koti mpono namapa pipa taewe. Pika Kotiba maya untiye: Naeba igege mima, ige ikapi nasikuwe, iye.

Piya pumagi, ige Koti miyekini igeba nae tu mpikibewe, iye.

¹⁷ Piya, abe'isa kinapa igaitegiri aota miyivo, Wa'egawama naba piya yuwe, iye.

Piya, i'nintanaba a-mpaema miyigi, naene tibabeno, iye.

¹⁸ Piya, naeba tibantana pekiri, tigeba araga yagaranentana puma mikibewema, tabe Wa'egarakayankamana yuwe, piya untiye.

7

¹ Piya, nabugai ntao'mitaba, piyaenaga agebama utaratantika, taeba tagu tau'ama i'nintana pemika aeyoba'magi Kotikaba taekuru puma aota'enama nkaupa aogima aborama miyeno.

Korinti kina'mi igu a'wae puguna Poro a'mu puntiye

² We, tigeba agu kao'ena purataiyo. Piya, taeba tigetiba ka'wainapa ataena kampa potantune. Piya, ka'wainapa antage kipa kampa aboraeyakintune. Piya, ka'wainapa kumpari kamana kapa kampa omima ae'enawapa paibuntune. Kampaye. ³ We, naeba piyama tipi pima kamanapa kampa yuwe. Kampaye. Naeba: Tigecka napima agu kao'ena puritaunemaba, taga kamana ago urimuwe. Eya, taeba tigege kaena puma mita wama purenemawe. ⁴ Piya, tigeba aogima ntapima arupuyena pusanagaba tara nagiba kampa napiyuwe. Tigecka tabera na'mu pogiri esegima asinatawe. Eya, wasanamiba tauki nakiyenaba aborawae tamega, aerawane. Tigecka napima tabera na'muntanabi mpiyuwe.

⁵ We, paipa Masetoniya mariba ampa irosauwapa, pita'igeba uwaba kampa mintantune. Kampaye. Asi nasiba toma toma tauki nakiyenaba tauta aborantiye. Eya, tautapa ma'ena puratauguna, tantabaipipa taekuruyena aborantiye. ⁶ Aibogana, Kotiba aeba kuntaena maeya kina'mipa agoya puwaitai'na aeba Taitasipa otaogana taeti kanaogana tantaba agoya puratantiye. ⁷ Piya, Taitasi taeti kanantempa, pikaba Kotiba agoya puratantiye. We tigeba Taitasi nkantabla agoya potauguna, aeba pi kamana maete kanama kaga agoya puratantiye. Piya, Taitasiba kamanatipa unamimagine: Tigeba naganagaba tibugagina, tintawamaba naeka kube'ena pegiri, nae nage asagayuyewema, unamintiye. Piya, pi kamana unamintikaba tabera na'mu puritantuwe.

⁸ Naeba paipa ka isa kaema timima, tinta tiki nakiyena maema aborarimintopa, pika abima nantarapa kampa puwe. We, paipa nantawamaba kunta puntikana, ibaba kampaye. Piya, esa'nemba aro ntanganto tinta tiki nakiyenaba aborarimintegina, a'ya wayema, abuwe. ⁹ Piyamaba nantawamaba aogi piye. Pipa tinta tikintika wanane. Tigeba tintara'ena puma tigu a'wae puntika nantawamaba aogi piye. Eya, Koti nkabintanaga tinta tiki nakiyenaba puguna, kamanatempaba kampa ata yugaba puritantine. ¹⁰ Piya, wasanamaba Koti nkabintanaga anta auki nakiyena puntanaba, ago a'wae pekanota Kotiba au'ima ababekana, pikaba kampa napima ata pikiye. We, wasanamaba mampabisae-naraka anta auki nakiyena pekanaba, pi'na nkau'wapa purikenaenawe. ¹¹ We, abiyo. Tigeba Koti nkabintanaga tintara'ena puguna, pi'na nkau'wapa aogiyenaba tigupinti atama tutusuritaogiri abintane. Piyama tutusuritaogiri, tigeba asima kamanatipa uma arupu pumagiri, pi ntagarama nkaguntaenarakar pami pumagiri, Kotika tiyekuruba puntawewe. Eya, pi ataaena pem'i'napa arupu potakenaga tigebla tabera napima esegi puma kamana'wapa karu'ena uma aogi puma antota'enawapa amintawewe. A'ya'ma yuga puntapa, pipa aogi pumagiri, Koti nkaobipa kampa kamanatipa uwa waintantiye.

¹² Piya, pai isa kaema timintopa, pipa aru'ena punti'na aekawemaba kampaye. Ataena potanti'na aekawemaba kaga kampaye. Piya kamana urimuwigiri, tawamupa wasike-naenaripa Koti nkaobi aboranema, pika kaema timintone. ¹³ Piya, pintanarimpaba tantawamapa agoyaena potawewe.

Piya, tanta manapa agoya puntika wanane. Tigeba Taitasi nkanta agoya potantaka a'mu puma kanama ampa uramoga, taeba tabera ta'mupa puntune. ¹⁴ Piya, paipa naeba tige tige asagayuma Taitasipa omintone. Pi kamana'ama nkau'wantaga aborawaeyugu kampa nanipa puntuwe. Piya, paipa tigebla kamana urimintopa, pipa taga au'wa aborantaisa puma, tige asagayuma Taitasipa kamanati omintopa, pikaba au'wantaga'ena aborantiye. ¹⁵ We, Taitasiba tigeti waogiripa tigebla ababuma tiyekuru puma pami ntami puma awamu'wapa wasintawewe. Pika aeba napintana agupa tigeti uwaenara abugantiye. ¹⁶ Piya, antage'ena pusanaga tigecka taranagiba kampa napinta, pikaba na'mu puritauwe.

8

Mono kina'miba iyokinapa iyo'maekenaenawe

¹ We, nao'mitaba, Masetoniya marisa monota ai'aruyenabipa Koti nkawagaena aboranti, pika urimikena pune. ² Piya, tabe iki nakiyenaba igebla aborama imiyo puwaitagini, igebla pugararak'a ya mintantawewe. Mimagine, igebla monotaka i'muntana puma asugasima tabera pumagini, ige'wai kupisa uwaena aki puma iyokinapa iyo'maentawewe. ³ Piya, ige'wai ntapiyenaras aega'ma kana moneba imintawewe. Eya, igebla waintemintana kanara napima atamagini, pi'napa pi'napa agasima to kake atantawewe. Naeba pika ago abigaite awagabla urimuwe. ⁴ Piya, igebla taeka tabera esuratagu: Tigege kaga Kotiti atokaema ataenabi mpinta'nagipa iyo'maeyanema, tabigantawewe. ⁵ Piyama tabigauku, taeba: Ka'isa atakibewema, napintompene. We, piyama kampa puntawewe. Kampaye. Maru'enaba ige'wai nkigupa Wa'ega amigaitegini, Koti nkabomeka aega'ma igupa taepa kaga tamima napiyenarepa asugasima tabera puntawewe.

⁶ Igeba piya pumeka, taeba Taitasi otakana tigeti wanomawe. Piya, aeba pi nkasoya yuga agobintisa puma, tigeti ampa nagarigasanema, otaune. ⁷ Piya, tigeba a'ya'maenaba aogiyena mana pewe. Eya, tigeba Kotiti timatiti pumagiri, kamanatipa aogima aboramagiri, uwaena napiyenarintagakiri, Koti ntugaba esegima pumagiri, tigeba agu kao'enya aogima puratawe. We, pabiyamagiri iba ma nkiyo'maekena asoya yuga kaga asugasima pivo.

⁸ We, pika naeba kampa esegima uritauwe. Kampaye. Ka'isa kina'miba aogi yuga puma iyo'maeyaga urimuwa, abima piyaenaga napiyigina kaga agu kao'enarimpaba tagantanta peno. ⁹ We, tigeba ago Wa'egarempa Isu Karaisiti nkawagaenawapa abintawé. Aeba uwaenaena waintaga mima, atate pugara puma ampintantiye. Eya, pugara puma mintantipisa tigeba uwaena maekibewemawe.

¹⁰ Pigoya, ibaba nae napiyenanepa mayama urimuwe: Ma ntugagaba marusa kabuba tigeba agobima puntawé. Eya, marupa kina yuga pusanagaba tibugaogiri puntakiri, ibanto nagariyiomawé. ¹¹ Eya, paipa agarosama pi ntugagaba tibogiri puntakiri, piyama ibageba agarosama au'wapa aborama, tigetintana waintintanaritasa nagariyio. ¹² Piya, ka'waina amikenaenaga abugakibipa, pi ntugaramati waintintanagaba Kotiba napiyegina kanarasayé. Kampa waintintanagaba kampa napiye.

¹³ We, tigeba imimagiripa ataenabi mpiyigini igeba aogiyenara miyyemaba, kampa yuwe. Kampaye. ¹⁴ Naeba tigegeba ka'masa puma miyyiyoma, yuwe. Piya, ibaba ma kanarapa tigeba kampa waint'nagipa uwaenaenaritasaba kanara iyo'maeyiyo. Piya pigini, tigeba ka'isaenagaba aisagakibepa, igebe uwaenaenawaitasaba kanara tiyo'maeyiyemawe. Piya pukibepa, igege tigegeba ka'masa puma mikibewe. ¹⁵ Piya, mono isa'amaba untamisa puma maya piye: Ka'waina mana naninta uwaena maenti'naba kampa asugaintiye. To ka'waina taranto maenti'naba, aeba kampa kusiba puntiye, iye.

Taitasibe ao'yagararabe Korinti kumati wakena puntawé

¹⁶ Naeba Kotipa na'mu potauwe. Aeba Taitasi nkanta maema asitagina, aeba tae napiyompesa puma tiyo'maekenagaba napima abugaye. ¹⁷ Piya, aeba tae otaompe kamana aegaraye. We, tae kamana abiwanane. Aekeba pi ntuga pusanaga abeginia, ae'wa ntapiyenabisa tigetiba waye. ¹⁸ Piya, taeba ka mono yagara otakana aegeba wakiye. Kana mono yagara, aeba a'ya'ma monota ai'aruyenabipa aogi mono ukena agiga'e wainta yagarawé. ¹⁹ Pi abiwanane. Monota ai'aru pe kina'miba aepa otagana, taege nasima pi Yerusalem kina iyo'maekena agoya yugare tao'maeye. Piya, taeba Wa'egawama nkage asagayuma aogima tiyo'enaba puritama aborarimue. ²⁰ Piya, tabera aki pompe ntubapa kabikena pompekaba ata kamana usanaga, taeba pi tao'yagara otakana Taitasige wakiye. ²¹ Piya, taeba aogiyena manapa pusanaga tabugaye. Eya, Wa'egawama nkaobinkamana wane. Wasanami nkiyobipeba kaga aogiyena pusanaga tabugaye.

²² Piya, taeba to ka mono yagara otakana, isigegeba wakiye. Taeba uwaena yaga toma toma ntugaba amompepa, aeba esegima yogaba pegi agawaeyune. Piya, ibaba tigeba aogiyenamana pewema, napima pi ntugaba to kakema esegima piye. ²³ Pigoya, Taitasipa mayama agaiyo: Aeba nao'yagaragana, naege kabo puma ka yuga puma tiyo'maekena piye. Piya, tara mono yagararamisipa tigeba mayama abiyo: Isigeba monota ai'aru pe kina'mi ntuga puma Karaisiti nke'wasaenaba maema aboramene. ²⁴ Pika tigeba a'ya'ma monota ai'aru pe kina'mi nkiyobi ma kakaga kina'miti agu kao'enaripa aborawaimima, tigeka kamana uwaimompe nkau'wapa aboraiyo.

9

Mono kinapa iyo'maekenaenawe

¹ Tigeba Kotiti atokaeya kina'miti muta atama iyo'maekenaenaba agantaka, naeba pikaba e'ero kamanapa kampa kaekuwe. ² Eya, tintawamaba pi ntuga pikengagaba aogi puntiyemaba, agantuwe. Piya, naeba Masetoniya kina'mi nkiyobipa tigeripa asagayuma, tigekaba maya uwaimuwé: Abetasa kaburapa Akaiya kina'miba pi ntuga pikengaba ago yokege puntawema, uwaimuwé. Piya, esegi punta ntugarimpa nkawaga kamana'amaba tutusuwaitaye. ³ Pigoya, ma kamanapa uwa kamana pusuma tigega'e asagayusu pusanagaba kampa nabije. Kampaye. Piya, nae uwaimosa puma tigeba yokege puma miyyemaba, nao'mipa uwaitaogini tigetiba wawé. ⁴ Piya, a'yugu tigeba kampa yokege puntigini, ka'isa Masetoniya kina'miba naege wamagini uma tigaigiri, taeba tani pusanaga yokege piyo. We, tigengeba kaga tini pusanaga yokege piyo. Piya, tigegenanagaba esegi kamana uwaimune. ⁵ Piya pumagi, naeba nao'mipa uwaitakini paitama wama tigetiba wakibewema, kanara napiyuwe. Piya, tigeti wamagini, tig-

atakena muta marupa yokege puma miyigi kanano. Piya, tipi pigaurisanaga kana yabapa ti'muntanabisa ibaba aki piyo.

⁶ Piya, yo kamana'ama nkagoba mayamawe: Ka'wainaba taranto aintana pemi'naba pi ntugabisaba taranto maekiye. To ka'wainaba uwaena aintana pemi'naba, aeba pi ntugabisa uwaenaba maekiye. ⁷ Piya, tigeba ka ka tintabintiba aogima napigaitegiri, pi ntapiyena aega'ma uwaenaba imiyo. A'yugu ka'wainaba antabinti aukinta'yaga imisanagawo, wasanami tutusunatawe usanagaba ti'muntanabisa imiyo. Eya, Kotiba aeba wasanama a'muntanabisa amisanagaba abugaye. ⁸ We, Kotiba a'ya'ma a'muntanaba asugasima timikena piye. Piya pekini, tigeba kanara maewaemagiri, a'ya'ma toma toma aogi yuga pikenaga ti'muntana pumaewaintapisa aborama kampa aisagawe. ⁹ Pika mono isa'amaba maya iye:

Kotiti atokaeyami ntagaramaba ae'enawataso aibarase puma pugara kinapa imiye, iye. Piya, arupuyenawampaba pipa waiyaba mikiye, iye.

¹⁰ Piya, Koti aeba aintana pukena kinapa a imimagine, nanintaba aborama wasanapa imiye. Piya, aeba pabiyyama aintanaripa tabera aborarimima, arupuyenarimpa nkau'wapa uwaenaba aborakiye. ¹¹ Piya, tigeba uwaena aborama imikibepa, tigetiba uwaenaenaba to kakema aborakiye. We, ti'muntanaripa maete wama imekiniba, tigeka igebe Kotiti tabera i'mu potakibewe. ¹² Piya, tigeba piya yugarasa Kotiti atokaeya kinapa iyo'maekena pepa, aguyosa'ma kampa waintintanaba maema aborawaeyawe. Piyaena mana nane. Pi pentanaraka Kotiti tabera a'muntanaba kaga aborawaeyawe. ¹³ Pi nkiyo'maekena yuga pepa, tige pentanama nkau'wapa aborakibewe. Eya, tigeba Karaisiti mpono kamanapa abima wasimagiri Koti nkagega'eba asagayukibewe. Eya, igebe to a'ya'ma kina'mibe tigamagini: Tabera i'muntanaba tamewe, umagini Koti nkage asagayukibewe. ¹⁴ Piya, igebe Koti nkawagaenamaba tigeti asugasima waintakini tigakibewe. Tigamagini, pika igebe tigege kaga mikenaga umagini Kotiti nunamu uritakibewe. ¹⁵ We, Koti a'muntanawapa tamipa, pikaba ta'mu potano. Pika kamanatepa kampa uma nagarikune.

10

Ata kamana otaume kamanapa Poroba maema metantiye

¹ Nae Porona, naeba Karaisiti nkagoyaenawape anta paruyenabe napima ka'isaenagaba urimuwe. We, ka'isa kina'miba naeka maya yewe: Aeba tae taora mintanaba agewapa maete tumimagina, pagasara mintanaba aeba esegi kamanapa urataye, yewe. ² We, naeba urimekiri abiyo: Aintiba tigetiba kanakubopa ka'isa kina, taekaba mampabisaena aegarawema ye kina'mikaba, esegi kamanapa uwaitakuwema, napiyuwe. Piya, naeba tigeke kaga esegi kamanapisa urimisanagaba kampa nabiya, pika aogima kabiyiyo. ³ Tagane. Taeba mampabi nasintapa, we, mampabisa esegiyenarasaba kampa ma'enarepa pune. ⁴ Piya, ma'ena pikenaena urintompepa, pipa mabisaenaba kampaye. Pipa Koti nkesegiyenawewe. Pi'naba kama kinatempi kagisa akasabakaikena esegiyenawewe. ⁵ Eya, taeba Koti nkesegiyenabisa wasanami ntapiyenawaipa akayumagi, a'ya'ma Koti agakena ki akunikena agebigo'enaba maema metamagi, a'ya'ma kina'mi ntapiyenabisa iga'na potama Karaisiti nkawamu wasiyiomawe. ⁶ Eya, taeba ago yokege pumagita kamana akayuye'nagipa kamparaga antotapa imukune. We, marupa tigeba arupu puma Karaisiti nkawamu wasiyiyo.

⁷ Pigoya, tiyobi waintintanaba agamagiri arirasaena manaka napiyewe. We, tigetisa ka'waina ae'wakaba: Karaisiti nkao'yagara mintuwema, napiyemi'naba, aeba taekaba mayama napiyeno: Naeba Karaisiti nkao'yagara miyosa puma igebe kaga aokina mintuwema, taekaba napiyeno. ⁸ Piya, Wa'egamaba yoga pikena esegiyenabisa tamintipa ata puritakena wanane. Pi nkesegiyenapana nama kiyesa puma esegima asiritakenaga tamintiye. We, naeba pi ntugaraka tae tage maete ikubopa, naeba kampa nanipa pukuwe. Kampaye. ⁹ Piya, esa kaema timopa abigina naekaba tiyekuru punatasanagaba kampa nabiye. ¹⁰ Piya, ka'isa kina'miba maya unatawe: Esa'wapiipa esegi kunta kamana'ama kaema tamintana, aeba taorapa ampiyemipa kampa esegima pegina kamana'wampaba uwaena kanta piye, yewe. ¹¹ We, piya ye kina'mitaba mayama abiyo: Taeba pagasara mintata kamana kaeyompe, pi kamana'ama nkauwapa tikapi mpinta aborakunema, napiyivo.

¹² We, taeba taekuru puma, ka'isa i'wai mpaete iye kina'migeba taeba ka'masa puma miyunemaba, kampa yune. Piya, igebe iyokinapa agama mare-u me-u puma i'waiwa maete ima, aibo'enaba pewe. ¹³ Piya, Kotiba yoga uratantinkamana pikaba ta'mu pumagi, kamanapa ukune. Tonaraka kampa ukune. We, uratanti ntugaba tigeti kaga aboraiyoma uratantiye. ¹⁴ Piya, taeba maru'enaba e'ero mpari wama tigeti irosa'ma Karaisiti

nkaogi mono kamanapa urimintompene. We, taeba kampa tigeti wama irosaompesinta, kamanatipa taeti a-nkaboraiyo, uma nagaresine.¹⁵ Piya, taeba to kina'mi ntugaraka wanane. Taeba Koti yoga uratantinkamana pikaba ta'mu puma taupa maete iyune. Piya, timatiti'enamaba anosakana tikapi yoga agorempa nkau'wapa aborama tabe pusanaga tabiye.¹⁶ Piya, tikapi tabena aboraka, taeba wasana tika'i minta'nagiti uma aogi mono kamanapa urite wama aborasanaga tabugaye. Piya, a'yugu taeba ka auka'i wama to waina ntugaraka tae tau'ikune. Pipa kampaye.

¹⁷ We, mono isa'amaba maya iye: Ka'waina aeba a'mu kamana ikena untanaba, Wa'egawamaka uma a'mu kamanapa yeno, iye.¹⁸ Piya, ka'waina aeba ae'wa nkau'ima asagayukibemipa, Koti nkaobipa kampa kanarasakiye. We, Wa'egawama to ka'waina nkau asagayukib'i'napa aagega'eraka waikiye.

11

Kampari aposoromi nkagowaipa Poro uma aborantiye

¹ Tigeba abintigi, anagi kamana'anto urimeno. We, anagi kamana'antonepa aogima abiyo. ² Naeba tigeba to ki'i wasanaga Koti nkaobi tiba puritama, to kipa akunikena puwe. Piya, nare ntare puma miyi nkaragawaepa awaeta menkatamisa puma naeba tigepa Karaisitika agebantaka, aeti atokaeritakena puwe.³ Piya, kuyawamaba ago'ena puma Ibi amiyo puntisa puma, ka'isa kina'mi napiyenaripa paibusanaga kabiritaue. Eya, Karaisititi atokaema taga nare ntare kitasa paiburitasanaga tara tara nagi napima kabiritaue.⁴ We, tigeti ka'waina irosa'ma Isukaba tae urimintompea pumaba kampaye. Toma urimikibipa karu'ena aegarakibewema, napiyuwe. Piya, Aota Awamusma maentasa pumaba kampaye. To aborarimikibi nkawamusapa karu'enaba maekibewema, napiyuwe. Piya, aogi mono kamana taetisa aborarimintompea pumaba kampaye. To ka mono'ena aborarimikibipa, pipa tigeba kampa akayunta karu'ena uma abigina aogi pukiyema, napiyuwe.

⁵ Abiyo. Naeba abopa, i maete iye nkaposoro kanta kinatimpi nkimentantiba kampa miyuwe. Pipa kampaye.⁶ Tagane. Kamana ukenaba kampa aogima iyema napiyepa, pipa aerawane. Mono abikenaenagaba kampa aguyosagauwe. Piya, a'ya'ma yugaretasa taeba a'ya'ma abikenaenarepa ago aborariyakokiri abewe.

⁷ Tigeba abintawe. Koti impono kamanapa naeba tigepa urimintuwé. Pi ntugarisaba ikantepa kampa maentuwé. Kampaye. We, pintana popa tige tigeripa maete isanaga nae'ne ntageba maete tumintopa, pipa Koti nkaobipa aguntaena puntuwa, a.⁸ Piya, tigeti mono yuga pikenaga tigetisa wanane. To ka'isa ai'aru pe kina getisa tao'maekena yabapa esuma iparintone.⁹ Piya, paipa tigege minta, kotakaba aisaganto ntaga kampa kuntaenaba urimima esuritantuwe. Kampaye. Mono kina'miba Masetoniya maba atate tige mari kananta, igeba maete mentamintawé. Pi ntaga kuntaenaba ka'enaba kampa puritantuwe. Aintigeba kaga pabiyama kampa kunta puritakuwe. Kampaye.¹⁰ We, Karaisiti taga kamana'amaba naeti waintegi, naeba taga yuwe. Piya, a'ya'ma Akaiya auka'iba nae pontanagaba nage asagayukenaba kampa akunikibewe. Kampaye.¹¹ Nana piyema naeba piyaenaba puwe, a. Naeba tigepa agu kao'ena kampa aborarimuwa, a. We, naeba agu kao'ena puritauwemaba Kotiba aogima agantiye.

¹² Pi a'ya'maena popa pipa pabiya puta wakuwe. Pipa uwaba kampaye. Ka'isa kina'mi igeba: Poroje ka'masa puma tabe yuga punema, untini i'waipa maete iyeka akayusanaga pabiya pukuwe.¹³ Piya, pi kana kinapa kampari aposoro kina mima monotaka tiyobi airarikaeyawe. We, igeba Karaisiti nkaposoro tae kanta puma miyewe.¹⁴ Pipa aoso'enaba kampa puwaeyawe. Kampaye. Piya, Satani aewa tamio'ena puma e'wasaenayaga enisore kina kanta puma miye.¹⁵ We, ae'wa kayakoya kina'wapa igeba Koti nkarupu kayakoya kina kanta puma miyekaba a-pami piyo. Aintiba yogawaiimpia pisa puma antota'ena maekibewe.

Poroba aposoro yugawatasasa tabe kuntuyenaba maentiye

¹⁶ Pigoya, naeba yo kamanapa to kake ikena puwe. Piya, a'yugu ka'wainaba: Anagi yagaragawe, unatakiye. We, anagi yagaragawe unatagiripa, uwa nababiyo. Kanarane. Ibabu tiyobipa naupa uwaenanto asagayukuwe.¹⁷ Piya, naeba ma kamana ukubopa, Wa'egawama nkawamu wasimaba kampa ukuwé. Naeba anagi'ena pusu puma uwaba naupa asagayukuwe.¹⁸ Eya, uwaena kina'miba arirasaenaga i'mu kamanapa uma i'waipa maete iyeka, naeba pabiyama naupa maete ikuwe.¹⁹ Piya, anagi kina'miba kamana urimegiri abima kanara pewe. We, tigeba aogi napiyenayaga kina mintawé, a.²⁰ Piya, ka'wainaba tiraku'ma kayakoya'enawata iga'na puritagiripa, kanara pewe. Eya, ka'wainaba timiyo puritamawo, titasaenaripa tipa'u'mawo, aagebigo'ena puritamawo, tiyobi aya kasutasa tiyeguyiripa tigeba uwa atama kanara pewe.²¹ We, taeba kampa

pabiyama ataba puritaune. Kampaye. Pikaba ayama napiyewe. Taekaba: Amu kina kanta puma miywewema, napiyewa, a. We, pika nanipa puwe.

Pigoya, ka'waina aeba miyemintanawano, pemintanawano ukibipa, naegeba pikaba kaga uma naupa maete ikuwe. We, naeba aibo kina'mi usu kamana yuwe.²² Piya, ige'waika: Yuta ago kina mintune yepa, pabiyama naegebewe. Ige'waika: Isureyo ago kina mintune yepa, pabiyama naegebewe. Ige'waika: Isureyo ago kina mintune yepa, pabiyama naegebewe. Igeba: Abara'amu nkaga'nurawe yepa, pabiyama naegebewe.²³ Igeba: Karaisiti ntuga kinatawe yepa, naeba asu igasima pi ntugaba tabera puwe. We, naeba aibo kina'mi usu kamana uma nau maete iyuwe. Piya, naeba araga ntuga puma asu igasimagi, iga'na namapi uwoma ntaga mintuwagini, kampa aisema kanara kasotasa naeguyugu, uwaena yaga pu'wakena puntuve.²⁴ Piya, nayaka'muta Yuta kina'miba iga'na kasutasa tabera naeguyuguna 39 puntiye.²⁵ Kakagara eru kasutasa naeguntane. Kapa pipa yaba kasutasa maebuma tabera naeguntane. Piya, kakagara wanipisa kareba aegasagasubaoga wanipi naisuwakena puntone. Piya poga, ka asege ka pake kayo wani nka'eti mintantone.²⁶ Piya, uwoma ntaga pagasa ki'i nasuwapa, anompankamaba ata punatakena pogini, ke kina'mibe nae tupisa kina'mibe to marisa kina'mibe kaga ata punatakena puntawe. Eya, tabe kumapintiwo, kabubintiwo, kayo wani nka'etivo miyuwagana ata punatakenaba aborantiye. We, kampari mono kina'miba kaga ata punatakena puntawe.²⁷ Naeba araga ntugaba esegima punta, uwaena yaga asenabintisa yuga punta nauba kampa waintone. Naeba naninta wanika naga'ena naboga, uwaena yaga i'miyuwagana, esiba naboga, kainekaba aguyosakantone.

²⁸ We, pi'na name. A'ya'ma yagaba naeba a'ya'ma monota ai'aru pe kina iyo'maekenaga napiyogana kuntaba nabiye.²⁹ Piya, ka'wainaba monota kampa esegiyena waintipa, naegeba kaga nantara potauwe. We, ka'wainaba aguntaenabi paibemi'nakaba naeba namo potauwe.

³⁰ Pigoya, nananetasa naupa maete ikuwe, a. We, Wa'egawama nkesegiyena aborasanaga magimagiyananepa maete ima aborakuwe.³¹ Eya, Koti, aeba Wa'ega Isu nkaba, agoyaenabi mpiyaba miyi'na, aeba kamana'nepa taga yopa pipa abiye.³² Pigoya, Tamasiko kumata mintuwapa, wa'ega yagara Aretasi otanti kiya yagara'wapa uwait-aogini narakurikenaga Tamasiko kuma kabera kabintawe.³³ Piya puguni, ka'isa nao'mi igeba wa'nu kupi ira'natamagini, kagisa abakupintisa mo nagasugu, ae ayapisa naegaka wagaintone.

12

Amonta ki'i Kotiba uwaena kamana Poropa ayakintiye

¹ Pigoya, tae tage asagayukena kamana yokanaba, kampa aogi purataye. Aerawane. Naeba tiyobi nae nage to kake asagayukuwe. Eya, naeba amato puma to ka'isa kamana, Kotiba amonta kamanake kakama kamanake aborantika ukuwe.² Naeba Karaisititi atokaenta yagarama nkagoba kapa agantuwe. Pi ntagaraba naewe. Piya, paipa miyuwagana Kotiba inatisa mantara nababute ima nayakogana, 14-wa kabu a'ya wantiye. Pigoya, naeba nau'yagape, naupa kampa waintape ima agantopa, pipa naeba kampa abintuwe. Koti mana abintine.³ Piya, Kotiba Paratisibinti, ae'wa ntauka yugabinti nababute ima nayakoga agantuwe. We, naeba nau'yagape, naupa kampa waintape ima agantopa, pipa naeba kampa abintuwe. Koti mana abintine.⁴ Piya, aeba nayakoga, mabiswa kina'mi kamanatepisa kampa ukenaenaba abuntuwe. We, pika mabiswa kina'miba aborakenaga akumpa'ma mintiye.⁵ Piya, aboranamintintanagaba nageba asagayukuwe. We, uwa nau'nekaba kampa maete ikuwe. Kampaye. Wa'egawamaba esegiyenawapa magimagi nau'nepisa aborantika, asagayukuwe.⁶ Pigoya, nae nage maete iyosinta, naeba anagi yagara kantaba kampa posine. Kampaye. Naeba taga kamana yosine. We, a'yugu wasanamaba pi kamana abima nae nage uwa maete inati isanaga, nae nage asagayukena kamanapa kampa uwaba ukuwe. Kampaye. Piya, nae mikenaenepa yoga kamana ukenaenanepe abima, pi nkawameta nae nage asagayuyekana kanarasano.

Poro nkaipi akena waintasu puntiye

⁷ We, Wa'egawamaba uwaena kasa'enaba abora nayakintiye. Pika nae'ne nagebigo'ena pusanaga nae naipi akena atanategina waintasus piye. Pipa Satani kayokaya yagara kanta puma naeguma asi nasi nageba maete tumemika, kampa nagebigo'ena pukuwe.⁸ We: Pipa nagasanema, Wa'egawamaka kega'e yuwagana kakaga puntiye.⁹ Piya yuwagana aeba kamana'wapa mayama a'wae punamintiye: Awagaenanempaba kanarasagataye. Piya, esegiyenempsa nkau'wampaba wasanami mpagimagiyenabisa aboraye, untiye. Piya, Karaisiti nkesegiyenamaba naeti waisanaga magimagiyanekaba napima tabera

na'mu pukuwe.¹⁰ Piya, Karaisititaka esegiyenane kampa waintipe, wasanami akaya-sunatape, toma toma kuntuyenama aboranamemipe, karana punatape, ataenaba naeti aboramipe, pikaba nantawamaba aogi piye. We, esegiyenane kampa waintegipa, pi nttagaba karu'ena esegiyenaba maeyuwe.

Poroba Korinti kina'mi nkimatiti'ena esegi puwaitantkiye

¹¹ Pigoya, naeba anagi yagara kanta puma mima ma kamana yuwe. We, tigeba uma aogi punatasinta naeba esegimaba piyaba kampa urimosine. Piya, i maete iye nkaposoro kanta kinatimpi nkimentantiba kampa miyuwe. Pipa kampaye. Naeba Koti nkaobi mana uwauna kanta puma mintuwe.¹² Piya, tige tikapi mintantopa, naeba paebuma mima taga aposoro yugama nkau'wapa aborarimintuwe. Eya, toma toma awame'enabe kasa'enabe, tabe esegiyenabe aborarimintuwe.¹³ Pigoya, to monota ai'aruyenabi aborantontanaba ka'antoba tigeti kampa aborarimintuwe. Pipa mayamawe: Naeba kotatipa kampa paibuma, pi kuntuyenaba kampa aborarimintone. We, pi aibo'enanekaba nantara puwa, maenagasiyo.

¹⁴ Piya, naeba tarara ago tigantuwe. Pigoya, ibaba to kake wama tigakenaga yokege puwe. Wamagi, kuntaenaba kampa aborarimukuwe. Kampaye. Kotati paibukena wanane. Uwa tige tigekenagawe. Piya, yagaramiba igeba maema aki puma ino ibagi iyo'maekena yugaba kampa pegini, ino ibagi igeba aki puma yagarawaipa imima kabiyewe. We, naeba tige tiba mintuwe.¹⁵ Piya, tige timankama tiyo'maekena naeba a'ya'maenanepe kasiwaekubopa, kanarane. Eya, naeba agu kao'ena tabera puritaogiri, ayabaya pegiri agu kao'ena antota'ena tarantoba punatawe.

¹⁶ We, ka'isa kina'mitaba naekaba maya yewe: Tagane. Aeba ka'enarepa kampa paibuntine. We, aeba karo'ne kara'ne suma ago'ena puratama tabaibiyema, yewa, a.¹⁷ Pigoya, naeba ka'isa kinapa ago uwaitauwagini tigetiba wantane. Piya, ige yugarisa ka'isaenaripa paibuntuwa, a. Pipa kampaye.¹⁸ Piya, naeba Taitasipa otauwagana tigeti wantine. Eya, to ka mono yagara otauwagana aege wantine. Pigoya, Taitasiba ka'enaripa kampa paibuntine. Kampaye. Aebe naebe ka taumarasa mono yuga pumagira, tikapipa aogima nasintomene. Pipa ago abintane.

¹⁹ Pigoya, a'ya'ma kamana kaema timompepa, pika tigeba: tae taobi kamana'wai uma aogi pikena pewema, napiyewe, a. Piyaba kampaye. We, nabugai ntao'mitaba, taeba Karaisitti atokaemagi, Koti nkaobipa kamanatepa uma tige timatiti'enaripa asiritanema, uma kaeyune.²⁰ Piya, naeba tigeti kanakiripa mikenaenarimpa kampa arupu pusanga, naekuruba puwe. Eya, naeba tigeti aborama a'yugu puritasanaga aogima kabiyiyo. We, tigeti kanama maka kamanana, tigobi pikenaenawa, kabirakenaenawa, agintanawa, akaya kamanana, wasana ika'i kamana uwaitakenaenawa, tigebigo'enaenawa, atataraenawa, suma tikapi agasanaga naekuruba puwe.²¹ A'yugu tigeti to kake wakana Kotinempa tige tiyobi nae nage maete tumisanaga, naekuruba puwe. Piya, tikapisaba uwaena kina'miba aguntaenawaiipa kampa ikabitama mintigipa, pai punta nki'nintanawaipe kumiyenawaipe kupiyonawaipe kampa ikabitama kampa asu'a puntaka, naekuruba puwe.

13

Imatiti'enara kabikena kamanane

¹ Pigoya, ibaba naeba tigeti iyekana kakagasa pukiye. Wama uma irosakini, ka'waina kamana'wapa otamaginiba mono isa'ama kamana aega'ma, tarawo kakagawo ka tiwamu yiginaba arupu peno.² Piya, paipa tigeti wantopa, wasana agunta punta kinape to ka'isa kinape obina kamanapa urimintone. Piya, tarasa puma wanto nttagaba obina kamana urimintosa puma, naeba to kakema pagasara yuwe. Piya, wama tigeti uma agakanaba, ka aguntaena pukibi nttagara uwaba kampa atakuwe.³ We, Karaisiti nae nawamupisa aboramipa kampa napiyewe, a. We, Karaisiti aeba tigeti yogawapa yubu yabuba kampa piye. Aeba tige tikapipa esegi yuga pusu pipa, agaiyo.⁴ Piya, aeba yubu yabu pusu pogini maripo yarapa aeguyuguna, to asintikana Koti nkesegiyenara mintiye. Taeba pabiyama yubu yabu puma miyune. Eya, aeti atokaema mima, aega kaga Koti nkesegiyenara mima, tigetiba yogaba pune.

⁵ Tigeba timatiti'enayaga miyebera aya pewe. Pi'na tigupa aegasama agantana agowapa aboraiyo. Piya, Isu Karaisitiba tigupipa mintipa, pi'na nkau'wapa kampa abewa, a. We, timatiti'ena kampa waintisinta aeba tigupipa kampa mintisine.⁶ Pigoya, tigeba taepa tagama taeka: Igeba mono ki'isa kampa paga pawe, usanaga nabugaye.⁷ Pigoya, Kotiba kabiritakiri ataenaba kampa aboranema, nunamuba otamagita miyune. Taepa tagaigita, mono'ama nkau'wantaga'ena aborawe, usanagaba kampa yune. Kampaye. We, wasanami nkiyobi taeba paga pasu pompepa, aerawane. Tigeba arupuyenama

nkau'wantaga'ena penoma, ka'antoga nunamu yune. ⁸ Eya, taeba tagantana akayukena wanane. Taeba tagantana mana pukena pune. ⁹ Piya, taeba yubu yabuba puma miyokiri, tigeba esegiyenayaga miyepa pikaba tantawamaba aogi piye. Piya, tigupa esegima anosanema, Wa'egamapa nunamu otaune. ¹⁰ Piya, naeba tigeti wama tiki nakiyena puritasanaga maru'ena pagasarasa obina kamana kaema timuwe. Piya, Wa'egawamaba esegiyena naminti pipa akasabakasasa puma tiyeba'marakena wanane. Uwa kiyesa puma imatiti'ena esegima anosanema, namintine.

Nagarikena kamanane

¹¹ We nao'mitaba, kamana'nepa uma mayama nagari yuwe: Tigeba aogi tintabarima miyiyio. Piya, obina kamana'nepa abintiri, tigupa maema aewarama miyiyio. Tigeba ka tintabarima paruyenabi mpiyiyo. Piya pukubepa, Koti aeba agu kao'enamape paruyenamape agowamaba tigege miwaema miyeno.

¹² A'ya'ma mono kinapa tiyapa imima aogima tiyo'ena piyo. ¹³ A'ya'ma matasa Kotiti atokaeya kina'miba: Aya pewe, yewe.

¹⁴ Pigoya, Wa'ega Isu Karaisiti nkawagaenawampage, Koti nkagu kao'enawampage, Aota Awamus'a'ama ka tintabariritama atokaeritakenaenabe, a'ya'ma tigeti waima waiyeno.

Poro piya isa kaentiye.

KARESIYA KINA'MI NKISA PORO KAENTIYE

¹ Naeba Poro, aposororonawe. Piya, aposoro Yugara wasanamiba kampa unatauguna, to ka yagaramaba kampa yuga aboranamintine. Kampaye. Isu Karaisiti aebe, purintapisa asitanti ntagara Koti tababe, isigeba unatantamene. ² Naebe a'ya'ma naege miye mono kina'miba ma nkisapa kaeyokana, Karesiya mari monota ai'aru pe kina'miti tigeti waye.

³ Taba Kotige, Wa'egare Isu Karaisitige, isigetisa awagaenababe paruyenabe tigeti waima waiyeno. ⁴ Piya, Karaisiti aebe tabarempa Koti nkabemintana aega'ma aguntaenaretaka aumawapa kasima, kamparagaena mampabi ibanto waintantanabiso akariyobatayate.

⁵ Piya pika, taeba Koti nkagega'e uma asagayuyaba miyeno. Tagane.

Aogi kamanapa ka'anto waintiye

⁶ We, tigeka naeba pami puwe. Karaisiti nkawagaenawatako Kotiba tigega'e uma tiba pegiri, tigeba karu'ena agaite aogi kamanapa toma aegaraga, naeba abite tabe pami puwe.

⁷ Piya, to ka aogi kamanapa kampa waintiye. Kampaye. Ka'isa kina'miba napiyenaripa paibukena puma Karaisitintana aogi kamanapa maema a'wae ubewe. ⁸ Piya, taeba uma taga kamana aborarimintompene. Pigoya, taewo, mantarasa enisorewamawo, akayuma kasa mono kamana urimikibipa, piya ukibi'naba a'abibinti aesawano. ⁹ Eya, paipa taeba kamanapa ago urimintompeka ibaba to kake yuwe: Ka'waina aeba kasa mono kamana urimima, pai tige maenta kamana akayikibi'naba, a'abibinti aesawano.

¹⁰ Ma kamana'nekaba ayama napiyewe. Ibasa kamanapa naeba wasanami nkiyobipera Koti nkaobi yuwe, a. Wasanami asoyaena punatataka yuwa, a. We, wasana asoyaena puwaitaosinta, pipa Karaisiti kayokaya yagaraba kampa miyosine.

Poro aposoro aborantemi kamanane

¹¹ We, nao'mitaba, naeba urimekiri aogima abiyo: Naeba aogi kamana pai aborarimintopa, pipa wasanami wanane. ¹² Pipa ka yagaramaba kampa aboranamintine. Ka yagaramaba kampa nayakintine. Pipa Kampaye. Isu Karaisiti aewa aboranamintine.

¹³ Pigoya, naeba pai Yuta kina'mintana aegarantopa, tigeba ago abintawe. Piya, pi ntagaba naeba Koti mponota ai'aru pume kina agasiya kama puwaitamagi, pi mpono maegaikenaraka puntone. ¹⁴ Piya, naeba nayabarma kamanapa esegima aega'ma agasiyaena puntuwe. Eya, Yuta kina'mintana aega'ma Yuta kina'mi nkibakapi naeba ka kananepa igasimagi agasiyaena puntuwe. Pipa ago abintawe.

¹⁵ Pigoya, paipa nanonempaba kampa yakari punatantogana, pi nttagaba Kotiba aewa ntapima awagaenawataso kega'e uma: Aota miyoma, unatantine. ¹⁶ Eya, aeba: To marisa kina'miti uma yagaranempantana aborawaimomagina, abemintana aega'ma yagarawampa nkagoba aboranamintiye. Aboranamintika, naeba wasanamiti ige kamana kampa wama abimagi, ¹⁷ Yerusaremi kumatiba kampa ima aposoro paitantananta kina'mi kamanapa kampa abimagi, naeba Arebiya mari wama umimagi, ainti a'wae puma Tamasko kumata irosantuwe. ¹⁸ Aibumagi, aintiba kakaga kabu wagasaga naeba Yerusaremi kumati ima, Pita asu agama nagisa ka'amu yaga aege mintantone. ¹⁹ Piya, pi ntaga naeba a'ya'ma aposoro kina'mi wanane. Yemisi, Wa'egawama nka'nantoba, abiwapa agantone. ²⁰ We, ma kaeyo kamanapa Koti nkaobipa kumpari kamanapa kampa kaema urimuwe.

²¹ Pigoya, aintiba naeba Siriya mariibe Sirisiya mariibe wantone. ²² Piya, pi nttagaba Yutiya marisa Karaisiti mponota ai'aru pume kina'miba igeba naowarapa kampa nangantini, ²³ igeba mayama nawaga kamana'amana abintane: Pai kama puratamagina tamatiti'ena aegukena punti'naba, ibaba pi kamanapa aborayema, abintane. ²⁴ Piyama nawaga kamana abimagini, pika igeba Koti nkageba asagayuntawe.

2

Aposoro kina'mi Poroge ka'ena puntawe

¹ Pigoya, nagisarisa tarawa tarawaki tumpaema kabu a'ya poga, naeba to a'wae puma Yerusaremi kumati intuwe. Piya, Panabasiba nababoga, Taitasi ababute kaga intune.

² Piya, Kotiba kamana uma aboranamegi abite imagi, to marisa kina uwaimo mpono kamanapa naeba uma aborawaitantuwé. Eya, ige wainta kiye kina'amana uwaimima, pai punto ntugabe iba po ntuganepe a'yugu pusanaga uma aborawaimintuwe. ³ Pigoya, Taitasiba naege inti, aeba Kariki yagarawe. We: Pika au kasama Yuta kina'mi nkara'ena potaomaba, kampa unatantine. Kampaye. ⁴ Piya, ka'isa kumpari kina, mono kina kanta puma miye kina, igeba kakama kanama ampa pai'magini: Au kasao, untawe.

Igeba ampa pai'ma Karaisiti Isu agoyaena tamomentana kunki agama, paisa ago kamana'ama amentapinti tatama iga'na puratakena puntawe.⁵ Piya pugu, taeba ka yaganto kamana'waipa kampa aega'ma abuntune. Kampaye. Piya, mono kamana'ama nkago kamparaga pusanaga tigeti waiyenema, taeba ige kamanapa kampa aega'ma abintune.

⁶ Pigoya, mono kiye igi wainta kina'miba, igeba kamana kasa'enagaba kampa amato puma unamintane. We, ige waintika kampa naekuruba puntuwe. Piya, wasana intaperu tumintapera Koti nkaibo ka kanara mintawe.⁷ Eya, igeba kasa'enagaba kampa unamintane. Piya, Kotiba Pita: Yuta kina'miti wama mono uwaimoma, otantisa puma: Namu'isa kina'miti wama monopa aborawaimoma, unataogini agantawe.⁸ Piya, Pita Yuta kina'mi nkibakapi aposoro Yugara otanti ntagaramaba pabiyama naeka Namu'isa kina'miti wama aposoro Yugara unatantine.⁹ Pigoya, tabe igi wainta kina Yemisiwa, Pitawa, Yoniwa suma, igeba Koti awagaena namima yogara unatantintanaba agamagini, igeba Panabasike naeke iya tasimima ka tantabarima, tasigepta: To marisa kina'miti wama yoga pisoma, urasitama, igewaika: Taeba Yuta kina'miti yoga pukune, untawe.¹⁰ Pigoya, igeba mayama to ka kamana untawe: Tigeba kusi kina'mikaba aogima ntapima iyo'maeyiyoma, urataugu, naeba pintanagaba nabugaoga, esegima yogaba puntuwe.

Pita nkaibo'ena Poro aborantiye

¹¹ Pigoya, aintiba Pita kanama Antiyoki kumati aborama ata poga, naeba ae aobi kamana'wa akayuntuwe.¹² Piya, paipa Yemisi nkaokina'miba kampa aborauguna, aeba to marisa kina'miti atokaema naninta naogini, aborauguna aeba Yuta kina'mikaba aekuru pumagina, igepta itate abira mintantiye.¹³ Piya pogini, to ka'isa Yuta kina'miba aeti atokaema kaga kumpariyena puguna, Panabasiba aewape kumpari napiyenawaipa maema kaga puntiye.¹⁴ Piya pugu, naeba agauwapa, igeba taga mpono kamanakaba kampa arupu puma nasugu, igepti, ige iyobi Pitapa mayama omintuwé: We, kaeba Yuta yagaramaga to kina'mintana iyega'ma mima Yuta kina kantaba kampa pempeka, ayamabayaya kaeba to marisa kinapa: Yuta kina'mi pesantanaba piyoma, esegima uwaimene, a, uma abigantuwé.

Yuta kinape to marisa kinape imatiti piginaba i'ikiye

¹⁵ Pigoya, taeba to marisa agunta kinapisaba kampaye. Taeba Yuta tupisarawe.¹⁶ Pigoya, taeba abintune: Ago kamana aegarami'nakaba: Arupu kinanemaba, Kotiba kampa otanta, Karaisiti Isuti amatiti pukibi'naka: Arupu kinanema, otaye. Pipa abintune. Piya, ago kamana aegarakena yugawanane. Taegeba Karaisititi tamatiti pompentanaraka arupu kina aborakenaga Karaisiti Isupa aegarantune. We, ago kamana aegarakena yugarasaba arupu yagaraba kapa kampa aborakiye. Kampaye.¹⁷ Pigoya, taeba Karaisititi tamatiti puma arupu kina aborakenaga, tagu'amaba to marisa agunta kina kanta puma miyompenema abompeka, taeba: Karaisitiba to aguntaena aboranti ntagarawema, ukuna, a. Pipa kampaye.¹⁸ We, naeba kaitantontanaba to kakeba ituru pukubopa, pipa taga kamana akayukena yagara torebata aborakuwe.¹⁹ Piya, ago kamana'amaba agonepa aboraoga, pi kamana'amati pu'wantoka Kotiti atokaema miyekanaba toba iga'naba kampa punatakiye.²⁰ Eya, naeba maripora Karaisitige itanataugu purintuwe. Piya puma, ibaba naenepa kampa agauwae. Kampaye. Karaisiti aeba nagupinti e'wsaenayaga mintiye. Piya, ibaba a'ya'ma mabi nasikenaanenepa namatiti'ena manane. Eya, Koti Ntagarawamaba agu kao'ena punatama naeka aumawapa kaintegi, ibaba aeti namatiti puma mintuwe.²¹ Piya, naeba Koti nkawagaenawapa kampa kasuwe. Kampaye. We, ago kamana'amaba kanara arupu kina aboraratasinta, Karaisitiba uwa purintesine.

3

Tamatiti'enama kipe ago kamana'ama kipe tomatomane

¹ We, Karesiya kina'mitaba, tigeba aibo kinane. Piya, paipa Isu Karaisitipa wasanami nkiyobi maripora ita'atanta kamanapa urimuwigiri, igeba tiyobisa agasu puntane. We, ibaba kiyo'ena ke puritagina tiyoba atikaeye, a.² Pigoya, naeba ka'enamanaka mayama tibigakiri unamiyo: Tigeba ago kamana wasima tiyapisa yuga puntiri Awamusapa mayabera, aogi kamana abima timatiti puntiri maeyawe.³ We, tigeba aibo kinatawa, a. Maru agobima Awamus'a'ama ntuga puntiri, ibaba tigeba arirasaenarasar Nagarikena pewa, a.⁴ Piya, marupa tigeba aota kina aborama kuntaena aesagabintapa, pipa uwawa, a. Nae napiyopa uwaba kampaye.⁵ Piya, Koti Awamusapa timimagina abakatipi esegiyenawapa aboraye. We, tigeba ago kamana wasima tiyapisa yuga peka aborabera, aogi kamana abima timatiti peka aboraye.

⁶ Piya, Abara'amuka mono isa'ama maya iye: Abara'amu aeba Kotiti amatiti puntika, Kotiba: Arupu yagarawewe, otantiye, iye. ⁷ Piya puma, imatiti pe'nagiba igeba taga Abara'amu ntagarawema, ago abintawe. ⁸ Piya, to marisa kina'miba imatiti puma arupu kina aborakbewema, Kotiba abimagina, pi nkaogi kamanapa Abara'amupa omintiye. Piya, mono isa'amaba maya iye: Abara'amu, kaepisa a'ya'ma kina'mitiba a'muntanaba aborawaimukuwe, Kotiba omintiye, iye. ⁹ Piya, Abara'amuba amatiti puntegini, a'ya'ma imatiti pe'nagiba aege kaga nka'muntanabi pasewe.

¹⁰ Pigoya, a'ya'ma i'kenaga ago kamana wasiye kina'miti a'abibi nkaesakibe kamanapa waintiye. Pika mono isa'amaba maya iye: A'ya'ma ago kamana isapi kaentantanaba kampa wasiye kina'miba a'abibi nkaesawaewakibewe, iye. ¹¹ Pigoya, mono isa'amaba to maya iye: Ka'waina Kotiti amatiti pekanaba: Arupu yagarawewe, omekaza e'wasaenabi mpikiye, iye. Piya, to ka'waina ago kamana'ama kipa aegarantanaba, Koti nkaobipa arupu yagara kampa miliyemaba, ago abune. ¹² Piya, ago kamana'amaba amatiti'enaba kampaye. Pika mono isa'amaba maya iye: Ka'waina ago kamana wasikibipa, pitasa e'wasaenaba maeyano, iye.

¹³ Pigoya, ago kamana'amaba a'abibi nkaesawaiyoma, uratantegina, Karaisitiba tao'maema ae'wa nkautasa pi nkantota maema ika puratantiye. Pika mono isa'amaba maya iye: A'ya'ma yara ita'itanta kina'miba a'abibi nkaesakena kinane, iye. ¹⁴ Piya puntagini, to marisa kina'miba Karaisiti Isuti atokaeyigini, igeba Abara'amu aboraminti nka'muntanabi ubasikibeka puntiye. Eya, taeba tamatiti puma pai Koti uraminti Nkawamusma maekubompeka, Karaisiti piya puntiye.

Ago kamana'amaba maru utaratanti kamanapa kampa maegaikiye

¹⁵ We, nao'mitaba, naeba meto kamanapa urimekiri abiyo: Taeba piyaena pune: Piya, ka'wainaba pu'wakenaenawakaba napima esegi kamana'wa segipa, taeba pi ntarama kamanapa kampa akayumagi, to ka'isa kamana kampa amato pune. Kampaye. ¹⁶ Pigoya, Kotiba kamana'wapa Abara'amupe yagarawampape esegima uwasimintiye. Aebe uwaena yagarawakaba kampa untiye. Aebe ka yagarantowaka untipa, pipa Karaisitiwe. ¹⁷ Piya, kamana'nempa nkagoba mayamawé: Kotiba marupa kamanapa esegima otantogana, aintiba 430 kabu a'ya'wasagoganaba, Koti ago kamanapa aborantiye. Aboraogana, pipa pai esegima potanti kamanapa kampa akayuma maegaintiye. Kampaye. ¹⁸ Piya, taeba ago kamanapa wasikena yugarasa aboraramikibintanaba maeyompesinta, utaratanti nkawaga kamanawatasaba kampa maeyompesine. We, Kotiba: Uwa kamukuwema, Abara'amupa otantine.

¹⁹ Pigoya, nanaraka Kotiba ago kamana'wapa aborantiye, a. Piya, wasanami akayuke-naenawaitaka aborantiye. Aborataogana wairite kanamagina, otanti ntagaraba aborakanaba nagarikiyema, untiye. Piya, enisore kina'miba akapisa yagaramatasa ago kamana'wapa aboraramintiye. ²⁰ Piya, akapisa yagara atarawaisitakena yugaba piye. We, Kotiba Abara'amupa kamanapa omintipa, akapisa yagara wanane. Ae abintoba omintine.

Ago kamana'ama tamatiti'enaraka yokege purataye

²¹ Pigoya, Koti nkago kamanape utaratanti kamanape kamaena pesa, a. Pipa kampaye. Piya, ago kamana'amaba e'wasaenaba aboraramisinta, pi nkago kamanatasaba arupu kinapa aboraompesine. ²² We, paisa mono isa'amaba a'ya'ma kina'mitekaba: Agunta kinatawe, urataye. Piya pegini, a'wae puma Isu Karaisititi imatiti pe'nagipa Koti otantintanaba imiye. Eya, aegaraompe kina'mitepa tamie.

²³ Pigoya, paipa tamatiti'enaba kampa aborantogana, ago kamana'amaba iga'na puratantiye. Eya, tamatiti'ena aborakibi nttagaga iga'na puratantiye. ²⁴ Piya, ago kamana'amaba kabiratkena wairite kanaogana Karaisiti aboraogana yogawapa nagarintiye. Eya, Karaisititi tamatiti'ena puma arupu kina aboraiyoma, kabirantantiye. ²⁵ Pigoya, ibaba tamatiti'enaba aboragi, taeba ago kamana'ama nkamentapintiba kampa mintune.

Tamatiti'enarasa Koti ntagaraenaba pune

²⁶ Piya, tigeba Karaisiti Isuti atokaemagiri, a'ya'ma kina'mitaba timatiti'enarasa Koti ntagaraenaba pewe. ²⁷ Eya, a'ya'ma Karaisititi atokaema paitanta kina'mitaba, tigeba Karaisitige ka kanta puma miyewe. ²⁸ Pigoya, ae aobi pakopukenaenaba kampaye. Yuta kinano, Kariki kinano, kagane. Kayokaya kinano, uwa miye kinano, kagane. Wawo, wayano, kagane. Eya, a'ya'ma Karaisititi Isuti atokaeya kina'miba ka kina'ena puma miyewe. ²⁹ Piya, tigeba Karaisititi atokaeyapa, tigeba Abara'amu tu mpimagiri, tigeba pai Koti otantintana maekena kinatawe.

4

Karaitsiti ntugara Koti ntagara aboraune

¹ Pigoya, kamana'nempa nkagoba mayamawé: Piya, yagarawampa abawampanta a'ya'maena maekenaenawe. Pigoya, ka'waina ntugara masi mintanaba, abawampatisa ae'enawapa ka kutapa kampa maema aesa piye. Kampaye. Aeba masi mintanaba, kayokaya kina kanta puma mima kampa maeye. ² Piya, masi mintanaba, kabita'nagi nki-mentapinti mimagina, anosamagina, abawampa otantemi ntugaba aba mparu mpaema miye. ³ Pigoya, taege pabiya puntune. Paipa taeba monota yagaranto kanta puma mintapa, taeba a'ya'ma amani kina'mi nkimentapinti mintantune. ⁴ Piyama mintuwaganá, kanapa arosaogana, Kotiba yagarawapa otaogana waya'maba yakari potaogana, aeba ago kamana'ama nkamentapinti aborantiye. ⁵ Piya, ago kamana'ama nkamentapinti miyompe kina'mitepa: Ika puritakiri Koti ntugaraena piyema, taba puratakenaga, aeba ago kamana'ama nkamentapinti aborantiye.

⁶ Piya, ibaba tigeba piyama yagarawa aboragana, Kotiba Yagarawampa Nkawamusapa otagina, tintabinti irosa'ma tintabaijis: Naba-o, naba-o, Kotikaba iye. ⁷ Piya, pika tigeba ibaba kampa kayokaya yagara mima, Koti ntugaraesa yagarawapa aborama mintawé. Eya, yagarawapa mintiripa, ae maru mpaekena kina mintawé.

⁸ Pigoya, paipa tigeba Kotikaba kampa aogima agantumetapa, taga kotiwanane, ama kotintanama iga'na puritantine. ⁹ Pigoya, ibaba tigeba Koti nkagoba agantawé. A'a-o, Kotiba agoripa agantipa, nanagabaya tigeba to a'wae puma magimagi kusi ki, amani kina'mi ki'i aega'ma kayokaya'ena puwaitakibewe, a. ¹⁰ We, a'ya'ma tabe yagawo, kasa uno, mono i'mu ntugawo, kasa kabuwoma, tigeba napima aegarawé. ¹¹ We, naeba tigeba naekuru puritauwe. Eya, yoga tigeti pontanama uwaena kanta pusnaga naekuru puritauwe.

¹² We, nao'mitaba, naeba esuritauwe. Tigeba naekanta puma aborama miyoyo. Piya, naeba ago kamana'ama nkamentapintisa uwa yagara aborama tige kanta puma miyuwe. Pigoya, marupa tigeba kampa tikabinatantawé. ¹³ Eya, tigeba ago abintawé. Nau'nepa kampa esegi puntika, naeba aogi kamanapa marupa aborama urimintuwé. ¹⁴ Piya nau'nempaba kampa esegi pogana, tigeti kuntaena aborantemipa tigeba aogima aesaga'ma, kampa tikabinatama ago enaba kampa punatantawé. Kampaye. Tigeba Koti nkenisore kano, Karaitsiti Isuwo, ababesa puma naba puntawé. ¹⁵ We, pi ntugaba tigeba tiyora sa nao'maentasinta pi'magiri namintasine. Pi'na nkagoripa napima agantona, ibaba pi ti'muntanaba aeta wantiye, a. ¹⁶ We, ibaba taga kamana yopa, kama kinatintana puwa, a.

¹⁷ Pigoya, ka'isa kina'miba tigebi nkaobi puma a'yugu puritawé. Piya, igeba monopa atate ige'wai nkige asagayukenga akumpa'ma miyewe. ¹⁸ Pigoya, asi nasi aogiyena aborakenaga tigebi nkaobi pukenaba kanarane. A'yugu mitanto ntuga puntaka, wauwagiripa ataena puntawé. ¹⁹ We, yagaranempitaba, waya'ma yagaraena pemisa puma tigeba torebeta naukemikana, Karaitsiti tintabaijinti aborakibi ntugaba nata wakiye. ²⁰ We, ibaba naeba tigeba tara nagí napiyoka ayabaya pukuwe. Piya, naeba ibaba tigege to kakema ampima kamana'nepa a'wae puma kayone puritasanaga nabiyé.

Egake Serake meto kamana'waisine

²¹ We, to marisa kina'mitaba, tibigakiripa kamana agoripa unamiyo. Piya, tigeba ago kamana'ama nkamentapinti mikena kina'mitaba, ago kamana'ama nkagoba aogima abewa, a. ²² Piya, Abara'amupisa tara yagarara aborantasema, mono isa'ama piya iye. Piya, kayokaya aragawae'ma kapa yakari potaogana, autasa wae'maba ka yakari potantiye. ²³ Piyama, kayokaya aragawae'ma yakari potaogana yagarawampa wasanami ntapiyenabisab aborantiye. Aibogana, autasa wae'maba yakari potaogana yagarawampa Koti otanti nkesegiyenabisab aborantiye. ²⁴ Pigoya, pi kamanapa meto kamanane. Piya, pi tara wae taramisi nkagoba mayama uratantiye: Kapa, agewapa Ega, aeba Sainai amuta utaratantin'na mpeto'enawe. Piya, ae yakaraki'nupa ago kamana'ama nkamentapinti miyuguna iga'na puwaitantiye. ²⁵ Piya, Sainai amu Arebiya mari waintipa, pipa Egawe. Piya, Yerusaremi kina'mipa ibaba ago kamana'ama nkamentapinti iga'na puwaitaogana, ibasa Yerusaremi kumape kayokaya aragawae Egabe kagane. ²⁶ Pigoya, Sera to meto'enawe. Piya, to Yerusaremi mantabinti waintipa, pipa autasa tanorempawé. ²⁷ Pika mono isa'amaba maya iye:

We, anamo wae, kampa yagaraena punta wae, ka'mu po, iye.

Kantaba tagugunkami nkwae, kaeba ka'muntanabisab tabe kiga'e yo, iye.

Piya, marusa anamo waya'maba aintisa wae'ma agasima uwaena yagara aborakiye, untiye, iye.

28 We, nao'mitaba, taeba anamo wae'ma ntagara Aisaki ka'masa pune. Piya, Koti Abara'amu otanti, taeba ae yagararawe. ²⁹ Pigoya, pai wasanami ntapiyenabisa aboranti ntagaramaba Awamus'a'ama otaogana aboranti ntgarama kamaena potentisa puma, ibaba taetiba piyrena aboraye. ³⁰ Pigoya, mono isa'ama nana kamana iye. Aeba maya iye: Kayokaya aragawaepi yagarawape isigarubaiginisi waiso, iye. Piya, kayokaya'enama ntgaramaba autasa wae'ma ntgaramati kampa atokaema otanti ntanaba kampa maekiye, iye. ³¹ Eya, nao'mitaba, taeba kayokaya'enama ntgaraba kampa mintune. Kampaye. Taeba autasa wae'ma ntagara aboraune.

5

Akariyobatatanti'nagitaba iga'nabipa to kakeba a-mpiyeno

¹ Pigoya, iga'na kampa pusanaga Karaisiti aeba akariyobatantkiye. Pika tigeba asima esegi puma iga'na ubutitakenaenama nkametapintiba toba kakeba a-mpiyiyo.

² Pigoya, nae Porona, urimekiri abiyo: Tigeba ago kamana wasima ara'enawapa titipa maekibepa, Karaisiti ntugaba kampa tiyo'maekiye. Kampaye. ³ Piya, a'ya'ma ti kasakena ara'en'a maeya kina'mitaba, naeba to kakema urimekiri abiyo: Piya, ka akayukibepa ago kamana'ama kampa kanara tiyo'maekiye, urimuwe. ⁴ Piya, tigeba ago kamana'ama ntugarasa arupuyenaga aguyosaga kina'mitipa, Karaisiti a'yigititantine. Eya, Koti nkawagaenabisa ware'na wantane. ⁵ Piya, taeba Awamus'a'ama nkesegiyenarasa tamatiti puma Koti arupu puratakenaenagaba aobi pune. ⁶ Piya, Karaisiti Isuti atokaeyompepa tau kasakenaenawo, kampa kasakenaenawo, pipa uwaenawe. Piya, aeti agu kao'ena puma tamatiti'enamaba au'wapa aboramaga tagantana piye.

⁷ Pigoya, tigeba mono kita agobima aogima nasintawe. Taga wasikenaenarapa ke akutitagiri tikabitawe, a. ⁸ We, tiba puritanti'naba pi ntapiyenabisa kampa aborarimiye. Kampaye. ⁹ Piya, uwaenanto abararamipa a'ya'ma abararawawaye. ¹⁰ Pigoya, Wa'egawama tiyo'maeyamikaba naeba namatiti pekiri, nae napiyenabisa tigeba aega'magiri, to ka napiyenabisa kampa aegarakibewema, napiyuwe. We, tibaibemi ntgarama nkagega'eba kampa abokana, Kotiba antota'enaba amikiye.

¹¹ We, nao'mitaba, naeba au kasakena ara'enabisa maeyiyo, yosinta, ayama kamaenabisa punatayaba miyesine. Piya, naeba piya kamanapa yosinta, maripo ya aibasanakenaenamaba a'ya wasine. ¹² Pigoya, i kasama ara'en'a puma napiyenari paibukena kina'miba, ige'wai nkipa kasama maebugaikibepa, kanarane.

¹³ We, nao'mitaba, Kotiba iga'nabisa tiba puritantina, iyobatitanta kina kanta puma miyiyo. Pigoya, aiyobatitanti ntanaba a-nka'yugu puma arirasaenabisa a-piyo. Tigeba tiyo'mipa agu kao'ena puwaitama kayokaya'enabisa puwaitaiyo. ¹⁴ Piya, a'ya'ma ago kamana'ama nkagoba mayama untiye: Kaeka kauka kabitampesa puma kagora miye kina'mipa pabiyama agu kao'ena puwaitao, untiye, iye. ¹⁵ We, yaga kanta pumagiri ankabana abana pumagiri, a'yugu aesawae wakibewe. Pika kabiyiyo.

Arirasa kipi kasima Awamus'a'ama miyeno

¹⁶ Pigoya, kamana'nepa mayamawe: Piya, Awamus'a'ama nkesegiyenara nasiyo. Tigeba ti'ama nkabugakibintanaba a-nkaboraiyo. ¹⁷ Piya, ti'ama nkabugaintanabisa Awamusupa maema nagintakena pegina, Awamus'a'ambaba ti'amantanabisa nagintakena piye. Piya, taramisi kamaena pementanabisa napiyenari a'yugu puritagiri aupa kampa aborawe. ¹⁸ Pigoya, Awamus'a'ama paitaratagiri aegarapa, tigeba ago kamana'ama nkamentapintiba kampa miyewe.

¹⁹ Piya, ti'ama ntugaba mayamawe: Kumiyanewa, i'nintanawa, tinta pami pentanawa, ²⁰ ama koti nkaegarakenaenawa, kiyoenawa, kamaenawa, ma'enawa, agobi pukenaenawa, amo'enawa, kota mpaema agintanawa, atatarenawa, mono kina pakobikenae-nawa, ²¹ to waina mparuta mikenaenawa, esegi wani ntama aibo'ena pikenaenawa, uwaena ataena pikenaenawa, a'ya'maena to auga to auga'enawa, sumaba, pipa ti'ama ntugawe. Pika pai naeba urimintosa puma, ibaba to kake esegima urimuwe: Piya pe kina'miba Koti kabiratakenaenabi kampa ubasikibewema, yuwe.

²² Pigoya, Awamus'a'ama nkau'wapa mayama aboraye: Agu kao'ena pukenaenawa, amuntanawa, paruyenawa, paebuma mikenaenawa, ao'ena pikenaenawa, aogiyenawa, arupu puma mikenaenawa, ²³ pasema kabikenaenawa, aupa nagintakenaenawa, suma, igetiba ka ago kamana'ambaba aupi pima kamanapa otakenaenabisa kampa waintiye. Kampaye. ²⁴ Piya, Karaisiti Isuti atokaeyaa kina'miba i'waipa maripo yara ita'itama, i'ama nki'nintanawaipae ibugaintanabe ago kaintawé.

²⁵ Pigoya, Awamus'a'ambaba e'wasaena tamegi, taeba Awamus'a'ama kepa tayakeka naseno. ²⁶ Piya, taete tageba a-nkasagayuyeno. Taeba tao'mi nkintabaiipa tutupa a-suwaitano. Taeba tao'mi mparupa a-mpaeyano.

6

Taeba tao'mi kuntuyenaba aesaga peno

¹ We, nao'mitaba, ka yagarama aibo'ena pikibipa, Awamus a wainti'nagita, tigeba paebuma kabima mima pi ntagaraba to asitaiyo. Tigeke timiyo pusanaga kaga kabiyyiyo. ² Tigeba tiyo'mi kuntaenawaipa aesaga piyo. Piya pikibepa, tigeba Karaisiti nkago kamana'ama nkau'wapa aogima aborakibewe. ³ We, ka yagarama aewaka napima: Nageba waintiyema, yipa, ageba kampa waintipa, aeba amiyo'ena puma ae'wa nkaoba airari kaeye. ⁴ Eya, a'ya'ma ka ka kina'miba ige'wai ntuga aogiyenawo, kamparagaenawoma, napiyyiyo. Piya pukibi'naba aeba aewaka a'mu pumagina, au maete ikenaenaba ao'mi nkiyobipa kampa pukiye. ⁵ Piya, a'ya'ma ka ka kina'mitaba aesaga pikena kuntaenarepa waintakapa, tageba a-mpaete iyeno.

⁶ Piya, mono kamana abe kina'miba igeba uwaimima iyakinta kinapa aogi kutankapisa antota'enaba imiyo.

⁷ Pigoya, tigeba timiyo'enaba tiyoba a-nkairari kaeyiyo. Piya, ka'wainaba Koti kamana'ama kampa akaya sukiye. Kampaye. Piya, wasanama aintana pipa, pabiyena abeti aborakiye. ⁸ Piya, ka'wainaba ae'wa nkau maete ima aintana pipa, aintiba ae'wa nkaupisa abararakenaenaba aboramikiye. To ka'wainaba Awamus a'mati atokaema aintana pipa, aintiba Awamus a'mapisa e'wasaenaba maema miyaba'mikiye. ⁹ Piya puma, taeba aogi yuga pikenaga tayampu peno. Taekita kampa pukubompepa, ae'wa ntugabu au'wapa aboraramikiye. ¹⁰ Piya, kete waintakapa, taeba a'ya'ma kina'miti aogi yuga aborano. We, imatiti pe kina'mika napima aogi yuga tabera aborano.

Poroba maripo yugaraka a'mu puntiye

¹¹ Pigoya, tabe awa'ena naene nayapisa kaeyopa aogima agaiyo. ¹² Pigoya, i'waipa wasanami nkiyobi maete ikena kina'miba igeba ti kasakenaraka uritawe. Piya, igeba mayama napiyewe: Ita ara'ena pukubompepa, Karaisiti mparipora ukubompe kamanatekaba kampa kamaena puratakibewema, napiyewe. ¹³ We, pi nkara'ena maeya kina'miba igegeba kampa ago kamanapa aogima wasintawe. Kampaye. Igeba ti kasakibetasa tabe igi maekenaga pewe. ¹⁴ We, tonaga wanane. Naeba Wa'egare Isu Karaisiti mparipo yugara amanaka na'mu pukuwe. Piya, pi ntugaraka mampabisaeenaba naeka ita'ataogana pu'wantiyi. Eya, naekeba mampabisaeenaga ita'nataoga pu'wantuwe. ¹⁵ Piya, tau kasakenawo, kampa kasakenawo, pipa uwaenawo. Eya, aoso kina'amana aborakenaba pipa au'wane. ¹⁶ Piya, a'ya'ma ma ntapiyena wasiye kina'miba, igeba taga Isureyo kinane. Pigoya, Koti taga Isureyo kinane. Pigoya, Koti taga Isureyo kina'miti paruyenabe antara'enawape tigeti waiyeno.

¹⁷ Pigoya, ka'wainaba to ka kuntaenaba a-nkaboranameno. Kampaye. Isuka naegunta, pi nkara'enaba nauta waintiye.

¹⁸ Nao'mitaba, Wa'egare Isu Karaisiti nkawagaen a tigutimapi waiyeno. Tagane. Poro piya isa kaentiye.

EPESASI KINA'MI NKISA PORO KAENTIYE

¹ Nae Porona: Karaisiti Isu nkaposorogawe, Koti abogana unatantemine. Piya, Epesasi kumatasa Kotiti atokaema Karaisiti Isu nkawamu wasiye kina, ma nkisapa tigeti kaeyuwe. ² Pigoya, tabarempa Koti, Wa'ega Isu Karaisiti, isigetisa awagaenabe paruyenabe tigeti waiyeno.

Koti mono ki tayakintiye

³ Pigoya, Wa'egare Isu Karaisiti nkabawampa Koti, aeba mantarasaena akayona puratama, Karaisititi atokaentompeka mono kao'enawa toma toma tamemine. Pika agega'eba asagayuyeno. ⁴ Paipa ma mpaba kampa puntometa aeba Karaisititi atokaeratakenaga utaratantine. Taeba ae aobi aota mima kamanate kampa waikibika Koti piyama utaratancing. ⁵ Piya, Koti aewa nkabomeka, Isu Karaisititi atokaema araga yagarawaka uma mikunompeka, agu kao'ena puratama utaratantine. ⁶ Aeba abugai ntagarawaka uma e'wasaenawa awagaenawataso atitatama aogi puratantine. Piya pemika, Koti nkagega'eba asagayuyeno.

⁷ Piya, Koti nkawagaenawampa pumaewaogana, Isu pu'magina koratasa aibo'enarepa asu'a puragasima ika puratantine. ⁸ Piya, awagaenawapa asunu kaema uwaena tamintana, aogi napiyena abompentanarepa aboraratantine. ⁹ Piya, paipa Koti ae'wa nkabugaomentana kakamagina, pai Karaisiti ntuga aborakibemika untemintana ibaba aega'ma taeyakiye. ¹⁰ Pi nkabugaomentanaga ke i'ma, aborakibi nttagaga aeba ago a'itantiye. Piya, mantarasaenabe mampabisaaenabe aki potama, Karaisitiba a'ya'maenama nkwa'ega mikiyema, untiye. Pi untintanaba aboraratantiye.

¹¹ Pigoya, Kotiba ae'wa nkaumawataso uma a'ya'waemaena esegi piye. Pi'na paipa tagama napimagina, Karaisitika uma ae tu mpikunompeka utaratantine. ¹² Piya, paitama Karaisititi atokaentompe kina'miteka, Koti nke'wasaenawantaga mima agega'e asagayukenaga utaratantine. ¹³ Piya, tigeba pabiya taga kamana, ti'ikena aogi mono kamana, abima Karaisiti nkaegarantakanा Koti aeba pai tamikena utaratantem Nkaota Awamusupa tigepe taepe tamima, ae ara'ena purataye. ¹⁴ Pabiyma, Koti ainti tababuma utaratanti nke'wasa antota tamikibika napima, ibaba Aota Awamus'a'wa tamegina, taege kaga mimagina Koti nkara'ena purataye. Pika agega'e asagayuyeno.

Epesasi kina'mika Poro nunamu untiye

¹⁵ Piya, tigeba Wa'ega Isuti timatiti potamagiri, a'ya'ma Kotiti atokaenta kina'miti agu kao'ena puwaitawe. Pika tiwaga kamana abimagi, ¹⁶ nunamu yo nttagaba asi nasi tigeba napimagi, Kotiti na'mu potauwe. ¹⁷ Piya, Wa'egare Isu Karaisiti ae Koti, e'wasa tabarempa, ae'wa nkauma timekiri, pika aososima napiyigina, Wa'egawama nkagowapa uma aboraritakiri, abibebe puma abiyoma, nunamu yuwe. ¹⁸ Piya, e'wasaenama ntapiyenawa timisanagaba nabiyi. Mantabisa tigeti aborakibi'na tigeba aogima abisanagaba nabiyi. Pigoyema, Koti utaratanti nke'wasa antotapa aeti atokaentompe kina taeti aborakibi'na, abigina au'wantana peno. ¹⁹ Piya, Isu nkaegarantompe kina'miteti esegiyenawapa aboramima tabe puma asu againtiye. Pi nkesegi yugawaka abigina au'wantana peno. ²⁰ Piya, pi nkesegiyenawataso Karaisiti purintapisa asitamagina mantabinti ayatakanti asitantiye. ²¹ Piya, ibabe aintibe a'ya'ma kiya kinape, kabirata kinape, esegi kinape, kamana ukena kinape, a'ya'ma toma toma inta kinape, Koti otagina Karaisiti asu igasima mintiye. ²² Piya, Karaisiti nkagisabinti a'ya'waemaena potama, a'ya'ma monota ai'aru pompe kina'mite nkai'nere otantiye. ²³ Piya, mono kina'mitiba Karaisiti nkaukanta puma miyokana, Karaisitiba tantabaipinti mima, a'ya'waemaenaba pumaetama miye.

2

Paipa a'yuguma mpintuwakana Koti aogi puratantiye

¹ Pigoya, paipa tigeba aibo'ena puma aguntaina pumagiri, tigupa Kotiti pu'wantiye. ² Piya, paipa tigeba agasiyaena puma mampabisaa kinatagiri, ke kina'mi nkwa'ega aega'ma mintantawe. Piya, ibasa yagaba pi kewamaba Koti kamana akayuma minta kina'mi nkintabaipinti yoga piye. ³ We, a'ya'ma taeba paipa pi kina'mige kaga mimagi, paisa tagu i'nintanabi mpima napiyenarempape tau'amape abugaomentana aegarantompene. Taere piyama mima a'ya'ma to kina'mi pesa puma mima, Koti antota amo'ena puratakena kina mintantompene.

⁴⁻⁵ Tagane. Tae aibo'enarempa taeguyoga, pu'wanta kina kanta puma mintuwakana, Koti nkantara'enawampa pumaewaogana, taeka abugaogana agu kao'ena tabera puratama, Karaisitike kaga asiratantine. Eya, Kotiba awagaena puritama ti'iye. ⁶ Piya, aeba taepa Karaisiti Isuti atokaeratamagina, kaga mantara mikenaga taba puratantine. ⁷ Piya, a'ya'ma yaga Koti asugainta awagaenawapa aborawaekibemika, kayonena puratama Karaisiti Isuti atokaetama taba puratantine. ⁸ Abewo. Koti awagaena puritama, timati'enorika ti'iye. Tigerinane. Pipa Koti ae'wa ntapiyenarasa timiye. ⁹ Piya, tiyapisaenaba kampaye. A'yugu ka yagarama au maete isanaga, pipa Koti uwa tamie. ¹⁰ Koti aewa aboraratamagina, Karaisiti Isuti atokaema kasa kina mima tayapisa aogiyena puma mikubompeka, aboraratantine. Piya, pi tayapisa aogiyena pukubompeka Koti paipa utaratantine.

Karaisierti ka kina'ena puratantiye

¹¹ Tigeba abiyo. Yuta kina'miba igewai nkiyapisa ipa kasawe. Pi kina'miba tigekaba: To marisa kina kampa ipa kasama kampa abinta kinane, uritawe. Piya, paipa tigeba mono kampa abinta namu kina mimagiri, ¹² pabi ntaga Karaisiertipa pagasara atama mintantawe. Tigeba Isureyo kina'miti abe'i mintiri, Koti aborawaekibintanaga uwaimogiripa tigeba kampa abintaw. Piya, Koti tamikenaenagaba kampa napima agawa pumagiri, mampabi uwa mima Kotitiba kampa atokaentawe. ¹³ Piya, tigeba paipa pagasara mintiri, ibaba Karaisierti Isuti atokaeyagan, korankatasu ika puma tibabegiri, kanama Koti nkagora miyewe. ¹⁴ Piya, Karaisierti aeba agore mimagina, tanta paruyena puma miye. Paipa Yuta kina'mige to marisa kina'mige kamaena puma mintantompekana, ibaba Karaisiertiba tupurepa uwa airataye. Piya puma, tara kinapa maema ka kina'ena puratantiye. ¹⁵ Piya, Karaisierti aewa ntuga pumagina, Yuta kina'mi nkago kamanape aegaranta ariwape maegaaintemine. Piya puma, aeba tara kina'mi kamaenarepa kasima, ka kina'ena puma paruyena puratantiye. ¹⁶ Piya, maripora pu'magina, kamaena a'ya kasima, tara kinapa maema aki puma Kotiti ka u'ena puratantiye. ¹⁷ Pigoya, Karaisierti irosa'magina pagasara mintantaka kinape, Koti nkagora mintantompekinape, paru kamana uramintiye. ¹⁸ Piya, Karaisierti ntugarasa ka Awamus'a'ama ka'ena puratama, tabarempati ikena ki aboraratantiye.

Koti nkaegaranta kina ae'wa ntamane

¹⁹ pigoya, tigeba ibanto namu'isa a'yo kana kina kampa mintawe. Tigeba Kotiti atokaenta kinake ka kina'ena pumagiri, Kotiti ka tuntana puma Koti ntama kanta puma miyewe. ²⁰ Aposoro kinape poropete kinape Koti igepta marukanta puwaitama, Karaisierti Isu aepa wa'ega aetamagina, taepa maema ae'wa ntama kanta puratantine. ²¹ Piya, a'ya'ma pi ntamankama nkayampu Karaisiertita uma asaeratagina, Wa'egawama nkaota mono nama anosama waikena piye. ²² Pabiyama Karaisiertita Awamus'a'ama tigegepa asaeritgiri, Koti mikenamanka aboraw.

3

Wa'egawama kamana Poro aborama uwaimintiye

¹ Pigoya, naeba Porona mima, to marisa kina tigeka Karaisierti Isu nkiga'na yagarawantanana puma mintuwe. ² We, tigeti: Mono yuga poma, Koti unatama, awagaenawapa namemintanaga tigeba agobaya abewema, napiyuwe. ³ Piya, Koti kakama waintintanaba uma aborama namoga, pi kamana aronkanto paipa kaema urimintuwe. ⁴ Piya, Karaisierti kakanti kamana'amaba napiyenenepipa arawaye. Pipa aisuma abiyo. ⁵ Pi kamana'ama nkagowapa paipa wasana mirite kananta kina'miti kampa aborantiye. Ibasa yagaba Awamus'a'ama aota aposorowape poropetewape uwaimegini, aborama uramewe. ⁶ Pi kakanti kamana'ama nkagoba mayama waintiye: To marisa kina, tigebe taebe ka tu, ka au'ena puma mimagi, Karaisierti Isu ntugarasa Koti utaratantintanama nkau'wapa kaga maemagi mikune.

⁷ Pigoya, pi aogi mono kamana uwaimoma, unatantine. Piya, Koti awagaenawapa aboranamimagina, mono yugawata unatama, pika esegiyenawapa namintemine. ⁸ Piya, a'ya'ma Kotiti atokaeya kina'mi tu amentapinti mintuwagana, Kotiba awagaenawapa aboranamima: To marisa kina'miti wama Karaisierti nkaogiyenawampaba atupe awamobe kampa uma a'ya wanta'enawe. Pika uwaimoma, unatantane. ⁹ Eya, Koti paipa a'ya'waemaena pumartana, napiyenawapa aega'ma, ainti pukenaena kakantemi, ibaba pi kamana'wapa a'ya'ma kina'miti aborama uwaimoma, naba punatantine. ¹⁰ Piya, Kotiba mantari paitanta kinape esegima mpiye kinape, aogi napiyenawapa iyakikenaga monota ai'aru pompe kina'mite abakatepi ae'enawapa ibaba aogima aboray. ¹¹ Pika paitaka'ya Kotiba napima, Wa'egare

Karaaisiti Isu, ae yuga piya pukiyema, otama aborantiye. ¹² Piya, aeba Kotiti ikena kitene. Taeba aeti tamatiti potama, tanipa kampa puma, Koti nkaobi aborakenaga taekuruba kampa pukune. ¹³ Piya, pika napima abiyo. Nauki nakiyenanempaka a'yugu tintawama arusasanaga, pipa kampaye. Tigetaka ataena punatapa, pipa tiyo'maekenaenawe.

Poroba Epesasi kinaka nunamu untiye

¹⁴⁻¹⁵ Pigoya, mantarake marake a'ya'ma kina tamata tamata Koti aboraratantiye. Aboraratantem tabati narakabima, tige aogima mikibeka nunamubisa maya yuwe: ¹⁶ Koti tabe e'wasaenawatasawa Awamusawapa tintabaipinti pumaeritama esegima asiritanema, nunamu yuwe. ¹⁷ Piya, timatiti pigina, Karaaisiti tigupi miyaba miyeno. Abu'ama mabi esegi potagina, esegi pisa puma agu kao'enawapinti esegi piyo. ¹⁸ Piya puntiri, a'ya'ma Kotiti atokaenta kina'mige kaga Karaaisiti nkagu kao'enawapa tabe, e'ero, inatibe, mabintibe, agasiyema nunamu yuwe. ¹⁹ Piya, agu kao'enawapa wasana abikenaenaba igasima waima waintiye. Piya puma, Kotiti agu pumaema wainti, pi'na pumaema wairitano, pabiyama tigeka nunamu yuwe.

²⁰ Pigoya, Koti nkesegiyenawampa tantabaipinti yogaba piye. Ae esegiyenawatasawa a'ya'ma esukenaenarepe napiyenarepe asu agasima, tabena pukena yagara mintiye. ²¹ Piya, a'ya'ma monota ai'aru pompe kina'mitaba Karaaisiti Isuti atokaema mirite kanama, a'ya'ma yagaba Koti nkage asagayuyaba miyeno. Tagane.

4

Isu nkaegaraompe kinapa taeba au'wane

¹ Pigoya, naeba Wa'egawama ntugara iga'nna yagaramana, maya urimuwe: Koti monota utaritama tibabunti, pika napima aogima miyivo. ² Piya, tige tumima pasema mima, tiga'nagi agoya puwaitama, kuntaenawaipa atama agu kao'ena puwaitaiyo. ³ Awamusawama maema paru puma asaerataika, pika napima ka'ena puma miyivo. ⁴ Mayaenaba, taeba ka tau'ena puma, ka Awamusawama mima, ka'enaga agawa puma mintakanwa Kotiba tababeno. ⁵ Piya, Wa'egaba ka'enawee. Tamatiti'enaba ka'enawee. Monota paitaratakenaenaba ka'enawee. ⁶ Koti ae ka'ant'o a'ya'ma kina'mite tabarempawe. Aeba a'ya'ma kina asuragasima mima, a'ya'ma kina'mite abakatepi mima, yogawa a'ya'ma kina'mite tayara puma miye.

⁷ Piya, Karaaisiti napimagine a'ya'ma kina'mitepa tayapsaena abikenaena ka ka tamoga, pika awagaenaba maentune. ⁸ Pika mono isa'amaba maya iye:

Aeba inati intipa, uwoma iga'nna kina akariyoba'ma paitawaitama ibabute ima, wasana a'muntanaba imintiye, iye.

⁹ Pigoya, pi kamana: Aeba inati intipa, pipa nanaga untiye. Piya, inati abiwapa kampa intana, aeba marupa mabintiraka'ya tumintemine. ¹⁰ Piya, mabinti tumintemini ntagararama, to ae manta abobori ima asugasima, a'ya'mena pumaema miyenema intine. ¹¹ Pigoya, aeba pabiyaki taya pukenaena a'muntanawa tamintiye. Piya, ka'isa kinapa aposoro yugara uwaitantana, ka'isa kinapa poropete yugara uwaitantana, ka'isa ke i'ma uwaimikena yugara uwaitantana, to ka'isaba pasitorowa, tisawa, suma uwaitantiye. ¹² Piya, Kotiti atokaeyompe kinapa tao'maema, mono yugawapa puma, Karaaisiti nkau'amaba taepa esegi purataka, Karaaisiti pi a'muntanawapa aboraramintine. ¹³ Piya, pi ntugamaba wairite kanama a'ya'ma taeba kanarasama ka tamatiti puma, Koti ntagaragaba kaga aogima ntapima, monoti anosakana, Karaaisiti nkesegiyena pumaerataka ae kanta puma mikunompeka a'muntanawa tamintemine. ¹⁴ Piya, monota a'yugu inamu kanta puma mikune. Piya, ka'isa kina'miba igebingkaobi puma tonarona kamana'waitasa uma ago'ena puratakena pewe. A'yugu inamu kanta puma mima kamana'wai abima, esibawama yoni nkaosa aibarara purite nasisa, piyaba a'yugu pukune. ¹⁵ Pipa kampaye. Agu kao'ena puwaitama taga kamanapa yeno. We, Karaaisiti aeba ai'nerene. Monota anosama esegi puma aeti atokaeyano. ¹⁶ Aeti atokaeyokana aki puratagi, ae au'wa mpiyokana kabirataye. Piya, taeba a'ya'ma au'ama nkauka'iba mima, agu kao'ena puma utaratanta yugaba aogi pokana, au'ama anosama aogima asiyune.

Mono abe kina'miba kasa kina miyewe

¹⁷ Pigoya, Wa'egawama nkawamatusa age'ma kamana esegima uma aborarimuwe: Piya, tigeba to marisa kampa abinta kina pesapa a-piyo. Igeba kampa aogima napima, ¹⁸ abikenaenawaipa airarikaegasawe. Piya, igeba Kotiti igupa akumpa'magini kampa napinta aibo'ena puma Kotige mikenaenaba ika'intaesi potama, ¹⁹ inintanaba kampa punta kupiyona puta nasimagini, i'intanabinti ubai'ma a'ya'ma tonarona kamparagaenaba pewe.

²⁰ We, tigeba Karaisitintanagaba kampa abima piyaba pewe. Kampaye. ²¹ Naeba ago abuwé. Isuti tagantanaba waintikaba, aogima pi kamanapa urimuguri, tigeba ago abintawé. ²² Piya, tigeba paisa timawama ntugaba kasiyo. Paipa tiyobi airarikaema ataenaga abugama, pintanama maema ata puritantiye. Piya, pi paisaenaba kasiyo. ²³ Piya, napiyenarimpaba kasa'ena pekiri, ²⁴ tigeba kasa kina aboraiyo. Piya, tigeba Koti ae aoga pumaranti kina aota arupu puma taga kasa kina aboraiyo.

²⁵ Pigoya, tigeba kumpari'enaba kasimagiri tiyo'mige asi nasi taga kamana uma miyiyo. We, taeba ka tau mintune. ²⁶ Piya, timo'ena puntiripa aogima kabiyyio. A'yugu aguntaena pukibewe. A'yugu timo'ena uwa waintakana papa tupasikiye. ²⁷ A'yugu kewama kabi a'waikibewe. ²⁸ Kuntana pi'naba to kakema kuntanaba a-peno. Kampaye. Ibaba aewa nkayapisa aogi yuga puma, ka'isaena kampa wainta kinapa iyo'maeyano. ²⁹ Tiwamupisaba ata kamana a'nkaborano. Kampaye. Wasana iyo'maekena kamana'amana nkaborano. Piya puma, kamanatitasa abe kina'miti awagae-namana nkaborano iyo'maeyano. ³⁰ Tigeba Koti Nkaota Awamus'a amapa kuntaenaba a-nkamiyo. Piya, aeba arupu puritakena yagagaba ara'ena puritantiye. Kuntaenaba a-nkamiyo. ³¹ Piya, tigeba a'ya'maena tinta tikikenenaenabe, ka ibirakenenaenabe, timo'enabe, tabera ata kamana ukenenaenabe, kamana uma akaya ukenenaenabe, a'ya'ma to ataenabe, kasiyo. ³² Kasimagiri, tiyo'mipa kayone puwaitamagiri, agu kao'ena puwaitaiyo. Eya, Karaisiti atokaeyaka Kotiba aguntaenaripa asu'a purigasisa puma, tiyo'mipa pabiya puwaigasiyo.

5

E'wasaenara nasikune

¹ Pigoya, tigeba Koti nkabugai ntakarantontowampitaba, ae pemisa puma miyiyo. ² Karaisitiba agu kao'ena puratasa puma, tigeba wasana agu kao'ena puwaitama miyiyo. Piya, taeka ae'wa nkaumawapa meru kasima, Kotiti muta atama iga agunta asu abasantiye.

³ Piya, Kotiti atokaeya kina'mitaba, tigeba kumiyenabe, a'ya'ma i'nintanabe, to wainantanaga abugakenaenabe, tikabitaiyo. A'yugu pika kamanapa aborakiye. ⁴ Piya, a'yugu tigeba i'ni kamanape, aibo kamanape, karana kamanape usanaga, aogima kabima mima Kotiti ti'mu potaigina kanarasano. ⁵ We, tigeba ago abintawé. Kumiyyena pe kinape, i'nintana pe kinape, to wainantanaga abugai kina igeba ama koti nkaegara kinape, igeba Karaisitige Kotige kabiratakenaenawaisipi kampa ubasikibewe.

⁶ A'yugu wasana ampa esiba kamana uma iga puritaigiri aegarakibewe. Pika aogima kabiyyio. Pika kamana akayuye kina'miti Koti amo'enawapa antota aborawaimikiye. ⁷ Piya, igegeba agaya agayaba a-piyo. ⁸ Eya, paipa tununtanabi mintantawé. Ibaba tigeba a'wae puma Wa'egawamatı atokaema e'wasaenawata miywē. Piya, e'wasa kina kanta puma nasiyo. ⁹ Piya, a'ya'ma aogiyenabe arupuyenabe tagantanabe, pipa e'wasaenama nka'wane. ¹⁰ Piya, tigeba aogima nasima, Wa'egawama nkabugaintanama nka'wapa aboraiyo. ¹¹ Pigoya, tununtana pe kina'mi ntuguba a kampa aema yugawe. Piya, igegeba kaga pi ntuguba a-pumagiri aranta'enara agowaipa aborawaitaiyo. ¹² We, kakama uma pugasantanama nkawaga kamana usanagaba nani ntabiye. ¹³ Pigoya, e'wasaenamaba a'ya'maenama nkagoba aboramagina age atakenaenawe. Aborama age atakana e'wasa pukiye. ¹⁴ Pika mono isapi Kotiba maya iye:

Ibanto waitamintampe ntagara, karu'ena kaogama purintapisa asiyegana, Karaisitiba e'wasaena kameno, iye.

¹⁵ Piya, nasikenaenaripa aogima kabima nasiyo. Napiyena kampa wainta kina'mi ntasisuba a-puma, abinta kina kanta puma nasiyo. ¹⁶ Piya, ibasa yagaba aguntaenaba pumaema waiyegiri, aogima kabima mima Kotintanaba maema piyo. ¹⁷ Piyama tigeba a-nkaiba'nabo puma mimagiri, Wa'egawama nkabugaintanaba abima aegarakibewe.

¹⁸ Tigeba uwaena waini wanipa a-ntama aibo'nabopa a-a-piyo. Kampaye. Pintanamaba ata puritaya, tigeba Kotitisa Awamus'a maeyigina, aeba pumaeritano. ¹⁹ Piya, tigeba tiyo'mige mono kamana uma, mono inibe, ibasa inibe, kasa inibe tiyo'mige uma, tigupi Wa'egawamatı ini uma, ti'mu potaiyo. ²⁰ Eya, a'ya'ma yagaba tigeba a'ya'maenagaba tabarempa Kotiti ti'mu potamagiri, Wa'egare Isu Karaisiti nkagera uma esegi potaiyo.

Waya waena pe kina'mi kamanane

²¹ Tigeba Karaisiti nkagega'e asaga'yuma tiyo'mi nkimentanti miyiyo.

²² Wayapa, tiwaegi kamana wasima miyiyo. Piya pukibepa Wa'egawama kamanapa wasima mikibewe. ²³ Piya, monota ai'aru pompe kinapa Karaisiti nkau'wa mintokana, aeba tau'ikena yagara mintiye. Piya, Karaisitiba mono kina'mi nkai'newai mintisa puma,

waba waya'mi nkai'newaine. ²⁴ Piya, monota ai'aru pe kina'miba Karaisiti nkawamu wasiyesa puma, waya'mitaba, a'ya'ma tiwaegi kamanapa wasiyiyo.

²⁵ Waba, tigeba wayatipa agu kao'ena puwaitaiyo. Karaisitiba monota ai'aru pompe kinakaba ae'wa nkaumawapa meru kasima, agu kao'ena puratantisa puma, wayatipa agu kao'ena puwaitaiyo. ²⁶ Piya, Karaisiti aeba piya puma mono kina'wapa aeyoba tagasogana wani pasisu puma kamana'amabeba ka'masa pumagina, aota kina'wantana puratantiye. ²⁷ Piya, monota ai'aru pompe kina'mitepa ae aoriba e'wasaenaba aborarata-magina, mono'amaba i'nintanabe aowapisipasiyenabe to kanaenabeba kampa waima, aota waima kampa ataba penema aboraratama, ae'wa mputa nataiyoma puratantine. ²⁸ Piya, Karaisiti kabirataso puma, wamitaba wayatipa agu kao'ena puwaitaiyo. Titi kabiyeso pumagiri wayatipa kabiwaitaiyo. ²⁹⁻³⁰ Piya, ka'wainaba ae'wa nkaupa kamaba kampa potaye. Kampaye. We, taeba Karaisiti nkaupa mintokana, mono kina'wata kabirataisa puma wasanaba ae'wa nkaupa nakena amima aogima kabitaye. Piya pemisa puma wayatipa kabiwaitaiyo.

³¹ Pikaba mono isa'amaba maya iye: Wasanama ano aba atate wayake wage kabobuma isigeba ka isi'ena pese, iye. ³² Pi esegi kamanapa nae napiyopa mayamawe: Isigeba ka isi'ena pemesa puma, Karaisitibe monota ai'aru pompe kina'mitabe ka tau'ena puma mikune. ³³ Pigoya, tigeba ka ka maya piyo: Tigeba titi kabiyeso puma wayatipa agu kao'ena puwaitaiyo. Piya pigiripa, waya'mitaba, tiwaegi nkigega'e asaga'yuyiyo.

6

Yagaramike ino ibagike kamanane

¹ Araga yagara, tigeba Wa'egawamaka napima tino tibagi kamana abima wasiyiyo. Pipa arupuyenawé. ² Piya, mono isa'amaba maya iye: Kaeba kano kaba kamanapa aegarao, iye. Pigoya, pi nkakumparanta kamanapa aeba marupa aogi antota'ena wantagane. ³ Pi nkantota'enaba mayamawe: Piyama aegarakibempepa, kaeba aogima mintanapa mampara e'erota mikibene, iye.

⁴ Ibagitaba, araga yagararipa imo'ena pusanaga tigobipa a-puwaitamagiri, Wa'egawamantana abima wasikenaenaga kabiwaitaigina anosaiyo.

Yoga kina'mike kiya kina'mike kamanane

⁵ Kayokaya, tigeba mabisa tabe kinatimpi nkiwamupisa kamanapa wasiyiyo. Tigeba tyekuru puma aogi arupu puma mima, Karaisititi yoga piyo. ⁶ Ayugu sepena puma wasanami nkiyora tabe yuga pusanaga aogima kabima mimagiri, Karaisiti kayokaya'ena puma Koti nkabemintanaba tigutasa aega'ma miyivo. ⁷ Piya, yoga puma wasanamiti wanane. Tigeba aogi tintabarima Wa'egawamati aogi piyo. ⁸ Eya, tigeba ago abintawé. Wasanamaba a'ya'maenaba aogiyenamana pukibipa, pabiya puma Wa'egawamaba antota'enaba aogiyena amikiye. Kayokaya kinape uwa kinape ka'masa nkika imikiye.

⁹ Tabé kina'mitaba, tigeba pabiya puma kayokaya kinatimpi nkiyekuru pukenaena a-puwaitama kayone puwaitaiyo. Tigeba aogima abiyo. Tigebe igebe kaga Wa'egaripa mantabinti mintiye. Piya, aeba tabe agi wainta kinape uwa kinape kaga antota'ena imikiye.

Karaisitiba iregutene

¹⁰ Pigoya, ka kamana amato puma ukuwe: Tigeba Wa'egawamati atokaema esegi puma miyigina, agasiya esegiyenawapa pumaeritano. ¹¹ Piya, tigeba a'ya'ma Koti tamemi mpa'ena kairipa maema piyo. Piya pukibepa, tigeba kanara asima esegi puma, kewama nkago'enawapa aibasanakibewe. ¹² Eya, wasana ibimanapa kampa kamaenaba pune. Kampaye. Amani paitanta kina'mige, esegiyena pe kina'mige, mampabi tununtanara kabintemi kina'mige, a'ya'ma mantarasa agunta pe kina'migeba kamaba peno. ¹³ Piya puma, a'ya'ma ma'ena kairi Koti timemipa maema puma, agunta aborakibi ntogabá kanara asima esegi puma pi kina'migeba kamaena aogima pukibewe. Piya, nagarima asu igaikibeka ma'ena kairipa maema piyo.

¹⁴ Eya, tigeba asimagiri, tikapi tagantana maema amimagiri, arupuyenama nki'ana tibira atamagiri, ¹⁵ Koti nkaogi paru kamana uma aborawaimikena tigisa anapa maema pumagiri, ¹⁶ asi nasi timatiti'ena iregutipa maema arakaebiyo. Piya, kewamanta yaku tanta iriyamaba pi iregutipa ampa pagonkosa'nama tu'ma wakiye. ¹⁷ Koti tau'ikenenaarasa ma'ena taminoku'ena maema pumagiri, Awamus'aamanta paroya ntoginkapa maema uryo. Pi paroya ntoginkapa Koti kamanane. ¹⁸ Piya, asi nasi nunamuba yiyo. Awamus'aama nkabemintana aega'ma Kotiti esotama nunamu yiyo. A'ya'ma yagaba tiyogama tyekita pusanaga aogima kabima mimagiri, a'ya'ma Kotiti atokaeya kina'mikaba esotaiyo. ¹⁹ Tigeba naekegaba nunamu yiyo. Piya, Kotiba naekuruyenanepa

kasima nawamupa aerarayeka, ae aogi kakanti kamanapa uma aborakenaga naeka nunamu piyama yiyo.²⁰ Naeba aogi agoya kamana'wa ukena yagaranaga, naeba pika iga'nabipa mintuwe. Piyama nunamuba Kotiti unataigi, naekuruyenanepa kasimagi kamana'wapa uma aogima aborano.

Uma nagarikena kamanane

²¹ Pigoya, mikenaenanekabe pukenaenanekabe agowapa Tikikasiba urimikiye. Aeba tabugai tao'yagara, Wa'egawama nkawamu wasima kayokaya yagara, aeba naekaba a'ya'ma urimikiye.²² Pika naeba ataogana tigeti waye. Piya, taekaba ayama mintawema umagiri napiyyiyoma, tinta esegi puritakenaga tigeti waye.

²³ Pigoya, Koti tabage, Wa'ega Isu Karaisitige, isigebisa paruyenabe agu kao'enabe mono kina'mititi waiyekana, timatiti'enaba kaga aborarimeno.²⁴ Piya, a'ya'ma Wa'egare Isu Karaisiti kampa tikabitanta tibugai kina, tigeti awagaenawapa waima waiyeno. Poro piya isa kaentiye.

PIRIPAI KINA'MI NKISA PORO KAENTIYE

¹ Poronage Timotige, Karaisiti Isu kayokaya yagarara mimagira, tasigeba ma nkisapa kaeyuse. Piripai kumatasa pasitori kinape, tikeni kinape, a'ya'ma Karaisiti Isuti atokaeya kinape, tigeti ma nkisapa kaeyuse. ² Pigoya, tabarempa Koti, Wa'ega Isu Karaisiti, isigetisa awagaenabe paruyenabe tigeti waiyeno.

Poro iga'na namapi mpima pi kina'mika nunamu untiye

³ Pigoya, a'ya'ma tigeka napiyo ntagaba naeba Kotinempati na'mu potauwe. ⁴ A'ya'ma yaga tiyo'maeckenaga nunamu yopa, naeba na'muntanabisa nunamuba yuwe. ⁵ Tigeba marusa yaga kamana abima, taege ampa atokaemagiri, a'ya'ma yaga aogi kamana uwaimikena Yugara miyekaba, naeba na'mu puwe. ⁶ Piya, naeba ago abintuwé. Aogi yuga tigeti agobinti ntagara Koti, aebe tabubasanata iyaba'mima ainti Isu Karaisiti kanabi, pi ntugawama nkau'wapa aogima aborakiye. ⁷ Owe, naeba piyamaba a'ya'ma tigeka na'mu puritakenaenaba, pipa aogi piye. Piya, paipa mono kamana'ama nkagoba esegima aborauwagiri tigeba nao'maemagiri, awagaenawapa naege kaga maeyawe. Piya puma ibaba naeba iga'na namapi mintogiripa, tigeba awagaenawapa naege kaga maeyawe. Pika naeba nantabaipintiba tiraku'ma upebe puma na'mu puritakenaenaba aogi piye. ⁸ Piya, Koti abintegi, naeba taga kamana yuwe. Karaisiti Isu nkagu kao'enawampa tutusunatagina tigeka nabugaye.

⁹ Pigoya, naeba piyama nunamu yuwe: Tigeba aogi abikenaenabe uwaena napiyenabé maeyigina, agu kao'enarimpaba anosaurite wagana pikiyema, nunamu yuwe. ¹⁰ Piya, aogi napiyenabé maentiripa a'ya'maenaripa a'yigimpa, arupuyenagaba owe uma mikibewe. Piyama mikibepa, tigeba Karaisiti aborakibi ntagaba kampa i'ni kina miyigina, Koti nkaobipa kampa kamanatipa waikiye. ¹¹ Piya puma, arupuyenama nkau'wapa Isu Karaisititisa tigeti pumaeritakiri, Kotiti ti'mu potama ae ageba asagayukibewe.

Poro iga'na namapi mintogana mono kamana wagana puntiye

¹² We nao'mitaba, tigeba aogima abiyo: Naeti aboraintanamaba mono kamanapa kampa akuniye. Kampaye. Pipa uwa ao'maeerite waye. ¹³ Piya, naeba Karaisiti nkagega'eraka iga'na namapipa mintuwé. Pipa a'ya'ma kiya yagarama ntamatá kabiye irebu kina'miba a'ya'ma to kinape, igeba abintawé. ¹⁴ Piya, naeba iga'na namapi mintogini, pika uwaena mono kina'miba napima Wa'egawamatisa to esegiyenabé maema, iyekuruyenabé kasima, Koti kamanapa esegima uma aborawé.

¹⁵ Tagane, ka'isamiba nae nageba maete tumimagini igewai nkige maete ikenaga, Karaisiti kamana uma aborawé. Piya pegini, to ka'isamiba aogi napiyenawaitasa Karaisiti kamanapa uma aborawé. ¹⁶ We, ma mima mono kamana'ama nkagoba aboraoma unatantika, pi aogi kina'miba abima, agu kao'ena punatatura kamanapa uma aborawé. ¹⁷ Piya, to ka'isamiba kampa arupu puma igewai tabe igiga'e uma aboramagini Karaisiti kamanapa uma aborama, iga'nanepti to ka'isa kuntuyena punatakena pewe. ¹⁸ Pipa aerawane. Anagi'ena napiyewo, tagantana napiyewo, Karaisiti kamana'ama nkagoba uma aborakena peka na'mu puwe. Eya, na'mu puyaba'mima mikuwe.

Poro mikenaenawapa Karaisitit atokaekenaenawe

¹⁹ Pigoya, naeba ago abuwe. Tigeba nunamu uma nao'maeyakana, Isu Karaisiti nkawamusa'ama esegi punatakaná, ibaba aboranamemintanamaba kampa ataba punatama uwa nao'maekiye. ²⁰ Piya, to aboranamikibintanaga aobi puma kabima mimagi, ago napiyopa aintiba uwaenantoba kampa nanipa pukuwe. Kampaye. Naeba a'ya'ma yaga posa puma, aintiba kampa naekuru pekana, naogama misuwo, pu'wasuwo, nau'nempaba Karaisiti tabe agega'eba asagayukiye, napiyuwe. ²¹ Eya, naeba abuwe. Mikubopa, Karaisitit atokaekenaenaba mikenenaenane. Pu'wakubopa, aogiyenabé maekuwe. ²² Piya, naeba mampabi uwa mikubopa, yoganempaba a'wapa aekiye. Piya, pu'wasuwo, uwa misuwo, naeba ayabaya pukuwe. Naeba kampa abintuwé. ²³ Naeba pi taraenagaba aogi nanta paruwe. Pikaba naeba maba atate Karaisitige umisanaga nabiye. Pipa asugasaye. ²⁴ Pigoya naeba abopa, mampabi naeba mintapa, aogima tiyo'maeyakana kanarasakiye. ²⁵ Pika naeba esegima abibebe puwe. Naeba uwa mima tikapi yoga puma kanarasaritakiri, timatiti'enabe ti'muntanabe to kake aborakibewe. ²⁶ Piya, naeba to kake tigeti uma irosakuwe. Pika tigeba ti'mu punatama, Karaisiti Isu nkage asaga'yuyeno.

Monota esegima mpiyyiyo

²⁷ Pigoya, ke nasentanarimpaba arupu pekiri, Karaisiti nkaobi aogi kamanawapa aega'ma miyivo. Eya, kampa tigasubo, uma tigasubo, ka tintabarima misanaga nabibe: Tigeba kaga esegima mimagiri ka napiyena puma ankao'mae ankao'mae puma aogi kamanata imatiti pusanaga yogaba esegi puntiri,²⁸ kama kinatimpika tiyekuruba a-piyo. Pika abisanaga nabibe. Eya, kampa tiyekuru pentanaba pipa Kotitisa awame'enawe. Piya, pipa tigeti ima ige iyeguma kaikena awame'enawe.²⁹ Piya, Kotiba Karaisiti ntugaraka timatiti'ena potakenaena manapa kampa timiye. Kampaye. Aeba timatiti'enabe tikinakiyenabe kaga timima ae yugawa piyoma timiye.³⁰ Piya, paipa kunta yuganepa agantakiri, to ibaba pabiyamagiri nawaga kamanapa abewe. Pi ntuguba tigeba pabiyama kaga pewe.

2

Tao'mipa agu kao'ena puwaitaiyo

¹ We, tintabaipinti Karaisitisa esegiyenawapa maemagiri, agu kao'ena puma tutusurtagiri, Awamus'a amati atokaemagiri, to kina'mikaba agu kao'ena puma tintara'ena puwaitawé. Pintanaba kanarasayé. ² Piya pepa, tigeba ka tintabarimagiri, agu kao'ena kaga pumagiri, ka'masa puma mima, ka tintabarima miyivo. Tigeba piya pukibepa, na'muntananeempaba pumaewakiye. ³ Piya, tigeba tige'ena manakaba a-nlapimigiri, tipa a-mpaeti iyiyo. Pipa kampaye. Tigeba tipa maete tumima to kina'mikaba: Tagasawema, napiyivo. ⁴ Tige'enaena manatipa a-kabiyyio. Pipa kampaye. To kina'mintanarapeba kaga kabiwaitama iyo'maeiyio.

Karaisierti ntapiyenara aegaraiyo

⁵ Pigoya, Karaisierti Isu napiyisa puma, tigeba ka'masa puma napiyivo. ⁶ Napiyenawapa mayamawé: Piya, aeba Kotiraka'ya mintemipa, Kotige ka'masa puma mikenaenagába kampa antage'enaba puma ageba maete tumiye. ⁷ Aeba mikenaenawapa kaitegina, wasana aborama kayokaya kina'mi nkiyoga puntiye. ⁸ Piya puma aborama, aeba wasanarak'a'yantana puntiye. Piya puma ae'wa nkaupta maete tumima, Koti nkawamu wasirite wamagina purometa uma nagarintiye. Eya, awamu wasima maripo yara purintiye. ⁹ Pika Kotiba inata asitama, ae ageba a'ya'ma kina'mi nkigeba asu agasima to agi omintiye. ¹⁰ Pi nkagi omintipa, pipa a'ya'ma mantarisá kinape mabisa kinape mawama amentapintisa kinape, igéba kaga Isuti irakabima mima, ae agega'e uma asagayukibewe. ¹¹ Piyama a'ya'ma kina'mi nkiamupisaba: Isu Karaisiertiba Wa'egawe, ukibewe. Piya ukibepa Koti taba nkagega'eba asagayukibewe.

Tigeba wasanami nkikapi e'wasaena puwaitaiyo

¹² We, nabugai kina'mitaba, paipa tigeba a'ya'ma yaga nae nawamu wasintasa puma ibage pabiyama piyo. Pai mintanto ntaga abiwanane. Ibaba kampa tigege mintakubo nttagageba kakema tabera wasimagiri, tigeba tiyekuru puma tabaraba puma Koti ti'ikenenaena nkau'waka napima esegima aboraiyo. ¹³ Piya, ae a'muntanaga tibekiri, yoga pukibeka Koti tikapinti yoga puma tutusuritaye.

¹⁴ Piya, a'ya'maena puntiripa, a-tiyekita puma kamanapa a-nkakayuyiyo. ¹⁵ Tigeba pabiya pukibepa, parutu kina miyigina Koti nkaobi kamanatipa kampa waikiye. Piya puma mima, tigeba Koti ntagara kanta puma mima, kampa aogima napima antage pe kina'mi nkikapi mima, e kanta puma e'wasaba puwaitaiyo. ¹⁶ Eya, miyaba'enama kamanapa uwainimigiri e'wasa puwaitaiyo. Piya pigipa, Karaisierti kanabipa na'mu puma mayama napikuwe: Tigeba naeba uwa yugaba kampa puma esegiyenane puma kampa uwaba maebugasuwema, napima na'mu pukuwe.

¹⁷ We, timatiti'enari tabera puma Kotiti titipa muta atawe. Pigoya, naeguyingina korantepa tumima tige'enage kaga Kotiti muta atakiye. Pipa kanarane. Pika naeba nanta asoyaena puma tigege na'mu pukuwe. ¹⁸ Piyama, tigegeba tinta asoyaena puma naege kaga ta'mu peno.

Timoti kamanane

¹⁹ Pigoya, Wa'ega Isu abekana kanarasakapa, uwaena yaganto Timotipa otakana tigeti wakiye. Aeba wama tigategina to a'wae puma kanama tigekaba ampa un-amekana, nantawamaba a'muntanaba pikiye. ²⁰ Eya, Timoti aeba asi nasiba tigeba napima aumarasa esegi puritakena piye. To kapa ae kanta yagaraba naegeba kampa mintiye. ²¹ Piya, a'ya'ma to ka'isa kina'miba igewaintanara amana kabintini, Isu Karaisierti ntugarapa kampa aogima kabiyyewe. ²² Piya, Timoti aeba mono kamanataka, yagara abawampa ao'maeysa puma nao'maema yogaba piye. Pi nkagowapa tigeba abintawé. Aeba aogi yagarawé. ²³ Pigoya, naeba marupa naeti aboramintanaba ago agagaitegintema karu'ena aepa tigeti agarubakana wakiyema, napiyuwe. ²⁴ Piya,

naeba Wa'egawama ntapiyenaga nabegin, ke iremika naegeba aro ntaganto ampa tigasanagaba nabiye.

Epaparotaitasi kamanane

²⁵ Pigoya, nao'yagara Epaparotaitasiba, pai tigeba agarubauguna naeti kanama tigega'erapa nao'maenti ntagara, aeba naege ka yuga puma, kama kina'ne kanta yagara mintiye. Aepa ago agarubakana tigeti wanema napiyopa, to kipa kampaye. ²⁶ Piya, yoni nkabogiri awaga kamana abuguna tintara'ena abuma kunta piye. Piya puma, aseyonabisa uma tigakena piye. ²⁷ Tagane. Paipa aeba yoni nkabuma purikena pogana, Koti antara potama ao'maentiye. Piya, Kotiba ae abiwa antara potantyanan. Kampaye. Aeba naeke antarapa punatantine. Aeba tabe kuntuyenama nairarikaesananagaba kampa abogana nao'maentiye. ²⁸ Piyama nae nabugamika otakana wakiri, tigeba agama ti'mu pigina, kuntaenakeba maete tumenomawa. ²⁹ Piyama tigeba ti'mu puma Wa'egawama nkageraka aepa aba piyo. We, tigeba piya kina'mi nkigega'eba asagayuyiyo. ³⁰ Piya, aeba yogaripa naeti ampa aboramagina, aogama misanagaba aeba kampa napiye. Kampaye. Kampa napimagina, aeba Karaisiti ntugaraka purikena puntiye. We, piya kina'mi nkigeba asagayuyiyo.

3

Karaisititi imatiti pe'nagiba arupu kinane

¹ We nao'mitaba, naeba maya kamana uma a'ya pukena puwe: Tigeba Wa'egawamaka ti'mu piyo. Naeba to kakema kaema timikenaga kampa kuntaba nabegi esegi puritakena puwe.

² Pigoya, ata yuga pe kina'miba, igeba kabu kara kanta puma mima, wasanami nkipa kasama ara'enaba uwa puwaitawe. Pi kina'mikaba aogima kabima miyiyo. ³ We, Koti Nkwamus'a ama tao'maeyagi, Karaitsi Isu nkageba asagayuma tautepa kampa maete iyompe kina'mitaba, taeba taga ara'enawapa maeyune. ⁴ We, naegeba nau'nepa maete iyosinta, wasanami nkiyobi kanara maete iyosine. Piya, to ka'waina au maete iyekapa, naeba asugaikuwe. ⁵ Piya, naeba aborama mintuwagana, papa tonarentsa kakaga umaeyogana naupa kasanta, naeba Isureyo yagarawan. Naeba Penisameni pi tuntaw. Yuta kina'mi ma'natanta, Yuta ago yagarawan. Naeba Koti nkago kamana aegarao, Parasi yagarawan. ⁶ Naeba Koti ntuga puwema napima, asagarare puma Isu mponota ai'aru pume kinapa karana puwaitamagi, Yuta yagara aogima mintantuwe. Piya, mono ago kamana'ama nkarupuyenaraka naeti kamanapa kampa aborantine.

⁷ Pigoya, a'ya'ma pintanarasa tabe nagiba maentopa, pipa anagiyenaw. Karaitsititi atokaekenanama asugasayema abuwe. ⁸ We, a'ya'ma tonaba anagiyenawema napiyuwe. Piya, Wa'egane Karaitsi Isu ae agoba abibebe pukenaanab a'ya'ma tonamapa asugasay. Piya, aeka a'ya'maenanekekab i'nantawemna napimagi kaintepa. Eya, naeba Karaitsi nkaraku'ma uephe puma, ⁹ aeti atokaekenaga tabe naginepa kaintone. We, naeba ago kamanapa aega'ma arupu nagiba kampa maeyuve. Kampaye. Naeba Karaitsititi namatiti pogana, pi ntamatiti'enagaba Koti aewapa: Arupu yagaragaw, unataye. ¹⁰ We, naeba Karaitsi nkagoba aogima abibebe pukena puwe. Piya, ae asikena esegiyenawapa naeti aborasangan nabiye. Piya, ae auki nakiyena abuntisa puma naepa pabiyama nabeka, ae purinti nkagoba aogima abima ka'masa pusnaga nabiye. ¹¹ Piya, naeba purintapisa asima aota kina misanaga nabiye.

Poro esegima ntasima aogi antota'ena maekena puntiye

¹² Pigoya, naeba purintapisa asinti nke'was a kampa ago maema, kasa mima aota kina kanta naeba kampa puma mintuwe. Pipa kampaye. We, aota misanaga nabiye. Piya, Karaitsi Isuba naba puma: Nae'enawe, unantantika, naeba ae aobi aota kina abora misanaga esegima ntasuve. ¹³ We nao'mitaba, naeba piyamapa kampa aborauwe. Pigoya, naetiba ka napiyena waintiye: Piya, naeba pai putontanaba naka'i kaitegi, naeba ainti aborakibintanaga esegima karusuwe. ¹⁴ Piya, naeba kampa migarama esegima karusuma a'imaranta'enari wama, Karaitsi Isu nka'muntanawapa mantabinti maekena puwe. Pintanaraka Kotiba uta marantine.

¹⁵ Piya, aogima ntapiyena wainta kina'mitaba, pi aota ki'iba aegarano. We, tigepisa ka'waina to ka napiyena aborakibipa, Kotiba agowapa aogima urimima arupu puritakiye. ¹⁶ Piya, ka kita kanantompe, pabiyama wano.

¹⁷ We nao'mitaba, paitaritakiri nagamagiri nae posa piyo. Piya, tae miyompesa puma miye kinapa igama iyegaraiyo. ¹⁸ We, paipa uwoma ntagaba tigepa ka'isa kina'mikaba kamana urimima, to kake nao'n'u pagegi urimuwe. Piya, uwaena kinapa Karaitsi mparipowamapa kamaena potama mintaw. ¹⁹ Igeba i'ama ntapiyena aega'ma kotiwi

kantaba pewe. Igeba intintanawaimpa asagayuma i'mu pewe. Igeba mabisaenaga napiyewe. We, pi kina'miba purikena ki'i wawe.²⁰ Pigoya, manta ago kinatawe. Taeba kabintakana, Wa'ega Isu Karaisiti mantaba kaite tumpa tau'ima taba pukibika, agawa puma mintune.²¹ Piya, aeba pi ntagaba i'ninkamana tau'amaba ae'wa nkau'ama pisa puma a'wae puma kaga e'wasa pukiye. Aeba piyama a'ya'waemaena kabiratakena esegiyenarasa e'wasa puratakiye.

4

Ka'ena puma aogima ti'mu piyo

¹ We nao'mitaba, naeba agu kao'ena puritaogana, nagu'amaba tigeka abugaye. Tigeba na'muntana antota'enane mpintawewe. We, nabuga kinapa, tigeba piyama Wa'egawamati atokaema esegima miyiyo.

² Pigoya, Yuwotiyawa, Sintikiwa suma, tisigeba Wa'egawamati atokaema ka napiyena piso.³ We, ka yuga pome taga nao'yagaraba, naeba mayama ugamuwe: Kaeba pi tara wae taraba isiyo'maeyo. Isigeba naebe, Keremenibe, to ka'isa igewaipa miyaba isapi wainti kina'mibe, isigeba kabu puma mima mono kamana yugaba pese. Pi tara wae tara isiyo'maeyo.

⁴ Tigeba Wa'egawamati atokaema ti'mu puyaba miyiyo. Naeba to kakeba yuwe: Tigeba ti'mu piyo.⁵ Pigoya, Wa'ega aborakenaenamaba agarosaye. Tigeba paruyenena puma miyigina a'ya'ma kina'miba tigaiyo.⁶ Tigeba tonaronagaba a-tiyekuruba piyo. Pipa kampaye. Tigeba a'ya'maena pintanagaba Kotiti ti'mu puma nunamurasa esotaiyo.⁷ Piyama esotaiginaba, Karaisiti Isu ntugarasa Koti nkanta paruyenamaba tintarape napiyenaritape aogima kabikiye. Pi anta paruyenamaba a'ya'ma kina'mi ntapiyenabigaasaye.

⁸ We nao'mitaba, ma kamanapa piya uma nagarikena puwe: A'ya'ma tagantanabe, aogi napiyenabe, arupuyenabe, apuyapukenaenabe, tikaenabe, aogi agiga'e ukenaenabe, a'ya'maenama asugaikenenaenabe asagayukenaenabe waintika, piyaenagaba tigeba napiyivo.⁹ Piya, nae uriminto kamanapa abima aega'magiri, agonepa agama abewe. Pintanaba wasima miyiyo. Piya piginaba, agoya Koti tigebe mikiye.

Poro paenabisa Piripai kina'miti a'muntana imintiye

¹⁰ Pigoya, ibaba tigeba naeka to napiyenaripa aboragi, agama naeba Wa'egamatiba tabera na'mu puwe. Piya, tigeba asi nasiba naekaba napintapa, nao'maekena kitipa kampa waintantiye.¹¹ We, naeba ka'isaenaga kusi puwe, piyaba kampa yuwe. Pipa kampaye. Naeba mayama ago abuwewe: Tonarona naeti aboragina, nantawamaba Kotiti paru pegina a'ya'maenaba kanara piye.¹² Piya, nagenepa kampa asagayukibepa, kanarane. Asagayukibepa, pipa kanarane. Piya, naga'ena nabukenaenabe naga'e pakenaenabe, uwaenaena maekenaenabe i'mikenaenabe, a'ya'ma yagaba a'ya'ma auka'iba, naeba Koti paruyenabi mikenaenama nkagoba agantuwe.¹³ Eya, esegi punatami ntugaramaba esegi punatagi, a'ya'maenaba aogi puma miyuwe.

¹⁴ Pigoya, tigeba kanara kayone punatama, kuntaenanepta aesagabewe.¹⁵ Piripai kina'mitaba, tigeri piyama abewe: Paipa naeba agobima aogi kamanapa tigeti aboramagi, Masetoniya maba atate kanauwagana, pi nttagaba to ka'isa monota ai'aru pe kina'miba kampa naeti atokaema, ankami ankamienabaga kampa puntane. Kampaye. Tigemana piya puntane.¹⁶ Eya, naeba Tesaronaika mintuwagiripa tigeba ka yaga yabatitasa nao'maemagiri, ti kakema aintiba nao'maentawewe.¹⁷ We, nao'maekibentanagaba kampa kega'eba yuwe. Kampaye. Nae nabemika monotipa au'wa aborakanabaga tigega'e waiyenema yuwe.¹⁸ We, ibaba uwomantana namiwaema namegana pumaewaye. Piya, tigeba ti'muntanabaa atagana Epaparotaitasi nkayata kanagi maeyuwe. Pi ti'muntanabaa Kotiti muta atagana, aogi aguntaenaba Koti pigama a'mu pegina antawamaba kanara piye.¹⁹ Pigoya, Kotinempati a'ya'ma aogiyenabaga pumaema waintika, tigeti a'ya'maema kampa waintintanabaa aeba Karaisiti Isu ntugarasa aboramikiye.²⁰ We, tae tabarempa Koti, ae atega'eba asagayuyaba miyeno. Tagane.

To ka'isa kamanane

²¹ Pigoya, a'ya'ma Karaisiti Isuti atokaeya kina'mikaba, Poroba: Aya pewe iyema, uwaimiyo. Piya, mono kina naege miye kina'miba kaga: Aya pewe, yewe.²² A'ya'ma Kotiti atokaeya kina'miba: Aya pewe, yewe. We, Sisa ntamapi yoga pe mono kina'mi esegima: Aya pewe, yewe.

²³ Pigoya, Wa'ega Isu Karaisiti nkawagaenama tintabaaipi waima waiyeno. Poro piya isa kaentiye.

KOROSI KINA'MI NKISA PORO KAENTIYE

¹ Nae Porona: Karaisiti Isu nkaposorogawe, Koti abogana unatantemine. Piya, naene tao'yagara Timotibe mimagira, ² Korosi kumatasa Kotiti atokaema Karaisiti nkawamu wasiye kina, ma nkisapa tigeti kaeyuse. Tabarempa Koti aetisa awagaenabe paruyenabe tigeti waiyeno.

Korosi kina Koti aegarantawe

³ Tigecka nunamu yome ntaga, Wa'ega Isu Karaisiti ae aba Kotiti tasi'mu potause. ⁴⁻⁵ Piya, mantabinti asu mikenaga puritanti, pika tigeba Karaisiti Isuti timatiti pumagiri, a'ya'ma Kotiti atokaenta kinapa agu kao'ena puwaitawe. Pi nkawaga kamanatipa ago abuse. Tigeba aogi taga mono kamanapa pa'i urimogiri, pi mantabinti asu mikenaga abima agawa puntawe. ⁶ Pi aogi kamana a'ya'ma kina'miti kanama, a'wa aborama anosamagina, tigeti pabiyaena aboraye. Piya, Kotitisaga taga awagaenabe kamana maru abinta ntaga, tigeti wairite kanama ampa tabe piye. ⁷ Pi aogi kamanapa tasibugai tasiyi yagara Epaparasi urimintiye. Aeba Karaisiti nkawamu wasima kayokaya yagara, ka yugare puma kabiritaminne. ⁸ Piya, tigeba agu kao'enaba Aota Awamusatasa aboragana, urasimegira Kotiti tasi'mu potause.

Mono a'wa aborakenaga nunamu untiye

⁹ Piya pegira, tasigeba abintome ntaga kampa tigasima, agobima tigecka mayama nunamu yuse: Awamus'ama napiyenaripe abikenaenaripe timekana anosama tabe pukiye. Piya pekiri inatisa abemintana abibebe pukibeka, nunamu yuse. ¹⁰ Piya, Wa'egawama aogi puritakiri, mikenaenarimpaa nkagowapa uma arakana tigakana kanarasakiye. Piya pumagiri, mono yuga pigina, a'wapa aborakiri Koti nkagowapa abibebe pigina anosakiye. ¹¹ Piya aogi esegiyenawataso tabera esegi puritakiri, asima a'ya'ma kuntuyenaripa aisaga'ma, tintawama kampa pam i pumagiri, ¹² tabarempati ti'mu potama, tikaenabi mikibeka nunamu yuse. Piya, tabarempa utaratama, e'wasaenabi Kotiti atokaenta kinake kaga mikenaga tababuntiye. ¹³ Aeba tununtanama nke-segiyenabisa a'yobatatama, yagarawampa kabiratakenabi tababuratantiye. Pi abugai ntagarawapa ¹⁴ ago ika puratama aguntaenarepa asu'a pugasakiri, aogima mikibeka nunamu yuse.

Karaisiti ntugawane

¹⁵ Pigoya, kampa agaompe Kotipa yagarawampa ae aoga aboraye. A'ya'waemaena Koti pumarantemi, paitama ai'ne aewe. ¹⁶ Piya, Koti otaogana, aeba mantabinti waintintanabe mabi waintintanabe, pi agaompentanabe kampa agaompentanabe, pi a'ya'waemaena ae aborantiye. Pabi amani kina'mi wa'ega kinape, kamana ukena kinape, paitanta kinape, kabikena kinape, ae'wantana aborama asu igasima mintiye. ¹⁷ Aeba a'ya'waemaenamapa paitama mintegini, a'ya'waemaena ae esegiyenarasa marunkaipta mirite kanama mintawe. ¹⁸ Piya, monota ai'aru pe kina'mi au'wa mintokana, aeba ai'nerene. Aeba agorepa mintana, ae agobima purintapisa asima, paitaratama a'ya'maenaba aeba asuragasima mintiye. ¹⁹ Piya, Kotiba ae abemika, a'ya'ma aumawapa pi ntagarawampati pumaemaa amintiye. ²⁰ Piya, yagarawampa ntugarasa a'ya'ma marasabe mantarasabe, Koti aewati kaga asaeratama, maripo kurankatasu paruyenabe aborama, piya puratantiye.

²¹ Paipa tigeba Koti tika'intaesi potama, napiyenarimpaba kama potama aguntaena puma mintantawe. ²² Piya puma mintuguna, Karaisiti pu'magina, au'watasa Kotike asaema ka kina'ena puritantiye. Piya, tigeba aota mima, aobipa ataena kampa puma, kamana kampa uritakibi kina mikibeka, tibabuma Koti nkaobi mutatitakena piye. ²³ Pigoya, a'yugu ka'enama tibaibekiri, aogi kamanati atokaenta'ena kaisanaga, tigeba timatiti'endaripa aebebe puma, kibasa atama, esegi puma miyivo. Piya mikibeka, Koti nkaobi mutatitakiye. Pi aogi kamana mampabisa a'ya'ma waya'wa mite aborantine. Pi kamana kayokaya yagara Porona mintuwé.

Poro au'watasa mono kina iyo'maentiye

²⁴ Pigoya, nauki nakiyenabisa kuntaenaripa aesaga'ma tiyo'maeyoka na'mu puwe. Piya, Karaisiti auki nakiyena aboramintanaba ka'isa naeba ae auka aesagabuwé. Pi nkaupa monota ai'aru pe kinane. ²⁵ Pi aegara kina tigeti Koti kamana maema aborawaeyoma unatantegi, tige kayokaya yagara mima piya puwe. ²⁶ Piya, Koti kamana agowapa pa'i a'ya'ma yaga kakama waintanti, Kotiti atokaenta kina'miti ibaba aboraye. ²⁷ Piya, Koti ae abemika, ae aokina'miti kakanta kamana agoba aborawaiye. Pi aogi e'wasa kamanapa

to marisa kina'mitibe kaga aborawaimiye. Pi kakanta kamana'ama nkagoba mayama waintiye: Karaisiti tigupi mintika e'wasa kumati asu mikibewe.²⁸ Pigoya, Karaisiti nkagoba uma aborama a'ya'ma kina'miti uwaimima, obisuma, igu aogantasikena kamana a'ya'ma kina uwaimune. Piya, a'ya'ma kina Karaisiti nkau'wantana pigina Kotiti ibabusangan nabiye.²⁹ Pika agasiyaena popa, tabe esegiyenawataso asinatagi, piya puwe.

2

Isu nkaega'ma wasanami kumpari'enaba kasiyo

¹ Naeba urimekiri abiyo. Tigege, Areyotisiya kumatasa kinape, nae naowara kampa aga kinape, tige tiyo'maekena nunamu agasiyama yuwe.² Piya, tigutasa maema agu kao'ena puma atokaema esegi piyo. Piya puma, tigeba aogi napiyenabaa maema, Koti kakanta kamana'ama nkagowapa Karaisiti napima, tagantanaba abibebe puma abiyoma, pika nunamu yuwe.³ Pigoya, a'ya'ma aogi abikenaenabe napikenenaenabe Karaisiti kakantanabi pumaeyagina, taeti ago aboray.

⁴ Piya, ka'waina iga kamanatasa kumpari urigasima tige kaka'isanaga, ma kamanapa yuwe.⁵ Pigoya, naeba naupa pagasara mima, nagutasa tigege miyuwe. Piya, tigeba kaga arabama, Karaisiti esegima aegaraga, tigaogana nantawama kanara piye.

Isuti wama e'wasaena maekune

⁶ Pigoya, tigeba Karaisiti Isu aega'ma: Wa'egarene, otantawe. Pabiya puma ae aguta nasiyo.⁷ Tibupa aeti uma aema, ubu'ma esegi pumagiri, urimintana napima timatit'enaba esegi piyo. Piya puma Kotiti tabera ti'mu potaiyo.

⁸ Pigoya, tigeba aogima kabiyiyo. A'yugu ka'waina wasanami ntapiyenabisa esiba kamana'ama iga puritamagina, tigupa maerite wagasanaga, tiyota tiyota piyo. Pi'naba ayabamagi kamanapisabe amani kina'mi kamanapisabe iye. Pipa Karaisiti kamana'nane. Mampabisa kamanane.

⁹ Tigeba ago abintawé. Koti nkagoba Karaisiti nkautasa aborawaeye.¹⁰ Piya, aeba a'ya'maena paitanta'enamape esegiyenamape ai'newane. Aeti atokaentaka e'wasaenaba pumaeritaye.¹¹ Tigeba tiyatasa auta ara'ena pikenaenawanane. Ariritasenaba mae-gasima, Karaisiti tigupi ara'ena puritaye.¹² Piya puma, mono wani paititama, ae purintapi kaga kairintawé. Pigoya, Koti aeba esegiyenawataso Karaisiti purintapisa asintiye. Pabiya, pi nkesegiyenawaka timatiti puguna, kaga asima atokaeritantiye.¹³ Paipa tigeba ti kasama ara'enaba kampa punta, aibo'ena puma pu'wanta kina kanta mintantawé. Mintiri, timatiti puguna Kotiba a'ya'ma aibo'enaripa asu'a purigasima, Karaisitike kaga asiritama e'wasaenawapa timintiye.¹⁴ Piya, agunta puwakana, paisa ago kamanapa esegi puma, kamana uratama tapirintakena puntiye. Piya pogana, pi paisaenaba Karaisiti ntugarasa maripo yara ita'atama kaintiye.¹⁵ Piya puma, amani kina'mi wa'ega kinape kamana ukena kinape, ige esegiyenawaipa a'ya'ma kina'mi nkiyobi mae igasimagina, maripora agowapa aogima aborantegi agaune.

Karaositige pu'wantaka uwa napiyenaba a'nkaegaraiyo

¹⁶ Tigeba Isu aegarawé. Pigoya, tabe yagabe, kasa utape, sabatirano aki puma mikenabe, ka'isa naninta wani nakenabe, pikaba ka'waina uwa kamana tipi mpa'ma yekiripa: Kumparina, kaso, omiyo.¹⁷ Pintana amankane. Ae aki'i au'wapa, Karaisiti, ago aborantie.¹⁸ Piya, ka'waina: Naeba kasa'enaba agaopa, tabe yagararanawe yemi'naba, kamana uritakiripa, kumparina, a-nkabiy. Pi ntagaraba: Tipa maete tumima, enisore kina aegaraiyo, iye. Pi ntagara ae'wa nkau maema amantana puma tabe piye. A-nkuwa ataigina piyaba peno.¹⁹ Pi ntagara Karaisititi kampa atokaeye. Karaisiti aeba ai'nerene. Aegaraompe kina taeba au'wane. Piya, aga'nabe agisa aya nkaope amato puratama atokaeye. Piya puma, mono naninta tamima Koti nkesegiyenawataso i'ma anosarataye.

²⁰ Tigeba Karaositige kaga pu'wama, mabisenaenaba tika'intaesi puntawé. Nanaga mabisna nasisuba pewe. Nanaga pi kamana amentantiba miyewe.²¹ Pi kamanapa mayamawé: Ma nanintaba a-mpaeyo. Pipa a-ntao. Maropa a-nkaigayabo.²² We, nanintaba uwa nagaikenaenawé. A-ntao kamanapa wasanama ntapiyenawé.²³ Pi kamanakaba, monotapa esegi puma, tanta a'wa puratama, tau'amapa aeguma arupu puma, wasanami nkiyobi aogi piye. Piya, akumpa'ma mintintanama wasanami nkiyobipa uwa aogi pegina, pi'naba ata napiyenarempa kampa aogi pumagina, tagupa kampa tao'maeye. Piya, wasanami ntapiyenaba a'nkaegaraiyo.

3

Inati waintintana pika ti'mu potaiyo

¹ Pigoya, Kotiba Karaisiti asitaogana, inati ayatakanti mintiye. Piya, aege kaga asiritami kina tige inatasaenaga napiyiyo. ² Mampabisaenagaba a-ntapimagiri, inatasaenaga napiyiyo. ³ Tigeba purinta kina kanta puma miye kina'mitaba, mampabisaenagaba a-ntapiyiyo. Piya, mikenaenari Karaisitige Kotiti kakama waintiye. ⁴ Piya, Karaisiti aeba mikenaenarempa nkagowe. Ae aborakibi ntaga tigege kaga e'wasaenawatapa aborakibewe. Piyama inatasaenaga napiyiyo.

Paisaena kasiyo

⁵ Pigoya, asiratami kina mintiri, mampabisaenaripa kaigasiyo. Piya, kumiyenaba a-piyo. Kumiyenagaba a-ntapiyiyo. Tigu i'nintanaripa kasiyo. Ataaenaga tintabinti pamipeda kasiyo. To wainantanagaba a-ntapimagiri wa'egari kantaba a-piyo. ⁶ Piya, piya pe kinapa Koti amo'enaba imikiye. ⁷ Paipa tigeba mampabisaena aega'ma piya puntawe. Piya, ibaba kaigasiyo.

⁸ Ibaba ataenaripa asarosuma kasiyo. Piya, timo'enabe, kabirakenaenabe, ata puwaitakenaenabe, akaya kamanatipe, tiwamupisa i'ni kamanatipe, asarosuma kasiyo. ⁹ Piya, tiga'nagipa kumpari kamanapa a-nkuwaigasiyo. Tigeba paisa timawama ntugaba ago kaitegiri, ¹⁰ tigeba kasa kina aborama mintawe. Mintagana, kasa aborariti ntagara, Koti, asi nasi napiyenabu kasa timima, ae'wa aoga kina pabiyyama aboraritama mintiye. ¹¹ Piya ae aobi Yuta kinape to kinape pako pikena ara'enaba kampa waintiye. I kasanta kinape kampa kasanta kinape pako pikena ara'enaba kampa waintiye. Namu'isa kinape, kabu kinape, kayokaya kinape, uwa kinape, Koti nkaobi pako pikena ara'enaba kampa waintiye. Karaisiti aeba a'ya'waemaenama nkagoba ka mima, a'ya'ma aokina'mi nkigupi aborama miye.

Tinta paruyenabi miyiyo

¹² Pigoya, Koti utaritanti kina, aota tibabuma agu kao'ena puritantiye. Piya puritanika ka'masa puma, wasana iyo'maema, tipa mara maete tumima, agoya puwaitaiyo. Wasanami ata puritaigiripa uwa ataiyo. ¹³ Tigetipa a-mpaete ima tiyo kabiwaitaiyo. Abakatipi kamana aborakiripa timo'enaba ataiyo. Wa'egawama antota'enaripa asu'a purigaintika, tigeba a'wae puma to kina'mipa pabiyya puwaitaiyo. ¹⁴ Pigoya, agu kao'ena maema miyiginaba a'ya'waemaenaba asu igasano. Piya pukibepa ka kina'ena puma mikibewe. ¹⁵ Piya, Karaisiti paruyenawampa tigupi pumaeyakan kabiritanu. Ka ti'ena puma mikibeka tibabuntine. Pika ti'mu potaiyo. ¹⁶ Pigoya, kamana aogima napima, toma toma uwaimima ankomi ankomi puma miyiyo. Paisa mono inibe, ibasa inibe, kasa inibe, Kotiti umagiri, tigupinti ti'mu potaiyo. Piya pigina, Karaisiti kamana'ama tintabaipinti pumaewama aogi napiyena timeno. ¹⁷ Piya, tiwamupisa ukenaenabe, tiyatasa pukenaenabe, Wa'ega Isuti napima a'ya'maenaba ae pemisa puma, pi ntugaba puma, aega'ewataka tabarempa Kotipa ti'mu potaiyo.

Wa'egawama nkaobi aogima miyiyo

¹⁸ Wayapa, tigeba tiwaegi kamana wasima miyiyo. Piya pigina, Wa'egawama nkaobi kanara pikkiye.

¹⁹ Waba, tigeba wayatipa agu kao'ena puwaitama, intawaipa ataba a-puwaitaiyo.

²⁰ Araga yagara, tigeba tinogi tibagi kamana abima a'ya'maenaba wasima miyiyo. Piya pigina, Wa'egawama abekanabu kanarasakiye.

²¹ Ibagitaba, araga yagararipa imo'ena pusanaga, asi nasi tigobipa a-puwaitaiyo.

²² Kayokaya, tigeba mabisa tabe kinatimpi nkiwamupisa kamanapa a'ya'ma wasiyiyo. Ayugu sepena puma wasanami nkiyora tabe yuga pusanaga, Wa'egawamatii paruyenena puma, ae aobi arupu puma mima, tabe kinatimpi ntuga aogi piyo. ²³ Piya, a'ya'waema yuga puma wasanamiti wanane. Tigeba ti'mu puma Wa'egawamatii aogi pigina, ²⁴ Wa'egawama utaritanti nke'wasa antota timikiye. Pipa tigeba ago abintawé. Tigeba Wa'ega Karaisiti, ae kayokaya mintawe. Pika napiyiyo. ²⁵ Piya, Koti aeba ataena pikibe kina, tabe agi wainta kinape, kaga antota'ena imikiye.

4

¹ Tabé kina'mitaba, kayokaya kinatipa arupuyena puma aogi puwaitaiyo. Pabiyyama tabe yagararipa mantari mintemika, napima aogi puwaitaiyo.

Nunamu uma arupu ki'i waiyo

² Tigeba asi nasi nunamu uma, a-tyiekita pumagiri Kotiti ti'mu potaiyo. ³ Pigoya, taekega nunamu yiyo. Yigina, Kotiba mono kipa tayakeka, Karaisititisa pi kakanti kamana uma aborakune. Pi kamanataka iga'nabi nataugu miyuwe. ⁴ Piya, Koti yogawa namegi, ae'wa kamanapa aogima uma aboraoka, nunamu yiyo.

⁵ Pigoya, a'ya'ma yagaba a-tiyekita puma, kamana kampa abinta kina'mi nkiyobi asi nasi arupu puma miyijo. ⁶ A'ya'ma antota kamana a'wae puma aogima uwaimikibeka, a'ya'ma yagaba kamanatipa kayo asigi yigina, iga peno.

Tikikasige Onisimasige kamana maete wantase

⁷ Pigoya, Tikikasi kamana'nepa urimikiye. Aeba tabugai tao'yagara mima, ka yugare piye. Aeba Wa'egawamati kayokaya'ena puma awamu aogima wasiye. ⁸ Tae mikenaenarempa urimima, tige tigu esegi puritanema, tigeti otaogana waye. ⁹ Piya, aogi taga'naba Onisimasigi, tige kumatasa yagara, monopa aogima wasiyemika, otaogana Tikikasige wase. Isigeba mata'i aboramintanagaba urimiwaekibese.

Korosi kina'miti Poro: Aya pewe, untiye

¹⁰ Arisitakasi, aeba naege iga'na punti ntagararamaba: Aya pewe, iye. Maka, aeba Panabasi nkababa, aegeba: Aya pewe, iye. Aeka pi kamanapa abimagiri, tigeti kanakiripa abiyo. ¹¹ Isu Yasitasi aegeba: Aya pewe, iye. Pigoya, Koti kabiratakenaga unti ntugarapa ka'isa kina nao'maeyawewe. Piya, pi kakaga igeba ibinto Yuta kinane. Igeba nao'maegawe.

¹² Pigoya, tige kumatasa yagara Epaparasi, aegeba: Aya pewe, iye. Aeba Karaisiti Isu kayokaya yagara mimagina, tigeka asi nasi nunamuwatasa esegi puritaye. Koti nkabemintanara asima aebebe puma abiyma, tigeka nunamu iye. ¹³ Naeba agowapa agantuwe. Aeba tigebe, Areyotisiya kumatasa kinape, Iraporisi kumatasa kinape, tigekaba mono yuga agasiyama pegi agauwe. ¹⁴ Aruku aeba tabugai tusa yagarabe, Timasibe isigeba: Aya pewe, yese.

¹⁵ Pigoya, Areyotisiya kumatasa mono kinape, Nimpage, ae namapi monota ai'aru pe kinape, igekaza: Poro, aya pewe iyema, uwaimiyo. ¹⁶ Pigoya, tigeba ma nkisapa aisuma abigaitiba, ataigina Areyotisiya kumatasa monota ai'aru pe kina'miti wano. Areyotisiya kina'mi nkisake kayogana wamipa, maema aisuma abiyo. ¹⁷ Pigoya, Akipasipa maya omiyo: Wa'egawama ugatanti mono yuga puma aogima a'aiyoma, omiyo.

¹⁸ Naeba Poronawe. Naeba: Aya pewema, nae'ne ntayapisa kaeyuwe. Iga'nabi miyoka, naeka napi napi piyo.

Awagaena tigeti waima waiyeno.
Poro piya isa kaentiye.

TESARONAIKA KINA'MI NKISA PORO KAENTIYE (KA YAGANE)

¹ Poronawa, Sairasiwa, Timotiwa, sumagita esa kaeyune. Tesaronaika kumata monota ai'aru pe kina, tabarempa Koti, Wa'ega Isu Karaisiti, isigeti atokaenta kina, tigeti ma nkisapa kaeyune.

Awagaenabe paruyenabe tigeti waima waiyeno.

Igeba aega'ma arupu puma mintantawe

² Asi nasi tigeka Kotipa ta'mu potama, a'ya'ma yaga nunamu yompepa, tigekega esuritaune. ³ Piya, timatiti'enaritaka au'wapa aboraye. Agu kao'enarika esegi yuga pewe. Wa'egare Isu Karaisititi atokaekenaga napima agasiyaena puma miyewe. Pika tabarempa Koti ae aobi napima esuritama ta'mu potaune. ⁴ Tao'mitaba, tigekaba Koti agu kao'ena puritama utaritagi agaune.

⁵ Piya, aogi kamana tigeti maete kanaompepa, uwa kamanapa kampaye. Pipa aogima abompe kamanapa Aota Awamus'a'ama esegima urimogiri, a'wae puma aegarantawé. Ti tikapi tiyo'maeyompe agowapa tige ago abintawé.

⁶ Piya, tae taega'magiri Wa'egamape kaga aegarantawé. Tigeba Kotitisa kamana maeyuguna, uwaena tiki nakiyena tigeti aboraogana, Aota Awamus'a'ama asiritaogiri aeka ti'mu puntawé. ⁷⁻⁸ Piyama tigeba mintume'nagiba, tige agoripa aogima agantawé. Piya, tigetisa Wa'egawama kamana'ama kanarasama, Masetonyia maribe Akaiya maribe aboraogini abintawé. Ibintowaipa kampaye. Kotiti timatiti pe kamanapa a'ya'ma marisaba abewe. Igeba agoripa ago abintaka, to urimikenaenaba kampaye. ⁹ Pi ntuga pokana, aboramintanagaba igewai uramewe. Taeba tigeti kanauwakiri, ama kotintana pumaranta'ena tikabitategiri a'wae puma Kotiti kanamagiri, pi taga miyaba Koti kayokaya kina'wa aborama mintantawé. ¹⁰ Piya puma, yagarawa Isu purintapisa asitanategina, mantarisu tumikibintanaga agawa puma mintawé, uramewe. Pi Isu, aeba Koti nkamo'enawa maete tumikibemita, tumpa a'yigitatamagina tababikiye.

2

Poro mayama Tesaronaika kumata mono yuga puntiye

¹ Tao'mitaba, tigeti irosa'ma yoga puwakaná, au'wantaga'ena aborawaeyogiri tigeri ago agantawé. ² Piya, Piripai kumata marupa aerari kaeratama, tauki nakiyena purataumepa ago agantawé. Pipa aerawane. Kotirempatisa to esegiyena maema, kumatiti wasanami to tabera ata puratakaba kampa taekuruba puma, Kotitisa aogi mono kamana uma aborarimintune. ³ Taeba kamana urimoppepa, pipa aibo kamanapa kampa urimima, i'nintanabe ago'enabe kampa puritaune. ⁴ Kampaye. Kotiba tagagina kanarasagi, aogi kamana'wapa yune. Wasanami nkiyobinané. Koti tagu agakenama, ae aobi abekana kanarasananoma ka yune. ⁵ Tigeba abintawé. Tigebingkaobi kamanapa kampa urimintune. Pipa kampaye. Kotiba tagantoga, pi ntugaba puma abugakenaenagaba ka kampa ampa puntompene. ⁶ Taeba pi ntuga puma, wasanami tabe igi maekenaba pipa tigetisaba kampaye. To kina'mitisabe kampaye. Taeba Karaisiti nkaposoro mama, piya puma taeba tabe pukerenaba kanarane. ⁷ Piya, taeba paipa tigege pasema mama, mayama waya'ma yagarawa aogima kabiyisa puma, tigege mintantompene. ⁸ Piya, Koti nkaogi kamana urimikena, abiba kampaye. Tae taguke kaga aborarimikena yune. Pipa nanagawe. Taeba tigekaba tabugagi, tagutepa timiwaema timune.

⁹ Tao'mitaba, tigetiba araga ntuga puntompepa, ago tagantawé. Piya, nanintaripe arisarontanaripe paibukenaenaba kampaye. Taeba arape asenabipe agasiya yuga puma, Kotitisa aogi kamana uwa urimintompene.

¹⁰ Tigeba ago tagantagana, Kotigeba ago tagantiye. Taeba Isu nkaegaranta kina'miti abakatipi mimagi, aota parutu puma mama, Koti nkaobi kampa kamanate abakatipi miyuwakiri tagantawé. ¹¹ Piya, abawampa yagarawa kabiyisa puma, pabiyma taeba tiyo'maema, ka ka asiritala, tigu ti'amapa uma esegi puritama urimuwalakiri abintawé. ¹² Piya, tigeba Koti kabiratakena e'wasaenawapi ago utaritamika, ae aobi aogima nasiyo. Pika uma esegi puritama urimintompene.

Mono abintini maya puntawé

¹³ Pigoya, Koti kamana urimuwalakira abimagiri, wasanami kamana abisuba kampa puntawé. Pipa taga Koti kamananema abintawé. Piya puguna, pi kamana'amaba aegaranta kina'miti tigupipa esegi puntemine. Pika asi nasi Kotiti ta'mu potaune. ¹⁴ We,

tao'mitaba, Yutiya marisa Koti mponota ai'aru pume kina'mi Karaisiti Isuti atokaeyuguni, iyokina'mi iyeguntawé. Iyeguntasa puma, tigepe tiyokina'mi tiyeguntawé.¹⁵ Pi Yuta kina'mi poropete kinapa iyeguta iyeguta iyuguna, Wa'ega Isu ampa aboraogini aeguma kaintawé. Kaitamagini taekeba tagarubakasima, Koti nkabugaomentanamapa kama tu'atama, a'ya'waema kinapa akunkitantawé.¹⁶ Piya, taeka: To marisa kina uwaimigina, i'ima aogi pusanaga, akutatakena puntawé. Piyama aguntaenawaipa maema anosama ago tabe puntaka, Koti nkamo'enawampa igeti ankwaitiye.

Poro to kake igasanaga abuntye

¹⁷ We, tao'mitaba, tagarubaugu wauwakana, tagu taumawamaba tigeti waintantiye. Piya poga, taeba arontaganto to au'i mima kampa tigamagi, kinta yagara kanta puma mimagi, esegima ke ku'ena puma, tige tiyowarapa tigakenaga puntune. Pipa kampaye.¹⁸ Piyamagi, taeba uma tigakena puntune. Naeba Porona, uwoma ntaga tigeti wakena pugate atauwe. Pipa kampaye. Sataniba ke akutagasaye.¹⁹ Pigoya, ainti Wa'egare Isu tumikibi ntaga, nanaraka ae aobi asikune. Nanaraka tantawama aogi peka, ta'mupa pukune. Pipa tigerine.²⁰ Eya, pabi ntaga aege mikibeka e'wasaenarepa ta'muntanawé.

3

Igeti esegi puwaitanema Timotipa agarubantiye

¹ Pigoya, uwasuwa puma misanagaba kampa tabuma, tige tigasanaga tabugama, napiyenarempa kanara poga, tasibinto Atenisi kumata mima,²⁻³ tao'yagara Timoti otauwagana, tasitate tigeti wantiye. Aeba Koti kayokaya'ena puma, Karaisiti impono yuga pemi nitgarawé. Piya, a'yugu ka'isa tigetisa kina'mi iki naki puma iyekuru pusanaga, aepa otauwagana, tiyo'maema timatit'ena tonkiya puritanema wantiye. Tigeba ago agantawé. Pi tauki nakiyenaga taeke utaratantiye.⁴ Eya, pai tigege mima taeba maya urimintompene: Aintiba tauki nakiyenaba maekunema, urimintompekan, pigo taeti aboragiri agawe.⁵ Piya pemika, uwasuwa puma misanagaba kampa naboga, timatiti agori abenema, Timoti otauwagana tigeti wantiye. A'yugu amiyo puritakena yagarama ampa tigekara iyekiri, araga yogare kaisanaga antuwe.

Timoti iwaga kamana omogana Poro a'mu puntiye

⁶ Pigoya, Timoti titate a'wae puma taeti ibanto kanamagina, timatit'ena agu kao'enarikabeba aogi awaga kamanati ampa yegi abune. Tige tiganema yokiri, pabiyama tae tagakena pumagiri, taeka asi nasi napiyewema, yegi abune.⁷ We, tao'mitaba, tigeba aogi timatiti puma abeka taeba ago abune. Pi'n'a esegi puratagi, tauki naki puma taekuruyena pompe'napa asugasune.⁸ Piyama, Wa'egawamatni esegima atokaemai miyigipa, abima ta'muntanabi mikune.⁹ Taeba tigekaba Kotirempa nkaobi tabera ta'mu puritaune. Pi ta'muntanaba Kotiba pumaeyanoma tamemikawe.¹⁰ Piya, arape asenabipe taeba esegima nunamu yompepa, tigeti wama tiyowara agakena puma timatit'ena arosasanaga, pumaema esegi puritanema yune.

Koti esegi puwaitanema Poro nunamu untye

¹¹ Pigoya, tabarempa Koti aewake, Wa'ega Isuge, isigewaisi kepa tayakisigi, tigeti wanema, yune.¹² Pigoya, Wa'egawama agu kao'ena puritaomesa puma, tigeba tiyokina'mitibe a'ya'ma kina'mitibe pabiyama puwaitaiyo.¹³ Piya puwaitaigin, Wa'egawama tigu esegi puritanema yune. Piya puritakiri, aintiba Wa'ega Isurempa Kotiti atokaenta kina'wake tumikibi ntagaba, tigeba tabarempa Koti nkaobi kamana kampa utaritakiri aota mikibewe. Pika nunamu yune.

4

Piya ki nasisanaga Kotiba abiye

¹ Pabigoya, tao'mitaba, tigekaba esuritama esegi kamana urimekiri, Wa'ega Isuka napima abiyo: Tiyakompentana Koti ntapiyenara aega'ma aogima nasiyo. Piya pesa puma, amato puma aogima miyivo.

² Tigeba ago abintawé. Wa'ega Isu, ae awamu mima kamanapa urimintune.³ Piya, tigeba aota misanaga Koti nkabemika maya iye: Kumiyenaba tigeba a'wae puma miyivo.⁴ Tigeba waya maekenaenaba, aogima napimagiri aota mikenenaenama aega'magiri, aogi puma wayapa maeyivo.⁵ Tigu'amaba a-tika pekiri, to marisa kina, Koti kampa aegara kina'mi pesapa a-piyo.⁶ Aibo'enaba a-puma tiyo'mi nkwaepa a-paibuma, pintanagaba kumparipa a-nkuwaigasiyo. Piya, Wa'egawama a'ya'ma kina'mi kuntaenawaipa antota imiwaekiye. Taeba pi kamanapa pai uma aborama esegima urimintompene.⁷ Piya, tagu i'nintanayaga miyiyoma taba puratanti nane. Pipa kampaye. Koti aega'ma aota

miyiyo, uma taba puratantine. ⁸ Pigoya, pi kamanaka ka'waina aka'i ntaesi potakibipa, wasanama nane. Kotipa aka'i ntaesi potaye. Piya pemikaba, kampa aeba napiye. Kotiba Aota Awamus'a'wapa tamima: Aota miyiyo, uma taba puratantine.

⁹ Agu kao'ena mono kina puwaitakenaenaga ago abintawe. Pika naeba kampa esapa kaema timukuwe. Kotiba aewa agutasa kao'ena agowapa puriyakintekiri tiyo'ena aogima pewe. ¹⁰ Piya, tigeba a'ya'ma Masetoniya mari minta Isu nkaegaranta mono kina'mipa, agu kao'ena puwaitawewe. Pipa tagane. Pigoya, tao'mitaba abiyo. Tigeba maya uma esegi puritaene: Tigeba pintanaba to kake pumagiri, ¹¹ esegima napima paebuma mimagiri, to kina'mi mikibentanagaba a-ntapima tige'enarika aogima kabima mima, tiyapisa yogaenaripa puma maeiyio. Piyama pai urimintompesa puma piyo. ¹² Piya pumagiri, mono kampa abinta kina'mi nkiori aogima mima, inamukantaba a-piyo.

Wa'egawama irosa'ma tumpa aspiratakiye

¹³ We, tao'mitaba, Isu nkaega'ma pu'wanta kina'mikaba aibosapo pisiwe. Piya puma to kina'mi Kotiti atokaekenaga kampa napima uwa intara pesa puma, a'yugu tintawama kube'ena pusanaga, pi kamanapa yune. ¹⁴ Piya, taeba Isu pu'ma asinti kamana abibebe puma abene. Piya puma, Isu nkaega'ma pu'wanta kina Koti iba pekini, Isuge kaga irosakibewe. Pika abiyo.

¹⁵ Pigoya, Wa'egawama kamana urimompepa mayamawe: Ainti Wa'egawama tumikibi nttagaba, taogama mintompe kina'mitaba purinta kina'mipa kampa uma paitawait-akune. ¹⁶ Toganaba Kotiba esegima kega'e yekana, marusa enisorewama kega'e yekana, pikuriyama aga yekana, Wa'egawama mantaba kaitegina tumikiye. Tumimagina, Isuti atokaema pu'wanta kina'mipa paitama asiwaitama, ¹⁷ taogama mintompe kinapa ibinapinti tumpa taba purite, pi kinake Wa'egawamatia mesurataka, Wa'egawamate kaga miyaba mikune. ¹⁸ Piya, pi kamana abima, tiyo'mi nkigu imapa esegi puwaitaiyo.

5

Wa'egawama agawa mintakana tumikiye

¹ We, tao'mitaba, kana'wa aborakibintanaga ayantagabayawema, kampa esa kaema urimukune. Pipa kampaye. ² Tigeripa ago abintawe. Wa'egawama antota'ena tamikena yagaba, ku kina'mi aseka ampa aboraisha puma aborakiye. Pipa ago abintawe. ³ Piya: Paruyenabi mima aogima miyune, piya yiginaba, pabi ntaga, waya'ma yagaraena pukena yagaba auki nakiyenawapa aboramisa puma, ige ataena puwaitakenaena karu'ena ampa aborakiye. Piyamagina kampa igaikiye. ⁴ We, nao'mitaba, pabi ntaga ampa aborarimekiripa, ku kina kanagiri pamipesapa kampa pamipukibewe. Tigeba tununtanabi miye kinapa kampaye. ⁵ Tigeba e'wasaena maema ara miye kina mintawe. We, tigebe taebe asekasa kinape tununtanabiswa kinape kampa mintune. ⁶ Piya puma, Kotika kampa kabinta a'yugu tauwaima, to kina'mi pesa pusanaga, taoba a'waintakana napiyenarempaba kanara peno. ⁷ Taeba agantune. Iwaikena kina'miba asekaiwaiyewe. Wani nakeda kina'miba asekai nama aiboenaba pewe. ⁸ Pigoya, taeba arasa kinatowe. Piya, napiyenarepa kanara peno. Irebu kina'mi ma'ena i'ana pesa puma, tamatiti'enarepe agu kao'enarepe peno. Ma'ena taminoku atasa puma, Kotiba tau'iyeka taeba tagu esegi peno. ⁹ Piya, Kotiba amo'enaba puratakenabu kampa uratantine. Pipa kampaye. Aeba Isu Karaisiti Wa'egarepa aegarakana taba puma tau'iyenema uratantine. ¹⁰ Ainti taogama mintakubompepe, pu'ma mintakubompepe, Wa'egare taeka pai pu'ma e'wasaena tamintika aege mikune. ¹¹ Pika tiyo'mi uwaimima, iba pesa puma amato puma iyo'maema esegi puwaitaiyo.

Wasana maema asaekena kamanane

¹² Pigoya, tao'mitaba, taeba urimekiri abiyo: Tige tikapi, yoga puma napiyenaripa arupu puma esegi purita kina'mi nkige asagayuyiyo. Pipa Wa'egawama kiya kinati uwaitakiri, ¹³ yogawaitaka agu kao'ena puwaitama abiwaitaigina iyeno. Piya, paruyenabu miyivo.

¹⁴ We, tao'mitaba, kamana to esegima urimekiri abiyo: A'ya'ma yugaga iyekeita pe kinapa arupu pumagiri, tara tara igi napiye kinapa esegi puwaitamagiri, anu kinapa iyo'maemagiri, a'ya'ma kina'mipa pasema paru puwaitaiyo. ¹⁵ Wasanami ataena puritaigiri, a'yugu antota'ena ataena puwaitasanaga kabiyiyo. Asi nasi tiyokinape a'ya'ma to kinape aogi puwaitakenaenaga napiyiyo.

¹⁶ Asi nasi Kotiti ti'mu potaiyo. ¹⁷ Asi nasi nunamu uma miyiyo. ¹⁸ A'ya'maena aborarimekiripa, pipa Kotiti ti'mu potaiyo. Karaisiti Isu aega'ma piya pukibeka Kotipa abiyo.

¹⁹ Pigoya, Aota Awamus'a'ama ntaku a-nkatu'maiyo. ²⁰ Wasanami: Koti nkawamupisa kamanapa yunema, urimigiripa, tika'i ntaesi uwaba a-pumagiri, ²¹ a'ya'waemaenama nkagowapa marupa uma aborama napiyyiyo. Piya puma aogiyenaba upebe puma, ²² a'ya'ma aguntaenaba kasiyo.

²³ Pigoya, Koti aebe anta paruyenama nkago, aewa mpaema aota puwaerigasima, Wa'egare Isu Karaisiti tumikibi ntagagaba a'ya'ma aogima miyigina kamamatipa kampa waisanaga, timatape tigutape titape Kotiba kabiritano. ²⁴ Piya: Aota miyyiyo, uma tibaburi ntagara, tagantana puma, kabiritama aota titakiye.

²⁵ Pigoya, tao'mitaba, taeka nunamu yiyo.

²⁶ A'ya'ma mono kinapa aogima tiyapa imiyo.

²⁷ Pigoya, ma nkisapa a'ya'ma mono kina'mitaba aisuma uwaimiyoma, Wa'egawama nkagega'eraka urimuwe.

²⁸ Wa'egare Isu Karaisiti nkawagaena tigeti waima waiyeno.
Poro piya isa kaentiye.

TESARONAIKA KINA'MI NKISA PORO KAENTIYE (TARA YAGANE)

¹ Poronawa, Sairasiwa, Timotiwa, sumagita esa kaeyune. Tesaronaika kumata monota ai'aru pe kina, tabarempa Koti, Wa'ega Isu Karaisiti, isigeti atokaenta kina, tigeti ma nkisapa kaeyune.

² Tabarempa Kotige, Wa'ega Isu Karaisitige, isigetisa awagaenabe paruyenabe tigeti waima waiyeno.

Poro Kotipa a'mu potantiye

³ Tao'mitaba, taeba tigeka a'ya'ma yaga Kotiti ta'mu potaompepa, pipa kanarane. A'yugu kampa piyaba pukune. Timatiti'enamaba ampa anosama esegi pegiri, a'ya'ma ka kapa agu kao'enaripa tiyo'mipa puwaitagana, anosagi agama ta'mu potaune. ⁴ We, tigepta karana puritagiri tiki nakiyenabi mima, kuntaenaba aesaga'ma miyegana, timatiti'enamaba esegi piye. Pika Koti nkaegaranta kina'mi nkaruyenabi tigeri maete iyune.

Koti antota kamanane

⁵ Pigoya, tigeba pintana pekaba, Koti arupu antota'enawapa aborawaekenamana puma tayakiye. Piya, Koti kabiratakena kumata ampikibeka, tige tigupa ago yokege puta waye. Pi kabiratakenaenaraka tiki nakiyenaba aesagabewe. ⁶ Pigoya, tiki nakiyena purita kina'mipa Kotiba kanara antota iki nakiyenaba aborawaimikiye. ⁷ Piya aborawaimimagna, tiki nakiyena maeya kina tigepe taepe kaga maeragasima migarakennaenaba tamikiye. Pi nttagaba Wa'ega Isu esegi enisore kina'wantaga, tabe yaku nkabu e'wsaenayaga, tumpa aboramagina, ⁸ Kotika kampa ibuma, Isu Wa'egarempa nkaogi mono kamana'wa kampa wasiye kina, igepta kamparaga ika antota meru imikiye. ⁹ Piya, pi nttagaba igeba Koti nkantota'enaba maeyigina kaiwaitakini, Wa'egawama nkaowara kampa wanta, esegiyenawampa nke'wsaenabu kampa asu agakbewe. ¹⁰ Pi tumikibi nttagaba, Kotiti atokaenta kina'wampiba ae auge'a'eba asagayuma, a'ya'waema imatiti pota kina'miba aeka tabera i'mu potakbewe. Pabiyma tigeba tae kamanapa abima timatiti puntapa, pabiyma tabera i'mu potakbewe.

Pi kina'mi esegi piyema Poro nunamu untiye

¹¹ Taeba pika napima, asi nasi tigeka Kotirempati nunamu maya yune: Tige utaritanti'na aogima aega'ma mimagiri, aogiyena pukena puntiripa, timatiti yuga pigina, Kotirempa, ae'wa nkesegiyenarasa au'wa aborarimenoma, nunamu yune. ¹² Pi pukibentanaga, Wa'egare Isu nkagega'e asagayuyekana, aeba pabiyma tigea'eba asagayukiye. Piya puma, Kotirempa Wa'ega Isu Karaisiti, awagaenawaisitasa pabiya puritase.

2

Mono akayukena yagarama kamanane

¹ Pigoya, tao'mitaba, Wa'egare Isu Karaisiti aborakibi nttaga aege uma aki pukubompeka urimekiri abiyo. ² Pipa ka'isa kina'mi: Amonta agaune, ukibipera: Aoso taga kamanapa yunema, ukibipera, taeka: Ige esa kaeyaga maeyune, umagina: Wa'ega aborakena yagaba aborawaeyema yigiripa, a-pami puma karu'enaba a-nkiyegaraiyo. ³ Pigoya, ka yagara a-nkuwa atraigina amiyo kamana urimeno. Piya, Wa'egawama kana'wapa arosakena pekana, mono akayuma akabitakena yagarama maru aborakiye. Piya, a'abibinti tumikena yagara ae maru aborama nagarikiye. ⁴ Piya, wasanami kotiwaipe aegarantanawaipe kamaena potama a'ya'waemaenaba agisabi kasima, aewa nkagega'e asagayuma, Koti mpono namapi asu pai'ma mara'mima kamana uma aborama: Naeba Kotinawe, piya ukiye.

⁵ Napiyenari ago kasapera aya pewe. Pintanaga paipa tigege minta ago urimintone. ⁶ Pi nttagarama ki akunikenaaenaba ago abintawé. Piyama, Koti otantemi nttagaba aborakiye.

⁷ Piya, ibaba kamana akayukenaenamaba kakama mima yoga pegina, toganaba ke'wa akunintemi'naba ae'watakana wakiye. ⁸ Pigoya, pi nttagaba pi kamana akayukena yagaraba aborakiye. Piya pekana, Wa'ega Isu nkawamupisa aumawampa aegumagina, pi nttagae tumpa aborakibi nkesegiyenawampa agaroga pubasana kaikiye. ⁹ Pigoya, kamana akayukena yagara aeba Satani ntugarasa aborakiye. Aborama, uwoma nkesegiyenabe awame'enabe kasa'enabe kumpari'ena aborawaekiye. ¹⁰ Piya, ka'isa kina'mi taga kamanakaba kampa ibika, mantari kampa ikibewe. Pigoya, pi ataenabi tumikibi kinapa kana kewama a'ya'ma ata amiyo kamana uwaigasima iyobi airarikaekiye. ¹¹ Piya puma,

Koti iyorikaekena ago'ena otakana igeti tumekini, pi kumpari kamanapa aegarakibewe.
¹² Piya, taga kamana kampa aega'ma ataenawaimpaka i'mu pe kina, pi a'ya'ma kinapa
ata ika maekibewe.

Kotiba tibabikena uritantiye

¹³ We, tao'mitaba, Wa'egawama tigekaba abugaye. Taeba tigeka a'ya'ma yaga Kotiti
ta'mu potaompepa, pipa kanarane. Piya, Kotiba ti'ikenagaba paitaka'ya utaritaogana,
Aota Awamus'a'ama tibabuma Kotiti aota titaogiri, taga kamana aegarantawe. Pinta-
naraka Koti tibabegi ta'mu puritaune. ¹⁴ Pintanaraka Koti abogana, Wa'egare Isu Karaisiti
nke'wasaena maekenaga, aogi urimompe mono kamanatasa utaritaogiri aegarantawe.
¹⁵ Pigoya, tao'mitaba, esegima asima mima, taga kamana tawamupisabe esapisabe
urimintompepa araku'ma aegaraiyo.

¹⁶ Pigoya, Wa'egare Isu Karaisiti aewape tabarempa Kotibe esegi puritaiso. Piya, aeba
agu kao'ena puratama, tagu taumapa esegi puratayaba mima, aeti atokaekenaenaga
napiyokana awagaenawataso aogima tao'maeye. ¹⁷ Piya, aeba tigupa maema esegi
puritama, a'ya'ma aogi kamanape aogiyenabe tonkiya tiyo'maeyano.

3

Kotiti nunamu otaigina tao'maeyano untiye

¹ We, tao'mitaba, to ka kamanapa waintiye. Abiyo. Taeka nunamu yigina, tigeti
aboraompesa puma Wa'egawama kamana'ama uwaesama au'wapa aborano. ² Piya,
nunamu yigina, kampa aogima napinta aguntaena pe kina'mi nkiyapisa ipatatanano.
Tigeba ago agantawe. Uwoma kina'mi Kotitiba taga imatitiba kampa pewe.

³ Pigoya, Wa'egawamaba tagantanamana piye. Aeba esegi puritama kabiritakana,
aguntaena pemi ntagaramaba kampa tibaebukiye. ⁴ Piya, Wa'egawama napiyena tamegi,
tigekaba mayama napima abune: A'ya'maena piyoma yompentana kanara pewe. Piya,
aintiba pabiya pukibekaba, ago abune.

⁵ Pigoya, tae tabemika, Wa'egawama tigutipa maema arupu puma, Koti nkagu
kao'enawapipe Karaisiti kunta aseaga'ma esegiyenawapipe uwaesaiyo.

A'ya'ma kinaka yoga kamana waintiye

⁶ Pigoya, tao'mitaba, Wa'egare Isu Karaisiti ae awamuta urimekiri aogima abiyo.
Ka'waina aeba yogaga aekita puma uwa miyaba yagarama, esegima urimintompe
kamana kampa aegaranta uwa miyekiripa, ae'wataiyo. ⁷ Tigeripa ago abintawe. Tae
pompentanaba aegaraiyo. Paipa tigege mintantompepa, yogaga kampa taekita puma
mintantompena. ⁸ Piya, taeba tiyapisa ka'isa nakenaba kampa uwaba maema nantom-
pene. Tige kuntaena puritasanaga arape asekape esegima araga ntuga puyaba mima,
ikantanaretasa maema nantompena. ⁹ Piya, taeba tigetisa naninta uwa maeyompesinta
kanara pesine. Pipa kampaye. Taeba tae'enaena aegaraiyoma tayapisa puma tiyakune.
¹⁰ Paipa tigege mintapa kamana mayama esegima urimuwakiri, ago abintawe: Yoga
kampa pukibi'naba i'miyenoma, urimintompena.

¹¹ Piyamaba, tigetisa kamana mayama kanagi abune: Ka'isa kina'mi yogawai iyekita
puma atate uwa mima, kamana kiki uta nasepa, abune. ¹² Pigoya, piya kina'mika, Wa'ega
Isu Karaisiti nkawamuta mayama esegima urimigiri abibebe piyo: Pasema mima yogari
pumagiri, tigeti ntugarasa nakenaripa maeyiyo.

¹³ Piya, tao'mitaba, iyo'maekena yugaba tiyekitaba a-puma uwa piyo. ¹⁴ Pigoya,
ma nkinsapi kaemaraompe kamanapa ka'waina kampa aegarakibipa, ae agoba aogima
agamagiri, aegeba a-mpima abira ataigina mima, pi'ka ani peno. ¹⁵ Piya, pukibemika
kamaena a-potaiyo. Pipa kampaye. Tiyo'ena puma arupu napiyena amiyo.

To ka'isa kamanane

¹⁶ Wa'ega, aeba paruyenama nkagowama, a'ya'waemaenabi miyigina asi nasi aewa
paruyenma aborarimeno. Piya, pi Wa'egaba a'ya'ma kina'mititi miyeno.

¹⁷ Naeba Poronawe. Naeba: Aya pewema, nae'ne ntayapisa kaeyuwe. Piya, a'ya'ma
isa'nempa ara'enane kaeyuwa, agama naepisa aogima abiyo.

¹⁸ Pigoya, Wa'egare Isu Karaisiti nkawagaenawampaba a'ya'ma tigeti waima waiyeno.
Poro piya isa kaentiye.

TIMOTI AE ISA PORO KAENTIYE (KA YAGANE)

¹ Nae Porona, Karaisiti Isu nkaposoronaw. Pi ntugaraka tau'ikena yagara Kotibe aobi pompe ntagara Karaisiti Isube isigeba unatantame aposoronaw. ² Timoti, kaeba monota yagaronetaka'ya miyempeka naeba ma nkisapa kaeti kaeyuve. Piya, taba Kotike Wa'egare Karaisiti Isuke isigetisa awagaenabe isintara'enabe paruyenabe, kaeti waima waiyeno.

A'ya'ma kumpariyenaba maete tumo

³ Pigoya, paipa naeba Masetoniya mari wakena punta, ugamintosa piya po. Piya, kaeba Epesasi kumata agora mimagina, ka'isa pi kinapa esegima uwaimegini, igeba to kamana to kamana'waipa a-siyo. ⁴ Piya, igeba uwa amani kamanape aotumpi kamanape kasiyoma, uwaimo. Piya, pi kamana'amaba kampa nagariken puma, napiyenawaipa paibegini tara tara igiba napiyegana, monota kampa iyo'maeayagina, imatiti'enawaipa kampa anosaye. ⁵ We, ugamo kamanapa wasanamiba aegarakibepa, igeba igupa nare ntare puma, aogi napiyena maema, taga imatiti'enaba pikibewe. Piya, aegarakibe kina'miba igeba ugamo kamana'ama nkau'wapa aborama agu kao'enaba pukibewe. ⁶ We, ka'isamiba ma kamanatepa kaitegini, aibo'nabo puma a'yugu kamana uta nasewe. ⁷ Igeba Koti nkago kamana aborakena tisa kina misanaga ibiye. We: Taga taga piye, ye kamana'waipe, kamana'ama nkagobeba, igeba kampa aogima abintawe.

⁸ Pigoya, taeba mayama abune: Kotiba ago kamana'ama ntugaba tayakemika, pi ntugaga napima ago kamana ukubompepa, pi kamana'ama nkau'wapa kanarasakiye. ⁹ Piya, taeba mayama kaga aogima abune: Kotiba ago kamanapa arupu kina'miti wanane. Antage kina'miti atantine. Eya, akayuye kinana, Koti ikabita kinana, aguntaena pe kinana, kampa aota miye kinana, i'hintana pe kinana, ibawaiimpia iyeguye kinana, inowaimpa iyeguye kinana, to wasana iyeguye kinana, ¹⁰ kumiyyena pe kinana, wa paibe kinana, wasana ababuma kakata kinana, kumpari kinana, taga kamana uma antage pe kinana, a'y'a'ma to kamana uma taga mono kamana akayasota kinana sumagini, igebi ago kamanapa utawaitantine. ¹¹ Pi taga e'wasa mono kamanapa e'wasa Kotiba aboranamegi, uma aborauwe.

Koti nkantara'enaga nkantara'enaga Poro a'ma potaye

¹² Pigoya, Wa'egarempa Karaisiti Isu aeba naekaba tagantana piyema napima yogawata unatamagina, pi ntugaraka esegiyenawapa namegi, pika na'mu potauwe. ¹³ We, paipa ae agega'eba akayasotama ae aegaraume kinapa kama puwaitama, aepa ata potentone. Pi ntugaga naeba agowapa kampa abibebe punta, namatiti'enaba kampa potentone. Piya puwagana, pika Wa'egarempa antara punatama, ¹⁴ awagaenawapa ari'ma pumaenatama, Karaisiti Isuti atokaene namatiti'enabe agu kao'enabe aboranamintiye.

¹⁵ Piya, Karaisiti Isuba agunta kina'mite tau'ikena mampabi aborantiye. Pi kamanapa tagane. A'ya'ma kinapa abibebe pesinta kanara pesine. We, naeba tabe aguntaena pumagi to kinapa igaintone. ¹⁶ Piya puwagana, Karaisiti Isu aeba antara punatama, igainto nkaguntaenanepta asu'a punagaintiye. Eya, aeba aota agoyaenawapa nae nautasa aborantiye. Piya, aintiba a'y'a'ma aegarakibe kina'miba nagategini, aogima abima aeti imatiti puma wayaba e'wasaena maekibeka, antara punatantiye. ¹⁷ Pika, Koti nkagega'eba asagayuyiyo. Aeba miyaba Wa'ega mima kampa purikiye. Aeba wasanamite taora kampa aborama, ka'antoo taga Koti mintika, ae agega'e maete ima asagayuyaba miyeno. Tagane.

Timotika: Kama kina'mipa asu igaso, omintiye

¹⁸ We, yagarane Timoti, kaeka paipa poropete kina'mi una kamanaka naeba napima maya yugagaba ugatauw. Kaeba pi kamanapa napima esegiyena maema Koti kama kina'mipa ma'enaba aogima puwaitao. ¹⁹ Eya, kaeba kamatiit'enayaga aota napiyenayaga upube puma mita wama pi mpa'enaba po. We, ka'isa kina'miba aota napiyenawaipa kasima Kotipa ikabitauguna, imatiti'enawaimpaba akasaba'ma kakawantiye. ²⁰ Piya, Ameniyasige Aresantage isigeba piya pusugu, naeba isigepa Satani nkayapa isitantuwe. Piya, isigeba aogi napiyena maema to kakeba Kotikaba akaya kamanapa a-sisoma, isitantuwe.

¹ Pigoya, naeba maru ma kamana esegima ugamukuwe, abo. Tigeba a'ya'ma kinakaba Kotipa kega'e uma nunamu uma iyo'maekenaga abigama au'wa aborakibikaba ti'mu potaiyo. ² Eya, mabisa wa'egabe a'ya'ma to kiya kinape iyo'maekenaga abigaiyo. Piya, a'ya'ma kina'mitepa paebuma paruyenabi mama Kotintana puma wasanami nkiyobi kanara mikenaga, pabiyama nunamu yiyo. ³ Piya, nunamuwamaba kanarasagina, tau'kena yagarare Koti ae aobipa aogi piye. ⁴ Piya, a'ya'ma kinapa i'iyekini taga kamana'ama nkagowapa abisanagaba abugaye. ⁵ Piya, ka Koti abintowa mintegina, pi Kotike wasanage maema kabo puwaisitaka yagaraba ka mintiye. Aeba au'yaga Karaisiti Isuwe. ⁶ Aebe a'ya'ma kinapa ika puratakenaga ae'wa nkaupa kaintiye. Piya, pika awaga kamanapa Kotiba ae'wa ntatanga aboraramintiye. ⁷ Pigoya, pi nkawaga kamana aborakenaga Kotiba: Aposorogawe, unatantiye. Naeba taga kauwe. Kumparipa kampa yuwe. Eya, aeba mono kamana ukena aposoro Yugara unatamagina, to marisa kina'mi tisa yagara mama tamatiti'enabe taga kamanape aborawaimoma, unatantine.

Wa waya'mi kamanane

⁸ Pigoya, nae nabemika, a'ya'ma auka'iba wamiba imo'enabe makabe kasima, aota mama Kotiti iyapa atama nunamu yiyo.

⁹ Pabiyamagina nae nabemika, waya'mi paega paega pukenaenaba a-puma, igeba itasaenaba aogiyena mana puriyo. Piya, igeba i'notasa iwa'enabe tabe ikatasaaenabe, kori, pasesu, kai pi nane. ¹⁰ Waya'miba aogi mono yugarasaaena mana puriyo. Eya, igeba mono kina mimagini, mono au'wapa aogima aboraiyo. ¹¹ Waya'miba iwamupa akumpa mama i maete tumima mono kamanapa aogima abiyo. ¹² Piya, waya'miba wami tisaena puma ai'newaipa misanaga kampa nabegi, akumpa'ma mintuwé. Igeba paka puma mama kamana abiyo. ¹³ Piya, Kotiba aeba marupa Antamu potantana, aintiba Ibiba potantine. ¹⁴ Piya, kewamaba amiyo'ena potaogana Antamu wanane. Waya'ma kumpari kamana'wapa aega'ma kamparagaenaba puntine. ¹⁵ Pigoya, waya'miba yagaraena pukena yuga piginaba kanarasakiye. Eya, igeba imatiti'ena puma agu kao'enaba puma, aota mama paega kampa pukibepa, Kotiba i'ikiye.

3

Monota kabiyeye kina'mi kamanane

¹ Pigoya, ka'waina aeba pasitori mama monota kabikena puntanaba, aogi yuga peno. Pi kamanapa tagane. ² Piyamagina pasitori yagaramaba arupu pegana wasanamaba kamanapa a-nkotano. Aeba ka wae'ma nkawae miyeno. Aeba paebuma mama, aogi napiyena aega'ma, paruyenya yaga mama, ao'ena puma, aeba aogi tisa yagara miyeno. ³ Aeba esegi wani ntama aibo'enaba a-peno. Ma'ena a-puma paebuma miyeno. Aeba maka kamanapa a-nkuma, mone kutakaba a-ntapi napi peno. ⁴ Aeba waya yagarawata-pa aogima kabima mama, yagarawapa aogi puwaitakini aementanti kamana'wapa wasiwaya miyivo. ⁵ We, ka'waina aeba waya yagarawata kampa aogima kabiwaitakibipa, ayamabaya Koti imponota ai'aru pe kinapa aogima kabiwaitakiye, a. Pipa kampaye. ⁶ Piya, aro nttagonto agu a'wae puma mono aegarami'napa pi ntugaraipa a-nkotano. Kampaye. A'yugu aeba agebigo'ena pekan, Koti kewama nkotakibintana maekiye. ⁷ Piya, wasanamiba kamana otaigina aeba kewama ku uma pasanaga, kaeba ka'waina, aeba abe'isa kina'mi nkiyobi aogi agi waintakibi'napa, pi ntugaraipa otano.

Monota aki pukena yuga pe kina'mi kamanane

⁸ Pabiyamagini, monota aki pukena yuga pe tikeni kina'miba, igeba arupu puma mama, intebu a'wae u kina a-mpimagini, uwaenara esegi wanipa a-ntama, igeba uwoma mone kuta mpaekenagaba a-ntapiyiyo. ⁹ Napiyenawaipa nare ntare puma, igeba tamatiti'nama aboranti nkagowapa aogima upube piyo. ¹⁰ Maru'enaba agowaipa aogima agamagini, igebibia kamanapa kampa aborakibipa, kanara tikeni yugara uwaitaiyo. ¹¹ Pabiyamagini, waya'waiimpiba, igeba arupu puma mama, akaya kamanapa a-suma mama, paebuma mama, a'ya'maena tagantana piyo. ¹² Piya, tikeni kina'maba ka wae'ma nkawae mama, yagarawape a'ya'ma kina'watape aogima kabiyeno. ¹³ Piya, tikeni kina'miba aogi yuga pukibepa, igebibia aogi igi waiyekini, igeba kampa iyekuru punta Karaisiti Isuti aogima imatiti'ena puma esegima mikibewe.

Koti nkago kamanane

¹⁴ Pigoya, nae nabemika, agarosama kaeti wakena puwe. We, maru'ena iba ma kamanapa kaeti kaeyuwe. ¹⁵ Piya, narakureka kampa karu'ena aborakanapa, kaeba ma kamanapa agama, Koti tumpi nkikapi: Ayamabaya mikenawa, pi agogaba aogima abo. Piya, tankapa e'wasa Koti imponota ai'aru pe kina mama, wage ya kanta puma

mima taga kamanapa aogima aesagabiye. ¹⁶ Eya, taeba abune. Aboraratami mponotepa agasiyaenawe. Pipa mayamawe:

Aeba au'yaga aborama kanantiye, iye.

Awamus'a'maba: Agowapa arupuyenawe, otantiye, iye.

Enisore kina'miba agama ae ageba asagayuntawe, iye.

Wasanamiba kamana'wapa maga kina'miti uma aborantawe, iye.

Mampabisa kina'miba abima imatiti potantawe, iye.

Kotiba e'wasaena yaga aba puntiye, iye.

4

Kumpari kina'mi kamanane

¹ Pigoya, Awamus'a'maba maya uma aogima aboraye: Nagarikena yagaba agarosakanaba, ka'isa kina'miba amiyo puwaitakibi nkawamusapa aega'ma kewama kamanapa abima, imatiti'enawaipa ikabitakibewe, iye. ² Eya, kumpari kina'miba igeba aborama meto'ena puma paibuwaitakibewe. Pi kumpari kina'mi ntapiyenaba yaku tamisa pekini, ³ igeba waya maekenaenaba akunkitamagini, ka'isa nanintaba: A-ntaiyoma, uwaitakibewe. We, Kotiba aeba tamatiti puma taga kamana'wapa abompe kina'miteka pi ntanintaba aborantegi, taeba ta'mu potama maema nakana kanarasakiye. ⁴ Eya, a'ya'maenaba Kotiba aogiyena pumarantine. Piya, taeba maema Kotiti ta'mu potaompepa, pipa kaikenaenaba kampaye. ⁵ Eya, Koti kamana'amage nunamurempage aborama aota atagina aogi piye.

Timoti yogara otanti kamanane

⁶ Pigoya, pi yo kamanapa mono kina uwaimikibempepa, kaeba aogi Karaisiti Isu ntuga yagara mikibene. Eya, tamatiti kamana'amabe aogi aegarampe mpono'amabe kao'maema esegi pugatakanana anosakibene. ⁷ Piya, kaeba i'ni kamanape a'yugu amani kamanape kakabitamagini, Kotintanaba aega'ma puma miyo. ⁸ Piya, tau'ama ntuga pukenaenaba aeba aro ntagantoba tao'maeye. We, Koti kanta puma mikenenaenaba tabera tao'maeye. Eya, pipa ibaba mampara tao'meyamikana, aintiba mantabinti to kakema tao'maekiye. ⁹ Pi kamanapa tagane. A'ya'ma kinapa abibebe pesinta kanara pesine. ¹⁰ Piya, Koti kanta puma e'wasaena yaga mikenaga taeba araga ntugaba pune. Piya, taeba e'wasa Kotiti tamatiti puma utaratanti ntanagaba aobi pune. Eya, aeba a'ya'ma kina'miteka tau'ikena yugaba pumagina, aeti tamatiti pompe kina'mite tau'ikena yagarawe.

¹¹ Kaeba pi yo kamanapa wawayapa uwaimima, puwaiyakegini aegaraiyo. ¹² Kaeba aogi yuga pekini, igeba kagapa: Masimabi miyenema, napimagini kageba a-mpaete tumiyo. We, aogi kamanakatasabe, mikenenaengatasabe, agu kao'enagatasabe, kamatiti'enagatasabe, nare ntare puma mikenenaengatasabe, kepa mono kinapa aogima i'ma iyako. ¹³ Kaeba naobi puma mintanapa, akiyenabi mono kamanapa aisumagina, wasanaba mono uwaimimagine, kepa aogima i'iyako. ¹⁴ Pigoya, pai monota kabiyume kina'miba poropete kina'mi kamanapa aega'ma yogarapa iyapa ka'nota ataunguna, Kotiba esegiyenaba kamintine. Pika a-nkuwasuwaba po. ¹⁵ A'ya'ma yaga kaeba yogagata aogima kabima mima au'wapa aborakini, a'ya'ma kina'miba kagaigina aogi pikie. ¹⁶ Piya, kaeka pempentanarapa aogima kabima mima, wasanaba puwaiyakikenaenarapa kabiyo. Eya, pikaba esegi yuga po. Piya pukibempepa, kaegape kae kamana abe kina'mipe kaga ti'ikenaenama nkau'wapa aborakibene.

5

Wasanaba aogi puwaitakena kamanane

¹ Kaeba karu'enaba kamana omikena puntanapa, esegima a-nkomo. Kabagampa kanta puma pasema omo. Piyamagina masimabi kinapa ka'natabara kanta puma uwaimo. ² Kaeba aentaba kanogampa kanta puma uwaimima, kasa wae'iyaba apuyaena puwaitama kae kamana kanta puma uwaimo.

Abeya wae'mi kamanane

³ Pigoya, abeya wae abiya mintakanapa, kayonena puwaitao. ⁴ Pigoya, ka abeya wae'ma ntgarawo, aga'nugivo mintini, ao'maeyiyo. Eya, igeba marupa mono abibebe puma au'wapa aokina'miti aboraiyo. Piya, igeba anasa kina'waimpipa antota'ena puwaitaigina, Kotiba abekana kanarasano. ⁵ Piya, ka abeya wae'ma ae abintowa mimagina arape asekape Kotika kega'e uma nunamu yemipa, aeba Kotiti atokaekenaga aobi piye. ⁶ We, to ka abeya wae'maba ae'wa nkau'ama ntapiyena aegarakibipa, aeba pu'waisa puma miye. ⁷ Kaeba pikaba uwaimegini, igeba wasiyigina kamana'waipa

kampa waiyeno. ⁸ Piya, ka'waina aeba aokinapa, we, aotumpipa kampa iyo'maeyamipa, aeba amatiti'enawapa akabitama kasima, mono kampa abinta kinapa asu igasima kamparagaena piye.

⁹ Pigoya, abeya wae'mapa mono yugaraka agewapa kaekibempepa, kaeba mayama napiyo: Piya, aeba waba ka maentegin, kabowapa 60-wa kabu a'ya wagina, ¹⁰ yogawapa kanara puntakaba aogi agiga'e waiya, pika napima kaeyo. Eya, aeba paipa yagarawapa aogima kabitantemino. Aeba to marisa kinapa kayonena puwaitantino. Kotiti atokaeya kinapa aogi puwaitantino. Ikinakiyenabi mintanta kinapa iyo'maeyuguna paru ibuntiyo. Aeba a'ya'ma aogi yugaba puyaba mintipera kampaye. Pika napima igepe ibabo.

¹¹ Pigoya, kasa abeya wae'mi nkigega'eba a-kaeyo. Piya, igebe to wa maekenaga napikibepa, Karaisiti akabitama: ¹² Ae Yugara mikune, unta kamanapa akayuyigina, kamanapa igeti waikiye. ¹³ Piya, igebe tonageba mayama pewe: Igeba iyampuyena kampa punta, namaka namaka wama uwasuwa puma miyewe. We, iyampuyena kampa punta uwa nasimagini, to waina kamanapa maete mare-u me-u puta nasima tonarona a'yugu kamanapa aborawe. ¹⁴ Piya peka nae nabemika, kasa abeya wae'miba igebe to ka wa maema, yagaraena puma namatapa kabiygina, kama kinatempiba akayusuratakena kikaba aguyosagano. ¹⁵ We, kaeba abintane. Ka'isa abeya wae'miba aogi kipa kasima Satani kipa aegarawae. ¹⁶ Pigoya, ka mono aegarami nkxae'maba ae tupisa abeya waepa kabiyeno. Eya, monota ai'aru pe kina'mi nkiyobipa kampa kunta pekana kabiye kini, igebe abiwa miyemi waepa kabitakibewe.

Kiya kina'mi kamanane

¹⁷ Pigoya, monota aogi yuga puma kabiye kina'mi nkigiba maete ima, to maete iyiyo. Eya, mono kamana uma puwaiyakikena araga ntuga pe kina'mi nkigega'eba inata maete iyiyo. ¹⁸ Piya, mono isa'amaba maya iye: Purumakankama witi apa aerapakanapa, naninta na siyemaba awamupa a-nkakuno, iye. Eya, yoga kina'maba ikankapa maeyagina kanarasaye, iye. Pika napima monota kabiye kina'mi nkigiba maete ima kabiwaitaiyo. ¹⁹ Pigoya, ka'wainaba pi kabiyemi ntagaraga kamana otakanapa, kaeba a-nkabo. Piya, tara kinano, kakaga kina'mi piya yiginapa, kanara abo. ²⁰ We, kabiyemi ntagarama aguntaena pekiripa, tigeba a'ya'ma kina'mi nkiyobi arupu potaigini, to ka'isamiba agama iyekuru piyo.

²¹ Pigoya, Koti nkaobipe, Karaisiti Isu nkaobipe, Koti aba punti nkenisore kina'mi nkiyobipe, ma kamanapa wasiyoma, ugatauwe. Eya, igebi nkiyobi kamanapa a-suma, wasana intapera tumintapera ka kana puwaitamagina, ma kamanapa wasiyoma, ugatauwe. ²² Kaeba wasana mono yugaraka kayapa a'nota karu'enaba a-mpenkataao. To kina'mi nkaguntaenabipa a-nkubaso. Kae kagupa nare ntare potao.

²³ We, kaeba waninkamanapa a-ntao. Kanta kaukikibintanagabe to ka'isa yonintanagabe wainiba uwaenantoba nagana kao'maeyano.

²⁴ Pigoya, ka'isa kina'mi nkaguntaenamaba wasanami nkiyobi aboragi, taeba karu'ena a'yiginkitaune. Piya, to ka'isa kina'mi nkaguntaenama kakama waima ainti uma aborakiye. ²⁵ We, pabiyamagina, ka'isa kina'mi aogiyena pentanaba taobi aborawaeye. Piya, to ka'isa kampa agaompe nkaogiyena pentanaba agorapa kampa kakawaye.

6

Kayokaya kina'mi kamanane

¹ A'ya'ma wasanami nkimentanti miye kayokaya kina'mitaba, igebe kabiwaita kina'mikaba: Tabé kina miyeka igege'eba asagayukune, yiyo. Eya, wasanamiba Koti nkagega'eba kamana'wape maete tumisanaga kabima mima piyama yiyo. ² We, tabé kina'waimpiba Isu nkaegarami ntagara miyegana, a'yugu aeka: Tao mono yagarama, iyemagini kamana'wape akayuyewe. Pipa kampaye. Igeba mayama napiyiyo: Tabugai mpono yagarama ntuga potamagi, taeba asugasima aogi yugaba penoma, napiyiyo. Pigoya, kaeba pi kamanapa uwaimiwaeyagini abima aogi yugaba piyo.

Tabe mone maekenaenagaba a-ntapi napi piyo

³ Piya, ka'waina aeba Wa'egare Isu Karaisiti arupu kamanape Koti kanta puma mikena kamanape akayuma a'wae puma to kamana wasana uwaimikibipa, aeka maya yiyo:

⁴ Aeba age maete iyokana anosagina, napiyenawapa kampa waintiye. Aeba kamparagaenagaba wasana ibigama, kamana akayukena ma'ena puta nasima ankagasi agasiyenaga abiye. Piya pegina, pi ntugawataso mayama aboraye: To waina mparuta mikenaenabe, wasana pako puma atarakenaenabe, kamana akayukenaenabe, iyo'mikaba ata kamana uwaitakenaenabe, piyama aboraye. ⁵ Eya, piya kina'mi ntapiyenawaipa kamparaga

pegini taga kamanapa kampa upebe puma, a'ya'ma yagaba maka uta nasewe. We, piya kina'miba piya puta nasisimagini, igeba Koti ntugarasa tabe kuta mpaekenenaenawe, yewe.

⁶ Tagane. Ka'waina ae'enawaka napima: Kanarane, uma Koti kanta puma miyemipa, ae agu'ama kutapa uwaena maeye. ⁷ Eya, yakari purata ntugabaa ka'ena kampa maerite aboraune. Aintiba mampa kaikubompe ntugabaa taeba ka'enaba kampa maete wakune. ⁸ Piya, nakenarepe kairepe wairatantika napima: Kanara miyune, ukune. ⁹ We, uwaena kuta mpaekenka pe'nagiba, igeba imiyo'ena pigina ware'nakibewe. Eya, igeba ko uma paigina uwaena ibugaintanamaba ata puwaitakini aibo'nabo pigina kamparaga puwaitama igaikiye. ¹⁰ Piya, yabaka abugaintanaba aeba a'ya'ma ataenama nkagowe. Eya, ka'isa kina'miba piyama ibugagini, igeba imatiti'enaba kasagana tabe iki nakiyenamaba igupi wanta aeye.

Kaeba e'wasaenara miyaba miyo

¹¹ We, Koti nkao'yagaramagaba, kaeba pintanaba kakabitama naso. Piya, kaeba kekapa i'ma arupu puma, Koti kanta puma mima, kamatiitipotama, wasana agu kao'ena puwaitama, esegima asima, agoya puwaitao. ¹² Kaeba kamatiitipotama araga ntugabaa puma agaso. Piya, pai kaeba kamanapa abima uwaena kina'mi nkiyobi aogi kamatiitipotama aboragasima, Koti nkugatanti nke'wasaba maentane. Pi waiyaba e'wasaenaba araku'ma au'wapa aogima aborao. ¹³ Pigoya, Kotiba a'ya'maenama nkimbaba imagi, ae aobi ma kamanapa ugamuwe. Piya, Karaisiti Isu aeba Pontiyasi Pairati nkaora agowapa uma amatiti'enawapa aogima aboranti, ae aobi kaga ma kamanapa ugamuwe. ¹⁴ Piya, kaeba Koti unti kamanapa aogima wasiyegana, i'ntantanamaba kekapa kampa ataba pugatakana, wasanamaba kamanapa kampa ugatano. Kaeba piya puta kanagana Wa'egare Isu Karaisiti irosanoma, esegima ugamuwe. ¹⁵ Piya, Kotiba aewa ntaga, otanti ntugabaa taora Karaisitipa aborakiye. We, pi e'wasa Koti abintowa kabiratakenama nkagowe. Aeba wa'ega kina'mi Nkwa'egawee. Aeba tabe kina'mi Tabewaine. ¹⁶ Ae abintowa kampa purinta, e'wasaenara miyika, taeba agorapa kampa uma airokaekune. Ka'wainaba kampa agantikana, to ka'wainaba kampa agakiye. We, ae agiga'eba asagayuyekana, esegiyenawantaga miyaba miyeno. Tagane.

Uwaena kutantaga kina'mi kamanane

¹⁷ Pigoya, mampabi uwaena kutantaga kina'mika uwaimegini, igeba igebigo'enaba a-puma, nagarikenka kutankaitiba imatitiba a-piyo. We, Koti aeba a'ya'maenaba tamiawayagi maema ta'mu potaune. Piya, igeba aeti imatiti potama aobi piyo. ¹⁸ Eya, igeba aogi yuga puma, aogiyenawaipa uwaena aborama puma, kotankaipa a-nkupebe puma mima, iyo'maekenaga napiyiyo. ¹⁹ Igeba piya puntiniba, aintisa maruntana puma, ibaba miyaba e'wasaenaya araku'ma upebe piyo.

Timoti ntugawatasaka kamanane

²⁰ We, Timoti, kaeba Koti ugatantemi ntugabaa aogima kabiyo. We, ka'isamiba ige'wai kamanakaba: Aogi napiyenawe, yepa, pipa kumparine. Pi kamanapa uwa i'ni kamana, atarakena kamanana, pipa kakabitao. ²¹ Piya, ka'isa kina'miba pi kumanati atokaeyapa, imatiti'enawaipa paga pagasawee.

Pigoya, awagaenaba tigeti waima waiyeno.
Poro piya isa kaentiye.

TIMOTI AE ISA PORO KAENTIYE (TARA YAGANE)

¹ Nae Porona: Karaisiti Isu nkaposorogawe, Koti abogana unatantemine. Piya, taeba Karaisiti Isuti atokaema utaratanti nke'wasaenabi ubasikenaraka aposoro unatantine.

² Timoti, kaeba nabugai ntgaranempakati ma nkisapa kaeyuwe. Koti tabage, Wa'egare Karaisiti Isuge, isigepisa awagaenabe, isintara'enabe, paruyenabe, kaeti waima waiyeno.

Aogi kamanakaba tanipa kampa pukune

³ Nayabamagiba Koti aegarantasa puma naegeba pabiyama aega'ma kayokaya'ena potaogana, ae aobipa napiyenanempa nare ntare piye. Aibegina, naeba asi nasiba asekape arape nunamu uma kaeka napima Kotiti na'mu potauwe. ⁴ Piya, naeba kao'nu pageka napimagi, nabemika kagate tabera na'mu pusanaga nabiye. ⁵ Naeba kamatiti'ena waigatantika napiyuwe. Pipa tagantanawé. Piya, maru paitama arogampa Arowisiba amatiti puntiye. Piya poga, naeba abuntuwe. Kaeba taga kamatiti potane. ⁶ Piyama napiyenaga pugatakana, kaeba napiyomawé. Piya, nae ka'nota naya katauwagana Kotiba yoga pukenaga a'muntana kamogana kantabaipi wainti, pipa wasanama yaku pukama to kaeyamisa puma ituru po. ⁷ Piya, Kotiba taemarakenaenaba kampa tamiye. Kampaye. Aeba esegi puma mikenaenabe, agu kao'enabe, taupa kabikena esegiyenabe, tantabaipi aborama ituru purataye.

⁸ Piya pika, kaeba Wa'egarempa kamana ukenaba a-kani po. Piya, naeba iga'na yagarawantawa, kaga naeka a-kanipa po. Kaeba Kotitisë esegiyenä maemagina, kaeti aborakibi kuntuyenaba aesaga'ma mono au'wapa uma aborao. ⁹ Piya, Kotiba tau'ima aota mikenaenara taba puratantiye. Aogi pompentanareka wanane. Ae'wa ntapiyenarasa taba puratantine. Eya, paitaka'ya aeba Karaisiti Isu ntugarasa awagaenawapa utarata-magina, ¹⁰ ibasa yagaba pi nkawagaenama nkau'wapa aboraramintiye. Piya, tau'ikena yagarare Karaisiti Isu aeba ampa aborama purikenenaenama nkau'wapa aegugasima, aogi kamana'watasa e'wasaenabe miyaba mikenaenabe aboraramintiye.

¹¹ Piya, pi aogi kamana aborakenaga aeba naeka: Mono kamana yoma, aposoronabe tisaenabe poma, unatantine. ¹² Piya, pi ntugaraka kuntaenaba aboranamewe. Aerawane. Naeba kampa nanipa puwe. Kampaye. Naeba namatiti potao ntgararama nkagoba aogima agantuwe. Piya, naeba abuntuwe. Ae ayata ataontanaba aeba aogima kabita wagana agogo yaga uma aborano. ¹³ Pigoya, arupu kamanapa nawamupisa abempe, pi kipa aega'ma upebe po. Eya, kaeba Karaisiti Isuti atokaemagina kamatiti'enama nkau'wape agu kao'enama nkau'wape aogima aborao. ¹⁴ Piya, Aota Awamus'a amaba tagupinti mima tao'maeye. Piya, aeba tagantanama ntuga kayata atamipa, aogima kabiye gana waigatano.

¹⁵ We, kaeba ago abintane. A'ya'ma Esiya marisa kina'miba ikabinataginisi, Pigerasibe Emogenisibe isigeba kaga nagasase. ¹⁶ Pigoya, Wa'egawamaba Onisiporasi nkaotumpiba antara'ena puwaitama iyo'maeyano. Piya, uwoma ntugaba aeba kayonena punatama, iga'na puntokaba kampa anipa piye. Kampaye. ¹⁷ Aeba Aroma kumata aborama araga puma naguyosa'ma nagantine. ¹⁸ We, Wa'egawamaba agogo yagaba Onisiporasikaba antara potakana aogima miyeno. Piya, Epesasi kumata aeba kayokaya'ena uwaenara puntiye. Pipa kaega aogima agantane.

2

Kaeba Karaisiti nkaogi irebu yagara miyo

¹ We, yagaranempa, Karaisiti Isu aeba awagaena pugatakana, kaeba maema esegima asiyo. ² Piya, naeba uwoma kina'mi nkiyobipa kamana'nepa uma aboraogana abempe, pipa a'wae puma taga kina'miti uma aborawaimegini igeba to ka'isa kinapa aborawaiyivo.

³ Kaeba Karaisiti Isu nkaogi irebu yagara mimagina, kaeba to irebu kina'mi pesa puma kuntaenaba aesaga po. ⁴ Piya, ka'waina irebu Yugara miyemi'naba, aeba uwa kina'mi ntugaba kagapa kampa puta waye. Kampaye. Aeba irebu Yugamanapu puma, aeba ababunti ntgararama nkawamupa wasiyekana kanarasakiye. ⁵ Pita, to ka'waina ankagasi agasi pukena pemina, aeba ari kamana'wata kampa aega'ma uwa karusemipa, aeba ikankapa kampa maekiye. ⁶ Piya, to ka'waina araga ntuga pe'nagiba, aeba paitama pi ntugarasaba nanintawapa maeyakana kanarasakiye. ⁷ Pi yo kamanapa napiyo. Wa'egawamaba napiyenagapa maema aragatakana a'ya'maenama nkagowapa abiwaeyano.

⁸ Pigoya, Isu Karaisiti aeba Tebiti tupisa aboramagina, purintapisa asintika, aogima napi napi po. Pika naeba aogi kamana'nepa yuwe. ⁹ Piya, pi aogi kamana uma aboraoka kuntaenaba namewe. Eya, igeba iga'na kina kanta punatamagini kirokaentawe. We, Koti kamana'amaba wasanaba iga'naba kampa kirokaetakenaenawe. ¹⁰ Piya, Koti ababikibi kina iyo'maekenaga naeba a'ya'ma kuntuyenaba aesaga puwe. Piya, nae nabemika, igeba Karaisiti Isuti atokaeyigina i'ima, miyaba e'wasaenaga kaga aborawaimeno. ¹¹ We, ma kamanapa tagane:

Piya, taeba aeti atokaema purintipi ubasikubompepa, aege kaga miyaba mikune, iye.

¹² Piya, aeka kuntaenarepa aesaga pukubompepa, aege kaga asu kabikune, iye.

Piya, taeba takabitakanaba, aegeba akabiratakiye, iye.

¹³ We, taeba kamana akayukubompepa, ae abiwa tagantanaraka'ya piye. Eya, aeba tagantanama nkago mima, kamana'wapa kampa akuyukiye, iye.

Koti nkaobipa mono Yugaba aogima piyo

¹⁴ Pigoya, pi kamanakaba kaeba wasanamipa uwaimegini igeba aogima abiyo. Piya, Koti nkaobipa esegi kamanapa uwaimegini, igeba abima uwa kamanakaba ma'enaba a'piyo. We, pintanamaba abe kina'mi nki maete tumikenaenawe.

¹⁵ Kaeba araga ntuguba puma taga kamana'ama nkagowapa arupu puma aboramagina, Koti nkaobipa aogima aborakananaranaso. Piya pukibempepa, ae aobipa kampa kanintanaba wakiye. ¹⁶ Eya, a'yuga kamana yiginapa, kaeba kakabitao. Piya kamana ye'nagiba igeba to kamparagaena puta wama mono ataigina, ¹⁷ kamana'waimpaba ata inamunkama pisa puma anosama abararano. We, Aimeniyasige Pairitasige isige pi tupisa piyama ata puntase. ¹⁸ Piya, isigeba taga kamanakaba paga pamaginisi: Asiratakenaenaba ago nagari waye, umaginisi ka'isa kina'mi nkimatitienaba asunu kaegasawee.

¹⁹ We, Kotiba esegi wage aema'ma mintegini, pi wageba asima esegi puntiye. Pika awa'ena mayama kaentiye: Wa'egawamaba aeba waya'wawampipa aogima igantiye, iye. Piya, a'ya'ma Wa'egawamati atokaema ae agega'eba maeya kina'miba igeba ataenaba ikabitaiyo, iyema kaentiye. ²⁰ Pigoya, tabe namapipa tu'napa korirasabe siribarasabe pewe. Ibiwanane. Igeba to ka'isaba yarasa puntini, ka'isaba marasa pewe. Piyama ka'isamiba aogi yuga pegini, ka'isamiba tuminta yugaba pewe. ²¹ Piyamagina, ka'wainaba tuminta'enawapa maegaitegina nare ntare puma mimaginaba, aeba aogi tu'na pisa puma aogi yuga puma mima, aota mikiye. Aeba piyama kanara tabewapa ao'maema tonarona aogi yuga pukenaba yokege pukiye.

²² Piya, kaeba masimabi kina'mi nkigu i'nintanaba kakabitamagina, kekapa i'ma arupu puma, kamatiti puma, agu kao'ena puma, paruyenabi miyo. Eya, a'ya'ma apuya igutasa Wa'egawama nkagega'e ye kina'miba, igege kaga ketipa i'ma paruyenabi miyiyo. ²³ We, ka'isamiba aibo'nabo puma kampa abinta tonarona kamanapa uwa uta nasewa, kaeba kakabitaitao. Piya, kaeba ago abintane. Pi kamanapa maka kamana aboraye. ²⁴ Piya, Wa'egawama ntuga pemi kina'maba maka kamanapa a-seno. Kampaye. Aeba a'ya'ma kina'mipa kayonena puwaitamagina, aogi tisa mimaginaba, kampa karu'ena a'wae puma ikapa puwaitamagina, ²⁵ aeba paebuma mima kamana'wapa akayuye kina'mi ntapiyenaba arupu puwaitano. Aeba piya pekanaba, Kotiba iyo'maeayigini, igupa a'wae puma taga kamanapa aega'ma abibebe piyo. ²⁶ Eya, kewamaba ae'wa nkawamu wasikenaga ko'wapi ira'waitantikini, kaeba paebuma taga kamana uwaimeginiba igeba abima ko'wapisaba paima iyegaka waiyo.

3

Agogo yaga uwaena ataena aborakiye

¹ Pigoya, ma kamanapa aogima abo: Agogo yagaba uwaena kuntaenaba aborakiye. ² Piya, pabi ntugaba wasanamiba ige'wai nki asagayuyigina, mone kutaka ibugakini, paebuta nasima, igebigo'ena pumagini, kamanapa akayasumagini, ino ibagi kamanapa akayuma, kampa i'mupa puma, aota mikenaenaba akayumagin, ³ iyo'ena kampa puma, imo'enawaipa kampa kasimagine, akaya kamanapa uta nasima, i'ama ntapiyenarapa kampa kabima mimagine, wasanaba ata puwaitama, aogiyenamapa kama potamagini, ⁴ iyokina'mipa minaga'ena puwaitamagini, kampa napinta karu'ena kamparagaena pigina, igebigo'enawaimpaba anosakini, Kotikaba kampa napiyigina ari itasaenaga ibegini, ⁵ mono iga puma mima agowama nkesegiyenaba ikabitakibewe. Piyama miyiginapa igama kakabitao.

⁶ Piya, ka'isa piya kina'miba igebi nkiyobi kamana uma aibo waya'mi ntamapinti ubai'magini, napiyenawaipa iga'na puwaitawé. Piya wae'miba aguntaenawaika kuntaena napiyegana intawamapisa tonaronama ibai puta nasegini, ⁷ igeba tonarona kina'mi

kamana abima, taga kamana'ama nkagowapa kampa abikena pewe.⁸ We, paipa Yanisige Yampirisige Mosesepa kama potentamesa puma, kana kina'miba taga kamanapa kama potawe. Piya, igewai ntapiyenaba abararanta'ena pegina imatiti'enawaipa ago'enaba piye.⁹ Piya pepa, pintanawaipa agorapa kampa kakawakiye. Kampaye. Piya, pai Yanisige Yampirisige aibo'enawaisipa agantasa puma, kana kina'mi nkaibo'enawaipa a'ya'ma kina'mi nkiyobi aborakini agakibewe.

Koti kamanata arakuregana kabigatano

¹⁰ Pigoya, kaeba agonepa aogima agantane. Piya, tisaena yuganepe, nasikenaenanepe, mikenaenanempa kipe, namatiti'enanepe, paebuma mikenaenanepa, agu kao'enanepe, asima esegima mikenaenanepa,¹¹ kama punatantananepe, nauki nakiyenanepe, ago agantane. Piya, Antiyoki kumatape, Aikoniyamu kumatape, Arisitera kumatape, tabe kuntuyena namugu aesaga pintopaga nagantane. We, Wa'egawamaba a'ya'ma pi kuntuyen-abisa nau'intiye.¹² Eya, a'ya'ma kina, Karaisiti Isuti atokaema Koti kanta puma misanaga ibemi kina'mipa, igepe wasanamiba karana puwaitakebewe.¹³ Piya, agunta kina'mibe amiyo kina'mibe igebe tonarona ataena pegina anosakiye. Eya, igebe imiyoen a pigini, to igepe imiyoen a puwaitakibewe.

¹⁴ Pigoya, kaeba aogi kamana abima esegima kamatiti puntampene. Pi kamanapa upebe po. Piya, ugamtompone kina'mite nkagorepa agantane.¹⁵ Piya kaeba uwaena yagaranto mintana aota mono isapa maema aisuwa abita kanama miyempene. Pi nkisa'ama aogi napiyenaba ugamekana, Karaisiti Isuti kamatiti pegana Kotiba kau'iyeno.¹⁶ Piya, Piya, a'ya'ma mono isapa Koti ntapiyenabisa aborantiye. Aibumagina, pi kamanapa ketepa aogima purayakima, aguntaenarekaba taipi pima, nasikenaenarepa parutu puratama, arupu kipa purayakiye.¹⁷ Piya pegina, Koti nkaoyagaramaba monota anosama a'ya'ma aogi yugara yokege peno.

4

Mono yuga puma miyo

¹ Pigoya, Karaisiti Isu aeba aoganta kinape purinta kinape a'yigitatakiye. Piyama, aeba tumpa aborama kabiratakenaenga napima ae aobipe Koti nkaobipe naeba esegi kamanapa mayama ugamuwe:² Kaeba mono kamana'wapa uma aborao. Piya, wasanami abikena piginape, kampa abikena piginapeba a'ya'ma yaga kaeba yokege puma monopa uma aborao. Kaeba esegi kamana uma intawamapa aseyo puwaitamagina, aguntaenawaika kamana uwaitamagina, igupa asiwaitagini Kotipa aegaraiyo. Piyama, a'ya'ma yagaba pasema yoga puwaitama aogima ibubasanao.³ Piya, ka kana arosakanapa, wasanamipa arupu kamana maesanagaba kampa ibikiye. Kampaye. Piyama, igeba igebeitinti antunta uwakena tisa kina aki puma iba pigini, igebi nkiyobi kamanapa nig'i'ma ukibewe.⁴ Aibigini, igeba taga kamana abikenagaba ikabitama, tonarona a'yugu amani kamana ki'i nasikibewe.⁵ We, kaeba kampaye. A'ya'ma yaga kaega parutu kagi napiyo. Kaeba kuntaenaba aesagabo. Eya, aogi kamanapa aborakena yugaba puma, mono yugagampa nkau'pa aogima aborano.

Poro kana'wapa arosantiye

⁶ Pigoya, nae nau Kotiti muta atakena kanapa arosasu pegi, mampaba atakena puwe.⁷ Naeba agasigasi pukenaenaba aogima puntuwe. Eya, naeba ke'nemba nkattuta ago kanamagi, namatiti'enanempa kampa antage potauwe.⁸ Piya, ibaba arupuyenama nkattota'ena taminonki natakena yokege pumagina, agogo yagaba Wa'ega, arupu kamana ukena yagaramaba, aeba namikiye. We, nae'mana nane. A'ya'ma ae irosakibitaka ibugai kina, igeke kaga imikiye.

Nagarikena kamanane

⁹ Pigoya, kaeba karu'ena naetiba kanao.¹⁰ Piya, Timasiba aeba mampabisenaga abugagana nagasima Tesaronaika kumati wantiye. Keresenisiba aeba kanara puma Karesiya mari waogana, Taitasiba aeba Tarimesiya mari wantiye.¹¹ We, Aruku ae abintowapa naege mintiye. Piya, kaeba Makapa aba puregirisri kanaisigina, aeba kanara yogaba ampa nao'maeyano.¹² Naeba Tikikasipa otauwagana aeba Epesasi kumati wantiye.

¹³ We, naeba e'ero mu'mu kainepa Torowasi kumata Kapasi ntamapi atantogana, kaeba kanakena puntanapa, maentana purite kanantana, esa'nepe, we, yaga au'arirasa pumaranta isapa kaga maete kanao.

¹⁴ Aresanta aeba kapa yugawa pukena yagara, aeba tabera ata punatantiye. Aintiba Wa'egawamaba antota'enaba a'wae pomeno.¹⁵ We, aeba kamanatepa tabera kama puratantegina, kaegeba aekaba kabima miyo.

¹⁶ Pigoya, maru'enaba kamana unatauguni, wasanamiba kampa nao'maema a'ya'ma kina'miba nagaintawe. We, naeba Kotiti nunamu yokini, pi nkaibo'enawaikaba kamanapa a-nkuwaitano. ¹⁷ Pigoya, Wa'egawama nagora asimagina esegiyenaba namima nao'maeyoga, naeba kanara aogi kamana'ama nkago uma aborauwagini, a'ya'ma namu'isa kina'miba abintawe. Eya, Kotiba araiyoniwama nkawamupisa apa'natantisa puma nau'intiye. ¹⁸ Piyama, Wa'egawamaba a'ya'ma aguntaenabisa apa'natmagina, mantawama kabiratakenaenawapi ubasikenaga nau'ikiye. We, ae agega'eba asagayuyaba miyeno. Tagane.

¹⁹ Pigoya, Pirisikabe Akurabe Onisiporasi tunkape: Aya pewe uritayema, uwaimo. ²⁰ Pigoya, Erasitasiba aeba Korinti kumata pabita mintogana, Toropimasipa yoni nkaboga aepa Mairitasi kumata atauwagana mintantiye. ²¹ We, kamparaga esiba yaga aborakiya, kaeba karu'ena naeti kanao. Pigoya, Yuburasibe Putenisibe Arainasibe Korotiyabe a'ya'ma mono kina'mibe kaga: Aya pene, yewe.

²² Wa'egawamaba kauma kagukampage miyeno. Awagaenawampaba tigeti waima waiyeno.
Poro piya isa kaentiye.

TAITASI AE ISA PORO KAENTIYE

¹ Nae Poro, Koti kayokaya yagara, Isu Karaisiti nkaposoro nawe. Aeba unatama, Koti uwaitanti kina'mi nkimatiti'ena esegi puwaiitaoma, naba punatantine. Piya, taga kamanapa abibebe pigina anosakini Koti kanta puma mima,² utarantanti nke'wasaenabi ubasikibeka unatantine. We, Kotiba kumparipa kampa ukena yagara mimagina, paitaka'ya e'wasaenawapi ubasikibeka utaratamagina,³ aintiba ae'wa kanapa pi kamana'ama nkau'wapa mono kamana'wapis aboraramintiye. Eya, tau'ikena yagarare Kotiba aeba ago ugasisma pi ntuguba namegi kamana'netasa uma aborauwe.

⁴ Taitasi kati ma nkisapa kaeyuwe. Piya, kaeba taga nae yagara kanta puma mimagina, kamatiit'ena tae pompesa puma ka'masa pene. Pigoya, taba Kotige, tau'ikena yagarare Karaisiti Isuge, isigetisa awagaenabe paruyenabe kaeti waima waiyeno.

Monotasa kiyi kina'mi kamanane

⁵ Pigoya, Kariti mariba mono yuga atunkapa waintoga: Puma nagaraoma, megatamagi, a'ya'ma kumaka kumaka monota kabiye kina'mikaba: Asiwaitaoma, ugamtone.

⁶ Piya, ka'wainaba wasanamu nkiyobipa kamana'wa kampa waintakanaba, anara ka'ant mintakanaba, araga yagarawaisiti aguntaena pusnagaba kamana'waipa kampa wainta, ino ibagi kamana kampa akayunta Karaisiti imatiti pigina kabikibi, piya kina kiyaba asitao.

⁷ Piya, pasitori kina'maba aeba Koti ntugara kabikaenara mima a'yugu kamana aeti waisanagaba kabima miyeno. Aeba agebigo'enaba a-peno. Karu'enaba anta aukikenenaenaba a-peno. Eseg i wani ntama aibo'enaba a-peno. A-nkaibasanano. Aeba mone kuta asugasima maekenaenagaba a-nkabeno. Kampaye.⁸ Aeba wasana kayone puma kabiye. Aogiyenagaba aepa abugano. Ae'wa nkaupa kabima mima, Kotintana aega'ma, aota mima, napiyenawatapa aogima kabiye. ⁹ Aeba taga kamana omogana abintitapa esegima asiyeno. Piya pukibepa, aeba wasanamipa arupu kamanapa aogima uwaimimagine, akayuye kina'mi kamanapa akayuma asu igasano.

Kariti maripa uwaena kina'miba kumpari kamana untawe

¹⁰ We, pi mpariba uwaena kina'miba taga kamanapa akayuyewe. Igeba au'wa kampa wainta kamana uma wasana imiyo'ena puwaiitawe. Eya, Yuta kina, i kasakena tupisa kina'miba piya pewe.¹¹ We, piya kina'mi nkiwamupa akunkitao. Piya, igeba kota mpaenaga a'yuguyenaba puwaiyakima, piyaenaba ka'isa kina'mi ntapiyenabaya waya yagarawaipe ibaibewe. Ibaibegana, pi kina'mi nkiwamupa akunkitao.¹² We, paipa ka Kariti poropete yagarama aokina'mikaba maya untiye: Kariti kina'miba a'ya'ma yaga kumpari'ena puma, kabu kina kanta puma mima, iyekita karegi kinane, untiye.¹³ Pi nkawaga kamanapa tagane. Piya, kaeba esegi kamanatasu uwaimegini, igeba imatiti pukenaraka esegima asiyeno.¹⁴ Eya, Yuta kina'mi nkamani kamanapa a-nkaega'ma, taga kamana ikabita kina'mi nkimentantiba a-mpiyeno.

¹⁵ Piya, wasanamu ntapiyenawaipa nare ntare peginaba, a'ya'maenaba iyobipa nare ntare piye. We, kampa imatiti puma kamparagaena napiye kina'mitiba, ka'enaba kampa nare ntarepa piye. Kampaye. Ige'wai napiyenawaintaga igu'yaga kaga i'ni pawaye.

¹⁶ Piya, igeba iwamutasaba Kotipa aegarauwe untiniba, nasikenaenawaitasaba Kotiba ikabitawe. Piya pegana, Kotiba igeckaba aema itaye. Igeba kamana akayumagini, aogiyena pukenaenaba kap kampa abae pewe.

2

Mikenaenarene

¹ Pigoya, kaekantanaga napima maya yuwe: Kaeba wasanaba arupu kamanapa uwaimo. ² Piya, kaeba anasa kina'mipa mono uwaimegini, igeba paebuma mima, arupu puma mima, napiyenawatapa kabima mima, imatiti'enabe agu kao'enabe monota asima mikenaenabe tagantana pigina waiwaitano.

³ Piya, anasa wae'mikeba pabiyama uwaimegini, igeba monota aota mima, akaya kamana kampa uma, aibo waninkama iga'na puwaiatasanaga kabima mima, aogiyenama nkagowapa puwaiyakiyo.

⁴ Puwaiyakimagini igeba kasa wae'mipa uwaimigini, igeba iwaegipe yagarawaipe agu kao'enae aogima puwaitama,

⁵ napiyenawatapa kabima mima, nare ntare puma mima, namapintisaena aogi puma, kayonena puma, iwaegi nkiwamu wasiyiyo. Piya, Koti kamana akayasuma maete tumisanaga, piya piyo.

⁶ Piya, masimabimikeba pabiyama esegima uwaimegini, igeba i'waitapa kabima miyivo. ⁷ Pigoya, kaega aogiyenamana paitawaitama, a'ya'ma aogi yuga pegini agama kaegaraiyo. Mono untanapa antage kamanakeba kagapa a-nkuwaimima, taga kamana

paebuma uwaimo. ⁸ Piya, aogima parutu kamana yegini, kama kinatimpiba akayapa kampa uma taeti ata kamanaka aisakateginiba, igeba ini piyo.

⁹ Pigoya, kaeba kayokaya kinapa uwaimegini, igeba kiya kina'waimpi nkimentanti mima, a'ya'ma kayokaya'ena aogima puwaitaiyo. Piya, igeba iwamupisa kamanapa a-nkakayuma, ¹⁰ kuntanaba a-punta mima, a'ya'maenawaipa tagantanamana puwaitaiyo. A'ya'maenawaika piya pumagini, tau'ikena yagarare Koti ae'wa kamana'ama nkau'wapa aboraigini i'mu piyo.

Taeba nare ntare puma Karaisiti kanaka aobi pero

¹¹ Pigoya, a'ya'ma maga maga kina'mite tau'ikenaraka Koti nkawagaenawampa aborantine. ¹² Piya, atama mpikenaenarepe mampabisa i'nintanarepe atasanagaba aborama purayakima: Mampara paebuma arupu puma mima Koti kanta puma miyiyomagina, awagaenawapa aborantine. ¹³ Eya, tabe Kotire, tau'ikena yagara Karaisiti Isuba e'wasaenabi aborawaeyakana aeti aogima atokaekenaga: Aobi puma aota miyiyoma, utaratantine. ¹⁴ Piya, ae'wa nkauma kasima, a'ya'ma antage'enabisa ika puma taba puratantegi, ae tunkampitaba nare ntare puma mima aogi mono yuga pukenenaga esegi pukubompeka, pu'ma aogi puratantkiye.

¹⁵ Pigoya, kaeba ma kamana'ama nkagoba aogima uwaimagina, kiya kina'mi usu kamana uma asiwaitagini ataenawaipa aebasanaiyo. We, kaekaba wasanamiba: Uwa yagaragawe, usanagaba, aogima kabiyo.

3

Mikenaenarempa nkau'wapa aogima aborano

¹ Piya, kaeba kao'mipa asi nasiba uwaimegini, igeba kabiwaita kina'mipe kiya kina'mipe imentapinti mima, ige'wai nkiwamupa wasimagina, aogi yuga pukenagaba yokege piyo. ² Piya, igeba a-nkakayasuwaitamagini, maka kamanapa a-nkuwaitamagini, paru puma mima a'ya'ma wasanamipa kayone puwaitaiyo.

³ We, paipa taegeba aibo'ena pumagi kamanapa akayuntune. Piya puwakan, kewamaba antage ki'i tabaibogana, tonarona tagu i'mintanamage kamparaga ta'muntanamage iga'na puratantine. Piya purataoga, taeba asi nasiba wasana ata puwaitama ige'wai mparuta maekenagaba napintune. Piya puwakini, wasanamiba kama purataugu, taeba tao'mipa pabiyama kamaena puwaitantompene. ⁴ Pigoya, aintiba tau'ikena yagarare Kotiba aogiyenama nkagowa aborama agu kao'ena pukena antara'enaba aborantipa tau'ima taba puntiye. ⁵ Piya, aeba taere nkarupuyena pompe ntugaraka wanane. Ae'wa nkagutasa antara puratamagina, Aota Awamus'a'watasaba aeyobatatama aota aboraratama, kasa yagara kanta puma taba puratantine. ⁶ Eya, tau'ikena yagarare Isu Karaisiti ntugarasa Kotiba Aota Awamus'a'wapa asunu kaeyogana, taetiba tumpa pumaewantiye. ⁷ Piya, aeba awagaenawatasa arupu purataka, taeba aeti atokaema waiyaba e'wasa maekenaga asunu kaerataogana, taeti tumintiye.

⁸ Pi kamanapa tagane. Piya, nae nabemika kaeba pi kamanapa esegima uwaimegini, Kotiti imatiti pe'nagiba asima paebuma mima aogi yuga pukenaga asi nasi napiyyiyo. Pi ntugaba kanara puma wasanaba iyo'maeye. ⁹ Pigoya, tonarona uwa ibigata nasikena kamanape, aotumpi kamanape, akayukena kamanape, ago kamanataka maka ukenaenabe, pintanamaba kampa tao'maema aogi nakenaba kampa aekiye. Pipa kaeba kakabitao. ¹⁰ Piya, ka'waina aeba mono kina'mi ntapiyena paibekanapa, katano, tararano, arupu potagana kampa abekanapa, kasagana abira miyeno. ¹¹ We, kaeba abintane. Piya kina'maba aeba kepa kaitegina aguntaena puma, ae'wa nkaipi pima piye.

Nagarikena kamanane

¹² Pigoya, Atemasiwo, Tikikasiwoma otakana kaetiba wakanapa, kaeba Nikoporisi kumati ampa nagao. Piya, tabe esiba yagaba pi kumata ampikuwema, napiyuwe. ¹³ Pigoya, ago kamana'yaga yagara Senasibe, ao'mi Aporohe, isigeba kaeti aboraisiginapa, ke'i kusi pusananaga nasikenaenarapa isiyo'maeye. ¹⁴ Piya, taokina'mipa puwaiyakegini, igeba asima paebuma mima asi nasiba aogi yuga puma, kusi pe kinapa iyo'maeyigina, mono'waimpaba au'wantaga'ena pero.

¹⁵ A'ya'ma naege miye kina'miba: Aya pene, ugamewe. Kaeba imatiti puma agu kao'ena purata kina'mipa: Aya pewe iyema, uwaimo.

Pigoya, awagaenaba a'ya'ma tigeti waima waiyeno.
Poro piya isa kaentiye.

PIRIMONI AE ISA PORO KAENTIYE

¹ Naeba Poronawe. Karaisiti Isu, aeka iga'na punataga mintuwe. Naebe, tao'yagara Timotibe, tasigeba ma nkisapa Pirimoni kaeti kaeyuse. Kaeba tasibugai ntagara ka Yugare pompen. ² Piya, kaewa, tamana Apiyawa, tao'maenti ntagara Akipasiwa, kae namapi monota ai'aru pe kinana, sumagira tigeti kaeyuse.

³ Tabarempa Koti, Wa'ega Isu Karaisiti, isigetisa awagaenabe tintawama paruyenabe tigeti waiyeno.

Pirimoni aogima nkaegarantiye

⁴ Naeba kaeka nunamunepisa esugatamagi, Kotinempakati na'mu pugatauwe, omuwe. ⁵ Piya, naeba abopa kaeka maya yewe: Kaeba Wa'ega Isuka kamatiti'ena potamagina, Kotiti atokaenta kinapa, agu kao'ena puwaitane. Pika yega, abima Kotika na'mu puwe. ⁶ Piya, kaeba wasanage ampa kabo puma kamatiti'ena piya pega, a'ya'waema Karaisitisita aogiyena maeyompentana igeba agaka, nunamu yuwe. ⁷ Owe, nao'yagara, Kotiti atokaenta kina agu kao'ena puwaitampe, pintana intawama esegi puwaitaka, nantawama paruyenena pegin asugasima na'mu puwe.

Kayokaya yagara Onisimasi ae kamanane

⁸ Piyama naeba Karaisiti nkawamutaka: Kaeba aogiyena po, esegima ugamosinta kanara yosine. ⁹ Pigoya, naeba karen, Karaisiti Isu ae iga'na yagara ibaba mintuwe. Piya, esegi kamanapa kampa ukuboka, agu kao'ena puma paebuma ugamukuwe. ¹⁰ Naeba maya yuwe: Yagarane Onisimasika kabigauwe. Naeba iga'na namapi minta, mono omintone. Pintana aogima abima, pigoyema yagarane kanta puma abora mintemine. Kaeba agama aogi potao. ¹¹ Piya, aeba paipa kampa aogi yuga puma kao'maentemine. Ibaba aeba kanara aogi yuga puma, kaape naepe tasiyo'maekiye.

¹² Ibaba naeba agarubaogana, aeba mayama naunkantayaga to kaeti waye. ¹³ Piya, naeba aogi mono kamana yuwagini iga'na namapi nataugu mintoka, Onisimasipa mata'i nao'maekenaga araku'ma ababosinta, kae maru mpaema naomaeyamisine. ¹⁴ Pipa naene kampagi uwa araku'magi, kampa esegi pugatauwe. Nae nabemika, kaeka ntapiyenabisa aogi po.

¹⁵ Piya, kasa yagara aboragina agora to ababikibempeka, a'yo kagaite kanan-tipayawema napiyuwe. ¹⁶ Piya, ibaba uwa kayokaya yagaraba kampaye. Aeba Isu nkaegarami kayokaya yagara mintiye. Pi tabugai tao'yagaraga naepa nabugaikana, kaeba asunagasima tabera potakibenema abuwe. Piya, yoga yagaraga, Wa'ega aegaranta yagara, aepa aogima ababo.

¹⁷ Piya, naeka: Nao'yagara, naege ka Yugara piyema napiyempepa, Onisimasi to kakema nababempesa puma ababo. ¹⁸ Pigoya, ka'ena kamparaga pugatama, ireta pugatakanapa, nae nagera atao. ¹⁹ Iretawapa naene ikapukuwe. Tagane. Naeba Poronawe. Ma nkisapa nayantepisa kaeyuwe. We, kaeba nae kamana abima e'wasa maentampe, pika iretaba tabera punatampene. Aerawane. Pikaba kampa yuwe. ²⁰ We, nao'yagara, Wa'egawama nkageraka ka'mu punatamagina, pi Karaisiti nkagegaa'era kaogi potamagina paruyenena punatao.

²¹ Naeba abopa, pi kamana'ne wasikibene. Piya pega, naeba ma nkisapa kaeti kaeyano. Kamana'ne ugamosa puma, ka'isa napiyenagatas amato pukibenema, abuntuwe. ²² Pigoya, Koti nunamuripa abiritaka naeba tigeti kananoma, napiyuwe. Piya, ka maru nae'ena akusanataga kaege ampiyeno.

Kamana uma nagarintiye

²³ Pigoya, Epaparasi aeba: Aya pene, ugamiye. Aeba Naebe Karaisiti nkiga'na yagarara-sawe. ²⁴ Pigoya, a'ya'ma yuga kina'ne: Makabe, Arisitakasibe, Timasibe, Arukube, igeba pabiyma: Aya pene, yewe.

²⁵ Pigoya, Wa'ega Isu Karaisiti aetisa awagaenabe tiguti waiyeno. Poro piya isa kaentiye.

IBURU KINA'MI NKISANE

Koti Ntagarama kamana aboraramintiye

¹ Paipa uwaena yaga Kotiba toma toma ki i'ma poropete kina'mi nkiwamutasa tayabamagi mono kamana'wapa uwaimita kanantiye. ² Piya, ainti atuti iba nagarikena kanara, Kotiba kamana agowapa, yagarawa nkaboraramintine. Pi ntagarama nkayataswa Kotiba mampaba puma'ma, a'ya'maenama nkago miyенома otantine. ³ Piya, yagarawampa aeba Koti kanta puma mima ka'masa pumagina, aeba Koti nke'wasaena aboraramimagina, kamana'wampa nkesegiyenarasa a'ya'maena mabe mantabe parutu puma kabiye. Aeba aguntaenabisa aeyobatatakena yuga puma a'ya kaitegina, Tabe Wa'egama nkayatakanti inati asu mara'mintiye.

Koti Ntagarama a'ya'ma enisore kinapa igantkiye

⁴ Pigoya, abawampa yagaranene ominti nkagiba enisore kina'mi nkigeba igasisa puma, aewapa enisore kina'mi igasima abawampa nkayatakanti mara'mintiye. ⁵ Piya, paipa paipa Kotiba yagarawaka maya omintiye:

Yagaranekawe. Kaepa iba aboragatauwе, untiye, iye.

Piya, aeka to kaka maya untiye:

Naeba abawampantana puma miyekana, aeba yagaranentana puma miyeno, untiye, iye. Pigoya, pi kamanapa Kotiba ka enisore yagaraga untiye, a. Kampaye. ⁶ Piya, aeba amaru yagarawa mabi ataogana aboraogana maya untiye:

A'ya'ma enisore kina'nempitaba, aeti tirakabima agisiyo, untiye, iye.

⁷ Piya, enisore kina'mikaba maya untiye:

Naeba enisore kina'nepa esiba kanta puma aboramagi, pi ntuga kina'nepa yaku nkantebu kanta puma aborawaitauwe, untiye, iye.

⁸ We, a'wae puma yagarawaka Kotiba maya omintiye:

Kaeba Koti mimagina, tabe Wa'ega a'ya'ma yaga miyaba mima, kabiwaitakenaenagatapa kabima mima parutu'ena puma miyaba mikibene, iye.

⁹ Piya, kaeba arupuyenaga kabegin, antage'enaba kama potane, iye.

Pika kae Kotina, naeba ka'muntanagapa kae tikataogana kao'mipa igasaye, untiye, iye.

¹⁰ Pigoya, to kapa Kotiba maya omintiye:

Wa'ega, kaeba paitaka'ya maba aboratama, mantaba kayapisa pumarantampene, iye.

¹¹ Piya, kaeba miyaba miyegana, mantabe mabe paisa kai abararaisa puma abararama ata puwakiye, iye.

¹² Piya, kabi akarakitantana to antota kasa maema kabisa puma, mantabe mabe to antota kasa'ena aborakiye, iye.

We, kaeba kampa antota kasa'ena aborama pabiyama mimagina, masimabi kau'yaga miyaba mikibene, untiye, iye.

¹³ Pigoya, paipa Kotiba yagarawaka to ka maya omintiye:

Kaeba nayatakanti mara'miyega, kama kinakapa kagisa amentapinti atakini waiyo, untiye, iye.

Pigoya, pi kamanapa Kotiba ka enisore yagaraga untiye, a. Pipa kampaye. ¹⁴ We, enisore kina igeba awamuska kina mima Koti kayokaya potagina, i'ikibi kina iyo'maeiyemwa uwaitayte.

2

Koti aogima tau'ikena kamanane

¹ Piya pegi, pi abintompe kamana uwasuwa pusanaga, taeba napiyenaretapa araku'ma upube puma aegarano. ² Piya, Kotiba kamana'wapa enisore kina'mi nkiwamuta umaranategina, pi kamana'amaba waima esegi puntiye. Kana kamana'amaba a'ya'ma aibasana'ma aemita punta kinape kamana akayunta kinape ata ikankaipa antotapa maentawa, taewariye. ³ We, aogima tau'ikena aboraratantintanaga taekita pompepa, aya pumabaya ataenabisaba taegakapa wagaikune. Pipa kamparaka'yane. Pigoya, Wa'egawama aewa pi tau'ikena kamanapa maru uma aboraratantegini, ae kamana abinta kina'miba kaga taeti ago ampa aborantawе. ⁴ Ampa aborauguna, Kotiba agowa abompeka iyapisa tonarona aboraogini, igeba awame'enabe kasa'enabe toma toma esegiyenabе aborantini, Aota Awamus'a'ma nkabemika ka ka imogini tonarona a'mu ntuga aborantawе.

Isu aeba tau'ikena ai'neraka'yane

⁵ Piya, aborakibi mpaga kamanapa yune. Pi mpa kabiyiyomaba, enisore kinapa Kotiba kampa uwaitantiye. Pipa kampaye. ⁶ Pika ka yagarama mono isapi mayama ka auka'i Kotipa omintiye:

Wasanaba nanagana kaeba napiyene. Wasanama Ntagaraba nanagana aepa kabitane, untiye, iye.

⁷ Piya, arontaganto enisore kina'mi nkimentapinti kaeba aepa atamagina, to kake a'wae puma aba puma au maete ima agega'eba asagayuma, ⁸ a'ya'maenaba ae agisa amentapinti aki pekana waiyegina aeba kabiy, untiye, iye.

Eya, Kotiba pi ntgararama nkamentapinti a'ya'maenaba waiyenema otantana, ka'isaenaba uwaba kampa waiyenema otantiye. We, a'ya'maena pi ntgararama nkamentapinti waiyemaba ibaba taobisaba kampa agaune. ⁹ Piya, to kapa agaune: Isupa enisore kina'mi nkimentanti arontaganto otaogana, tumpimagina Koti nkawagaenawa mpaema a'ya'ma kina'miteka purintiye. Aeba auki nakiyena puma purogana asitama au maete ima agabe asagayuntye. Pi'n'a nkagoba ago agaune.

¹⁰ Pigoya, Kotiba a'ya'waemaenama nkagogana puma'ma mintiye. Piya, aeba otaogana Isu pu'magina auki nakiyena watasa tau'ima paitakena yagara aota mikena agega'eba maeyogana, Kotiba uwoma araga yagara ibabute e'wasaenawapi ubasintiye. Pintanaba aeba arupuyenaraka'ya puntiye. ¹¹ Piya, aota puratakena yagarabe, aota puratami kinape, ka auka'isa aboraune. Piya pokana, aeba taeka ani pusanaga kampa napima: Na'natabararawe, uramiye. ¹² Pika mono isapi maya untiye:

We, Koti, naeba kae kagega'eba na'natabaraba uwaimukuwe, iye.

Eya, naeba monota ai'aru pe kina'mi nkikapi kagega'eba asagayukuwe, untiye, iye.

¹³ Piya, aeba to ka maya untiye:

Naeba Kotiti namatiti potakuwe, untiye, iye.

Pigoya, pika to ka maya untiye:

Kaeba nagaka, naeba mata'i mima a'ya'ma yagaraba Koti namemi'nagigeba kaga miyompene, untiye, iye.

Isu wasanarakaya aborama tao'maentiye

¹⁴ Pigoya, Koti ntgaraki'nu taeba wasana mintokana, Isuba tae kanta puma aborantiye. Eya, tae kanta puma aboramagina, purikenama nkagoba aegugaikenaga pu'ma asintiye. Pi'n'a nkagoba kewamawe. ¹⁵ Piya, a'ya'ma purikenaenaga taekuru pompe kina'miba a'ya'ma yaga kewama iga'na purataginiaba, Isu aepa aegugasimagina pi nkiga'nabisa akariyobatatakenaga pu'ma asintiye. ¹⁶ We, tagane. Aeba enisore kina'mikaba ae'wa ntuga kampa puma iyo'maentiye. Pipa kampaye. Aeba Abara'amu tumpi ntuga puma iyo'maentiye. ¹⁷ Piya, a'natabara iyo'maekenaga aeba ka'masa puma aborantine. Piya, aeba monota paitanta kiye yagara ampima, Koti ntuga puma arupu puma antara puratama, waway'a'mite nkaguntaenarempa nkantota ika puratakenaga, a'natabaramige ka'masa puma aborantine. ¹⁸ Piya, auki nakiyenabe amiyo'enabe aeti aboramogana aeba asu againtemika, taepa pabiyama tamiyo'ena aborarameginaba kanara tao'maeye.

3

Isu aeba Mosese asu againtiye

¹ Pigoya, aota nao'mitaba, mantabi ubasikibe kina'mitaba, tigeba Isugaba aogima napiyivo. Aeba tamatiti'enama nkagowama tabe aposorobe monota paitanta kiye yagararepe mima, Koti nkawamupa aogima wasintiye. ² Piya, Kotiba pi ntugarara otaogana, pai Mosese Koti nkawamu wasima Koti nkaokinama'ni kayokaya'ena puntisa puma, Isuba Koti nkawamupa aogima wasima yogawapa puntiye. ³ Eya, nama kiyi ntgararama nkagewamaba pi ntamankama nkageba asu agasisa puma, Koti nkaobipa Isu nkagewamaba Mosese nkageba asu againtiye. ⁴ Piya, namapa wasanami nkiyapis aborantegina, we, a'ya'waemaenama aboranti ntgarara Kotiwe. ⁵ Piya, Moseseba aeba Koti nkawamu wasima Koti nkaokinapa kabima mima, ainti aborakibintanaga awaga kamana umagina, aeba kayokaya yagaragana mintiye. ⁶ We, Karaisitiba Koti nkawamu wasima Koti nkaokinapa kabima mimagina, aeba Koti Ntagaragana mintiye. Piya, taeba a'ya'ma yaga esegima aega'ma Kotiti atokaekenaga ta'mu puntapa, taeba Koti nkaokinama namantanawapa pukune.

Isureyo kina'miba ata puntasapa a-piyo

⁷ Pigoya, pika Aota Awamus'ama maya untiye:

Ibabu, tigeba Koti kamana abintiripa, aogima abiyo, iye.

⁸ Eya, Isureyo kina'miba ka'me mpari mima Koti amiyo'enae potama ago kamana akayumagini, igu akuntintasa piyaba a-piyo, iye.

⁹ Eya, ka'me mpari tiyabamagiba 40-wa kabuba mima nae puwantanaba agantiniba namiyo puntane, iye.

¹⁰ Piya pugu, naeba igama pi kina'mika namo'enaba puma maya yuwe: Igu'amaba a'ya'ma yagaba kepa agasima antage'ena pumagini, nae kipa kampa agama nasewe, yuwe, iye.

¹¹ Piya, igeka namo'ena puwaitamagi, mayama esegima yuwe: Igeba migarakenae-nanetiba kampa ubasikibewe, yuwe, untiye, iye.

¹² We, nao'mitaba, tigeba aogima kabiyiyo. A'yugu tikapisa ka'wainaba antabinti aguntaena puma amatiti'enawa kaita, miyaba Koti aka'intaesi potasanaga, aogima kabiyiyo.

¹³ We: Ibawe, untiipa ma ntagawe. Piya, ibasa yagaba aguntaenama tikapisa ka'waina nkao airarikaeyakana antaba akunisanaga, tigeba kabima mima a'ya'ma yaga tiyo'mipa aogi kamana uwaimigini, napiyenawaiipa igelegano. ¹⁴ Piya, pai tamatiti puntompentana to esegi puma mirite wama nagariyeka, Karaisintantanabi ubasikune. ¹⁵ Eya, ibasa yagaga mono isa'amaba maya iye:

Ibaba, tigeba Koti kamana abintiripa, aogima abiyo, iye.

Eya, Isureyo kina'miba Koti nkago kamana akayumagini, igu akunintasa piyaba a-piyo, untiye, iye.

¹⁶ Pigoya, aya pume kina'mi Koti kamana abima ataena puma akayuntawe. Pipa Moseseba wawaya iba purite Isipi maba agaite waume kina'mi, ige akayuntawe. ¹⁷ Eya, aya pume kina'mi kamana akayuguna Koti 40-wa kabuba amo'enaba puwaitantiye. Pipa wawaya'mi aguntaena pume kina'mika Kotiba amo'enaba puwaitantegini, i'waipa ka'me mpari ware'nawaewantawe. ¹⁸ Aya pume kina'mika Kotiba: Igeba migarakenae-nanetiba kampa ubasikibewe, untiye. Pipa wawaya'mi kamana'wa akayuye kina'mika untiye.

¹⁹ Pi'na nkagoba taeba abune. Kampa imatiti pe'nagiba, igeba Koti mpigarakenae-nawatiba kampa ubasikibewe.

4

Koti nkaokina'mi mpigarakenae-nawae

¹ Pigoya, Koti migarakenae-nawapi uma pasikena kamana utaratantine. Pi kamana'amaba uwa waiyeka, taekuru pumagi, taepisa ka'wainaba kampa abae puma apasisanaga kabiyeno. ² Piya, paipa Mosese nkaokina'miti aogi kamana aborantsa puma, taeti pabiyama aboraye. Pigoya, pi kana aogi kamana abintapa, kampa wasima imatiti puguna, igitiba kampa au'wapa aborantiye. ³ Piya, tae tamatiti pompe kina'mitaba Koti utaratantempi mpigarakenae-nawapi uma pasune. We, paipa Kotiba mampa puma nagaritaogana, wasanamiteti yogawapa a'ya waogana aeba agama maya untiye: Kamana'ne kampa abikibe kina'mika namo'ena pokini, igeba migarakenae-nepipa taganema kampa ubasikibewema utawaitauwe, untiye, iye.

⁴ Piya, mono isa'ama ka auka'i maya iye:

Kotiba tonarentsa ka'umaema yaga yoga puma nagarigaite, to tarumaema yaga migaranatiye, untiye, iye.

⁵ Eya, pi nkauka'i to ka maya iye:

Igeba taganema migarakenae-nepipa kampa ubasikibewe, untiye, iye.

⁶ Piya, pai aogi kamana abinta kina'miba kamana ago akayumagini, kampa uma pasintawe. We, migarakenae-nari wakena kipa uwa waintikini, to ka'isamiba pasikibewe.

⁷ Eya, Kotiba ka yagaga: Ibawe, otantiye. Piya, aintiba uwaena kabu wagasoganaba, Kotiba Tebiti nkawamupisa kamanapa maya uma aborantiye:

Ibaba, tigeba Koti kamana abintiripa, aogima abima, tigu'amapa a-nkakunkataiyo, untiye, iye. Pipa ago urimintuwe.

⁸ Pigoya, pai Yosuwa ago migarakenae-nabapi iba puntisinta, Kotiba pika to ka yagagaba kampa otasine. ⁹ Piya, migarakenae-nabapi taeti uwa waintiye. Owe, sabati yaga kanta puma migarakenae-nabapi waintegi, pipa Koti nkaegaraompe kina'mitaba aobi pune.

¹⁰ Piya, ka'waina Koti mpigarakenae-nawapinti ubasikibipa, aeba yogawapa a'ya atate migarakiye. Eya, pai Koti yogawa a'ya kaite migarantisa puma, aeba yogawapa a'ya atate migarakiye. ¹¹ We, migarakenae-nawapi uma pasikenaga taeba esegima mono yuga peno. A'yugu taepisa ka'wainaba, pai kamanapa akayuntasa puma ware'nasangababa, kabima mima aogi mono yuga peno.

¹² Piya, Koti kamanapa e'wasaena wantaga, esegima yogawapa piye. Piyamaba, agananta'enawampa tara awa wainta paroya ntoginkamantana asugasima, tagu tamankama atokaentipa nawae-gasima, tayampu tara'nuwama atokaentipa nawae-gasaye. Eya, a'ya'ma tantawama ntapiyenabe tabugaintanabe a'yigimpa aboraye. ¹³ Piya, Koti nkaobipa kakanta'enaba kapa kampa waintiye. Kampaye. A'ya'maenarepa apira

puma ae aobi ago aborawaeye. Eya, Koti aeba a'ya'maena pompentana tage tatai ntagarawe.

Isuba monota paitanta kiye yagararene

¹⁴ Pigoya, taetiba monota tabe paitanta kiye yagarare mintiye. Aeba mantabinti asu pasinti ntagara Isu, Koti Ntagarawe. Pika taeba tamatiti potaompentanaba upebe puma aesaga peno. ¹⁵ Piya, aeba magimagiyenare atama antara'ena kampa punta yagara kanta puma kampa miye. Kampaye. Aeba aboraogana amiyo'ena potaomepa kampa aguntaenaba punta, monota paitanta kiye yagarare tagantana puma taeti aborantiye. ¹⁶ Pigoya, pika kampa taekuruba punta, taeba Koti awagaenawa tamikena marunkati uma airokaeyeno. Piya, taeba airokaeyakana antara'ena purataka, kuntaenare aesaga pikenaga awagaenawataso tao'maeyano.

5

Isuba tau'ikenanama agorene

¹ Pigoya, mabisa kina taepisa monota paitanta kiye yagarare Kotiba otaye. Kotiba otagina, aeba tau'ikenaga Kotiti ta'muntanarepa amima yagaba aeguma kaema agunta pasa'atagina aguntaenarepa airarikaegasaye. ² Piya, pi ntagaramaba aegeba tae kanta puma magimagi yagara mintanaba, aeba pika napima, aibo antage kina'miteka taga antara puratama pasema tao'maeye. ³ Piya, aeba mabisa magimagi yagara mintanaba, wayawamika muta ataisa puma ae'wa aguntaenawa maegaikenaba pabiyama muta ataye.

⁴ Pigoya, pi monota paitanta kiye yagarama mparupa uwa maekenaba kampaye. Pipa Koti Eronipa pai otantisa puma otagina maeye. ⁵ We, pabiyamagina Karaisiti kampa ae'wa nkagega'eba maete inta, monota paitanta kiye yagararepa aborantine. Koti otaogana aeba pi ntugaba puntine. Eya, Kotiba maya omintiye:

Kaeba yagaranakewe. Iba aboragatauwe, untiye, iye.

⁶ Piya, mono isapi to auka'iba to ka maya omintiye:

Kaeba Meyokisete ae tu mpima mono kiye yagara miyaba miyeno, untiye, iye.

⁷ Pigoya, Kotiba purintapisa au'ikena esegiyena waintegina, paipa Isuba mampabisa yagara mintanaba, pika napima tabera kega'e uma kube'ena puma Kotiti nunamu uma nao'maeyoma abigantye. Aibumagina, aeba ae'wa ntapiyena ware'nama Koti nkawamupa wasiyomeka, Kotiba nunamuwapa abintiye. ⁸ Piya, Isu aeba Koti Ntagara mintiye. We, tae kanta puma auki nakiyenarasa Koti nkawamu wasikenaenama nkagoba abibebe puntiye. ⁹ Piya, Isu aeba abibebe pumagina, Koti nkaobi aota'enarak'a'ya puma, a'ya'ma ae awamu wasiyompe kina'mitepa tau'ima miyaba mikenaenama agoba aborantine. ¹⁰ Eya, Kotiba otaogana, aeba Meyokisete tu kanta puma monota paitanta kiye yagarare aborantine.

Inamu ntagara kantaba taeba a-peno

¹¹ We, mono yugawaka uwaena kamana waintegi, tige akuninta mintaka, urimikenaenaba kunta piye. ¹² Piya, tigeba mono abirite kananta'nagita, ayamabaya mono tisa kinapa kampa miyewe, a. Tige napiyenaripa aronkanto waiyegin, ka yagarama Koti nkaogi kamana'ama nkagoba to kake urimikibipa, pipa kanarane. We, tigeba esegi nanintaba kampa na kina mimagiri, nono'amana mpaema miyijo. ¹³ Eya, a'ya'ma kina'miba nono nayaba mima, igeba inamu ntagara kanta puma mima arupuyenama nkagoba kampa aogima agantawe. ¹⁴ Piya, esegi nanintaba i'anosa kina'mintanaw. Piya kina'miba igewai ntapiyenarasa aogima napima asi nasiba aogiyenabe ataenabe taga a'yikewe.

6

Timatiti'enaba a-tiyekita piyo

¹ Pigoya, taeba marupa ka'isa Karaisiti nkaegarakena kamanapa abuntune. We, pi aintana kamanapa agasima to ka'isa kamana'wapa abima amato puma anosano. A'yugu asi nasiba nama kampa kinta, maruntana puyaba mikune. Eya, e'wasaenawa kampa wainta'enamakaba takabitama a'wae puma Kotiti tamatiti potakena kamanapa agasima, to ka'isa amato puma anosano. ² Eya, wani pai'itakena kamanape, iya nki'nota atakena kamanape, purintapisa asikena kamanape, a'yigitatama antota'ena tamikena kamanape, agasima amato puma anosano. ³ Piya, Koti abekana kanarasakapa, taeba pabiya pukune.

⁴ Pigoya, ka'isa kina, e'wasaenayaga'ena Kotitisa maeya kina'miba, igeba Kotintana ikabitamagini, to intara puma a'wae puma e'wasaena maeyanema pukibepa, pi kipa kampaye. Eya, mantabintisa i'muntana imakagama Aota Awamus'a'ena punta kina, igeiba to a'wae pukena kipa kampa waintiye. ⁵ Eya, igeba Koti kamana'ama nkaogiyenabe,

ainti aborakibi nkesegiyenabe, imakagamagini,⁶ Kotintana ikabitapa, igetiba to igu a'wae pukena kipa kampa waintiye. Piya, igeba Koti Ntagaraba maripo yara to ka ita'atama wasanami nkiyobi ani pukena kamanapa otane. Pika igetiba to a'wae pukena kipa kampa waintiye.

⁷ Piya, ka mara asi nasi ka tumegina, maema ago yagarama ntakenaba aogima aboragina, pi mpagaba Kotiba a'mu piye. ⁸ Piya, maba akenaenabe kabuyenabe aboraipa, pipa uwa ma waiyekana, aro ntaganto pumirere potama, aintiba antota yaku kaegaikiye. Pipa wasanamitepi piyama aborakiye.

⁹ We, tabugai ntao'mitaba, ibaba tigeti kunta kamanapa yune. We, tigeba piya ataenaba kampa puma, ti'imaenama nkau'wapa aogima aborakibewema, napiyune. ¹⁰ Piya, Kotiba antage yagaraba kampa mima, aogi yuga pekaba kampa agegu'aba piye. Kampaye. Tigeba aogi yuga puma Kotika agu kao'ena puma aeti atokaeya kina'mi kayokaya'ena pai puntiri, ibageba piginaba, kampa uwuba titakiye. ¹¹ Pigoya, tigeba ka ka kina'mita maya pusanaga tabiye. Tigeba Kotiti atokaekenaga esegima ntapima au'wapa aogima aborama wairite wama a'ya pusanaga tabiye. ¹² We, tigeba uwasuwaba a-piyo. Piya, imatiti puma kampa uwasuwa punta kina'miba Koti nkutaratantintanaba maeyawe. Pi kina'mi pesa, tigeba piyo.

Koti utaratantintanama kamanane

¹³ Pigoya, paipa Kotiba Abara'amu kamana otantipa, Koti ae'wa nkagera uma esegi potantiye. Piya, to ka yagaramaba kampa asu agasogana Kotiba ae'wa nkagera uma esegi potamagina, ¹⁴ maya omintiye: Naeba taga kauwe. Naeba na'muntananepa aboragamekana, kayabamagi uwaena aborakibewema, omintiye. ¹⁵ Aiyogana, Abara'amuba antawamapa esegi potama kampa aekita puma paibuma mintanaba, aintiba otantintanaba maentine. ¹⁶ Pigoya, wasanamiba asu againta kina'mi nkigera kamana'waipa esegi pegina, pi kamana akayukenaenaba kampa waiye. ¹⁷ Piya, Kotiba abugaogana utaratant kina'miteti ae agera kamana'wapa esegi puntine. Eya, aeba tara agi kampa napinta, untintanaba taga aboraramikiye. ¹⁸ Piya, aeba kamana otamagina ae agera esegi potantine. Aibuntikana Kotiba kamana'wapa kampa akayumagina, kumparipa kampa ukiye. Pika Kotiti taegaka uma kakaompe kina'mitepa esegi purataka, uratantemintanaba araku'ma uebe puma esegi peno. ¹⁹ Piya, Koti uratantintanaba, pipa tauma'ama nkarakurikena iga'hawe. Pi nkiga'narasa Koti imparuti, tabe kaiyama nkaka'i, asaerataye. ²⁰ Pi imparuti Isuba paitaratama ubai'ma, Meyokisete ae tu mpima monota paitanta kiye yagararepa miyaba miye.

7

Meyokisete aeba tabe mono kiyeraka'yane

¹ Piya, Meyokisete, Saremi kumatasa wa'ega, aeba ima minta tabe Kotiwama mpono kiye yagara mintantiye. Pigoya, paipa Abara'amuba wama mabisa wa'ega kama kina'wapa iyeguma igarubakaite a'wae puma wa'eri kanaogana, Meyokisete aeba ke'i uma pabuma a'mu potantiye. ² A'mu potaogana, Abara'amuba a'ya'maenawapisaba aisuma nayatararu'mu pogana age ka maeta maeta puma Meyokisetepa amintiye. Piya, Meyokisete nkage a'wae puma tae kamanapisa: Arupuyenama nkwa'egawe, yune. Pigoya, aeba Saremi kumatasa wa'ega miyoga, pi nkageba tae kamanapisa: Paruyenama nkwa'egawe, yune. ³ Piya, aeba ano aba kampa minta, abigutasa yagara miyeginia, ma'atanta'enawape purikenaenawape kampa waiyeginia, aeba Koti Ntagara kanta puma mima mono kiye yagara miyaba miye.

⁴ We, tigeba Meyokiseteka napiyyiyo. Aeba taberaka'yane. Piya, tayabama Abara'amuba ma'enabisa kota maema aisuma nayatararu'mu pogana age ka maeta maeta puma Meyokisetepa amintiye. ⁵ Pigoya, Aribai ntagaraki'nupa mono kiye kina'mi ntugamana mpaeyia kina'mika, Isureyo kina'mintana nayatararu'mu pogana age ka maeta maeta piyoma, ago kamana'ama uwaitantiye. We, Aribai kina'mibe a'ya'ma to Isureyo kina'mibe igeba Abara'amupisa aboranta, ka tune. Piya, Aribai kina'mibe iyo'mitasa igewaintanaba maeyawe. ⁶ Pigoya, Meyokisete ige tupipa kampa aboranta, maru'enaba Abara'amuntanaba age ka maeta puntiye. Eya, Meyokisete aeba Koti kamana otanti nttagaramapiswa age ka maeta pumagina a'mu potantiye. ⁷ Piya, taeba ago abintune: Asugasima minti'na aeba amentapinti minti'napa a'mu potaye. Eya, Meyokisete asugasima minti'nawe. ⁸ We, ibantoba purikibe mono kiye kina'miba age ka maeta maeta pewe. Paipa Meyokisete age ka maeta punti'na, aeba miyaba mikena yagaramawewe, iye. ⁹ Piya, ibaba Aribai tupisa mono kiye kina'miba age ka maeta maeta pewe. We: Aribai, aeba Abara'amu nkayapisa marupa Meyokisetepa menkamogana age ka maeta puntiye, yompesinta, kanara yompesine. ¹⁰ Eya, Aribai kampa ma'atantogana,

Meyokisete Abara'amuti aborantogana, Aribai aeba atawampa Abara'amu nkayapisa age ka menkamintiye.

Kasa mono kiyerempa marusaenama mparu maentiye

¹¹ Pigoya, pai Kotiba ago kamana'wapa aboraramintipa, pi kamanape Aribai kina'mi mpono yugabe kaga kapi atama aboraramintiye. Piya, igewai mpono yugarasa aota kina aboraompesinta, Meyokisete kanta puma mikena mono kiye yagara, Isuba, kampa aboramisine. Eya, igewai mpono yugarasa aota kina aboraompesinta, Eroni kanta puma mikena yagara utaratamisine. ¹² Pigoya, mono kiye kina'mi ntugawaipa wagina aogaso yuga ampa aboraginaba, ago kamana'wapa kaga wagina to aogaso'ena ampa aboraye. ¹³⁻¹⁴ Piya, Aribai tupi kampa aboranti ntagara Isuka pi kamanapa untiye. Aeba to tupisawe. We, Wa'egare Yuta tupisa aborantine. Pipa ago abune. Pigoya, Yuta tupisa tabe mono kiyeba aborakibewemaba, Moseseba kampa untine. Kampaye. Pai pi tupisaba mono namapinti aratara mono yugaba kapa kampa puntine. Kampaye. Pigoya, pi tupisa kasa'ena taeti aboraye.

Isuba Meyokisete kanta puma monota paitaratanta kiyerene

¹⁵ Piya, kasa mono kiye yagara aborama Meyokisete kanta puma ka'masa peginaba, pi kasa mono'ama nkagoba taeti uma arawaeye. ¹⁶ Piya, kasa mono kiyerepa ago kamana'ama otanti tupisa kampa aborantiye. Kampaye. Aeba miyaba mikena esegiye-nayaga, mono kiyerepa aborantine. ¹⁷ Piya, aeka mono isa'ama maya iye: Kaeba Meyokisete ae tu mpima, mono kiye yagara miyaba miyeno, untiye, iye.

¹⁸ Eya, paisa ago kamana'amaba esegiyenawape tau'ikenaenabe kampa waintomeka Kotiba maegaintiye. ¹⁹ Piya, paisa ago kamana'amaba ka'enaba kampa aota potantine. Kampaye. We, Kotiti atokaekena kasa ki aboraogana, pi kipa paisa ago kamanapa agasimagina Koti nkagora uma irosakubompe kine. Pi kipa Karaisitiwe.

²⁰ Piya, Isuba tabe mono kiyerepa kampa uwaba aborantogana, Kotiba uma esegi potantine. Pigoya, paisa monotasa kiye kina'mipa kampa esegi potaogini, igewai tupisa mono yugawai uwa maentane. ²¹ We, Kotiba Isu mono kiyena pukenaga esegi kamana uma mayama omintiye:

Wa'egawanababa, naeba uma esegi pumagi, napiyenanepa kampa a'wae pukuwe. Kaeba mono kiye yagaraba miyaba mikibene, untine.

²² Eya, Kotiba pi kamana umagina, kasa utaratanta'enama nkatkunkapa Isupa aboraramogana, pipa paisaenamaba asugasima waintiye.

²³ Pigoya, paisa kiye kina'miba pu'maba, uwaena kina'miba pi mpono yuga puma mita mita kanantawe. ²⁴ We, Isu aeba miyaba mama, mono kiyenawa kampa kainta kabima miyabane. ²⁵ Piya, a'ya'ma ae yugarasa Koti nkagora ampiyompe kina'mitepa agora tau'iye. Eya, aeba miyaba miyemika, taeka asi nasi Kotiti nunamu yegina tao'maeye.

Isu aeba monota paitaratanta kiyerepa aogiyenaraka'yane

²⁶ Pigoya, Isu aeba aota yagara miyegina kamanapa kapa kampa aeti waiyegin, agunta kina kantaba kapa kampa puma narentare pumagina, mantaba agasima inata minti ntagarara mintiye. Pabiya yagara monota paitanta kiyenarepa pegina, Koti nkaobi kanarasaye. ²⁷ Piya, marusa tabe mono kiye kina'miba igeba a'ya'ma yagaba muta atakena puntiniba, maru'enaba igewai nkaguntaena maegaite, aintiba a'ya'ma kina'mi nkaguntaenaba mae igaikenaga mutapa atantaw. We, Isuba piya yugaba kampa punta, ka yaganto ae'wa nkaupa taeka muta ataogana nagariwantiye. ²⁸ Piya, paisa ago kamanatasaba Kotiba marasa magimagi kina'mipa tabe mono yugara uwaitantkiye. Albumagina, aintiba esegi kamana uma, aota miyaba yagarawapa pi ntugara otantegina, aeba miyaba miye.

8

Isuba mantabinti mima mono yuga yuga piye

¹ Pigoya, pi kaeyo kamana'ama nkagowapa mayamawe: Monota paitaratanti kiyerepa mantabinti mima Tabe Wa'egawama nkaemu yabaera ayatakantisa auka'i mima, ² mono yugawapa Koti nkaota namapi piye. Pi nkaota namapa taga mono namane. Pipa wasanama wanane. Wa'egawama ituru puma kintemine.

³ Pigoya, a'ya'ma monota paitanta kiye kina'miba Kotiti i'muntana atakena yugarape muta atakena yugarape uwaitaye. Pigoya, kiyarepa Isu aeba muta atagina kanarasaye.

⁴ We, mampara mono kiye kina mima, paisa ago kamana wasima muta ataw. Piya puntika, Isu aeba mampabi mintesinta, mabisa mono kiyenawapa kampa waintesine.

⁵ Eya, mantabinti taga mpono namapa waintegini, marapa igeba awame namantanaba puma mono kiye yugaba pewe. Piya, paipa Moseseba kairasa mono nama ituru

pukena poganaba, Kotiba marupa maya omintiye: Amuti awame pugayakintosa puma a'ya'maenaba po, omintiye.⁶ Piya, Karaisiti aebe mono kiye yugaba aogima puma, paisa mono kiye kina'mi ntuga igaintiye. Eya, utaratami ntanama pai uwaitanti ntanamapa asugasagina, Karaisiti ntugarasa Kotiti atokaeratakenaenama paisaenamapa asugasaye.

Kasa atokaenenaenama marusaenamapa asugasaye

⁷ Pigoya, marusa uwaitanti ntanamaba au'wantana aogima aborasinta, kasa'enagaba kampa utaratamisine.⁸ Piya, Koti wasanamika abogana kampa kanarasaogana, maya untine:

Aintiba ka yagaba naeba Isureyo tupe Yuta tupe naeti atokaewaitakena au'wapa kasa'ena aborakuwe, Wa'egawamaba piya untiye, iye.

⁹ Piya, paisaena wanane. Kasa'ena aborakuwe, untiye, iye.

Piya, paipa iyabamajipa iyata u'ma, Isipi marisa ibaburite wama menkitauwagini wantane. Pi ntagaba kamana'nepa uwaitauwagini, atokaenenaenama nkagupi kampa mintantane. Piya pugu, naeba nakabiwaitantone, Wa'egawamaba piya untiye, iye.

¹⁰ Eya, ma ntagaba a'ya waka, Isureyo tu atokaekenaga to kakema mayama utawaitakuwe, Wa'egawama untiye:

Piya, ago kamana'nepa napiyenawaipi atakana waikiye, iye.

Eya, ago kamana'nepa igupi kaetakanwa waikiye, iye.

Piya, naeba ige Koti miyekini, igeba nae tu mpikibewe, iye.

¹¹ Piya, ka ka kina'miba igora miye kina'mipa: Wa'egamakaba abibebe piyomaba, kampa uwaimikibewe, iye.

Eya, igeba iyo'mipa: Wa'egamakaba abibebe piyomaba, kampa uwaimikibewe, iye.

We, pi ntagaba a'ya'ma kina'miba, amana kinape tabe kinape, kaga nagabebe puma nagakibewe, iye.

¹² Piya, pi ntagaba naeba nantara puwaitamagi ataenawaipa mae igasima, aguntae-nawaikaba to kakema kampa napikuwe, Wa'egawamaba piya untiye, iye.

¹³ Piya, Kotiba kasa atokaenenaenaga untipa, marusaenaba abararawaye. Eya, marusa kamana'wapa karenara wama, nagarikena piye.

9

Paisa mono kiye kina'miba yagama kurapa maema muta atantawe

¹ Pigoya, marusa kamanapa Kotiba uwaitamagina, aebe mono ukena kipe mampara aota mono nama kikenaeabe uwaimima iyakintiye.² Piya, igeba ka seri nama asitamagini, marusa marupi kanepe yarebe Koti nkaobi atanta paretibe atauguna waintantiye. Pi mparukaba: Aota marune, omintawe.³ Piya, akapintiba tabe kai itama akugasimagini aka'isa marukaba: Aota marutaka'yane, untawe.⁴ Piya, pi mparupi kaema agunta pasa atakena korirasa punta arata atamagini, nayataru'mu kamana wainta korirasa airari kaenta pokisi kaga atantawe. Pi pokisi antabaipintiba mana naninta wainta korirasa punta kankabebi, Eroni nkasarasa asae'wa pama iraome nkasabe, nayataru'mu kamana kaema aminti ntaba tarabe, kaga atantawe.⁵ Piya, tara enisore kina'mi nkimapia pi polisi abobori potaugunisi, e'wasa Koti antara puratakena auka'i kabintase. We, ibaba kanaenama nkagoba a'ya'maba kampa aborakuwe.

⁶ Pigoya, pabiyama atauguna waintogini, mono kiye kina'miba pi aota seri namapinti ite tumite puma marusa marupinti asu pai'ma, mono yugawaipa puntawe.⁷ Abuguna, monota paitanta yagara ka'wainantoba aka'isa aota marupintiba asu pasintiye. Asi nasiba kampaye. Aebe a'ya'ma kabuba ka yaga ka yaga asu pasintiye. Piya, aebe uwaba kampa inta, aebe korapa mae u'ma ae'waka muta atama a'ya'ma kina'mi nkaibo'enawaika kaga aeyoba itakena ubasintiye.⁸ Pintanaba Aota Awamus'aama mayama tayakintiye: Pi aota seri namapa uwa waintegina marusa auka'i mono yuga uwa pepa, Koti nkaota namapi uma pasikena kipa kampa aborantiyema, napiyiyoma tayakintiye.⁹ Piya, ma kanarapa pi seri nama kanta puma waiye. Piya, wasanamiba paisa mono aega'ma i'muntanabe muta atakenaenabe Koti amegana, pipa napiyenawaimpaba aota'enaba kampa potaye. Kampaye.¹⁰ Piya, naninta nakenaenabe wani ntakenaenabe, wani pasikenaenabe, pika paisa mono'amaba uramiye. Eya, paisaenamaba tau'ama nkagoba wairite kanama waiyegina, a'ya'maena uma arupi ntaga uma nagarikiye.

Karaitsiti aebe ae'wa kuratasa muta atantiye

¹¹ Piya, kasa aogiyenaba aboramogana, Karaitsita kasa monota paitaratanti kiyeba ago ampa aborantiye. Piya, kasa monopipa ubai'ma, paisa seri mono namapa asugasaye. Piya, kasa'enaba wasanamaba kampa ayapisaba puma mampabisena kampaye. Pipa

inatisaenawe. ¹² Piya, Karaisitiba aeba aota marupintiba asu pasintipa, aeba memewama kurape purumaka nkawaroma kurape kampa maete asu pasintiye. Kampaye. Aeba ae'wa kuratasa muta atama ika puratantika miyaba mikune. ¹³ Piya, wasanami i'nintana puguniba, paisa mono kiye kina'miba memewama kurape purumakankama kurape purumaka nkawaro kaenta kagupe maema, wasanami nkiti asunu kaeyuguna, asu'a puma i'amaba Koti nkaobipa aogi puntiye. ¹⁴ We, Karaisiti kurankama asugaintiye. Piya, Karaisitiba aiboenaba kapa kampa punta, aota mimagina, miyaba Awamus'a'ama nkesegiyenarasa ae'wa nkaupa Kotiti muta atantiye. Eya, pi ntugarasa korankamaba napiyenaretasa arirasaena asu'a puma, kasa taumaba tamegi aoganti Kotiti kayokaya'ena potaune.

Korankama aguntaenaba aeyobakasaye

¹⁵ Piya, Isu aeba Kotike wasanage atatarawaisitakena yagara mima, kasa atokaekena kamana esegi piye. Aeba piya pumagina, taba puratai wasanamitepa waiyaba'ena utaratantintanabi ubaseno. Eya, akayuyompentanabisa ika puratakenaga Isuba purintiye.

¹⁶ Piya, pure kina'mi kuta eta'maima wasana imikena pepa, marupa taga pu'wayema umagini eta'maikibewe. ¹⁷ Eya, wasana aogama minteginiba, kotankapa kampa eta'maiyewe. Aeba pureginiba, eta'maiyewe. ¹⁸ Piya, marusa mono kamana pai uma esegi puntapa, igeba yaga aeguma korankapa Koti nkaobi pai'atama esegi puntawe. ¹⁹ Eya, maru'enaba Mosese aeba ago kamanapisa a'ya'ma Koti unti kamana a'ya'ma kina'mipa uwaimitegina, purumaka nkawaroma korape memewama korape wanipe maemagina, sipisipiwama tete aepe kakintape maema aeyu'ma, Koti nkisatibe a'ya'ma kina'mi nkitibe aeguse pugasogana wagana kana puntiye. ²⁰ Aibumagina, Moseseba: Pi kurankamaba Kotiti atokaeritakena untintanaba esegi potaye, untiye. ²¹ Piya pumagina, Moseseba seri mono namatibe mono namapisa kankaberibe korapa aeguse puma pai'itantiye. ²² Eya, ago kamana untitaka, korankama uwomantana aeyoba'ma aogi puwaitaye. Piya, kora kampa pagemisinta, aguntaenawaipa kampa aeyobakasasine.

Karaisitiba ae'wa nkautasa muta atantiye

²³ Pigoya, mampara monopa mantabinti waintintanama nkamankane. Piya, marasaena aota potakena puntiniba, pabiyama yaga kuratasa aeyobantawe. We, mantarasaena muta atama aota potakenaenaba to awametane. ²⁴ Eya, Karaisiti aeba tagantanabi ubasintiye. Piya, wasanami serirasa kimaranta aota mono namapa aeba amankane. Pi ntamapinti wanane. Aeba mantabinti asu pai'ma, ibaba Koti nkaobi uma aborama tao'maeye.

²⁵ Pigoya, paisa monota paitanta kiye kina'miba ka ka kabura yagama kurapa maerite wama Kotiti muta atakenaga aota marupintiba ubasi puntawe. Kaboga kaboga puntasa puma, Karaisitiba ae'wa kuratasaba piyaba kampa puntiye. Kampaye. ²⁶ Piya, aeba kaboga kaboga puntimesinta, Koti mampa puntemi ntaga aukigakenaenawapa agobima wairite kanantesine. Pipa kampaye. Kanapa agarosaogana, Karaisitiba ka yaga ae'wa nkaupa Kotiti muta atama aguntaena maegaintiye. ²⁷ Piya, a'ya'ma kina'mitaba ka'anto purukubompeka uratantikana, aintiba kamanatepa aborakiye. ²⁸ Piya pogana, Karaisitiba uwaena kina'mi nkaguntaena mae igaikenaga ae'wa nkaupa ka yaga Kotiti muta atantiye. Aibuntana, aintiba to kakema tumikibipa, aguntaenaba to kakema mae igaikena wanane. Aeba aobi punta kina'mi nki'ima ibabute ikenaga tumikiye.

10

Paipa muta atantapa kampa aguntaenaba maegaintine

¹ Pigoya, paisa mono ago kamanapa pipa amane. Eya, aogi au'wa ainti aborakibintanaba pipa tagantanawe. Piya, paisa monoti pase kina'mika kaboga kaboga paisa muta atantapa, pika ago kamana'amaba kampa arupu puwaitagini igeba aota kina kampa aborawe. Pipa kampaye. ² Piya, igeba aota kina aborasinta, pika to ka kaburapa kampa mutapa atasine. Piya, monoti pase kina'miba apuya puma miye kina aborasinta, to kakeba aguntaenawaikaga kampa napiyesine. ³ We, a'ya'ma kabuba muta atamaginiba, a'ya'ma yaga aguntaenawaikaga uwa napiyewe. ⁴ Eya, purumakankama kuratasabe memewama kuratasabe aguntaena agora maegaikenaba kampa waintiye. Kampaye. ⁵ Aibuguna, Karaisiti mampabi tumintana Kotipa maya omintiye:

Kaema agunta pasa katakenaenabe muta katakenaenabe kampa kabogana napintana, kaeba pika nau'nepa aboranamintane, iye.

⁶ Piya, kaeti yaga kaekenaenagabe aguntaena maegasima muta atakenaenagabe kampa ka'mu pene, iye.

⁷ Piya, naeba maya yuwe: We, Koti, pai kamana'nepa esapi kaemarantasa puma, ibaba kabugaintana wasikena kanaauwe, yuwe, untiye, iye.

⁸ Piya, aeba ago kamana wasikenaga napima marupa maya untiye: Kaeba kaema agunta pasa katakenaenagabe muta katakenaenagabe, kaeti yaga kaekenaenagabe aguntaena maegasima muta atakenaenagabe, kampa kabegin a kampa ka'mu pene, untiye. ⁹ Piya untana, aka'iba maya untiye: We, kabugaintana wasikena kanaauwe, untiye. Piyama maru'enaba asu'a pugasima, kasa'enaba ae marupi asima esegi potantiye. ¹⁰ Piya, Isu Karaisiti aeba Koti nkabugaintana wasima, au'wapa muta atantiye. Piya puma, aeba ka yaga muta atama esegi pogana aota puratantiye.

Karaisiti imputa atakenaenawampa aguntaenarepa maegaintiye

¹¹ Piya, a'ya'ma mono kiye kina'miba asi nasi asima mima yogawaipa puma muta atabuntaw. Piya puntapa, aguntaenaba agrorapa kampa maegaintiye. ¹² Piya, Karaisiti aeba ka yaga ka muta atama aguntaenaba agora maegaintine. Piya potate, aeba Koti nkayatakanti asu mara'mimagine, ¹³ kama kina'wapa aki puwaitakana agisa aema miyemika aobi puma miye. ¹⁴ Eya, Karaisitiba ka muta atamagina, pi ntugarasa aeti atokaeyompe kina'mite aota puratantika, aota miyaba mikune. ¹⁵ Pika Aota Awamus'a'amageba awaga kamanapa mayama aboraramiye:

¹⁶ Piya, Wa'egawamaba maya untiye: Ma ntagaba a'ya waka, wasana to ka atokaekena kamanapa esegi pukuwe, untiye, iye.

Pi kamanapa mayamawe: Ago kamanapa'nepa igupi atakana waikiye, iye.

Eya, ago kamanapa'nepa napiyenawaipipa kaetakanwa waikiye, untiye, iye.

¹⁷ Pigoya, to amato puma maya untiye:

Aguntaenawaikabe antage'enawaikabe to kakema kampa napikuwe, untiye, iye.

¹⁸ Piya, Kotiba aguntaena ago asu'a pugasaka, aguntaena maegaikena muta atakenaba to kakema kampa waintiye.

Kotiti atokaema miyeno

¹⁹ We, nao'mitaba, Isu kuratasaka kabe aitatantika, kampa taekuruba punta Koti nkaota marupipa asu pasokana kanarasaye. ²⁰ Piya, pi mparupi asu pasikena kasa e'wasa kipa Isu ae'wa nkautasa aitatantiye. Eya, au'wapa kairasa kabera akumparanta kanta puma a'waeratantiye. ²¹ We, mono kyerentaga kana Koti nkaokinatapa kabitata, aeti atokaema miyeno. ²² Piya, aeba korankapa aibarase puma tagupisa ata napiyenarepa aeyobakasima, aota wanitasa tautepisa i'nintana aeyobatagaintika, taeba tara tagiba kampa napinta Kotita tamatititaka'y a puma aeti atokaema miyeno. ²³ Eya, utaratanti Kotiba tagantanama nkagowe. Pika taeba tara tagiba kampa napinta, aeti atokaema tamatiti pompantanaba kampa kaenta, aeti esegima atokaeyano. ²⁴ Eya, pika tao'mikegaba napiima kabima mima, agu kao'enabe aogi yugabe takapintisa aborano. ²⁵ We, monota ai'aru petiba ka'isa kina'miba kampa irosa'ma wanta uwasuwa puma miyewe. Ige pesapa kampa punta, tao'mipa kabiwaitano. We, Karaisiti kanaba aborakena pemika aogima kabiyo.

Koti Ntagarapa a-tikabitaiyo

²⁶ Pigoya, Karaisiti taga kamanapa'ama nkagoba aogima abibebe punta, aintiba taete ntapiyenarasa agunta ki'i nasi nasi pukubompepa, aguntaena maegaikena mutapa to kakema kampa waikiye. Pipa kampaye. ²⁷ Piya pe kina'miti tabera iyekuru piginaba, kamanapa uwaitakenaena igit ikerakan, pabi ntaga tabe yakuatasu Kotiba kama kina'wapa kaegaikiye. ²⁸ Pigoya, taeba abure: Ka'wainaba Mosese nkago kamanapa aemita puma taena pukibipa, tarawo kakaga kina'miba agama kamanapa'wapa aboragini, pi ntagaragaba kampa intarapa puma aeguyigina purikiye. ²⁹ We, to ka'wainaba Koti Ntagara akabitamikaba, ayawema napiyewe. Pi ntgararamaba atokaekena kuratasaka aota yagara aboranti, pi kurapa i'nintana potamagina, awagaena taminti Nkawamus'a'amaka uma ata potamagina, aeba tabe kuntuyenaba maekiye. ³⁰ Eya: Kamparaga ika nkantota'ena nae'enawe, yemi ntgararama nkagowapa ago agaune. Piya, aeba to ka maya untiye: Wa'ega aeba aokina'mi kamanapa abima aewa a'yiginkitakiye, untiye. ³¹ We, e'wasa Kotiba taraku'ma kamparaga ikatepa aboraramikibipa, pipa tabe taekuruyenaw.

Tamatiti'enara asima esegi peno

³² Pigoya, tigeba paipa Kotitispa e'wasaena maentaka napiyiyo. Pi ntgaraba tabe kuntuyenaba timigiri, tigeba aesaga'ma araga ntuga puma esegi puntaw. ³³ Piya, ka'isa yagaba wasanami nkiyobi asiritama, kamparaga kamanapa uritama tabe kuntuyenena timintini, to ka'isa yagaba tiyo'mikeba ka'masa puma imuguri, tigeba tiyo'miti iyo'maekena atokaentaw. ³⁴ Eya, tigeba iga'na punta kinakaba tintara puwaitantaw. We, ka'isa yagaba wasanamiba mone kutati tiparauguripa, tigeba: Aerawane, uma, tigeti asugasima

waiyaba'enaripa waintika napima, tintawamaba asoya puntawe. ³⁵ Piya pumagiri, tigeba pi esegi timatiti'enabisa tabe ikantana maekibewe. Pipa a-kasiyo. ³⁶ Piya, tigeba esegima asimagiri, Koti nkabugaintana wasiyiyo. Piya puntiripa, Koti utaritantintanaba maekibewe. ³⁷ Eya, mono isa'amaba maya iye:

Pigoya, aro ntgantowе, iye.

Aborakibi ntagara kampa uwa migaranta aborakiye, iye.

³⁸ Piya, arupu kina'nempiba imatiti puma miyaba mikibewe, iye.

We, kapa a'wae puma natakibipa, nantawamaba kampa a'mu potakiye, untiye, iye.

³⁹ We, taeba a'wae puma ataenabi mpikena kina'mi tupisa kampa mintune. Taeba tamatiti puma tauma waiyaba mikena kina'mi tupisawe.

11

Tamatiti kamanane

¹ Tamatiti'enaba pipa Kotiti atokaema agawa pompentanama nkagowe. Eya, taowama kampa agamintanaba tagu'amaba tamatiti puma tagantana piye. ² Piya, paisa kina'miba esegima imatiti puguna, Kotiba igaogana kanarasantiye. ³ Piya, taeba tamatiti puma, Koti nkawamutasa maba punti kamanapa abune. Eya, Kotiba ka'ena kampa waintapisa aborantika agaune.

Eborowa Inokowa Nowawa sumawe

⁴ Eboro aeba Kotiti amatiti puma muta ataogana, pi mputa ataome'naba Keni muta ataomepa againtiye. Eya, Eboro amatiti pogana, Kotiba muta ataoamentanawaka agaogana kanarasaoagna: Arupu yagaragawee, otantiye. We, Eboro pu'wantemipa amatiti'enawampaba kamanapa uwa uyaba miye.

⁵ Inoko aeba Kotiti amatiti pogana, purikenaenama auti kampa aegayabomeka Kotiba aoganta ababute mantabinti intiye. Eya, wasanamiba aeka aguyosagaumepa, Koti ababurogini kampa agantawе. Piya, Inoko kampa intogana aeka Koti abogana kanarasantiye, mono isa'amaba piya iye. ⁶ Piya, wasanama Kotiti kampa amatiti pemipa, Koti abimagina kampa a'mu potaye. Kampaye. We, wasanamaba Kotiti atokaekena puntanaba, aeba: Koti uwa mintana aeka aguyosaga kinapa aogi ika imikiye, utegina amatiti pekanakanarasakiye.

⁷ Nowa aeba Kotiti amatiti puntiye. Piya pogana, Kotiba ainti aborakibintanaga omogana, Nowaba kamanawapa aega'ma ae tunka nki'ikenaga wanipisa kareba puntiye. Piya pumagina, aeba pi amatiti'ena yugawatasa mampabisa kinapa kamanapa uwaitantiye. Eya, amatiti'enawata arupu puratakenaenara Nowa paitaratantiye.

Abara'amuwe

⁸ Abara'amu aeba Kotiti amatiti pogana, Kotiba Abara'amuka kega'e yogana pi kamanapa wasintiye. Piya, aeba kuma'wapa kaitegina, Koti amikena maga agakena wama amatiti puta kampa agantome ki'i wantiye. ⁹ Wamagina, aeba amatiti puma Koti otaome mpara wama, pimpara namu yagara kanta puma umintantiye. Aeba seri nama kima'ma mintoginisi, yagaraawa Aisakibe Yekobube kaga mintantase. Piya, isigeba pimpa kaga maekibesema, Koti uma esegi puntiye. ¹⁰ Piya, Abara'amuba a'ya'ma yaga aota kumapi ampikenaga napintiye. Pi kumapa esegi wa'ega wantaga, Koti aema aborakibi kumaka napintiye.

¹¹ Serageba Kotiti amatiti puntiye. Piya, aeba yakari pukena kanapa ago agasoganaba, otanti ntgarama kamanaka: Tagane, uma amatiti puma, kanara yagaraena pukena esegiyenaba maentiye. ¹² Piya, Abara'amuba karenarama aro ntgantato purikena pogini, aepisa uwaena kina aborantawе. Eya, mantarisa noribe kayo wanitasa kepiyape kampa aisompesa puma, pi nkawameta aborantawе.

¹³ Pigoya, pi kina'miba imatiti'enayaga mima pu'waewantawе. Piya, utawaitanti ntanama nkau'wa kampa maenta, pagasara waintogini agama i'mu puma mintantawе. Piya igeba: Taeba namu'isa kina kanta puma mamparapa a'yo ampintune, untawе. ¹⁴ Piya yume kina'miba ma agowai iyota aguyosagakena untawе. ¹⁵ We, igeba ika'intaesipotanta mpawalika napintasinta, aguyosa'ma a'wae puma wakena kipa agantasinе. ¹⁶ We, pipa kampaye. Igeba mawaipa agasima waintome mpa agakenaga ibugantiye. Eya, manta asu agakenaga ibugantiye. Piya puguna, Kotiba abima ige Koti mikenaga kampa ani puntiye. Kampaye. Aeba aota kuma'waipa ago yokege puntiye.

¹⁷⁻¹⁸ Piya, Abara'amuba Kotiti amatiti pogana, Koti abara'amu nkagoba agakenaga omogana, aeba Aisakipa ababuma Kotiti muta atakena puntiye. We, paipa Kotiba Abara'amupa maya omintiye: Aisakipisa yakkarak'i'nunkapa uwaena aborakibewe, omintiye. Pi kamanakaba Abara'amuba kampa tara agiba napinta, aeba Koti nkawamu

wasima, ka yagarantowa aeguma kaema muta atakena puntiye. ¹⁹ Piya, aeba mayama napintiye: Aeba pu'wakanaba Kotiba kanara asitakiyema, napima ababute wantiye. Eya, aeba yagarawa purintapisa ababunti nkawametane.

Aisakiwa Yekobuwa Yosepewa sumawe

²⁰ Aisaki aeba Kotiti amatiti pumagina, Yekobuke Isokeba a'mu puwaisitama, ainti Kotitisa isigeti aborakibintanaga uma a'mu puwaisitantiye.

²¹ Yekobu aeba Kotiti amatiti puma, purikena puntanaba aeba a'muntana Yosepe ntagara tara isimintiye. Piyama asawata amagi tara puma Kotiti parokaema a'mu puwaisitantiye.

²² Yosepe aeba Kotiti amatiti pumagina, purikena kana'wa arosaogana, Isureyo kina'miba Isipi ma kaitakibe kamanapa untana, ayampuwaka: Uma kainataiyo, uwaimintiye.

Mosesewe

²³ Mosese anoge abage isigeba Kotiti isimatiti puma yakari potamaginisi, Mosese agausumepa aogi yagara aboraoginisi, isigeba mabisa wa'egawama kamanakaba kampa isiyekuru pumaginisi, kakaga u kakatantase.

²⁴ Mosese aeba Kotiti amatiti pumagina, anosantanaba Parao nkaragama ntagarawe usanagaba kampa abuntiye. ²⁵ Piya, aguntaenama nkigaenawapa aronkanto waiyogana pipinti uma pasisanagaba kampa abogana, aeba Koti nkaokina'mige kuntaena mae-sanaga abuntiye. ²⁶ Eya, aeba Isipi kina'mi mpone kuta maesanaga kampa abogana, aeba Karaisiti aborakibi ntagaga karana potaumekaba: Kanarane, untiye. Piya, aeba Kotitisa aogi ika mpaekenaga piya puntiye.

²⁷ Piya, Mosese aeba Kotiti amatiti pumagina, mabisa wa'ega yagarama nkamo'enagaba kampa aekuru punta, asima Isipi maba kaintiye. Piya, aeba Koti nkagasu puma asima esegi puntiye. ²⁸ Aeba amatiti puma, Pasoba naninta nama, korapa maema kabera pai'ataogana marusa yagara aegukena enisorewama agama kampa iyeguntiye.

²⁹ Isureyo kina'miba Kotiti imatiti puma, tete kayo wanipi uwa mari wasuma ta'eyuguna, Isipi kina'miba igate ika'i wauguna, wanipa tumima iyeguyogini pirintama naesuwaewantawe.

³⁰ Igeba Kotiti imatiti pumagini, wama Yeriko kuma tonaentisa tarumaema yaga ainkinki puguna, yabatasa kimaranta kibi takuma aigasaba'wantiye. ³¹ Piya, kumi wae Areyabu aeba Kotiti amatiti pomekana, aeba tara yagara tara pi kumapinti kiya pukena wausuguna isiyo'maeyomekana, pi kumatasa kamana akayuyome kinake kampa purintiye.

Uwaena to kina'miba imatiti puntawe

³² Pigoya, aya kita to kamanapa amato puma usuwe. A'ya'ma kina'mika yosinta e'ero kamana yosine. Piya, Kitiyoniwa, Parakiwa, Samusoniwa, Yepitawa, Tebitiwa, Samuweriwa, a'ya'ma poropete kinana, sumagini, ³³ igeba Kotiti imatiti puntawe. Piya, igeba ma'enya puma uwoma kina igaintawe. Igeba arupu puwaitakena yuga puntawe. Igeba Koti utawaitanti nkau'wapa maentawe. Igeba araiyonni yagami iba nakena iwamupa akunintawe. ³⁴ Igeba tabe yakunkama nkesegiyenawapa asugasima atu'mantawe. Igeba iyegaka wauguna paroya ntoginkamaba kampa irisanziye. Igeba magimagiyenabisa esegiyenawaipa maentawe. Igeba esegi ma'ena kina aborantawe. Igeba namu'isa kama kinapa igarubakaentawe. ³⁵ Waya'miba iyokinapa purintapisa ibabuntawe.

Pigoya, to ka'isa kina'miba asima aogi e'wasaena maekenaga napiyuguni karana itama iyeguyuguni: Aerawane, ute pu'wantawe. ³⁶ To ka'isa kina'miba kuntaena maeyuguni karana puwaita kina'miba ige'waintanarakra akayasuma, iga'na kasutasa iyegumagini, esegi iga'narasara kirokaetama, iga'na namapi itantawe. ³⁷ Piya, igeti kuntaena maeyuguni, yaba kasutasa iyeguntini, sorasa ikapi katisakasi puntini, paroya ntogirasa iyeguyuguni pu'wantawe. Piya, igeba sipisipa aribe meme aribe maema itasaenaba puma mimagini, kusi kina'ena puma miyuguni, wasanamiba tabe kuntuyena imima, ataena puwaitantawe. ³⁸ Igeba ka'me mparibe amu wainta maribe wagana kana puma, yaba nkagepintibe ma agepintibe uma kakama mintantawe. We, pi kina'miba aogima imatiti puma, mampabisa kina'mipa asu igasuguni igege mikenaba kampa kanarasantiye.

³⁹ We, a'ya'ma pi kina'miba Kotiti imatiti puguna, Koti igaogana kanarasantiye. Aibogini, igeba Koti utawaitanti ntanama nkau'wapa kampa maentawe. Kampaye.

⁴⁰ Piya, pi nkagoba mayamawe: Koti aeba aogima againtintanaba uwa ae'waratakena puntine. Eya, paisa imatiti pume kina'miba kampa paitaratama taobi puma taebe kaga aota'ena aborama au'wapa kaga maekune.

12

Isu paitarantantika aega'ma esegi peno

¹ Pigoya, pi paisa kina'miba imatiti'enawaiapa tayakintawe. Piya, iwaga kamana tabe ibina kanta puma taenkima kobe purataye. Piya pegi, taeba a'ya'ma kuntaenarepe tarakuri nkaguntaenarepe kasima, tantawamaba maema esegi puma ankagasi ankagasi puma utaratanti mpono ki'i karuseno. ²Eya, taowamaba Isuti agano. Aeba amatit'enama nkagoba mima paitaratama tamatiti'enama nkau'wapa aborakena yagarawe. Piya, aeba a'muntanabi mpikenaga napima, auki nakiyena maema yara pu'ma anintanama nkabobori asugaintiye. Piya, ibaba Koti nkaemu yabaera ayatakanti asu mara'mintiye. Pika napima aepa agano.

Koti kuntaena tamemipa aota puratakenawe

³ We, tigeba Isuka aogima ntapiyyo. Piya, agunta pume kina'miba kama potantaka, pipa aeba asima esegi puntiye. Pika tigeba napima, tintawamaba uwasuwa puma tiyonanta puma ware'nasanaga, aeka napima asima esegi piyo. ⁴Piya, aguntaenaba aeguma mabi nkatakenaraka ma'ena pepa, koratipa kampa pagiye. Asugasima esegi piyo. ⁵We, Koti: Naene ntagararawewe, urimima esegi puritami kamanapa ago tigegu'a piya, a. Pipa mayamawee:

Yagaranene. Wa'egawama parutu pugatakanapa, uwaena kantaba a-peno, iye.

Piya, aeba parutu pugatakena kuntuyena kamekanapa, kantawamaba anuntanaba a-peno, iye.

⁶ Eya, Wa'egawama ka yagara agu kao'ena potamipa, antabaipinti parutu potakena yugaba piye, iye.

Piyama ae tankapa ababuwaitami kinapa eru kasutasa parutu puwaitaye, mono isa'ama piya iye.

⁷ Piya, Kotiba parutu puritakenaenarapa a-tiyekuru puma, asima esegi puma maeyiyo. Eya, Koti ntagarawa mpiyegana piya puritaye. We, yagarawampa aba kampa parutu potamipa, aempaye. Pipa Kampaye. ⁸We, a'ya'ma Koti tumpitepa parutu puratakena yugaba tantabaipi puntiye. Piya, aeba kampa parutu puritaminsita, tigeba yagarawapa kampa mima ke'isa yagara kanta pesine. ⁹Pikaba to ka urimekiri abiyo: Mabisabarempagiba parutu purataga, ige igeba asagayuyune. We, tagu'ama nkaba igepta asu igasima mintika, amentapinti miyaba mima e'wasaenabi mpiyeno. ¹⁰Piya, mabisabarempagiba igewai ntapiyena aega'ma aro ntaganto parutu puratagan, Kotiba tao'maekenaga parutu puratamika, taeba aota'enawapi ubasikune. ¹¹Piya, marupa parutu puratamika tanta asoyaena kampa punta kunta pegi, aintiba parutu puratami kina'mitaba paru puma arupuyenama nkau'wapa tayapisa aborakune.

Asima esegi piyo

¹² Piya, magimagi tiyenkama nkaga'nawapa pakisuma yogaba esegima piyo. Tigisa pu'waintakiripa aebartama asima esegi piyo. ¹³Pugage kina'mi nkigisa airigiwasanaga, kepa arupu puma iyo'maeayakan itawano.

¹⁴ Eya, tigeba wasanaba kaga paruyenabi mpikenaga yogaba piyo. Tigeba aota kina aborama mikenaga esegi piyo. We, aota'ena kampa waintai'nagiba Wa'egaba kampa asu agakibewe. ¹⁵Piya, tigetisa ka'wainaba Koti nkawagaenawa kaisanaga aogima kabiyiyo. Piya, tikapi asa kamana aborama ata puma uwoma kinapa i'nintana puwaitasanaga, aogima kabiyiyo. ¹⁶Piya, Iso puntisa puma kumiyena pusangabé Koti mpono akabitasanagabe aogima kabiyiyo. Piya, aeba amaru yagarama mpaekenaenaba a'nantomenkamima ka nakenaenawapa ika puntiye. ¹⁷Ika pumagina, aintiba pi nka'muntanamaekena pogana Kotiba kakataogana, Isoba tabera kubé'ena puma aguyosagaomepa, ae a'wae puma maekena kipa kampa waintantiye. Pipa ago abintawé. Ae puntisa pusangaga aogima kabiyiyo.

Moseseti wanane, Isuti aboraune

¹⁸ Pigoya, tayabamagi Sainai amuti aborama au'wainta'enamati iya atantasa puma arirasaenariba kampa aega'ma aborawé. Kampaye. Piya, igetiba tabe yakupe tununtanabe ibinape antaruyenabe irari kaentiye. ¹⁹Eya, pikuriyama aga yogana, awamu aga agasiya kamana yogini, abume kina'miba: To kakema kampa abema tagigaye, untawé. ²⁰Piya, Kotiba maya untiye: Ka yagaramawo, yagamawo, pi nkamuta aya atama arakurekiripa, yaba kasutasa aeguyigina pureno, untiye. Piya yogini, pi kamanakaba iyekuru pumagini: Toba a-so, untawé. ²¹We, iyekuru puguna pintanaraká Mosesgebe: Naekuru puma tabaraba puwe, untiye.

²² Pigoya, tigeba pi nkamuti wanane. Tigeba Saiyoni amuti irosantawé. Eya, miyaba Koti mintiti ae kumati mantarasa Yerusaremi aborakenaga irasantawé. Pi kumatia

enisore kina kampa aisuwaeyama kina mima i'mu pewe.²³ Pita'i marusa yakaraki'nu, mantabinti igewai kaenta kina'mi aki pegana, a'ya'ma kina'mi kamana abima pakobemi ntagara Kotiba miyegini, aota puwaitanti arupu kina'mi nkimbaba miyewe.²⁴ Eya, pita'i Isu, aebe Kotike wasanage atarawaisitama kasa utaratanti kamana'ama nkau'wa aborakena yagara mintiye. Eya, pita'i paitatanti kurankapa, Eboru kura agasima awaga yugaba aogima aboranti kurapa waintiye. We, pi kumati aborakenaga aota kina irosantawe.

Koti untu kamanapa aogima kabiyeno

²⁵ Pigoya, taga kamana uriminti'napa tika'intaesi pusanaga kabima miyiyo. Piya, paitaka'ya mabi Mosese aebe esegi kamana uwaitaogini, akayuyuguna Kotiba ata antota'ena imogini kampa kakama mintantawe. We, Kotiba mantabintisa esegi kamana uramintegi, taka'intaesi potaompeka antota'ena tamemipa kampa kakama mikune.²⁶ Piya, paipa Koti nkawamu'ama mampaba imimapu puntiye. Piya puntana aebe to ka maya uramintiye: Naeba to ka yagaba ma abiba kampaye. Mantabe mabe kaga asari pukuwe, untiye.²⁷ Pi kamanapa: To ka yagaba, uma piyama tayakiye: A'ya'maena pumarantintanaba asari puma aebasanakan, to ka'isa kampa asari pukenaenaba uwa waikiye.

²⁸ Piya, kabiratakenaena maekubompeka ta'mu peno. Pipa kampa asari pukenaenawe. Eya, pika Kotiti ta'mu potamagi, ae'wa nkabemintana puma agega'e asagayuma aeka taekuru peno.²⁹ Pipa nanagawe: Kotirempa aebe yaku tawaewakenaenama nkagowe.

13

Taeba tao'mipa tauma imeno

¹ Pigoya, tigeba mono kinatawa, tiyo'mipa timaba imiyaba miyiyo.² Tigeba na'mu kina a-tiyogapa agagasima kayone puwaitaiyo. We, paipa ka'isa kina'miba pabiyama wasanawema napimagini, enisore kinapa kayone puwaitama ibabuntaw. ³ Tigeba iga'nabi mpinta kina'mikaba aogima napintiri, tiba puritasuma napima iyo'maeyiyo. Piya pumagiri, tigeba i'waita kuntaena maeya kina'mikaba napintiri, kaga wasanarawema napima iyo'maeyiyo.

⁴ Pigoya, iba'ena pukenaenaba kanara'enawe. Pipa asagayuntiri, i'nintana potasanaga kabima mima kumiyenaba a-piyo. Eya, kumiyenaba pe kinape kupiyona pe kinape Kotiba ata ikapa imikiye.

⁵ Tigeba mone kutakaba asi nasi maekenagaba a-ntapiyiyo. Wairitanti nkawameta maema uwa miyiyo. Piya, Kotiba maya uramintiye: Naeba kaege ampima kampa nakabikatama kamparakaya katakuwe, untiye.⁶ Eya, taeba pikapima tara tagi kampa napinta, mayama esegima seno:

Wa'ega aebe nao'maenta yagara mintemika, kampa naekuruba pukuwe, yeno. Piya, wasanamiba ige'wai ntapiyenabisaba nana punatakibewe. Pipa kampaye, taeba yeno.

Paisa mono'ama nkawameta aegaraune

⁷ Pigoya, tigeba Koti kamana uriminta paitaritanta kinatimpikaba napiyiyo. Eya, mono kita nasiyenawaimpa nkagowapa agama imatiti pesa piyo.⁸ Piya, Isu Karaisiti aebe aibe ibabe a'ya'ma yagabe ka'yaga miyemisa puma miyabane.⁹ Piya, tonarona kasa kamana'ama ampa tibaibusanaga kabiyiyo. Piya: Pipa nao, pipa a-ntao, kamana wasiye kina'miba pintanarasaba esegiyenaba kampa maeyawe. Kampaye. We, tigeba Kotitiswa awagaena maeyaka tigupa esegi pukibewe.

¹⁰ Pigoya, taetiba aota arata yare awameta Karaisitiba mintiye. Piya, paisa seri namapisa mono wasiye kina'miba aota aratarasaba nakenaba kampa maeyawe.¹¹ Piya, monota paitanta kiyema yagama kurapa maete seri nama nkaota marupintiba ima, aguntaena maegaikena muta atabuntiye. Piya puntana, yagama nkau'wapa abe'i yakupi tumpa kaegasi puntiye.¹² Piya pumagina, Isuba abe'i kagisa awari auki nakiyenaba maema ae'wa kurankatas aota puratakena puntiye.¹³ Piya, taegeba kuma abe'i wasu puma aeti atokaema ae kuntu yugabi ubaseno.¹⁴ Eya, mampabipa waiyaba kuma'amaba kampa taeti waiyegi, taebe taga kuma aborakibika aobi pune.¹⁵ Pigoya, pik aeti atokaema Kotiti ta'mu potakena muta atano. Eya, agewapa maete ima tawamu'ama nkau'wapa muta atano.¹⁶ Piya, aogiyena pukenaenabe titasaenarasa tiyo'mipa iyo'maekenaenabe, uwasuwaba a-piyo. Piya puma iyo'maekibepa, tigeba Kotiti muta ataiginaba a'mu pukiye.

¹⁷ Pigoya, paitaritanta kinatimpimpi imentapinti mima kamana'waipa wasiyiyo. Piya, igebe aintiba Kotiti uma aborama yogawaimpa nkawaga kamanapa omikenaga tigupipa

kabiwaitawe. Aibigiripa, tigeba kamana'waipa aega'ma wasiyiyo. Wasikibepa, igeba i'muntanabisa aogima kabiritakibewe. A'yugu intawama kunta'yaga kabiritantiniba, kampa aogima tiyo'maekibewe.

Nagarikena kamanane

¹⁸ Pigoya, tigeba Kotiti nunamu yigina tao'maeyano. Piya, taeba a'ya'ma yaga arupu puma nasikenaenareka Koti nkaobi kamanatepa kampa waintiyema, napiyune. ¹⁹ Eya, nunamurasa nao'maeyigi, Koti nao'maeyakapa tigeti karu'ena to kake ampa aborakuwema, esegima urimuwe.

²⁰ Pigoya, Wa'egare Isu aeba yagawampate tabe kiyerene. Isuba atokaeratayaba mike-naga purogana, paru Koti aeba purintapisa asitantiye. ²¹ Tigeba ae'wa ntapiyena aegarak-enaga, asitanti Kotiba aogiyenarasa paitaritama tiyo'maeyano. Eya, Isu Karaisiti ntugarasa ae aobi kanarasantintana tagupipa a'ya'ma aborano. Ae agega'eba asagayuyaba miyeno. Tagane.

²² We, nao'mitaba, naeba aro kamana kaema urimekiripa, esegi kamana'nepa abigina ataba a-peno. ²³ Pigoya, tao'yagara Timotika urimekiri abiyo. Aepa iga'nabisaba ago akariyoba atakana, agaro kanakaka ababurekara tigeti wakuse.

²⁴ Pigoya, a'ya'ma paitaritanta kinatimpibe a'ya'ma Kotiti atokaenta kina'mibe, taetis-aba: Aya pewe, uwaimiyo. Piya, Itari marisa kina'miba kaga: Aya pewe, yewe.

²⁵ Pigoya, Koti nkawagaenawapa a'ya'ma kina'mititi waima waiyeno.

YEMISI MA NKISA KAENTIYE

¹ Nae Yemisina, Kotike Wa'ega Isu Karaisitike isige kayokaya yagara mimagi, nagsarisa tara tumpaema Yuta tupisa to mari uminta kina'mititi, ma nkisapa tigeti kaema: Aya pewe, yuwe.

Amiyo'enaga esegi purataye

² We, nao'mitaba, toma toma nkamiyo'enaba tigeti aborakiri, abigina tintaba asoya puma ti'mu peno. ³ Piya, tigeba abintawe. Ka'enama aborama timatiti'enarika ampa timiyo pekiri asugaikibepa, kuntaena aesaga pikena esegiyenaba maekibewe. ⁴ Piya, kuntaena aesaga pikena esegiyenama nkau'wapa aborano. Au'wapa piyama aborakibepa, tigeti ka'isaenamaba kampa kakama waiyekiri tigeba monota kanarasawaema aota kina mikibewe.

Tigupa aisa'ma Wa'egamati nunamu otaiyo

⁵ Pigoya, tige tikapisa ka'waina aogi napiyena kampa wainta, Kotiti abigakana ameno.

Eya, Kotiba kaba kampa abi'ma, kampa a'yikinta aogi napiyenaba paga uwa amikiye.

⁶ We, pi ntagaramaba tara agi napisanaga aogima amatiti puma Kotiti abigano. Piya, tara agi napi ntagara aeba kayo wanu esiba pegina aiga'yo'ya puma maete nasisu piye. ⁷⁻⁸ Piya kina'maba tara agiba napiyekanaba, aunkama igarumiga pekan: Wa'egawamapisa maekuwemaba, a-ntapiyено. Aeba ka'enaba kampa maekiye. Kampaye.

Kotantaga mikenaena pipa au'wa kampaye

⁹ Pigoya, kota kampa wainta mono kina'maba Koti au'ikibika a'mu peno. ¹⁰ Tabe kuta wainta kina'maba: Tumima mintuwe uma abima a'mu peno. Piya, yao aosawama aebira puma pu'waisa puma pu'wakiye. ¹¹ Eya, pankamaba irosa'ma tama mu'mu pegina, kabuyena asa wagina, aosawampaba takuma tumima awa'enawapa ata puwaisa puma, tabe kuta wainta kina'maba yogawapa kampa a'ya wantakana akapi pu'wakiye.

Wasana amiyo pukena kamanane

¹² Pigoya, kuntaena aesaga pemi'naba a'muntanabi mpikiye. Piya, a'ya'ma amiyo'enawapa agasimagnabu Kotitisa e'wasa antota maekiye. Eya, Koti aogi utamarranti antota'ena a'ya'ma agu kao'ena pota kina'mipa imikiye. ¹³ Pigoya, aguntaena pukena amiyo'enamaba ka yagara abaibekanaba, piyama: Koti nababegi puweba, aseno. Pipa kampaye. Aguntaenamaba Kotipa kampa abaibegina, Kotiba to wasanaba kampa abaibuma aguntaenarapa ataye. Kampaye. ¹⁴ We, taeba ka ka kina'mitaba taete ntapiyena aegarakanaba inoyanta aesuma tabaibukiye. ¹⁵ Piya, taete ntapiyena aga'e pusu puma, toma toma nkaguntaena aboragina, aguntaenamaba anosantanaba tagu'amapa purikenaena aboramikiye.

¹⁶ We, nabugai ntao'mitaba, kumpari'ena tiyobi airarikaisanaga kabiyiyo. ¹⁷ Piya, a'ya'ma aogiyenabe aota'enabe tumemitanaba inatisaena manane. Eya, tabarempa e'wasa agowama otagina taetiba tumiye. Piya, aeti a'wae pikenaenaba kampa waintegina, ama nkaite e'wasa pute pukenaenaba aetiba kampa waintiye. Pipa kampaye.

¹⁸ Aeba ae'wa ntapiyena aega'ma taga kamana'wapa aborarameka, taeba marusa kina kanta puma mima ae aobi a'ya'ma aboranta kina asu igasima aota miyeno.

Kamana'ama nkagoba wasikenaenawe

¹⁹ We, nao'nempitaba, aogima abiyo: A'ya'ma kina'mitaba kamana abikenaenaga aseyo puma, kamana ukenaenagabe kabirakenaenagabe kunta peno. ²⁰ Piya, wasanama nkamo'enamaba Koti nkarupuyenaba kampa aboraye. ²¹ Piya, a'ya'ma i'nintanabe a'ya'ma to ataenabe kasimagiri, Koti tintabapi kutitami kamanapa aogima kabiyiyo. Pi kamana'amaba tima'ama au'ikenaenawe.

²² Pigoya, mono kamanatakwasina au'wapa aboraiyo. We, tigeba uwa abima kampa wasikibepa, amiyo'ena puma tiyobi airarikaekibewe. ²³ Piya, ka'waina aeba mono kamana uwa abima kampa wasikibi'naba, aeba pemontabisataowa agaompesa pukiye. ²⁴ Piya, ae'wa aowa agama, a'wae puma wakibipa, aogawakaba karu'ena agegu'a pukiye. ²⁵ We, aota ago kamana'ama aguntaenama nkiga'nabisaba a'yoba tatagina, ka'waina pi kamana'ama nkagobi agama kampa uwa atama, aeba aogima wasima au'wa aborakibepa, wasikenaga a'muntanabi mpikiye.

²⁶ Pigoya, ka'waina aeba: Monota mintuwe, yi'naba, antebuwamapa kampa kiya puntapa, aeba ae agu aowawapa airarikaeyagina, mono'wampaba anagiyena kanta piye.

²⁷ We, tabarempa Koti nkaobipa i'nintana kampa punta aota mono aegarakenaenaba mayamawe: Taeba kinta yagarabe abeya waepe kuntaenabi mpiyeka wama igama

iyo'maemagi, mampabisa i'ntanaba taekita puma miyeno. Piya pukubompepa, taga mponota mikune.

2

Koti nkaobi a'ya'ma kina'miba ka'masa puma miyewe

¹ We, nao'mitaba, tigeba e'wasa Wa'egare Isu Karaisititi timatiti pota'nagitaba, wasana intapera tumintapera ka kana puwaitaiyo. ² Piya, tigeba monota ai'aru piginaba, ka yagarama aebe kasa'ena autasaenabe awa'enawape purite pasekana, to ka kusi yagarama abaraena autasaena purite asu pasekiripa, ³ tigeba aogi autasaena purinta'nagipa: Mata'i kanama aogi yabaera ampiyo, omintiri, to ka kusi yagarakaba: Kaeba pagasara asima miyo, omikibewo: Tagisabi mpura miyo, omikibewo. Piya ukibepa ataaenewa. ⁴ Tigeba piyaena puntiripa, tiyotimpipa pako puwaitawe. We, piyaena puntiripa, tigeba agunta napiyena waintaga kina mima, kamana abima atama a'yiki kina kanta puma miyewe.

⁵ We, nabugai ntao'nempitaba, abiyo. Koti untegini, mamparasaenaga kusi pe kina'miba imatit'enawaimpaba kota wainta kina kanta pumagini kabiratakenaenabi ubasikibewe. Eya, Kotiba pi kinapa uwaitantikini, igeba agu kao'ena potaompe kina'mite nkutaratanta'enabi ubasikibewe. ⁶ We, tigeba kusi kina'mi nkigeba maete tumima ataenaba pewe. Pigoya, ae kina'mi kuntaena timewe. Ae kina'mi tibabuma kamana uritawe. Kota wainta kina igeba piyaba puritawe. Kusi kinapa kampaye. ⁷ Piya, kota wainta kina'mi igeba tiba puritanti nkagiba akayasotawe. Eya, igeba Karaisiti nkaota agiba maete tumewe.

⁸ Pigoya, kabiratakenaenama nkago kamana'amaba mono isapipa maya iye: Kaeka kau kabitampesa puma kagorasa kinapa agu kao'ena potao, iye. Pi kamana agoba wasiyigina kanarasano. ⁹ Piya, tigeba wasana pako puma tabe kina'amana aogi potentiripa, tigeba aguntaenaba pewe. Piya piginaba, ago kamana'amaba tigu'amapi piyekiri, tigeba kamana akayukena kinatawe. ¹⁰ Piya, ka'waina aebe ka kamana aemita pipa, a'ya'ma to kamana agoba aegaraginaba, Koti nkaobipa a'ya'ma kamana'ama nkagoba aemita piye. ¹¹ Piya, kumiyenaba a-po unti ntagaramaba: Wasanaba a-nkaeguyegana pureno, untiye. We, ka'waina kumiyenaba kampa punta, wasana aeguma kaiyipa, aebe ago kamana akayukena yagara miye. ¹² Pigoya, aguntaenabiswa akariyoba titani kamanakaba Kotiba napima a'yigititakiye. Pika tigeba napima aogi kamana uma aogiyena peno. ¹³ Piya, antara'ena kampa pukibi'napa Kotiba kampa antara'ena potama kamana otakiye. We, antara'enamaba kamana otakenaenaba agaikkiye.

Tamatiti'enama nkau'wampantanawe

¹⁴ We, nao'nempitaba, ka'waina aebe kampa aogi yugaba puma: Namatiti'enayaga mintuwe, ukibipa, ayama ao'maekiye, a. Amatiti'enawapa ayama au'ikiye, a. ¹⁵ Piya, tiyo'yagaramaba autasaenabe nakenabe aisa'ma mintakanaba, ¹⁶ tigepisa ka'wainaba: Aogima mima agoya pegana kaga'e pano, omintana, i'anape nanintabe kampa ameganaba, au'amaba ayamabaya aborama ao'maekiye. Pipa kampaye. ¹⁷ Piya puma, amatiti'ena abiwapa waima au'wantaga yuga kampa aboraginaba, pi nkamatiti'enamaba pu'wasu piye.

¹⁸ We, ka yagarama: Kaeba kamatiti peka, naeba aogi yuga puwe, unamikiyema napiyuwe. Pigoya, naeba maya omukuwe: Kaeba ayama kamatiti'enamana nayakega, pabiyama aogi yuganetasa namatiti'enaba kayakuwe, omukuwe. ¹⁹ We, tigeba: Ka Koti mintiye, uma abegana kanarasaye. Abiyo. Kewamabeba kaga pi kamanapa abima, igeba tabaraba pewe. ²⁰ We, tigeba aibo'ena pewe. Timatiti'enamana puntiri au'wampa ntuguba kampa aborakibepa, timatiti'enarimpaba anamo wae kanta pukibewe. Pi'na nkagoba tiyakiswu, a.

²¹ Piya, paipa tayabama Abara'amuba aebe Koti nkawamu wasima, yagarawapa Aisakipa muta atakena arata yarerit atantine. Piya pogana Kotiba yogawata agategina: Arupu yagarawewe, otantine. ²² Piya, tigeba ago abewe. Amatiti'enabe aogi yugabe kaga puntine. Eya, amatiti'enawampa nkaupa yogawane. ²³ Piya, paipa Abara'amuba Kotiti amatiti pogana, Kotiba agama arupu potantiyema, mono isa'ama uramiye. Pi kamanapa Abara'amu yogawataswa esegi potantiyiye. Aibogini, wasanamiba: Aebe Koti nka'o'yagarawewe, otantawe. ²⁴ Piya, ibaba tigeba abewe. Amatiti'enamana nane. Amatiti'enama nkau'wapa pipa aogi yugarasa wasana arupu yagara aboraye.

²⁵ Piya pumagina, kumi wae Areyabu aebe ma agakena kinapa kabiwaisitama to ki'i uwaisitaoginisi wantase. Piya pometaka: Arupu waene, otantiye. ²⁶ Piya, au'ama nkaumawapa kampa waintipa pu'waisa puma, amatiti'enama ntuga kampa aboraipa pu'wasu piye.

3*Tantebuwamapa aogima kabiyeo*

¹ We, nao'nempitaba, tigepisa mono tisa kina uwaena aborakenaga a-tibeno. Piya, tigeba ago abintawé. Aintiba Koti aebe tisa kina'mitepa yogaretakaba esegima a'yigi tatakiye. ² Piya, a'ya'ma kina'mitaba ka'isaena antage'ena pune. Piya, ka'wainaba antage kamana'wapa ka'anto kampa yipa, aebe aota yagara mima a'ya'ma au'wapa ubu'atama aogima kabiye. ³ Piya, taeba osiwama nkawamupipa iga'na ubu'atama paibokana, au'wampaba taete ntapiyenaba wasiye. ⁴ Piya, wanipisa karegegaba napiyyiyo. Pipa tabena waintegina pontawama pukagina, tabe kayo wani nkakapinti waye. Piya wagina, pubasanami ntagaramaba uwaena asantora pubasanagina aewa nkwaeti aega'ma waye. ⁵ We, pabiyamagina wasana antebuwama uwaenanto waimagina tabe kiga'e uma maro-u mo-u pegina anosaye.

Abiyo. Uwaena yakunkantoma anosama tabe kabuba tawaeye. ⁶ We, wasana antebu pipa yakune. Piya, tantebuwamaba tonarona ataenaba aborama, a'ya'ma taupintiba i'nintana aborawaye. Piya, a'abibintisa yakutasa kaema aogima mpikenaenarepa tababi'waye. ⁷ Pigoya, wasanamiba igeba tonarona umugababe kabarape kuyape wanipintisa kinape kabima mima kayone puwaitakena puntiniba, kayone puwaitama imentapinti me nkitawe. ⁸ Piya, ka yagaramaba antebuwamapa kampa kabima mima mabi atakana, amentapintiba kampa waikiye. Kampaye. We, wasana aeguma kaikenka tusaena pumaema waintegina, tantebuwamaba a'ya'ma yaga aogama ata piye. ⁹ Piya, tanteburasaba Wa'ega tabarempa nkageba uma asagayumagi, a'wae puma wasanaba pumirere puwaitaune. We, wasanaba Koti nkaoga kanta puma aborantiye. ¹⁰ Piya, ka tawamupisa ta'mu kamanape tamo kamanape irosase. We, nao'mitaba, a'yugu piyaena pusanagawe. ¹¹ Eya, ka auka'isa aogi nakena wanipe asa wanipe kaga irosasa, a. ¹² We, nao'mitaba, piki yawamaba kanara oripi yamankapa aekiya, a. Waini iga'nawamaba piki yamankapa aekiya, a. Pipa kampaye. Piyama asa wanipisaba aogi wanipa kampa maekune. Piyama, a'yugu tantebuwama tara aborasanagawe.

Aogi napiyenabu Kotitisa tumiye

¹³ Pigoya, tigetiba kebaya aogi napiyenaba abintiye. Piya, aogima abemi nttagarama aogi napiyenawatasa agoya puma aogima mpikenaenawampa nkau'wapa aborano. ¹⁴ Piya, tigeba to kinakaba tintawamaba tikinta'yaga mima, tigeri mpaete asu igaikenaga napimagiripa: Naeba monota aogima mpiyuweba, a-siyo. A'yugu tagantanaga untiri, miukenaenariqa kumpariyena pukibewe. ¹⁵ Piya, pi ntapiyenaba mantabintisaba kampa tumiye. Kampaye. Pipa mampabisa, paisaenabisa, kewamapisawe. ¹⁶ Piya, wasanamiba intawamaba ikinta'yaga mima igewai maete asu igaikena pepa, ige pako pikenaena aboragini tonarona ataenaba pewe. ¹⁷ We, inatisa napiyenaba aotane. Piya, ka'waina inatisa napiyena maentanaba, maru'enaba napiyenawampa narentare pegina, aintuba wasanage kayone puma pasema mima, to kina'mi kamanapa abima, antara'ena puma, mono'amaka kampa tara agiba napima ago'enaba kampa puma au'wapa aogima aboraye. ¹⁸ Piya, paru kina'miba paruyenabisa ainkapa kurigina arupu nakena aborakiye.

4*Mampabisenaga iyo'ena pe'nagiba Kotipa kama potawe*

¹ Pigoya, nanaraka maka puma kamaenaba tige tikapipa pewe, a. Piya, titipipa tigu i'nintana waintegiri, ma'enya yugaba pewe. ² Piya, tigeba tonaronaga tibugagiri, kampa maentiripa, wasana iyeguma kaiyewe. Tigeba tika puma kampa maentiripa, kamaena puma ma'enaba pewe. We, tigeba Kotipa kampa esotamagiripa, kampa maeyawewe. ³ Piya, tigeba nunamu uwa yepa, kampa maeyawewe. Tigeba kampa arupu puma tigu i'nintanarako abigamagiri kampa maeyawewe. ⁴ We, tigeba atokaekenenaabisa atarakena kina mintawé. Piya, wasanamiba mampabisenaga iyo'ena pe'nagiba Kotipa kama potawe. Pikaba kampa napiywea, a. Piya pumagina, wasanama mabisenaga ao'ena pukibipa, aebe Kotipa kama potakiye. ⁵ We, mono isa'ama maya iye: Koti tagupipa Awamusia atagina waiyemi'na, aebe: Tigeba nae'enarawe, uma taraku'ma kabirataye, iyegiri, tigeba anagiyanewema napiyewa, a. ⁶ We, Kotiba i'nintanare nkasugaenawa awagaenawapa tamegina, pika mono isa'amaba maya iye: Kotiba ipa maete iye kinapa kama puwaitama, ipa maete tume kinapa awagaenawapa imiye, iye. ⁷ Piya, tigeba tintaba Koti nkamentapinti atama miyyiyo. Tigeba keba aibasanaigina titate aegaka wano. ⁸ Piya, tigeba Kotiti atokaeyingina, aegeba tigeti atokaeyano. Agunta kina'mitaba, tiyantana puma i'nintanaripa agarubaiyo. Tara tigi napiyenarintaga kina'mitaba, tigupa narentare piyo. ⁹ Tigeba pai punta ntanagaba kunta puma i'nintanarika maegasima

tintara pumagiri kube'ena puma kaite aogima miyivo. Piya, paisa kagiyanerika kube'ena puma agarubakasiyo. Paisa ti'muntanarika kuntaena puma agarubakasiyo. ¹⁰ Eya, Wa'egawama nkaobipa tipa maete tumigina, ae asiritano.

A'yugu kamana tiyo'mikaba a-nkuwaitaiyo

¹¹ We, nao'mitaba, tigeba tiyo'mikaba ata kamanapa a-nkuwaitaiyo. Piya, ka'waina ao'makaba aupi pima ata kamana otaipa, aeba Koti nkago kamanakaba aupi pima ata kamana otaye. We, aeba pabiyama ago kamanakaba otaipa, kamana aegaranta yagara kampa miye. Kampaye. Aeba sasi yagara kanta puma miye. Pipa ataaewa. ¹² Piya, ka'wainanto taga sasi yagara mima ago kamanapa aborantipa, aewe. Eya, ka'isa i'intana to ka'isa igaikibipa, aewe. Piya pegina, kegabayna kao'makaba kamanapa otane, a.

Kotika napima a'ya'ma Yugaba peno

¹³ We: Ibabe aibe to ka kumatu wama mone kutataka ka kabu ampima yogaba a'ya peka uwaena mone maete kanakune, ye kina'mitaba, urimekiri abiyo: ¹⁴ Aikaba tigeba kampa abintawe. We, mikenaenaripa ayama miyewe. Piya, tigeba kunkawama pisa puma kiyaya puwakiye. ¹⁵ Pika tigeba maya yigina kanarasano: Wa'egawama nkabikaba, taeba taogama ma ntugawo, pi ntugawo, uma pukune, yiyo. ¹⁶ We, nanagabaya tigeba paebuta nasima tipa maete iyewe. Wasana ae'wa nkau maete iyipa, pipa ataaena piye. ¹⁷ Eya, ka'wainaka aogiyena pukibintanaba kaiteginaba, aeba aguntaenaba piye.

5

Wasanami mone kutaka ibugai kamanane

¹ We, uwaena kutantaga kina'mitaba, kamanapa urimekiri abiyo: Kuntaena aborarimekiri, pika napima tigeba: A-e, a-e, uma tabe kube'ena piyo. ² Piya, a'ya'ma kutatipa abaraena kanta piye. Kabagina'ama titasenaabu agukuri puwaegasu piye. ³ Kori yabatipe siribaripe ago agarirasu pegina, pi nkagariyenawampaba kamana uritama yakunkama pisa puma titipa nawaaegaikiye. We, tigeba nagarikena yagaga antota'enaba uwaena aki pewe. ⁴ Abiyo: Yoga kina'miba yogaripi yogaba pegiri, tigeba ikankaipa ka'isa kakantiri ka'isa imewe. Piya, kakantanamaba kamanapa uritaye. Piya pumagina, pi ntuga kina'mi kamanapa mantarisu tabe Wa'ega Yagararama nkagebi irosaye. ⁵ We, tigeba mabi mpintiripa, aogiyenamana mpaema uwa ti'mu puma miyewe. Eya, tiyegukenagaba tigu'amaba uwaena naninta nama anosawe. ⁶ Piya, tigeba arupu yagaraba kamanapa otamagiri aeguyegana puriye. We, piya potapa, aeba a'a-o ukena esegiyenawapa kampa waintiye.

Kuntaenaba aesaga'ma Wa'egawamaka aobi peno

⁷ We, nao'mitaba, Wa'ega irosakiri paebuma mima aobi piyo. Piya, yogawama nkababa aogi nakeda aborasanaga kabima mima, pape kabe aobi pegina nakenaba aogima aboraye. ⁸ Aeba aobi pemisa puma, tige paebuma mima Wa'egamaka aobi piyo. Eya, Wa'ega arosaika tintawamapa esegi potaiyo.

⁹ We, nao'mitaba, kamana uritasanaga tigeba tiyo'mipa kaba a-nkibiriyo. Agaiyo. Tabu sasi yagaraba kabera ampintiye. ¹⁰ Pigoya, nao'mitaba, pai poropete kina'miba Wa'egawama nkawamutasa kamanapa yuguni, ata puwaitauguni kuntaenawaiipa aogima aesagabintawe. Igeka napima, ige puntasa puma paebuma mima aesaga piyo. ¹¹ Abiyo: Kuntaena aesagabinta kina'mikaba: Kanara pewe, yune. Piya, tigeba Yobu kamanapa ago abintawe. Aeba kuntaenawapa esegima aesaga pogana, Wa'egawamaba abomentanama nkau'wapa aeti aogima aborantiyema, abintawe. Eya, Wa'egawamaba antara puma kayonena tabera puratagi, agaune.

Uma esegi pikena kamanane

¹² We, nao'mitaba, marupa aogima abiyo: Tigeba mantawama nkagerape marape tonaronarape a-nkumagiri kamanatipa esegi piyo. Kampaye. Tigeba kamana uritasanaga: Owe, untiripa, piya piyo. Kampaye, untiripa, a-piyo.

Arupu kina'mi ntunamuwamapa esegi piye

¹³ Pigoya, tikapisaba ka yagarama kuntaenaba aesagibipa, aeba Kotiti nunamu yeno. To ka yagarama nkantawamaba a'mu pipa, aeba inibisa Koti nkagega'e uma asagayeyeno. ¹⁴ Tigepisa to ka yagara yonintana abipa, aeba monota kabinta kina'mika kega'e yeno. Yegini, igeba Wa'egawama nkagega'eraka autiba masawae aetamagini, Kotiti nunamu yigina ao'maeyano. ¹⁵ Piya, imatiti'enabisu Kotiti nunamu yiginaba, Wa'egawamaba kana yoni ntagaraba kaba atakana asikiye. Piya, aeba aguntaena puntika, Wa'egawamaba asu'a pugaikiye. ¹⁶ Pika tiyo'mige aguntaenaripa uma aboramagiri, Kotiti nunamu yigina tiyo'maeyakana tita wano. Piya, arupu yagarama nunamu yekanaba, au'wapa esegima

aborakiye. ¹⁷ Piya, Iraiya ae ba wasana tae kanta yagara mima: Ka kampa aeyanema, esegima nunamu yogana, kakaga kabube ton aentisa ka'umaema upe kaba marapa kampa tumintiye. ¹⁸ Piya, ainti to ka nunamu yogana, mantabintisa kaba tumogana aintanaba airapoma irantiye.

Kepa kasa kinapa to ibabu maete kanano

¹⁹ Nao'nempitaba, tikapisa ka yagara ae ba taga kamanapa atate wakana to ka yagarama ababute kanantanaba, ²⁰ pi ntagaramaba piyama abeno: Piya, ka yagarama agunta yagara ao'maeyakana aibo'ena pukibi ki kaito a'wae puma kanakibipa, ae ba agunta yagarama nkagupa purinta ki'isa ababotama, uwaena aguntaenawapa aerarikaetakiye. Yemisi piya isa kaentiye.

PITA MA NKISA KAENTIYE (KA YAGANE)

¹ Nae Pita, Isu Karaisiti nkaposoro agarawa ntawe. Piya, tigepa kamaena puritama tigarubauguri maripa kaitegiri, Pontasi maribe, Karesiya maribe, Kapatosiya maribe, Esiya maribe, Pitinya maribe uminta kina'mititi, ma nkisapa kaeyuwe. ² Piya, taba Koti utaritaogiri ae'wantana aborantane. Aeba yogana Awamus'a'amaba: Isu Karaisiti kamana wasima korankatasa aeguse puma paititayoma, utaritama aota puritantine. Piya, tigetiba awagaenabe paruyenabe waiyaba'mita iyeno.

Koti nke'wasaenamaba mantabinti taobi piye

³ Pigoya, Isu Karaisiti Wa'egarempa nkaba Koti, ae agega'e asagayuyeno. Piya, aeba tabera antara puratama, Isu Karaisiti purintapisa asitanti ntugarasa waiyaba kumaka aobi piyoma, taumarepa kasa'ena yakari puratantiye. ⁴ Piya, pi maekubompe kumapa kampa abararama, kampa ataena puma, paisa kantaba kampa pukiye. Piya, Kotiba pi kumapa tae'ena taobi puma kabirataye. ⁵ Piya, taeba Kotiti tamatiti pompeka esegiyenawatasaka kabirataye. Eya, agogo yaga wasanami nkiyobi tau'ikibika kabirataye.

⁶ Tigeba pika ti'mu piyo. We, mampara tonaronan makaga makaga pekana tikinaki pukibintanaba uwaena yaganto a'ya wakiye. ⁷ Piya, kori yabapa mampabisenawae. Pipa wasanama yakupi kaema i'ninkapa aeyoba'ma agowapa aboramisa puma, kuntaenaripa timatiti'enama nkagoripa aborarimiye. We, timatiti'enarimpaba koriba asugasayeye. Piya, Isu Karaisiti aborakibi ntagaba pika tigega'e maete ima asagayuma a'mu puritakiye. Pika ibanto kuntaenaripa aboraye. ⁸ Piya, tigeba Isu nkaowarapa kampa aganta, agu kao'ena potawe. Kampa aganta, timatiti potamagiri agasiyama ti'mu potawe. Pi ti'muntanamaba tiwamupisaba kampa asugasawee. Kampaye. Aeba tabera asugaintiye. ⁹ Piya, timatiti'enarimpaba nkau'wapa pipa timankama nki'ikenauenawae.

¹⁰ Pigoya, paipa poropete kina'miba awagaena aborarimikibi ntanagaba uma aborantane. Pi nkagoba napimagini: Ayamabaya i'ikiyema, napima mare-u me-u puntane.

¹¹ Piya, Karaisiti Nkawamus'a'ama intabaijinti mintogini, igeba Karaisiti kuntaena aesaga pukenaenawakabe ainti age asagayukenaenagabe uma aborantane. Aboramagini, pi poropete kina'miba: Aya yagarabaya, ayantagabaya pi nkau'wapa aborakiyema, napima mare-u me-u puntane. ¹² Pigoya, igeti wanane. Tigeti kayokaya'ena puntaka Kotiba tayakikiye, piya uma Kotiba aborawaimintiye. Piya, ainti Kotiba otaogana Aota Awamus'a'ama mantabintisa tumintika, wasanamiba ae esegiyenawatasaka aogi kamana'ama nkagoba uma aborarimewe. We, pi kamana'ama nkagoba enisore kina'miba kaga abisanaga ibiye.

Kotiba aota miyyioma tagega'e iye

¹³ Pigoya, pika tigeba napiyenarimpapa tibamu kantiba kimagiri paebuma mima aogima kabiyiyo. Eya, Isu Karaisiti irosakibi nttagaba awagaena aborarimikibi ntanaga napima tabarababa a-puma aogima kabiyiyo. ¹⁴ Tigeba inamu ntgararama aba kamana wasiyisa puma, Koti kamanapa wasiyiyo. Paipa kampa napiyenaba waintogiri, tigu i'nintana puntasa puma, ibaba pi kipa toba a-nka'wae puma aegaraiyo. Kampaye. ¹⁵ Tigeba tigega'e uma tiba punti Ntagarama aota miyyisa puma, pabiyama a'ya'ma nasikenaenarintaga aota miyyiyo. ¹⁶ Pika mono isa'amaba maya iye: Naeba aota miyoka, tigeba pabiyama aota miyyiyo, piya untiye, iye.

Tabe ikankatasa taba puratantiye

¹⁷ Pigoya, Kotiba intakabe tumintakabe kampa napinta yogaretaka taga a'yigitatagiri, tigeba aeka: Tabarempawe, yewe. We, tigeba ae agoga aogima napima, aekaba tiyekuru puma mima mampara arupu kita nasiyiyo. Piya, tige ma agoba kampaye. ¹⁸ We, tigeba ago abintawee. Tiyabamagiba ata ki uwa aega'ma mintuguri, tigegeba kaga pabiyapuntawee. Pigoya, pi kitasa Kotiba ika puritantine. Aeba mampabisenawae, kori, siribarasa wanane. ¹⁹ Aeba Karaisiti kurapa inta ikatasa ika puritantine. Eya, Karaisitipa sipisipi awaro kanta puma aegugasuguna, ka ataena au airisa'enawapa kampa waintayaga, tigeke pu'wantiye. ²⁰ Piya, paipa Koti maba kampa punta, Karaisitipa pi ntugaraka otantine. Ainti kana nagarikena pekana, tige tyo'maekena mabipa aborantine. ²¹ Piya, ae'wa ntugarasa tigeba Kotitiba timatiti pewe. Eya, Kotiba Karaisitipa purintapisa asitama tabe agiga'eba amintika, tigeba Kotitiba timatiti puntiri, aeti atokaekenaga aobi pewe.

Mono'ama tabage puntiye

²² Piya, tigeba taga kamanapa wasikenenaenara tigu'amapa narentare puma, mono kina'mipa taga agu kao'ena puwaitawe. Pigoya, tigeba tintabaipisa tiyo'mipa agu kao'enaba esegima puwaitaiyo. ²³ Tigeba mampabisa abara yamankatasa wanane. Waiyaba'enarasa kasa kina aboraritantine. Eya, Koti kamana, aoso sima waiyaba kamanatasa aboraritantine. ²⁴ Pika mono isa'amaba maya iye:

Aya'ma wasanamiba kabuyenana kanta pegana, iwa'enawaimpaba kabuyenama nkaosa kanta piye, iye.

Piya, kabuyenana asa wagina, aosawampaba aibarara puwaye, iye.

²⁵ Pigoya, Wa'egawama kamanapa waiyabane, iye.

Piya, pi kamanapa uriminta aogi mono kamanane.

2

Ai'ne yabate Wa'egawae

¹ Piya, tigeba a'ya'ma ata puwaitakenaenabe, a'ya'ma ago'enabe kumpari'enabe to waina mparuta mikenaenabe, a'ya'ma akaya kamanape kasiyo. ²⁻³ Tigeba kasa inamumpi nonoka ibisa puma, tigu tiyo'maekena taga ntunukaba tibenio. Eya, tigeba Wa'egawama kyonenawapua nabigama tima kagagana iga piya, ti'ikenaena anosasanaga tibenio.

⁴ We, tigeba Wa'egawamati ampiyiyo. Aeba aogaso sima waiyaba'ena wantaga yabane. Piya, wasanamiba ataaena piyema napima kasapa, Koti otaogana ae aobipa aogi puma inta ika mpintiye. Aeti ampima atokaeyiyo. ⁵ Piya, tigeba aogaso sima waiyaba yaba kanta puma mimagiri, amato puma Awamus'a'ama ntamantana puma miyivo. Eya, tigeba aota tabe mono kina kanta puma mima, tigupa muta atasu piyo. Tigeba piya pigina, Kotiba Isu Karaisitika napekana pi mputa'enagaba kanarasakiye. ⁶ Pikaba mono isa'amaba maya iye:

Abiyo. Naeba ka inta ikantaga yabaka otauwe, iye.

Pi ntabantama esegi potakena yabapa, Saiyoni kumantepintiba arabama arupu pukena puwe, iye.

Piya pekana, wasanama aeti amatiti pukibemipa, anintanaba kampa waikiye, untiye, iye.

⁷ Piya, timatiti pe kina'mititiba, Karaisitiba inta ikane. We, kampa imatiti pe kina'mitiba Karaisitikaba maya iye:

Pi ntabapa yoga kina'mi maegasa ntabapa, ibaba arupu pukena ai'ne yabapa aboraye, iye.

⁸ Eya, wasanami nkigisa aimisagakena yabantana pukiye, iye.

Tabe yabankamaba ipasanakini ware'nakibewe, iye.

Piya, igeba Koti kamanapa akayuyiginaba, pi kamana'amaba igisaba aimisagakini ware'nakibewema, Kotiba paipa piya uwaitantine.

Taeba Koti tuntanamana puma miyune

⁹ Pigoya, Kotiba ago uritantegiri, tigeba ae taga tunka mpiyewe. Tigeba Wa'egawama mpono kiye kina'wa mpiyewe. Tigeba ka kina'ena puma aota kina miyewe. Tigeba Koti nkaokinataka'ya mpiyewe. Piya, tununtanabisa tiba puma aogi e'wasaenawapi apaititani ntagara nkaogi yugawaka awaga yiyma, aokina tiba puntine. ¹⁰ Piya, paipa tigeba uwa kina mintantapa, ibaba Koti tuntana puma mintawe. Paipa tigeba Koti nkantara'enawapi kampa mintantapa, ibaba antara'enabi ago ampiantawe.

Tigeba Koti ntuga kina miyivo

¹¹ We, nabugai kina'mitaba, tigeba to marisa kina kanta puma mima, mampabipa uwaena yaganto mikena kinatawe. Piya, naeba mayama urimekiri abiyo: Arirasa i'mintanamaba timawamapa ma'ena potamipa, tigeba tikabitaiyo. ¹² Tigeba to marisa kina'mi nkikapinti aogima ntasiyo. Piya, igeba kamparaga kamana uritapa, aogi yugaripa agama, aintiba Koti nkago igeti aborakibi ntgaba ae agega'eba asagayukibewe.

¹³ Tigeba Wa'egawamaka napi napi puma a'ya'ma ima minta kina'mi imentapinti miyivo. Eya, wasana wa'ega yagara asugasima minti'na aepa, ¹⁴ ae uwaitanti kabirata kamani kina'mipeba imentapinti miyivo. Piya, igeba ataaena pe kina'mipa ika nkintinti, arupuyena pe kina'mi nkigega'e asagayukena yuga pewe. ¹⁵ Piya, Kotiba piya pusana abiy: Tigeba arupu yugaritasaka kampa abima aibo kina'mi nkiwamupa akunisanaga abiy. ¹⁶ Pigoya, Kotiba iga'nabisaka akariyobatitantisa puma pabiya puma miyivo. We, tigeba: Uwa kina miyune, umagiripa, karu'ena a'wae puma ataenaba a-piyo. Kampaye. Tigeba Koti kayokaya kina'ena puma miyivo. ¹⁷ Tigeba a'ya'ma kina'mi nkigega'eba asagayuyiyo. Mono tiyo'mipa agu kao'ena puwaitaiyo. Kotikaba tiyekuru piyo. Wasana wa'egawama nkagega'e asagayuyiyo.

Taeba Karaisiti kisaga'ma tauki nakiyena maekune

¹⁸ We, kayokaya kina'mitaba, tigeba kabirita'nagikaba tiyekuru puma imentanti aogima miyiyo. Kayonena puma paebuma miye kina'mi ibiwanane. Tigeba atama kabirita kinake kaga imentanti miyiyo. ¹⁹ Piya, igeba tiki nakiyenaba uwa timigiripa, tigeba Kotitiba napimagiri pi tiki nakiyenaba aesagabikibepa, Kotiba a'mu puritakiye. ²⁰ Piya, tigeba aguntaena pigini tiyeguyigiripa, uwa itaiginaba, ke abekana kanarasakiye, a. We, tigeba arupuyenena pigini, pika tiki nakiyenena puma ata puritaigiripa, uwa itaiginaba, Kotiba pikaba a'mu puritakiye. ²¹ Piya pukibeka Kotiba utaritantine. Eya, Karaisitiba tigeke auki naki puma paitartantine. Pika tigeba aekisa aegaraiyo. ²² Aeba aguntaenaba kapa kampa pogana, ago'enaba ae awamupisa kapa kampa aborantine. ²³ Igeba akayasotaugunaba, antotapa kampa akaya puwaitantine. Auki nakiyenena maentanaba, antotapa kampa kaba ibirantine. Kampaye. Aeba inatisa taga a'yigitatakena yagaramati arupuyenawaka ayapa tatantine. ²⁴ Piya, ae'wa nkautasa aguntaenarepa aesa'ga'ma maripo yarapa pu'wantine. Eya, taeba aguntaenareti pu'wama arupuyenara taogakubompeka pu'wantine. Piya, au'arisanta'enawampa kamparagaenarepa maeragasima kaba tatantie. ²⁵ Eya, paipa tigeba sipisipi yaga kanta puma asorisari puma mintantawe. We, ibaba sipisipira kabikena yagara, timata kabiye'mi'nat, a'wae puma ampintawe.

3

Waya wami kamanane

¹ We, waya'mitaba, tigeba pabiyama tiwaegi imentanti miyiyo. Piya, igetisa ka'isa Koti kamana kampa wasye'nagiba waya'waimpiti kamana nane. Mikenaeenaripe agama pam i pumagini, igeba igu a'wae piyo. ² Eya, Kotikaba tiyekuru puma nare ntare mike-naenaripe agamagini, igeba igupa a'wae piyo. ³ Piya, tigeba ti'no nkitakenaenarasawo, kori tiwa'enarasawo, toma toma titasaenarasawo, igebi nkiyobi arirasaenaras a-piyo. Kampaye. ⁴ Tigeba tintabisaba tigu tiwa'enaba aboraiyo. Eya, timawamaba paebuma paru puma waiyegina, Kotiba a'mu pegina ikankampaba inta'ena puma waiyaba miye. Pipa aboraiyo. ⁵ Piya, paipa ka'isa waya'miba Kotiti atokaekenaga napima aota mintini, pabiyama imarasa iwa'ena puma iwaegi imentapinti mintantawe. ⁶ Eya, Seraba piyaena puma Abara'amu nkawamu wasima: Wa'eganene, untine. Tigeba piyama arupuyenena puma tonaga kampa tiyekuru pukibepa, Sera ntagara kanta pukibewe.

⁷ We, iwaegitaba, tigeba pabiyama kayone puma wayatimpige aogima miyiyo. Piya, waya'mi nki'ama nkesegiyenaba tumintiye. We, igeba Kotitisa e'wasaenaba tigege kaga maekibeka, igege'eba asagayuyiyo. Piya, nunamuripa akunisanaga piya piyo.

Taeba kaga miyeno

⁸ Pigoya, kamana'nepa a'ya wakena piya, abiyo: Tigeba a'ya'ma kina'mitaba, ka tintabarima miyiyo. Tigeba tintara'ena puma, tiyo'mipa agu kao'ena puwaitama, kayonena puma, aogima ntapima tigeripa a'mpaete iyoyo. ⁹ Wasanamiba ataena puritaigiripa, tigeba antotapa ataba a-puwaitaiyo. Piya, igeba kamana akayasuritaigiripa, antotapa a-nkakayasuwaitaiyo. Kampaye. Tigeba akayona puwaitaiyoma, Kotiba tiba punti'na, antotapa piya piyo. Piya pukibepa, Kotiba antotapa akayona puritakiye. ¹⁰ Pika mono isa'amaba maya iye:

Piya, ka yagarama, e'wasaenabi mpikenagabe aogi yaga agakenagabe abugai ntgararamaba, ata kamana usanagaba anteburapa aogima kabima mima, awamu eperasa anagi kamana usanagaba aogima kabiye, iye.

¹¹ Aeba ataenaba akabitama, arupuyenena peno, iye.

Aeba paruyena aguyosa'ma maema arakureno, iye.

¹² Piya, Wa'egawama nkaomaba arupu kina'miti waiyegina iyo'maeye, iye.

Wa'egawama nunamuwaitiga age atakae piye, iye.

We, ataena pe kina'mipa Wa'egawamaba amo puwaitama ata ika nkimikiye, iye.

Yogarasa tauki nakiyenaba maekubompepa pipa kanarane

¹³ Pigoya, tigeba arupuyenena puma miyiginaba, kebaya karu'ena ataenaba puritakiye. Pipa kampaye. ¹⁴ We, tigeba arupuyenena pumagiri pintanaraka kuntaena maekibepa, ti'mu ti'muntanabu uwa mikibewe. Piya, igekeba a-tiyekuru puma tabarababa a-piyo. Kampaye. ¹⁵ Tintabaiapi Karaisitiba Wa'egari asitaiyo. Piya pumagiri, tigeba a'ya'ma yaga kabima mima, wasanamiba Kotiti atokaema aobi pikena agorika tibigaigiripa, karu'ena a'wae puma uwaimiyo. Piya, tigeba Kotika tiyekuru puma paebuma mima aogima uwaimiyo. ¹⁶ Eya, napiyenaripe ataenaba a-potaiyo. Piya pukibepa, wasanamiba ata puritakibepa, Karaisitika aogiyena pentanaga akayasota kina'miba ini pukibewe. ¹⁷ Pigoya, taeba ataena pukubompetaka kuntaena maekubompepa, pipa ka awamene.

We, Koti nkabemika taeba arupuyena pukubompeta kauntaena maekubompepa, pipa Koti nkaobi aogiyenawee.

Nowa potantisa puma Kotiti wani paitatantiye

¹⁸ Pigoya, Karaisiti aeba ka yaga pu'ma aguntaenaba agora maegaintine. Eya, aeba arupu yagara kana, aeba ata kina'mite mparu mpaema, Kotiti taba puratakena puntine. Piya, aeba wasana mintogini igeba au'wapa aeguyuguna purogana, aumawataswa asitao-gana aogantine. ¹⁹ Pigoya, pi nttagaba ae amankampa wama iga'nabi mpintume nki-mawamapa kamana'wapa uwaimintiye. ²⁰ Piya, paipa Nowa wanipisa kare punti nttagaba Kotiba paebuma mintogini pi kina'miba kamana'wapa akayumagini pu'wantawee. Piya, pi nttagaba tara kina'antomi, tonautisa kakaga umaema kina'mi, wanipinti i'yogini mintantawee. ²¹ We, aeba wanipisa iba puntisa puma, ibaba wanitaswa paitaritamagina ti'ye. Pi nkwanipa titasaba kampa maebugaintane. Kampaye. Isu Karaisiti purintapisa asintika paititakibipa, antotapa Kotipisaba aota napiyenaba maekibewe. ²² Eya, Isu aeba mantabinti ima, Koti nkayatakanti asu mintegini, enisore kinape kabikena kinape to esegi kinape ae amentanti mintawee.

4

Isu auki nakiyena puntika abe'isaenaba kasiyo

¹ Pigoya, Karaisitiba ae'wa nkau'wata auki nakiyena maentika, pika napiyisa puma tigeba napiyivo. Piya, wasanamaba au'wata auki nakiyena maeyamipa, aguntaena pusanagaba kampa napiye. ² Piya pumagina, ae'wa nkau mampabi waikenala pekanaba, aeba wasanami nki'ni ntapiyenaba kampa aega'ma, aeba Koti nkabemintanaba wasima miyeno. ³ We, paipa tigeba to marisa kina'mi nkibugaintanara nasisu pumagiri, kumiyyena puma, tigu'amapa i'nintana potamagiri, esegi wani ntama aibo'nabo pumagiri, ata patiyena puma, aibo'ena pumagiri, kamana akayuma ama kotintana aegarantapa, ibaba a'ya wakiripa ataiyo. ⁴ Piya, tigeba pi nkagasiya kamparagaena pukenagaba kampa igegetiba uma atokaeyaginiba, pika igeba ata pamu puma kamparaga puritawee. ⁵ We, aintiba pu'wanta kinape taogantompe kinape kamanatepa uma a'yigitatakena yagaramati igeba ige'wai nkagowaipa aborakibewe. ⁶ We, paipa pu'wanta kina'mi nka'yigitakenaraka pu'wanta kina'mitiba uma aogi kamanapa aborantine. Eya, igeba a'ya'ma kina pesa puma ige'wai nkitasa antota'enaba maema pu'wantapa, Koti miyisa puma misanaga imawaimpaba kamanapa aborantine.

Koti nkesegiyenarasa aogi yuga puma tiyo'ena piyo

⁷ Pigoya, a'ya'maena nagarikena kanapa pabigo arosaye. Piyama, tigeba aogima ntapima, nunamu ukenaraka asoyaena piyo. ⁸ Tigeba tiyo'mi agu kao'ena puwaitake-naenaba aogima ubebe puyaba miyivo. Pintanamaba tonaba agasaye. Piya, agu kao'ena potakenaenamaba agasima uwoma aguntaenaba airari kaeye. ⁹ Tigeba tiyekitaenaba a-pumagiri, tiyo'mipa aogima maruntana puma kabiwaitaiyo. ¹⁰ Kotiba awagaenawapisa tonarona a'muntanaba ka ka kina'miti timegiripa, a-kakatama, pitasa aogi mono yuga puma tiyo'mipa iyo'maeyivo. ¹¹ Piya, ka'wainaba kamana uma aborakibipa, pipa Koti nkawaga kamana uma aborano. To ka'wainaba wasana ao'maekibipa, pipa Koti nkamemi nkesegiyenarasa ao'maeyano. Eya, a'ya'maenagaba Isu Karaisiti ntugarasa Koti nkagiga'e asagayuenagaba aogi yuga piyo. We, e'wasaenabe esegiyenabe a'ya'ma yaga aeti waiyabane. Tagane.

Karaisitikaba tauki nakiyena maekune

¹² We, nabugai ntao'mitaba, tigetiba yaku tasu puma timiyo'ena pukenaenaba aborakiye. Piya, kasa'ena wanane. Pipa tige agoripa aogima aborakena piye. A-pami piyo. ¹³ Piya, tigeba Karaisiti nkauki nakiyena kaga maema aesaga peka ti'mu piyo. Eya, aintiba e'wasaenawapa aborakiripa, tigeba to ka tinta asoyaena puma ti'mu pukibewe. ¹⁴ Tigeba Karaisiti nkagera iyekita puritaigiripa, Koti akayona puritakiye. We, e'wasaenama Nkawamus, Koti Nkawamus'ama tigeti ago miya, ti'mu piyo. ¹⁵ Pigoya, tige tikapisa ka'wainati auki nakiyena aborakibipa, a'yugu wasanama aegunta'enarasawo, kuntanarasawo, ataenawatasawo, to waina ntanari ara agata nasikiba ntanarasawoma aborakiye. Piya puta nasekiniba igeba antota'enawapa taga aboramikibewe. ¹⁶ We, ka yagarama Karaisiti nkaegarakenaga auki nakiyena maentanaba, aeba anipa a-peno. Aeba Karaisiti nkaegarakenagaba napima Koti nkage asagayueno.

¹⁷ Pigoya, Koti utaratakena yagaba agarosagina, marupa Koti nkaokina'miteti kamana aborakiye. We, taete nkagoba marupa aboragaitegina, Koti kamana akayuye kina'mitiba ayabaya puma a'ya pukie. ¹⁸ Pika mono isa'amaba maya iye:

Arupu kina i'ikenaba kunta pikana, Koti ikabitate aguntaena pe kina'miba ae nkauka'ibaya mikibewe, a, piya iye.

¹⁹ Piya pegini, wasamiba Koti nkabemika iki nakiyenaba maeyapa, aogiyena puma a'ya'maena aboratanti ntagarama nkayapi imawaipa ataigina, aeba tagantana puma kabiritano.

5

Mono kiye kina'mi kamanane

¹ We, tigetisa mono kiye kina'mika esegi kamana uwaimikena puwe. Piya, naegeba tige pesa puma monota kabinta ntagaranawé. Naeba naonepisaba Karaisiti auki nakiyena maeyoga agantone. We, naene kaga aborakibi nke'wasaenabi ubasikune. Pigoya, kabinta kina'mitaba, kamanapa urimukuwa, abiyo: ² Koti nkaegara kina'miba igeba sipisipi kanta puma miyigiri, tige timentapinti miye kinapa aogima kabiwaitaiyo. Pipa kuntaenabisa wanane. Peronabisab kabiwaitaiyo. Pipa ika mpaekena napi napi piyoma wanane. Tintawama aseyonabisa piyo. ³ Tigeba kabiwaita kina'mipa igaikena wanane. Tigeba aogima mikenaenaritasa pi sipisipi kanta puma miye kinapa mono kita paitawaitaiyo. ⁴ Piya pukibepa, paitaratanta sipisipi kiye yagara ampa aborakiripa, pi ntagaba tigeba e'wasa ika nkantota maeyigina kampa abararakiye.

Imentanti miye mpono kina'mi kamanane

⁵ We, masimabi kanta puma miye kina'mitaba, tigeba pabiya puma mima paitanta mono kina'mi nkimentanti miyivo. Piya, tigeba ti maete tumikenaenaba maema tipa airarikaema tiyo'mipa iyo'maeiyio. Pika mono isa'amaba maya iye: Kotiba igebigo kinapa kama puwaitamagina, i maete tume kina'mipa awagaenawapa aborawaimiye, iye.

⁶ Pika tigeti ntapiyenaba maete tumima, Koti nkesegi ae nkamentanti miyigina kana'wa arosakanaba tisagayuyeno. ⁷ Piya, aeba aogima kabiritagiri, a'ya'ma kuntuyenariipa aeti ataiyo.

⁸ Tigeba aibo'nabopa a-puma, aogima kabiyyio. Kama kinati kewamaba araiyon i yagama pisa puma amo kasa uma tiba nakenagaba uma igasaga ampa igasaga piye. ⁹ Tigeba timatiti'enayaga esegima mimagiri aepa aebasanakasiyo. We, tigeba abintawe. A'ya'ma tiyo'miba a'ya'ma mari minta'nagiba, igeti kuntaenaba pabiyama aborawaimewa, esegima miyivo. ¹⁰ Pigoya, Kotiba a'ya'ma awagaenama nkagoba mimagina: Karaisititi atokaema waiyaba e'wasaenane mpaeyanema, utaritantegiri, aro ntaganto tigeba kuntaenaba maeyakana, aewa a'wae puma aogi puritama, asima esegi puritakiye. ¹¹ Aetiba a'ya'ma kabiratakena esegiyenaba waiyaba miyeno. Tagane.

Ka'isa nagarikena kamanane

¹² Pigoya, ma nkisapa Sairasi nkayapisaba aro nkisa'anto kaema urimuwe. Naeba aekaba taga naonemaba napiyuwe. Piya, ma nkisapipa Kotitisa taga awagaenaraka esegima asiritakenaga urimuwe. Pika tigeba napima asiyiyo.

¹³ Pigoya, Pebironi ma kumatasa kinake kaga tigeke tiba punti kina'mitika: Aya pewe, uritawé. Maka yagaranempageba: Aya pewe, iye. ¹⁴ Tigeba tiyo'mipa tiyapa imima, agu kao'ena puwaitaiyo.

We, a'ya'ma Karaisititi atokaeya kina'mitaba, tigeti paruyenaba waima waiyeno. Pita piya isa kaentiye.

PITA MA NKISA KAENTIYE (TARA YAGANE)

¹ Nae Saimoni Pita, Isu Karaisiti nkaposoro, kayokaya yagarawa ntawe. Piya, taege ka'masa puma timatiti'ena aogima maeya kina'mititi ma nkisapa kaeyuwe. Piya, Kotirepe, tau'ikena yagara Isu Karaisitibe, isigetisa arupuyenama tamatiti'enaba tabe ikatasataga maentompene. ² Piya, Kotike Wa'egare Isuke, tigeba agowaisipa aogima abigina, awagaenabe paruyenabe tigeti anosama aborarimeno.

Mono'ama nkau'wa aborawawama miyiyo

³ Pigoya, Kotiba ae'wa nke'wasaenabipe aogiyenawapipe: Ubasiyoma, tagega'e yoga, abima ubasintompeka aeba mantarasa esegiyenawatasasa a'ya'ma Koti kanta puma mikenaenarepa tamiye. ⁴ Piya, utaratanti ntanaba asugasima tabe ika kanta pegina agowapisaba tamiye. We, wasanami nki'ni ntapiyenabisa mampabisa uwoma kamparagaena waintipisa tiyegaka kanamagiri mantarasa e'wasabi ubasiyoma, utaratama agowapisaba tuo'maeye.

⁵ We, tigeba pika napiyiyo. Tigeba timatiti'enarita aogi yugaba puma amato piyo. Aogi yugarita taga nkabibibe puma amato piyo. ⁶ Taga nkabikenaenarita titipa kabima mima amato piyo. Titipa kabima mikenaenarita esegima asima amato piyo. Esegima asikenenaenarita Koti kanta puma aota mima amato piyo. ⁷ Koti kanta puma aota mikenaenarita tiyo'ena puma amato piyo. Tiyo'ena puma mikenaenarita agu kao'ena puma amato piyo. ⁸ Piya, pintanaba tigeti waima aborawaeyakanaba, anagiyena wanane. Tigeba Wa'egare Isu Karaisiti nkagoba aogima abima, mono yugaba taga pumagiri au'wapa aogima aborakibewe. ⁹ Pigoya, ka'waina piyaena kampa aeti wainti'naba aeba pagasari kampa agama aorika kina kanta piye. Tagane. Aeba Koti paisa aguntaenawapa kaintikaba ago agegu'a puntiye.

¹⁰ We, nao'mitaba, Koti utaritama tiba puntintana esegi potakenaraka mono au'wapa aogima aboraiyo. Tibega piya pukibepa, kampa ware'nakibewe. ¹¹ Piya, tigeba pintana aegarakibepa, waiyaba kumati ubasikena kabiba tigeti a'waiyekiri, tigeba ti'muntanayaga ubasikibewe. Eya, Wa'egare tau'ikena yagara Isu Karaisiti kabiratakena kumati ubasikibewe.

¹² Pigoya, tigeba taga kamanapa ago maema esegi puma asimagiri, pintanama nkagoba abintawe. Kanarane. Asi nasiba to ka urimekiri, pika napiyyiomawe. ¹³ Piya, naeba ma ntau'yaga mima asi nasi ma kamanapa urimekiri napiyyiomawema napiyopa kanara'enawe. ¹⁴ Piya, naeba uwaena yaganto nau'nepa kaikuwema, Wa'egare Isu Karaisiti unamintegi abintone. Pika napima asi nasiba kamana urimuwe. ¹⁵ Toganaba naeba mampa kaikubopa, tigeba pi kamanapa a'ya'ma yagaba aogima napiyyiyoma, esa kaerimukuwe.

Pita aeba Karaisiti nkagoba agantiye

¹⁶ Pigoya, taeba paisa kina'mi napinta nkamani kamana nane. Taeba Wa'egare Isu Karaisiti nke'wasaenawapa taorepisa agantompika esegiyenawatasasa aborakibi kamana urimintogiri abintane. ¹⁷ Eya, amuta Koti tababa tabe agiga'e amima asagayumagina, pi asugasima e'wasa Kotiba yeginaya kamanapa Isuti tumintiye: Pi ntagara aeba nabugai ntgaranane. Aekaba tabera na'mu potauwe, untiye. ¹⁸ Piya yoga, taeba aege aota amuta mintuwakana, pi kamana mantabintisa tumoga abintompene.

¹⁹ Piya, taeba poropete kina'mi kamana'ama nkau'wapa aogima agaune. Pika tigeba aogima upebe pigina kanarasano. Piya, e'ama tununtanabinti araisa puma, poropete kina'mi kamanapa ka'isaenaba aogima aboraye. We, tintabaiinpinti abayasa noriwamaba asiyekana taga marekipa, kamana'ama nkagowapa aogima agakibewe. ²⁰ Pigoya, tigeba maru'enaba pika abiyo: Poropete kina'mi kamana mono isapi wainti, pi'na nkagowapa ka'wainaba ae'wa ntapiyenabisaba kampa aboraye. Kampaye. ²¹ Piya, poropete kina'mi kamana'ambaba wasanami ntapiyenabisaba wanane. Aota Awamus'a'ama uwaitantegini wasanamiba Koti nkawamupa uma aborantane.

2

Kumpari poropete kina'mi kamanane

¹ We, paipa kumpari poropete kina'miba Isureyo kina'mi nkikapi asintasa puma, kumpari mono tisa kina'miba tige tikapipa asikibewe. Asimagini, igeba kakama toma toma kumpari mono kamana tikapinti maete kanama atararitakena pewe. We, ika puma ibabunti Wa'egawamapa igeba ikabitamagini igewai nkigupa ata puwaitaingina

igaikiye. ² Igeba piya pigini, uwaena kina'miba i'ni mpikenaenawaipa aega'ma ataena pukibewe. Piya pigini, wasanamiba agama taga ki'amakaba akayasotakbewe. ³ Pigoya, pi kumpari kina'miba mampabisaena ibugai kina mimagini, kumpari kamana uma kotatipa paibikbewe. We, paitaka'ya Kotiba kamanapa uritakuwe, untemipa, kampa kaintiye. Eya, igaikebemi ntagaramaba kampa auwaita mintantiye. Pipa kampaye.

⁴ We, Koti nkagoba agaune. Piya, paipa ka'isa enisore kina'miba aguntaena pugunaba, Kotiba uwaba kampa itantine. Kampaye. Aeba iga'na puwaitantegini igeba tunusuwantu kabinti miyegana, antota'ena imikena yagaga iga'na puwaitantine. ⁵ Piya, paipa mampabi miyume kina'miba igeba ikabitauguna, aeba uwaba kampa itantine. Kampaye. Aeba tabe wanitasa ipaikaintegini pu'waewantane. Piya, Nowa aeba arupuyenama nkago uma aboranti ntagarabe tonaaentisa tarumaema aokinape Kotiba kabiyogini aogima miyuguni a'ya'ma to ka'isa pu'waewantane. ⁶ Piya, Sotomu kumatasa kina'mibe Komora kumatasa kina'mibe ataena puguna, Kotiba igama antotapa pi tabe kuma taraba taraba yakutasa kaegasogana kagu'amana waitantine. Eya, aintiba pika ikabitakibe kina'miba abima ige'wai nkantota'ena maekibeka napikibewema, Kotiba piya puntine. ⁷ Piya, Kotiba arupu yagara Arotipa aba purogana, aeba kampa tabatintiye. Piya, Arotiba kumiyyena pumekaba tabera kunta abuntiye. ⁸ Eya, pi arupu yagara ikapi mpima, ige puntantana agama kamana'waipa abintiye. Piya, igebe akaka'y'o'na'naenawaipa aborauguna asi nasiba igaogana, arupu antawamaba tabera pami puntiye. ⁹ We, Wa'egawamaba abintiye. Ae aegara kina'mipa imiyo'enabisa iba pukenaba aeba agantiye. Ata pe kina'mipa antota'ena imikena yagaga iki naki iga'na puwaitakenaba agantiye. ¹⁰ We, aeba agasiyena i'nintana potakena kumiyyena puma kamana akayuye kina'mipa iga'na puwaitakenaba aogima agantiye. Piya pe kina'miba igebigo'ena puma ige'waintana aega'ma kampa iyekuruba puma inatisa e'wasaenayaga kinakaba ikayasuwaitaw. ¹¹ Aibegini, enisore kina'miba pi kina'mi nkesegiyenaba igaintini, pigoyemagini igebe kampa ikayasuwaitama Wa'egawama nkaobipa kamanapa kampa uwaitaw.

¹² Piya, pi kina'miba igebe kabu yaga kanta puma aborawe. Pi at aya iraku'ma iyegukenaba ma'ataisa puma, igebe ago kampa agantananganaba akayasekana kaga iyeguma kaikiye. ¹³ Eya, igebe tonarona ataena pegini, igepe antota ataena puwait-awe. We, igebe arantita tikapi kamparagaena puma pika i'mu pewe. Igeba i'nintana tamakaema ara'ena puma abuyasa pisa puntini, tigege kaga ti'muntana namagini timiyo pukenaga i'mupa pewe. ¹⁴ Iyobintiba kumiyyena pumaeyagina, aguntaena pikenaenamaba kampa iga'e paye. Kampaye. Igeba tara igi napiye kina'mipa ibaibumagini, mabisaeena ibugaintanama nkagowapa agawaeyawe. We, igebe a'abibi nkaesakena kinane. ¹⁵ Igeba arupu kipa ikabitategini, antage'enaba pewe. Aibegana, Peyo ntagara Peramu aeba ataena pometa ika mpaekenaga abugantisa puma, pi ki'i aegarawe. ¹⁶ Piya, Peramu aeba aibo'ena pogana, tonki yaga, kamana kampa una kina'maba wasanama usu pumagina: A'a-o, uma kabi'ma, pi poropete yagarama nkaibo'ena potakena pomentanaba akunkatantiye.

¹⁷ Pigoya, pi kumpari mono kina'miba igebe mabintisa nabai nami wani tagankwamisa puma miyewe. Igeba esibawama ibina mpanta agarubagina, wagasa pisa puma miyewe. We, a'abibisa tununtanaba geti itaye. ¹⁸ Piya, igebe igebigo'ena puma aibo'enawipa tabera aborama kampa inipa pewe. Piya pumagini, igebe i'amantana puma i'ni kumiyyena pukenarasa wasanaba imiyo'ena puwaitama, ataena pe kina'mi nkai'aruyenabisa iyegaka wama monota inamu kanta pe kinapa, igebe paibuma miyewe. ¹⁹ Piya, igebe: Iga'na kampa punta tae kanta puma uwa miyivo, uwaimewe. Uwaimimagini, igewaipa kamparagaenara iga'nabi mpiyewe.

Piyama, ka'enama wasana asugasaginaba, pi ntgaramaba amentapinti iga'nabi miye. ²⁰ Tagane. Igeba tau'ikena yagara Wa'egare Isu Karaisiti nkagoba aogima abima aega'magini, mampabisa i'nintanabisa iyegaka wantaw. We, igeba to a'wae puma i'nintanabi ubasegina, to iraku'ma iga'na puwaitaginaba, mikenaenawaipa tabera ata puwaitaye. Eya, maru i'ni kina mintantapa ata maru mpintantane. We, igeba a'wae pepa, ainti mikenaenawaipa tabera asugasima ata marunkaipa to awametane. ²¹ Piya, piya pe kina'miba arupuyenama kikaba aibo'ena puma kampa aegarantasinta, igebe ataba puntasine. We, pi kita aegaranta'nagiba to a'wae puma Koti nkaota uwaiminti kamanapa ikabitapa, ige ataenaba to awametane. ²² Piya kina'mitiba maya kamana umarantapa esegi piye: Karawamaba naninta nagaitegina muyena pumagina, to a'wae puma naye, iye. Piya, yagaba wani pai'ataginaba, pabiyama to a'wae puma auba pasiye, iye.

¹ We, nabugai ntao'mitaba, ma nkisa kaeyogana taraena piye. Naeba tigutipa abage pekana to kanara abibebe pukibeka, tara isa kaema timuwe. ² Piya, aota poropete kina'miba ainti aborakibi kamanapa untana, aogima abiyo. Pigoya, tau'ikena yagara Wa'egawamaba uwaitaogini, aposororimpiba ae awamu wasimagini ae kamanapa untana, aogima abiyo.

³ Pigoya, a'ya'ma kina'mitaba, tigeba maru'enaba abiyo: Agogo yaga karana pukena kina'miba aborama i'ni ntapiyenawaipa aega'ma amiyo kamana uma, ⁴ maya ukibewe: Wa'ega kanakiye, untapa, au'wapa aempaye, umagini: Tayabamagi Wa'egawama kanama arupu pukena kamana untapa, pu'wauguna, pai Koti pumarantintanaba antota kampa tonarona punta uwa mirite kanantiye, ukibewe. ⁵ We, igeba maya kamanapa abitegini kaiyawe: Paitaka'ya Koti yogana mantaba aborama waintogana, waninkama meki menkaki puma maba wanitasa aborama waintantine. ⁶ Piya, Koti yogana, tabe wanitasaboranti mpaba aerari kaeyogini a'ya'ma kinapa pu'waewantawe. ⁷ Eya, Koti ae'wa kamana yogana, aboranti mpantabe mabe yaku kaekenaga uwaisitantine. Piya, ibaba Kotiba mantabebabe kabima mima aobi pumagina, ae ikabita kina'mi kamana uwaitama kaikena yagaba kaegaikiye. Pika aibo'ena puma kasawe.

⁸ We, nabugai ntao'mitaba, tigeba ma kamanapa abima aibopa a-piyo. Wa'egawama nkaobipa uwaena kabuwamaba ka yaga kanta pegina, to ka yagaba uwaena kabu kanta piye. ⁹ Piya, ka'isa kina'miba: Wa'egawama pase puma migrayema, napiyewe. Pipa kumparine. Wa'egawamaba aeba kampa pase pase puma mima, utaratanti kamana'wapa kampa uwa ataye. Kampaye. Aeba tigeba napimagina, ka'waina kakasanagaba kampa abeginia, a'ya'ma kinapa: Tigupa a'wae piyo, umagina, tigeba ibaba paebuma miye.

Mabe mantabe a'ya wakana kasa'ena aborakiye

¹⁰ Pigoya, Wa'egawama kanapa ku kina'mi pesa puma aborakiye. Pi ntangaba mantawamaba tapo uma a'ya wakana, a'ya'waemaenama nkagoba yaku tawakana kagu'ena pekana, mabe a'ya'ma mara pumaranta'enabeba kaga yaku tawaewakiye. ¹¹ We, pintanaba piyama a'ya wakiripa, tigeba to awameta mima, aota kina mima Koti kanta puma miyiyi. ¹² Eya, tigeba Koti kanaka tibugakiri kabima miyiyi. Piya, pi ntaga mantabebabe yaku tama a'ya wakana, a'ya'waemaenama nkagoba tawaewakana kagu'ena pekiri, pika tu awameta miyiyi. ¹³ We, Kotiba kasa mantabebabe kasa mabe aborakana, pita arupuyenawampaba pumaewakiye. Pika utaratantegi, kabima mima aobi pune.

Taeba Wa'egawamati anosano

¹⁴ We, nabugai ntao'mitaba, pintanagaba aogima kabima mima aobi peka, esegima yogaba puma mima ka'ena ataenabe kamparagaenabe a-puma, paruyenabi miyigina, aeba tigakiri aogima miyiyi. ¹⁵ Piya, Wa'egawamaba taeti pasema miye. We, aeba tau'ikena pasema miyema napiyiyi. Pika tabugai tao'yagararakaya'ya Poroba aogi napiyena maemagina, aegeba pi kamanapa tigetiba kaentine. ¹⁶ Eya, a'ya'ma esa'wapipa pika kaentine. We, ae isapipa ka'isa kamanapa esegima waiyegini, wasanamiba kampa aogima napiyewe. Aibeginia, kampa abinta kina'mibe tara agi napiye kina'mibe pi kamanapa uma pai ampa paibumagini ke'waiipa kasawe. Eya, pi kina'miba to ka'isa mono kamanapa kaga paibumaata pewe.

¹⁷ We, nabugai ntao'mitaba, tigeba pika napima esegima kabiyiyo. Piya, ainti kamana akayuye kina'miba aibo'enawaitasa tibaibigiri, monota esegima asikenarenaripa kaisanaga kabiyiyo. ¹⁸ Piya, tigeba Wa'egare tau'ikena yagara Isu Karaisiti nkawagaenabi mimigiri, agowapa aogima abigina anosano. Ibabe a'ya'ma yagabe, ae agega'eba asagayuyeno. Tagane. Pita piya isa kaentiye.

YONI MA NKISA KAENTIYE (KA YAGANE)

E'wasaenama kamanane

¹ Pigoya, agorasa wairite kanama waintintanaga taeba ago abimagi, taobisaba agamagi, eya taeba agama tayatasaba aigaya puntompene. Pi nke'wasaenama kamana agoba uma aboraune. ² Piya, pi nke'wasaenamaba ampa aborawaeyoga, taeba agantompene. Pi nke'wasaenama nkagowamaba tabage mirite kanaogana aboraramoga agantompene. Ibaba pikaba taeba awaga kamanapa uma aborarimune. ³ Piya, taeba ago abima agantompentanaga tigekeba urimompepa, taege ka'ena puma miyenemawe. We, taeba kaga tabati ampa airokaema, aege yagarawapa Isu Karaisitige ka'ena puma miyune. ⁴ Piya, tigepe taepē ta'muntanarepa pumaewakibika, ma nkisapa kaema urimune.

Taeba e'wasaenara nasikune

⁵ Pigoya, Isupisa taeba abitegi, uma aborarimompepa, pi kamanapa mayamawe: Piya, Kotiba aeba e'wasaenama nkagowe. Aetiba tununtanta uwaenantoba kampa waintiye. ⁶ We, taeba tununtanabi mita nasima: Kotige ka'ena puma miyune, yompepa, taeba kumpari uma taga kamanapa kampa aega'ma miyune. ⁷ Piya, aeba e'wasaenara miyisa puma taeba e'wasaenara mita nasompepa, taeba tao'mige ka'ena puma miyokana, Koti ntagara Isu kurankama a'ya'ma aguntaenarepa asu'a puragasaye.

⁸ We, aguntaenarepa kampa waintiye, yompepa, taga kamana'amaba tantabaipi kampa waiyegi, taeba tantawamapa amiyo'ena potaune. ⁹ Piya, Kotiba tagantana puma arupuyena puyaba miyegi, taeba aguntaenareka ae aobi uma aborakubompepa, aeba aguntaenarepa maeragasaki, a'ya'ma ataenarepa asu'a puragaikiye. ¹⁰ We, aguntaenaba kampa pune, yompepa, taeba Kotikaba kumpari yagarawewe, otaokana, taga kamana wampaba tantabaipi kampa waiye.

2

Karaaisitiba tao'maekenaenarene

¹ We, uwaena yakarantontonempitaba, a'yugu aguntaena pusanaga tigeti ma kamana kaeyuve. Piya, ka'wainaba aguntaena pukibemipa tabarempa Koti nkaobi ao'maema aka'i pukena yagaraba aeti mikiye. Pi ao'maenta yagara aeba arupu yagara Isu Karaisitiwe. ² Aeba tae aguntaenare maeragaikena yugaba aesagabintiye. We, tabintoreka wanane. Aeba a'ya'ma maga maga kina'mikegaba kaga aesagabintine.

³ Pigoya, Koti unti kamanapa wasiyompe kina'mitaba, taeba: Taga tao'ena potaune, yokana, tagantana piye. ⁴ We, ka'wainaba: Naeba Kotipa nao'enä potauwe, umagina Koti unti kamanapa kampa wasiyipa, pi ntgararaba aeba kumpari yagara miyeginna, taga kamana'amaba kampa antabai pintiba waiye. ⁵ Piya, Koti kamana wasiy'naba aeba Kotiti agu kao'ena potagina anosaye. Taeba piya pokana anosagi, taeba: Kotiti atokaema miyune, yokana, tagantana piye. ⁶ Eya: Aeti atokaema mima nasuwe yemi'naba Karaaisiti nasisa puma naseno.

E'wasaenama nkau'wapa aborama kayonenabi mpiyyo

⁷ We, nabugai ntao'mitaba, ma kamana ago tigeti kaeyopa, kasa kamanapa kampaye. Marusa kamana pai maenta, pi kamana kaeyuve. Pi kamanapa ago abita kananta kamanane. ⁸ We, ma kamana ago iba tigeti kaeyopa, pipa kasa'ena kanta piye. Piya, Karaaisiti ntugarasabe tige yugarasabe pi kamana'ama nkau'wapa aogima aboraye. Eya, tununtanabana a'ya wakena pegina, taga e'wasawamaba aborama taye.

⁹ Piya, ka'waina aeba: E'wasaenabi mpiyuwe, umagina ao'agararaba ata anta paritamipa, aeba tununtanabi mpiyi ntgarawewe. ¹⁰ Piya, to ka'waina aeba ao'ma agu kao'ena potami'naba aeba e'wasaenabi mpimagina, agisa aimisa'ma ware'nakenaenababa kampa aboraye. ¹¹ We, ao'maka ata anta paritami'naba, aeba tununtanabi mpima tununtanabinti nasimagina, tununtanamaba aotikaetagina aeba kekaba aibo'nabo piye.

¹² We, uwaena yakarantontonempitaba, Karaaisiti ntugarasa Kotiba aguntaenaripa maerigasagi, tiyo'maekenaga naeba ma kamanapa tigeti kaeyuve. ¹³ Nabagitaba, pai uwa mita kananti ntgararaba tiyo'ena potaga, tiyo'maekenaga ma kamanapa tigeti kaeyuve. Masimabi kina'mitaba, tigebe atenaama nkagowamapa asugasaga, tiyo'maekenaga ma kamanapa tigeti kaeyuve. Araga yagaramitaba, tigebe tabapa tiyo'ena potaga, tiyo'maekenaga ma kamanapa tigeti kaeyuve.

¹⁴ We, nabagitaba, pai uwa mita kananti ntgararaba tiyo'ena potaga, tiyo'maekenaga ma kamanapa tigeti kaeyuve. Masimabi kina'mitaba, tigebe esegima asima mintagana, Koti

kamana'amaba tintabaipinti ago uwaiyegini, tigeba ataenama nkagowamapa asugasaga, tiyo'maekenaga ma kamanapa tigeti kaeyuwe.

Mampabisenamapa taeba tagupa a-nkameno

¹⁵ Pigoya, magabe mampabisenagabe a-tibugano. Piya, ka'waina aeba magaba abugamipa, aeba tabapa kampa abugaye. ¹⁶ Piya, a'ya'ma mampara aboraintanaba pipa mampabisenawewe. Eya, tantabaipisa kupiyona tabugaintanabe, tao iye'ena puma tabugaintanabe, tau maete ima tagebigo'ena pompentanabe, pintanaba tabatisaba kampa aboraye. Kampaye. Pipa mampabisenawewe. ¹⁷ Piya, mampabisenabaa a'ya wakana, ae'wa abugaintanabe kaga a'ya wakiye. We, Koti nkabemintana wasiye kina'miba miyaba mikibewe.

Karaisiti kama kinapa ago aborawaye

¹⁸ We, araga yagaramitaba, ma kanapa pabigo a'ya wakena piye. Piya, Karaisiti kama kina'waka pai abintapa, pabigo aborakena piye. We, ibaba uwaena Karaisiti kama pota kina'miba aboraga, pika napima ma kanapa a'ya wakena piyema, abune. ¹⁹ Piya, pi kina'miba ago tagasawe. Paipa taege ka kinapa igeba kampa mintantane. Eya, igeba ka kina taege mintantasinta, taege mimagini kampa tagasasine. Piya, igeba ago tagasaga, taeba agowaipa agaompepa, a'ya'ma pi kinapa taege ka kinapa kampaye. ²⁰ We, tigeba aotane. Aota Awamus'a'maba paititanika, a'ya'ma napiyenarintaga kina mintawa. ²¹ Piya, tigeba taga kamanakaba aibo'ena pe wanane. Tigeba aogima abeka tiyo'maekenaga ma kamanapa tigeti kaeyuwe. Eya, taga kamana'amaba kumpari'enabaa kampa piyema, abeka, tigeti kaeyuwe.

²² We, kumpari yagaramita kewe, a. Piya, ka'waina aeba Isuka: Pipa taga Karaisiti kampa yemi ntgaramabaa, aeba kumpari'enabaa piye. Eya, tabape yagarawape akabiwaisitai'naba, pipa Karaisiti kama kina mintiye. ²³ Piya, ka'wainaba yagarawa akabitami'naba, aeba abawampati kampa atokaeye. Piya, to ka'waina aeba yagarawampati amatiti potami'naba, aeba pabiyama abati kaga atokaeye.

Aota Awamus'a'ama taga kamana uramiye

²⁴ Pai abinta mono kamanapa a-tigegu'a puma upebe piyo. Piya, pai abinta kamanapa upebe pukibepta, tigeba yagarawampatibe abatibe aogima atokaema miyaba mikibewe. ²⁵ Eya, aeba e'wasaenabi miyaba miikenaga uratantani.

²⁶ Piya, timiyo puritakena kina'mikaba naeba ma kamanapa tigeti kaeyuwe. ²⁷ We, paipa tigeba Aota Awamus'a'ama esejiyenawapa tigeti uwa waiye. Piya, tigeba wasanami mono ago tiyakikenaenagaba a-nkaguyosagaiyo. Kampaye. Aota Awamus'a'ama paititintantanawapa a'ya'maenaba puriyakikiye. Pi nkawamus'a'ama kamanapa tagane. Kumparipa kampaye. Piya, Awamus'a'maba puriyakigiri abima Karaitsiti atokaema miyaba miyivo.

²⁸ We, uwaena yakarantontomitaba, tigeba piyama aeti atokaema miyaba miyivo. Taeba piya pekanaba, ainti ampa aboraka, taeba asima ta'mu pumagi kampa taekuru puma tanipa kampa peno. ²⁹ Pigoya, Karaisiti aepa arupuyenama nkagoba agamagiri, pika mayama napiyiyo: Wasanama arupuyenena pem'i'nable pipa Kotitisa aborayema, napiyiyo.

3

Koti nkaraga yagara mintune

¹ Abewo. Tabarempaba tabera agu kao'ena puratama, ae araga yagararawewe, urataye. Pipa taga mintune. Piya, mampabisenamaba kina'miba Koti nkagoba kampa agantaka, tae agoba kaga kampa tagawee. ² We, nabugai ntao'mitaba, taeba ibaba Koti nkaraga yagara mintune. Piya, aintiba ayamabayaa aborakune. Pipa kampa abintune. We, aintiba Karaitsiti ampa aboraka, taeba ae agoba aogima agamagi, pika ae kanta puma mikune. Pipa abune. ³ Piya, Karaisiti nare ntare puma miyisa puma, aeti atokaema aobi pi kina'miba ige'wai nkigupa nare ntare puma miyewe.

⁴ Pigoya, aguntaena pem'i'nable aeba Koti nkago kamanapa akayuye. Eya, Koti kamana akayukenaenamaba aguntaenama nkau'wane. ⁵ Piya, tigeba abintawee. Karaitsiti aguntaena maegaikena aborantegina, aetiba aguntaenabaa kapa kampa waintiye. ⁶ Piya, ka'waina aeti atokaema miyemi'naba aeba aguntaenabaa kampa aegaraye. Eya, to ka'waina aguntaena aegarami'naba aeba Karaitsiti nkagoba kampa agamagina, aekaba kampa abibebe piye.

⁷ We, uwaena yakarantontomitaba, tigeba ka'waina timiyo puritasanaga kabima mima abiyo. Piya, arupuyenena pem'i'nable aeba Karaitsiti arupu yagara miyisa puma arupu yagara miye. ⁸ We, paitaka'yaa kewamaba aguntaena puta kanantegina, wasanama

aguntaena pemipa aeba kewama ae tupisawe. Pigoya, kewama ntugaba aguya ima agarubakaikenaga Koti ntagaramaba ampa aborantiye.⁹ Pigoya, Kotitisa aborai'naba aeba kampa aguntaena aega'ma piye. Piya, aeba Kotitisa aboragina, Koti ntapiyenaba agupinti waiye. Piya pegina, aeba agunta ki'i kampa aegarakena piye. Kampaye.¹⁰ Pigoya, wasanamiba Koti ntagaraena puma miyewo, kewama ntagaraena puma miyewoma, agowipa mayama agakune: Piya, ka'waina arupuyena kampa pemi'naba, aeba Koti tupisa kampa aboragina, to ka'waina aeba ao'mapa kampa agu kao'ena potami'naba, aegeba kaga Koti tupisaba kampa aboraye.

Taeba tao'mipa agu kao'ena puwaitano

¹¹ Pigoya, maya kamanapa paitaka'ya abita kanantompene: Tao'mipa agu kao'ena puwaitanomaba, abintompene.¹² Piya, Keni aeba kewama tupisa, ae a'nantopa aegunti-sapa a-puma miyeno, iye. We, nanaraka aeguyogana purintiye. Piya, Keniba kamparaga yuga pogana, a'nantowampaba arupu yuga pomeka amo waiyogana aeguntiye.

¹³ We, nao'mitaba, mampabisa kina'miba kama puritaigiripa, pikaba pamiba a- piyo. ¹⁴ Piya, taeba tao'mipa agu kao'ena puwaitaompeka mayama abune: Taeba paisaenaba kaite purintapisa asima e'wsaenabi ubasintunema, abintuwé. Piya, agu kao'ena kampa potami'naba, aeba purikenaenara uwa miye. ¹⁵ Piya, ka'waina ao'maka ata anta paritam'i'naba aeba wasana aeguma kaiyisa piye. We, tigeba ago abintawé. Wasana aeguma kaiyi'naba, ae antabipa e'wsaenaba kampa waiye. ¹⁶ Piya, Isu aeba tao'maekenaga ae'wa nkaumawapa kasoga, taeba agu kao'enama nkagoba taga agantompene. Piya, taeba pabiyama tao'miti taumaba kasakanaba, kanarasakiye. ¹⁷ Piya, ka'waina aeba mampabisenaba uwaena waintakanaba, ka ao'yagarama kusi miyegina agama aka'intaesi potakanaba, ayama Koti nkagu kao'enaba ae antabai pipa waikiye, a. Pipa kampaye. ¹⁸ We, uwaena yakarantontomitaba, taeba kamanatasabe tawamutasabe uwaba agu kao'enaba a-puwaitano. Kampaye. Taeba taga tantara puwaitama tayapisa agu kao'ena puwaitano.

Amatiti kina'maba Koti nkaogaba kampa aekuru pukiye

¹⁹ Piya pukubompeka, taeba tagantanabi ubasunema, abekana, Koti nkaobi tagu'amaba paebuma waikiye.²⁰ We, tagu'amaba taipi piyeka, taeba paebuma paruyenabi mikune. Eya, Kotiba tagu'amaba taipi piyeka, taeba paebuma paruyenabi mikune. Eya, Kotiba tagu'amapa asugasima, aeba a'ya'maenama nkagoba agantiye. ²¹ We, nabugai ntao'mitaba, tagu'amaba kamanapa kampa uratakibipa, Koti nkaobipa asima kampa taekuru pukune. ²² Piya, taeba unti kamana'wapa wasimagi, abemintanawapa tayapisa pompeka, taeba ka'enaga abigaokanaba, aeba aboraramiye. ²³ We, unti kamana'wapa mayamawé: Taeba yagarawa Isu Karaisiti nkagera tamatiti potamagi, tao'mipa agu kao'ena puwaitano, untiye. Piya unti kamanapa uratantine. ²⁴ Piya, a'ya'ma Koti unti kamana wasiye kina'miba igeba Kotige ka'ena puma miyegana, Kotiba igupi miyaba miye. Piya, ae tamemi Nkawamus'a'ama ntugaba tagupi aboragi, taeba agama, Kotiba taege miyema, napiyune.

4

Awamusapa toma toma mintawe

¹ We, nabugai ntao'mitaba, uwaena kumpari poropete kina'miba mampabintiba nasima kamana yepa, tigeba karu'enaba a-nkiyegaraiyo. Piya, awamusapa toma toma mintiya, pipa Kotipisa kanayo, to auka'isa kanayoma napima, agowaipa aogima agaiyo.

² Piya, Koti Nkawamusano, to awamusanova tigeba mayama abikibewe: Isu Karaisiti wasana aborantine ye, pi kina'miba Koti Nkawamus'a yagane. ³ Piya, to ka'isa kina Isukaba: Kampa wasana aborantiye, ye kina'miba, igeba Koti Nkawamus'a yagaba kampaye. Pi nkawamus'a'ama Karaisiti kama kina'ma nkawamusane. Piya, paipa aeka: Mampara aborakiye, yogiri abintaganá, ibanto mampabi ago aboraye.

⁴ We, uwaena yakarantontomitaba, tigeba Kotintana mimagiri, kumpari poropete kina asu igasawe. Eya, ma nkawamus'a'ama tigupinti waintemi'ná, aeba mampabi wainti nkawamusapa asugasaye. ⁵ Piya, pi kumpari poropete kina'miba igeba mampabisa kinane. Piya pegana, kamana'waijmpaba mampabisenaba kanta pegini, mampabisa kina'miba abewe. ⁶ We, taeba Kotitisawe. Piya, Kotiti atokaeya kina'miba kamanatepa abewe. Pigoya, Kotitisa kampa aboranta'nagiba kamanatepa kampa abewe. Pintanaraka taga awamusape kumpari awamusape isige agoba pako pikenaga napiyune.

Koti aeba agu kao'enama nkagowe

⁷ We, nabugai ntao'mitaba, taeba agu kao'ena peno. Piya, agu kao'ena pukenaenaba pipa Kotitisawe. Piya, taga agu kao'ena pemi'naba aeba Kotitisa aboramagina, aeba

Kotiti atokaentine. ⁸ We, wasanama kampa agu kao'ena potami'naba, aeba Kotiti kampa atokaema, agowapa kampa agaye. Kampaye. Piya, Kotiba agu kao'enama nkagowe. ⁹ Pigoya, Kotiba yagarawapa ka'anto mintogana otaogana mampabipa tumintiye. Piya, taeba: Aeti atokaema e'wasaena maeyiyema, otaogana tumintiye. Piya pumagina, pi ntugarasa Kotiba agu kao'enawapa taetiba aboraramintiye. ¹⁰ Eya, agu kao'enama nkagoba mayama aborantiye: Piya, taeba agu kao'ena kampa potantokana, Koti aewa agu kao'ena puratamagina, yagarawapa otaogana, aguntaenarepa asu'a puragaikenaga mampabipa tumintiye.

¹¹ We, nabugai ntao'mitaba, Koti agu kao'ena puratamika, taegeba pabiyama tao'mipa agu kao'ena puwaitakanaba kanarasakiye. ¹² Pigoya, ka yagaramaba aobisaba Kotipa kampa agantiye. We, taeba tao'mipa agu kao'ena puwaitakubompepa, Kotiba taege miyeka, abekana, agu kao'enawapa tantabaipinti anosama wakiye.

¹³ Piya, Koti aeba Awamus'a'wapa pako puratamika, taeba mayama abune: Taeba aege ka'ena puma miyokana, aeba tagupi miyaba miyema, abune. ¹⁴ Piya, tababa yagarawapa otaogana maga maga kina i'kenaga tumintegi, taeba agamagi, pi nkawaga kamanapa uma aborama miyune. ¹⁵ Piya, ka'waina aeba Isuka: Koti ntagarawe, yi'napa Kotiba aege miyegina, pi ntagaramaba Kotiti atokaema miye. ¹⁶ Piya, Kotiba agu kao'ena puratamikaba agamagi tamatiti pune.

Piya, Kotiba agu kao'enama nkagowe. Eya, ka'waina aeba agu kao'ena wantaga miy'i' naba aeba Kotige miyegina, Kotiba aege miye. ¹⁷ Piya, agu kao'enawapa tantabaipinti anosagina au'wapa mayama aboraye: Taeba Koti antota'ena tamikibi ntagagaba kampa taekuru pune. Eya, ibantoba Karaisiti ae kanta puma taeba mampabi mintune. ¹⁸ Pigoya, ka'waina agu kao'ena potami'naba kampa aekuruba piye. Eya, taga agu kao'enamaba taekuruyenarepa agarubakasaye. Piya, ata ika mpaekenaga taekuruyenaba aboraye. Aibegina, ka'wainaba aekuru pi'napa, ae antabaipintiba Koti nkagu kao'enaba kampa anosama waiye.

¹⁹ Pigoya, Kotiba marupa agu kao'ena puratantika taeba agu kao'ena yaga miyune. ²⁰ Piya, ka'waina aeba ao'mipa ata anta pariwaitamagina: Kotipa agu kao'ena potauwe, yipa, aeba kumpari iye. We, aeba aganta nkao'mipa kampa agu kao'ena potamipa, ayamabayna kampa aganta Kotipa agu kao'ena potakiye. Pipa kampaye. ²¹ We, Kotiba maya kamanapa uratantiye: Piya, ka'wainaba Kotipa agu kao'ena potami'naba, aeba ao'makeba pabiyama agu kao'ena potakana kanarasano, untiye.

5

Amatiti yagaramaba mabisenaba asugasayeye

¹ Pigoya, a'ya'ma kina'miba: Isu aeba taga Karaisitiwema, abima ye'nagiba, igeba Koti ntagaraena puma miyewe. Piya, abawampa agu kao'ena pota'nagiba, igeba kaga a'ya'ma yagarawake agu kao'ena puwaitawe. ² Eya, taeba Kotiti agu kao'ena potama, unti kamana'wapa wasiyompeka taeba mayama abune: Taeba Koti ntagaramipa kaga agu kao'ena puwaitaunema, abune. ³ Piya, taeba Koti unti kamanapa wasiyompepa, taeba Kotiti agu kao'ena taga potaune. We, ae kamana'amaba kampa kuntaba tabiye. ⁴ Piya, Kotitisa aboranta'nagiba igeba mabisenaba asugasaweye. Piya, taeba Kotiti tamatiti potaompepa, pi tamatiti'enarempaba mabisenaba aeguma maema metama asugasayeye. ⁵ We, ke esegi puma mabisenaba maema megasi piye. Piye: Isu aeba Koti ntagarawema, abima yeminaba, aeba asugasi piye.

Kotiba yagarawampa kamanapa uma arantiye

⁶ Piya, Isu Karaisiti aeba aborama yogawa agobikenaba wani mpaemagina, nagarikenaba korankapa airintiye. Piya, wanitasa abiwanane. Wanitasabe koratasabe agowapa aborantine. ⁷ Pigoya, Awamusapa tagantanama nkago mintana, pi Nkawamus'a'wama Karaisiti nkawaga kamanapa uma taga aboraramegi abune. ⁸ Piya, pintanaba kakagami uma aboraweye. Eya, Awamusana, wanina, korana suma, pi kakagaba igeba ka awaga aboraweye. ⁹ Piya, wasanami nkiwaga kamanapa taeba abune. We, Koti yemi kamana'amaba wasanami kamanapa igasayeye. Piya, Kotiba Isukaba: Yagaranene, yoga abuntune. ¹⁰ Pigoya, ka'wainaba Koti ntagaramati amatiti potami'naba, ae'wa nkagupipa Koti uma aborami kamana'ama nkau'wapa aboraye. Kampa Kotiti amatiti potami'naba, aeba Koti yagarawakaba awaga kamana untipa kampa abibebe piye. We, pika aeba Kotikaba: Kumpari yagaraweye, uma ata potaye. ¹¹ Pigoya, taga awaga kamanapa mayamaweye: Kotiba e'wasaenaba tamika miyaba mikune. Pi nke'wasaenamaba yagarawappisa aboraye. ¹² Piya, Koti ntagarari uma kabo pemi'naba, aeba pi nke'wasaena wantagane. We, Koti ntagarari kampa kabo pemi'naba, aetiba pi nke'wasaenaba kampa waiye.

E'wasaenaba taeti waiyaba miyema napiyeno

¹³ We, Koti ntgaramati timatiti pe kina'mitaba, ma kamanapa tigeti kaeyuwe. Piya, tigeba pi waiyaba e'wasaenaba ago maeyawema napiyiyoma, kaeyuwe. ¹⁴ Piya, taeba Kotikaba kampa taekuru punta ta'muntanabisa ae agori wano. Piya, taeba kampa taekuru punta, ka'enaga ae abukibintanaga abigakubomppea, kamanatepa aogima abikiye. ¹⁵ Eya, abigakenaenarepa abiymea, abintompeka, tao'maeyaka abigakenaenarempa nkau'wapa ago maekunema abima tagantanagaba yune.

¹⁶ Pigoya, ka'waina aeba agupa a'abibi agora kaikena aguntaena wanane. To aguntaena pekanaba, to ka yagaramaba agantanaba, aeba ao'yagaraga Kotipa abigakana, Kotiba e'wasaenaba pi nkao'yagaraba ameno. We, agupa agora kaikena aguntaenaba ka waintiye. Piya pemi ntagaragaba abigaoma naeba kampa yuwe. Kampaye. ¹⁷ We, a'ya'ma kampa arupu pemintanaba pipa aguntaenama nkau'wane. Piya, aguntaenama nkau'wapa kampa wasanama nkagupa agorapa kaikiye.

¹⁸ Piya, Kotitisa abora'nagiba agunta ki'i kampa aegaraga, agaune. Eya, Kotitisa aboranti ntgaramaba kabiwaitagina, ataenama nkagowamaba kampa ata puwaitaye. ¹⁹ We, taeba Kotitisa aborantokana, a'ya'ma mampabisa kina'miba ataenama nkagowama nkamentanti miywemera, abune. ²⁰ Piya, Koti ntgaraba aboramagina aogi napiyenaba tamiye. Eya, aeba taga ntgararama nkagowaka abibebe pukena napiyenaba tamiye. Pikaba abimagi, taeba tagantanama nkagoripa atokaemagi, yagarawa Isu Karaisitige kaga aeti atokaeyune. We, aeba Koti mima, waiyaba e'wasaenama nkagowe.

²¹ We, uwaena yakarantontompitaba, tigeba ama kotipa tikabiwaitaiyo.
Yoni piya isa kaentiye.

YONI MA NKISA KAENTIYE (TARA YAGANE)

¹ Naeba monota kabiyo ntagaramana, Koti ugatanti nkwae'makake yagaragakeri naeba ma nkisapa kaeyuwe. Piya, naeba taga kamanaka napima tigeka nabugaye. We, nae nabinto wanane. A'ya'ma taga kamana abibebe pe kina'miba, igeba kaga tigeka ibugaye. ² Piya, taga kamana'amaba ibaba taeti waintana, taeti waima waiyaba mikihiba napima piyama yune. ³ Pigoya, Koti tabage, Isu Karaisiti taba ntagarabe, isigeba tagantana puma agu kao'ena puratamaginisi, isigetisa awagaenabe, isintara'enabe, paruyenabe taeti waima waiyeno.

Agu kao'enama kamanane

⁴ Pigoya, ka'isa yagaragampigi tabarempa utarataisa puma tagantanaba aegarakka, naeba abima tabera na'mu puwe. ⁵ We, ma nkwae, ago kamanapa kapa kaema ugamuwe. Pipa kasa kamana kanta puma wanane. Paitaka'ya uramintanaga mayama ugamuwe: Taeba tao'mipa agu kao'ena puwitanoma, yuwe. ⁶ Piya, paitaka'ya: Agu kao'enama ki'i waiyoma, Kotiba yogiri abintane. Piya, taeba unti kamana'wapa aegarakubompepa, taeba agu kao'ena pukenaenama nkagoba pukune.

Kumpari kina'mi kamanane

⁷ Pigoya, uwaena timiyo pikena kina'miba mampabinti nasewe. Igeba: Isu Karaisitiba au'yaga kampa aborantine, yewe. Piya kina'miba igeba timiyo puma Karaisiti kama kina'ena potawe. ⁸ We, tigeba titipa aogima kabiyiyo. Tigeba mono yugama nkau'wa kaisanaga kabima mima, aogi ika mpaekenaga aobi piyo. ⁹ Piya, ka'waina aeba Karaisiti kamanati kampa atokaenta atate to ki'i wakibipa, Kotiba aegeba kampa mikiye. Piya, to ka'waina aeba Karaisiti kamanati atokaeyakanaba, tababe yagarawampabe kaga aege mikibewe. ¹⁰ Piya, ka'waina aeba Karaisiti au'yaga aboranti kamana'nane. To kamana urite nasima tigeti uma irosakiripa, tigeba wa'eritapa a-nkababuma, kayonenaba a-potaiyo. ¹¹ Piya, kayonena potakibi'naba, aeba agunta yugawa ao'maekiye.

Nagarikena kamanane

¹² Pigoya, urimikena kamana'nepa uwaena waintegi, naeba esapi kaesanagaba kampa nabegi, tigeti waka, nawamupisa uma abenema, yuwe. Piya pekana, ta'muntanarepa anosakiye.

¹³ Pigoya, Koti otanti ka'nanto ntagaramiba: Aya pene, ugatawe. Yoni piya isa kaentiye.

YONI NKISA KAENTIYE (KAKAGA YAGANE)

¹ Naeba monota kabiyo ntagaramana, nabugai ntao'yagara Kaiyasi kaetiba ma nkisapa kaeyewe. Piya, naeba taga kamanaka napima akeka nabugaye.

² We, nabugai ntao'yagara, kae kagupa kanara monoti waintiyema, ago abuwe. Pabiymagi, a'ya'maena kaega pempentanabe mikenenaeb aogima waisanaga nabkiye.

³ Piya, ka'isa mono kina'miba kanama kaekaba: Taga ki'iba aegaraye, yugu abite tabe na'mu puntone. We, kaeba tagantanamanati nasenema, taga abintone. ⁴ Piya, yagararanempiba taga ki'i aegarakaba abima tabera na'mu puwe. Piya pekana, tonamaba pi nta'muntananepa kampa asugaikiye.

Kaiyasi aogi yuga puntiye

⁵ We, nabugai ntao'yagara, kaeba mono kina'miti kayokaya'ena puma iyo'maeyampepa, kamattiti'enama nkau'wapa aogima aborane. Eya, namu'isa mono kina'miti pabiymama aborampepa anosama asugasaye. ⁶ Piya, ka'isa iyo'maentampe kina'miba monota ai'aru pompe kina'miteti irosa'ma agu kao'ena puwaitampe ntanaraka uramewe. Piya, kaeba Koti ntugaraka napima ke'isaena iyo'maeyagan, kanarasano. ⁷ Piya, igeba Karaisiti ntugaraka mawaipa atate namu'i wama namu'isa kinatasaba ikapa kampa maeyaka iyo'maeyo. ⁸ We, taeba piya kina taga kamana'ama ntugara iyo'maekenaga ke'isaena imekana, kanarasakiye.

Tiyoterepisi aeba ataena puntiye

⁹ Pigoya, naeba ka'isa kamanapa monota ai'aru pe kina'mititi ago kaentone. We, Tiyoterepisi aeba paitama tabe misanaga pemi ntagaraba, aeba tae kamanapa kampa abiye. ¹⁰ Piya, naeba tigeti uma irosakubopa, pintana pemikaba kamanapa ukuwe. Aeba taekaba ata kamana uma kumpari urataye. Pi abiwanane. Aeba mono kinapa kampa kayonena puwaitamagina, to ka'isa kina kayonena puwaitakena pegana, akunkitama mono ai'aruyenabisa igarubaye.

Timiteriyasi aeba aogiyena puntiye

¹¹ We, nabugai ntao'yagara, kaeba ataenamapa a-nkaega'ma aogiyenamana aegarao. Piya, ka'waina aeba aogiyena pemipa, aeba Kotitisa aborantiye. To ka'waina aeba ataena pemipa, aeba Koti nkagoba kampa aogima agantiye. ¹² Pigoya, a'ya'ma kina'miba Timiteriyasi nkagega'e asagayuyewe. Piya, tagantanama nkagowamaba tabe agiga'e kaga aboraye. Piya pegi, naegeba ae aegaga'e asagayuyogana, awaga kamana'nepa taganema, ago abene.

Nagarikena kamanane

¹³ Pigoya, urimikena kamana'nepa uwaena waintegi, naeba esapi kaesanagaba kampa nabiye. ¹⁴ Piya, naeba karu'ena tigeti waka, nawamupisa uma abenema, yuwe.

¹⁵ Paruyenaba kaeti waima waiyeno. Tao'miba: Aya pene, yewewe. Kaebe a'ya'ma pita'i miye taokina'mikaba: Aya pewe, uwaitao. Yoni piya isa kaentiye.

YUTA MA NKISA KAENTIYE

¹ Nae Yuta, Isu Karaisiti kayokaya yagara mima, Yemisi nka'nantowe. Piya, taba Kotiba agu kao'ena puma utaritama Isu Karaisiti atokaentaka kabiritai kina'mititi, ma nkisapa kaeyuve. ² Pigoya, Koti nkantara'enabe, paruyenabe, agu kao'enabe tigeti waima waiyekana anosano.

Akayukena kina'mi kamanane

³ We, nabugai ntaokina'mitaba, maru'enaba naeba esa kaema a'ya'ma kina'mite tau'ikenaenama nkagowapa urimisanaga nabugantiye. Pigoya, ibaba pika wanane. Naeba tonaraka ma kamanapa kaeyuve. Piya, ka yaganto Kotiba aeti atokaeyompe kina'mititi tamatiti'enaba aboraramintegi, pi tamatiti'enaretapa tigeba aogima kabima mima, akaya kamanapa aebasanaiyoma, urimuwe. ⁴ Piya, ka'isa kamparagaena pe kina'miba agowaipa kakaurite kanamagini ai'aruyenatipintiba ubasintawe. Pi kina'miba igeba Koti nkawagaenawapa maema a'wae puma, i'ni ntapiyenewaipa aega'magini kumiyyena puma, ka tabe yagarare, Wa'ega Isu Karaisitipa ikabitawe. Igeka paitaka'ya Kotiba: Kamana uwaitakuwema, untine.

⁵ Pigoya, tige ago abiwaenta kamanapa to kakema urimekiri abiyo: Piya, paipa Wa'egawamaba Isureyo kina'mi nki'ima Isipi marisa ibabute me itamagina, aintiba kampa aeti imatiti pume kinapa iyeguntiye. ⁶ Piya, paipa ka'isa enisore kina'miba kabiyume mparutta kampa agora mima taga wa'ewaipa kaintane. Piya puguna, Kotiba waiyaba iga'narasa kirokaewantagine igeba a'abibisa tununtanabinti miyigina, Kotiba a'e'wa tabe yagaba kamanapa uwaitakiye. ⁷ Piya, paipa Sotomu kina'mibe Komora kina'mibe pi kuma'ama nkawarisa kina'mibe, igeba ata enisore kina'miba ke'wai kaintasa puma atate kumiyyena puma waba to wa uma paibogana to wae ampa paibogana puta wantawe. Piya puguna, Kotiba: Agate tiyekuru piyema, esegi yakutasa agora iyegugaintine.

⁸ Pigoya, tigeti abora kina'miba pabiya pewe. Igeba amontabi mpikena kanta puma mima i'waipa i'nintana potamagini kiya kina'mi kamanapa ikabitamagini, inatisa e'wsaenayaga kinakaba ikayasuwitiae. ⁹ Piya, paipa kewamaba Mosesa nkau maekenaga yogana, marusa enisore yagara Maikoro aeba: A'a-o, umagina maka untase. Piya puntamepa, Maikoroba kampa ataenaba puma, antotapa kampa akayapa otantine. Kampaye. Aeba: Antotapa Wa'egawamaba ugatakiye, omintiye. ¹⁰ We, ma kina'miba kampa agantanagaba karu'ena akayasewe. We, kabu yagama ntapiyena waintisa puma, igebi wasanama ntapiyenaba waintegini, pi kipa atagana aintiba napiyenewaimpala nkagomaba ipi pima antotapa iyegukiye. ¹¹ We, igeba atenaabi mpikibewe. Piya, Keni wasana aeguntisa puma, igeba piya puta nasewe. Piya, Peramu puntisa puma, igeba tabe ikankai maekenaga napiyaba miyewe. Piya, Kora aeba Koti kamana akayuntisa puma, igeba piya pekana aintiba antota'enaba kaga imima iyegukiye.

¹² Piya, agu kao'enaritasa tigeba aki puma nakeda pigini, igeba i'nintana tamakaema ara'ena puma abuyasa pisa puntini, ige'wai ntapima nama iga'e paga paga puma kampa inipa pewe. Igeba ka kampa aeyam ibina mpanta kanta puma miyegana, esibawama agarubagina nasisa pewe. Eya, igeba yawama kampa a aenta asa wagina wasanama ikasamisa pewe. ¹³ Piya, tabe kayo waninkama tabera aigayo'ya pegina akagawa irisa puma, igeba pami pukenaenawapa aborawewe. Piya, igeba noriawama ogasi ankagasi pemisa puma igeba ata a'abibisa tununtanabinti agora mikenaba igebi uwaitantine.

Kamparaga ikantanawaine

¹⁴ Pigoya, Antamu aeba paitama aborama kanama tonaentisa tarumaema pogana Inoki aboramagina, aeba poropete kamanapa maya uma aborawaimintiye: Abo. Wa'egawamaba aeba uwoma aota kina'wantaga tumimagina, ¹⁵ a'ya'ma kina antota ika nkimikena tumegi agauwe, untiye. Eya, a'ya'ma Koti ikabita kamparaga kinapa a'ya'ma kamparagaena punta kamparaga yugawaika kamanapa uwaitamagina, pi kamparaga agunta kina'miba ata otanta kamanatakaba antota'enaba imikena tumegi agauwe, untiye. ¹⁶ We, pi kina'miba wasana ika'i obisobi suma, imo puyaba mima, igu i'nintanawai aega'ma, tabe a'yugu kamana uma igebigo'ena puma, kota paibukeneraka ikaragara kamanapa yewe.

Tigeba timatiti'enaba upebe piyo

¹⁷ We, nabugai ntao'mitaba, Wa'egare Isu Karaisiti nkaposoro kina'miba aborakibintanaga kamanapa untane. Tigeba pika to kakema aogima napiyiyo. ¹⁸ Igeba mayama urimewe: Ainti agogo yaga agarosakanaba, monota karana pukibe kina'miba aborama

Kotipa ikabitama igu i'nintanawaipa puta nasikibewe, untawe. ¹⁹ We, piya pukibe kina'miba apako pikenaenaba aborakibewe. Eya, igeba mabisa kina'mi ntapiyena aegaraigina, Aota Awamus'a'ama igupipa kampa milkiye.

²⁰ Pigoya, nabugai ntao'mitaba, tigeba esegi puma aota timatiti'enaripa puyaba mita iyigina anosano. Tigeba Aota Awamus'a'ama nkesegeyenarasa nunamu yiyo. ²¹ Tigeba Koti nkagu kao'enabi ubasiyaba miyivo. Piya, Wa'egare Isu Karaisiti nkantara'enama nkau'wapa aboragiri, tigeba miyaba aumaba maekibewe. Pika yokege piyo. ²² Tara igi napiye kina'mipa ka'isaba ibawage piyo. ²³ Piya, yakupisa iso itasa puma, to ka'isa kinapa i'iyyio. Tigeba tiyekuru puma to ka'isa kinapa tintara puwaitama iyo'maemagiri, arirasa i'nintanawaika tiyekuru puma apasanaiyo.

Kotiti ta'mu potakena kamanane

²⁴ Pigoya, Kotiba ware'asanaga aogima kabiritakena yagarawe. Eya, aeba abuyasa kampa punta kina aboraritaigiri ti'mu pigina, e'wasaenawapi tiba puritakena piye. ²⁵ Piya, Koti aeba ka'anto mima, Wa'egare Isu Karaisiti ntugarasa tau'ije. Pigoya, asagayukenaenabe, e'wasaenabe, kabiratakenaenabe, esegiyenabe, paippe ibabe a'ya'ma to yagabe, aeti waima waiyeno. Tagane.

Yuta piya isa kaentiye.

AREBERESONI KAMANA KAR AISITIBA ABORAMINTIYE

¹ Pigoya, ma kamanapa Isu Karaisiti aboranti kamanane. Piya, agarosama aborakibintana kayokaya kina'wa iyakikenaga Kotiba Isu uma aboramintiye. Aboramogana, Karaisiti aeba enisore kina'wa otaogana kayokaya yagarawa Yoninteti tumpa aboranamintiye. ² Aiboga, Yoninaba Koti aboranti kamanape Isu Karaisiti nkawaga kamanape abimagi: Pipa tagantanawe, untuwe. Eya, a'ya'maema agantontanagaba: Tagane, untone.

³ Piya, wasanamaba ma poropete kamanapa aisuma awamupisa uma aborai'na, aeba a'muntanabi mpikkiye. Piya pegiri, wasanamiba ma kaeyo kamanapa abima aegara'nagitaba tigeba kaga ti'muntanabi mpikibewe. Eya, pi kanapa agarosaye.

Yoniba monota ai'aru pume kina'miti esa kaentiye

⁴ Nae Yonina, ma kamanapa tonarentisa tara umaema monota ai'aru pukenaenata Esiya mari wainti, tigeti kaeyuwe. Piya, Koti aeba iba mintipe, pai mintantipe, ainti mirite wakibipe, aepisa awagaenabe paruyenabe tigeti waiyeno. Eya, Kotipisabe, ae wa'ega aemu yabaera miye tonarentisa tara umaema Awamus'a'ama nkagobisabe, ⁵ Isu Karaisitispabe, awagaenabe paruyenabe tigeti waima waiyeno. Piya, Karaisiti aeba tagantana aboraminti, aeba purintapisa paitama asimagina, mabisa wa'egamipa kabiwaitayye.

We, aeba agu kao'ena puratamagina, korankatasa aguntaenarepisa akariyobatata magina, ⁶ ka'ena puratama kabiratamagina, ae'wa nkabawampa Kotiti mono kiye kina kanta puma miyyoma, uratantkiye. Piya puntegi, ae aegaa'eba asagayuyekana kabiratayaba miyeno. Tagane.

⁷ Abiyo. Aeba ibinankama nkakapi ampa aborakini a'ya'ma kina'miba iyowaitasa agakibewe. We, a'ya'ma ita atama aegunta kina'mibe kaga agakibewe. Pigoya, a'ya'ma maga maga kina'miba agama aeka iyekuru puma intara pukibewe. Kanaranra, aborao. Tagane.

⁸ Piya: Naeba paitanta yagara mite aintisa yagaraba mite puwe, Wa'ega Kotiba piya iye. Eya, Koti aeba iba mintipe, pai mintantipe, ainti mirite wakibipe, aeba taberaka'yane.

Yoniba Karaisiti nkaoga'ena agantiye

⁹ Nae Yoni tiyo'yagararanawe. Naeba tigege Isuti atokaema mimagi tauki nakiyenarepa aesa'ga'magi, Koti kabiratakenaenabi ubai'ma, tigege kaga paebume mima monoka asima esegima miyuwe. Piya, naeba Koti aboranti kamanape Isu nkawaga kamanape aborasanaga akuntatama nagarubakasugu, wani nkakapisa Patimosi mara mintantuwe. ¹⁰ Piya, ka yaga, Wa'egawama nkaota yagaba, naeba Awamus'a'ami atokaema kasa'enaba agauwagana, naka'isa ka tabera awamu aga maya uma pikuri aga usu puntiye: ¹¹ A'ya'maena agampentanaba esapi kaemagina, tonarentisa tara umaema monota akibukenaenara atagana wano. Piya, Epesasi kinape, Simena kinape, Pegamami kinape, Tiyatira kinape, Satisi kinape, Piratepiya kinape, Areyotisiya kinape, igeti kaema atagana wano, unatantine.

¹² Piya unataoga, naeba kamana unamemi'napa agakenaga a'wae puntuwe. A'wae pumagi, tonarentisa tara umaema korirasa pumaranta kani waintoga agauwapa, ¹³ pi kani'ama nkakapipa ka yagara, aeba wasanama ntagara kanta puma mintoga, agantuwe. Piya, aeba e'ero kai potama, abamukantiba korirasa pumarantatasae-barakima ki u'mawe. ¹⁴ Piya, a'nope abiayape wae puwama, sipisipiwama nkaya kanta puma, wae nkibina kanta puntiye. Piya pogana, aowamaba yaku ikisu pogana, ¹⁵ agisawamaba, tabe yakunkama kapa kaema i'nintanawa kaigasagina ta'nera'ne bisa pogana, awamu'wampaba tabe wani nkabawama yisa suntiye. ¹⁶ Piya, aeba ayatakanti tonarentisa tara umaema nori u'ma mintogana, awamupisaba ka paroya ntogipa torirori agana waintoga yogipa aboraogana, aowawamaba e'wasa puwama, pa nkesegi pataisa pogaga agantuwe.

¹⁷ Naeba piyama agategi, agisabi pu'wanta kina kanta puma ware'nantuwe. Piya puwagana, aeba ayatakanti natama, maya untiye: Kaekuruba a-po. Naeba paitanta yagara mite aintisa yagara mite puma, ¹⁸ naogama mintuwe. Piya, paipa nae purintoka, we, ibaba naogama miyaba miyuwe. Piya, naeba purikenarasa kibe karasa kibe uruntuwe. ¹⁹ Piyama kaeba pintana agampentanaba esapi kaeyo. Eya, iba waintintanagabe ainti aborakibi ntanagabeba kaeyo. ²⁰ Pigoya, kaeba tonarentisa tara umaema nori nayatakanti waintegina agampepe, tonarentisa tara umaema korirasa pumaranta kani agampepe,

pipa awame'enawe. Pi'na nkagowapa mayamawé: Pi tonaentisa tara umaema kanipa, pabi tonaentisa tara umaema monota ai'aru pukena kinane. Pi tonaentisa tara umaema noriba, pipa pi mponota ai'aru pe kina'mi kiye kinanema, unamintiye.

2

Epesasi kina'mi nkisane

¹ Pigoya, Epesasi kumata monota ai'aru pe kina'mi kiye yagaramati kamanapa mayama kaeyoma, unamintiye: Naeba nayatakanti tonaentisa tara umaema noriba u'urinta, tonaentisa tara umaema korirasa pumaranta kani'ama nkakapintiba naso ntagaramana, naeba ma kamanapa kaetiba atauwe, iye:

² Piya, naeba a'yama monota tiyapisenabe, araga ntugaripe, paebuma mama kuntaena aesaga pentanaripe, ago agantuwe, iye. Eya, tigeba kamparaga kinakaba kampa tibegiri, kumpari kamana: Taeba aposororawe, ye kina'mi nkagowipa a'yigimpa agama kumpari'enawaipa aboraga, pipa agauwe, iye. ³ Piya, tigeba naekaba paebuma mama kuntaena aesaga'ma esegima asimagiri, tiyekitaba kampa pega, agauwe, iye. ⁴ We, tigeti ka kamana uritauwe, iye. Piya, maru'enaba naeti agu kao'enaba aogima punatantawe. Pipa ibaba kasawe, iye. ⁵ Piya, paipa tigeba aogiyena puntakiri, ibanto ago kaite ware'nawawe, iye. Pika napimagiri tigu a'wae pumagiri maru'ena puntasa piye, iye. Piya kampa pukibepa, kanetipa marunkatasu tumpaegaikuwe, iye. Eya, kampa tigu a'wae pukibepa piya pukuwe, iye. ⁶ We, kapa tige pega naeba abogana kanarasaye, iye. Piya, tigeba Nikorasi tumpi pentanaba kampa tibugagina, naekeba kampa nabugagina kanarasaye, iye.

⁷ Piya, wasana ageyaga kina'maba Awamus'a'ama monota ai'aru pe kina'mi uwaimemi kamanapa abeno, iye. Pigoya, wasanama mono yuga puma agaikibipa, naeba otakana wasanama e'wasaena amikena yamankapa maekiye, iye. Eya, pi ntamankapa Koti nkauka kumata waintakana amekana nakiyema, Isu piya untiye.

Simena kina'mi nkisane

⁸ Pigoya, Simena kumata monota ai'aru pe kina'mi kiye yagaramati kamanapa mayama kaeyoma, unamintiye: Naeba paitanta yagara mite aintisa yagara mite punta, nae purintoka ibaba naogama miyuwe, iye. Piya po ntagaramana naeba ma kamanapa kaetiba atauwe, iye:

⁹ Piya, tiki nkaiyena tigeti aborarimegi, naeba tigantuwe, iye. We, tigeba mantabinti uwaena kutapa akibewe, iye. Piya, ka'isa kina'miba igeba: Yuta kinatawe, yepa, pipa tagapa kampaye. Igeba Satani tumpi akayasuritapa, pipa abuntuwe, iye. ¹⁰ Pigoya, aro ntanganto tigetiba kuntaenaba aborarimekiripa, pikaba a-tiyekuru piyo, iye. Abiyo. Kewamaba tige tikapisa ka'isa kinapa timiyo pusanaga tiyesagayuma iga'nabi maeburi-takiye, iye. Piyama tigeba tiki nakiyenaba nayatar'a'mu yaga maeygina a'ya wakiye, iye. Eya, tiyeguyigiri pu'wantiripa, timatiti'enaripa a-kasiyo, iye. Piyama aogima mikibepa, Kotitisa e'wasa antotopa timukuwe, iye.

¹¹ Piya, wasana ageyaga kina'maba Awamus'a'ama monota ai'aru pe kina'mi uwaimemi kamanapa abeno, iye. Pigoya, wasanama mono yuga puma agaikibipa, aintisa purikenae-namaba kampa ataba potakiye, Isu piya untiye.

Pegamami kina'mi nkisane

¹² Pigoya, Pegamami kumata monota ai'aru pe kina'mi kiye yagaramati kamanapa mayama kaeyoma, unamintiye: Naeba paroya ntogipa torirori agana wainta yogipa uro ntagaramana, naeba ma kamanapa kaetiba atauwe, iye:

¹³ Naeba miye kuma'ama nkagoba abintuwe, iye. Pitapa Satani nkaemu yabae waima kabiwaitagiri, nae nagega'eba esegima araku'ma kampa nagasaga tigauwe, iye. We, paipa Antipasi aeba tigege mintana, amatit'i'enaba kampa kasima nae nawamu aboraogini aeguyuguna, Satani mintemi nkwa'e pita'i purintiye. Tigeba pi ntangaba naeti timatiti'enaripa atamagiri kampa tikabitaugu, agantuwe, iye. ¹⁴ We, naeba tigeti ka'isa kamanapa uwa waintiye, iye. Piya, paipa Peramuba Perekipa omogana, aeba Isureyo kina'miba igisaimisa'ma ware'nakenaenawaipa aboraogini, igeba ama kotiti muta ataume ntanintaba namagini kumiyyena puma agunta puntawé. We, tikapisa ka'isa kina'miba Peramu puntisa puma pi ki taku'ma upebe pega, kamanapa uritauwe, iye. ¹⁵ We, pabiaymagini tigetisa ka'isamiba Nikorasi tumpi kamanapa taku'ma upebe puma ata pewe, iye. ¹⁶ Pigoya, pika tigu a'wae piyo, iye. Piya, kampa pigipa, aro ntanganto tigetiba wamagi, pi kina'mipa nawamupinti paroya ntogi waintitasa kama puwaitakuwe, iye.

¹⁷ Piya, wasana ageyaga kina'maba Awamus'a'ama monota ai'aru pe kina'mi uwaimemi kamana abeno, iye. Pigoya, wasanama mono yuga puma agaikibipa, naeba ka'isa mantabintisa kakanta mana naninta amimagi, taberabe yabapa kaga amukuwe, iye. Piya, pi ntatabata aoso agiba kaeyakana, maekibi'naba ae abintowa agowapa abikiye, Isu piya untiye.

Tiyatira kina'mi nkisane

¹⁸ Pigoya, Tiyatira kumata monota ai'aru pe kina'mi kiye yagaramati kamanapa mayama kaeyoma, unamintiye: Naeba Koti Ntagaranaga, naowamaba yaku ikisu pegi, nagisawamaba kapa ta'nera'ne pisa pegi, piya miyo ntagaramana, naeba ma kaman'a'nepa kaetiba atauwe, iye:

¹⁹ Piya, naeba a'ya'ma monota tiyapisaenabe, agu kao'enaripe, timatiti'enaripe, kayokaya'enaripe, paebuma mima kuntaena aesaga pentanaripe, ago agantuwe, iye. Eya, tige maru'ena puntantanaba ibantoba asugasaga agauwe, iye. ²⁰ We, tigeti ka kamanapa mayama uritauwe, iye: Piya, tige tikapipa ka Yesebe kanta wae uwa atagana miye, iye. Pi nkwea'maba: Naeba poropete wae'nawe, uma, aeba yoga kina'nepa amiyo'ena puwaitama kumiyyena puwaiyakegini, a'yugu puma ama kotiti muta ata ntanintaba naga, tigeti kamanapa uritauwe, iye. ²¹ Piya, ae agu a'wae penema, ka'isa yagaba uwa ataogana, kumiyyenawakaba kampa agu a'wae punta, akabitaye, iye. ²² Abiyo. Naeba tabe inu aboramimagi, pi nkwea'e kumiyyena pe kina'miba ae'wantanara kampa ikabitakibepa, tabe iki nakiyenabi kaiwaitakuwe, iye. ²³ Piya, a'ya'ma araga yagarawapa iyeguyekini purikibewe, iye. Piya pekini, a'ya'ma monota ai'aru pe kina'miba igeba nae igu'amabe napiyenawaipeba aguysa'ma aborao ntagaranagini abikibewe, iye. Piya, a'ya'ma pukibentanaraka antota'enaba ka ka aborarimkuwe, iye.

²⁴ Pigoya, a'ya'ma to Tiyatira miye kina, pi ata kamanapa kampa abe kina'mititi ma kamanapa kaeyuwe, iye. Eya, ka'isamiba pi ata kamanaka: Pipa Satani nkago kaman'a'wane, yewe. Pi nkagoba kampa abe kina tigeti ma kamanapa kaeyuwe, iye. Piya, naeba maya urumuwe, iye: Piyama tiboboriba kuntaenaba to kakemaba kampa atauwe, ²⁵ tigeba mono abintapa upebe puma urintigi, naeba irosano, iye. ²⁶ Pigoya, wasanama nae'enaena aega'ma purite wama kampa natamagina, aeba mono yuga puma agaikibipa, naeba esegiyena amekana aeba maga maga kina paitawaitamagina, kabiwaitakiye, iye. ²⁷ Eya, nabanempa esegiyenaba namintisa puma aepa amekana ka'masa puma aeni kasutasa kabiwaitakiye, iye. Eya, magabu aeguma ayasagasasa puma piya puwaitakiye, iye. ²⁸ Piya, naeba abayarasa nori amato potama e'wasa potakuwe, iye.

²⁹ Piya, wasana ageyaga kina'maba Awamus'a'ama monota ai'aru pe kina'mi uwaimemi kamana abeno, Isu piya untiye.

3

Satsi kina'mi nkisane

¹ Pigoya, Satsi kumata monota ai'aru pe kina'mi kiye yagaramati kamanapa mayama kaeyoma, unamintiye: Naeba tonarentisa tara umaema Koti Nkwamus'a'ama nkagobe, tonarentisa tara umaema noribe uro ntagaramana, naeba ma kamanapa kaetiba atauwe, iye:

Piya, naeba a'ya'ma monota tiyapisaenaba ago agantuwe, iye. Piya, wasanami tigagiripa, tigeba aoganta mintasu pewe. We, tige tigupa ago pu'wasu piyema, iye. ² Piya, tige pentanamaba Kotinempa nkaobipa kampa aogi pegi agauwe, iye. We, tigeba purikena pepa, uwaenanto esegiyenariipa waintiyi, tigeba asima tiyogama uwa waintintanaba esegima arakuriyo, iye. ³ Piya, paipa tigeba aogi kamanapa abima maentawé. Pika to kake napima abibebe puma tigupa a'wae puma kabiyiyo, iye. Piya, tigeba kampa asinta waitamikibepa, naeba ku kina kinisa puma tigeti kanakuwe, iye. Eya, nae kanapa kampa abintapa kanakuwe, iye. ⁴ Pigoya, Satsi kumata tikapisa tarantomiba uwa mama itasaenawaipa kampa i'nintanaba pegana kanarasagini, igeba waentanamana purite, naege nasikibewe, iye. ⁵ Piya, wasanama mono yuga puma agaikibipa, aepa wae kai amekana pureka, aegega'ewapa e'wasa maekena isapipa kampa asu'a pukuwe, iye. Eya, aegega'ewapa nabanempa nkaobipe enisore kina'wampi nkiyobipe uma aborakuwe, iye.

⁶ Piya, wasana ageyaga kina'maba Awamus'a'ama monota ai'aru pe kina'mi uwaimemi kamanapa abeno, Isu piya untiye.

Piratepiya kina'mi nkisane

⁷ Pigoya, Piratepiya kumata monota ai'aru pe kina'mi kiye yagaramati kamanapa mayama kaeyoma, unamintiye: Naeba aota taka'ya, taga taka'ya mimagi, Tebitinta kiba uruntuwe, iye. Piya, naeba kabe aigekanaba ka'wainaba kampa akuneka, to

akunekanaba ka'wainaba kampa aigikiye, iye. Piya pukena yagaramana naeba ma kamanapa kaetiba atauwe, iye:

⁸ Piya, naeba a'ya'ma monota tiyapisaenaba ago agantuwe, iye. Agaiyo. Tiyoriba kabeba a'waitaogana waintikana ka'wainaba kampa kanarasama akunikiye, iye. Piya, naeba ago abintopa, tigeti uwaena esegiyenanto waintegiri tigeba kamana'nepa upibe pumagiri, naeka kampa tikabinatawe, iye. ⁹ Abiyo. Ka'isa kina'miba igeba: Yuta kinatawe, yepa, pipa tagapa kampaye. Igeba Satani tumpi kumpari yewe, iye. Abiyo. Naeba ige puwaitakini, igeba tige tigisabi ampa irakabima mima, nae agu kao'ena puritaantanaba agama abibebé pukibewe, iye. ¹⁰ Pigoya: Paebuma mima kuntaababa aesaga piyo, uriminto kamana'nepa tigeba wasintawe, iye. Pika aintiba tabe kuntuyenaba a'ya'ma maga maga kina'miti aborasanaga kabiritakuwe, iye. ¹¹ We, naeba agarosama irosakuwe, iye. Wairitantantababa upibe puma ka'waina e'wasa antota'enaripa tiparisanganaga esegima kabiyiyo, iye. ¹² Piya, wasanama mono yuga puma agaikibipa, naeba asitakana aebe Kotinempa nkaota namapisa wage kanta puma, aebe aota namapa kampa kaite wakiye. Kamaraka'yane, iye. Piya, naeba Kotinempa nkagega'ebe aeti kaemagi, Kotinempa kuma'ama nkagega'ebe aeti kaga kaekuwe, iye. Pi kuma'amaba Kotinempatisa mantabintisa tumpa aborakiye. Pipa kasa Yerusaremi kumane, iye. Piya, nae'ne kasa naginekeba kaga aeti kaekuwe, iye.

¹³ Piya, wasana ageyaga kina'maba Awamus'a'ama monota ai'aru pe kina'mi uwaimemi kamanapa abeno, Isu piya untiye.

Areyotisiya kina'mi nkisane

¹⁴ Pigoya, Areyotisiya kumata monota ai'aru pe kina'mi kiye yagaramati kamanapa mayama kaeyoma, unamintiye: Naeba taga kamana'ama nkagonaga, a'ya'ma Koti nkawaga kamanapa uma arupu puma tagantana po ntagara nawe, iye. Eya, naeba a'ya'ma Koti pumaranti ntanama paitawaitanto ntgararamana, naeba ma kamanapa kaetiba atauwe, iye:

¹⁵ Piya, naeba a'ya'ma monota tiyapisaenaba ago agantuwe, iye. Tigeba yoganepa kampa esegima puma mu'mu'enaba kampa pewe, iye. Tigeba kampa agora tik-abinatama esibaena kantaba kampa puma miyewe, iye. We, nae nabemika esiba pusiwo, mu'mupaya pukibewe, iye. ¹⁶ Piya, tigeba mu'mutaka'yapa kampa puntiri, esibaraka'yapa kampa puntiri, isibakapi mima amuntana puma miyeka, nawamupisa muyena puritama nttagigaye, iye. ¹⁷ Piya, tigeba mayama yewe: Taetiba uwaena kutapa waintegi, kanara maenta, ka'enagaba kampa kusiba pune, yewe, iye. Pipa kamaraka'yane. Tigeba agorika aibo pewe, iye. Piya, tigeba ata maru mpiyegini, intara puritagiri, kusi kina miyegini, tiyori kaentegiri, uwa tika mintawe, iye. ¹⁸ We, pika ma ntapiyenanepa maema aegaraiyo, iye: Piya, naepisa kori yakupi kaeyakana aborama narentare pekiri ika pumagiri, tigetiba aki piyo, iye. Piyama, tigeba naepisa wae kai ika pumagiri, ti'amaka tinintana pusnaga airari kaeyiyo, iye. Piyama, naepisa tigeba tiyobisa tusaena apa ika pumagiri tiyobi atama agaiyo, iye. ¹⁹ Piya, naeba agu kao'ena puwaitao kina'mipa iyeguma arupu puwaitauwe, iye. Piyama, tigeba esegima napi napi puma tigupa a'wae piyo, iye. ²⁰ Agaiyo. Naeba kabera asima mimagi aiwakarusuwe, iye. Piya, ka'waina kamana'nepa abitegina a'wainataka, naeba aeti ubai'ma aege naninta nakana, aebe naege kaga nakiye, iye. ²¹ Piya, wasanama mono yuga puma agaikibipa, naeba: Kanarane, otakana, wa'ega kina'mi nkiyemu yabaeneta naege ampikiye, iye. Piya, paipa naeba agasuwagan, nabanempaba wa'ega kina'mi nkiyemu yabaewapa namoga aege mintantosa puma, otakana naege ampikiye, iye.

²² Piya, wasana ageyaga kina'maba Awamus'a'ama monota ai'aru pe kina'mi uwaimemi kamanapa abeno, Isu piya untiye.

4

Mantabintiba Koti nkagisewe

¹ Pi kamana unamoga, mantabinti agauwaga, ka kabiba a'wai waintoga agauwaga, marusa awamu, pikuri'ama yemisa puma unaminti nkawamu'ama to ka maya uma unamintiye: Kaeba mata iyega, ainti aborakenaenaba kayakekana agao, unamintiye. ² Piya unamoga, agora uma Awamus'a'amatı atokaema mima agauwaga, mantabinti Wa'egawama nkaemu yabaeba waintiti ka'waina mara'mintoga agantuwe. ³ Pi mara'mikena yagaraba aebe taberabe yasipa yabape tete koniryo yabape ta'nera'ne pisa puma mintoga agantuwe. Piya, pi nkaemu yabaera ka kobawama yanta emero yabankama e'wara e'wara pisa puma ainkintoga agantuwe. ⁴ Piya, pi nkaemu yabaera to 24-wa wa'ega kina'mi nkiyemu yabaeba ainkintogini, 24-wa anasa kina'amana kana iyemu yabaera mintugu agantuwe. Igeba waentanamana potamagini, i'notiba korirasa

pumaranta wa'ega kina'mi taminoku purintugu agantuwe.⁵ Piya, Wa'egawama nkaemu yabaerasaba apayaena puma aga uma antaru yoga abintuwe. Pi nkaemu yabaewama nkaowariba tonarentisa tara umaema kani ikegana e'wasa poga agantuwe. Piya, pi kanipa tonarentisa tara umaema Koti Nkawamus'a'ama nakgowe.⁶ Piya, pi nkaemu yabaewama nkaoriba tabe kayo wani kantaba poga agantuwe. Pipa pemonta kanta puma agabasasa puntiye.

⁷ Piya, maru aoganta kina'maba arayonima nkaoga pogana, ainti aoganta kina'maba purumaka nkaoga pogana, kakagaenamaba wasanama nkaoga pogana, tarawa tarawa'enamaba pa'wakena kegeba nkaoga puntiye.⁸ Pi tarawa tarawaki iyoganta kina ka ka tonarentisa ka'umaema igaga waintogana, uwaena iyo intabai pintibe itibe pumaewaintoga, agantuwe. Aibuwagini, igeba arape asekape iniba mayama uyaba mintantawe:

Taberaka'ya Wa'ega Koti aeba aota, aota, aota'yaga mintiye.

Aeba pai mintantipe, iba mintipe, ainti mirite wakibipe, taga taka'yane, piya untawe.

⁹ Piya, iyoganta kina'miba igeba aemu yabaera miyemi'na nkagega'eba maete ima asagayuma i'mu potawe.¹⁰ Piya pegini, 24-wa anasa kina'miba aemu yabaera miyemi'nakaba irakabitama parokaemagini, a'ya'ma yaga miyaba miyemi'na nkagisewe. Eya, igeba wa'ega kina'mi taminoku'waipa pi nkaemu yabaera maebuma amintini, ini mayama yewe:

¹¹ We, Wa'egare, Kotirekawe. A'ya'ma kina'miba kae kagega'eba maete ima asagayigina, esegiyenagampa uwaesakana kanarasakiye, yewe.

Piya, kaeba a'ya'maenaba aborantampene. Eya, kabemika a'ya'maenaba aborantampepa uwa waintika kagiseno, piya yewe.

5

Yoniba asaemaranta isa agantiye

¹ Piya, Kotiba aemu yabaera mara'mimagine, ayatakantisa au'isa esapa u'urintoga agauwapa, aoribe aka'ibe awa'ena waintogana, arakurikena ka'me tonarentisa tara umaema waintoga agantuwe.² Aiboga, naeba agauwapa, esegi enisore yagaramaba taberasa kega'e uma maya untiye: Kebaya aogi yagarama, ma nkisapa a'waima asaemaranta ka'meba akaosakana kanarasakiye, untiye.³ Piya uma aguyosagao-gana, mantabintisabe, mampabisabe, mawama nkantabai pintisabe, a'waima agakena yagaraba kapa kampa mintantiye.⁴ Eya, ka yagaramaba kanarasama pi nkisapa a'waima agakena yagaraba kampa agaoga, naeba tabera kube'ena puntuwe.⁵ Piya puwagana, anasa kina igitisa ka'waina maya unamima untiye: Kaeba a-kube'enaba po, untiye. Abeno. Yuta kina'mi tupisa araiyonni yagaraba asu againti'na, aeba againti nkesegiyenarasa tonarentisa tara umaema asaemaranta ka'me akaosa'ma pi nkisapa a'waikiyema, unamintiye.

Yoniba sipisipi awaro agantiye

⁶ Piya, naeba agauwapa, ka sipisipi awaroba aeguyogana purusu poga agantuwe. Aeba Wa'egawama nkaemu yabae agora, tarawa tarawaki iyoganta kina mintita, anasa kina'mi nkikapi asima mintoga agantuwe. Piya, aeba tonarentisa tara umaema awa waintogana, aoba pabiyma tonarentisa tara umaema waintoga agantuwe. Pi tonarentisa tara umaema aoba igeba Koti Nkawamus'a'ama nkago waintuguni, uwaitogini a'ya'ma maga magaba wantawe.⁷ Piya, pi sipisipi awarowamaba asugina, aemu yabaera mintanti'na nkayatakantisa kana isapa maentiyne.⁸ Aeba pi nkisapa ago maeyogini, pi tarawa tarawaki aoganta kina'mibe 24-wa anasa kina'mibe irakabima mama, sipisipi awarowamaba nkaora parokaentawe. Igeba a'ya'ma ka ka kina'miba ini ukena kita kantaenaba u u'magini, ka ka aogi agunta ukena kori tu'napa urintawe. Pi aogi agunta ukenaenamaba pumaewantipa, pipa Kotiti atokaeya kina'mi ntunamuwaine.⁹ Piya, igeba sipisipi awaromati kasa ini maya untawe:

Kaeba tagapa pi nkisapa u'ma, asaemaranta ka'me a'waima akaosaganaba kanarasakiye, iye.

Piya, igeba kaeguyuguna, kaeba korakatasa wasanaba ika puwaitama Kotiti iba puwait-antampene, iye.

Eya, kaeba a'ya'ma tupisabe, a'ya'ma to kamana to kamanapisabe, a'ya'ma to i'yaga to i'yaga kinapisabe, a'ya'ma maga maga kinapisabe, ka'isa iba puwaitantampene, iye.

¹⁰ Piya, kaeba ka'ena puwaitama kabiwaitamagina: Kotirempati mono kiye kina kanta puma miyiyoma, uwaitantampene, iye.

Eya: Igeba marapa kabiyiyo, uwaitantampene, piya ini untawe.

Mantabinti awaromati tabe a'muntana aborantiye

¹¹ Pigoya, naeba torebeta agamagi, abuwapa, uwaena enisore kina'mi nkiwamu aga abuntuwe. Igepa kampa aisukena kanara, uwaena mintantawe. Piya, igeba Wa'egawama nkaemu yabaе waintita, aoganta kina'mibe anasa kina'mibe mintume igora, ainkintawe.

¹² Ainkimagini igeba tabe kiga'e maya untawe:

Ma sipisipi awaroba aeguyuguna purintemi'napa, aeba esegiyenabe, tabe ikape, aogi napiyenabe maema, tabera esegi pekini, au'wapa maete ima, agega'eba asagayuma, i'mu potaigina kanarasano, untawe.

¹³ Piya yuguna abuwapa, a'ya'ma Koti pumaranti ntanamaba, mantabintisa kinape, mabiso kinape, mawama nkantabaipintisa kinape, kayo wanipintisa kinape, igeba kaga mayama yugu abintone:

Wa'egawama nkaemu yabaera minti'nape, sipisipi awaropeba, isigetiba a'muntanabe, isi'ikenaenabe, isige asagayukenaenabe, esegiyenabe, a'ya'ma yagaba waiyaba myieno, untawe.

¹⁴ Piya yuguni, pi tarawa tarawaki iyoganta kina'miba: Tagane, yuguni, anasa kina'miba igeba parokaema isigisoga agantuwe.

6

Asaemaranta ka'me akaosakena kamanane

¹ Pigoya, naeba agauwapa, sipisipi awaroma tonaentisa tara umaema ka'merasa asaemaranta ka akaosaoga agantuwe. Agauwagana, tarawa tarawaki iyoganta kinapisa kapa antaru yisa puma kega'e uma: Kanao, yoga abintuwe. ² Piyama abima agauwapa, we, ka wae nkosi aboraogana akabata irebu wantaga yagara aboraoga agantuwe. Aepa tabe kina'mi taminokupa amuguna, ma'ena puma agasi kina kanta puma wama asugaikena ma'ena puta waoga agantuwe.

³ Piya, sipisipi awaromababa ka'merasa asaemaranta tara akaosaogana, aintisaena aoganta kina'maba: Kanao, yoga abintuwe. ⁴ Piyama aburopa, to ka autiba tete puwanta osi aborantiye. Aboraogana otaogana, akabata miyome ntagaramaba mampabisa paruyena agarubakena esegiyenaba amintiye. Eya, to kina'mi to kina iyeguyigina purikena esegiyena amimagina, pika tabe paroya ntogipa amoga, agantuwe.

⁵ Piya, sipisipi awaromababa ka'merasa asaemaranta kakaga akaosaogana, kakaga aoganta kina'maba: Kanao, yoga abintuwe. Piyama abima agauwapa, we, ka tunu nkosi aboraogana, akabata sigeri ayapi wantaga yagara aboraoga agantuwe. ⁶ We, tarawa tarawaki iyoganta kina'mi nkikapisa awamu aga yoga abuwagana, maya untiye: Naya tara'mutasa araisiba uwaena kankabentobi a'yigi atao, untana: Piya, to kakaga kankabebi pari nakenaenaba naya tara'mutasa a'yigi atama, apabe wainibe kaga ataiyo, untiye.

⁷ Piya, sipisipi awaromababa ka'merasa asaemaranta tarawa tarawaki akaosaogana, tarawa tarawaki aoganta kina'maba: Kanao, yoga abintuwe. ⁸ Piyama abima agauwapa, we, to ka asasu au'yaga osi aboraogana, akabata miyome ntagarama nkageba purikenaeawne. Aibogana kawamaba aegaurite wantiye. Pi taramisipa uwaisitaoginisi, mabiso tupa kakaga uwa atate ka tu aegukena esegiyenaba maentase. Eya, paroya ntogitasabe, iga'enarasabe, iki nakiyenarasabe, kabu kinatasabe, iyegukenaena yokege pusugu agantuwe.

⁹ Pigoya, sipisipi awaromababa ka'merasa asaemaranta naya ka'mu akaosaoga agauwapa, ka'isa purinta kinapa arata'ama nkamentapinti mintugu agantuwe. Piya, pi kina'miba Koti kamanapa wasima awaga kamana'wapa uma aborauguni kama kina'miba iyeguyugu, igu imankaipa agantuwe. ¹⁰ Piya, pi nkimankaimpaba tabera kega'e uma maya untawe: We, a'ya'maenama kabintampe Wa'ega, kaeba aota taga tak'a'ya mpiyene. Ayaki yaga wagasakanra kaeba mabiso kinapa kamanapa uwaitamagina, koratempa nkantotapa imikibene, untawe. ¹¹ Piya yuguna, igepe e'ero wae kai ka amimagina maya uwaimintiye: Tigebe uwaena yaganto migaraiginto. Toganaba ka yugari pe kinape, mono tiyokinape, kama kina'waipa iyeguyigini tige puntasa puma purigina, aisuia iyekana asu kanarasakanaba, Kotiba ika puwaitakiye, uwaimoga abintuwe.

¹² Pigoya, sipisipi awaromababa ka'merasa asaemaranta tonaentisa ka'umaema akaosaoga agauwapa, tabe imima pogana, pankamaba a'wae puma paisaena kanta puma tunusu waogana, o'amaba kora kanta puma tete puwaeyoga agantuwe. ¹³ Piya pogana, nakena yamanka'ama kampa agutantegina esiba puma tutubu pisa puma, mantarisa noriwamaba mabinti tutubu puwaeyoga agantuwe. ¹⁴ Piya pogana, kai akarakiyompesa puma, mantaba akarakiyogana, a'ya'ma amupe wanipisa mabe marunkaitasa maebugasogana agantuwe. ¹⁵ Aibogana, mampabisa wa'ega kinape,

ige wainta kinape, irebu kina'mi tabewaipe, kotantaga kinape, esegi kinape, a'ya'ma kina kayokaya kinape uwa miye kinape, a'ya'ma iyegaka ma awabintibe amupintisa tabe yaba nkagebintibe ubasi apasi pugu, agantuwe.¹⁶ Igeba piya pumagini, amu'amakabe yabankamakabe kega'e uma maya untawe: Tigeba tigaba'ma tumpa taerarkaeyaga, wa'egawama nkaemu yabaera miyemi'na nkaorape sipisipi awarowama nkamo'enarape kakaratao, untawe.¹⁷ Piya, pi taramisi kanaba aboraginisi isimo'ena puma antota'enaba aboramemekana, taepisa kebaya asima esegiba pukiye, a. Pipa kampaye, piya yugu abintuwe.

7

Isureyo tupisa ara'ena maenta kina'mi kamanane

¹ Pipa a'ya waoga agauwapa, tarawa tarawaki enisore kina'miba tarawa tarawaki ma atuta asima mimagini, igeba marasa tarawa tarawaki esibaba akumpa'ma mintagana, mabipe kayo wanipipe kampa wanema, akumpa'ma miyugu agantuwe.² Piya, pi enisore kina'miba igeba mabe kayo wanipe ata pukena esegiyenaba maentane. Aibugu to agauwapa, to ka enisore yagarama pa nkirosaometisa uma aoganti Koti nkara'enawapa mae u'ma, pi tarawa tarawaki enisore kina'mika taberasa kega'e uma maya uwaimintiye:³ Tigeba mabe kayo wanipe yabe a-nkata puwaitaiyo. Paitama taeba Koti nkiba pukena ara'enawapa ae kayokaya kina'wampi nki'nebi ataokiri, aintiba ataba pukibewe, piya uwaimintiye.⁴ Piya, naeba abuwapa, pi ara'ena maeyume kinapa aisoga mayama abintuwe: Igeba 144,000 kina, a'ya'ma Isureyo tupisawe.

⁵ Piya, Yuta tupisa 12,000 kina'miba ara'ena maeyuguri,
Arubeni tupisa 12,000-wa,
Kati tupisa 12,000-wa,
⁶ Asa tupisa 12,000-wa,
Napatarai tupisa 12,000-wa,
Manasa tupisa 12,000-wa,
⁷ Simiyoni tupisa 12,000-wa,
Aribai tupisa 12,000-wa,
Isaka tupisa 12,000-wa,
⁸ Seburoni tupisa 12,000-wa,
Yosepe tupisa 12,000-wa,
Penisameni tupisa 12,000-wa sumagini,
pi kina'mi igeba Kotitisa ara'enaba maeyugu agantuwe.

To uwaena kina'miba Kotiti aki puntawe

⁹ Pipa agategi, to agauwapa, we, uwaena kina, kampa aisema kina'mi aki puma, wa'egawama nkaemu yabaera, sipisipi awaroma nkaori asima mintugu agantuwe. Piya, pi kina'miba a'ya'ma maga maga kinapisabe, a'ya'ma tupisabe, a'ya'ma to i'yaga to i'yaga kinapisabe, a'ya'ma to kamana to kamanapisabe, asima mimagini, igeba e'ero wae kaimana pu u'ma, wayo nka'ye iyapiwa u'ma asima mimagini,¹⁰ taberasa kega'e uma maya untawe: Aemu yabaera miyemi Kotirempatisabe, sipisipi awaromatisabe, tau'ikenaenaba aboraye, untawe.

¹¹ Piya yuguni, a'ya'ma enisore kina'miba aemu yabaera asima ainkimegini, anasa kinape tarawa tarawaki iyoganta kinape akapi atama ainkiwaitamagini, aemu yabaera nkagora parokaema Koti nkagisuma,¹² maya untawe: Pipa tagane. Kotirempatiba a'muntanabe, age asagayukenaenabe, ta'mu potaompentanabe, au'ikenaenabe, a'ya'ma tonarona esegiyenabe, aeti a'ya'ma yagaba waiyaba miyeno. Tagane, untawe.

¹³ Piya, anasa kina'mipisa ka'waina nabigama maya untiye: Pi e'ero wae kai purinta kinape, igeba as kinane. Aetas kanantane, untiye.¹⁴ Piya yugu, naeba: We, naba-o, kaeba abintane, omuntuwe. Omuwagana aeba maya unamintiye: Pi kina'miba kama kina'waimpiba tabe iki nakiyena puwaitantanta, pi kanabisa aborawe. Piya, igeba kaiwaipa sipisipi awaroma kuratasa aeyobagana, kaiwaimpaba waentanaba piye, untiye.

¹⁵ Piya, igeba Koti nkaemu yabaera mima, arape asekape aota namankapi kayokaya'ena potawe, iye.

Piya pegana, aemu yabaera mara'miyemi'naba ama nkiwaitama kabiwaitakiye, iye.

¹⁶ Piya, nanintagabe wanikabe igeba to kakema iga'ena kampa ibekana, to kakema pankamaba kampa irabatekana, yakutasa iki nakiyenaba kampa aborawaikiye, iye.

¹⁷ Piya, aemu yabaewama nkakapi miyemi sipisipi awaromaba kabiwaitamagina, paitama wama nabai'namu nke'wasa waniti iba pukiye, iye.

Piya, Kotiba iyo'nuba aebago puwaegaikiye, piya untiye.

8*Tonaentisa tara umaema asaemaranta ka'me akaosantiye*

¹ Pigoya, sipisipi awaromaba tonarentisa tara umaema asaemaranta ka'merasa akaosao-gana, mantabinti a'ya'maenaba paka puwama apu-awa kamanapa kampa untawé. ² Aibugo to agauwapa, Koti nkaora asima miye tonarentisa tara umaema enisore kina'mi aboragu agauwagana, tonarentisa tara umaema pikuri imogini maentawé.

³ Piya maeyuguna, to ka enisore yagarama kanamagina, kaema agunta pasa'atakena kori tu'na u u'ma aratara ampa asintiye. Asiyogini, igeba aogi agunta ukenaenaba uwaena amuguna, aebe a'ya'ma Kotiti atokaeyume kina'mi ntunamuwai mpaema kapi aki puwaitamagina, aemu yabaewama nkaora kori aratara aebe kaema aguntaba pasa'atantiye. ⁴ Piya, Koti nkaora miyume enisorewama nkayapisaba aogi agunta uke-naenama kunkawamabe, Kotiti atokaeyume kina'mi ntunamuwaimpabe, kaga aogima intiye. ⁵ Piya pogana, pi enisorewamaba pi tu'napa maema yakupa aratarasa maema pumaetama, pi ntakupa mabinti maebugaintiye. Maebugasogana, antaru uma ago yogana, apayaena purite waogana, maba imima poga, agantuwe.

Tarawa tarawaki enisore kina'miba pikuriba pukantawe

⁶ Aibogana, pi tonarentisa tara umaema pikuri mae urintume enisore kina'miba pukakena yokege puntawé.

⁷ Pigoya, marusa enisorewamaba pikuriwatasa pukaogana, kabayarape yakupe koran-taga a'yugu puma, mabinti tubuma tumintiye. Piya tumogana, mabe yabe tara auka'isa awatepa uwa waiyogana, ka auka'isa awate yaku tawamagina, a'ya'ma apararetare kabuyenabeba yaku tawaewaoga, agantuwe.

⁸ Pigoya, aintisa enisorewamaba pikuriwatasa pukaogana, yaku abuyaga tabe amu kantaenaba maebugasogana kayo wanipinti tumintiye. Tumogana, tara auka'isa awatepa uwa waiyogana, kayo wanipa ka auka'iba korantana puwantkiye. ⁹ Piya pogana, kayo wanipintisa iyogama mintume kina'miba tara auka'isa uwa mintuguni ka auka'isa pu'waewauguna, wanipisa kareba tara auka'isa uwa waintogana, ka auka'isaba ata pu'waewaoga, agantuwe.

¹⁰ Pigoya, kakaga enisorewamaba pikuriwapa pukaogana, ka tabe nori mantabintisa tubuma e'ama nke'wasa pusu purite tumimagina, tara auka'isa uwa atamagina, anompa-pintibe nakena wanipintibe ka auka'i tumogana ata puwaewantkiye. ¹¹ Piya, pi ntoriwama nkageba: Asa tusawe, yewe. Piyama tumogana, wanipa tara auka'isa uwa ataogana, to ka auka'isaba a'wae puma asa tusa wani aboraoagini, pika uwoma kina'miba nagaite pu'waewaugu, agantuwe.

¹² Pigoya, tarawa tarawaki enisorewamaba pikuriwapa pukaogana, tara auka'isa uwa atate, pape ope noribe ka auka'isawaipa ata puwaewaogana, ka auka'isa kane'waipa kampa tama tunusu wantkiye. Piya, arape asekape ka auka'isawaipa kampa taoga, agantuwe.

¹³ Aiboga, naeba to agauwapa, ka kegebankama mantabinti pa'urite wama taberesa kega'e yoga abuwagana, maya untkiye: A-e, a-e, a-e, mabi minta kinapa, to kakaga enisore kina'miba pikuriwai pukakena yokege pekana, pukakibepa waway'a'mitiba tabe kuntuyena aborarimikiye, yoga abintuwe.

9*Nayaka'mu enisorewama pikuriwa pukantiye*

¹ Pigoya, nayaka'mu enisorewamaba pikuriwapa pukaogana, ka noriwama manta kaitegina tubuma mabi tumoga agauwagana, abe kampa wainta kawama kiba amogana maentkiye. ² Piya maemagina, kana ka aigogana, pi kabintisaba kunka kima tabe yakunkama kunka kiyisa puntiye. Piyama kimagina, pape mantabe airarikaeyogana tunusu wantkiye. ³ Aibogana, pi kunkabisa uwaena iro'amaba mabinti aboraogana, patak-abama wasana iba nakena esegiyenaba imintkiye. ⁴ Imimagina mayama uwaitantkiye: Tigeba mampabisa apararetare kabuyenena a'nobe yabe a-nkata potaiyo. Kampaye. Koti nkara'ena i'nebi kampa wainta kina'mana ata puwaitaiyo, iye. ⁵ Piya, tigeba pi kinapa opa nayaka'muta iki nakiyena puwaitamagiri, a-nkiyeguyigini puriyo, piya uwaitaoga abintuwe. We, pi iro'ama nkimikena iki nakiyena patakabama wasana iba nama iki nakiyena pemisa poga agantuwe. ⁶ We, pi kanabipa wasanamiba purikena ki ku'enabaa pugagategini, kampa agakibewe. Eya, purisanaga ibugakibemipa, purikenaenamaba aegaka wagaikkiye.

⁷ Piya, nae agauwapa, kana iro'amaba osirasa ma'ena pukena arabasa puma arabao-gana, i'notiba taminoku'waipa korirasa pumaranta kanta pogana, iyowamaba wasana

iyō kanta puntiye. ⁸ Piya, ibiya'amaba e'ero puma waya'mi nkibiya kanta pogana, iwawamaba araiyoniwama nkiwa kanta puntiye. ⁹ Piya, iba'waimpaba kapa ma'enā i'ana kanta pogana, igaga agawamaba uwaena osiwama kare paiburite ma'enari waisa kamauna uma aga puntiye. ¹⁰ Piya, iyēge'amaba patakabama nkaege kanta puma, wasanaba aba nakena yokege puntiye. Eya, opa nayaka'muta wasana iki nakiyena puwaitakena esegiyenawaipa iyēgeta waintoga, agantuwe. ¹¹ Aibogana, wa'egawaiimpaba aeba kampa abewa nkwaitsa karasa enisorewe. Piya, pi enisorewama nkagewapa Iburu kamanapisaba: Abatoniwe, yegini, Kariki kamanapisaba: Aporiyoniwe, yewe. Piya, taete kamanapisaba: Ataena puma kaikena yagarawe, yune.

¹² Pigoya, marusa tabe kuntuyenama kamanapa a'ya waginisi, to tara kuntuyenaba waintinisi, aintiba aborakibese.

Tonaentisa ka'umaema enisorewama pikuriwa pukantiye

¹³ Pigoya, tonaeintisa ka'umaema enisorewamaba pikuriwapa pukaogana, Koti nkaobi kori pumaranta aratara tarawa tarawa atuta wainta awawatasa awamupisa kamauna yoga, abintuwe. ¹⁴ Aeba kana pikuri pukaome nkenisore maya omintiye: Tarawa tarawaki enisorewama Yupiterati anompata mima iga'na puntapa, kaeba wama a'yoba'itagini waiyo, yoga abintuwe. ¹⁵ Piya yogana, aeba wama pi tarawa tarawaki enisore kinapa a'yoba'itaogini, igeba a'ya'ma kinapa maema a'yigimpa tara tupa iyegukena yokege puntawé. Eya, pi ntuga, pi nku, pi ntaga, pi nkawa, pi kanara a'yoba'itaogini iyegukena yokege puntawé. ¹⁶ Piya, osira wakibe irebu kinapa, 200,000,000 kina aisuwaitaoga abintuwe. ¹⁷ Piya, naeba amonta ki'i mayama agantuwe: Osi akabata miyume kina'miba ma'enā i'ana atantapa, pipa ka'isaba tete yaku kanta pogana, to ka'isa kokomu kunka pogana, to ka'isaba mopai yakupisa kagu kanta puntawé. Piya puguni, osimi nki'nopa araiyoniwama nka'no kanta puguna, piyama iwamupisaba yakupe, kunkabe, yakupisa kagupe iro'ma wagana puntiye. ¹⁸ Eya, yakupe, kunkabe, yakupisa yakupe, iwamupisa pi kakaga irosume nkataenamaba wawayapa ka tupa iyeguyuguni purugu, agantuwe. ¹⁹ Piya, pi osiwama nkesegiyenaba iwamutape iyawarape waintiye. Eya, iyawamaba kuyawama nka'no kanta pegina, pi nki'notasaba wasanaba ata puwaitawé.

²⁰ Pigoya, pi ata puwaitakena kakagaenama to tara tupisa kinapa kampa iyeguyuguni, igeba iyapisa pentanarapa kampa igu a'wae puma, igeba keginape ama kotipe kampa ikabitantawé. Kampaye. We, pi ama kotiba igeba korirasabe, siribarasabe, kaparasabe, yabatasabe, yarasabe, iyapisa puguna, pintanamaba kampa aoba agama, kampa kamanapa abima, kampa nasintiye. ²¹ Piya, pi kina'miba tabe kuntuyenaba agamagini, ataenawaikaba kampa a'wae puntawé. Eya, wasana iyegumagini, kiyo'enaba pumagini, kumiyyena pumagini, kuntana puta nasimagini, igupa kampa a'wae pugu agantuwe.

10

Enisorewama Yoni esa amogana nantiye

¹ Pigoya to agauwapa, to ka esegi enisorewama mantabintisa tumoga agantuwe. Ae autasaenamaba ibina puwaogana, a'notapa koba aewanama waintogana, aowamaba pa kanta puma e'wasa puwaogana, agisawamaba wa'ega yaku kanta puntiye. ² Piya, aeba ka uwaena isa'anto a'waitama ayapi u'magina, ayatakantisa agisaba kayo waninkama nkabobori aema mima, ayake'masisa agisaba mara aema mintantiye. ³ Piyama mimagina, aeba araiyoniwama kega'e yisa puma tabe kiga'e untiye. Piya yogini, tonaeintisa tara umaema antaru untawé. ⁴ Pi tonaeintisa tara umaema antaru yugu, naeba pi kamana kaekena puwagana, ka awamu mantabintisa maya kamana yoga abintuwe: Pi tonaeintisa tara umaema antaru ye kamanapa kaeba akumpa'ma mima a-kaeyo, unamintiye.

⁵ Aiyogana, kayo wanitape marape asintoga aganto nkenisore yagarama aeba ayatakantisa inati maeyotamagina, ⁶ miyaba yagarama nkaobi esegi puntiye. Piya, miyaba yagara Kotiba aeba pi mantabe pipinti waintintanabe, mabe pipinti waintintanabe, wanipe pipinti waintintanabe pumarantine. Piya, enisorewama Koti nkaobi mayama esegima untine: Kanapa pabigo a'ya wakena pika, to ka yagaba kampa aobi pukune. Kampaye, iye. ⁷ Piya, tonaeintisa tara umaema enisorewama pikuriwapa pukakan, pi nttagaba Koti kakanti ntapiyenawampa nkau'wapa aborakiye, iye. Eya, pi aogi kamanapa pai kayokaya poropete kina'wapa uwaimintintanama nkau'wapa aborakiye, piye untiye.

⁸ Pigoya, pi nkawamu mantabintisa unaminti nkawamu'amaba to kake maya unamintiye: Kaeba wama pi a'wainti nkisa, kayo wanitake marake asintemi nkenisore yagarama nkayapi wainti nkisapa umaeyo, unamintiye. ⁹ Piya unamoga, naeba pi nkenisore yagaramati wama uma abigamagi: Kaeba pi uwaena isa'antoba namo, yuwagana, aeba maya unamintiye: Kaeba maema nao. Pipa kantabintiba asa kabakanaba, kawamupipa

igaenawapa tankama iga pusu pukiye, untiye. ¹⁰ Aeba piya yoga, naeba enisorewama nkayapisa pi uwaena isa'antoba maema nauwagana, nawamutapa tankama iga pusu poga, nagasuwaganaba nantabintiba asa pantiye.

¹¹ Aibogana, to ka maya unamintiye: Kaeba to kakeba uma, uwoma to i'yaga to i'yaga kina'mikabe, maga maga kina'mikabe, to kamana to kamana ye kina'mikabe, mabisa wa'ega kina'mikabe, Koti nkawamutasa kamanapa uma aborawaimo, piya unamintiye.

11

Kamana uma aborakena yagararamisi kamanane

¹ Piya umagina, kabi aisukena asa namintana, maya unamintiye: Kaeba asima wama Koti nkaota namapinti ima e'eronkape tabenawape ayaki kanarapayawe aisia, aratarape asu aisumagina, pita'i Koti nkagise kinapa ayakipawayawa, kaga aisia agao, iye. ² We, kaeba aota nama nkawamorisa kumapa a-nkaiso. Uwa atao. Pi kumapa to marisa kina'mintanawe, iye. ³ Piya, naeba nawamupisa kamana ukena yagarane taraba esegiyenaba isimekinisi, isigeba abaraena pu u'ma, 1,260 yagaba kamana'nepa uma aborakibese, piya untiye.

⁴ Pigoya, pi kamana ukena poropete yagara taraba, isigeba tara oribi ya kanta puma mima, isigeba a'ya'ma mara kabintemi Nkwa'egawama nkaora waiyeme kani kanta puma miyese. ⁵ Piya, ka'isa kina'miba pi tara yagarara ata puwaisitakena pukibea, pi taramisi nkisiwamupisa yaku iro'ma, kama kina'waisipa irabatikiye. Eya, ata puwaiatikibe'nagiba antotapa pabiyama purikibewe. ⁶ Piya, ibina mpantaba akunikena esegiyenaba isigeti waiyekana, Koti nkawamupisa kamana uma aborakibeme kanabipa kaba kampa aekiye. Piya, wanipa a'wae pikena esegiyenaba isigeti waiyekana kora nkwanintana puwakiye. Piya, mabisa kinapa a'ya'ma ata puwaiatkena esegiyenaba isigeti waiyekinisi, isigeba isibemika pabiyama pukibese, piya untiye.

⁷ Piyama, isigeba awaga kamana'waisipa uwaetaisigini, abe kampa wainta kabin-tisa kaba kina'maba iro'ma ima, ma'ena puwaisitama, asu isigasima isiyeguyekinisi purikibese. ⁸ Isigeba pu'maginisi, isiwaisipa pi tabe kuma'ama kepi uwa waikiye. Eya, paipa Wa'egawaisimpa yara purinti kumatapa uwa waikiye. We, meto kamana uma pi kuma'ama nkageba: Sotomuve, Isipiwe, yompene. ⁹ Aibekini, to i'yaga to i'yaga kina'mibe, a'ya'ma tupisa kina'mibe, to kamana to kamana ye kina'mibe, maga maga kina'mibe, igeba pi nkisapa kakaga yaga apuwa suma agasaba'waetamagini, kaiwaisitakenaenaba akumpa'ma mikibewe. ¹⁰ Piya, mabisa kina'miba pi tara yagarara pu'wakibemekaba tabe i'mu pumagini, wa'ena puma iyo'mipa i'muntanaba imikibewe. Pi tara poropete taramisi, mabisa kina'mitapa ata puratantame ntagararaba purese, umagini, piyama i'mu pukibewe.

¹¹ Pigoya, agauwapa, kakaga yaga apuwa suma a'ya waogana, Kotiba uwaisitaoginisi isigeba aemu maema isiyogama asiyusuguni, isigaume kina'miba tabera pamitami puma iyekuru pugu, agantuwe. ¹² Piyama isiyogama asiyusuguna, mantabintisa tabera kega'e umagina: Tisigeba mata'i iyiso, yeginisi, isigeba mantabinti mimigara iyusuguni kama kina'waisimpiba isigantaw. ¹³ Piya, pabi ntaganto tabe imima pogana, pi kumatasa age ka megasima auka'i uwa waintogana ka auka'i akasaba'ma aeguwaewaugu, agantuwe. Piya, pi imimankamaba 7,000-wa kina iyeguyogini pu'waewauguni, a'ya'ma to kina'miba tabera iyekuru pumagini, mantabintisa Koti nkagisuntaw.

¹⁴ Pigoya, tara tabe kuntuyenama kamanapa a'ya wagina, kakaga kuntuyenaba waintana agaro nttaganto aborakiye.

Tonaentisa tara umaema enisorewama pikuriwa pukantiye

¹⁵ Pigoya, tonarentisa tara umaema enisorewama pikuriwapa pukaogana, mantabintisa iwamu aga uma esegi kiga'e uma maya untaw: Wa'egarempabe otanti ntagara Karaisitiwampabe ibaba a'ya'ma marisa kina'mipa kabiwaitakiye. Eya, Wa'egarempa a'ya'ma yaga kabiwaitayaba mikiye, piya yugu abintuwe. ¹⁶ Piya yuguni, 24-wa anasa kina'miba, Koti nkaora iyemu yabaera miyume'nagiba, igeba mara parokaema Koti nkagisumagini, ¹⁷ maya untaw:

We, Wa'ega Koti, kaeba taberaka'yane. Kaeba ibabe paipe miyaba miyeka, ta'mu pugataune, iye.

Piya, kaeba tabe esegiyenagapa aborama kabiwaitakenaena ago peka, taeba ta'mu pugataune, iye.

¹⁸ Piya, abe'isa kina'miba imo'ena puntaka, kae kamo'enagapa ibanto aborawaeye, iye.

Piya, purinta kina'mi kamana ukena yaga aboroye, iye.

Eya, ibaba kayokaya kinakapa pipa poropete kinape kaeti atokaenta kinape, we, a'ya'ma intape tumintape iyekuru pugatama kamentapinti miye kina, igeba aogi ika nkimikena yagawe, iye.

Piya, ibaba mabi ata pe kinapa ata puwaitakena yagageba kagane, piya yugu abintuwe.

¹⁹ Piya yugu, naeba to agauwapa, mantabinti Koti nkaota nama ai'ataogana, pi aota namankapinti Koti esegi uwaitanti kamana wainta pokisiba wasanami nkiyora aborawaintantiye. Piya pogana, apaya purite waogana, antaru uma tabera aga yogana, mawamaba imima pogana, tabe kabayara poga agantuwe.

12

Wayake tabe kuyegewe

¹ Pigoya, to agauwapa, mantabintiba tabe awame'ena mayama aboraoga agantuwe: Piya, ka wae miyogana, pankamaba autasaena kanta puma aerarikaeyogana, o'amaba agisa amentapinti waiyegana, a'notiba nori nagisarisa tara tumpaema norirasa wa'ega kina'mi taminoku'ena puntiye. ² Piya pogana, aeba aga'e pogana, yagaraena pukena auki nakiyena aboramogana, pi ntagaraena puma nagarikenaga tabera: A-e, a-e, yoga abintuwe.

³ Agauwapa, mantabintiba to ka awame'ena mayama aboraoga agantuwe: Piya, ka tabe kuyewama mintomepa, aeba tete puwaogana, a'nonkapa tonautentisa tara umaema a'nu waiyogana, awawapa nayatar'a'mu waintantiye. Piya pogana, a'notiba tonautentisa tara umaema wa'ega kina'mi taminoku'anto waiyogana, ⁴ ayawa kasu aeyogana, mantarisa noriba tara auka'isa uwa atate ka auka'isa a'ya'ma maebugaogini mabinti tumintawé. Aibuguna, kana kuyawamaba yagaraena pukena wae'ma nkaori ampimagine, yagaranto ma'atakana aeguma nakenaraka aobi puma mintoga, agantuwe. ⁵ Aibogana, pi way'a'maba masi ma'atantiye. Piya, pi ntaramaba aeba ainti esegi kaso ayapipa mae u'magina maga maga kinapa esegima kabiwaitakena yagarawé. Piya, masi ma'ataogana karu'ena kana yagaraba ababute ima Kotiti aemu yabaewata mesu atantawé. ⁶ Aibuguna, kana wae'maba aegaka wama ka'me mpari ampintantiye. Piya, pi mpariba 1,260 yaga miyekiri: Nanintaba amima kabitaiyema, Kotiba yokege poga, agantuwe.

⁷ Agauwapa, mantari tabe ma'ená aborama, Maikoroge enisore kina'wake kana kuyewamapa ma'enaba potantawé. Piya, pi kuyewamage enisore kina'wake antotapa ma'ená pumagini, ⁸ igeba kampa esegi puguni asu igaintawé. Aibumagini: Ige marupa mantabinti ibaba kampa waikiye, umagini, ⁹ pi tabe kuye maebugasuguna tumintiye. Piya, pi tabe kuye aeba paisa kuyewe. Ae ageba Sataniwe, kewe, yewe. Aeba a'ya'ma marisa kina imyo'ena puwaitakena yagarawé. Piya, aeba kampa igasogini, igeba mabinti maebugasimagini, ao'enisore kina'wake kaga igarubauguni tumugu agantuwe.

¹⁰ Piya puguna, mantabinti tabe awamu'ama mayama kega'e yugu abintuwe: Ibaba Kotirempa tau'ikenaenawape esegiyenawape kabiratakenaenawape aboragina, Karaisitiwampaba kabikena esegiyenawape aboraye, iye. Piya, tao'mi kamana uwaitakena yagara, aeba asi nasiba arape asekape Kotirempa nkaobi kamana uwaitami ntagaraba maebugasuguna tumintiye, iye. ¹¹ Piya, tao'miba igeba ago esegi puma sipisipi awarowama koratasabe kamana'ama nkago aborakena yugawaitasabe asugasima agarubantawé, iye. Piya, igeba pu'wakenaenagaba kampa napinta yogawaipa pumagini againtawé, iye. ¹² Pigoya, pika mantabe a'ya'ma mantabinti minta kinape, tigeba ti'mu piyo. We, mabinti minta kinape kayo wanipinti minta kinape, ataenabi miyewe. Piya, kewamaba tigeti ago tumintana, ae yaga aro ntagogantowema, abimagina, tabera amo'enaba purite tumegiri, ataenabi miyewe, piya untiye.

¹³ Pigoya, pi kuyewamaba maebugasuguna mabinti tumimagine, aeba kana masi ma'atanti nkxae aega'ma wama arakurikena puntiye. ¹⁴ Piya pogana, kana waepa tabe kegebankama nkagaga taraba amogana: Pa'urite wanema, amogana, aeba pi kuyewamaka aegaka wama ka'me mpari umintantiye. Pita'iba kakaga kabu apuwa suma miyekiri nanintaba amima kabitaiyema Kotiba yokege puntiye. ¹⁵ Piya, pi wae'maba aegaka waogana, kana kuyewamaba awamupisa tabe wanintama ikasogana, kana wanipa anompa aborama karu'ena pi wae aega'urite wantiye. Piya, kuyewamaba napiyomepa: Wani pa'ma kana waepa amaerite wama apaikasanelma, piya puntiye. ¹⁶ Piya pomepa, mawamaba ao'maemagine, kana kuyewama nkawamupisa ikasome nkano nkwanipa akuniken aawamu aka puntogana, pita'i pai'waewantiye. ¹⁷ Piya pogana, kana kuyewamaba pi nkwaeka amo pogana, aeba aguyosagata wama, a'ya'ma to yagarawampige ma'ena puwaitakena wantiye. Eya, aeba Koti unti kamana wasima: Isu nkao'yagararanawe, ye kina'mipa iyegukena wantiye. ¹⁸ Pigoya, kana kuyeba wama kayo wani kepiyati tumpintoga, agantuwe.

13

Wanipintisa kabu kina tara aborantase

¹ Pigoya, to agauwapa, kayo wanipisa ka kabu kina irosaoga agantuwe. Aeba nayatara'mu awawa, tonautisa tara umaema a'nuna suma agantuwe. Piya, awawatapa nayatara'mu wa'ega kina'mi taminoku'anto waintogana, a'notapa akaya agiba waintantiye. ² Pi aganto kabu kina'maba tabe kabu pusi kanta pogana, agisawamaba peyawama nkagisa kanta pogana, awamu'amaba araiyoniwama nkawamu kanta puntiye. Pigoya, tabe kuyewamaba pi kabu kinapa esegiyenawape, wa'egawama mparunkape, tabe kabikena esegiyenabe amintiye. ³ Piya, kabu kina'ma ka a'nupa aegugasuguna pu'wasu poga agantuwe. We, piya puguna pi nkanamunkapa ago ata waogini, a'ya'ma marisa kina'miba agate pami puma, pi kabu kinapa aegarantaw. ⁴ Piya, pi tabe kuyewamaba kabikena esegiyenawape kabu kinapa amogini, a'ya'ma kina'miba kuyewama nkagisuntaw. Piya pumagini, igeba kabu kina'ma nkageba kaga agisuma maya untawe: Ke kanarasama kabu kina'ma pisa pukiye, a. Ke kanarasama ma'enaba puma agaikiye, a, piya untawe.

⁵ Piyama Kotiba kanarasaogana, pi kabu kina'ma nkawamupisa agebigo kamanape akaya kamanape umagina, aeba kabikena esegiyenawapa 42 uta aborantiye. ⁶ Piya, aeba awamupa aka puma Kotikaba akaya kamanape untiye. Eya, aeba Koti nkagega'ebe kuma'wakabe kaga akaya suntiye. Piya, a'ya'ma manta kumapinti miyume kina'mikaba akaya suntiye. ⁷ Piya pogana, Kotiba kanarasaogana, aeba asima Kotiti atokaeyume kinape ma'enaba puwaitama igasugu, agantuwe. Piyama aeba kabikena esegiyenaba maema, aeba a'ya'ma tupisa kinape, a'ya'ma to i'yaga to i'yaga kinape, a'ya'ma to kamana to kamana ye kinape, a'ya'ma maga maga kinape kabiwaitakiye. ⁸ Kabiwaitakini, a'ya'ma mabi mikibe kina'miba kabu kina'ma nkagisukibewe. Piya, paipa Koti mampa kampa punta, aeba aegunti sipisipi awarowampa ne'wasa maekena isapipa aokina'mi nkigeba ago kaentine. Piya, a'ya'ma to kina, igewai pi nkisapi kampa wainta kina'miba igeba pi kabu kina'ma nkagisukibewe, piya untiye.

⁹ Wasana ageyaga kina'maba ma kamanape abibebe peno: ¹⁰ Piya, iga'nabi ataigina wakibi'naba iga'nabi wano, iye. Eya, ma'enaba puma kasotasa aeguyigina purikibi'naba kasotasa pureno, iye. Pigoya, piyaena aborakapa, Kotiti atokaeyompe kina'mitaba, esegima mpima tamatiti'enara uepebe peno.

¹¹ Piya, to agauwapa, to ka kabu kina'maba mabintisa irosa'ma iyoga agantuwe. Aeba tara awawa sipisipi awaroma nkawa kanta puma waintogana, kamana'wapa tabe kuyewama usu puntiye. ¹² Piya, aintisa kabu kina'maba pi marusa kabu kina'ma kabikena esegiyenma ewaemagina, ae aobipa yogawapa aogima puntiye. Yogawapa piya pumagina uwaitaogini, a'ya'ma maga maga kina'miba marusa aegunti nkanamu ata wanti kabu kina'ma nkagisugu, agantuwe. ¹³ Piya, aintisa kabu kina'ma toma toma nkawame'ena tabera puntiye. We, aeba otaogana wawayami nkijora mantabintisa yakupa mabi tumintiye. ¹⁴ Piya, Koti kanarasaogana, aeba tonarona awame'ena marusa kabu kina'ma nkaobi pumagina, pi nkawame'enarasa mabisu kinapa imiyo pumagina maya uwaitantiye: Kasotasa aeguyogana kampa pu'wanti kabu kina'ma nkamapa tigeba pumagiri agisiyo, untiye. ¹⁵ Piya, Koti kanarasaogana, aeba kabu kina'ma nkamapa auma amogana pi nkamankamaba kamana untiye. Piya, auma amimagina otaogana, pi ka'isa kina amankamaka kampa agisume'nagipa amankamaba iyeguyogini purintaw.

¹⁶ Piya, aintisa kabu kina'maba otaogini, a'ya'ma kina, tuminta kinape inta kinape, kotantaga kinape kusi kinape, kayokaya kinape uwa miyume kinape, a'ya'ma kina'mi nkiya takantiwo, i'neranoma, ka ara'ena menkatantaw. ¹⁷ Piya, ka'waina kabu kina'ma nkara'ena kampa puntakibi'napa, ikantana pukenaenawapa akunkatakiye. Piya, ara'enawapa pipa kabu kina'ma nkagiwo, pi nkagiwama ntampawano. ¹⁸ Pika taeba aogima napiyeno. Piya, napiyenayaga kina'miba kabu kina'ma ntampawapa abima agowapa aogima aiseno. Piya, kana nampapa wasanami ntampane. Pi ntampawapa 666-we.

14

144,000 kina'miba kasa ini untawe

¹ Piya, naeba to agauwapa, we, Yerusaremi kumata Saiyoni amuti sipisipi awarowama asintogini, 144,000 kina kaga asintugu agantuwe. Piya, pi kina'mi nki'nebi sipisipi awaroma nkagebe abawampa nkagebe kaga kaentine. ² Aibogana, mantabintisa tabe kamana tumoga abuwagana, pi kamana'amaba tabe wani nkabawama usu pumagina, tabe antaru yisa puntiye. Piya, pi kamana'amaba iniwama usa puma, wasanami kita aeguyegana yisa kamana untiye. ³ Pi una kina'miba kasa ini ka uma, Koti nkaemu

yabaera uma, pi tarawa tarawaki iyoganta kina'mi nkiyobipe anasa kina'mi nkiyobipe ini untawe. Piya yuguni, pi 144,000-wa mabisa kina, Koti ika puma ibabemi, pi kina'amana pi kasa iniba abikena puntawe.⁴ Pi kina'miba igeba wayapa kampa maenta kina kanta puma, nare ntare puma mimagini, a'ya'ma kumati sipisipi awaro wakena pemitapa, igeba ae aegarawewe. Piya, mabisa kina'mi ikapisa pi kinapa Koti ika puwaitagini, igeba paitaratama Kotitibe awarowampatibe ka tuntana puma mintawe.⁵ Piya, ige iwamupisa kumpari kamana kapa kampa aboraogini, igeba nare ntare kina mintugu agantuwe.

Kakaga enisore kina'miba kamana untawe

⁶ Pigoya agauwapa, to ka enisore yagara pa'urite manta akapinti waoga agantuwe. Piya, ae yugawapa aogima waiyaba kamana uma aborama mabisa kina uwaimkenaenawe. Aeba uma aborama a'ya'ma maga maga kina'mitibe, a'ya'ma tupisa kina'mitibe, a'ya'ma to kamana to kamana ye kina'mitibe, a'ya'ma to i'yaga to i'yaga kina'mitibe aborakena yuga puntiye.⁷ Piya pumagina, aeba tabera kega'e uma maya untiye: Koti antota'ena aborakena kana'wapa aboragiri, tigeba Kotikaba tiyekuru puma agisiyo, untiye. Eya, mantabe mabe kayo wanipa nabai'nami wanipa aboranti'na nkagisiyo, piya untiye.

⁸ Pigoya, to ka enisorewamaba marusa enisorema nkaka'i aborama maya untiye: Pebironi kumapa ata puwaye. Ata puwaye, untiye. Pi tabe kumatasa ago kina'miba a'ya'ma maga maga kina'mitibe kumiyyena i'nintana aborauguni, igeba waini wani ntama aibio pesa puma aega'ma kumiyyena puntawe. We, pi tabe kumapa aya puwaye, untiye.

⁹ Pigoya, to ka enisorewamaba tara enisoremisi nkisika'i aborama tabera kega'e uma maya untiye: Piya, ka'wainaba kabu kina'mabe amankape agisuma, ai'nerano, aeyatano ara'enawapa maekibipa,¹⁰ waini namisa puma Koti nkamo'enaba kaga maema nakiye, untiye. Eya, wasanama wanipa kampa maenta waini abiwa kankabebi atama maema nama a'yugu pisa puma, Koti nkamo'enama nkesegiyenamana nakiye. Piya, yakunkamabe yakupisa kagu'amabe auki nakiyena aboramima, aota enisore kina'mi nkiyobipe sipisipi awaroma nkaobipe aboramekana ataenabi mikiye.¹¹ Piya, pi kina'mi nkiki nakiyenabisa kunka irosa'ma, a'ya'ma yaga iyaba'mikiye. Piya, pi kina'miba kabu kina'mabe amankape agisumagini, atega'ewa nkara'enawa maeya kina'miba igeba arape asekape iki nakiyenabisa kampa migarawewe.

¹² Pigoya, piyaena aborakapa, Kotiti atokaeyompe kina'mitaba, esegima asiyeno. Eya, Koti unti kamana wasima Isuti tamatiti'ena upebe pompe kina'mitaba, esegima asiyeno.

¹³ Pigoya, naeba mantabintisa awamu aga maya yoga abintuwe: Kaeba maya kamana kaeyo, untiye: Wa waya Wa'egawamatii atokaema yogawa pugaite pure'nagiba, ibasa kanara agobima i'muntanabi mikibewema kaeyo, untiye. Piya yogana, Awamus'aama kaga: Tagane, untana: Igeba araga ntugawaiipa kaitegini migaraigina, yogawaimpa nkawaga kamanapa aborakini i'muntanabi mikibewe, untiye.

Wasana a asikena yagawe

¹⁴ Pigoya, to ka agauwapa, we, wae nkibina waintogana pi ibinata wasanama ntagara kanta yagara mara'mintoga agantuwe. Ae a'notapa kori taminoku purintana, ayatiba agana wainta kasu u'ma mintantiye.¹⁵ Piyama mintogana, to ka enisore yagarama tabe mono namapisa irosa'magina, tabera kega'e uma ibinata mintome ntagaraga maya omintiye: Kaeba kasokataso mabisae'naba kasao. Piya, a'ya'ma mabisae'naba ago agutawaeyagina ibaba mabisaa naninta aki pukena yagawe, untiye.¹⁶ Piya yogana, ibinata mintome ntagaramaba kasonkatasa mabinti arisa pugasimagina, mabintisa nanintaba kasama maeyoga, agantuwe.

¹⁷ Piya, to ka enisore yagaramaba mantabintisa tabe mono namapisa iro'magina, aegeba agana wainta kasupa urite irosantiye.¹⁸ Piya, to ka enisore yagarama aratarasa irosantiye. Pi yakuta kabintome nkenisore yagarama iro'magina, tabera kega'e uma agananta kasu urintome enisore yagaraga maya untiye: Kaeba agananta kasukapa maete tumima arisa pugasimagina, mabisaa waini yamankapa agutamipa kasama aki puwaeyo, untiye.¹⁹ Piya yogana, pi nkenisore yagaramaba kasonkatasa mabinti arisa pugasimagina, mabisaa waini a'wapa aki pumagina, tabe aerakena kankabebi maebugaintiye. Piya, pi kankabebi Koti nkamo'enawane.²⁰ Piya, kuma'ama nkaka'i igeba pi yamankapa aerapantawe. Piya puguna, korapa pi kankabebisa uwaena aborama ima, osiwama nkawamuta ka kana puma e'eronkapa 300 kiromita waoga agantuwe.

15

Tonaentisa tara umaema enisoremi ataena urintawe

¹ Pigoya, naeba to agauwapa, to ka tabe awame'ena mantabinti agamagi, pika uwaena nagi napintuwe. Piya, tonarentisa tara umaema enisore kina'miba tonarentisa

tara umaema ataenaraka'yá wasana puwaitakenaena urintugu agantuwe. Piyama pi nkataenamaba uma a'ya wakana, aintiba to kapa kampa aborakiye. Kampaye. Pi nkataenamaba a'ya wakanaba, Koti nkamo'enawapa a'ya wakiye.

² Piya, naeba tabe kayo wani kantaenaba agantuwe. Pipa karasirasabe yaku-tasabe pumaranti kanta poga agantuwe. Piya, wasanamiba kabu kinape amankape agega'ewama ntampawape asu igasume kina'miba pi karasi waninkama nkatata asima mimagini Koti kitawapa u'ma mintantawe. ³ Igeba mimagini, Koti kayokaya yagara Moses nkiniibe, sipisipi awarama nkiniibe mayama sewe:

We, Wa'ega Koti, taberaka'yane. A'ya'ma pempentanagapa tabe pegi agategi uwaena tagi napiyune, iye.

We, miyaba Wa'ega, a'ya'ma kikapa arupu puma tagataka'yane, iye.

⁴ We, Wa'ega, kae kabintoga aotataka'yá miyekana, kebaya kaekaba kampa aekuru pumagina, kebaya kampa kagega'eba asagayukiye, a. Pipa Kampaye, iye.

Piya, arupu yuga pekana agogapa aborawaeyagini, a'ya'ma maga maga kina'miba kanama kae kagisukibewe, piya ini yewe.

⁵ Piya, ainti to agauwapa, mantabinti kairasa kimaranta mono namankapa a'waiwaintoga agantuwe. Pi ntamapa Koti miyemi ntamane. ⁶ Piya, pi tonaentisa tara umaema enisore kina'miba tonarentisa tara umaema ataena puwaitakenaenaba urite, pi tabe mono namapisa irosa'ma kanantawe. Igeba e'wasa wae kai amimagini korirasa ibamukantiba kintawé. ⁷ Abuguna, tarawa tarawaki iyoganta kinapisa ka'wainaba tonarentisa tara umaema korirasa tu'na maema tonarentisa tara umaema enisore kinapa imintiye. Piyama pi tu'napiya miyaba Koti nkamo'enawapa pumaewantiye. ⁸ Pumaema imogini maeyuguna, Koti nke'wasabisabe esegiyenawapisabe kunka kima pi mpono namapa pumaewaugu agantuwe. Piya, tonarentisa tara umaema enisore kina'mi ataena puwaitakenaenaba kampa a'ya puntogana, ka'wainaba pi mpono namapintiba kampa ubai'ma wakena puntiye.

16

Tu'napi Koti nkamo'ena pumaewaogini asunu kaegaintawé

¹ Pigoya, naeba abuwagana, ka tabe awamu aga tabe mono namapisa uma tonarentisa tara umaema enisore kinaka maya uwaimintiye: Tigeba wamagiri, tonarentisa tara umaema tu'napiya Koti nkamo'enawapa asunu kaegasigina mabinti tumeno, untiye.

² Piya yogana, marusa enisore yagarama wama tu'nankapa asunu kaegasogana mabinti tumintiye. Piya pogana, kabu kina'ma nkara'ena maema amata agisunta kina'mipa tonarona esegi inamu tu'ma iki nakiyena ibuntiye.

³ Piya, aintisa enisore yagaramaba tu'nankapa asunu kaegasogana kayo wanipinti tumintiye. Piya pogana, kayo waninkama a'wae puma pu'wanta kina'ma kura kanta pogana, kayo wanipinitsa iyoganta kinapa pu'waewantiye.

⁴ Piya, kakaga enisore yagarama pabiyyama tu'nankapa asunu kaegasogana anompabitibe nabai'nami nkwanipintibe tumogana, a'wae puma korantana puntiye. ⁵ Piya pogana naeba abuwagana, wanita kabintome nkenisore yagaramaba maya untiye:

Kaeba ibaba mite paipa mite aota taka'yane. Piya, ma nkantota'enagapa aborakenaga arupu pene, iye.

⁶ Piya, wasanamiba kaeti atokaeyume kinape poropete kinape iyeguyuguni korankaipa airi'ma purintane, iye.

Piya puguna, kaeba kanarasama ige'wai kurankaipa kamparaga potama antota'ena imukuni nantane, piya untiye.

⁷ Piya, naeba abuwagana, aratarasa awamu'ama mayama kega'e untiye:

Eya, Wa'ega Koti kaeba taberaka'yane. Antota'ena aborakenagaba kaeba tagantana puma arupuyena pene, piya untiye.

⁸ Pigoya, tarawa tarawa enisore yagarama tu'nankapa maema pata asunu kaegasogana, otaogana, pankama yaku tasubuma wasanaba yaku irantiye. ⁹ Piya, pi tabe pa ntakunkamaba irasu puma irabatogini, pi kina'miba Koti nkage, pi ataenaraka kabinti ntgararama nkage akayasotamagini, igupa kampa a'wae puma agega'eba kampa asagayuntawé.

¹⁰ Pigoya, nyaka'mu enisore yagarama tu'nankapa asunu kaegasogana, kabu kina'ma nkwa'ega aemu yabaera tumintiye. Tumogana, pi kabu kina'ma kabiyome kina'wampitiba tunusu waewantiye. Piya pogini, igeba agasiya iki nakiyena maema intebu utisa pumagini, ¹¹ iki nakiyena waikabe inamonkaikabe mantabintisa Kotikaba akayasotamagini, ata yugawaika kampa igupa a'wae puntawé.

¹² Pigoya, tonarentisa ka'umaema enisore yagarama tu'nankapa asunu kaegasogana Yuparatisi anompapi tumintiye. Piya pogana, wanipa tagankaogana pa nkirosamitisa mabisa wa'egama kanakena kipa i'ma aogi puntiye. ¹³ Piya, naeba agauwagana, kakaga ke kina'mi taro kanta pumagini, tabe kuyewama nkawamupisabe, kabu kina'ma nkawamupisabe, kumpari poropetewama nkawamupisabe irosagu agantuwe. ¹⁴ Piya, pi kina'miba igeba ke kina mima toma toma awame'ena pewe. Piya, igeba a'ya'ma mabisa wa'ega kina'miti nasima aki puwaitamagini, taberaka'ya Koti tabe kanabi ma'ena pukenaga aki puwaitakena pewe.

¹⁵ We, abiyo. Nae tigeti tumpa ku kina kanamisa puma kanama ampa aborawaekuwe, iye. Piya, wasanama kampa awaitaminta mima, kaiwapa aogima ami u'ma piyisa puma mimagina, auka mima wasana iyobi ani pisanaga yokege pukibi'naba a'muntanabi miyено, piya untiye.

¹⁶ Piya, pi ke kina'miba igeba mabisa wa'ega aki puwaitaagu agantuwe. Pi nkaki puwaitakena auka'igaba Iburu kamanapisaba: Amagetonewe, yewe.

¹⁷ Pigoya, tonarentisa tara umaema enisore yagarama tu'nankapa asunu kaegasogana esibabinti tumogana, tabe mono namapintisa, Wa'egawama nkaemu yabaerafa awamu'amaba tabe kiga'e yogana, maya umatumiye: Pipa iba a'ya wano, untiye.

¹⁸ Piya yogana, apaya purite waogana, antaru uta wama tabera aga yogana, agasiya imima puntiye. Pi nkimimap taberaka'yane. Piya, mabi mintanta kina'miba paipa tabe imimap piyama pogini kampa agantane. ¹⁹ Aibogana, pi tabe Pebironi kumapa aigasagasa'ba makaga atuntana pogana, a'ya'ma maga maga kumapa akasaba kaintiye. Piya, Kotiba Pabironi kumaka napimagina otaogana, pi kumatasa kina'miba wainiba kapubisa nawaegasisa puma, Koti nkagasiya amu'enaba nawaeyugu agantuwe. ²⁰ Aibogana, a'ya'ma wanipintisa maba aegaka wagasogana, to ka amupa kampa waintogini agantawe.

²¹ Piya pogana, tabe kabayara mantabintisa wasana ita tumoga agantuwe. Piya, kuntaenawaimpaba ka ka kopu ku kanta puma tumogini, wasanamipa pi kabayarankama ata puwaitantiye. Piya, agasiya ata puwaitantikaba igeba Koti nkageba akayasuntawewe.

17

Tabe kumi wae'ma kamanane

¹ Piya puguna, tonarentisa tara umaema tu'na urintume enisore kinapisa ka'waina maya tumpa unamintiye: Kaeba kanao. Tabe kumi wae, uwaena wani nkabobori mara'mintipa, antota'enaba aboramaka, pipa kababute kayakikuwe, untiye. ² Piya, mampabisa wa'ega kina'miba pi nkxae'maga kumiyyena puta nasewe. Piya pegini, a'ya'ma mabisa kina'miba waini namisa puma pi kumiyyenaba nama aibo'nabo pewe, piya unamintiye.

³ Piya, Awamus'a'maba nagu a'wae pogana, pi nkenisore yagaramaba nababute ka'me mpari wantiye. Piya poga agauwapa, ka wae'ma tete kabu kina'ma nkakabata mara'mintoga agantuwe. Piya, pi kabu kina'ma nkautiba uwaena Koti akaya nkagi pumaewaintogana, a'nonkapa tonarentisa tara umaema waintogana, awawapa nayataru'mu waintoga agantuwe. ⁴ Piya, pi nkxae'maba aogi konkonumuya kanta kaiibe aogi tete kaibe pu u'magina, toma toma nkawa'ena korirasabe ta'hera'ne yabatasabe aogi pasesurasabe pu u'ma, ayapipa korirasa pumaranta kapu u u'ma mintantiye. Piya, pi kapurapa Koti nkaobi kamparagaena pukenaenabe kumiyyenawampa nki'nintanabe pumaewantiye. ⁵ Piya agega'ewapa, meto kamanapis a'i'nera mayama waintoga agantuwe: Pebironi tabe kuma, mabisa kamparagaena pe kina'mi nkino, kumi wae'mi nkino nawema, kaemaranta waintoga agantuwe. ⁶ Piya, pi kana wae'maba Kotiti atokaeyume kina'mi kurape Isuka iyeguyume kina'mi kurape namagina aibo'nabo pog a agantuwe. We, pi nkxae'pa agategi, uwaena nagi napintuwe.

⁷ Pigoya, pi enisorewama to maya unamintiye: Nanaga uwaena kagiba napiyene, untiye. Piya, pi nkxae'ma nkagobe, pi kabu kina'ma tonarentisa tara umaema a'nuna nayataru'mu awawa suma wainta, pi nkxae'pa ababute wami kina'ma nkagobe, kakan-tipa, kaga aboramakuwe, untiye. ⁸ Piya, kaeba ago agampe kabu kina'maba paipa mintantikan ibaba kampa mintiye. Piya pikana, aintiba aebe pi abe kampa wainta kabisa asu irosakana, a'abibi kaitakana agaru tumikiye. Pigoya, paipa Koti mampa kampa punta, aebe e'wasa maekenisa isapi aokina'mi nkigeba ago kaentine. Piya, a'ya'ma to kina igewai pi nksapi kampa wainti kina'miba igeba kabu kina agateginiba, uwaena igi napikibewe. Eya, pi kabu kina'maba paipa mintantikan, ibaba kampa mintikana, aintiba to ka irosakini, uwaena igi napikibewe, untiye.

⁹ Pigoya, aogi napiyenayaga kina'maba ma kamana'ama nkagoba aogima napiyeno: Piya, tonarentisa tara umaema a'nunkamaba pipa tonarentisa tara umaema amu kanta

pegina, pi nkwaepa pi nkamuta mara'mintiye. ¹⁰ Piya, pi tonaentisa tara umaema a'nunkamaba pipa tonaentisa tara umaema mabisa wa'ega kinane. Eya, nayaka'mu wa'ega a'ya wagana, ibantoba ka mintemikana, to ka'wainaba kampa wa'egaenaba puntiye. Piya, aeba aintiba uwaena yaganto aborama mikiye. ¹¹ Pigoya, kabu kina'maba paipa mintantikana ibaba kampa minti'na, aeba wa'ega kanta puma tonaentisa tara umaema wa'ega kina'mi tupisa aboramagina, piyama aeba tonaentisa kakaga umaema mikekana, aintiba a'abibi kaitawakana agora tumikiye.

¹² Piya, nayataramu agampe nkawawapa pipa nayataramu wa'egawe. Igeba kampa wa'egaba maentakini, togana igebe kabu kina'mabe esegiyenayaga maemagini, igeba aro ntaganto wani awara wa'egaena puma mikibewe. ¹³ Piya, pi nkwa'egamiba igeba ka igi napimagini esegiyenawaipe wa'egaenawaipe kabu kina'ma amentapinti atakibewe. ¹⁴ Piya, igeba sipisipi awaropa ma'ena potaigina, awaroma asu igaikiye. Eya, aeba tabe kina'mi tabewaine. Aeba wa'egami nkwa'egawaine. Piya, a'ya'ma aeti atokaeya kina, kega'e uma uwaitaogini imatiti pota kina'miba, igebe sipisipi awaromageba asu igaikibewe, piya unamintiye.

¹⁵ Pigoya, aeba to ka maya unamintine: Kaeba wani ago agane. Pi nkwanu nkabobori kumi waepa mara'mintemi wani, pipa uwaena wabe wayape to i'yaga to i'yaga kina mima, maga maga kina mima, to kamana to kamana ye kina miyegana aganema, unamintiye. ¹⁶ Piya, nayataramu agampe nkawa, pipe kabu kinape kaga pi kumi wae kama potakibewe. Kama potamagini a'ya'ma autasaenawapa akugu pugasigma auka wakini awaseba nagasima yakupi kababai kaikibewe. ¹⁷ Eya, Kotiba napiyena imintikini igeba ae abugaintanaba aborakibewe. Piya, igeba ka igi napimagini wa'egaenawaipe kabu kina'ma amentapinti atamagini, piya puta wagina Koti a'ya'ma umarantem kamanama'ama nkagoba uma nagarikiye, untiye. ¹⁸ Piya, pi nkagampe nkwaes aeba a'ya'ma mabisa wa'ega kina'mi nkai'ne kuma kanta puma mintiye, piya unamintiye.

18

Pebironi kuma akasabakibi kamanane

¹ Piya unamoga naeba agauwapa, to ka enisore, tabe kabikena esegiyena wantaga enisorewama mantabintisa tumoga agantuwe. Piya, aeba tabe e'wasaena wantaga tumogana maba arawantiye. ² Aeba taberasa kega'e uma maya untiye:

Pebironi kumapa age ata puwaye. Pi tabe kumapa ago ata puwaye, iye.
Piya, ibaba pipa ke kina miye kumane, iye.

Pipinti i'ninkamana ke kinape kama potama i'ninkamana kabarape igeba ampiyewe, iye.
³ Piya, a'ya'ma maga maga kina'miba igeba waini wani ntama aibo pesa puma i'ninkama kumiyenawapa aega'ma puntawe, iye.

Piya, mabisa wa'ega kina'miba aege kupiyona puntawe, iye.

Piya, mabisa pisinisi kina'miba agebigo'enawapa aega'ma pi ntugarassa uwaena kuta maentawe, piya untiye.

⁴ Pigoya, naeba to abuwagana, to ka awamu aga mantabintisa maya untiye:

We, naokina'nempitaba, pi kumapa atate wagasiyo, iye.

Piya, aeti atokaema aguntaenawa puma'ma ataena potakenaenawapa kaga maesanaga atate wagasiyo, iye.

⁵ Piya, aguntaenawampa aigatopa aigatopa purite mantabinti iyegina, Kotiba atae-nawampa nkikakaba ago napiye, iye.

⁶ Piya, pi kumi wae'ma nkaborantintanagaba tigeba napima a'wae puma ka'masa puma ata potaiyo, iye.

Ae puntikaba antota'ena tara yaga atokaema amiyo, iye.

Aeba esegi wani kapubi yokege puma imintikaba, tigeba pi kapubi antota'ena tara yaga atokaema yokege puma amigina nano, iye.

⁷ Piya, ae'wa nkagega'e asagayuma agebigo'ena puta wantemikaba tigeba pi kanara auki nakiyena amigina kube'ena peno, iye.

We, antabaipinti mayama napiye: Naeba wa'ega wae mima aogima miyuwe, iye.

Naeba abeya waepa kampaye. Pikaba naeba ata kube'enaba kampa pukuwema, napiye, iye.

⁸ Pigoya, pika a'ya'ma ata potakenaenawapa ka yaga kaga aetiba aborakiye, iye.

Piya, auki nakiyenabe kube'enabe i'mikenaenabe aetiba aborakana, pi Pebironiba yaku kaegaikiye, iye.

Eya, Wa'ega Kotiba esegiyenayaga mima ikankapa a'yigi atakiye, piya untiye.

⁹ Piya, mabisa wa'ega kina, aege kumiyena puma atokaema igebigo'ena punta kina'miba, yaku tama kunka iyekiniba, agategini aeka tabe intara'ena puma kub'ena

pukibewe.¹⁰ Piya, igeba auki nakiyenagaba tabera iyekuru pumagini pagasara mima agama maya ukibewe: We, we, Pebironi, kaeba tabe kuma, esegi kumakawe. Ka yaga ka awara antota'enagapa maema a'ya wane, ukibewe.

¹¹ Piya, mabisa pisinisi kina'miba pi kumaka napimagini: Kebaya kotatepa ika pukiyema, napimagini kunta puma, pi kumaka intara'ena puma kube'ena pukibewe. ¹² Pi kutapa aeба koribe, siribabe, ta'nera'nе yabape, aogi pasesube, aogi wae kaibe, konkonumuya kaibe, sirikabe, tete kaebe, tonarona aogi agunta yabe, tonarona iwa pumarantape, tonarona yarasa pumaranta tabe ikantaga'enabe, kapabe, aenibe, agoginagogi yabape,¹³ nanintabi atakena sinamoni agunta kagupe, tonarona supupe, aogi agunta ukenaenabe, tusa masawaepе, aogi agunta masawaepе, waini wanipe, apabe, aogi parawape witibe, purumakabe sipisipibe, osibe osiwama paibukena karebe, wasanabe, eya wasanami nkigupe, pipa pisinisi kina'mi kutankai waiyomeka, pika intara pugu agantuwe.¹⁴ Piya, igeba pi kumaka maya ukibewe: Pi kagu'ama nkabugai nkau'wapa kagaite wagasaye. Eya, a'ya'ma iga nanintagape a'ya'ma kauka kautasaenabe agora kagaite wagasikanika, kaeti to kakema aborakiye, ukibewe.

¹⁵ Piya, pi kuta mpaeya pisinisi kina, pi kumatasa uwaena yaba maeya kina'miba igeba auki nakiyenagaba tabe iyekuru pumagini, pagasara mima agama intara'ena puma kube'ena puma, maya kamana ukibewe:¹⁶ We, we, pi tabe kumakaba tantarane. Paipa pi kumatasa kina'miba aogi wae kaibe, konkonumuya kaibe, tete kaibe pu u'ma, autiba koribe ta'nera'nе yabape aogi pasesube awa'enaba puntawе.¹⁷ We, ka awantora a'ya'ma kutankaipa nagari waya, tantarane, untawе.

Piyama agauwagana, a'ya'ma wanipisa karewama nkababe, pubasanakena kinape, posikurube, a'ya'ma kayo wanipinti pisinisi pe kina'miba igeba pagasara mima agamini,¹⁸ yaku tama kunka iyome agategini, aeka kega'e uma maya untawе: We, to ka kumapa aeба pi tabe kumankamate ka'masa puma waintemipa aempaye, a. Pipa kampaye, untawе.¹⁹ Piya, igeba i'ni nkakae'ma i'notiba pa'i'ma, intara'ena puma kube'ena puma, mayama kega'e untawе: We, we, pi tabe kumakaba tantarane. Paipa a'ya'ma wanipisa karewama nkabawampa aepisa tabe mone aki puntawе. We, ka awantora a'ya'ma kutankapa nagari waya, tantarane, untawе.²⁰ We, mantabintisa kinape, Kotiti atokaeya kina'mitabe, aposorobe, poropetebe, tigeba eakaba ti'mu piye. Piya, ata puritaitaka Kotiba kana kumapa antota'ena amiye, piya untawе.

²¹ Aiyuguna, ka esegi enisore yagarama tabe yaba, witi airapakena tabe yaba kanta yabapa asagayuma kayo wanipinti maebugasogana tumogana, maya untiye: Piyama maebugasosa puma pi tabe Pebironi kumapa aeguma maebugasakanaka tumiwakini, wasanamiba to kakema kampa agakibewe, iye.

²² Piya pekana, kita agabe, tonarona inibe, kabuwae agabe, pikuri agabe, to kakema kae kumapintiba kampa abikibewe, iye.

Piya, wasanami iyapisa pukenaena aogima aganta kinapa to kakema kae kumapintiba kampa igakibewe, iye.

Yabankama witi airapantana yi kamanapa to kakema kae kumapintiba kampa yekini abikibewe, iye.

²³ Kanepa to kakema kae kumapintiba kampa arakiye, iye. Iba wae'ma kamanape awae kamanape to kakema kae kumapintiba kampa abikibewe, iye.

Piya, paipa kae kumatasa kina'miba pisinisi pumagini, mabisa tabe kina mimagini, tonarona kiyo'enagatasa maga maga kinapa ago'ena puwaigaintane, iye.

²⁴ Piya, kae kumapintiba wasanamiba poropete kinape Kotiti atokaeyume kinape iyeguyogini puruguna, eya, a'ya'ma iyeguyume mabisa kina'mi kurapa Kotiba kaga agama, pika antota'ena kamiye, Pebironikaba piya untiye.

19

Pebironi ata puwantika mantabinti i'mu puntawе

¹ Pipa a'ya waoga, naeba abuwagana mantabinti uwaena kina'mi nkiwamu aga kanta puma maya uma tabe kega'e yoga abintuwe:

We, Kotiti nkage asagayuyen. Piya, tau'ikenenaenabe e'wasaenabe esegiyenabe, pi'na nkagoba Kotirene, iye.

² Piya, Kotiba kamanapa a'yigi nkitamagina aeба tagantana puma arupu piye, iye.

Piya, tabe kumi wae'ma kumiyenawapa a'ya'ma mabisa kina iyakima ata puwaitagina, Kotiba ata ikankapa amiye, iye.

Aeba Koti kayokaya kina iyeguyogini purintaka Kotiba antota'ena amegina kanarasayе, piya untiye.

³ Piyama igeba to kakema kega'e uma maya untawe: Koti nkage asagayuyeno. Piya, pi tabe kuma yaku tami kunkamaba a'ya'ma yaga iyaba miye, untawe. ⁴ Piya yuguni, 24-wa anasa kinape, tarawa tarawaki iyoganta kinape, igeba parokaema aemu yabaera minti Koti nkagisuma: Tagane, Koti nkage asagayuyeno, untawe. ⁵ Piya yuguna, Wa'ega aemu yabaeresa to ka awamupa kega'e uma maya untiye: Koti kayokaya kina, tuminta kinape inta kinape, a'ya'ma Kotika tiyekuru pe kina'mitaba, tigeba Kotirempa nkage asagayuyiyo, untiye.

Sipisipi awaroma waya maekena a'muntanawé

⁶ Piya, naeba to abuwagana, uwaena kina'mi nkiwamu aga kanta puma kega'e yoga abintuwe. Piyama uwaena wani nkabawama aga yisa puma, tabera antaru yisa puma maya untiye:

We, Koti nkage asagayuyeno. Piya, Wa'ega Kotirepa aeba taberaka'ya mima, wa'ega airatama kabirataye, iye.

⁷ Piya, taeba tabera ta'muntana puma agega'eba asagayuyeno, iye.

Piya, sipisipi awarowama waya maekena kana arosaika, iba'wae'wapa ago yokege puma mintune, iye.

⁸ Piya, Koti otagina aogi wae kai, e'wasa puma nare ntare puwai kai pu u'ma yokege pune, piya yugu abintuwe.

We, aogi wae kaiba pipa Kotiti atokaeya kina'mi arupu pentanawé.

⁹ Pigoya, enisorewamaba to ka maya unamimagine: Kaeba ma kamanapa kaeyo, untiye: Piya, Koti kega'e uma, sipisipi awaroma waya maema tabe nakena aborakibita iba pikibi'nagiba, igeba i'muntanabi mpikibewema, kaeyoma unamintiye. Piya: pi kamanapa taga Koti kamanane, unamintiye. ¹⁰ Piya unamoga, naeba ae'wa nkagisabi parokaema agisukena puwagana, aeba maya unamintiye: Kampaye. Kaeba piyaba apo. Piya, naebe, kaebe, a'ya'ma to Isu nkawaga kamana abibebe pe kaokina'mibe, taeba ka yuga pompene. Kaeba Kotitimana agiso, untiye. Piya, a'ya'ma poropete kina'mi usu kamana'ama nkagoba, pipa Isukawe.

Wae nkosira mintanti ntagarama kamanane

¹¹ Pigoya, naeba to agauwapa, mantaba a'waiyogana, we, wae nkosi mintoga agantuwe. Piya, akabata mintome'na nkagege'aewapa: Aogima kabima mima Tagantanamana pemi Ntagarawe, untawe. Piya, aeba arupuyenamana nkaega'ma kamanapa aogima a'yigi nkamatamigina, ma'ena aogima piye. ¹² Piya, aowamaba yaku nkikisu pogana, a'notiba uwaena wa'ega kina'mi taminoku'antonto waintogana, autapa abintowa abinti nkagege'aewapa kaemarantiye. ¹³ Piya, e'ero kaiwapa korataso pai'ataogana ae'wa nkagewapa: Koti Kamana Agowe, untawe. ¹⁴ Aibogini, a'ya'ma mantabintisa irebu kina'miba igeba aogi wae kai, nare ntare pe kai u'ma, wae nkosi mima aega'ma wantawé. ¹⁵ Piya, awamupisa agananta paroya ntogi aboraogana, kana yogitasa maga maga kina'mipa iyegukena puntiye. Piya, aeba aeni asarasara kabiwaitakiye. Aeba waini airapakena kankabebi airapakiye. Piya, pi kankabeba taberaka'ya Koti tabe amo'enawane. ¹⁶ Piya, kaiwatape arutape agewapa: Wa'ega Kina'mi Wa'egawe, Tabe Kina'mi Tabewaine, piyama kaema'ma mintiye.

¹⁷ Piya naeba to agauwapa, ka enisore yagarama papinti asintoga agantuwe. Aeba a'ya'ma manta akata pa'urite waume kabaraka tabera kega'e uma maya untiye: Tigeba menkaki puma Koti tabe nakenaba ampa naiyo, untiye. ¹⁸ Piya, tigeba mabiswa wa'egawama nkipe, paitanta irebu kina'mi nkipe, esegi pe kina'mi nkipe, osiwama nkipe akabata wa kina'mi nkipe ampa naiyo. Eya, kayokaya kina'mipe uwa kina'mipe, tuminta kinape inta kinape, tigeba a'ya'ma kina'mi nkipe nakibewe, untiye.

¹⁹ Piya, naeba to agauwagana, pi kabu kinape maga maga wa'ega kinape a'ya'ma irebu kina'waipe aki pumagini, igeba wae nkosira mintanti ntagaramage ae irebu kina'wake ma'ena puwaitakena aki pugu agantuwe. ²⁰ Piya pumepa, aeba kabu kinape kumpari poropetewape asu isigasima iga'na puwaitsantiye. Piya, pi poropetewamaba kabu kina'ma nkaobi toma toma awame'ena pumagini, pintanarasa ago'ena puma kabu kina'ma nkara'ena maenta amata agisume kinapa kumpari'ena puwaigaintine. Piya, pi kabu kinape kumpari poropetewape uwa isiyo agantusuguna, isiyesagayuma maebugasoginisi esegi kagu'ama yaku tami kotupintiba tumintase. ²¹ Piya, pi wae nkosira mintome ntagarama aeba awamupisa aboraome paroya ntogirasa a'ya'ma to kama kinape iyeguyogini purintawe. Aibogini, a'ya'ma kabarankamaba ampagini pi kina'mi nkipe nauguna iga'e paoga agantuwe.

20*Sataniba 1,000 kabu iga'na puntiye*

¹ Piya naeba to agauwapa, ka enisore yagarama mantabintisa tumoga agantuwe. Piya, ayapipa ka ki, abe kampa wainta karasa ki u u'ma tabe iga'na kaga urite tumintiye. ² Aeba tumimagina pi tabe kuyeba araku'ma iga'na potaugu agantuwe. Piya, pi paisa kuyewama aeba Satani, kewe. Piya, pi enisorewama iga'na potamagina: 1,000-wa kabu iga'nabi mpiyoma, otamagina, ³ abe kampa wainta kabinti apasanakasogana tumintiye. Piya tumogana aeba awaba akumpa esegi potantiye. Piya, Sataniba 1,000-wa kabu kampa maga maga kina kumpari uwaitasanaga akunkataoga agantuwe. Piya, pi kana a'ya wakanaba ainti ai'ataigina aeba ima aro ntangato to aborama nasikiye.

⁴ Piya, naeba agauwapa, ka'isa wa'ega aemu yabae waiyogana, pita'i a'yigimpa agama kamana uwaitakena yogara Kotiba iba puwaitanti kina'miba mara'mintugu agantuwe. Piyama agauwapa, Isuti imatiti puma au'wa aborama Koti kamanapa upebe puntaka, kama kina'waiimpiba ina'mu arisa kasuguni purinta kina'mi nkimankamaba agantuwe. Piya agauwapa, kabu kinatano, amankatano kampa agisunta kina'mi nkimate, ara'enawapa i'nerano, iyatano kampa maenta kina'mi nkimate agantuwe. Piyama agauwagini, pi kina'miba to ka asima iyogamagini, igeba Karaisitibe kaga wa'ega puma 1,000-wa kabu miyugu agantuwe. ⁵ Piya, igeba maru'ena irubintisa asintawe. Aibuguna, a'ya'ma to ka'isa purinta kina'miba pabi nttagaba kampa asima iyogantawe. Kampaye. Igeba pi 1,000-wa kabu a'ya waogana asima mintugu agantuwe. ⁶ Piya, marusa yaga asima mikibe nttagaba iyogakibe'nagiba igeba aota mima i'muntanabi mpikibewe. Piya, ainkagogo purikena yagagaba kampa iyekuru pekana ataba kampa puwaitakiye. Kampaye. Piya, pi kina'miba igeba Kotige Karaisitige isige mono yuga pumagini, Karaisitibe kaga mima 1,000-wa kabu wa'ega puma mikibewe.

Sataniba ataraka'ya puntiye

⁷ Pigoya, aintiba pi 1,000-wa kabu a'ya wakanaba, Satanipa iga'nabis a kariyoba ataijina kanakiye. ⁸ Kanakiniba, maga maga kina, tarawa tarawaki ma atutasa kina, pipa Kogibe Mekogibe, igeba Satani kaga kumpari uwaigasima, tabe ma'enara iba puma aki puwaitakiye. We, pi kinapa kayo wani kepiya kanta puma kampa aisema kanara, aki pikibewe. ⁹ Piya, naeba aguwapa, igeba a'ya'ma mariba masi purite kanama ampaki puma Kotiti atokaeyume kina'mi kumape Koti nkabugai kumape kaga ainkinki pugu agantuwe. Piya puguna, mantabintisa yaku tumima pi nkirebu kinapa irabatintiye. ¹⁰ Aibogana, Kotiba piyama kumpari uwaigainti keba aesagayuma maebugasogana, aeba kotupi, yakupe kagu yakupe esegima tami kotupinti tumoga agantuwe. Piya, pi kabu kinake kumpari poropetege maebugasoginisi mintusume kotupinti tumogini kaga mimagini, arape asekape a'ya'ma yaga iki nakiyenabi miyaba miyugu agantuwe.

Tabe pako pikenaenawe

¹¹ Pigoya, naeba agauwapa, ka tabe wae nkaemu yabae waintogana, ka'waina mara'mintoga agantuwe. We, ae aorisaba mabe mantabe aegaka wawaegusuuguna, marunkaisipa to kapa kampa waintantiye. ¹² Piya to agauwapa, purinta ige wainta kinape tuminta kinape, a'ya'ma kina'miba aemu yabaewama nkaori asima mintugu, agauwagana esaka esaka apira puma aisuntiye. Piyamagina to ka isakeba apira puntipa, pipa miyaba kina'mi nkisane. Piya, mara'minti'naba aeba esaka esaka aisuwa kaemaranta'enaba agamagina, purinta kinapa a'yigi nkitantiye. Eya, a'ya'maena pume kanara a'yigi nkitantiye. ¹³ Piya, kayo waninkamaba aeti mintome purinta kina aborrawaeyogana, pabiyamagina purintapisa kabintisa a'ya'ma kina'miba aborrawaeyuguna, a'ya'ma kinapa pume kanara ka ka a'yigi nkitantiye. ¹⁴ Piya pumagina, purikenaenabe kabinti mikenaenabe kaga maebugasogana yaku tami kotupinti agora tumintiye. Pi yaku tami kotupa pipa ainkagogo purikenaenawe. ¹⁵ Piya, aeba ka'waina nkage miyaba isapi kampa agantanaba, aesagayuma pi ntaku tami kotupinti kaga maebugasoga agantuwe.

21*Kasa mantage kasa magewe*

¹ Pigoya, naeba agauwapa, kasa mantage kasa mage aboraoga agantuwe. Piya, marusa mantage marusa mageba nagari waogana, kayo wanipa kaga to kakema kampa waintantiye. ² Piya, aota kuma, kasa Yerusalem kumapa Kotitisa mantabintisa tumoga agantuwe. Piya, pi kuma'amaba waya'ma iba'ena puma wara atakena awa'ena pusu puma tumogana, ³ tabe awamu aga aemu yabaeresa mayama tumoga abintuwe: Abo. Ibaba Koti miyemi kumapa wasana igeti waintiye. Piya, aeba igege miyekini, igeba ae aokina mikibewe. Eya, Koti aewapa igeti mikiye. ⁴ Igeti mimagina, aeba iyo'nuba aebago

puwaegasakini, to kakema wasanamiba kampa purikibewe. To kakema kuntaenabe kube'enabe iki nakiyenabe kampa aborakiye. Kampaye. Pi paisaenaba ago nagari waye, piya yoga abintuwé.

⁵ Pigoya, aemu yabaera mara'mintome'naba maya untiye: Agao. Naeba a'ya'maenaba kasa'ena mana pumaraeuwe, untiye. Piya umagina aeba to kakema maya uma unamintiye: Kaeba ma yo kamanapa kaeyo. Piya, pi kamanapa kampa antage'ena puma taga taka'yane, untiye. ⁶ Aeba to kakema maya unamintiye: Piya, a'ya'maenaba aborawaentuwe. Naeba paitanta yagara mite aintisa yagaraba mite puma, a'ya'maenama nkago nawe. Piya, wanika abemikaba naeba kanara e'wasa nabai'nami wanipa uwaba amekana nakiye. ⁷ Piya, yoga puma agaikibi'napa mayama aboramukuwe: Naeba Kotiwa mpiyekana, aeba yagarane mpikiye, untiye. ⁸ We, iyekuru puma iyegaka wa kinape, kampa imatiti pe kinape, tonarona i'nintana pe kinape, iyeguye kinape, kumiyyena pe kinape, kiyo'ena pe kinape, ama koti nkagise kinape, a'ya'ma kumpari ye kinape, ige'wai nkantota'enaba esegima tami kotupi iyesagayuma maebugaikkiye. Piya, pi yakupe kagu yakupe tami kotupa, pipa ainkagogo purikenaenawe.

Kasa Yerusaremi

⁹ Pigoya, ka enisore yagarama naeti ampagina, aeba tonarentisa tara umaema wasana ata puwaitakenaena pumaewainta tu'na u'urintume nkenisore kina'mipisa naeti ampa maya unamintiye: Kaeba kanao. Naeba iba'wae, sipisipi awaroma maekena pemi nkwaepa kayakikuwe, unamintiye. ¹⁰ Piya umagina, pi enisorewamaba Awamus'a'amati atokaenatama nababute tabe e'ero amuti imagina, aeba aota kumapa, Yerusaremi kumapa, nayakintiye. Pi kuma'amaba Kotitisa mantabintisa tumogana nayakintiye. ¹¹ Piya, pi kumapintiba Koti nke'wasaenama arantiye. Eya, e'wasaenawapa tabe ikankantaga yaba kanta puma taberabe yasipa yaba kanta ta'nera'ne puma, arawama karasi kanta puntiye. ¹² Pi kumatapa tabe kagisa inata asugasima ainkimaranta kagisa waintogana, pi kagisabi nagisarisa tara tumpaema kabi waintogana, pi kaberapa nagisarisa tara tumpaema Isureyo kina'mi tupisa igiwaipa kaemaraogana, pi kaberapa nagisarisa tara tumpaema enisore kina'miba asima mintantawe. ¹³ Piyaenaba, pa nkirosai nkauba'iba kakaga kabiwa, pa tupasaitiba kakagawa, metakaeri kakagawa, maretakaeri to kakaga kabiwa suma waintantiye. ¹⁴ Pi kuma'ama kagisawamaba nagisarisa tara tumpaema yabata kimaraogana, pi ntatabata sipisipi awaroma nkaposoro kina'mi nkige kaemaraoga agantuwe.

¹⁵ Pigoya, pi enisore, nae kamana unamome'naba aeba korirasa pumaranta asa ayapi u'ma, pi kumape kabewape kagisawape aisukena asaba urintoga agantuwe. ¹⁶ Piya, pi kumape po kona kumane. E'erongape tabenawape ka'masane. Piya, enisorewamaba asawatasaka kuma kuma aisuwa agaomepa, e'erongape tabenawape inatisaenawape ka'masa pumagina, pipa 12 tauseni kanara agantiye. Pipa 2,400 kiromita aisuwa agantiye. ¹⁷ Piya, pi enisorewama pi kagisa aisuwa agaomepa, wasanami aisikenenaearasa agama, tabenawapa 144 kanara agantiye. Pipa 70 mita aisuwa agantiye.

¹⁸ Piya, kana kuma'ama kagisaba yasipa yabatas kimagina, kana kumapa korirasa pumaraogana, arawama karasi kanta puntiye. ¹⁹ Pi kagisawama nkago yabapa tabe ikankatasaka toma toma ta'nera'ne yabatas awa'enawapa pumarantiye. Piya, marusa yabapa yasipawa, tarasa pome ntatabapa sapayawa, kakagasa pome ntatabapa agetiwa, tarawa tarawaki pome ntatabapa emerowa, ²⁰ nayaka'mu pome ntatabapa satonikisiwa, tonarentisa ka'umaeyome ntatabapa koniriyawa, tara umaeyome ntatabapa karisoraitiwa, kakaga umaeyome ntatabapa periyowa, age ka megasome ntatabapa topasiwa, nayatar'a'mu yabapa karisoparesiwa, nagisarisa ka tumpaeyome ntatabapa ayasin'iwa, nagisarisa tara tumpaeyome ntatabapa ametisiwa, suma waintantiye. ²¹ Piya, nagisarisa tara tumpaema kabiba pipa nagisarisa tara tumpaema wae pasesuwe. Eya, ka kabiba ka tabe pasesu waintogana, pi kumapintisa kipa korirasa pumaraogana, aeba karasi kanta pogini agarosa'ma agantawe.

²² Piya, pi kumapintiba tabe mono namapa kampa agantone. Kampaye. Wa'ega Koti taberaka'yape, sipisipi awaromabe, isigeba pi mpono namapa mintusugu agantone. ²³ Piya, pi kumapintiba pankamabe o'amabe e'wasaba kampa pukiye. Kampaye. Koti ae e'wasa pekana, sipisipi awaromabe aeba kane'wane. ²⁴ Piya, pi kuma'ama nke'wasaenara a'ya'ma maga maga kina'miba nasigini, pita'i mabisa wa'ega kina'miba aogi iwa'enawaipa maete metakibewe. ²⁵ Piya, arapa pi kuma'ama kabeba kampa akunikibewe. We, pi kumatapa kampa ase ukiye. ²⁶ Piya pekini, a'ya'ma marisa iwa'enabe i'muntanawaipae maete kanagana pukibewe. ²⁷ Piya, i'nintanabe, wasanama tonarona kamparagaena pukibi'nabe, kumpari ukibi'nabe, pipinti kampa ubasikiye. Kampaye. Piya, sipisipi

awaroma nke'wasa maekena isapi igewai kaetanti kina'mi ibiwaipa ubasikibewe, piya untiye.

22

E'wasa wanike e'wasa yagewe

¹ Piyama agauwagana, enisorewamaba anompa nayakintiye. Pi nkwanipa e'wasaena maekena wani, karasiwama ta'nera'ne pusu pi wani, pipa Kotige sipisipi awarowampage isiyemu yabaerasa aborami nkwanine. ² Piya, pi waninkama pi kumapintisa ki'ama nkakapinti wagina, to awamori to awamori e'wasaena maekena ya waintiye. Pi ntawamaba nagisarisa tara tumpaema toma toma a'wapa waiyegina, pi'n'a oka oka aboroma agutaye. Piya, pi ntawama nka'yenkapo maga maga kina'miba naigina, kamparagaenawaipa maegasima kaba itakiye. ³ Piya, pi kumatiba kaikenenaenaba to kapa kampa aborakiye.

Piya, pi kumapintiba Kotige sipisipi awarowampage isiyemu yabaewama waiyekini, kayokaya kina'wampiba agisuma mikibewe. ⁴ Piya, igeba aogawapa agama miyigina, i'nera ae ageba aborama waikiye. ⁵ Piya, pi kumatapa kampa toba ase ukiye. Kampaye. Pi kumatasra kina'miba kanepe pape kampa aguyosagainga, Wa'ega Koti aebe arakenae-nawaipa mikiye. Aibekini, igeba asi nasiba wa'ega kina kanta puma miyaba mikibewe.

Isu kanakena kamanane

⁶ Pigoya, pi enisorewamaba mayama unamintiye: Pi abempe kamana pipa kampa antage'ena puma, pipa tagataka'yane. Piya, Wa'ega Koti, poropete kina uwaitanti'na, aebe enisorewapa otagina tumpa kayokaya kina'wapa agarlo nkaborakibintanaba iyakegini agawe. ⁷ Piya, abo. Naeba agarosama kanakuwe, iyema unamoga abintuwe. Piya, ka'waina ma nkisapi kaeyo kamana, Koti nkawamupisa kamanapa aegarami'naba, aebe a'muntanabi mpikkiye.

⁸ Pigoya, nae Yonina, pintana agama abiwaentuwe. Piya agama abiwaemagi, naeba nayakinti enisorewama nkagisabi parokaema agisukena puwagana, ⁹ aebe maya unamintiye: Kampaye. Kaeba piyaba a-po. Piya, naebe, kaebe, poropete kaokinape, ma nkisapisra kamana wasiye kinape, taeba ka yuga pompene. Kaeba Kotitimanra agiso, untiye. ¹⁰ Piya, to ka maya unamintiye: Kaeba ma nkisapisra Koti nkawamupisa kamanapa a-nkasaema akumpa'ma miyo. Kampaye. Piya, pi kamana'ama nka'wa aborakena kana'wapa ago agarosaye. ¹¹ Pi kana'wakaba ataena pe'nagiba ataena pikena puntanaba peno. I'nintana pe'nagiba i'nintana pukena puntanaba peno. Piya, arupuyena pe'nagiba arupuyena pukena puntanaba peno. Aota miye'nagiba aota mikena puntanaba aota miyeno, untiye.

¹² Abo. Naeba agarosama kanamagi, antota'enanentaga irosa'magi, a'ya'ma wasana pentanawaika ikankaipa ka'masa puma a'wae puma imikuwe, iye. ¹³ Piya, naeba paitanta yagara mite aintisa yagara mite puma, marusabe atutasabe a'ya'maenama nkagonawе, piya untiye.

¹⁴ Piya, itasaenaba wani nkaema aebarupa'nagiba, igeba i'muntanabi mpikbewe. Piya pe'nagipa uwaitakin i'e'wasaena maekena yawamankapa namagini, pi kuma'ama kabirasa wama antabaipinti ubasigina kanarasano. ¹⁵ We, yaga kara kanta pe kinape, kyo'ena pe kinape, kumiyyena pe kinape, wasana iyeguye kinape, ama koti nkagise kinape, a'ya'ma kumpari'ena ibugagina aega'ma pe kinape, igeba Koti kuma'ama nkabe'i mikibewe, piya untiye.

¹⁶ Piya: Naeba Isuna, naeba enisorene agarubaogana monota ai'aru pe kina'mititi wama ma nkawaga kamanapa uma aborarimiye. Piya, naeba Tebiti tupisa ago ai'ne nawe. Naeba abayara e'wasa nori nawe, piya untiye.

¹⁷ Pigoya, Awamus'aamage sipisipi awaroma nkxae'mage: Kanao, untase. Wasana ma kamana abi'naba: Kanao, yeno. Piya, wanika abemi'naba aebe kanano. Eya, e'wasaena maekena wanika abemi'naba aebe kanama e'wasa wanipa uwa ampaema nano.

Nagarikena kamanane

¹⁸ Pigoya, wasanami ma nkisapisra Koti nkawamupisa kamanapa abe'nagipa, naeba esegi kamana maya urimuwe: Piya, ka'waina ma kamana ka'isa to kamana atokaekibipa, Kotiba ma nkisapisra wasana ata puwaitakena kamana'ama nkau'wapa aeti atokaetakiye. ¹⁹ Piya, to ka'waina ma nkisapisra Koti nkawamupisa kamanatasra ka'isa maegaikibemipa, aogi antota'enawapa Kotiba maegaikkiye. Eya, e'wasaena maekena yagabe, aota kumakabe unti nkantota'enawapa maegaikkiye.

²⁰ Pigoya, ma kamana uma aborama: Taga, tagane, yika, aebe: Karu'ena kanakuwe, iye. Eya, Wa'ega Isu kaeba karu'ena kanao.

²¹ Pigoya, Wa'ega Isu nkawagaenawampa a'ya'ma tigeti waima waiyeno. Tagane.